


हरियाणवी बाइबलि



The Holy Bible in the Haryanvi Language of India

हरियाणवी बाइबिल

The Holy Bible in the Haryanvi Language of India

Copyright © 2021 The Love Fellowship

Language: हरियाणवी (Haryanvi)

Contributor: The Love Fellowship

Read and download Bible and several other Christian materials in various formats :
www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 26 Jul 2024 from source files dated 9 Apr 2023
58901dbd-3931-5bbb-bd57-5dfafb882aee

Contents

मत्ती	1
मरकुस	51
लूका	86
यूहन्ना	141
परिचितों के काम	183
रोमियों	234
1 कुरिन्थियों	259
2 कुरिन्थियों	284
1 गलातियों	299
इफिसियों	309
फिलिप्पियों	318
कुलुस्सियों	324
1 थिस्सलुनीकियों	330
2 थिस्सलुनीकियों	336
1 तीमुथियुस	340
2 तीमुथियुस	347
तीतुस	352
फिलेमोन्	356
इब्रानियों	358
याकूब	376
1 पतरस	382
2 पतरस	389
1 यूहन्ना	394
2 यूहन्ना	401
3 यूहन्ना	403
यहूदा	405
प्रकाशित वाक्य	408

मत्ती के जरिये लिख्या गया सुसमाचार

??????

मत्ती के जरिये लिख्या गया सुसमाचार यो सन्देश देवै सै, के यीशु मसीह ए वो उद्धारकर्ता सै, जिसके आण की भविष्यवाणी करी गई थी। परमेसवर नै पुराणे नियम हजारों साल पैहले अपणे माणसां तै करे गए करार ताहीं उससे उद्धारकर्ता के जरिये पूरा करया। यो सन्देश सिर्फ यहूदी माणसां खात्तर ए कोनी, जिन म्ह यीशु पैदा होया अर पाळा-पोस्या गया, पर सारी दुनिया खात्तर सै।

वर्णन सै। इसकै बाद इस सुसमाचार म्ह यीशु की गलील परदेस तै यरुशलेम नगर तक का सफर अर यीशु मसीह की जिन्दगी के आखरी हफ्तै का वर्णन सै, जिस म्ह उसका क्रूस पै चढ़ाया जाणा अर दुबारा जिन्दा हो जाणा सै।

इस सुसमाचार म्ह यीशु मसीह ताहीं एक महान गुरु के रूप म्ह पेश करया गया सै। उस ताहीं परमेसवर के नियम-कायदा ताहीं व्याख्या करण का हक सै अर वो परमेसवर के राज्य की शिक्षा देवै सै। उसकी शिक्षा ताहीं पाँच भागगां म्ह बाटघा जा सकै सै: (1) पहाड़ी उपदेश, जो सुर्ग के नागरिकां के चरित्र, फर्ज, खास अधिकार, अर आखरी उम्मीद तै सै (पाठ 5-7); (2) बारहा चेल्यां ताहीं सेवकाई करण की शिक्षा देणा (पाठ 10); (3) सुर्ग के राज्य तै सम्बन्धित उदाहरण (पाठ 13); चेल्यां तै सम्बन्धित शिक्षाएँ (पाठ 18); (5) सुर्ग राज्य के आगमन अर आण आळे युग तै सम्बन्धित शिक्षाएँ (पाठ 24-25)

रूप-रेखा

पीढ़ी अर यीशु मसीह का जन्म 1:1-2:23

यूहन्ना बपतिस्मा देण आळा के सेवा के काम 3:1-12

यीशु का बपतिस्मा अर उसका इम्तिहान 3:13-4:11

गलील परदेस म्ह यीशु के जरिये माणसां की सेवा 4:12-18:25

गलील परदेस तै यरुशलेम नगर तक सफर 19:1-20:34

यरुशलेम नगर म्ह आखरी हफता 21:1-27:66

प्रभु यीशु का दुबारा जिन्दा हो जाणा अर उसका दिखाई देणा 28:1-20

???? ?? ?????

(???? 3:23-38)

1 ये यीशु मसीह के पूर्वजां के नाम सै। वो राजा दाऊद का वंशज था, अर राजा दाऊद अब्राहम का वंशज था।

2 अब्राहम का बेटा इसहाक था, अर इसहाक का बेटा याकूब था, फेर याकूब तै यहूदा अर उसके भाईयाँ का जन्म होया।

3 यहूदा के बेटे फिरिस अर जोरह थे। (फिरिस अर जोरह की माँ का नाम तामार था।) फिरिस का बेटा हिस्रोन था। हिस्रोन का बेटा एराम था,

4 एराम का बेटा अम्मीनादाब था। अम्मीनादाब तै नहशोन, अर नहशोन तै सलमोन का जन्म होया,

5 सलमोन का बेटा बोआज था। (बोआज की माँ का नाम राहाब* था।) बोआज अर रुत तै ओबेद का जन्म होया, अर ओबेद का बेटा यिशै था।

6 अर यिशै का बेटा राजा दाऊद था। (राजा सुलैमान दाऊद का बेटा था।) जो उस बिरबान्नी तै जन्मा था जो पैहले उरिय्याह की घरआळी थी,

* 1:5 1:5 तामार, राहाब, रुत, बेतसीबा गैर जात की थी

7 सुलैमान का बेटा रहबाम था। अर रहबाम का बेटा अबिय्याह था। अर अबिय्याह तै आसा का जन्म होया।

8 आसा का बेटा यहोशाफात था। फेर यहोशाफात तै योराम अर योराम तै उज्जियाह का जन्म होया।

9 उज्जियाह का बेटा योताम था अर योताम, आहाज का। फेर आहाज तै हिजकिय्याह का जन्म होया।

10 हिजकिय्याह तै मनशिशह का जन्म होया। मनशिशह का बेटा आमोन था, अर आमोन तै योशिय्याह का जन्म होया।।

11 फेर इस्राएल के माणसां नै कैदी बणाकै बेबीलोन देश ले जाण के बखत योशिय्याह तै यकुन्याह, अर उसके भाईयां का जन्म होया।

12 बेबीलोन देश म्ह पोहचाये जाये पाच्छै यकुन्याह तै शालतियेल का जन्म होया, फेर शालतियेल तै जरुब्बाबिल का जन्म होया।

13 जरुब्बाबिल तै अबीहूद का जन्म होया, अबीहूद तै एलयाकीम का अर एलयाकीम तै अजोर का जन्म होया।

14 अजोर का बेटा सदोक था। सदोक तै अखीम अर अखीम तै इलीहूद का जन्म होया।

15 इलीहूद का बेटा इलियाजार था। अर इलियाजार मत्तान का। मत्तान का बेटा याकूब था।

16 अर याकूब तै यूसुफ का जन्म होया, जो मरियम का धणी था। अर मरियम तै यीशु जो मसीह कुह्वावे सै, पैदा होया।

17 इस तरियां अब्राहम तै दाऊद तक चौदहा पीढी होई, अर दाऊद तै लेके इस्राएलियां नै कैदी बणाकै बेबीलोन देश भेज्जे जाण तक चौदहा पीढी, अर इस्राएलियां कैदी बणाकै बेबीलोन देश म्ह भेज्जे जाण के बखत तै मसीह तक चौदहा पीढी और होई।



18 यीशु मसीह का जन्म इस तरियां होया, कै जब उसकी माँ मरियम की सगाई यूसुफ के गैल होगी, तो उनका ब्याह होण तै पैहल्याए बेरा पाट्या के वा पवित्तर आत्मा की शक्ति तै गर्भवती सै।

19 पर उसका धणी यूसुफ जो एक धर्मी माणस था, उसनै बदनाम न्ही करणा चाहवै था, इस खात्तर उस ताहीं चुपके तै छोड़ण का विचार करया।

20 जब वो इन बाततां नै सोचवै ए था तो परमेसवर का सुगंदूत उसनै सपने म्ह आके कहण लागया, “हे यूसुफ! दाऊद के वंशज, तू अपनी घरआळी मरियम नै अपने उरै ल्याण तै ना डरै, क्यूँके जो उसकी कोख म्ह सै, वो पवित्तर आत्मा की ओड़ तै सै।

21 वो बेटा जायैगी अर तू उसका नाम यीशु धरिये, क्यूँके वो अपने माणसां का उनके पापां तै उद्धार करैगा।”

22 यो सारा इस खात्तर होया के जो वचन प्रभु नै यशायाह नबी के जरिये कहा था, वो पूरा हो

23 देखो एक कुँवारी गर्भवती होगी अर एक छोरा जण्येगी, अर उसका नाम इम्मानुएल धरया जावैगा, जिसका मतलब सै “परमेसवर म्हारै गैल सै।”

24 फेर यूसुफ नींद तै जाग के परमेसवर के सुगंदूत के हुकम के मुताबिक मरियम नै अपनी घरआळी बणाकै अपने याडै ले आया।

25 अर जब ताहीं उसने छोरा ना जणया जब तक यूसुफ उसके धोरै न्ही गया अर उसने बाळक का नाम यीशु धरया।



1 हेरोदेस राजा जब यहूदिया परदेस पै राज करण लागरया था, तो उस परदेस के बैतलहम नगर म्ह यीशु का जन्म होया। तो थोड़े बखत बाद कई विद्वान जो तारा का ज्ञान राखै थे, पूरब तै यरुशलेम नगर म्ह आये।

2 वो आकै बुद्धिण लागगे, यहूदियाँ का राजा जिसका जन्म होया सै, वो कित्त सै? हमनै पूरब दिशा म्ह उसका तारा देख्या सै, जो उसके जन्म के बारे म्ह बतावै सै, इस करकै हम उसकी आराधना करण आये साँ।

3 यो सुणकै हेरोदेस राजा अर उसकै गैल यरुशलेम नगर के सारे लोग चिन्ता करण लागगै।

4 फेर उसनै माणसां के सारे प्रधान याजकां अर शास्त्रियाँ ताहीं कट्टा करके उनतै बुद्धिया, के पवित्र ग्रन्थ के कहवै सै? “मसीह का जन्म कित्त होणा चाहिये?”

5 उननै उस ताहीं कह्या, “यहूदिया परदेस के बैतलहम नगर म्ह,” क्यूँके नबियाँ के जरिये योए पवित्र ग्रन्थ म्ह लिख्या गया सै:

6 “हे बैतलहम नगर, तू जो यहूदा के परदेस म्ह सै, तू किसे भी ढाळ तै यहूदा के अधिकारियां म्ह सारा तै छोट्टा कोन्या। क्यूँके तेरे म्ह तै एक राजा लिकडैगा, जो मेरी प्रजा इस्राएल की रुखाळी करैगा।”

7 हेरोदेस जाणणा चाहवै था के उस बाळक की उमर कितनी सै, इस करके उसनै तारा का ज्ञान राखण आळा ताहीं लुह्क्मा बुलाके उनतै बुद्धिया के तारा ठीक किस बखत दिख्या था।

8 अर राजा नै यो कहकै उन ताहीं बैतलहम नगर भेज्जा, “जाओ, उस बाळक के वारें म्ह ठीक-ठाक बेरा पाडो, अर जब वो मिल ज्या तो मन्ने खबर द्यो, ताके मै भी आणके उसकी आराधना करूँ।”

9 वे राजा की बात सुणकै चले गए, अर जो तारा उननै पूरब दिशा म्ह देख्या था, वो उनकै आगगै-आगगै चाल्या। अर जडै बाळक था, उस घर के उप्पर जाके रुक गया।

10 उस तारे नै देखकै वे घणे आनन्दित होए, जो उस घर के उप्पर रुक गया था।

11 उननै उस घर म्ह जाके उस बाळक ताहीं उसकी माँ मरियम के गैल देख्या, अर झुकके बाळक की आराधना करी, अर अपना-अपना झोळा खोल के उस ताहीं सोन्ना, लोबान, अर गन्धरस की भेट चढाई।

12 फेर सपनै म्ह परमेसवर नै या चेतावनी दी के हेरोदेस राजा के धोरै फेर ना जाइयो, वे राजा ताहीं बिना बताये दुसरे राह तै अपने देश म्ह चले गये।

????? ???? ???? ???? ???? ?

13 विद्वानां के चले जाणके बाद परमेसवर के एक सुगंदूत नै सपनै म्ह आकै यूसुफ तै कह्या, “उठ! उस बाळक नै अर उसकी माँ नै लेके मिस्र देश म्ह भाग ज्या। अर जब ताहीं मै तेरे तै ना कहूँ, जब ताहीं ओड़ै रहिये। क्यूँके हेरोदेस राजा इस बाळक नै टोहकै उस ताहीं उसनै मरवाणा चाहवै सै।”

14 फेर वो रात नै ए उठके बाळक अर उसकी माँ नै लेके मिस्र देश नै चाल पड्या।

15 अर हेरोदेस राजा के मरण तक ओड़ैए रह्या। ताके वो वचन जो प्रभु नै होशे नबी के जरिये कह्या था वो पूरा हो “मन्ने अपने बेट्टै ताहीं मिस्र देश तै बुलाया।”

???????? ? ? ???? ???? ???? ???? ???? ???? ?

16 जब हेरोदेस राजा नै यो देख्या, के विद्वानां नै उसके गैल धोक्खा करया सै, फेर वो छो म्ह भरग्या। उसनै सैनिकां ताहीं भेजके विद्वानां के जरिये ठीक-ठाक बताये होइ बखत के मुताबिक बैतलहम नगर अर उसके लोवै-धोवै की जगहाया के सारे छोरयां ताहीं जो दो साल के या उसते छोट्टे थे, वे सब मरवा दिए।

17 फेर जो वचन यिर्मयाह नबी के जरिये कह्या गया था, वो पूरा होया,

18 “रामाह नगर म्ह एक रोण की आवाज सुणाई देई, रोणा अर घणाए विलाप।

राहेल अपने बाळकां के खातर रोवै थी, अर चुप न्ही होणा चाहवै थी, क्यूँके वे इब मरगे थे।”

२२२२२ २२२ २२ २२२२

19 हेरोदेस राजा के मरण के पाच्छे, परमेसवर का सुर्गदूत मिस्र देश म्ह यूसुफ तै सपनै म्ह बोल्या, 20 "उठ, बाळक अर उसकी माँ नै लेके इस्राएल के देश म्ह चल्या ज्या, क्यूँके हेरोदेस राजा अर उसके माणस जो बाळक नै मारणा चाहवै थे, वे मर लिये सै।"

21 यूसुफ नींद तै जाड़ा, अर बाळक अर उसकी माँ नै गेल्या लैके इस्राएल देश म्ह बोहड़ आया।

22 पर या सुणके के अखिलाउस अपणे पिता हेरोदेस राजा की जगहां यहूदिया परदेस पै राज करै सै, ओड़ै जाण तै डरग्या। फेर सपनै म्ह परमेसवर की ओड़ तै चेतावनी पाके गलील परदेस म्ह चल्या गया।

23 अर नासरत नाम कै नगर म्ह जा बस्या, ताके वो वचन पूरा हो, जो नबियाँ कै जरिये यीशु के बारे कह्या गया था: "वो नासरी* कुह्यावैगा।"

3

२२२२२२२ २२२२२२२२ २२२ २२२

(२२ 1:1-8; २२२२ 3:1-18; २२२ 1:6-8,15-34)

1 उन दिनां म्ह यूहन्ना बपतिस्मा देण आळा आके यहूदिया परदेस के जंगल-बियावान म्ह यो प्रचार करण लाग्या:

2 "पाप करणा छोड़ दो, क्यूँके सुर्ग का राज्य धोरै आ लिया सै।"

3 यो वोए सै, जिसका जिक्र यशायाह नबी के जरिये करया गया: "जंगल-बियावान म्ह तै ए कोए रुक्का देवै सै, के प्रभु का राह तैयार करो अर उसकी सड़क सीध्नी करो।"

4 यूहन्ना ऊँट के रूए के लत्ते पहरणीया अर अपणी कड़ म्ह चमड़े की पेट्टी-बाँधे रहवै था। उसका खाणपान टिड्डियाँ अर शहद था।

5 फेर यरुशलेम नगर अर सारे यहूदिया परदेस अर यरदन नदी के लोवै-धोवै की सारी जगहां के माणस उसके धोरै आ गये।

6 उन सारया नै अपणे-अपणे पापां नै मानके यरदन नदी म्ह उसतै बपतिस्मा लिया।

7 जिव उसनै घणे सारे फरीसियाँ अर सद्कियाँ ताहीं अपणे धोरै बपतिस्मा लेण खात्तर आन्दे देख्या, तो बोल्या, "हे साँप के सप्पोलों जिसे माणसाँ, थम नरक की सजा तै किस ढाळ बचोगे?"

8 इस खात्तर जै थमनै सच म्ह पाप करणा छोड़ दिया सै तो यो दिखाण खात्तर भले काम तो करो।

9 अर अपणे-अपणे मन म्ह न्यू मतना सोच्चो के म्हारा पिता अब्राहम सै। क्यूँके मै थमनै कहुँ सूँ के परमेसवर इन पत्थरां तै अब्राहम के खात्तर ऊलाद पैदा कर सके सै।

10 इब कुहाड़ा दरखतां की जड़ पै धरया सै, इस करके जो-जो दरखत बढ़िया फळ न्ही ल्यांदा, वो काटया अर आग म्ह झोक्या जावैगा। इसका मतलब यो सै परमेसवर उन सारया नै दण्ड देवैगा जो पाप करणा न्ही छोड़ते।

11 "मै तो थमनै पाणी तै, पापां ताहीं छोड़ण का बपतिस्मा देऊ सूँ, पर जो मेरै पाच्छे आवैगा, वो मेरै तै भी शक्तिशाली सै। मै उसकी जूत्ती ठाण जोगगा भी कोनी। वो थमनै पवित्र आत्मा अर आग तै बपतिस्मा देवैगा।

12 उसका छाज उसके हाथ म्ह सै, अर वो अपना खलिहाण आच्छी तरियां साफ करैगा, अर अपणे नाज नै अपणे कोठार (गोदाम) म्ह कटटा करैगा, पर भुरळी ताहीं उस आग म्ह जळावैगा जो कदे बुझै कोनी।"

२२२२२२२ २२ २२२२२ २२२२ २२ २२२२२२२२

(२२ 1:9-11; २२२२ 3:21,22; २२२ 1:31-34)

13 उस बखत यीशु गलील परदेस तै यरदन नदी के कन्टारे यूहन्ना के धोरै उसतै बपतिस्मा लेण आया।

* 2:23 2:23 नासरत नगर का रहण आळा

14 पर या कहके यूहन्ना उसनै रोक्कण लाग्या, “कै मन्नै तो तेरे हाथ तै बपतिस्मा लेण की जरूरत सै, अर तू मेरै धोरै आया सै?”

15 यीशु नै उसतै जवाब दिया, “कै इब तो योए होण दे, क्यूँ कै हमनै इस्से तरियां तै सारी धार्मिकता पूरी करणा ठीक सै।” फेर उसनै उसकी बात मान ली।

16 अर यीशु बपतिस्मा लेके जिब पाणी तै उप्पर आया, अर अकास खुलग्या, अर उसनै परमेसवर की पवित्र आत्मा ताहीं कबूतर की तरियां उतरते अर अपणे उप्पर आन्दे देख्या।

17 अर देख्खो, परमेसवर सुर्ग म्ह तै बोल्या, “कै यो मेरा प्यारा बेट्टा सै, जिसतै मै भोत घणा राज्जी सूँ।”

4

CHAPTER 4

(**MT** 1:12-13; **MT** 4:1-13)

1 बपतिस्मे के बाद पवित्र आत्मा यीशु नै जंगल-बियाबान म्ह लेग्या, ताके शैतान* उस ताहीं परखै।

2 वो चाळीस दिन अर चाळीस रात, बिना खाए पिए रह्या, फेर उसनै भूख लाग्गी।

3 फेर शैतान नै धोरै आणके उसतै कह्या, “जै तू परमेसवर का बेट्टा सै, तो कहके साबित करदे, के ये पत्थर रोट्टी बण जावै, ताके तू इननै खा सकै।”

4 यीशु नै जवाब दिया: “पवित्र ग्रन्थ म्ह लिख्या सै, माणस सिर्फ रोट्टी तै ए न्ही, पर परमेसवर के हरेक वचन तै जो उसनै मान्नै सै, जिन्दा रह्येगा।”

5 फेर शैतान उसनै पवित्र नगर यरुशलम म्ह लेग्या अर मन्दर की चोट्टी पै खड्या कर दिया।

6 अर उसतै बोल्या, “जै तू परमेसवर का बेट्टा सै, तो अपणे-आपने तळे गेर के साबित कर। क्यूँके पवित्र ग्रन्थ म्ह लिख्या सै: वो तेरे बाबत अपणे सुर्गदूतां नै हुकम देगा, अर वे तन्नै हाथों हाथ उठा लेवैगें कदे इसा ना हो के तेरे पायां म्ह पत्थर तै ठेस लाग्गै।”

7 यीशु नै उसतै कह्या, “यो भी पवित्र ग्रन्थ म्ह लिख्या सै, के तू अपणे प्रभु परमेसवर नै ना परखै।”

8 फेर शैतान उसनै घणे ऊँचे पहाड़ पै लेग्या अर सारी दुनिया का राजपाट अर उसकी शानों-शोकत दिख्वाके,

9 उसतै बोल्या, “जै तू झुकके मेरी भगति करै, तो मै सारा किमे तन्नै दे दियुँगा।”

10 फेर यीशु उसतै बोल्या, “हे शैतान दूर हो ज्या, पवित्र ग्रन्थ म्ह लिख्या सै: तू प्रभु अपणे परमेसवर की भगति कर, अर सिर्फ उससे की सेवा करया कर।”

11 फेर शैतान उसके धोरै तै चल्या गया, अर देख्ये, सुर्गदूत आणके उसकी सेवा करण लाग्गे।

CHAPTER 4

(**MT** 1:14,15; **MT** 4:14-15,31)

12 जिब उसनै न्यू सुण्या के यूहन्ना केदी बणा लिया सै, तो वो यहूदिया परदेस तै लिकडके गलील परदेस म्ह चल्या गया।

13 अर फेर वो गलील परदेस के नासरत नगर नै छोड़के कफरनहूम नगर म्ह, जो गलील समुन्दर के किनारे था, कफरनहूम उस क्षेत्र म्ह गलील के समुन्दरी तट पै था, जडै जबूलून अर नप्ताली के गोत्र के माणस रहवै थे।

14 ताके जो यशायाह नबी के जरिये कह्या गया था, वो पूरा हो

15 “जबूलून अर नप्ताली जाति के परदेस, गलील समुन्दर के किनारे यरदन नदी के पार, गलील परदेस म्ह रहण आळे गैर यहूदी माणस”

* 4:1 4:1 शैतान ताहीं यूनानी भाषा इबलीस कहवै सै

16 “जो माणस अन्धकार म्ह जीण लागरे थे, उननै तेज चान्दणा देख्या। वे उस जगहां म्ह जीण लागरे थे, जित्त हर घडी मौत का खतरा था, उनपै चान्दणा चमक्या।”

17 उस बखत तै यीशु नै प्रचार करणा अर कहणा शरू करया, “पाप करणा छोड़ दो, क्यूँके सुर्ग का राज्य धोरै आया सै।”

~~~~~

18 गलील परदेस म्ह गलील समुन्दर के किनारे घूमदे होए उसनै दो भाईयाँ ताहीं शमौन जो पतरस कुह्वावै सै, अर उसके भाई अन्दरयास ताहीं समुन्दर म्ह जाळ गेरते देख्या, क्यूँके वे मछ्वारे थे।

19 यीशु नै उनते कहा, “मेरै पाच्छे, आओ, मै थमनै माणसां ताहीं कट्ठे करण आळे बणाऊंगा ताके वो मेरे चेल्ले बणे।”

20 वे जिब्वे जाळां नै छोड़के उसके चेल्ले बणण खात्तर उसके पाच्छे हो लिये।

21 ओड़ तै आगै चालके, यीशु नै दो और भाईयाँ ताहीं यानी जब्दी के वेट्टे याकूब अर उसके भाई यूहन्ना ताहीं देख्या। वे अपणे पिता जब्दी के गैल किस्ती पै अपणे जाळां ताहीं ठीक करै थे। यीशु नै उन ताहीं भी बुला लिया।

22 वे जिब्वे किस्ती अर अपणे पिता नै छोड़के उसके चेल्ले बणण खात्तर उसके पाच्छे हो लिये।

~~~~~

23 यीशु सारे गलील परदेस म्ह फिरता होया उनके आराधनालयों म्ह उपदेश सुणान्दा, अर राज्य का सुसमाचार सुणान्दा अर माणसां की हरेक ढाळ की बीमारी अर कमजोरियाँ नै दूर करदा रह्या।

24 अर सारे सीरिया परदेस म्ह उसका यश फैलग्या, अर माणस सारे बिमारां नै, जो कई ढाळ की बिमारियाँ अर दुखां तै जकड़ होए थे, जिन म्ह भुंडी आत्मा थी, अर मिर्घी आळे अर लकवे के रोगगी नै उसके धोरै ल्याए उसनै उन ताहीं ठीक करया।

25 अर गलील परदेस, दिकापुलिस नगर, यरुशलेम नगर, यहूदिया परदेस अर यरदन नदी के पार तै भीड़ की भीड़ उसके पाच्छे हो ली

5

~~~~~

1 यीशु उस भीड़ नै देखके पहाड़ पै चला गया, अर जब बैठग्या तो उसके चेल्ले उसके धोरै आए।

2 अर वो अपनी ऊँची आवाज म्ह उननै या शिक्षा देण लाग्या:

~~~~~

(~~~~~ 6:20-23)

3 “धन्य सै वे, जो या जाणे सै के उननै परमेसवर की जरूरत सै, क्यूँके सुर्ग का राज्य उननै का सै।

4 धन्य सै वे, जो शोक करै सै, क्यूँके वे परमेसवर तै शांति पावेंगे।

5 धन्य सै वे, जो नम्र सै, क्यूँके वे परमेसवर के जरिये धरती के हकदार होंगे।

6 धन्य सै वे, जो धार्मिकता का जीवन जीण खात्तर भूखे अर तिसाए सै, क्यूँके वे परमेसवर के जरिये छिकाए जावेंगे।

7 धन्य सै वे, जो दया करण आळे सै, क्यूँके परमेसवर भी उनपै दया करैगा।

8 धन्य सै वे, जिनके मन शुद्ध सै, क्यूँके वे परमेसवर नै देखेंगे।

9 धन्य सै वे, जो मेल करण आळे सै, क्यूँके वे परमेसवर के वेट्टा-वेट्टी कुह्वावेंगे।

10 धन्य सै वे, जो धार्मिकता के कारण सताए जावै सै, क्यूँके सुर्ग का राज्य उन्हे का सै।”

11 “धन्य सों थम, जिब माणस मेरै कारण थारी बुराई करै सतावै अर झूठ बोल-बोलके थारे विरोध म्ह सारी तरियां की बुरी बात फैलावै, क्यूँके थम मेरे चेल्ले सों।

12 फेर खुश अर मग्न होइयो, क्यूँके थारे खात्तर सुर्ग म्ह बड़ड़ा ईनाम सै। इस करके के उननै उन नबियाँ ताहीं भी इस्से ढाळ सताया था, जो थारे तै भी भोत पैहल्या थे।”

† 4:24 4:24 गलील परदेस के उत्तर दिशा म्ह सै

॥२२॥ ॥२३॥ ॥२३॥ ॥२३॥

(॥२३॥ 9:50; ॥२३॥ 14:34,35)

13 "थम धरती पै लोगगां खात्तर नूण की तरियां सों, पर जै नूण का सुवाद जान्दा रहवै, तो वो किस चीज तै नमकीन करया जावैगा? फेर वो किसे काम का न्ही, सिर्फ इसकै के बाहर फेक्या ज्या अर माणसां के पैरां तळै चिकल्या ज्या।"

14 "थम दुनिया के लोगगां खात्तर चांदणा की तरियां सों। जो नगर पहाड़ पै बस रह्या सै वो लुहक न्ही सकदा।

15 अर माणस दीवा जळ्हा कै बरतन कै तळै न्ही पर टांडी पै धरै सै, फेर उसतै घर के सारे माणसां ताहीं चान्दणा ज्या सै।

16 उससे तरियां थारा चान्दणा माणसां के स्याम्ही चमकै के वे थारे भले काम्मां नै देखकै थारे पिता की, जो सुर्ग म्ह सै बड़ाई करै।"

॥२३॥-॥२३॥ ॥२३॥ ॥२३॥

17 "या ना समझो, के मे मूसा के नियम-कायदा या नबियाँ के लेख नै मिटाण आया सूं, मिटाण न्ही, पर पूरा करण आया सूं।"

18 क्यूँके मै थमनै सच कहूँ सूं, के जब ताहीं धरती अर अकास सै, जद ताहीं नियम-कायदा म्ह लिखी हरेक छोट्टी तै छोट्टी बात पूरी होए बिना न्ही रहवैगी।

19 इस करके जो कोए इन छोट्टे तै छोट्टे हुकम म्ह तै किसे एक नै भी न्ही मानता, अर दुसरे माणसां नै भी उसाए सिखावै, वो सुर्ग के राज्य म्ह सारा तै छोट्टा कुह्हावैगा, पर जो कोए उन सारे हुकमां पै चाल्लैगा अर उननै सिखावैगा, वोए सुर्ग राज्य म्ह महान् कुह्हावैगा।

20 क्यूँके मै थमनै कहूँ सूं, के जै थारा आत्मिक जीवन शास्त्रियाँ अर फरीसियाँ के आत्मिक जीवन तै बढ़कै न्ही हो, तो थम सुर्ग के राज्य म्ह कदे बड़ न्ही पाओगें।"

॥२३॥ ॥२३॥ ॥२३॥

21 "थमनै सुण्या होगा, के थारे पूर्वजां तै कह्या, गया था के 'खून ना करियो', अर 'जो कोए खून करैगा वो कचेहड़ी म्ह दण्ड के लायक होगा।'

22 पर मै थमनै या कहूँ सूं, के जो कोए अपणे भाई पै गुस्सा करैगा, वो कचेहड़ी म्ह दण्ड के लायक होगा, अर जो कोए अपणे भाई नै निकम्मा कहवैगा वो बड्डी सभा म्ह दण्ड के लायक होगा, अर जो कोए कहवै 'अरै बेकूफ' वो नरक की आग के दण्ड के लायक होगा।"

23 "इस करके जै तू अपणा चढ़ावा मन्दर म्ह वेदी† पै चढ़ावै, अर ओड़ै तू याद करै, के तेरे भाई के मन म्ह तेरे खात्तर किमे बिरोध सै,

24 तो तू अपणा चढ़ावा ओड़ै वेदी के धोरै छोड़दे, अर ज्याकै अपणे भाई तै मेळ-मिलाप कर अर फेर आकै अपणा चढ़ावा चढ़ा।"

25 "जिब तक तू अपणे बैरी के गेल्या राह म्ह सै, तो उसतै जिब्वे मेळ-मिलाप करले, कदे इसा ना हो के बैरी तन्नै न्यायाधीश के हवालै, अर न्यायाधीश तन्नै सिपाही के हवालै करदे, अर तू जेळ म्ह गेर दिया जावै।

26 मै तन्नै सच कहूँ सूं के जिब ताहीं तू पाई-पाई न्ही भरदे जद ताहीं जेळ तै छुटण न्ही पावैगा।"

॥२३॥

27 "थमनै परमेसवर का हुकम सुण्या होगा के कह्या गया था, 'जारी ना करियो।'

28 पर मै थमनै न्यू कहूँ सूं, के जो कोए किसे बिरबान्नी पै भुंडी निगांह गेरै वो अपणे मन म्ह उसतै जारी करया।

29 जै तेरी सोळी आँख तेरे तै पाप करवावै सै, तो उसनै लिकाड़ के फेंक दे, क्यूँके तेरे खात्तर योए ठीक सै के तेरे अंगा म्ह तै एक नाश हो ज्या अर तेरी सारी देह नरक म्ह ना गेरी जावै।

* 5:17 5:17 (रोम-10:4) † 5:23 5:23 वेदी-परमेसवर ताहीं भेट चढ़ाण खात्तर एक जगहा

30 जै तेरा सोळा हाथ तेरे तै पाप करवावै सै, तो उसनै काट के फेंक दे, क्यूँके तेरे खात्तर योए आच्छा सै के तेरे बाक्की अंगा म्ह तै एक नाश हो जावै अर तेरी सारी देह नरक म्ह न्ही गेरी जावै।”

☞☞☞☞

(☞☞☞☞ 19:9,11,12; ☞☞☞☞ 16:18)

31 “थो भी कह्या गया था, ‘जो कोए अपनी घरआळी नै तलाक देणा चाहवै, तो उसनै तलाकनामा दे।’

32 पर मै थमनै यो कहुँ सूँ के जो कोए अपनी घरआळी नै जारी कै सिवा किसे और कारण तै तलाक दे, तो वो उसतै जारी करवावै सै। अर जो कोए उस छोड्डी होई तै ब्याह करै, वो जारी करै सै।”

☞☞☞ ☞☞ ☞☞☞☞☞☞

33 “फेर थमनै सुण्या होगा के थारे पूर्वजाँ तै कह्या गया था, ‘झूट्टी कसम ना खाईयो, पर प्रभु के खात्तर अपनी कसम नै पूरी करियो।’

34 पर मै थमनै या कहुँ सूँ के कदे कसम ना खाईयो, ना तो सुगं की, क्यूँके वो परमेसवर का सिंहासन सै।

35 ना धरती की, क्यूँके वा उसकै पैरां की पिड्डी सै, ना यरुशलेम नगर की, क्यूँके वो महाराजा का नगर सै।

36 अपने सिर की भी कसम ना खाईयो क्यूँके तू एक बाळ नै भी ना तो धोळा, अर ना काळा कर सकै सै।

37 पर थारी बात ‘हाँ’ की हाँ, या ‘ना’ की ना हो, क्यूँके जो किमे इसतै घणा होवै सै वो शैतान की ओड़ तै होवै सै।”

☞☞☞☞

(☞☞☞☞ 6:29,30)

38 “थमनै नियम-कायदा म्ह सुण्या होगा के कह्या था, आँख कै बदले आँख, अर दाँत कै बदले दाँत।

39 पर मै थमनै कहुँ सूँ के बुरे माणस तै झगड़ा मोल ना लियो, पर जो कोए तेरे सोळे गाल पै थप्पड़ मारै उस कान्ही दुसरा भी फेर दे।

40 जै कोए तेरे पै दाब देके तेरा कुड़ता लेणा चाहवै, तो उसनै अंगोच्छा भी दे दे।

41 जै कोए अधिकारी तन्नै एक कोस मुफ्त म्ह ले जावै, तो उसके गेल्या दो कोस चल्या ज्या।

42 जो कोए तेरे तै माँगै, उसनै दे, अर जो कोए तेरे तै उधार लेणा चाहवै, उसतै मुँह ना मोड़।”

43 “थमनै नियम-कायदा म्ह सुण्या होगा के कह्या गया था, अपने पड़ोसी तै प्यार राखिये, अर अपने बैरी तै बैर।

44 पर मै थमनै कहुँ सूँ के अपने बैरियाँ तै प्यार राक्खों अर अपने सतावण आळे के खात्तर प्रार्थना करो,‡

45 जिसतै थम अपने सुर्गीय पिता की सिध्द ऊलाद मान्ने जाओगे। क्यूँके वो भले अर बुरे लोगाँ पै अपना सूरज उगाया करै सै, अर धर्मी अर अधर्मी लोगाँ पै मिह बरसावै सै।

46 क्यूँके जै थम अपने प्यार करण आळा तै ए प्यार करो सों, तो कौण सा बड़ा काम करो सों? के चुंगी लेण आळे भी इसाए न्ही करदे?

47 जै थम अपने भाईयाँ नै ए नमस्कार करो, तो कौणसा बड़ड़ा काम करो सों? के गैर यहूदी भी इसाए न्ही करदे?

48 इस करके जरूरी सै के थम भी सिध्द बणो, जिसा थारा सुर्गीय पिता सिध्द सै।”

6

☞☞☞ ☞☞ ☞☞☞☞☞☞ ☞☞☞☞☞☞☞☞

1 “चौक्कस रहो! थम माणसां नै दिखाण कै खात्तर धर्म के काम* ना करो, न्ही तो अपणे सुर्गीय पिता तै कुछ भी ईनाम न्ही पाओगे।”

2 “इस करकै जिब तू दान करै, तो अपणे आगुँ दिंडोरा ना पिटवाईये, जिसा कपटी, आराधनालयों अर गळियाँ म्ह करै सै, ताके माणस उनकी बड़ाई करै। मै थारे ताहीं साच्ची कहूँ सूँ के उननै अपणा ईनाम माणसां की बड़ाई के रूप म्ह पा लिया।

3 पर जिब तू दान करै, तो उसका किसे और नै बेरा न्ही पाटणा चाहिए।

4 ताके तेरा दान छिया रहवै, अर जिब तेरा पिता जो गुप्त म्ह देखै सै, तन्नै ईनाम देवैगा।”

????????

(???? 11:2-4)

5 “जिब तू प्रार्थना करै, तो कपटियाँ के तरियां ना हो, क्यूँके माणसां नै दिखाण खात्तर आराधनालयों म्ह अर सड़कां के मोड़ां पै खड़े होकै प्रार्थना करणा उननै आच्छा लागुँ सै। मै थमनै साच्ची कहूँ सूँ के उननै अपणा ईनाम माणसां की बड़ाई के रूप म्ह पा लिया।

6 पर जिब तू प्रार्थना करै, तो अपणी कोठड़ी म्ह जा, अर किवाड़ बन्द करकै अपणे पिता तै, जो गुप्त म्ह सै उसतै प्रार्थना कर। जद तेरा पिता, जो तेरे लुहूक के करे होए काम्मां नै देखै सै, तो तन्नै उनका ईनाम देवैगा।

7 प्रार्थना करदे बखत दुसरी जात्ता की तरियां बडबडाइये ना, क्यूँके वे समझै सै के उनकै एक बात के बार-बार बोल्लण तै उनकी सुणी जावैगी।

8 इस करकै थम उनकी तरियां ना बणो, क्यूँके थारा पिता थारे माँगण तै पैहल्याए जाणै सै के थारी के-के जरूरत सै।

9 इस करकै थम इस तरियां तै प्रार्थना करया करो

हे म्हारे पिता, तू जो सुर्ग म्ह सै, तेरा नाम पवित्तर मान्या जावै।†

10 तेरा राज्य आवै। तेरी इच्छा जिसी सुर्ग म्ह पूरी होवै सै, उसी धरती पै भी हो।

11 म्हारे दिन भर की रोटी आज हमनै दे।

12 ‘अर जिस तरियां हमनै अपणे कसूरवारां ताहीं माफ करया सै, उस्से तरियां तू भी म्हारे कसूरां नै माफ करदे।’

13 ‘अर म्हारे ताहीं परखै ना, पर बुराई‡ तै बचा, (क्यूँके राज्य, वीरता अर महिमा सदा तेरे ए सै।’ आमीन।)

14 ‘इस करकै जै थम माणसां के कसूर माफ करोगे, तो थारा सुर्गीय पिता भी थमनै माफ करैगा।

15 अर जै थम माणसां के कसूरां नै माफ न्ही करोगे, तो थारा पिता भी थारे कसूर माफ न्ही करैगा।”

????

16 “जिब थम ब्रत करो, तो कपटियाँ की तरियां थारे मुँह पै उदासी छाई ना रहवै, क्यूँके वे अपणा मुँह बणाई राखै सै, ताके माणस उननै ब्रती जाणै। मै थमनै साच्ची कहूँ सूँ के वे अपणा ईनाम माणसां की बड़ाई के रूप म्ह पा चुके।

17 पर जिब तू ब्रत करै तो अपणे सिर पै तेल लगा अर मुँह धो,

18 ताके माणस न्ही पर तेरा पिता तन्नै ब्रती जाणै। तेरा पिता जो तेरे उस गुप्त म्ह करे होए ब्रत नै देखै सै, तो तन्नै उनका ईनाम देगा।”

??????

(???? 12:33-34)

19 “अपणे खात्तर धरती पै धन कट्टा ना करो, जड़ै कीड़ा अर काई नाश करै सै, अर जड़ै चोर सेंध लगावै अर चौरै सै।

* 6:1 6:1 धार्मिकता के काम † 6:9 6:9 (लूका 11:2) ‡ 6:13 6:13 बुराई बुरे जैतान तै बचा

20 पर अपने खात्तर सुर्ग म्ह धन कट्टा करो, जडै ना तो कीडा अर ना काई नाश करै सै, अर जडै चोर ना सेंध लगावै अर ना चौरै सै।

21 क्यूँक जडै तेरा धन सै उडै तेरा मन भी लाग्या रहवैगा।”

~~~~~

(~~~~~ 11:34-36)

22 “देह का दीवा आँख सै इस करकै जै तेरी नजर सही सै तो तेरी सारी देह भी चाँदणे म्ह सै।

23 पर जै तेरी नजर खराब सै तो तेरी सारी देह भी अन्धेरे म्ह सै, इस कारण जो तू सोचवै सै के मै चाँदणे म्ह सूं, पर वो अन्धेरा हो, तो सोचकै देख वो अन्धेरा कितना बड्डा होगा!”

~~~~~

(~~~~~ 16:13; 12:22-31)

24 “कोए माणस दो मालिकां की सेवा एक बखत पै न्ही कर सकदा, क्यूँक वो एक तै बैर अर दुसरे तै प्यार राखवैगा, या एक तै मिल्या रहवैगा अर दुसरे नै छोट्टा जाणैगा। थम परमेसवर अर धन दोनुआ की सेवा न्ही कर सकदे।

25 “इस करकै मै थमनै कहूँ सूं के अपने जीवन के खात्तर या चिंता ना करियो के हम के खावांगे अर के पीवांगे, अर ना अपनी देह के खात्तर के पैहरांगे। के जीवन खाणे तै, के देह लत्यां तै बढ़कै कोन्या?

26 अकास के पछियाँ नै देखवों! वे ना बोवै सै, ना काटे सै, अर ना कुटले (गोदाम) म्ह कट्टा करै सै, फेर भी थारा सुर्गीय पिता उन ताहीं खुवावै सै। के थम पछियाँ तै घणे कीमती कोनी?

27 थारे म्ह कौण सै, जो चिंता करकै अपनी उम्र म्ह एक पल भी बढ़ा सकै सै?”

28 “अर लत्यां के खात्तर क्यूँ चिंता करो सों? जंगळी फूल्लां पै ध्यान करो के वे किस तरियां बढ़ै सै, वे ना तो मेहनत करै सै, ना लत्ते बणावै सै।

29 तोभी मै थारे तै कहूँ सूं के राजा सुलैमान भी, अपने सारे शानों-शोकत म्ह उन म्ह तै किसे के समान लत्ते पैहरे होए कोनी था।

30 इस करके जिब परमेसवर मैदान की घास नै इसी सुन्दरता देवै सै, जो आज सै अर काल वाड म्ह झोक्की जावैगी, तो हे विश्वास म्ह कमजोर माणसों, वो थारी चिन्ता क्यूँ न्ही करैगा?”

31 “इस करकै थम चिंता करके न्यू ना कहियो के हम के खावांगे, या के पीवांगे, या के पैहरांगे?

32 क्यूँक गैर यहूदी इन सारी चिज्जां की टोह म्ह रहवै सै, पर थारा सुर्गीय पिता जाणै सै के थमनै इन सारी चिज्जां की जरूरत सै, इस करके चिन्ता ना करो।

33 इस करके पैहल्या थम परमेसवर के राज्य की खोज करो अर पवित्तर जीवन जिओई, तो ये सारी चीज भी थमनै अपने-आप मिल ज्यागीं।*

34 इस करके काल की चिंता ना करो, क्यूँक काल का दिन अपनी चिंता आप कर लेवैगा, आज के खात्तर आज का ए दुख भतेरा सै।”

7

~~~~~

(~~~~~ 6:37,38,41,42)

1 “दुसरयां पै दोष ना लाओ न्ही तो लोग थारे पै भी दोष लगावेंगे।

2 क्यूँक जिस तरियां थम दुसरयां पै दोष लगाओ सों, उस्से तरियां परमेसवर भी थारे पै दोष लगावैगा, जिस तरियां तै थम दुसरयां का न्याय करो सों, उस्से तरियां थारा भी न्याय करया जावैगा।”

3 “तू क्यूँ अपने भाई की आँख के तिन्कै जिसी छोट्टी सी बुराई नै देखवै सै, अर अपनी आँख म्ह लट जिसी बड़ी बुराई तन्नै कोनी दिखदी?”

4 जिव तेरी-ए आँख म्ह लट सै, तो तू अपने भाई तै किस तरियां कहवै सै, “ल्या मै तेरी आँख तै तिन्का लिकाइ द्यु।”

5 इस करके हे कपटी, पैहल्या अपने जीवन की बड़ी बुराई नै दूर कर फेर तू अपने भाई नै आच्छी दाऊँ बुराई तै बचा सकैगा\*।

6 “उन माणसां ताहीं परमेसवर का वचन ना सुणाओ जो उस ताहीं सुणणा न्ही चाहन्दे। जै तू इसा करै सै तो पवितर चीज कुल्याँ के आगै अर मोत्ती सूअरां के आगै फैक्कण की ढाळ होगी, इसा न्ही हो के वे उननै पैरां तळै चिकलै अर उल्टके थमनै पाइले।”

\*\*\*\*\*

(\*\*\*\*\* 11:9-13)

7 “परमेसवर तै माँगो, तो वो थमनै देवैगा, टोव्होंगे तो थम पाओगे, खटखटाओ, तो थारे खात्तर खोल्या जावैगा।

8 क्यूँके जो कोए माँगै सै, उसनै मिलै सै, अर जो टोह्वँ सै, वो पावै सै, अर जो खटखटावै सै, उसके खात्तर खोल्या जावैगा।”

9 “थारे म्ह तै इसा कौण माणस सै, के जै उसका बेट्टा रोटी माँगै, तो वो उसनै पत्थर देवै?

10 या मच्छी माँगै, तो उसनै साँप देवै?

11 इस करके जिव थम बुरे होके, अपने बाळकां नै आच्छी चीज देणा जाणो सों, तो थारा सुर्गीय पिता अपने माँगण आळा नै आच्छी चीज क्यूँ न्ही देवैगा?†

12 इस कारण जो किमे थम चाहो सों के माणस थारे गेल्या करै, थम भी उनके गेल्या उसाए करो, क्यूँके नियम-कायदे अर नबियाँ की शिक्षा याए सै।”

\*\*\*\*\*

(\*\*\*\*\* 13:24)

13 “थम परमेसवर के राज्य म्ह भीड़ै फाटक तै ए दाखल हो सको सों, क्यूँके चौड़ा सै वो फाटक अर सीध्या सै वो रास्ता जो नाश नै पोहच्यै सै, अर घणेए सै जो उस म्ह दाखल होवै सै।

14 क्यूँके भीड़ा सै वो फाटक अर मुश्किल सै वो राह जो अनन्त जीवन की ओइ पुहचावै सै, अर भोत थोड़े सै वे लोग जो उसनै पावै सै।”

\*\*\*\*\*

15 “झूट नबियाँ तै चौक्कस रहा, जो भेड़डां के भेष म्ह थारे धोरै आवै सै, पर भित्तर तै वे पाडण आळे भेड़िये सै।

16 उनके काम्मां तै ए थम उन ताहीं पिच्छाण ल्योगे। के माणस झाड़ियाँ तै अंगूर, या झाड़ बोझड़े तै अजीर तोड़ै सै?

17 इस तरियां हरेक आच्छा दरखत आच्छा फळ ल्यावै सै अर निकम्मा दरखत बुरा फळ ल्यावै सै।

18 आच्छा दरखत बुरा फळ न्ही ल्या सकदा, अर ना निकम्मा दरखत आच्छा फळ ल्या सकै सै।

19 जो-जो दरखत आच्छा फळ न्ही ल्यान्दा, वो काटचा अर आग म्ह गेरया ज्या सै, उससे तरियां झूट नबियाँ के गैल भी इसाए होवैगा।

20 झूट नबियाँ नै उनके काम्मां तै थम उन ताहीं पिच्छाण ल्योगे।”

21 “जो मेरै तै, हे प्रभु! हे प्रभु! कहवै सै, उन म्ह तै हर एक सुर्ग के राज्य म्ह दाखल न्ही होगा, पर वोए दाखल होगा जो मेरै सुर्गीय पिता की मर्जी पे चाल्ले सै।

22 न्याय के दिन घणखरे-ए माणस मेरै तै कहवैगें, ‘हे प्रभु, हे प्रभु, के हमनै तेरे नाम तै भविष्यवाणी न्ही करी, के हमनै तेरे नाम तै ओपरी आत्म्याँ ताहीं न्ही लिकाइचा, अर तेरे नाम तै घणेए अचम्भे के काम न्ही करे?’

\* 7:5 7:5 पैहले अपनी आँख म्ह तै लट लिकाइ ले फेर तू अपने भाई की आँख का तिन्का दाऊँ तरियां देखके लिकाइ सकैगा।

† 7:11 7:11 (लूका 11:13)

23 फेर मै उनतै खुलकै कह दियुँगा, मन्नै थारे ताहीं कदे न्ही अपणाया । हे भुन्डे काम करण आळो, मेरै धोरै तै चले जाओ ।”‡

¶¶¶¶¶¶ ¶¶ ¶¶¶¶¶¶ ¶¶¶¶

24 “इस करके जो कोए मेरी इन बाततां नै सुणकै उननै मान्नै सै, वो उस अकलमंद माणस की ढाळ होगा जिसनै अपणे घर की नीम चट्टान पै धरी ।

25 अर मिह बरसया, बाढ़ आयी, आँधी आई, अर उस घर तै टकराई, फेर भी वो कोनी गिरया, क्यूँके उसकी नीम चट्टान पै धरी गयी थी ।

26 पर जो कोए मेरी ये बात सुणै सै अर उनपै न्ही चाल्दा, वो उस बेकूफ माणस की ढाळ सै, जिसनै अपणे घर की नीम बाळूरेत पै धरी ।

27 अर मिह बरसया, बाढ़ आयी, आँधी चाल्ली, अर उस घर तै टकराई अर पड़कै उसका सत्यानाश होगया ।”

28 जिव यीशु नै ये बात कह ली, तो इसा होया के भीड़ उसके उपदेश तै हैरान होगी,

29 क्यूँके वो उन ताहीं शास्त्रियाँ की तरियां न्ही पर अधिकार कै गैल उननै उपदेश देवै था ।

## 8

¶¶¶¶¶¶ ¶¶ ¶¶¶¶¶¶ ¶¶¶¶¶¶ ¶¶ ¶¶ ¶¶¶¶¶¶ ¶¶¶¶¶¶

1 जिव यीशु उस पहाड़ तै उतरा, तो एक बड़्डी भीड़ उसके पाच्छै हो ली ।

2 अर, एक कोढ़ी नै धोरै आँके उस ताहीं नमस्कार करया अर कह्या, “हे प्रभु, जै तू चाहवै, तो मन्नै ठीक कर सके सै ।”

3 यीशु नै हाथ बढ़ाके उस ताहीं छुआ, अर कह्या, “मै चाहूँ सूं, के तू इस बीमारी तै ठीक हो ज्या ।” अर वो जिव्वे कोढ़ तै ठीक होगया ।

4 यीशु नै उसतै कह्या, “देख किसे तै ना कहिये, पर जाके अपणे-आपनै याजक ताहीं दिखा अर अपणे कोढ़ तै ठीक होण कै बारे म्ह जो कुछ मूसा नबी नै जो पवित्र ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के तू ठीक होगया सै ।”

¶¶¶¶¶¶¶¶¶¶ ¶¶ ¶¶¶¶¶¶¶¶¶¶ ¶¶ ¶¶¶¶¶¶ ¶¶ ¶¶¶¶¶¶¶¶¶¶

5 जिव यीशु कफरनहूम नगर म्ह आया तो एक सूबेदार\* नै धोरै आँके उसतै बिनती करी,

6 “हे प्रभु, मेरा नौक्कर लकवे के रोग तै घणा दुखी होरया सै ।”

7 यीशु नै उस ताहीं कह्या, “मै आँके उसनै ठीक करूँगा ।”

8 सूबेदार नै जवाब दिया, “हे प्रभु, मै इस लायक कोनी के तू मेरे घरां आवै, पर सिर्फ मुँह तै कह दे तो मेरा नौक्कर ठीक हो ज्यागा ।

9 क्यूँके मै जाणु सूं, के मै भी किसी के आदेशां का पालन करूँ सूं, अर सिपाही मेरै आदेशां का पालन करै सै । जिव मै एक तै कहूँ सूं, जा, तो वो जावै सै, अर दुसरे तै कहूँ, आ, तो वो आवै सै, अर अपणे नौक्कर तै कहूँ सूं, यो कर, तो वो करै सै ।”

10 यो सुणकै यीशु कै अचम्भा होया, अर जो लोग उसके पाच्छै आवै थे उनतै कह्या, “मै थमनै साच्ची कहूँ सूं के मन्नै इस्राएल देश म्ह भी इसा विश्वास न्ही देख्या, जिसा इस सूबेदार का सै ।

11 अर मै थमनै कहूँ सूं के पूरब अर पच्छिम तै घणेए गैर यहूदी आवैगें अर भोज म्ह अब्राहम अर इसहाक अर याकूब के गेल्या सुर्ग के राज्य म्ह बैटैगें ।

12 पर राज्य की ऊलाद (यहूदी लोग) बाहर अन्धेरे म्ह गेर दिये जावैगें उड़ै रोणा अर दाँत पिसणा होगा ।”

13 जिव यीशु नै सूबेदार तै कह्या, “घर चला जा, जिसा तेरा विश्वास सै, उसाए तेरे खात्तर होगा ।” अर उसका नौक्कर उस्से बखत ठीक होगया ।

‡ 7:23 7:23 (लूका 13:27) \* 8:5 8:5 सूबेदार-रोमी सेना के सौ सिपाही के उपर हो सै

१४ यीशु जिव पतरस के घरां आया, तो उसने उसकी सास्सु ताहीं बुखार म्ह पडचा देख्या।

१५ उसने उसका हाथ पकडचा अर उसका बुखार उतर गया, अर वा उठकै उसकी सेवा-पाणी करण लागगी।

१६ जिव साँझ होई फेर माणस उसके धोरै घणेए माणसां नै ल्याए जिन म्ह ओपरी आत्मा थी अर यीशु नै उन आत्मायाँ ताहीं अपणे वचन तै लिकाड दिया, अर सारे बिमारां ताहीं ठीक कर दिया।

१७ ताके जो वचन यशायाह नबी के जरिये कह्या गया था वो पूरा हो “उसने खुद ए म्हारी कमजोरी ले ली अर म्हारी बीमारी उठा ली।”†

१८ यीशु नै जिव अपण चौगरदू एक भीड़ देखी तो अपणे चेल्यां ताहीं गलील समुन्दर के परली ओड़ जाण का हुकम दिया।

१९ यीशु अर उसके चेल्लें किस्ती की ओड़ जाण लागरे थे, तो एक शास्त्री नै धोरै आकै उसतै कह्या, “हे गुरु, जइँ किते तू जावैगा, मै तेरे पाच्छे हो ल्युंगा, क्युँके मै तेरा चेल्ला बणणा चाहूँ सू।”

२० यीशु नै उसतै कह्या, “लोमडियाँ की घुरखाण अर अकास के पछियाँ के बसेरे हो सै, पर मुझ माणस के बेट्टे खात्तर सिर छिपाण की भी जगहां कोनी सै।”

२१ एक और चेल्ले नै उसतै कह्या, “हे प्रभु, पैहले मन्ने घर जाणदे, मै अपणे पिता के मरण के बाद उस ताहीं दफना के आऊंगा, फेर तेरा चेल्ला बणुगाँ।”

२२ यीशु नै उसतै कह्या, “तू मेरै पाच्छे हो ले, अर मेरा चेल्ला बण जा अर जो आत्मिक रूप तै मर चुके सै, उनै मुदें दफणाण दे।”

२३ जिव यीशु किस्ती पे चढचा, तो उसके चेल्लें उसके पाच्छे हो लिए।

२४ अर देखो, समुन्दर म्ह एक इसा बड़ड़ा अन्धोड़ उठचा के किस्ती झाल्लां तै ढक्ण लागगी, अर वो सोण लाग रह्या था।

२५ फेर चेल्यां नै धोरै आकै उस ताहीं जगाया अर कह्या, “हे प्रभु, हमनै बचा, हम डूबके मरण आळे सां।”

२६ यीशु नै उनतै कह्या, “हे विश्वास म्ह कमजोर माणसां, क्युँ डरो सों?” फेर उसनै उठकै आँधी अर पाणी ताहीं धमकाया, अर सब शान्त होगया।

२७ अर वे अचम्भा करके कहण लागये, “यो किसा माणस सै के आँधी अर पाणी भी उसका हुकम मान्नै सै।”

२८ जिव यीशु गलील समुन्दर के परली ओड़ गदरनियां के देश म्ह पुहचा, तो दो माणस जिन म्ह ओपरी आत्मा थी कब्रिस्तान म्ह तै लिकडकै उसनै मिले। वे इतने डरावणे थे के कोए उस रास्ते तै जा न्ही सकै था।

२९ दोन्नु माणसां नै किल्की मारके कह्या, “हे परमेसवर के बेट्टे, म्हारा तेरे तै के काम? के तू बखत तै पैहल्ल्या हमनै दुख देण आडै आया सै?”‡

३० उनतै थोड़ी सी दूर पै घणेए सूअरां का टोळ चरै था।

३१ ओपरी आत्मायाँ नै उसतै या कहकै बिनती करी के, “जै तू हमनै लिकाडै सै, तो सूअरां के टोळ म्ह भेजदे।”

३२ उसनै उन ताहीं कह्या, “जाओ!” अर वे ज्या के सूअरां म्ह बैठगी अर देखो, सारा टोळ ढळान पै तै झपटके पाणी म्ह ज्या पडचा, अर डूब मरया।

३३ उनके पाळी भाज्ये, अर नगर म्ह जाके ये सारी बात अर जिन म्ह ओपरी आत्मा थी उनका सारा हाल कह सुणाया।

† 8:17 8:17 (1 पत्त-2:24) ‡ 8:29 8:29 (लुका 4:34)



34 फेर सारे नगर के माणस यीशु तै फेटण नै लिक्ड़ाए, अर उस ताहीं देख के बिनती करी के म्हारी सीमा तै बाहर चल्या ज्या ।

## 9

*☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞*

- 1 फेर यीशु किस्ती म्ह चढ़के उस पार गया, अर बोहड़के अपने नगर म्ह आया ।
- 2 अर देखो, कई माणस लकवे के एक मरीज नै खाट पै लिटा के उसके धोरै ल्याए । यीशु नै उनका विश्वास देखके, उस लकवे के मरीज तै कहा, “हे बेटे, धीर बाँध, मन्नै तेरे पाप माफ कर दिये ।”
- 3 इसपै कई शास्त्रियाँ नै सोच्या, “यो तो परमेसवर की बुराई करै सै”
- 4 यीशु नै उनके मन की बात जाणके कहा, “थम माणस अपने-अपने मन म्ह बुरा विचार क्यूँ आण देओ सों?”
- 5 आसान के सै? यो कहणा, ‘तेरे पाप माफ होए’, या यो कहणा, ‘उठ अर हाँड-फिर ।’
- 6 पर इस करके के थम जाण ल्यो के मुझ माणस के बेटे नै धरती पै पाप माफ करण का हक सै ।” फेर उसनै लकवे के मरीज तै कहा, “उठ, अपने बिस्तर ठाके, अपने घरां चल्या जा ।”
- 7 वो उठके अपने घरां चल्या गया ।
- 8 माणस यो देखके डरगे अर परमेसवर की बड़ाई करण लागये जिसनै माणस ताहीं इसा हक दिया सै ।

*☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞*

- 9 ओड़े तै आगै बढ़ के यीशु नै मत्ती नाम के एक आदमी ताहीं चुंगी की चौकी पै बेटया देख्या, अर उसतै कहा, “मेरा चेल्ला बणण खातर मेरै पाच्छै हो ले ।” अर वो उठके उसके पाच्छै हो लिया ।
- 10 जिव वो अर उसके चेल्ले मत्ती के घर म्ह खाणा खाण खातर बेटे तो भोत-से चुंगी लेण आळे अर जिननै लोग पापी कहवै सै वे आके उनके गेल्या खाणा खाण बेटे ।
- 11 या देखके फरीसियाँ नै उसके चेल्या ताहीं कहा, “थारा गुरु चुंगी लेण आळे अर पापी माणसां गेल्या क्यूँ खावै-पीवै सै?”
- 12 या सुणके यीशु नै उनतै कहा, “वैद आच्छे-बिच्छयां खातर कोनी पर बिमारां खातर जरूरी सै ।”
- 13 इस करके थम जाओ अर समझ ल्यो के पवित्र ग्रन्थ के इस वचन का मतलब के सै: ‘मै बलिदान न्ही पर दया चाहूँ सूँ ।’ क्यूँके जो अपने-आपनै धर्मी कहवै मै उननै न्ही, पर जो अपने-आपनै पापी कहवै सै उननै बुलाण आया सूँ ।”\*

*☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞*

- 14 फेर बपतिस्मा देण आळे यूहन्ना के चेल्या नै धोरै आणके कहा, “के कारण सै के हम अर फरीसी इतने बरत करा सां, पर तेरे चेल्ले बरत न्ही करदे?”
- 15 यीशु नै उनतै कहा, “के बराती, जिव ताहीं बन्दड़ा उसके गेल्या सै, शोक मना सके सै? पर वे दिन आवैगें जिव बन्दड़ा उनतै न्यारा करया जावैगा, उस बखत वे बरत करैगें ।”
- 16 “नये लत्यां की थेगळी पुराणे लत्यां पै कोए न्ही लगान्दा, क्यूँके वा थेगळी लत्ते तै और भी लत्ता खुस्का दे सै, अर वो और भी घणा पाट ज्या सै ।
- 17 अर माणस नया अंगूर का रस पुराणी मशक म्ह न्ही भरदे, क्यूँके इसा करण तै मशक पाट ज्या सै, अर अंगूर का रस खिंड ज्या सै, अर मशक फूट ज्या सै, पर नया अंगूर का रस नई मशकां म्ह भरा जावै सै तब वे दोनु बचे रहवै सै ।”

*☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞*

\* 9:13 9:13 (होणे 6:6)

18 वो उनतै ये बात कहण ए लागरया था, के जिब्बे आराधनालयौं के सरदारों म्ह तै एक याईर नाम के आदमी नै आकै उस ताहीं नमस्कार करया अर कहा, “मेरी बेट्टी इब्बे मरी सै, पर तू चाल के अपणा हाथ उसपै धरै, तो वा जिन्दा हो ज्यागी।”

19 यीशु उठकै अपणे चेल्यां समेत उसके पाच्छै हो लिया।

20 अर देख्को, एक बिरबान्नी नै जिसकै बारहां साल तै लहू बहण की बीमारी थी, पाच्छै तै आकै उसकै लत्ते के कोणे ताहीं छू लिया।†

21 क्यूँके वा अपणे मन म्ह कहवै थी, “जै मै उसकै लत्ते नै छू ल्युंगी तो ठीक हो जाऊंगी।”

22 यीशु नै घूमकै उस ताहीं देख्या अर कहा, “बेट्टी धीरज राख, तेरे बिश्वास नै तेरे ताहीं ठीक करया सै।” अर वा बिरबान्नी उससे बखत ठीक होगी।

23 जिव यीशु याईर के घर म्ह पुँहचा अर बाँसली वजाण आळे अर भीड़ नै रोळा मचादे देख्या,

24 फेर कहा, “हट जाओ, छोरी मरी कोनी, पर सोवै सै।” इसपै वे उसका मजाक उड़ाण लाग्ये।

25 पर जिव भीड़ लिकाड़ दी, तो उसनै भित्तर ज्या के उस छोरी का हाथ पकड्या, अर वा जी उठी।

26 अर इस बात का जिक्र सारे देश म्ह फैल गया।

¶¶¶¶¶¶ ¶¶ ¶¶¶¶¶¶

27 जिव यीशु ओड़ै तै आगे बढ़ा, तो दो आन्धे उसके पाच्छै, या कहन्दे होए चाल्ले, “हे दाऊद की ऊलाद, म्हारे पै दया कर!”

28 जिव वो घर म्ह पुहचा, तो वे आन्धे उसके धोरै आये, अर यीशु नै उनतै कहा, “के थमनै बिश्वास से के मै थमनै चंगा कर सकूँ?” उननै उसतै कहा, “हाँ प्रभु!”

29 फेर उसनै उनकी आँखां के हाथ लगाकै कहा, “थारे बिश्वास के मुताबिक थम चंगे होजाओ।”

30 अर वे जिब्बे देखण लाग्गे। यीशु नै उनतै समझा के कहा, “सावधान, किसे ताहीं या बात ना बताइयो, के मन्नै थारे खात्तर के करया सै।”

31 पर उननै मिलके सारे देश म्ह उसका नाम फैला दिया।

¶¶ ¶¶¶¶ ¶¶¶¶¶¶ ¶¶¶ ¶¶¶¶

32 जिव वे दोन्नु आन्धे बारणे जाण लागरे थे, तो देख्को, कई माणस एक गूँगे नै उसके धोरै ल्याए जिसम्ह ओपरी आत्मा थी, जो उसनै बोल्लण कोनी देवै थी।

33 अर जिव यीशु नै ओपरी आत्मा लिकाड़ दी, तो गूँगा बोलण लागया। इसपै भीड़ नै अचम्भा करके कहा, “इस्राएल म्ह इसा कदे न्ही देख्या गया।”

34 पर फरीसियाँ नै कहा, “ओपरी आत्मायाँ के सरदार इस ताहीं शक्ति देवै सै, इस करके यो ओपरी आत्मायाँ नै लिकाड़ै सै।”

¶¶¶¶¶¶ ¶¶¶¶¶¶ ¶¶¶¶ ¶¶ ¶¶¶¶¶¶ ¶¶¶¶¶¶

35 यीशु अर उसके चेल्ले सारे नगरों अर गाम्मां म्ह फिरता होया अर उनकै आराधनालयौं म्ह उपदेश सुणांदा, अर परमेसवर के राज्य का सुसमाचार सुणादा, अर हरेक ढाळ की बीमारी अर कमजोरियाँ नै दूर करदा रह्या।

36 जिव उसनै भीड़ देखी तो उसने माणसां पै तरस आया, क्यूँके वे उन भेड्या की तरियां थे, जिनका कोए पाळी ना हो, वे बेचैन अर भटके होए से थे।‡

37 फेर उसनै अपणे चेल्यां तै कहा, “पके होए खेत्ता की तरियां लोग तो भोत सै जो परमेसवर के वचन नै सुणणा चाहवै सै, पर फसल काटण आळे की तरियां लोग कम सै जो जाकै परमेसवर का वचन सुणावै।

38 इस करके खेत के माल्लिक यानी परमेसवर तै बिनती करो, के वो और लोग्गां नै भेज्जै, ताके परमेसवर का वचन भोत सारे लोग्गां ताहीं सुणावै।”

## 10

\*\*\*\*\*

1 फेर यीशु ने अपणे बारहां चेल्यां ताहीं धोरै बुलाकै, उन ताहीं ओपरी आत्मायाँ पै हक दिया के उननै लिकाड़ै अर सारी ढाळ की विमारियाँ अर सारी ढाळ की कमजोरियाँ नै ठीक करै।

2 इन बारहां पुररितां के नाम ये सै: पैहल्या शमीन, जो पतरस कुह्वावे सै, अर उसका भाई अन्दिरयास, जब्दी का बेटटा याकूब, अर उसका भाई यूहन्ना,

3 फिलिप्पुस, अर बरतुलमै, थोमा, अर चुंगी लेण आळा मत्ती, हलफई का बेटटा याकूब, अर तद्दै,

4 शमीन जेलोतेस\*, अर यहूदा इस्करियोती जिसनै वो पकड़वा भी दिया।

\*\*\*\*\*

5 इन बारहां चेल्यां ताहीं यीशु नै यो हुकम देके भेज्या: “गैर यहूदी लोग्गां कान्ही ना ज्याइयो, अर सामरियाँ के किसे नगर म्ह दाखल ना होइये।†

6 पर इस्राएल के कुण्वे की ए खुई होड़ी भेड़डां के धोरै जाईये।

7 अर चालते-चालते यो प्रचार करो: सुर्ग का राज्य धोरै आ गया।

8 बिमारां नै ठीक करो, मरै होए नै जीवाओ, कोढ़ियाँ नै शुद्ध करो, ओपरी आत्मायाँ नै लिकाड़ो। धमनै मुफ्त लिया सै मुफ्त द्यो।”

9 “अपणे अंगोच्छ्रां म्ह ना तो सोन्ना, ना चाँदी, अर ना ताम्बे के सिक्के राखियो।

10 रास्ते खात्तर ना झोळी लियो, ना दो कुड़ते, ना जूत्ते अर ना लाट्टी लियो, क्यूँके मजदूर नै उसका खाणा मिलणा चाहिए।

11 जिस किसे नगर या गाम म्ह जाओ, तो बेरा पाड़ो के कुण लायक सै। अर जिब ताहीं उड़ै तै ना लिकड़ो, उससे के गेल्या रहों।

12 घर म्ह बढ़ते आणी उसनै आशीवाद दिए।

13 जै उस घर के माणस लायक होंगे तो थारा आशीवाद उनपै पुहँचगा, पर जै वे लायक ना हों तो थारा आशीवाद थारे धोरै उल्टा ए आ ज्यागा।

14 जो कोए धमनै न्ही अपणावै अर थारी बात ना सुणै, उस घर या उस नगर तै लिकड़दे आणी अपणे पैरां की धूळ झाड़ लियो।

15 मै धमनै सच्ची कहुँ सूँ के न्याय के दिन उस नगर की हालत तै सदोम अर अमोरा‡ के नगर की हालत घणी सहण जोग्गी होवैगी।”

\*\*\*

16 “देक्खो, मै धमनै भेड़डां की तरियां भेड़ियाँ के बिचाल्ये भेज्जू सूँ, इस करके साँपां की तरियां अकलमंद अर कबूतरां की तरियां भोळे बणो।

17 पर माणसां तै चौक्कस रहों, क्यूँके वे धमनै बड़े आराधनालयौं म्ह सौपैगें, अर अपणी सभा म्ह थारे कोड़े मारैगें।

18 धम मरै खात्तर राज्यपालों अर राजयां के स्याम्ही अर गैर यहूदी लोग्गां म्ह भेज्जे जाओगें। ताके धम मेरे बारें म्ह गवाही दे सको

19 जिब वे धमनै पकड़वावैगें तो या फिकर ना करियो के हम किस तरियां तै या के कहवागें, क्यूँके जो किमे थारे ताहीं कहणा होगा, वो उससे बखत थारे ताहीं बता दिया जावेगा।

20 क्यूँके बोलण आळे धम न्ही सों, पर थारे सुर्गीय पिता का आत्मा थारे म्ह बोल्लै सै।

21 भाई, भाई नै अर पिता बेटटे नै, मारण खात्तर सौप देंगें, अर बाळक अपणे माँ बाप के विरोध म्ह खड़े होके उन ताहीं मरवा देवैगें।§

\* 10:4 10:4 (एक कट्टर पंथी राजनैतिक दल का नाम था जिसका वो सदस्य था) † 10:5 10:5 (यिर्म-50:6) ‡ 10:15 10:15 सदोम अर अमोरा ये वे नगर थे जिस म्ह अब्राहम का भतिज्जा लूत रहया करै था परमसवर नै ओड़ै के माणसां ताहीं उनके बुरे काम्मां के कारण उन ताहीं आग गेर के नाश कर दिया था § 10:21 10:21 (मीका 7:6)

22 मेरे नाम के कारण सारे माणस थारे तै बैर करैगें, पर जो अन्त ताहीं धीरज धरैगा उससे का उद्धार होगा।

23 जिव वे थमने नगर म्ह सतावै, तो दुसरे म्ह भाग ज्याइयो। मै थमने सच कहूँ सूँ, थम इस्राएल के सारे नगरां म्ह न्ही घूम सकोगें के मै माणस का बेट्टा आ जाऊँगा।”

**\*\*\*\*\***

24 “चेल्ला अपणे गुरु तै बड्डा न्ही होंदा, अर ना नौक्कर अपणे माल्लिक तै।

25 चेल्लै का गुरु के, अर नौक्कर का माल्लिक के बराबर होणा ए भोत सै। जिव उननै घर के माल्लिक तै शैतान कह्या तो उसके घरआळां नै के कुछ न्ही कहवैगें!”

**\*\*\*\*\***

26 “इस करके माणसां तै ना डरो, क्यूँके कुछ ढकया कोनी, जो उजागर न्ही करया जावैगा, अर ना कुछ लुहकया सै जिसका बेरा न्ही पटै।

27 जो मै थारे तै अन्धेरे म्ह कहूँ सूँ, उसनै थम चाँदणे म्ह कहो, अर जो कान्नो-कान सुणो सों, उसनै छात्तां पै चढ के पूरचार करो।

28 जो देह नै घात करै सै, पर आत्मा नै घात न्ही कर सकदे, उनतै ना डरियो, पर उस परमेसवर तै डरो जो आत्मा अर देह दोनुआ नै नरक म्ह गेरकै नाश कर सकै सै।

29 छोट्टी चिड़ियाँ दो पिस्या की बिके सै, जो ना के बराबर सै तोभी जै वो धरती पै पडके मरै सै तो पिता परमेसवर नै उसका भी बेरा सै क्यूँके पिता परमेसवर सब कुछ जाणण आळा सै।

30 थारे सिर के बाळ भी सारे गिणे होड़े सै।\*

31 इस करके डरो मतना, थम घणी गौरैयाँ (एक छोट्टी चिड़ियाँ) तै बढके सो।”

**\*\*\*\*\***

32 “जो कोए माणसां के स्याम्ही मन्ने मान लेवैगा, उसनै मै भी अपणे सुर्गीय पिता के स्याम्ही मान ल्यूँगा।

33 पर जो माणसां के स्याम्ही मेरै बारे म्ह इन्कार करैगा, उसनै मै भी अपणे सुर्गीय पिता के स्याम्ही इन्कार करैगा।”

34 “यो ना समझो के मै धरती पै माणसां का मिलाप करवाण आया सूँ, मै मिलाप करवाण न्ही, पर न्यारे करण आया सूँ।

35 मै तो आया सूँ, ताके माणस नै उसके पिता तै, अर बेट्टी नै उसकी माँ तै, अर बहू नै उसकी सास तै न्यारा कर वु।”

36 “माणस के बेरी उसके घर के ए लोग होंगे।”

37 “जो अपणे माँ-बाप नै मेरै तै घणा प्यारा मान्ने सै, वो मेरा चेल्ला बणण के लायक कोनी, अर जो बेट्टा या बेट्टी नै मेरै तै घणा प्यारा मान्ने सै, वो मेरै लायक कोनी।†

38 अर जो अपणा दुखां का करूस लेके मेरै पाच्छै, न्ही चाल्लै वो मेरै लायक कोनी।

39 जो अपणी जान बचावै सै, वो उसनै खोवैगा, अर जो मेरै कारण अपणी जान खोवैगा, वो उसनै पावैगा।”

**\*\***

40 “जो थमने अपणावै सै, वो मन्ने अपणावै सै, अर जो मन्ने अपणावै सै, वो उस परमेसवर नै अपणावै सै, जिसने मेरे ताहीं भेज्या सै।

41 जो नबियाँ नै नबी जाण के अपणावै, वो नबियाँ के जिसा फळ पावैगा, जिसा नबी नै मिलै सै, अर जो धर्मी नै धर्मी जाण के अपणावै, वो धर्मी के जिसा फळ पावैगा।

42 जो कोए मेरे इन चेल्यां म्ह तै एक नै भी मेरा चेल्यां जाण के सिर्फ एक कटोरा टंडा पाणी पियावैगा, मै थमने सच कहूँ सूँ, वो किसे तरियां भी अपणा फळ न्ही खोवैगा।”

\* 10:30 10:30 (लूका 12:7) † 10:37 10:37 (लूका 14:26)

## 11

\*\*\*\*\*

1 अपने वारहां चेल्यां ताहीं इस तरियां समझाण के बाद यीशु ओड़ै तै चाल पड्या, अर गलील परदेस के नगरां म्ह उपदेश अर प्रचार करदा घूमता रह्या।

2 यूहन्ना नै जेळ म्ह मसीह के काम्मां की खबर सुणी अर अपने चेल्यां ताहीं यीशु तै न्यू बुद्धिण भेज्या,

3 अर उसतै कहा, “के आण आळा वो मसीहा जिसका वादा परमेसवर नै करया था, तू ए सै, या हम किसे और की बाट देक्खां?”

4 यीशु नै जवाब दिया, “जो कुछ थम सुणो सो अर देक्खो सो, यो सारा जाकै यूहन्ना ताहीं कह द्यो,

5 के आन्धे देक्खै सै अर लंगड़े चाल्लै-फिरै सै, कोढ़ी ठीक करे जावै सै अर बहरे सुणै सै, मुर्दे जिन्दे करे जावै सै, अर कंगालां ताहीं सुसमाचार सुणाया जावै सै।

6 अर धन्य सै वे, जो मेरै पै शक न्ही करते, अर बिश्वास करणा न्ही छोडते।”

\*\*\*\*\*

7 जब यूहन्ना के चल्ले ओड़ै तै जाण लागरे थ तो यीशु भीड़ म्ह माणसां तै यूहन्ना के बारे म्ह कहण लागग्या, “थम जंगल-बियावान म्ह के देखण गये थे? के हवा म्ह हाल्दे होए सरकड्या नै?

8 तो फेर थम के देखण गये थे? के सुथरे लत्ते पहेरे होड़ माणस ताहीं? देक्खो, जो सुथरे लत्ते पहरे सै, वे राजघरां म्ह रहवै सै।

9 तो फेर क्यातै गये थे? के किसे नबी नै देखण ताहीं? हाँ, मै थमनै कहूँ सूँ, बल्के नबी तै भी बडे नै।”

10 यूहन्ना वोए सै जिसके बारे म्ह पवित्र ग्रन्थ म्ह लिख्या सै: के “देख, मै अपने दूत ताहीं तेरे आगै भेज्जू सूँ

जो तेरे आगै तेरा रास्ता त्यार करैगा।”\*

11 मै थमनै कहूँ सूँ के जो बिरबानियाँ तै जणे सै, उन म्ह तै यूहन्ना बपतिस्मा देण आळे तै बड़ड़ा कोए न्ही होया, पर जो सुर्ग के राज्य म्ह छोटे तै भी छोटे सै वो उसतै बड़ड़ा सै।

12 यूहन्ना बपतिस्मा देण आळे के दिनां तै इव ताहीं सुर्ग का राज्य बलपूर्वक बढ़ण लाग रहया सै, अर बिरोधी लोग उसनै रोकण की कोशिश करण लागरे सै।

13 यूहन्ना के आण तक सारे नबी अर मूसा के नियम-कायदा म्ह, सुर्ग के राज्य की भविष्यवाणी करी गई।

14 जै थम सच म्ह भविष्यवाणीयाँ पै बिश्वास करो सों, तो सुणो यूहन्ना ए वो एलिय्याह सै जो दोबारा आण आळा था।†

15 जिसके कान हों, वो ध्यान तै सुण ले।

16 “मै आज की पीढ़ी के माणसां की बराबरी किसतै करूँ? वे उन बाळकां की ढाळ सै, जो बजारां म्ह बेट्टे होए एक-दुसरे तै रुके मारके शिकायत करै सै:”

17 “हमनै थारे खात्तर बाँसली बजाई, अर थम कोनी नाच्चे, हमनै बिलाप करया, अर थमनै छात्ती कोनी पिट्टी।”

18 “इस्से तरियां यूहन्ना बपतिस्मा देण आळा ना रोटी खाया करदा अर ना अंगूर का रस पिया करदा, अर थम कहो सो, ‘उस म्ह ओपरी आत्मा सै।’

19 मुझ माणस के बेट्टे का खाण-पान और माणसां की तरियां साहा ए सै, लखाओ, थमनै मेरे ताहीं पेट्टू अर पियक्कड़ माणस, चुंगी लेणिये का अर पापियाँ का साथी घोषित कर दिया! पर ज्ञान अपने काम्मां म्ह सच्चा ठहराया गया सै।”

\*\*\*\*\*

\* 11:10 11:10 (मला-3:1) † 11:14 11:14 (मला-4:5)

20 फेर यीशु उन नगरां ताहीं उल्हाणा देण लाग्या, जिन म्ह उसनै घणे सामर्थ के काम करे थे, क्यूँके उननै पाप करणा न्ही छोडचा अर ना ए परमेसवर के राह पै चाल्लै।

21 "धिक्कार सै थारे पै खुराजिन नगर के माणसों! धिक्कार सै थारे पै बैतसैदा नगर के माणसों! जो सामर्थ के काम थारे म्ह करे गये, जै वे सूर अर सैदा नगरां म्ह करे जान्दे, तो टाट ओढ कै, अर राख म्ह बैठकै वे कदे के पाप करणा छोड देन्दे।

22 पर मै थमनै कहूँ सूँ के न्याय के दिन थारी हालत तै सूर अर सैदा नगरां की हालत घणी सहण जोगगी होवैगी।

23 हे कफरनहूम नगर के माणसों, थम के सोच्चों सों, के थम सुर्ग ताहीं ऊँच्चे करे जाओगें? थम तो अधोलोक तक नीच्चै जाओगें, जो सामर्थ के काम थारे म्ह करे गये सै, जै सदोम नगर म्ह करे जान्दे, तो वो आज ताहीं बणया रहन्दा।

24 पर मै थमनै कहूँ सूँ के न्याय के दिन तेरी हालत तै सदोम नगर की हालत घणी सहण जोगगी होवैगी।"

~~~~~

25 उस्से बखत यीशु ने कहा, "हे पिता, सुर्ग अर धरती के प्रभु, मै तेरा शुकिरयादा करूँ सूँ के तन्नै इन बाततां ताहीं ज्ञानियाँ अर समझदार माणसां तै ल्कोए राख्या, अर बाळकां ताहीं दिखा दिया सै।

26 हाँ, हे पिता, क्यूँके तन्नै योए भाया।"

27 "मेरे पिता नै मेरे ताहीं सब कुछ सौप्या सै, अर कोए बेट्टे ताहीं कोनी जाणदा, सिर्फ पिता के अलावा, अर कोए पिता ताहीं कोनी जाणदा, सिर्फ बेट्टे के अलावा, अर हरेक वो माणस जो परम पिता नै जाणे सै, जिसकै खात्तर बेट्टे नै उस ताहीं जाहिर करणा चाह्या सै।"

28 "हे सारे मेहनत करण आळो अर बोझ तै दबे होडे माणसों, मेरे धोरे आओ, मै थमनै सुख-चैन दियुंगा।

29 मेरा जूआ अपणे उप्पर ठा ल्यो, अर मेरे तै सीखो, क्यूँके मै नरम अर मन का दीन सूँ: अर थम अपणे मन म्ह सुख-चैन पाओगे।

30 क्यूँके मेरा जूआ सोखा अर मेरा बोझ हल्का सै"

12

1 तकरीबन उस्से बखत आराम के दिन यीशु चेल्यां के गैल खेत्तां म्ह तै होके जाण लागरया था, अर उसके चेल्यां नै भूख लागगी तो वे गेहूँ की बालें तोड़-तोड़के खाण लागगे।

2 फरीसियाँ नै न्यू देखके उसतै बोल्ले, "देख, तेरे चेल्लें वो काम करै सै, जो नियम-कायदा के मुताबिक आराम के दिन करणा ठीक कोनी।"

3 यीशु नै उनतै कहा, "के थमनै पवित्र ग्रन्थ म्ह यो न्ही पढ़या, के दाऊद अर उसके साथियाँ नै जिव वे भूखे होए तो के करया था?

4 वो किस तरियां परमेसवर के घर म्ह गया, अर भेंट की रोट्टी खाई, जिनका खाणा ना तो उस ताहीं अर ना उसके साथियाँ ताहीं पर सिर्फ याजकां ताहीं सही था?

5 यो थमनै नियम-कायदा म्ह न्ही पढ़या के आराम के दिन मन्दर के याजक ए आराम के दिन की विधि ताहीं तोड़ै सै फेर भी उन ताहीं कोए कुछ न्ही कहन्दा?

6 पर मै थमनै कहूँ सूँ के उरे वो सै जो मन्दर तै भी बड़ड़ा सै।

7 जै थम पवित्र ग्रन्थ म्ह जो लिख्या सै, उसका मतलब जाणदे के, 'मै बलिदान न्ही पर दया चाहूँ सूँ।' तो थम बेकसूर ताहीं कसूरवार कोनी ठहरान्दे।

8 मै माणस का बेट्टा तो आराम के दिन का भी प्रभु सूँ।"

9 ओड़ै तै चालकै वो उनके आराधनालय म्ह आया।

10 ओड़ै एक माणस था, जिसका हाथ सूखरया था। फरीसी लोगगं नै यीशु पै दोष लाण खात्तर उसतै बुद्धया, “मूसा के नियम-कायदा कै मुताबिक आराम कै दिन ठीक करणा सही सै?”

11 यीशु नै उनतै कह्या, “थारे म्ह तै इसा कौण सै जिसकी एक ए भेड़ हो, अर वा आराम कै दिन खडहे म्ह पड़ जावै, तो वो उस ताहीं पकड़के न्ही काड़डै?”

12 फेर माणस तो भेड़ तै भोत घणे खास सै! ज्यातै आराम कै दिन भलाई करणा ठीक सै, जिसा के माणसां नै चंगा करणा।”

13 फेर यीशु नै उस माणस तै कह्या, “अपणा हाथ बढ़ा।” उसनै बढ़ाया, अर वो दुसरे हाथ की तरियां ठीक होग्या।

14 फेर फरीसियां नै बाहरणै जाके उसके विरोध म्ह सलाह करी के उसका नाश किस तरियां करया जावै।

15 न्यू जाणकै यीशु ओड़ै तै चल्या गया। अर घणे माणस उसके पाच्छै हो लिए, अर उसनै सारया ताहीं ठीक करया,

16 अर उन ताहीं चेतावनी दी, के मेरै बारे म्ह किसे तै ना कहियो के मै कौण सू।

17 ताके जो वचन यशायाह नबी कै जरिये कह्या गया था, वो पूरा हो

18 “देखवो, यो मेरा सेवक सै, जिस ताहीं मन्नै चुण्या सै, मेरा प्यारा, जिसतै मेरा मन राज्जी सै, मै अपना आत्मा उसपै तारुगां, अर योए दुसरी जात्तां नै न्याय की खबर देवैगा।

19 “वो ना माणसां के गैल झगड़ा करैगा, अर ना किल्की मारैगा, ना बजारां म्ह उसका कोए शब्द सुणैगा।

20 “वो कुचले होए सरकण्डे की समान कमजोर माणसां ताहीं कोनी लताड़ैगा, अर बुझते होए दीवे के समान, माणस मरता हो तो वो उसनै न्ही मारैगा, वो जिब ताहीं डटया रह्यैगा जिब ताहीं न्याय ना दुवा दे।

21 “अर दुसरी जात उसके नाम पै आस राक्खैगी।”

22 फेर माणस एक आन्धे-गूंगे नै जिसम्ह ओपरी आत्मा थी, जो उसनै देखण अर बोल्लण कोनी देवै थी, उसके धोरै ल्याए, अर उसनै उस ताहीं ठीक करया, अर वो गूंगा बोलण अर देखण लागया।

23 इसपै सारे माणस अचम्भा करके कहण लागगे, “यो के दाऊद की ऊलाद सै!”

24 पर फरीसियां नै न्यू सुणकै कह्या, “यो तो ओपरी आत्मायाँ के सरदार शैतान की मदद तै ओपरी आत्मायाँ नै लिकाड़ै सै।”

25 उसनै उनके मन की बात जाणकै उनतै कह्या, “जिस किसे राज म्ह फूट होवै सै, वो उजड़ जावै सै, अर कोए नगर या घराना जिसम्ह फूट होवै सै, बणया कोनी रहवैगा।

26 अर जै शैतान ए शैतान नै काड़डै, तो वो अपना ए विरोधी बणग्या, फेर उसका राज किस तरियां बणया रहवैगा?

27 भला, जै मै शैतान की मदद तै ओपरी आत्मायाँ नै काढ़ू सू, तो थारी पीढ़ी किसकी मदद तै काड़डै सै? इस करके वैए थारा न्याय करैगें।

28 पर जै मै परमेसवर के आत्मा की मदद तै ओपरी आत्मायाँ नै काढ़ू सू, तो परमेसवर का राज्य थारे धोरै आण पोहच्यो सै।”

29 “या किस तरियां कोए माणस किसे टाड़डे माणस के घर म्ह बड़के उसका माळ लूट सके सै जिब ताहीं के पैहल्या उस टाड़डे ताहीं ना जुड़ ले? जिब वो उसका घर लूट लेवैगा।”

30 “जो मेरै गेल्या न्ही वो मेरै विरोध म्ह सै, अर जो मेरै गेल्या न्ही कट्टा करदा, वो खिंडावै सै।

31 ज्यातै मै थारे तै कहूँ सू के माणस का सारे ढाळ का पाप अर बुराई माफ करी जावैगी, पर पवित्तर आत्मा की बुराई माफ कोनी करी जावैगी।

32 जो कोए माणस के बेट्टे के विरोध म्ह कोए बात कहवैगा, उसका यो कसूर माफ करया जावैगा, पर जो कोए पवित्तर आत्मा के विरोध म्ह कुछ कहवैगा, उसका कसूर ना तो इस लोक म्ह अर ना परलोक म्ह माफ करया जावैगा।”

33 “दरखत अपने फल तै ए पिच्छाणा जावै सै, जै दरखत नै बढ़िया कहो, तो उसके फल नै भी बढ़िया कहो, या दरखत नै निकम्मा कहो, तो उसके फल नै भी निकम्मा कहो।

34 हे साँप के सप्पोलों जिसे माणसों, धम भुन्डे होके किस तरियां बढ़िया बात कह सको सो? क्यूँके जो मन म्ह भरया सै, वोए मुँह पै आवै सै।

35 भला माणस अपने मन के भले भण्डार तै भली बात लिक्कड़ै सै, अर बुरा माणस अपने मन के बुरे भण्डार तै बुराई की बात काढै सै।

36 अर मै धारे तै कहुँ सूँ के जो-जो निकम्मी बात माणस कहवैगें, न्याय कै दिन वे हरेक उस बात का लेखा देवैगें।

37 क्यूँके तू अपनी बातों के कारण बेकसूर, अर अपनी बातों ए के कारण कसूरवार ठहराया जावैगा।”

38 इसपै कुछ शास्त्रियाँ अर फरीसियाँ नै उसतै कह्या, “हे गुरु, हम तेरे तै एक चिन्ह-चमत्कार देखणा चाहवाँ सा।”

39 उसनै उन ताहीं जवाब दिया, “इस युग के बुरे अर जार माणस निशान्नी टोह्वैं सै, पर योना नबी की निशान्नी नै छोड़ कोए और निशान्नी उन ताहीं कोनी दी जावैगी।

40 जिस तरियां योना नबी तीन रात अर तीन दिन बड़ी मछली कै पेट म्ह रहया, उससे तरियां ए मै माणस का बेट्टा तीन रात अर तीन दिन धरती कै भीत्तर रहूँगा।

41 निनवे नगर के माणस न्याय कै दिन इस युग के माणसाँ के गेल्या उठकै उन ताहीं कसूरवार ठहरावैगें, क्यूँके उननै योना नबी का प्रचार सुणके अपने पापाँ ताहीं स्वीकार किया, अर देखो, उरै वो सै जो योना नबी तै भी बड़ड़ा सै।

42 दक्षिण देश की राणी न्याय कै दिन इस युग के माणसाँ के गेल्या उठकै उन ताहीं कसूरवार ठहरावैगी, क्यूँके वा राजा सुलैमान का ज्ञान सुणण कै खात्तर धरती कै दुसरे सिरे तै आई, अर देखो, उरै वो सै जो सुलैमान तै भी बड़ड़ा सै।”

43 “जिब ओपरी आत्मा माणस म्ह तै लिक्कड़कै जावै सै, तो सूक्खी जगहां म्ह आराम टोहन्दी फ़िरै सै, अर पांदी कोनी।

44 फेर कहवै सै, ‘मै उससे माणस म्ह जड़ै तै लिक्कड़ी थी बोहड़ जाऊँगी।’ अर आकै उस माणस नै घर जिसा झाड़ा-बुहारा अर सजा-धज्या पावै सै।

45 फेर वा ओपरी आत्मा जाकै अपने तै और भुंडी सात आत्मायाँ नै अपने गेल्या ले आवै सै, अर वे उस माणस म्ह बड़कै ओड़ै वास करै सै, अर उस माणस की पाच्छली हालत पैहल्या तै भी भुंडी हो जावै सै। इस युग के बुरे माणसाँ की हालत भी इसीए होवैगी।”

46 जिब वो भीड़ तै बात करण ए लागरया था, तब उसकी माँ अर उसके भाई बाहरणै खड़े थे अर उसतै बात करणा चाहवै थे।

47 किसे नै उसतै कह्या, “देख, तेरी माँ अर तेरे भाई बाहरणै खड़े सै, अर तेरे तै बात करणा चाहवै सै।”

48 या सुणकै यीशु नै कहण आळे ताहीं जवाब दिया, “कौण सै मेरी माँ? अर कौण सै मेरे भाई?”

49 अर अपने चेल्याँ कान्ही अपना हाथ बढ़ाके कह्या, “देखो, मेरी माँ अर मेरे भाई ये सै।

50 क्यूँके जो कोए मेरे सुर्गीय पिता की इच्छा पै चाल्लै वोए मेरा भाई, मेरी बेब्बे अर मेरी माँ सै।”

13

1 उससे दिन यीशु घर तै लिक्कड़कै गलील समुन्दर कै किनारे जा बेठचा।

2 अर उसके धोरै इसी भीड़ कट्ठी होई के वो किस्ती पै चढ़गया, अर सारी भीड़ किनारे पै खड़ी रही।

3 अर उसनै उनतै उदाहरणाँ म्ह धणीए बात कही “एक किसान बीज बोण लिक्कड़या।

4 बोंदे बखत कुछ बीज राही कै किनारे पड़े अर पंछियाँ नै आके उन ताहीं चुग लिया ।

5 कुछ बीज पथरीली धरती पै पड़े, जइ उनताही घणी माट्टी ना मिली अर डून्धी माट्टी ना मिलण के कारण वे तोळाए जामगे ।

6 पर सूरज लिकड़णै पै वे जळगे, अर जड़ ना पकड़ण के कारण सुखगे ।

7 कुछ बीज झाड़ियाँ म्ह पड़े, अर झाड़ियाँ नै बढ़के उन ताहीं दाब लिया ।

8 पर कुछ बीज आच्छी धरती पै पड़े, कोए सौ गुणा, कोए साठ गुणा, अर कोए तीस गुणा फळ ल्याए ।

9 जिसके कान हों, वो ध्यान ते सुण ले ।”

10 चेल्यां नै धोरै आके उसतै कह्या, “तू माणसां तै उदाहरणां म्ह क्यांतै बात करै सै?”

11 उसनै जवाब दिया, “धारे ताहीं सुर्ग के राज्य के भेद की समझ दे राख्खी सै, पर उन ताहीं न्ही ।

12 क्यूँके जिसके धोरै सै, उसतै और दिया जावैगा, अर उसके धोरै घणा हो जावैगा, पर जिसके धोरै कुछ न्ही सै, उसतै जो कुछ उसके धोरै सै, वो भी ले लिया जावैगा ।

13 मै उनतै उदाहरणां म्ह ज्यांतै बात करूँ सूँ, के वे देखदे होए कोनी देखदे अर सुणदे होए कोनी सुणदे, अर न्ही समझदे ।”

14 “उनके बाबत यशयाह नबी की या भविष्यवाणी पूरी होवै सै: ‘थम सुणोगे, पर समझोगे कोनी, अर देखोगे, पर थमनै कोनी सूझैगा ।’ ”

15 “क्यूँके इन माणसां का मन मोट्टा होग्या सै, अर वे कान्ना तै ऊँच्चा सुणै सै, अर उननै अपणी आँख मूंद ली सै, कदे इसा ना हो के वे आँखां तै देखै, अर कान्ना तै सुणै अर मन तै समझै, अर पलट जावै, अर मै उननै ठीक करूँ ।”

16 पर धन्य सै थारी आँख, क्यूँके वे देखै सै, अर धारे कान क्यूँके वे सुणै सै ।

17 मै थमनै साच्ची कहूँ सूँ के घणखरे नबियाँ नै अर धर्मियाँ नै चाह्या के जो बात थम देखो सो, देखै, पर न्ही देख पाए, अर जो बात थम सुणो सो, सुणै, पर न्ही सुण पाए ।

18 “इब थम बोण आळे के उदाहरण का मतलब सुणो

19 जो कोए राज्य का वचन सुणके कोनी समझदा, यो वोए सै जो राही कै किनारे बोया गया था, उस ताहीं दुष्ट आके खोस ले जावै सै ।

20 अर जो पथरीली धरती पै बोया गया सै, यो वो माणस सै, जो वचन सुणके जिब्बे खुशी कै गेल्या मान लेवै सै ।

21 पर अपणे म्ह जड़ न्ही पकड़ण के कारण वो माड़े से दिन का सै, अर जिव वचन के कारण क्लेश या संकट आवै सै, तो जिब्बे ठोक्कर खावै सै ।

22 जो झाड़ियाँ म्ह बोया गया, यो वो सै, जो वचन ताहीं सुणै सै, पर इस दुनिया की फिक्र अर धन का धोक्खा वचन नै दावै सै, अर वो फळ कोनी ल्यांदा ।

23 जो आच्छी धरती पै बोया गया, यो वो सै, जो वचन ताहीं सुणके समझै सै, अर फळ ल्यावै सै, कोए सौ गुणा, कोए साठ गुणा, अर कोए तीस गुणा ।”

24 यीशु नै उन ताहीं एक और उदाहरण दिया: “सुर्ग का राज उस किसान जिसा सै जिसनै अपणे खेत मै बढ़िया बीज बोया ।

25 पर जिव माणस सोवै धे तो उसका बैरी आके गेहूँ के बिचाळे जंगळी बीज बोके चल्या गया ।

26 जिव अंकुर लिकड़े अर बाल लागी, तो जंगळी दाण्या के पौधे भी दिखण लागगे ।”

27 “इसपै धरेलू नौकरां नै आके उसतै कह्या, ‘हे माल्लिक, के तन्नै अपणे खेत म्ह बढ़िया बीज कोनी बोया था? फेर जंगळी दाण्या के पौधे उस म्ह कित्त तै आए?’ ”

28 “उसनै उनतै कह्या, ‘यो किसे बैरी का काम सै ।’ नौकरां नै कह्या, ‘के तेरी मर्जी सै के हम जाके उन जंगळी पौधां नै कट्टे करा?’ ”

29 “उसने कहा, ‘ना, इसा ना हो के जंगली दाण्या के पौधे कट्टे करदे हाण थम उनके गेल्या गेहूँ नै भी पाड़ ल्यो।

30 लामणी तक दोनुआ नै एक सेत्ती बधण दो, अर लामणी के बखत मै काटण आळा तै कहूंगा के पैहल्या जंगली दाण्या के पौधे कट्टे करके बाळण खात्तर उनके भरोट्टे जुड़ ल्यो, अर गेहूँ ताहीं मेरै खत्ते म्ह कट्टा करो।”

31 उसनै उन ताहीं एक और उदाहरण दिया: “सुर्ग का राज राई के एक दाणे की ढाळ सै, जिस ताहीं किसे माणस नै लेके अपने खेत म्ह बो दिया।

32 वो सारे बीज्जां तै छोटा तो होवै सै पर जिब बध जावै सै फेर सारे साग-पात तै बड़ा होवै सै, अर इसा दरखत हो जावै सै के अकास के पंछी आके उसकी डाळियाँ पै बसेरा करै सै।”

33 उसनै एक और उदाहरण उन ताहीं सुणाया “सुर्ग का राज खमीर की ढाळ सै, जिस ताहीं किसे बिरबान्नी नै लेके तीन पसेरी (पन्द्रह किलो) चून म्ह रखाया अर होन्दे-होन्दे वो सारा चून खमीर बणग्या।”

34 ये सारी बात यीशु नै उदाहरणां म्ह माणसां तै सिखाई, अर इस तरियां की शिक्षा देण खात्तर वो उदाहरणां का ए इस्तमाल करया करदा।

35 के जो वचन नबी के जरिये कहा गया था, वो पूरा होवै: “मै उदाहरण कहण नै अपना मुँह खोलूंगा, मै उन बातों नै जो दुनिया की शुरुआत तै लुक्की होई सै, जाहिर करूंगा।”

36 फेर वो भीड़ नै छोड़के घरां आया, अर उसके चेल्यां नै उसके धोरे आके कहा, “खेत म्ह जंगली दाणे का उदाहरण म्हारै ताहीं समझा दे।”

37 यीशु नै उन ताहीं जवाब दिया, “बढ़िया बीज का बोण आळा, मै माणस का बेट्टा सूं।

38 खेत दुनिया के लोग सै, बढ़िया बीज राज्य की ऊलाद, अर जंगली बीज शैतान की ऊलाद सै।

39 जिस बैरी नै उन ताहीं बोया वो शैतान सै। लामणी दुनिया का खात्मा सै, अर काटण आळे सुर्गदूत सै।”

40 आखर म्ह जिस तरियां जंगली पौधे कट्टे करे जावै अर बाळे जा सै उससे तरियां दुनिया का खात्मा होवैगा।

41 मै माणस का बेट्टा अपने सुर्गदूतां नै भेजजूंगा, अर वे उसके राज्य म्ह तै सारे जो खुद पाप करै सै अर दुसरयां नै पाप करण खात्तर उकसावै सै, अर भुन्डे काम करणीया नै कट्टे करैगें।

42 अर उननै आग के कुण्ड म्ह गेरैगें, जड़े रोणा, अर दाँत पिसणा होवैगा।

43 उस बखत धर्मी लोग अपने पिता के राज्य म्ह सूरज की ढाळ चमकैगें। जिसके कान हों, वो ध्यान तै सुण ले।

44 सुर्ग का राज्य खेत म्ह लुहके होड़ धन की ढाळ सै, जिस ताहीं किसे माणस नै पाया अर लहूको दिया, अर खुशी के मारे अपना सारा कुछ बेच दिया अर उस खेत ताहीं मोल ले लिया।

45 फेर सुर्ग का राज्य एक व्यापारी की तरियां सै जो अच्छे मोतियाँ की टोह म्ह था।

46 जिब उसनै एक घणा महंगा मोती मिल्या तो उसनै जाके अपना सारा कुछ बेच दिया अर उस ताहीं मोल ले लिया।

47 फेर उसनै कहा, सुर्ग का राज्य उस मछली के बड़े जाळ की ढाळ सै जो समुन्दर म्ह गेरया जावै, अर हरेक ढाळ की मच्छी ताहीं समेट ल्यावै।

48 अर जिब जाळ भरग्या, तो मछुआरे उस ताहीं किनारे पै खींच ल्यावै, अर बैटके बढ़िया-बढ़िया मच्छी तो बासणा म्ह कट्टी करी अर बेकार बगा दी।

49 दुनिया के अन्त म्ह इस तरियां ए होवैगा। सुर्गदूत आके दुष्ट लोगां नै धर्मियां तै न्यारे करैगें,

50 अर सुर्गदूत, दुष्ट लोगां नै आग के कुण्ड म्ह गेरैगें। जड़े रोणा, अर दाँत पिसणा होवैगा।

51 “के थमनै ये सारी बात समझी?” उननै उसतै कहा, “हाँ।”

52 यीशु नै उनतै कहा, “इस करके हरेक शास्त्री जो सुर्ग के राज्य का चेल्ला बणया सै, उस घरवासे की तरियां सै जो अपने भण्डार तै नयी अर पुरानी चीज काड्डे सै।”

53 जिब यीशु नै ये सारे उदाहरण कह लिये, तो ओड़ै तै चल्या गया।

54 अर अपणे नगर नासरत म्ह आकै उनके आराधनालय म्ह उननै इसा उपदेश देण लागग्या के वे हैरान होकै कहण लागये, “इसनै यो ज्ञान अर सामर्थ के काम कित्त तै मिले?”

55 के यो खात्ती का छोरा कोनी? अर के इसकी माँ का नाम मरियम अर इसके भाईयाँ का नाम याकूब, यूसुफ, शमौन अर यहूदा कोनी?

56 अर के इसकी सारी बेब्बे म्हारै बिचाळै कोनी रहन्दी? फेर इसनै यो सारा कित्त तै मिल्या?”

57 इस तरियां उननै उसके कारण ठोक्कर खाई, पर यीशु नै उनतै कह्या, “नबी का अपणे गाम अर घर नै छोड़ और किते निरादर कोनी होन्दा।”

58 अर उसनै ओड़ै उनके अविश्वास के कारण घणे चमत्कार के काम न्ही करै।

14

1 उस बखत चौथाई देश के गलील परदेस के राजा हेरोदेस नै यीशु का जिक्र सुण्या,

2 अर उसनै अपणे नौकरां तै कह्या, “यो यूहन्ना बपतिस्मा देण आळा सै! वो मरे होया म्ह तै जिन्दा उठया सै, इस्से करकै उसतै ये सामर्थ के काम दिक्खै सै।”

3 यूहन्ना ताहीं पकड़के बाँधया अर जेळ म्ह गेर दिया था। क्यूँके हेरोदेस नै अपणे भाई फिलिप्पुस के जिन्दा रहन्दे उसकी घरआळी हेरोदियास ताहीं अपणे धोरै राखली थी,

4 क्यूँके यूहन्ना नै उसतै कह्या था के इस ताहीं राखणा मूसा के नियम-कायदा के मुताबिक तेरे खात्तर ठीक कोनी।

5 ज्यातै वो उसनै मारणा चाहवै था, पर माणसां तै डरै था क्यूँके वे यूहन्ना नै नबी मान्ने थे।

6 पर जिब हेरोदेस का जन्म दिन आया, तो हेरोदियास की बेट्टी नै त्यौहार म्ह नाच दिक्खके हेरोदेस ताहीं राज्जी करया।

7 इसपै उसनै कसम खाकै वचन भर लिया, “जो कुछ तू माँगगी, मै तन्नै दियुंगा।”

8 वा अपणी माँ के उकसाण तै बोल्ली, “यूहन्ना बपतिस्मा देण आळे का सिर थाळ म्ह उरै मन्ने मँगवा दे।”

9 राजा घणा दुखी होया, पर अपणी कसम, अर गेल्या बैठण आळा के कारण, हुकम दिया के दे दिया जावै।

10 अर उसनै जेळ म्ह सैनिकां ताहीं भेजकै यूहन्ना का सिर कटवा दिया।

11 अर उसका सिर थाळ म्ह ल्याया गया अर छोरी ताहीं दिया गया, जिस ताहीं वा अपणी माँ धोरै लेगी।

12 फेर यूहन्ना के चेल्ले आए अर उसकी लाश ताहीं ले जाकै गाड़ दिया, अर जाकै यीशु ताहीं खबर दी।

13 जिब यीशु नै सुण्या, तो वो किस्ती पै चढकै ओड़ै तै किसे सुनसान जगहां ताहीं, एकान्त म्ह चल्या गया। माणस न्यू सुणके नगर-नगर तै पांए-पाँ उसके पाच्छै हो लिये।

14 यीशु किनारे पै पुहुचा तो एक बड्डी भीड़ देखी अर उनपै तरस खाया, अर उनके बिमारां ताहीं ठीक करया।

15 जिब साँझ होई तो उसके चेल्यां नै उसके धोरै आकै कह्या, “या सुनसान जगहां सै, अर वार होरी सै, माणसां ताहीं बिदा करया जावै के वे वस्तियाँ म्ह जाकै अपणे खात्तर खाणा मोल लियावै।”

16 पर यीशु नै उनतै कह्या, “उनका जाणा जरूरी कोनी! थमे इन्नै खाण नै द्यो।”

17 उननै यीशु तै कह्या, “उरै म्हारै धोरै पाँच रोट्टी अर दो मच्छियाँ नै छोड़के और कुछ कोनी सै।”

18 यीशु बोल्या, “उन ताहीं उरै मरै धोरै लियाओ।”

19 फेर यीशु नै माणसां ताहीं घास पै बैठण खात्तर कह्या, अर उन पाँच रोट्टी अर दो मच्छियाँ ताहीं लिया; सुगं कान्ही लखाके खाणे खात्तर परमेसवर का धन्यवाद करया अर रोट्टी तोड़-तोड़के चेल्यां ताहीं दी, अर चेल्यां नै माणसां ताहीं।

- 20 जब सारे खाकै छिकगे, तो चेल्यां नै बचे होए टुकड्या तै भरी होई बारहां टोकरी ठाई ।
- 21 अर खाण आळे लुगार्दियाँ अर बाळकां नै छोड़कै, पाँच हजार माणसां कै करीबन थे ।
- 22 फेर उसनै जिब्बे अपणे चेल्यां ताहीं किस्ती पै चढ़ण कै खात्तर मजबूर करया के वे उसतै पैहल्या पार चले जावै, जब ताहीं वो अपणे माणसां ताहीं बिदा करै ।
- 23 वो माणसां ताहीं बिदा करकै, प्रार्थना करण खात्तर उनतै अलग होकै पहाड़ पै चल्या गया; अर साँझ ताहीं वो ओड़ै एक्ला था ।
- 24 तब तक किस्ती समुन्दर कै किनारे तै भोत दूर जा ली थी अर झाल्लां तै थपेड़े खाकै डगमगाण लागरी थी, क्यूँके हवा स्याम्ही की थी ।
- 25 यीशु सबेरै तीन बजे कै लोवै-धोवै यीशु समुन्दर पै चाल्दे होए उनकै धोरै आया ।
- 26 चेल्लें उस ताहीं समुन्दर पै चाल्दे होए देखकै घबरागे । अर बोल्ले, “यो भूत सै!” अर भय के मारे किल्की मारण लागगे ।
- 27 फेर यीशु नै जिब्बे उनतै बात करी अर बोल्ल्या, “होसला राखो! मै सूँ, डरो मतना!”
- 28 पतरस नै उसतै जवाब दिया, “हे प्रभु, जै तू ए सै, तो मन्नै अपणे धोरै पाणी पै चालकै आण का हुकम दे ।”
- 29 यीशु बोल्ल्या, “आ!” फेर पतरस किस्ती पै तै उतरकै यीशु कै धोरै जाण ताहीं पाणी पै चाल्लण लागया ।
- 30 पर हवा नै देखकै डरगया, अर जब डूब्वण लागया तो किल्की मारकै बोल्ल्या, “हे प्रभु, मन्नै बचा!”
- 31 यीशु नै जिब्बे हाथ बढ़ाकै धाम लिया अर उसतै बोल्ल्या, “हे अल्पविश्वासी, तन्नै क्यातै शक करया?”
- 32 जब वे किस्ती पै चढ़गे, तो हवा थमगी ।
- 33 इस घटना नै देखकै उसकै चेल्यां नै जो किस्ती पै थे, उसकी बड़ाई करकै कहा, “साच्चए, तू परमेसवर का बेट्टा सै ।”
- 34 वे गलील समुन्दर पार करकै गन्नेसरत परदेस म्ह पोहचे ।
- 35 ओड़ै के माणसां नै उस ताहीं पिच्छाण लिया अर लोवै-धोवै के सारे देश म्ह खबर भेज दी, अर सारे बिमारां नै उसके धोरै ल्याए ।
- 36 अर उसतै बिनती करण लागगे के वे उननै अपणे लत्ते कै पल्ले तै ए छू लेण दे अर जितन्या नै उस ताहीं छुआ वे ठीक होगे ।

15

- 1 फेर यरुशलेम नगर तै कुछ फरीसी अर शास्त्री यीशु कै धोरै आकै बोल्ले,
- 2 “तेरे चेल्लें बुजुर्गां के रीति-रिवाजां ताहीं क्यातै टाळै सै, क्यूँ बिना हाथ धोए रोटी खावै सै?”
- 3 उसनै उन ताहीं जवाब दिया, “थम भी अपणी रीति-रिवाज कै कारण क्यातै परमेसवर का हुकम टाळौ सौ?”
- 4 क्यूँके परमेसवर नै कहा, ‘अपणे माँ-बाप की इज्जत कर, अर जो कोए माँ-बाप नै भुंडा बोल्लै, वो मार दिया जावे ।’
- 5 पर थम कहो सो के जै कोए अपणे माँ-बाप तै कहवै, ‘जो कुछ मन्नै धारे ताहीं अपणी सम्पत्ति म्ह तै देणा था, वो मन्नै परमेसवर ताहीं अर्पण ताहीं कर दिया,’
- 6 तो वो पिता का आदर ना करै, इस तरियां थमनै अपणी रीत-रिवाजां कै कारण परमेसवर का वचन टाळ दिया ।
- 7 हे कपटियों, यशायाह नबी नै धारे बाँरे म्ह या भविष्यवाणी ठीक करी सै”
- 8 ये माणस होट्टां तै तो मेरा आदर करै सै, पर उनका मन मेरै तै दूर रहवै सै ।
- 9 “अर वे खांम-खा मेरी भगति करै सै, क्यूँके माणसां के तरीक्यां नै धर्म उपदेश करकै सिखावै सै ।”
- 10 फेर उसनै माणसां ताहीं अपणे धोरै बुलाकै उनतै कहा, “सुणो, अर समझो

11 जो मुँह म्ह जावै सै, वो माणस नै अशुद्ध कोनी करदा, पर जो मुँह तै लिकडै सै, वोए माणस नै अशुद्ध करै सै।”

12 फेर चेल्यां नै आकै उसतै कह्या, “के तन्नै बेरा सै के फरीसियाँ नै यो वचन सुणकै ठोक्कर खाई?”

13 उसनै जवाब दिया, “हेरक पौधा जो मेरै सुर्गीय पिता नै न्ही लगाया, उखाड़ा जावैगा।

14 उन ताहीं जाण द्यो; वे आन्धे राह बताणीये सै अर आन्धा जै आन्धे नै राह दिखावै, तो दोन्नु ए खड्डे म्ह गिरैगें।”

15 न्यू सुणकै पतरस नै उसतै कह्या, “यो उदाहरण म्हारै ताहीं समझा दे।”

16 यीशु नै उनतै कह्या, “के थम भी इब ताहीं नासमझ सो?”

17 के थमनै न्ही बेरा के जो कुछ मुँह म्ह जावै वो पेट म्ह पडै सै, अर संडास कै जरिये लिकड जावै सै?

18 पर जो कुछ मुँह तै लिकडै सै, वो मन तै लिकडै सै, अर वोए माणस ताहीं अशुद्ध करै सै।

19 क्यूँके भुन्डे विचार, हत्या, जारी, विगान्नी विरबान्नी धोरै जाणा, चोरी, झूट्टी गवाही अर बुराई मन तै ए लिकडै सै।

20 येए सै जो माणस नै अशुद्ध करै सै, पर हाथ बिना धोए रोट्टी खाणा माणस नै अशुद्ध कोनी करदा।”

~~~~~  
(7:24-30)

21 यीशु ओडै तै लिकडकै, सूर अर सैदा के परदेसां कान्ही चलया गया।

22 उस परदेस तै एक कनानी विरबान्नी लिकडी, अर किल्ली मारकै कहण लागगी, “हे प्रभु! दाऊद की ऊलाद, मेरै पै दया कर! मेरी बेट्टी ताहीं ओपरी आत्मा घणी सतावै सै।”

23 पर यीशु नै उसतै कुछ जवाब कोनी दिया। फेर उसके चेल्यां नै आकै उसतै बिनती करी, “इस ताहीं बिदा करो, क्यूँके वा म्हारै पाच्छे रुक्के मारदी आवण लागरी सै।”

24 यीशु नै जवाब दिया, “इस्राएल के कुणवे की खोई होड भेड्डां नै छोड मै किसे के धोरै कोनी भेज्या गया।”

25 पर वा आई, अर यीशु ताहीं प्रणाम करकै कहण लागगी, “हे प्रभु, मेरी मदद कर।”

26 यीशु नै जवाब दिया, “छोरयां की रोट्टी लेकै कुत्त्या के आगुँगे गेरणा ठीक कोनी।”

27 उसनै कह्या, “साच्ची सै प्रभु, पर कुत्ते भी तो मेज के तळै बाळकां की रोट्टी के टुकडे खा लेवै सै।”

28 इसपै यीशु नै उस ताहीं जवाब दिया, “हे नारी, तेरा बिश्वास पक्का सै। जिंसा तू चाहवै सै, तेरे खात्तर उसाए हो।” अर उसकी बेट्टी उससे घडी तै चंगी होगयी।

29 यीशु ओडै तै गलील समुन्दर के धोरै आया, अर पहाड पै चढकै बैठगया।

30 फेर भीड की भीड उसके धोरै आई। वे अपणे गेल्या लंगड़ा नै, आन्धा नै, टुंडयाँ नै, गूंगया नै अर दुसरे घणेए माणसां नै उसके धोरै ल्याए, अर उन ताहीं उसके पायां म्ह गेर दिया, अर उसनै उन ताहीं ठीक करया।

31 जिब माणसां नै देख्या के गूँगे बोल्ले सै, अर टुंडे चंगे होवै सै, अर लंगड़े चाल्ले सै, अर आन्धे देख्के सै तो हेरान होकै इस्राएल के परमेसवर की बड़ाई करी।

32 यीशु नै अपणे चेल्यां ताहीं बुलाया अर कह्या, “मन्नै इस भीड पै तरस आवै सै, क्यूँके वे तीन दिनां तै मेरै गेल्या सै अर उनके धोरै कुछ खाण नै भी कोनी। मै उननै भूक्खा बिदा करणा न्ही चाहन्दा, कदे इसा ना हो राह म्ह थक हार के बेहोस हो जावै।”

33 चेल्यां नै उसतै कह्या, “हमनै इस वण म्ह कित्त तै इतनी रोट्टी मिलैगी के हम इतनी बड्डी भीड ताहीं छिकावा?”

34 यीशु नै उनतै बुझ्या, “थारे धोरै कितनी रोट्टी सै?” उननै कह्या, “सात, अर माडी-सी छोट्टी मच्छी।”

- 35 फेर उसनै माणसां ताहीं धरती पै बैठण का हुकम दिया ।  
 36 अर उन सात रोट्टी अर मच्छियाँ ताहीं लिया, परमेसवर का धन्यवाद करके तोड्या, अर अपणे चेल्यां ताहीं देन्दा गया, चेल्लें माणसां ताहीं ।  
 37 इस तरियां सारे खाकै छिकगे अर चेल्यां नै बचे होइ टुकड्या तै सात टोकरे टाए ।  
 38 खाण आळे विरवानियाँ अर बाळकां नै छोड़के चार हजार माणस थे ।  
 39 जिव वो भीड़ नै विदया करके किस्ती म्ह चढ़या अर मगदन देश की सीमा म्ह आया ।

## 16

- 1 फरीसियाँ अर सद्कियाँ नै धोरे आके उस ताहीं परखण कै खात्तर उसतै कह्या, “हमनै सुर्ग की कोए निशान्नी दिखा ।”  
 2 उसनै उन ताहीं जवाब दिया, “साँझ नै थम कहो सो, भौसम खुला रहवैगा, क्यातैके अकास लाल सै”,  
 3 अर तड़कैए नै कहो सो, ‘आज आँधी आवैगी, क्यूँके अकास लाल अर धूळ-भरया सै ।’ थम अकास के लछण देखकै उसका भेद बता सको सो, पर आज कै बखत म्ह जो होण लाग रह्य सै उसनै देखकै भेद क्यूँ नही बता सकदे ?  
 4 इस युग के बुरे अर जार माणस चिन्ह-चमत्कार टोह्लें सै, पर योना नबी के चिन्ह-चमत्कार नै छोड़ उन ताहीं ओर कोए चिन्ह-चमत्कार कोनी दिया जावैगा ।” अर वो उननै छोड़के चल्या गया ।  
 5 चेल्लें समुन्दर कै परली ओड़ पोहचे, पर वे रोट्टी लेणा भूलगे थे ।  
 6 यीशु नै उनकी कपट रूपी शिक्षा के बारे म्ह उनतै कह्या, “देखो, फरीसियाँ अर सद्कियाँ कै खमीर तै चौकन्ने रहियो ।”  
 7 वे आप्स म्ह विचार करण लागगे, “हम रोट्टी कोनी ल्याए ज्यातै वो इस तरियां कहवै सै ।”  
 8 न्यू जाणकै यीशु नै उनतै कह्या, “हे अल्प बिश्वासियों, थम क्यातै विचार करो सो के म्हारै धोरे रोट्टी कोनी सै ?  
 9 के थम इब ताहीं नही समझे ? के थमनै उन पाँच हजार की पाँच रोट्टी याद कोनी, अर ना यो के थमनै कितनी टोकरियाँ टाई थी ?  
 10 अर उन चार हजार की सात रोट्टी, अर ना यो के थमनै कितने टोकरे टाए थे ?  
 11 थम क्यातै नही समझदे के मन्नै थारे तै रोट्टियाँ कै बाबत नही कह्या, पर यो के फरीसियाँ अर सद्कियाँ के खमीर तै चौकन्ने रहियो ।”  
 12 फेर उनके समझ म्ह आया के उसनै रोट्टी कै खमीर तै नही, पर फरीसियाँ अर सद्कियाँ की शिक्षा तै चौकन्ने रहण नै कह्या था ।  
 13 यीशु कैसरिया फिलिप्पी के परदेस म्ह आया, अर अपणे चेल्यां तै बुद्धिण लाग्या, “लोग मुझ माणस कै बेट्टे नै के कहवै सै ?”  
 14 वे बोल्ले, “कुछ तो यूहन्ना बपतिस्मा देण आळा कहवै सै, अर कुछ एलिय्याह, अर कुछ यिर्मयाह या नबियाँ म्ह तै कोए एक कहवै सै ।”  
 15 उसनै उनतै कह्या, “पर थम मन्नै के कहो सो ?”  
 16 शमौन पतरस नै जवाब दिया, “तू जिन्दे परमेसवर का बेट्टा मसीह सै ।”  
 17 यीशु नै उस ताहीं जवाब दिया, “हे शमौन, योना के बेट्टे, तू धन्य सै; क्यूँके माँस अर लहू नै नही, पर मेरे पिता नै जो सुर्ग म्ह सै, या बात तेरे पै जाहिर करी सै ।  
 18 अर मै भी तेरे तै कहूँ सूँ के तू पतरस सै, अर मै इस पत्थर पै अपणी कलीसिया बणाऊँगा, अर अधोलोक के फाटक उसपे हावी कोनी होवेंगें ।  
 19 मै तन्ने सुर्ग के राज्य की ताळी दियुंगा जो कुछ तू धरती पै बाँधेगा, वो सुर्ग म्ह बंधेगा; अर जो तू धरती पै खोलैगा, वो सुर्ग म्ह खुलैगा ।”  
 20 फेर उसनै चेल्यां ताहीं चिताया के किसे तै ना कहियो के मै मसीह सूँ ।

21 उस बखत तै यीशु अपणे चेल्यां तै बताण लाग्या, “जरूरी सै के मै यरुशलम म्ह जाऊँ अर यहूदी अगुवें, परधान याजकां, शास्त्रियाँ के हाथ्यां तै घणा दुख ठाऊँ; अर मार दिया जाऊँ; अर तीसरे दिन जी उट्टूँ।”

22 इसपै पतरस उसनै न्यारा ले जाके झिड़कण लाग्या, “हे प्रभु, परमेसवर इसा ना करै! तेरे गेल्या इसा कदे ना होवैगा।”

23 उसनै पलटके पतरस तै कह्या, “हे शैतान, मेरै स्याम्ही तै दूर हो! तू मेरै खात्तर टोक्कर का कारण सै; क्यातैके तू परमेसवर की बात्तां पै न्ही, पर माणसां की बात्तां पै मन लगावै सै।”

24 फेर यीशु नै अपणे चेल्यां तै कह्या, “जो कोए मेरा चेल्ला बणणा चाहवै, वो अपणी ए इच्छा पूरी ना करै बल्के अपणे दुखां का करूस ठाके, मेरै पाच्छै हो लेवै।

25 क्यूँके जो अपणी जान बचाणा चाहवैगा, वो उसनै खोवैगा; अर जो कोए मेरै खात्तर जान खोवैगा, वो उसनै पावैगा।

26 जै माणस सारी दुनिया नै पा लेवै, अर अपणी जान का नुकसान ठावै, तो उसनै के फायदा होगा? या माणस अपणी जान के बदले के देवैगा?

27 मै माणस का बेटटा अपणे सुर्गदूतां के गेल्या अपणे पिता की महिमा म्ह आऊँगा, अर उस बखत भै हरेक नै उसके काम्मां के मुताबिक प्रतिफळ देऊँगा।”

28 “मै थारे तै साच्ची कहूँ सूँ जो आडै खडे सै उन म्ह तै कुछ इसे सै के जिब तक वे मुझ माणस के बेटटे नै उसके राज्य म्ह आन्दे होए ना देख लेंगे तब ताहीं मौत उननै छू भी न्ही पावैगी।”

## 17

1 छः दिनां पाच्छै यीशु नै पतरस अर याकूब अर उसके भाई यूहन्ना ताहीं गेल्या लिया, अर उन ताहीं एकले म्ह किसे ऊँचे पहाड़ पै लेग्या।

2 ओडै उनके स्याम्ही उसका रूप म्ह बदलाव होया, अर उसका मुँह सूरज की ढाळ चमक्या अर उसके लते चाँदणे की ढाळ धोळे होगये।

3 अर मूसा नबी अर एलिय्याह उसके गेल्या बात करदे होइ दिक्खे।

4 इसपै पतरस नै यीशु तै कह्या, “हे प्रभु, म्हारा उरै रहणा ठीक सै। जै तेरी मर्जी हो तो मै उरै तीन मण्डप बणाऊँ, एक तेरे खात्तर, एक मूसा नबी खात्तर, एक एलिय्याह नबी खात्तर।”

5 वो बोल्लणए लागरया था के एक चमकदा होया बादळ उनपै छाग्या, अर उस बादळ म्ह तै या वाणी लिकड़ी, “यो मेरा प्यारा बेटटा सै, जिसतै मै राज्जी सूँ: इसकी सुणो।”

6 चेल्लें न्यू सुणके मुँह के बळ गिरगे अर घणे डरगे।

7 यीशु नै धोरै आके उन ताहीं छुया, अर बोल्या, “उठो, डरो मतना।”

8 फेर उननै अपणी निगांह करी अर यीशु नै छोड़ और किसे ताहीं कोनी देख्या।

9 जिब वे पहाड़ पै तै उतरण लागरे थे, तो यीशु नै उनतै यो हुकम दिया, “जिब ताहीं मै माणस का बेटटा मरे होया म्ह तै जिन्दा न्ही हो जाऊँगा, तब ताहीं जो कुछ थमनै देख्या सै किसे तै ना कहियो।”

10 इसपै उसके चेल्यां नै उसतै बुझ्याया, “फेर शास्त्री क्यातै कहवै सै के एलिय्याह का पैहल्या आणा जरूरी सै।”

11 उसनै जवाब दिया, “एलिय्याह जरूर आवैगा, अर सारा कुछ सुधरैगा।

12 पर मै थमनै कहूँ सूँ के एलिय्याह आ लिया, अर माणसां नै उस ताहीं न्ही पिच्छणा, पर जिसा चाह्या उसाए उसके गेल्या करया। इस तरियां तै मै माणस का बेटटा भी उनके हाथ्यां तै दुख ठाऊँगा।”

13 फेर चेल्यां नै समझया के उसनै म्हारै तै यूहन्ना बपतिस्मा देणीये के बाबत कह्या सै।

14 जिब वो भीड़ के धोरै पोहचे, तो एक माणस उसके धोरै आया, अर गोड़डे टेक के कहण लाग्या,

15 “हे प्रभु, मेरे बेटे पै दया कर! क्यूँके उस ताहीं मिर्घी आवै सै, अर वो घणा दुख ठावै सै; अर बार-बार आग म्ह अर बार-बार पाणी म्ह पड़ ज्या सै।

16 अर मै उसनै तेरे चेल्यां धोरै ल्याया था, पर वे उसनै ठीक कोनी कर सके।”

17 यीशु नै जवाब दिया, “हे अबिश्वासी अर जिद्दी माणसों, मै कद ताहीं थारे गेल्या रहूंगा? कद ताहीं थारी सहूंगा? उसनै उरै मेरै धोरै ल्याओ।”

18 फेर यीशु नै ओपरी आत्मा ताहीं धमकाया, वा उस म्ह तै लिकड़ग्यी अर छोरा उस्से बखत ठीक होग्या।

19 फेर चेल्यां नै एकले म्ह यीशु कै धोरै आकै कह्या, “हम उसनै क्यातै न्ही काढ सके?”

20 उसनै उनतै कह्या, “अपणे विश्वास की कमी के कारण, क्यूँके मै थमने साच्ची कहूँ सूँ, जै थारा विश्वास राई के दाणे के बराबर भी हो, तो इस पहाड़ तै कह सकोगे, ‘उरै तै सरकके ओड़ै चल्या जा’, तो वो चल्या जावेगा, अर कोए बात थारे खात्तर मुश्किल कोनी होवेगी।”

21 (पर या जात बिना प्रार्थना अर ब्रत के कोनी लिकड़दी।)

22 जिव वे गलील परदेस म्ह थे, तो यीशु नै उनतै कह्या, “मै माणस का बेटा माणसां के हाथ्यां म्ह पकड़वाया जाऊंगा।

23 वे मन्ने मार देवेंगे, अर मै तीसरे दिन जिन्दा हो जाऊंगा।” इसपै वे घणे उदास होए।

24 जिव वे कफरनहूम पोहचे, तो मन्दर का कर लेण आळा नै पतरस कै धोरै आणके बुद्धया, “के थारा गुरु, मन्दर का कर कोनी देंदा?”

25 उसनै कह्या, “हाँ, देवै सै।” जिव वो घरां आया, तो यीशु नै उसके बुद्धयाण तै पैहल्याए उसतै कह्या, “हे शमौन, तू के सोचै सै? धरती के राजा चुंगी किन तै लेवै सै? अपणे बेटचाँ तै या बिगान्याँ तै?”

26 पतरस नै उसतै कह्या “बिगान्याँ तै।” यीशु नै उसतै कह्या “तो बेटे बचगे।

27 तोभी इस खात्तर के हम उननै ठोक्कर ना खुवावा, तू झील कै किनारे जाके कांडा गेर, अर जो मच्छी पैहले लिकड़े, उसनै ले, उसका मुँह खोल्लण पै तेरे ताहीं एक सिक्का (जिसकी किम्मत चार दिन की मजदूरी के बराबर हो सै) मिलैगा, उस्से नै लेके मेरै अर अपणे बदले म्ह दे दिये।”

## 18

1 उस घड़ी चेल्ले यीशु कै धोरै आके बुद्धयाण लागगे, “सुर्ग के राज्य म्ह बड़ड़ा कौण सै?”

2 इसपै उसनै एक बाळक ताहीं धोरै बुलाके उनकै बिचाळै खड्या करया,

3 अर कह्या, “मै थमनै सच कहूँ सूँ के जिव ताहीं थम न्ही बदलो अर बाळकां की ढाळ नम्र न्ही बणो, थम सुर्ग के राज्य म्ह बड़ न्ही सकदे।

4 जो कोए अपणे-आपनै इस बाळक की ढाळ छोटटा करैगा, वो सुर्ग के राज्य म्ह बड़ड़ा होवेगा।

5 अर जो कोए मेरै नाम तै एक इसे बाळक ताहीं अपणावै सै वो मन्ने अपणावै सै।”

6 पर जो कोए इन छोटया बाळकां समान जो मेरै पै विश्वास करै सै, किसे तै भी पाप करवावै, तो उसके खात्तर भला योए सै के एक बड़ड़ी चाक्की का पाट उसके गळ म्ह लटकाया जावै, अर वो डून्हा समुन्दर म्ह डबोया जान्दा।

7 ठोकरां के कारण दुनिया पै हाय! ठोकरां का लागणा जरूरी सै; पर धिक्कार सै उस माणस पै जिसके जरिये ठोक्कर लागै सै।

8 जै तेरा हाथ या तेरा पैर तेरे तै पाप करवावै सै, तो उसनै काटके बगा दे, टुंडा या लंगड़ा होके जीवन म्ह दाखल होणा इसतै भला सै के दो हाथ या दो पैर रहंदे होए तू अनन्त आग म्ह गेरया जावै।

9 जै तेरी आँख तेरे तै पाप करवावै सै, तो उस ताहीं लिकाड़के फेक दे, काणा होके अनन्त जीवन म्ह बड़णा तेरे खात्तर भला सै, ना के दो आँख रहंदे होए तू नरक की आग म्ह गेरया जावै।



10 देखो, थम इन छोट्या म्ह तै किसे नै तुच्छ ना जाणीयो, क्यूँके मै थमनै कहूँ सूँ के सुर्ग म्ह उनके सुर्गदूत मेरे सुर्गीय पिता की मौजूदगी म्ह सदा रहवै सै ।

11 (क्यूँके मै माणस का बेटा खोये होया नै बचाण आया सूँ ।)

12 थारा इसके बारे म्ह के विचार सै? जै किसे माणस की सौ भेड़ हों, अर उन म्ह तै एक भटक जावै, तो के वो निन्यानवे ताहीं छोड़के, अर पहाड़ां पै जाके, उस भटकी होई नै कोनी टोहवैगा?

13 अर जै इसा हो के उसनै पावै, तो मै थमनै साच्ची कहूँ सूँ, के वो उन निन्यानवे भेड़ों के खात्तर जो भटकी कोनी थी, इतणा आनन्द कोनी करैगा जितना के इस भेड़ के खात्तर करैगा ।

14 इससे ढाळ थारे पिता की जो सुर्ग म्ह सै या मर्जी कोनी के इन छोट्यां म्ह तै एक भी नाश हो ।

15 “जै तेरा बिश्वासी भाई तेरे खिलाफ कसूर करै, तो जा अर एक्ले म्ह बतळा के उसनै समझा, जै वो तेरी सुणके पछतावै तो तन्नै अपणे भाई ताहीं पा लिया ।

16 जै वो तेरी न्ही सुणै, तो एक या दो जन नै अपणे गेल्या और ले जा, क्यूँके मूसा नबी के नियम-कायदा के मुताबिक ‘हरेक बात दो या तीन तै ज्यादा गवाह के स्याम्ही सच साबित हो जावै ।’

17 जै वो उनकी भी न्ही मान्ने, तो कलीसिया तै कह दे, पर जै वो कलीसिया की भी कोनी मान्ने तो तू यो समझ ले के वो गैर यहूदी अर चुंगी लेण आळे जिसा सै ।”

18 “मै थमनै साच्ची कहूँ सूँ, जो कुछ थम धरती पै बांधोगे, वो सुर्ग म्ह बंधैगा अर जो कुछ थम धरती पै खोल्लोगे, वो सुर्ग म्ह खुलैगा ।”

19 “फेर मै थमनै कहूँ सूँ, जै थारे म्ह तै दो जणे धरती पै किसे बात के खात्तर एक मन होके बिनती करै, तो वा मेरे पिता की ओड़ तै जो सुर्ग म्ह सै, उनके खात्तर हो जावैगी ।

20 क्यूँके जडै दो या तीन मेरै नाम पे कट्टे होवै सै, ओड़ै मै उनके बिचाळै म्ह होऊँ सूँ ।”

21 जब पतरस नै धोरै आके उसतै कहा, “हे प्रभु, जै मेरा भाई कसूर करदा रहवै, तो मै कितनी बार उस ताहीं माफ करूँ? के सात बार?”

22 यीशु नै उसतै कहा, “मै तेरे तै यो न्ही कहन्दा के सात बार, बल्के सात बार के सत्तर गुणा तक माफ करिये ।”

23 “इस करके सुर्ग के राज्य की तुलना इस उदाहरण तै करी जा सकै सै, किसे राजा नै अपणे नौकरां का लेक्खा (ब्यौरा) लेणा चाह्या ।

24 जब वो लेक्खा लेण लाग्या, तो एक जणा उसके स्याम्ही ल्याया गया जो दस हजार तोड़े\* का कर्जवान था ।

25 जब के चुकता करण नै उसके धोरै कुछ कोनी था, तो उसके माल्लिक नै कहा, ‘थो अर इसकी घरआळी अर बाळ-बच्चे अर जो कुछ इसका सै सारा बेच्या जावै, अर कर्ज चुकता करया जावै ।’”

26 “इसपै उस नौक्कर नै उसके पायां म्ह पड़के उस ताहीं कहा, ‘हे राजा धीरज धर, मै सारा कुछ भर दियुँगा ।’

27 इसपै राजा नै तरस खाके उस नौक्कर ताहीं छोड़ दिया, अर उसका कर्जा भी माफ कर दिया ।”

28 “पर जब वो नौक्कर बाहरणै लिकड़या, तो उसके साथ के नौकरां म्ह तै एक उसतै मिल्या जो उसके सौ दीनार (100 दिन की मजदूरी) का कर्जदार था; उसनै पकड़के उसका गळा घोट्या अर कहा, ‘जो कुछ मेरा तेरे पै कर्ज सै भर दे ।’”

29 “इसपै उसका साथ का नौक्कर पायां म्ह पड़के उसतै बिनती करण लाग्या, ‘धीरज धर, मै सारा कुछ भर दियुँगा ।’”

30 वो न्ही मान्या, पर जाके उस ताहीं जेळ म्ह गेर दिया के जब ताहीं कर्जा ना भर दे, तब तक ओड़ै रहवै ।

31 उसके गेल्या के नौक्कर यो जो होया था देखके घणे उदास होए, अर जाके अपणे राजा ताहीं पूरा हाल बता दिया ।

\* 18:24 18:24 (1 तोड़ा 15 साल की मजदूरी के बराबर सै)

32 “फेर राजा नै उस ताहीं बुलाकै उसतै कह्या, हे दुष्ट नौकर, तन्नै जो मेरै तै बिनती करी, तो मन्नै तेरा वो सारा कर्जा माफ कर दिया।

33 ज्यातै जिस ढाळ मन्नै तेरे पै दया करी, उससे तरियां के तन्नै भी अपणे साथ के नौकर पै दया न्ही करणी चाहिये थी?”

34 अर उसकै माल्लिक नै छो म्ह आकै उस ताहीं दण्ड देण आळे के हाथ्यां म्ह सौप दिया, के जिव ताहीं वो सारा कर्जा भर न्ही देवै, तब तक उनके हाथ्यां म्ह रहवै।

35 “इस्से ढाळ जै थारे म्ह तै अपणे भाई नै ना माफ करै तो मेरा पिता जो सुर्ग म्ह सै थारे तै उसाए करैगा।”

## 19

1 जिव यीशु नै ये बात कह ली, तो गलील परदेस तै चल्या गया; अर यरदन नदी कै परली ओड़ यहूदिया परदेस म्ह आया।

2 फेर बड़डी भीड़ उसकै पाच्छै हो ली, अर उसनै ओड़ै उन ताहीं चंगा करया।

3 फेर फरीसी उसनै परखण खात्तर धारे आकै बोल्ले, “के किसे भी कारण तै अपणी घरआळी ताहीं छोड़णा ठीक सै?”

4 उसनै जवाब दिया, “के थमनै न्ही पढ़या के जिसनै उन ताहीं बणाया, उसनै शरुआत तै नर अर नारी बणाकै कह्या,

5 इस कारण माणस अपणे माँ-बाप तै न्यारा होकै अपणी घरआळी के गेल्या रहवैगा अर वे दोन्नु एकए तन होवैगें?”

6 इस करके इव वे दो न्ही, पर एक तन सै। इस करके जिन ताहीं परमेसवर नै जोड़या सै, उन ताहीं माणस न्यारा ना करै।”

7 उननै उसतै कह्या, “फेर मूसा नबी नै यो क्यातै ठहराया के तलाक देकै उस ताहीं छोड़दे?”

8 उसनै उनतै कह्या, “मूसा नबी नै थारे मन की कठोरता कै कारण थारे तै अपणी-अपणी घरआळी ताहीं छोड़ देण का हुकम दिया, पर शरुआत म्ह इसा कोनी था।

9 अर मै थमनै कहूँ सूँ, के जो कोए जारी नै छोड़कै और किसे कारण तै अपणी घरआळी नै छोड़कै दुसरा ब्याह करै, वो जारी करै सै, जो उस छोड़डी होई तै ब्याह करै, वो भी जारी करै सै।”

10 चेल्यां नै यीशु तै कह्या, “जै माणस का विरबान्नी के गेल्या इसा सम्बन्ध सै, तो ब्याह करणा आच्छा कोनी।”

11 यीशु नै उनतै कह्या, “हरेक कोए इन उपदेशां पै चाल न्ही सकदे, सिर्फ वे जिन ताहीं या शक्ति देई गई सै।

12 क्यूँके कुछ नपुंसक इसे सै, जो माँ के पेट या गर्भ ए तै इसे जन्मे; अर कुछ नपुंसक इसे सै, जिन ताहीं माणस नै नपुंसक बणाया; अर कुछ नपुंसक इसे सै, जिन नै सुर्ग के राज्य के खात्तर खुद ताहीं नपुंसक बणाया सै। जो इस बात ताहीं समझ सकै सै, वे समझ ले।”

13 फेर माणस बाळकां नै उसकै धारे लियाए, के वो उनके उप्पर हाथ धरे अर प्रार्थना करै; पर चेल्यां नै उन ताहीं धमकाया।

14 यीशु नै कह्या, “बाळकां नै मेरै धारे आण द्यो, अर उन ताहीं मना मतना करो, क्यूँके सुर्ग का राज्य इसाए का सै।”

15 अर वो उनपै हाथ धरकै ओड़ै तै चल्या गया।

16 एक माणस यीशु कै धारे आया अर उसतै कह्या, “हे गुरु, मै कौण सा भला काम करूँ के अनन्त जीवन पाऊँ?”

17 यीशु नै उसतै कह्या, “तू मेरै तै भलाई के बाबत क्यातै बुझै सै? भला तो एकैए सै, पर जै तू जीवन म्ह दाखल होणा चाहवै सै, तो हुकमां नै मान्या कर।”

18 उसनै यीशु तै कह्या, “कौण-से हुकम?” यीशु बोल्या, “खून ना करियो, जारी ना करियो, चोरी ना करियो, झूठ्ठी गवाही ना दियो,

19 अपने माँ-बाप का आदर करियो, अर अपने पडौसी तै अपने जिसा प्यार राखियो ।”

20 उस जवान नै उसतै कहा, “इन सारया ताहीं तो मन्नै मान्या सै, इब मन्नै किस बात की कमी सै?”

21 यीशु नै उसतै कहा, “जै तू सिध्द होणा चाहवै सै तो जा, अपना सारा माळ बेचकै कंगालां ताहीं दे, अर तन्नै सुर्ग म्ह धन मिलैगा; अर आकै मेरा चेल्ला बणण खात्तर मेरै पाच्छै हो ले ।”

22 पर वो जवान या बात सुणकै उदास होकै चल्या गया, क्यूँके वो घणा साहूकार था ।

23 फेर यीशु नै अपने चेल्यां तै कहा, “मै थमनै साचची कहूँ सूँ के साहूकार का सुर्ग के राज्य म्ह बड़णा ओक्खा सै ।

24 थार ताहीं फेर कहूँ सूँ के जिस तरियां तै ऊँट का सूई कै मोरै म्ह तै लिकड़णा आसान हो सकै सै । पर परमेसवर के राज्य म्ह साहूकार का बड़णा भोत मुश्किल सै ।”

25 न्यू सुणकै चेल्यां नै हैरान होकै कहा, “फेर किसका उद्धार हो सकै सै ।”

26 यीशु नै उनकी ओड़ लखाकै कहा, “माणसां तै तो यो कोनी हो सकदा, पर परमेसवर तै सारा कुछ हो सकै सै ।”

27 इसपै पतरस नै उसतै कहा, “देख, हम तो सारा कुछ छोड़के तेरे पाच्छै हो लिए सा: तो हमनै के मिलैगा?”

28 यीशु नै उनतै कहा, “मै थमनै साचची कहूँ सूँ के नयी सृष्टि म्ह जिब माणस का बेट्टा अपनी महिमा के सिंहासन पै बैठेगा, तो थम भी जो मेरे पाच्छै हो लिए सो, बारहां सिंहासनां पै बैठके इस्राएल के बारहां गोत्रां का न्याय करोगे ।

29 अर जिस किसे नै घर, या भाई-भाण, या माँ-बाप, या बाळ-बच्चे, या खेत्तां ताहीं मेरै नाम कै खात्तर छोड़ दिया सै, उस ताहीं सौ गुणा मिलैगा, अर वो अनन्त जीवन का हकदार होवैगा ।

30 पर भोत-से जो पैहले सै, पाच्छले होंगे; अर जो पाच्छले सै, पैहले होंगे ।”

## 20

1 यीशु नै अपने चेल्यां ताहीं सिखाण खात्तर एक और उदाहरण दिया, “सुर्ग का राज्य किसे घर के मालिक की ढाळ सै, जो तड़कैए लिकड़या के अपने अंगूर के बाग म्ह मजदूरां नै लावै ।

2 वो मजदूरां नै एक दीनार (एक दिन की मजदूरी) रोज की दिहाड़ी पै ल्याया अर उननै अपने अंगूर के बाग म्ह भेज्या ।”

3 “फेर सबेरै के नौ बजे पाच्छै, उसनै लिकड़कै और माणसां ताहीं बजार म्ह खड़े देख्या,

4 अर उसनै कहा, “थम भी अंगूर के बाग म्ह जाओ, अर मै एक दिन की जो भी मजदूरी थारी बणै सै वा थमनै दियुंगा ।” अर वे भी काम पै चले गये ।

5 फेर उसनै बारहां बजे अर तीन बजे कै लोवै लिकड़कै उससे तरियां करया ।

6 तकरीबन पाँच बजे फेर वो अपने घर तै गया अर उसनै फेर कई माणसां ताहीं ओड़ै खड़े देख्या, अर उसनै कहा, “थम क्यांते सारे दिन उरै बेकार खड़े रहों सों?” उननै उसतै कहा, “ज्यांते के किसे नै म्हारै ताहीं मजदूरी पै कोनी लगाया ।”

7 “उसनै उनतै कहा, “थम भी मेरे अंगूर के बाग म्ह काम करण खात्तर जाओ ।”

8 “साँझ नै अंगूर के बाग के मालिक नै अपने भण्डारी तै कहा, ‘मजदूरां ताहीं बुलाकै पाच्छल्यां तै लैके पैहल्या ताहीं उननै मजदूरी दे-दे ।’”

9 “जो पाँच बजे लगाये थे, उन ताहीं एक-एक दीनार (एक दिन की मजदूरी) मिल्या ।

10 जो पैहल्या आये उननै यो सोच्या के म्हारै ताहीं घणा मिलेगा, पर उननै भी एक-एक दीनार (एक दिन की मजदूरी) ए मिल्या ।

11 मजदूरी तो उननै ले ली पर वे अंगूर के बाग के मालिक पै बिरड़ाकै कहण लागे,

12 “जो पाच्छै लागे थे, उननै बस एक घंटा काम करया, अर तन्नै म्हारै ताहीं भी उतनाए दिया जितना उन ताहीं, जिब के हमनै दिन-भर बोझ ठाया अर धाम सहया?”

13 “बाग के मालिकक नै उन म्ह तै एक ताहीं जवाब दिया, हे दोस्त, मन्नै तेरे गैल कोए अन्याय कोनी करया। के तन्नै ए मेरे तै एक दीनार (एक दिन की मजदूरी) कोनी तय करया था?

14 जो तेरा सै, ठा ले अर चल्या जा; मेरी मर्जी, के जितना तन्नै दियुँ उतनाए इस पाच्छले ताहीं भी दियुँ।

15 के यो ठीक कोनी के मै अपने धन का जो चाहूँ वो करूँ? के मेरै भले होण के कारण तू कइवी नजर तै देखै सै?”

16 “इस तरियां तै जो पाच्छले सै, वे पैहले होंगे, वे पैहले सै, पाच्छले होवेंगे।”

17 जब यीशु अपने बारहां चेल्यां गैल यरुशलेम नगर म्ह जाण लागरया था तो उन ताहीं एकान्त म्ह लेगया, अर राह म्ह चालते-चालते उनतै बोल्या,

18 “देखो, हम यरुशलेम नगर म्ह जावां सा; अर मै माणस का बेट्टा प्रधान याजकां अर शास्त्रियां के हाथ्यां पकड़वाया जाऊंगा, वे मेरे खात्तर मौत की सजा तय करैंगे।

19 अर मेरे ताहीं गैर यहूदियां के हाथ्यां म्ह सीपेगें, वे मेरा मजाक उड़ावेंगें, कोड़े मारैंगें, क्रूस पे चढ़ावैंगें, अर मै तीसरे दिन जिन्दा हो जाऊंगा।”

20 फेर जब्दी के बेटचां की माँ नै, अपने बेटचां के गेल्या यीशु के धरै आके प्रणाम करया, अर उसतै कुछ माँगण लागगी।

21 यीशु नै उसतै कह्या, “तू के चाहवै सै?” वा यीशु तै बोल्ली, “मन्नै वचन दे, के मेरे ये दो बेट्टे तेरे राज्य म्ह एक तेरे सोळे अर दुसरा तेरे ओळै कान्ही बेट्टे।”

22 यीशु नै जवाब दिया, “थमनै न्ही बेरा के थम के माँगो सों। जो दुख का कटोरा मै पीण पै सूँ, के थम वो दुख का कटोरा पी सको सो?” उननै उस ताहीं कह्या, “पी सकां सा।”

23 उसनै उनतै कह्या, “थम मेरे दुख का कटोरा तो पी ल्योगे, पर अपने सोळे अर ओळै कान्ही किसे ताहीं बिटाणा मेरा काम कोनी, पर जिनके खात्तर मेरै पिता की ओड़ तै त्यार करया गया, उननै ए खात्तर सै।”

24 न्यू सुणके दसो चेल्लें उन दोन्नु भाईयां पै छो करण लागगे।

25 यीशु नै उन ताहीं धरै बुलाके कह्या, “थम जाणो सो के गैर यहूदियां के हाकिम उनपै राज करै सै; अर जो बड़े सै, वे उनपै हक जमावै सै।

26 पर थारे म्ह इसा कोनी होवैगा; जो कोए थारे म्ह बड़ड़ा होणा चाहवै, वो थारा सेवक बणै,

27 अर जो थारे म्ह प्रधान होणा चाहवै, वो दास बणै,

28 जिसा के मै माणस का बेट्टा, ज्यातै कोनी आया के मेरी सेवा-पाणी करी जावै, पर ज्यातै आया के खुद सेवा-पाणी करै, अर घणखरयां के छुटकारै के खात्तर अपनी जान देऊँ।”

29 जब वे यरीहो नगर तै लिकड़े थे, तो एक बड़डी भीड़ यीशु के पाच्छै हो ली।

30 अर दो आन्धे, जो सड़क के किनारे बेट्टे थे, न्यू सुणके के यीशु जाण लागरया सै, रुक्का मारके कहण लागगे, “हे प्रभु, हे दाऊद की ऊलाद, म्हारै पै दया कर।”

31 माणसां नै उन ताहीं धमकाया के बोल-बाल्ले रहवै; पर वे और भी रुक्के मारके बोल्ले, “हे प्रभु, दाऊद की ऊलाद, म्हारै पै दया कर।”

32 फेर यीशु नै खड़े होके, उन ताहीं बुलाया अर कह्या, “थम के चाहवो सो के मै थारे खात्तर करूँ?”

33 उननै उसतै कह्या, “हे प्रभु, योए के हम देखण लाग जावां।”

34 यीशु नै तरस खाके उनकी आँखां पै हाथ लगाया, अर वे जिब्बे देखण लागगै; अर उसके पाच्छै हो लिये।

## 21

1 जब वे यरुशलेम नगर के लोवे पोहचे अर जैतून पहाड़ पै बैतफगे गाम के धरै आये, तो यीशु नै दो चेल्यां ताहीं न्यू कहके भेज्या,

2 “स्याम्ही कै गाम म्ह जाओ। ओडै पोहोचदये एक गधी बंधी होई, अर उसके गेल्या बच्चा थमनै मिलेगा। उननै खोल कै मेरै धोरै ल्याओ।

3 जै थारै ते कोए कुछ कहवै, तो कहियो के प्रभु नै इसकी जरूरत सै, अर वो तोळा उसनै भेज देवैगा।”

4 यो ज्यांतै होया के जो वचन नबी के जरिये कह्या गया था, वो पूरा हो

5 “यरुशलैम के लोग्गं तै कहो, देख, थारा राजा थारे धोरै आवै सै; वो नम्र सै, अर गधे पै बेट्या सै; बल्के गधी के बच्चे पै।”

6 चेल्यां नै जाकै, जिसा यीशु नै उनतै कह्या था, उस्से तरियां करया।

7 अर गधी अर बच्चे ताहीं ल्याकै, उसपै अपणे लत्ते गरे, अर वो उसपै बैठग्या।

8 फेर घणखरे माणसां नै अपणे लत्ते राह म्ह बिछ्याये, अर माणसां नै दरखतां तै डाळियाँ काटकै राह म्ह बिछ्याई।

9 जो भीड़ आगै-आगै अर पाच्छै-पाच्छै चाल्ली आवै थी, रुक्के मार-मारकै कहवै थी, “दाऊद की ऊलाद ताहीं होशाना\*, धन्य सै वो जो प्रभु के नाम तै आवै सै, अकास म्ह होशाना।”

10 जिव वो यरुशलैम म्ह बड़या, तो सारे नगर म्ह खलबल्ली माचगी, अर माणस कहण लागगे, “यो कौण सै?”

11 माणसां नै कह्या, “यो गलील परदेस के नासरत नगर का नबी यीशु सै।”

12 यीशु नै परमेसवर कै मन्दर म्ह जाकै उन सारया ताहीं, जो मन्दर म्ह लेण-देण करे थे, काढ दिया, अर सर्राफां (पईसा का लेण देण करण आळे) के पीढ़े अर कबूतर बेचणीयाँ की चौकियाँ उल्ट दी;

13 अर उनतै कह्या, “लिख्या सै, मेरा घर प्रार्थना का घर कुह्वावैगा; पर थम उसनै डाकुवां की गुफा बणाओ सो।”

14 फेर आन्धे अर लंगड़े, मन्दर म्ह उसकै धोरै आये, अर उसनै उन ताहीं ठीक करया।

15 पर जिव प्रधान याजकां अर शास्त्रियाँ नै इन अनोकखे काम्मां ताहीं, जो उसनै करे, अर छोरयां ताहीं मन्दर म्ह दाऊद की ऊलाद ताहीं होशाना रुक्के मारदे देख्या, तो वे छो म्ह भरगे,

16 अर उसतै कहण लागगे, “के तू सुणै सै के ये के कहवै सै?” यीशु नै उनतै कह्या, “हाँ; के थमनै यो कदे कोनी पढ्या: ‘बाळकां अर दूध पीन्दे बच्चां कै मुँह तै तन्नै घणी जै-जै कार कराई?’”

17 फेर वो उननै छोड़कै नगर कै बाहरणै आकै बैतनिय्याह गाम म्ह गया अर ओडै रात बिताई।

18 तड़कैए जिव वो नगर नै बोहड़ण लागरया था तो उसनै भूख लागगी।

19 सड़क कै किनारे अंजीर का एक दरखत देखकै वो उसकै धोरै गया, अर पत्त्या नै छोड़ उस म्ह और कुछ ना पाके उसतै कह्या, “इब तै तेरे म्ह फेर कदे फळ कोनी लाग्गै।” अर अंजीर का दरखत जिव्वे सूखग्या।

20 न्यू देखकै चेल्यां नै हैरानी होई अर उननै कह्या, “यो अंजीर का दरखत जिव्वे किस तरियां सूखग्या?”

21 यीशु नै उन ताहीं जवाब दिया, “मै थमनै साच्ची कहूँ सूँ, जै थम विश्वास राखो अर शक ना करो, तो ना केवल यो करोगे जो इस अंजीर के दरखत गेल्या करया गया सै, पर जै इस पहाड़ नै कहोगे, ‘खड़ जा, अर समुन्दर म्ह जा पड़’, तो यो भी हो जावैगा।

22 अर जो कुछ थम प्रार्थना म्ह विश्वास तै माँगोगे वो सारा थमनै मिलेगा।”

23 वो मन्दर जाकै उपदेश देवै था, तो प्रधान याजकां अर यहूदी अगुवां नै उसकै धोरै आकै बुझ्झया, “तू ये काम किसकै हक तै करै सै? अर तेरे ताहीं यो हक किसनै दिया सै?”

24 यीशु नै उनतै जवाब दिया, “मै भी थारे तै एक बात बुझ्झु सूँ; जै वो मन्नै बताओगे, तो मै भी थमनै बताऊंगा के ये काम किस हक तै करूँ सूँ;।

\* 21:9 21:9 होशाना परमेसवर म्हारे ताहीं बचाओ

25 यूहन्ना का बपतिस्मा कित्त तै था? सुर्ग की ओड़ तै या माणसां की ओड़ तै?" फेर वे आप्पस म्ह बहस करण लागगे, "जै हम कद्दां 'सुर्ग की ओड़ तै' तो वो म्हारै तै कहवैगा, 'फेर थमनै उसका बिश्वास क्यांतै न्ही करया?"

26 अर जै कद्दां 'माणसां की ओड़ तै' तो हमनै भीड़ का डर सै, क्यूँके वे सारे यूहन्ना ताहीं नबी मान्नै सै।"

27 फेर उननै यीशु ताहीं जवाब दिया, "हमनै न्ही बेरा।" यीशु नै भी उनतै कद्दा, "तो मै भी थमनै कोनी बतान्दा के ये काम किस हक तै करूँ सू।"

28 "आच्छा बताओ थम इस बारें म्ह के कहो सो? के किसे माणस के दो बेट्टे थे; उसनै पैहले के धोरै जाके कद्दा, हे बेट्टे, आज अंगूर के बाग म्ह काम कर।"

29 "पर बेट्टे नै जवाब दिया, 'मै कोनी जान्दा', पर कुछ बखत के बाद अपणे दिए हुए जवाब पै उसनै भोत पछतावा होया अर वो चल्या गया।"

30 "फेर पिता नै दुसरे के धोरै जाके न्यूए कद्दा, उसनै जवाब दिया, 'जी हाँ जाऊँ सू', पर कोनी गया।"

31 "इन दोनुवां म्ह तै किसनै पिता की मर्जी पूरी करी?" उननै कद्दा, "पैहले नै।" यीशु नै उनतै कद्दा, "मै थारे तै साच्चि कहुँ सू के चुंगी लेण आळे अर बेशयाएँ थारे तै पैहल्या परमेसवर के राज्य म्ह दाखल हो जावैगे।"

32 यो मै इस खात्तर कहुँ सू क्यूँके यूहन्ना बपतिस्मा देण आळा धर्म की राह दिखान्दे हुए थारे धोरै आया, अर थमनै उसका बिश्वास कोनी करया; पर चुंगी लेण आळे अर बेशयायाँ नै उसका बिश्वास करया अर थमनै न्यू देखके भी पाप करणा कोनी छोड्या अर ना ए उसका बिश्वास करया।"

33 एक और उदाहरण सुणो एक घर का माल्लिक था, जिसनै अंगूर का बाग लगाया, अर उसकै चौगरदे नै बाड़ा बाँधया, अर रस का कुण्ड खोद्या, अर रुखाळ खात्तर एक मचान बणाया; अर किसानां ताहीं उसका टेक्का देके परदेस चल्या गया।

34 जिव फळ का बखत लोवै आया, तो उसनै अपणे नौकरां ताहीं उसका फळां का हिस्सा लेण नै किसानां धोरै भेज्या।

35 पर किसानां नै उसके नौकरां ताहीं पकड़के, किसे ताहीं छेल्या, अर किसे ताहीं मार दिया, अर किसे पै पत्थर बरसाए।

36 फेर उसनै पैहल्या तै घणे और नौकरां ताहीं भेज्या, अर उननै भी उससे तरियां करया।

37 आखर म्ह उसनै अपणे बेट्टे ताहीं उनकै धोरै न्यू सोचके भेज्या के वे मैरे बेट्टे की इज्जत करैगे

38 "पर किसानां नै बेट्टे ताहीं देखके आप्पस म्ह कद्दा, 'यो तो वारिस सै, आओ, इसनै मार देवा अर इसकी विरासत ले लेवां।'"

39 अर उननै उस ताहीं पकड़्या अर अंगूर के बाग तै बाहरणै काढके मार दिया।

40 "इस करके जिव अंगूर के बाग का माल्लिक आवैगा, तो उन किसानां के गेल्या के करैगा?"

41 उननै उसतै कद्दा, "वो उन भुन्डे माणसां का भुंडी ढाळ नाश करैगा; अर अंगूर के बाग का टेका दुसरे किसानां ताहीं देवैगा, जो बखत पै उस ताहीं फळ दिया करैगे।"

42 यीशु नै उनतै कद्दा, "के थमनै कदे भी पवित्तर ग्रन्थ म्ह यो कोनी पढ्या: जिस पत्थर ताहीं राजमिस्तरियाँ नै बेकार ठहराया था, वोए कुणे के सिरे का पत्थर होगया? यो प्रभु की ओड़ तै होया, अर म्हारी निगांह म्ह अनोक्खा सै।"

43 "ज्यातै मै थमनै कहुँ सू के परमेसवर का राज्य थारे तै ले लिया जावैगा अर इसी जात ताहीं दिया जावैगा, जो उसका आच्छा फळ ल्यावै सै।"

44 जो इस पत्थर पै पड़ैगा, वो चकणचूर हो जावैगा; अर जिसपै वो पड़ैगा, उसनै पिस देवैगा।"

45 प्रधान याजक अर फरीसी उसके उदाहरणां नै सुणके समझगे, के वो उनकै बाबत कहवै सै।

46 अर उननै उस ताहीं पकड़णा चाह्या, पर माणसां तै डरगे क्यूँके वे उसनै नबी मान्नै थे।

## 22

~~~~~

- 1 इसपै यीशु फेर उनतै उदाहरणां म्ह कहण लाग्या,
- 2 “सुर्ग का राज्य उस राजा की ढाळ सै, जिसनै अपणे बेट्टे का ब्याह करया।
- 3 अर उसनै अपणे नौकरां ताहीं भेज्या, के न्योदे होइ माणसां ताहीं ब्याह के जिमणे म्ह बुलावै; पर उननै आणा न्ही चाह्या।”
- 4 “फेर उसनै और नौकरां ताहीं न्यू कहकै भेज्या, न्योदे होइ माणसां ताहीं कहा देख्खों, मन्नै भोज त्यार कर लिया सै, अर मेरे बळध अर पळे होइ डान्गर काट लिये सै: सारा कुछ त्यार सै; ब्याह के जिमणे म्ह आओ।”
- 5 पर वे बेपरवाह होकै चले गये, कोए अपणे खेत्तां म्ह, कोए अपणे धन्धे पै।
- 6 और कई माणसां नै तो राजा के नौकरां ताहीं पकड़कै उनकी बेजती करी अर उन ताहीं मार दिया।
- 7 जिव राजा नै यो सुणया तो छो म्ह भरग्या, अर अपणी पलटन भेजकै उन हत्यारा का नाश करया, अर उनके नगर फूँक दिए।
- 8 फेर राजा नै अपणे नौकरां तै कह्या, ब्याह का भोज तो त्यार सै, पर के न्योदे होइ माणस इस जोगगे कोनी ठहरे।
- 9 इस करके चौराहयाँ पै जाओ, अर जितने माणस थमनै मिलै, सारया ताहीं ब्याह कै भोज म्ह बुला ल्याओ।
- 10 इस तरियां उसके नौकरां नै सड़कां पै जाकै के भुन्डे, के आच्छे, जितने मिले सारया ताहीं कट्टा करया; ब्याह का घर मेहमानां तै भरग्या।
- 11 जिव राजा मेहमानां नै देखण भीत्तर आया, तो उसनै ओड़ै एक माणस ताहीं देख्या, जो ब्याह आळे लत्ते कोनी पहररया था।
- 12 उसनै उसतै बुझ्झया, हे दोस्त, तू ब्याह म्ह पैहरे जाण आळे लत्ते पहेरे बिना उरै क्यातै आ ग्या। उसका मुँह बन्द होग्या।
- 13 फेर राजा नै नौकरां तै कह्या, इसके हाथ-पैर जुड़कै उस ताहीं बाहरणै अन्धेरे म्ह गेर द्यो, ओड़ै रोणा, अर दाँत पिसणा होवैगा।
- 14 “क्यूँके बुलाये होइ तो घणे सै पर चुणे होए कम सै।”
- 15 फेर फरीसियाँ नै आकै आप्स म्ह विचार करया, के उसनै किस ढाळ बाततां म्ह फसावा।
- 16 इस तरियां उननै अपणे चेल्यां ताहीं हेरोदेस राजा के समर्थकां कै गेल्या उसकै धोरै न्यू कहण नै भेज्या, “हे गुरु, हमनै बेरा सै, के तू साच्चा सै, अर परमेसवर की राह सच्चाई तै सिखावै सै; अर किसे की परवाह कोनी करदा, क्यूँके तू माणसां का मुँह देखके बात कोनी करदा।
- 17 इस करके हमनै बता तन्नै के समझ आवै सै? केसर तै चुंगी देणा ठीक सै के न्ही।”
- 18 यीशु नै उनका कपट जाणकै कह्या, “हे कपटियाँ, मन्नै क्यातै परखो सो?”
- 19 कर का सिक्का मेरै ताहीं दिखाओ।” फेर उसके धोरै एक दीनार (एक दिन की मजदूरी) लियाये।
- 20 उसनै उनतै कह्या, “था छाप अर नाम किसका सै?”
- 21 उननै उसतै कह्या, “कैसर का।” फेर उसनै उनतै कह्या, “जो कैसर का सै, वो कैसर ताहीं; अर जो परमेसवर का सै, वो परमेसवर ताहीं द्यो।”
- 22 न्यू सुणकै उननै हैरानी होई, उस ताहीं छोड़कै चले गये।
- 23 उससे दिन सड़की जो कहवै सै के मेरे होया का दुबारा जिन्दा उठणा सै ए कोनी, उसकै धोरै आये अर उसतै बुझ्झया,
- 24 “हे गुरु, मूसा नबी नै कह्या था के जै कोए माणस बेऊलादा मर जावै, तो उसका भाई उसकी घरआळी तै ब्याह करके अपणे भाई के खात्तर पीढ़ी पैदा करै।

25 इब म्हारै उरै सात भाई थे; पैहलड़ा ब्याह करकै मरग्या, अर ऊलाद ना होण कै कारण अपनी घरआळी अपने भाई कै खात्तर छोड़ गया।

26 इस्से तरियां दुसरे अर तीसरे नै भी करया, अर सातुवां तक योए होया।

27 सारया पाच्छे वा बिरबान्नी भी मरगी।

28 आखर म्ह जिन्दा होण पे वा सातुवां म्ह तै किसकी घरआळी होवैगी? क्यूँके वा सारया की घरआळी बण ली थी।”

29 यीशु नै उनतै जवाब दिया, “थारी गलती या सै के थम पवित्तर ग्रन्थ अर परमेसवर की सामर्थ नै न्ही जाणते।

30 क्यूँके मरकै जिन्दा हो जाणके बाद ब्याह शादी कोनी होन्दी, पर सुर्ग म्ह परमेसवर के सुर्गदूतां की ढाळ होवैगें।

31 पर मरकै जिन्दा हो जाणके बाबत के थमनै यो वचन कोनी पढ़या जो परमेसवर नै थारे तै कह्या

32 मै अब्राहम का परमेसवर, अर इसहाक का परमेसवर, याकूब का परमेसवर सूँ? वो मरे होया का न्ही, पर जिन्दा का परमेसवर सै।”

33 न्यू सुणके माणस उसके उपदेश तै हैरान होए।

34 जब फरीसियां नै सुणया के यीशु नै सद्कियाँ का मुँह बन्द कर दिया, तो वे कटटे होए।

35 शास्त्री समाज के माणसां म्ह तै एक नै उस ताहीं परखण कै खात्तर उसतै बुझया,

36 “हे गुरु, नियम-कायदा म्ह कौण सा हुकम बड़ड़ा सै?”

37 यीशु नै उसतै कह्या, “तू परमेसवर अपने प्रभु तै अपने पूरे मन अर अपने सारे प्राण अर अपनी सारी बुद्धि के साथ प्यार राख।

38 पैहला अर बड़ड़ा हुकम तो योए सै।

39 अर उससे जिसा यो दुसरा भी सै के तू अपने पड़ोसी तै अपने जिसा प्यार राख।

40 ये दो हुकम सारे नियम-कायदे अर नबियाँ का निचोड़ (आधार) सै।”

41 जब फरीसी कटटे थे, तो यीशु नै उनतै बुझया,

42 “मसीह कै बारे म्ह थम के सोचो सो? वो किसका बेट्टा सै?” उननै यीशु तै कह्या, “दाऊद का।”

43 यीशु नै उनतै बुझया, “तो दाऊद आत्मा म्ह होकै उसनै प्रभु क्यातै कहवै सै?”

44 “प्रभु नै, मेरे प्रभु तै कह्या, मेरे सोळे कान्ही बैठ, जब ताहीं के मे तेरे बैरियाँ ताहीं तेरे पायां म्ह ना झुका दिवुँ।”

45 “भला, जब दाऊद उसनै प्रभु कहवै सै, तो वो उसका बेट्टा किस ढाळ होया?”

46 उसके जवाब म्ह कोए भी एक बात न्ही कह सक्या। पर उस दिन तै दुबारे उसतै कीमे और बुझण की हिम्मत कोनी करी।

23

1 फेर यीशु नै भीड़ तै अर अपने चेल्यां ताहीं कह्या,

2 “शास्त्री अर फरीसी माणसां नै मूसा नबी के नियम-कायदे सिखाण का हक सै;

3 ज्यातै वे थारे तै जो कुछ कहवै वो करियो अर मानिये, पर उन जिसे काम ना करियो; क्यूँके वे सिखावै तो सै पर खुद करदे कोनी।

4 वे थारे पै कई नियम लागू करै सै जिसका पालन करणा ओक्खा सै, वे माणसां नै उनपै चाल्लण खात्तर मजबूर करै सै; पर वे खुद अपने नियमां नै कोनी मानते।”

5 वे अपने सारे काम माणसां ताहीं दिखाण कै खात्तर करै सै: वे अपने ताबिजां नै चौड़ा करै सै जिनपै वे पवित्तर ग्रन्थ के वचन लिखके शरीर पै बाँधले सै, अर अपने लत्यां की झाल्लर बधावै सै, ताके लोग उननै धर्मी समझे।

6 भोज म्ह खास-खास जगहां, अर आराधनालयों के खास-खास जगहां बैठणा,

7 बजारां म्ह नमस्कार, अर माणसां म्ह गुरु कुह्वाणा उननै भावै सै।

8 पर थम गुरु ना कुह्वाणा, क्यूँके थारा एके गुरु सै, अर थम सारे भाई-भाण के समान सों।

9 धरती पै किसे नै अपना पिता ना कहियो, क्यूँके थारा एके आत्मिक पिता सै, जो सुर्ग म्ह सै।

10 अर स्वामी भी ना कुह्वाणा, क्यूँके थारा एके माल्लिक सै, यानिके मसीह।

11 जो थारे म्ह बड़ड़ा हो, वो थारा सेवक या नौक्कर बणै।

12 जो कोए अपने-आपने बड़ड़ा बणावैगा, वो छोट्टा करया जावैगा: अर जो कोए अपने-आपने छोट्टा बणावैगा, वो बड़ड़ा करया जावैगा।

13 हे कपटी शास्त्रियो अर फरीसियो, थारे पै धिक्कार सै! थम माणसां के खात्तर सुर्ग राज्य का बारणा बन्द करो सो, ना तो थम खुद उस म्ह दाखल होवो सो अर ना उस म्ह दाखल होण आळा नै दाखल होण यो सो।

14 (हे कपटी शास्त्रियो अर फरीसियो, थारे पै धिक्कार सै! थम बिधवा के घरां नै खा जाओ सो, अर अपने-आपने धर्मी दिखाण खात्तर घणी वार ताहीं प्रार्थना करदे रहो सो: ज्यातै थारे ताहीं परमेसवर की ओड़ तै घणा दण्ड मिलैगा।)

15 हे कपटी शास्त्रियो अर फरीसियो, थारे पै धिक्कार सै! थम एक माणस ताहीं अपने पंथ म्ह ल्याण के खात्तर दूर-दूर ताहीं हान्डो सो, अर जब वो पंथ म्ह आ जावै सै, तो खुद तो नरक म्ह जाओ सों पर दुसरयां नै अपने तै दुगणा नरक जाण का भागगी बणा यो सो।

16 हे आन्धे अगुवों, थारे पै धिक्कार सै! थम जो या शिक्षा यो सो, के जै कोए मन्दर की सूह खावै तो किमे न्ही, पर जै कोए मन्दर के सोन्ने की सूह खावै तो उसतै बन्द जावैगा।

17 हे बेअक्लो अर आंध्यो, कौण बड़ड़ा सै; मन्दर का सोन्ना या वो मन्दर जिसनै उस सोन्ने ताहीं पवित्र बणाया सै?

18 थम यो भी सिखाओ सो के जै कोए वेदी* की सूह खावै तो किमे न्ही, पर जो भेंट उसपै सै, जै कोए उसकी कसम खावै तो बन्द जावैगा।

19 हे आंध्यो, कौण बड़ड़ा सै; भेंट या वेदी† जिसम्ह भेंट पवित्र होवै सै?

20 इस करके जो वेदी की कसम खावै सै, वो उसकी अर जो कुछ उसपै सै, उसकी भी कसम खावै सै।

21 जो मन्दर की कसम खावै सै, वो परमेसवर जो उस म्ह रहवै सै, उसकी भी कसम खावै सै।

22 जो सुर्ग की कसम खावै सै, वो परमेसवर के सिंहासन की अर उसपै बैठण आळे की भी कसम खावै सै।

23 हे कपटी शास्त्रियो अर फरीसियो, थारे पै धिक्कार सै! थम पुदीने, सौँफ, जीरे का दसमां हिस्सा तो यो सो, पर थमने नियम-कायदा की गहरी बाततां ताहीं यानिके न्याय, दया, अर वफादारी का तिरस्कार करो सों; थमने दसमां हिस्सा भी देणा चाहिये पर उन खास बाततां नै भी नजरअंदाज ना करो।

24 हे आन्धे अगुवों, थम छोट्टे-छोट्टे नियमां का पालन करण का तो भोत ध्यान राखों सों, जिस तरियां पाणी म्ह तै माच्छर ताहीं तो छाण ल्यो सो, पर परमेसवर के खास हुकम का पालन कोनी करते, जो ऊँट नै निगळ जाणके समान सै।

25 हे कपटी शास्त्रियो अर फरीसियो, थारे पै धिक्कार सै! क्यूँके थम लालची अर स्वार्थी सों, पर थम अपने-आपने पवित्र राखण का ढोंग करो सों, इस खात्तर थम उन कटोरे अर थाळी के समान सों जो उप्पर तै तो साफ सै पर भित्तर तै वे गन्दे सै।

26 हे आन्धे फरीसियो, पैहल्या माणस नै लूटणा बन्द करो जिब्बे थम धर्म के काम का पालन कर पाओगे अर फेर थम उस कटोरे अर थाळी के समान होवेंगें जो भीत्तर बाहर तै भी साफ हों सै।

* 23:18 23:18 वेदी-परमेसवर ताहीं भेंट चढ़ाण खात्तर एक जगहां † 23:19 23:19 वेदी-परमेसवर ताहीं भेंट चढ़ाण खात्तर एक जगहां

27 हे कपटी शास्त्रियों अर फरीसियों, थारे पै धिक्कार सै! थम चुन्ने फिरी होई कबरां के जिसे सो जो उप्पर तै तो सुथरी दिक्खै सै, पर भीत्तर मुदां की हाड्डियाँ अर सारे ढाळ की गन्दगी तै टुकी होई सै।

28 इस्से तरियां तै थम भी उप्पर तै माणसां ताहीं धर्मी दिक्खो सो, पर भीत्तर अधर्म अर कपट तै भरे सो।

29 हे कपटी शास्त्रियों अर फरीसियों, थारे पै धिक्कार सै! थम उन नबियाँ की कबर समारो सो अर धर्मियाँ की कबर सजाओ सो, जिन ताहीं थारे पूर्वजां ने मारा था।

30 “अर कहो सो, ‘जै हम अपने बाप-दादां के दिनां म्ह होन्दे तो नबियाँ की हत्या म्ह उनके साइद्दी कोनी होन्दे।’

31 इसतै तो थम अपने आप ए या गवाही द्यो सो के थम नबियाँ के हत्यारां के वंशज सो।

32 ठीक सै थम अपने पूर्वजां के पाप का घड़ा भरते जाओ।”

33 हे साँप के सप्पोलों जिसे माणसां, थम नरक की सजा तै किस ढाळ बचोगे?

34 इस करके देखो, मै थारे धौरे नबियाँ अर समझदार अर शास्त्रियाँ ताहीं भेज्जू सू, अर थम उन म्ह तै कुछां नै मार द्योगे अर कूस पै चढ़ावोगे, अर कुछां नै अपने आराधनालयाँ म्ह कोड़े मारोगे अर एक नगर तै दुसरे नगर ताहीं भजादि फिरोगे।

35 जिसतै धर्मी हाबिल तै लेके विरक्याह के बेटे जकर्याह तक, जिस ताहीं थमने मन्दर अर वेदी के विचाळे मार दिया था, जितने भी धर्मी माणसां ताहीं मारया सै, वो सारा दण्ड थारे सिर पै पड़ेगा।

36 मै थमने सच कहूँ सू, ये सब का दण्ड इस पीढ़ी के माणसां नै भुगतणा पड़ेगा।

37 “हे यरुशलेम नगर के लोगो, हे यरुशलेम नगर के लोगो! थम नबियाँ नै मार देओ सो, अर जो थारे धौरे भेज्जे गए, उनपै पत्थर बरसाओ सो। कितनी ए बर मन्ने चाह्या के जिस ढाळ मुर्गी अपने बच्चां ताहीं अपने पाखां के तळे छुपा ले सै, उस्से तरियां ए मै भी थारे बाळकां नै कट्टा कर ल्युँ, पर थमने कोनी चाह्या।

38 देखो, थारा घर थारे खात्तर उजाड़ छोड्या जावै सै।

39 क्यूँके मै थमने साच्ची कहूँ सू के इब तै जिव ताहीं थम न्ही कहोगे, ‘थन्य सै वो, जो प्रभु के नाम तै आवै सै’ तब तक थम मन्ने फेर दुबारै कदे कोनी देखोगे।”

24

1 जिव यीशु मन्दर तै लिकड़के जाण लागरया था, तो उसके चेल्ले उस ताहीं मन्दर की बणावट दिखाण के खात्तर उसके धौरे आये।

2 यीशु नै उनतै कह्या, “के थम ये सारी इमारत न्ही देखते? मै थमने साच्ची कहूँ सू, उरै पत्थर पै पत्थर भी कोनी रहवैगा, जो गेरया ना जावैगा।”

3 जिव यीशु जैतून के पहाड़ पै बैठ्या था, तो चेल्यां नै एकले म्ह उसके धौरे आके कह्या, “हमने बता, ये बात कद होवैगी? तेरे आण का अर दुनिया के अन्त की के निशान्नी होवैगी?”

4 यीशु नै उन ताहीं जवाब दिया, “चौकन्ने रहियो! कोए थमने भकाण न्ही पावे,

5 क्यूँके घणखरे इसे होवैगें जो मेरे नाम तै आके कहवैगें, मै मसीह सू, अर घणाए ताहीं भकावैगें।

6 थम रोळे अर लड़ाईया का जिक्र सुणोगे, तो घवराईयो ना क्यूँके इनका होणा जरूरी सै, पर उस बखत खात्मा कोनी होवैगा।

7 क्यूँके जात पै जात, अर राज्य पै राज्य चढ़ाई करैगा, अर जगहां-जगहां अकाळ पड़ेंगें, अर हाल्लण आवैगें।

8 ये सारी बात दुखां की शरूआत होवैगी।”

9 फेर माणस क्लेश देण के खात्तर थमने पकड़वावैगें, अर थमने मार देवैगें, अर मेरे नाम के कारण सारी जात्तां के माणस थारे तै बेर राखेंगें, क्यूँके थम मेरे पै विश्वास करो सों।

10 फेर घणखरे मेरे पै विश्वास करणा छोड़ देंगे, अर एक-दुसरे नै पकड़वावैगें, अर एक-दुसरे तै बेर राकखैगें।

11 घणखरे झूट्टे नबी आवैगें, अर घणाए ताहीं भकावैगें।

12 अधर्म के बढण तै वे एक-दुसरे तै प्यार करणा छोड़ देंगे,

13 पर जो अन्त ताहीं मेरे पै विश्वास राकखैगा, उस्से ताहीं बचाया जावैगा।

14 अर परमेसवर के राज्य का यो सुसमाचार सारी दुनिया म्ह प्रचार करया जावैगा, ताके सारी जात्तां नै इस ताहीं स्वीकार करण का मौक्का मिलै, ताके थम मेरे गवाह होओ, फेर दुनिया का अन्त आ जावैगा।

15 इस करकै जिब थम उस उजाड़ण आळी घृणित चीज ताहीं जिसका जिक्र दानिय्येल नबी के जरिये होया था, पवित्तर जगहां पै खड़े देखो (जो पढ़ै, वो समझै),

16 फेर जो यहूदिया परदेस म्ह हो, वे पहाड़ां पै भाज जावै।

17 जो छात पै हो, वो अपणे घर म्ह तै समान लेण नै तळै न्ही उतरै,

18 अर जो खेत म्ह हो, वो अपणा लत्ता लेण नै पाच्छै न्ही बोहड़ै।

19 उन दिनां म्ह जो गर्भवती अर दूध पिलान्दी बिरवान्नी होवैगीं, उनके खात्तर भागणा भी मुश्किल होगा!

20 प्रार्थना करया करो के थमनै जाड़डे म्ह या आराम के दिन भाजणा ना पड़ै।

21 क्यूँके उस बखत इसा भारया क्लेश होवैगा, जिसा दुनिया की शरूआत तै ना इब ताहीं होया ना कदे होवैगा।

22 “अर जै वे दिन घटाए न्ही जान्दे तो कोए प्राणी कोनी बचदा, पर छॉट्ट होया के कारण वे दिन घटाए जावैगें।

23 उस बखत जै कोए थमनै कहवै, ‘देखो, मसीह उरै सै!’ या ‘ओड़ै सै!’ तो विश्वास ना” करियो।

24 क्यूँके झूट्टे मसीह अर झूट्टे नबी उठ खड़े होवैगें, अर बड़े-बड़े चमत्कार, अर अनोकखे काम दिखावैगें के जै हो सक्या तो छॉट्ट होया ताहीं भी भका देवैगें।

25 देखो, मन्ने पैहल्याए थारे तै यो सारा कुछ कह दिया सै।

26 “इस करकै जै वे थारे तै कहवै, ‘देखो, वो बण म्ह सै’, तो बाहरणै ना लिकड़यो; या ‘देखो, वो कोठड़ी म्ह सै’, तो विश्वास ना करियो।

27 क्यूँके जिस तरियां बिजळी पूरब तै लिकड़के पश्चिम ताहीं चमके सै, उस्से तरियां मुझ माणस के बेट्टे का भी आणा होवैगा।

28 जड़ै लाश हो, उड़ैए चील कट्टे होवैगें।”

29 उन दिनां के क्लेश के पाच्छै जिब्वे सूरज अन्धेरे म्ह हो जावैगा, चाँद का चाँदणा जान्दा रहवैगा, अर तारे अकास तै तळै पड़ैगें, अर अकास की शक्तियाँ हलाई जावैगीं।

30 फेर माणस के बेट्टे का निशान अकास म्ह दिखैगा, अर फेर धरती के सारे खानदान्ना के माणस छात्ती पिटैगें; अर माणस के बेट्टे ताहीं बड़डी सामर्थ अर महिमा के गेल्या अकास के बादळां पै आन्दे देखवोगे।

31 वो तुरही की तेज आवाज के गेल्या अपणे सुर्गदूत्तां नै खन्दावैगा, अर वे अकास के इस सिरे तै उस सिरे ताहीं, च्यारु दिशायां तै उसके चुणे होया नै कट्टे करैगें।

32 अंजीर के दरखत तै यो उदाहरण सीखो: जिब उसकी डाळी कोमल हो जावै अर पत्ते लिकड़ण लाग ज्या सै, तो थम जाण ल्यो के गर्मी का बखत लोवै सै।

33 इस्से तरियां तै जिब थम इन सारी बात्तां नै देखो, तो जाण ल्यो के वो लोवै सै, बल्के दरबाजे पै सै।

34 मे थमनै साच्ची कहूँ सूँ के जिब ताहीं ये सारी बात पूरी ना हो लेवै, जद ताहीं इस पीढ़ी का अन्त कोनी होवैगा।

35 धरती अर अकास टळ जावैगें, पर मेरी बात कदे न्ही टळैगी।

36 “उस दिन अर उस बखत कै बारै म्ह कोए न्ही जाण्दा, ना सुर्गदूत अर ना बेट्टा, पर सिर्फ पिता।

37 जिसा पूर्वज नूह के दिनां होया था, उससे तरियां ए माणस के बेट्टे का आणा होगा।

38 क्यूँके जिस तरियां बाढ़ तै पैहले के दिनां म्ह, जिस दिन ताहीं नूह जहाज पै न्ही चढ़या, उस दिन ताहीं माणस खावै-पीवे थे, अर उन म्ह ब्याह होवै थे।

39 अर जिब ताहीं बाढ़ आके उन सारया ताहीं बहा न्ही लेग्या, जद ताहीं उननै किमे बेरा न्ही पाट्या; इस्से तरियां ए मुझ माणस के बेट्टे का आणा भी होगा।

40 उस बखत दो जणे खेत म्ह होंगे, एक टाया जावैगा अर दुसरा छोड़ दिया जावैगा।

41 दो बिरबान्नी एक साथ चाक्की पीसदी होवैगी, एक टा ली जावैगी अर दुसरी छोड़ दी जावैगी।”

42 इस करके जागदे रहो, क्यूँके थमनै न्ही बेरा के थारा प्रभु किस दिन आवैगा।

43 पर न्यू जाण ल्यो के जै घर का माल्लिक नै बेरा हो के चोर किस घड़ी आवैगा तो जागदा रहन्दा, अर अपणे घर म्ह सेंध लागण न्ही देन्दा।

44 ज्यांतै थम भी त्यार रहो, क्यूँके जिस घड़ी के बारै म्ह थम सोचदे भी कोनी, उससे घड़ी मै माणस का बेट्टा आ जाऊँगा।

45 “आखर म्ह वो विश्वास जोगगा अर अकलमंद दास कोण सै, जिस ताहीं माल्लिक नै अपणे नौक्कर-चाकरां पर सरदार ठहराया के बखत पै उननै खाणा देवै?

46 धन्य सै वो नौक्कर, जिस ताहीं उसका माल्लिक आके इसाए करदा पावै।

47 मै थमनै साच्ची कहूँ सूं, वो उसनै अपणी सारी धन-सम्पत्ति का माल्लिक बणावैगा।

48 पर जै वो दुष्ट दास सोच्चण लाग्गै के मेरै माल्लिक कै आण म्ह वार सै,

49 अर अपणे साथी नौकरां नै पिटटण लाग्गै, अर शराबियाँ के गेल्या खावै-पीवै।

50 तो उस नौक्कर का माल्लिक उस दिन बोहड़ैगा, जिब वो उसकी बाट ना देख्दा हो, अर इसे बखत म्ह आवैगा जिसका उसनै ना बेरा हो,

51 जिब वो उसनै भारी सजा देगा उसकी गिणती कपटियाँ के म्ह गिणी जावैगी: ओड़ै रोणा अर दाँत पिसणा होगा।”

25

1 यीशु नै अपणे चेल्यां ताहीं एक और उदाहरण देके कह्या, “सुर्ग का राज्य उन दस कुँवारियाँ के जिसा होगा जो अपणी मशाल लेके बन्दे तै फेण लिकड़ी।

2 उन म्ह पाँच बेअक्ल अर पाँच समझदार थी।

3 बेअक्ली कुँवारियाँ नै अपणी मशाल तो ली, पर अपणे गेल्या फालतू तेल न्ही लिया;

4 पर समझदारां नै अपणी मशालां के गेल्या अपणी कुप्पियाँ म्ह तेल भी भर लिया।

5 जिब बन्दे के आण म्ह वार होई, तो वे सारी ऊँचण लाग्गी अर सोगी।”

6 “आध्धी रात नै धूम माच्ची: देख्खो, बन्दे आण लागरया सै! उसतै फेण नै चाल्लोँ।”

7 “फेर वे सारी कुँवारियाँ उठके अपणी मशाल ठीक करण लाग्गी।

8 अर बेअक्लियाँ नै समझदारां तै कह्या, ‘अपणे तेल म्ह तै कुछ हमनै भी द्यो, क्यूँके म्हारी मशाल बुझ्ण लागरी सै।’”

9 “पर समझदारां नै जवाब दिया, ‘कदे यो म्हारै अर थारे खात्तर पूरा ना पड़े; भला तो योए सै के थम बेचणीयाँ के धोरै जाके अपणे खात्तर मोल लियाओ।’”

10 जिब वे मोल लेण नै जावै थी तो बन्दे आण पाँहच्या, अर जो त्यार थी, वे उसके गेल्या ब्याह के घर म्ह चली गई अर बारणा मूंद दिया गया।

11 “इसके पाच्छे, वे दुसरी कुँवारियाँ भी बोहड़के आई अर बन्दे तै कहण लाग्गी, हे माल्लिक, हे माल्लिक, म्हारै खात्तर किवाड़ खोल दे।”

12 “उसनै जवाब दिया, मै थारे ताहीं साच्ची कहूँ सूं, मै थमनै कोनी जाण्दा।”

13 इस करके चोक्कने रहो, क्यूँके मेरे आण के उस दिन नै थम कोनी जाणते, ना उस घड़ी नै जिस दिन म्ह आऊँगा।

14 सुर्ग का राज्य उस माणस के उदाहरण के समान भी सै, जिसनै परदेस जान्दे बखत अपणे नौकरां ताहीं बुलाके अपणी कुछ सम्पत्ति उन ताहीं सौप दी, ताके वे व्यापर करके घणा धन जोड़ ले।

15 उसनै एक तै पाँच तोड़े (1 तोड़ा 15 साल की मजदूरी के बराबर सै), दुसरे ताहीं दो, अर तीसरे ताहीं एक; यानिके हरेक नै उसकी काबिलियत के मुताबिक दिया, अर फेर परदेस चल्या गया।

16 फेर, जिस ताहीं पाँच तोड़े मिले थे, उसनै जिब्बे जाके उनतै लेण-देण करया, अर पाँच तोड़े* और कमाए।

17 इस्से तरियां तै जिस ताहीं दो मिले थे, उसनै भी दो और कमाए।

18 पर जिस ताहीं एक मिल्या था, उसनै जाके माट्टी खोदी, अर अपणे माल्लिक का धन लहको दिया।

19 घणे दिनां पाच्छे उन नौकरां का माल्लिक आया, अर उनतै हिसाब लेण लागया, के उननै उन पईसा तै के कुछ करया।

20 जिसनै पाँच तोड़े मिले थे, उसनै पाँच तोड़े और ल्याके कह्या, हे माल्लिक, तन्नै मेरे ताहीं पाँच तोड़े सौपे थे, लखा, मन्नै ये पाँच तोड़े और कमाए सै।

21 उसके माल्लिक नै उसतै कह्या, शाबाश, हे भरोस्से के लायक आच्छे नौकर, तू थोड़े-से धन म्ह भी भरोसमंद लिकइया, मै तन्नै घणी चिज्जां का अधिकारी बणाऊँगा। अपणे माल्लिक के आनन्द म्ह साइझी हो।

22 फेर जिस ताहीं दो तोड़े मिले थे, उसनै भी आके कह्या, हे माल्लिक, तन्नै मेरे ताहीं दो तोड़े सौपे थे, देख, मन्नै दो तोड़े और कमाए सै।

23 उसके माल्लिक नै उसतै कह्या, शाबाश, हे भरोस्से के लायक आच्छे नौकर, तू थोड़े म्ह भी भरोसमंद लिकइया; मै तन्नै घणी चिज्जां का अधिकारी बणाऊँगा। अपणे माल्लिक के आनन्द म्ह साइझी हो।

24 फेर जिस ताहीं एक तोड़ा† मिल्या था, उसनै आके कह्या, हे माल्लिक, मै तन्नै जाणु था, के तू इसा माणस सै: जित्त किते तू बीज न्ही बोन्दा ओड़े फसल काट्टे सै, अर जित्त न्ही खिंडान्दा ओड़े तै कट्टा करै सै।

25 जै मै तेरा तोड़ा खो देता तो तू मन्नै दण्ड देता, ज्यातै मै डरगया अर जाके तेरा तोड़ा माट्टी म्ह दबा दिया। देख, जो तेरा सै, वो यो सै।

26 उसके माल्लिक नै उस ताहीं जवाब दिया, हे दुष्ट अर आलसी नौकर, जिब तन्नै न्यु बेरा था के जित्त मन्नै बीज न्ही बोया ओड़े तै फसल काट्टू सू, अर जित्त मन्नै न्ही खिंडाया ओड़े तै कट्टा करूँ सू;

27 जै तन्नै बेरा था के मै इसा सू, तो तू मेरा धन सर्राफां नै ए दे देँदा, फेर मै आके अपना धन ब्याज सुधां ले लेन्दा।

28 माल्लिक नै अपणे नौकरां तै कह्या, ज्यातै वो तोड़ा‡ उसतै ले ल्यो, अर जिसके धोरै दस तोड़े सै उसनै दे द्यो।

29 क्यूँके जिस किसे धोरै सै, उस ताहीं और दिया जावैगा; अर उसके धोरै घणा हो जावैगा: पर जिसके धोरै न्ही सै, उसतै वो भी जो उसके धोरै सै, ले लिया जावैगा।

30 इस निकम्मे नौकर नै बाहर अन्धरे म्ह गेर द्यो, जित्त रोणा अर दाँत पिसणा होगा।

31 जिब मै माणस का बेट्टा अपणी महिमा म्ह आऊँगा अर सारे सुर्गदूत मेरे गेल्या आवैगें, तो मै अपणी महिमा के सिंहासन पै बैट्टुंगा।

* 25:16 25:16 (1 तोड़ा 15 साल की मजदूरी के बराबर सै) † 25:24 25:24 (1 तोड़ा 15 साल की मजदूरी के बराबर सै)

‡ 25:28 25:28 (1 तोड़ा 15 साल की मजदूरी के बराबर सै)

32 अर सारी जात मेरे स्याम्ही कटुठी करी जावैगी; अर जिस ढाळ पाळी भेड्डां नै बकरियाँ तै न्यारी कर देवै सै, उस्से तरियां मै उननै एक-दुसरे तै न्यारा करूंगा।

33 मै भेड्डां नै अपणी सोळी ओड़ अर बकरियाँ नै ओळी ओड़ खडचा करूंगा।

34 “फेर मै राजा अपणी सोळी ओड़ आळा नै करूंगा, हे मेरे पिता के धन्य माणसों, आओ, उस राज्य के हकदार हो जाओ, जो दुनिया की शरुआत तै थारे खात्तर त्यार करया गया सै।

35 क्यूँके जिब मै भूक्खा था, तो थमनै मेरै ताहीं खाण नै दिया; मै तिसाया था, तो थमनै मेरै ताहीं पाणी पिलाया; मै परदेशी था, तो थमनै मेरै ताहीं अपणे घरां ठहराया;

36 मै उघाड़ा था, तो थमनै मेरै ताहीं लत्ते पिहराए; मै बीमार था, तो थमनै मेरा बेरा लिया, मै जेळ म्ह था, तो थम मेरै तै मिलण आये।”

37 “फेर धर्मी उस ताहीं जवाब देवैगें, हे प्रभु, हमनै कद तेरे ताहीं भूक्खा देख्या अर खुवाया? या कद तिसाया देख्या अर पाणी पिलाया?

38 हमनै कद तेरे ताहीं परदेशी देख्या अर अपणे घरां ठहराया? या उघाड़ा देख्या अर लत्ते पिहराये?

39 हमनै कद तेरे ताहीं बीमार या जेळ म्ह देख्या अर तेरा बेरा लेण आये?”

40 “फेर मै राजा उननै जवाब देऊंगा, मै थमनै साच्ची कहूँ सूँ के थमनै जो मेरे इन छोट्या तै छोट्टे बिश्वासी भाईयाँ म्ह तै किसे एक के गेल्या करया, वो मेरै ए गेल्या करया।”

41 “फेर मै ओळै कान्ही आळा ताहीं करूंगा, हे श्रापित माणसों, मेरै स्याम्ही तै उस अनन्त आग म्ह चले जाओ, जो परमेसवर नै शैतान अर उसके दूतां खात्तर त्यार करी सै।

42 क्यूँके मै जिब भूक्खा था, तो थमनै मेरै ताहीं खाण नै कोनी दिया; मै तिसाया था, तो थमनै मेरै ताहीं पाणी कोनी पियाया; मै जिब परदेशी था, तो थमनै मेरै ताहीं अपणे घरां कोनी ठहराया;

43 मै नंगा था, तो थमनै मेरै ताहीं लत्ते कोनी पिहराए; मै जिब बीमार था, तो थमनै मेरा बेरा कोनी लिया, मै जेळ म्ह था, तो थम मेरै तै मिलण कोनी आये।”

44 “फेर वे जवाब देवैगें, हे प्रभु, हमनै तेरे ताहीं कद भूक्खा, या तिसाया, या परदेशी, या उघाड़ा, या बीमार, या जेळ म्ह देख्या, अर तेरी सेवा-पाणी न्ही करी?”

45 “फेर मै उननै जवाब देऊंगा, मै थमनै साच्ची कहूँ सूँ के थमनै जो मेरे इन छोट्या तै छोट्या म्ह तै किसे एक के गेल्या न्ही करया, वो मेरै गेल्या भी न्ही करया।”

46 “अर अधर्मी जन अनन्त दण्ड भोगैगें पर धर्मी जन अनन्त जीवन म्ह दाखल होंगे।”

26

1 जिब यीशु नै ये सारी बात कह ली तो अपण चेल्यां तै कहण लागया,

2 “थमनै बेरा सै के दो दिनां पाच्छै फसह का त्यौहार सै, अर मै माणस का बेट्टा क्रूस पे चढ़ाण के खात्तर पकड़वाया जाऊंगा।”

3 फेर प्रधान याजक अर प्रजा के यहूदी अगुवें, काइफा नामक महायाजक के आँगण म्ह कट्टे होए,

4 अर आप्स म्ह विचार करण लागगे के यीशु ताहीं धोक्खे तै पकड़के मार देवा।

5 पर वे कहवै थे, “त्यौहार के बखत न्ही, कदे इसा ना हो के माणसां म्ह रोळा माच ज्या।”

6 जिब यीशु बैतनिय्याह गाम म्ह शमौन कोदी के घरां था,

7 तो एक बिरबान्नी संगमरमर के बरतन म्ह महूंगा खसबूदार तेल लेके उसके धौरे आई, अर जिब वो खाणा खाण नै बेठ्या था तो उसके सिर पे उंडेल दिया।

8 न्यू देखके उसके चेल्लें खीजके अर कहण लागगे, “इसका क्यातै नाश करया गया?

9 इस ताहीं तो बढ़िया दाम्मां पे बेचके कंगालां म्ह बांडया जा सके था।”

10 न्यू जाणके यीशु नै उनतै कहा, “बिरबान्नी नै क्यातै सताओ सो? उसने मेरै गेल्या भलाई करी सै।

11 कंगाल तो थारे गेल्या सारी हाण रहवै सै, पर मै थारे गेल्या सारी हाण कोनी रहूंगा ।

12 उसनै मेरी देह पै जो यो महंगा खसबूदार तेल उंडेला सै, वो मेरे गाड़े जाणके खात्तर करया सै ।

13 मै थमनै साचची कहूँ सूँ, के सारे दुनिया म्ह जित्त किते भी यो सुसमाचार प्रचार करया जावैगा, ओइँ उसकै इस काम का जिक्र भी उसकी याद म्ह करया जावैगा ।”

14 फेर यहूदा इस्करियोती नै, जो बारहां चेल्यां म्ह तै एक था, प्रधान याजकां के धारे जाके कहा,

15 “जै मै यीशु नै थारे हाथ्यां म्ह पकड़वा दियुँ, तो मन्नै के द्योगे?” उनै तीस चाँदी के सिक्के तौलके दे दिये ।

16 अर वो उससे बखत तै यीशु नै पकड़वाण का मौक्का टोह्ल लागया ।

17 अखमीरी रोटी के त्यौहार के पैहलडे दिन, चेल्लें यीशु के धारे आके बुद्ध्ण लागगे, “तू कित चाहवै सै के हम तेरे खात्तर फसह खाण की त्यारी करा?”

18 यीशु बोल्या, “नगर म्ह फलाणा माणस नै जाके उसतै कहो, भुरु कहवै सै के मेरा बखत लोवै सै । मै अपने चेल्यां के गेल्या तेरे उरै फसह का त्यौहार बणाऊंगा ।”

19 आखर चेल्यां नै यीशु का हुकम मान्या अर फसह का भोज त्यार करया ।

20 जिब साँझ होई तो यीशु बारहां चेल्यां के गेल्या खाणा खाण के खात्तर बेट्या ।

21 जिब वे खाण लागरे थे तो यीशु नै कहा, “मै थमनै साचची कहूँ सूँ के थारे म्ह तै एक मन्नै धोक्खा देके पकड़वावैगा ।”

22 इसपै चेल्लें घणे उदास होए, अर हरेक उसतै बुद्ध्ण लागया, “हे गुरु, के वो मै सूँ?”

23 यीशु नै जवाब दिया, “जिसनै मेरे गेल्या थाळी म्ह हाथ घाल्या सै, वोए मन्नै पकड़वावैगा ।

24 मै माणस का बेटा तो जिसा मेरे बारे म्ह लिख्या सै, अर जावै ए सै; पर उस माणस पै धिक्कार सै जिसके जरिये मै माणस का बेटा पकड़वाया जाऊंगा: जै उस माणस का जन्म ए न्ही होंदा, तो उसके खात्तर भला होंदा ।”

25 फेर यीशु के पकड़वाण आळे यहूदा नै कहा, “हे गुरु, के वो मै सूँ?” यीशु उसतै बोल्या, “तन्नै कह लिया ।”

26 जिब वे फसह खाण लागरे थे, तो यीशु नै रोटी ली, अर आशीष माँगके तोड़ी, अर चेल्यां ताहीं देके कहा, “ल्यो, खाओ; या मेरी देह सै ।”

27 फेर यीशु नै अपना कटोरा लेके परमेसवर का धन्यवाद करया, अर उन ताहीं देके कहा, “थम सारे इस म्ह तै पियो,

28 क्यूँके यो करार का मेरा वो लहू सै, जो घणखरयां के खात्तर पापां की माफी के खात्तर बहाया जावै सै ।

29 मै थमनै साचची कहूँ सूँ के अंगूर का यो रस उस दिन ताहीं कदे न्ही पिऊंगा, जिब थारे गेल्या अपने पिता के राज्य म्ह नया न्ही पीऊँ ।”

30 फेर वे भजन गाके जैतून के पहाड़ पै गए ।

31 फेर यीशु नै उनतै कहा, “थम आज ए रात नै मेरे बाबत ठोक्कर खाओगे, क्यूँके लिख्या सै: मै पाळी नै मारूंगा, अर टोळ की भेड़ तित्तर-बितर हो जावैगी ।”

32 “पर मै अपने जिन्दा उठण के बाद थारे तै पैहल्या गलील परदेस म्ह मिलूंगाँ ।”

33 इसपै पतरस नै उसतै कहा, “जै सारे छोड़ै तो छोड़ै, पर मै तेरा साथ कदे न्ही छोड़ूंगा ।”

34 यीशु नै उसतै कहा, “मै तेरे तै सच कहूँ सूँ के आज ए रात नै मुर्गे के बाँग देण तै पैहल्या, तू तीन वर मेरे बारे म्ह मुकरैगा ।”

35 पतरस नै उसतै कहा, “जै मन्नै तेरे गेल्या मरणा भी पड़े, तोभी मै तेरा इन्कार कदे कोनी करूंगा ।” इससे तरियां और सारे चेल्यां नै भी न्यूए कहा ।

36 फेर यीशु अपने चेल्यां के गेल्या गतसमनी नामक एक जगहां म्ह आया अर अपने चेल्यां तै कहण लागया, “उरैए बेटे रहियो, जिब ताहीं मै ओइँ प्रार्थना करूँ ।”

37 वो पतरस अर जब्दी के दोन्नु बेट्टा नै गेल्या लेग्या, अर उदास अर काल होण लाग्या ।

38 फेर उसनै उनतै कह्या, “मेरा मन घणा उदास सै, उरै ताहीं के मेरा जी लिकड़ण नै होरया सै । थम उरै ठहरो अर जागदे रहो ।”

39 फेर वो माड़ा और आगौ सरक कै मुँह कै बळ गिरया, अर या प्रार्थना करण लाग्या, “हे मेरे पिता, जै हो सकै तो यो दुख का कटोरा मेरै तै टळ जावै, तोभी जिसा मै चाहूँ सूँ इसा न्ही, पर जिसा तू चाहवै सै उससे तरियां ए होवै ।”

40 फेर उसनै चेल्यां कै धोरै आकै उन ताहीं सोन्दे पाया अर पतरस तै कह्या, “के थम मेरै गेल्या एक घडी भी कोनी जाग सके?”

41 जागदे रहो, अर प्रार्थना करदे रहो के थम परखे ना जाओ, आत्मा तो त्यार सै पर देह कमजोर सै ।”

42 फेर उसनै दुसरी बार जाकै या प्रार्थना करी, “हे मेरे पिता, जै यो मेरै पिए बिना न्ही हट सकदा, तो तेरी मर्जी पूरी हो ।”

43 फेर उसनै आकै उन ताहीं फेर सोन्दे पाया, क्यूँके उनकी आँखां म्ह नींद भरी थी ।

44 उननै छोड़कै वो फेर चल्या गया, अर उन्हे शब्दां म्ह फेर तीसरी बार प्रार्थना करी ।

45 फेर उसनै चेल्यां कै धोरै आकै उनतै कह्या, “इब सोन्दे रहो, अर आराम करो: देखो, बखत आण पोंहच्या सै, अर मै माणस का बेट्टा पापियाँ के हाथ्यां पकड़वाया जाऊँगा ।

46 उठो, चाल्लां; देखो, मेरा पकड़ण आळा धोरै आण पोंहच्या सै ।”

47 वो न्यू कहण ए लागरया था के यहूदा जो बारहां चेल्यां म्ह तै एक था आया, अर उसकै गेल्या प्रधान याजकां अर यहूदी अगुवां की ओड़ तै बड़डी भीड़, तलवार अर लाट्टी लिये होए, आई ।

48 यीशु कै पकड़वाण आळे यहूदा नै उन ताहीं यो इशारा दिया था: “जिस ताहीं मै चूम ल्यूँ वोए सै; उस ताहीं पकड़ लियो ।”

49 अर जिव्बे यीशु कै धोरै आकै कह्या, “हे गुरु, नमस्कार!” अर उस ताहीं घणा चुम्या ।

50 यीशु नै उसतै कह्या, “हे दोस्त, जिस काम कै खात्तर तू आया सै, उसनै करले ।” फेर उननै धोरै आकै यीशु पै हाथ गेरया अर उस ताहीं पकड़ लिया ।

51 यीशु के साथियाँ म्ह तै एक नै हाथ बढ़ाकै अपणी तलवार खींच ली अर महायाजक के नौकर पै चलाकै उसका कान उड़ा दिया ।

52 फेर यीशु नै उसतै कह्या, “अपणी तलवार म्यान म्ह धर ले क्यूँके जो तलवार चलावै सै वे सारे तलवार तै नाश करे जावैंगे ।

53 के तन्नै न्ही बेरा के मै अपणे पिता तै बिनती कर सकूँ सूँ, अर वो सुर्गदूतां की बारहां पलटन तै घणे मेरै धोरै इब्बे हाजर कर देवैगा ?

54 पर पवित्तर ग्रन्थ की ये बात के इसाए होणा जरूरी सै, किस ढाळ पूरी होवैगी ?”

55 उस बखत यीशु नै भीड़ तै कह्या, “के थम तलवार अर लाट्टी लैके मन्नै डाकू की ढाळ पकड़ण कै खात्तर लिकड़े सो? मै हरेक दिन मन्दर म्ह बैठकै उपदेश दिया करूँ था, अर थमनै मेरै ताहीं कोनी पकड़्या ।

56 पर यो सारा ज्यातै होया सै के नबियाँ के वचन पूरे होवै ।” फेर सारे चेल्लें उसनै छोड़कै भाजगे ।

57 फेर यीशु के पकड़ण आळे उस ताहीं काइफा नामक महायाजक कै धोरै लेगे, जित्त शास्त्री अर यहूदी अगुवें कट्टे होए थे ।

58 पतरस दूर ए दूर उसकै पाच्छै-पाच्छै महायाजक कै आँगण ताहीं गया, अर भीत्तर जाकै अन्त देखण नै सिपाहियाँ कै गेल्या बैठग्या ।

59 सारे प्रधान याजक अर यहूदी अगुवां की सभा यीशु नै मारण कै खात्तर उसकै विरोध म्ह झूट्टी गवाही की टोह म्ह थे,

60 पर घणखरे झूट्टे गवाह कै आण पै भी कोनी पाई । आखर म्ह दो जणे आये,

61 अर बोल्ले, “इसनै कह्या सै के मै परमेसवर के मन्दर नै गेर सकूँ सू अर उस ताहीं तीन दिन म्ह बणा सकूँ सू।”

62 फेर महायाजक नै खड़े होके यीशु तै कह्या, “के तू कोए जवाब न्ही देंदा? ये माणस तेरे बिरोध म्ह के गवाही देवै सै?”

63 पर यीशु बोल-बाल्ला रहया। फेर महायाजक नै उसतै कह्या, “मै तन्नै जिन्दे परमेसवर की कसम दियुँ सू के जै तू परमेसवर का बेटटा मसीह सै, तो म्हारै ताहीं कह दे।”

64 यीशु नै उसतै कह्या, “तन्नै आप ए कह दिया; बल्के मै तेरे तै यो भी कहूँ सू के इब तै थम मुझ माणस के बेटटे नै सब तै सर्वशक्तिमान की सोळी ओड़ बेटटे, अर अकास के बादळां पै आन्दे देखोगे।”

65 फेर महायाजक नै अपने लत्ते पाड़के कह्या, “इसनै परमेसवर की बुराई करी सै, इब हमनै गवाह की के जरूरत? देखो, थमनै इब्बे या बुराई सुणी सै!

66 थम के सोचो सो?” उननै जवाब दिया, “यो मारण जोगगा सै।”

67 फेर उननै उसकै मुँह पै थुक्या अर उसकै घुस्से मारे, दुसरयां नै थप्पड़ मारके कह्या,

68 “हे मसीह, म्हारै तै भविष्यवाणी करके कह के किसनै तेरे ताहीं मारया?”

69 पतरस बाहरणै आँगण म्ह बेटचा था के एक नौकराणी उसकै धोरे आई अर बोल्ली, “तू भी तो गलीलवासी यीशु के गेल्या था।”

70 उसनै सारया के स्याम्ही यो कहके नाटचा, “मन्नै न्ही बेरा तू के कहवै सै।”

71 जिब वो बाहरणै देहळियाँ म्ह गया, तो दुसरी नौकराणी उसनै देखके उनतै जो ओड़ै थे कह्या, “यो भी तो यीशु नासरी* के गेल्या था।”

72 वो कसम खाके फेर नाटचा: “मै उस माणस नै कोनी जाणदा।”

73 माड़ी बार पाच्छे माणसां नै जो ओड़ै खड़े थे, पतरस के धोरे आके उसतै कह्या, “साच्चए तू भी उन म्ह तै एक सै, क्यूँके तेरी बोल्ली तेरा भेद खोल्ले सै।”

74 फेर वो धिक्कारण अर कसम खाण लाग्या: “मै उस माणस नै कोनी जाणदा।” जिब्बे मुगें नै बाँग देई।

75 जिब पतरस नै यीशु की कही होई बात याद आई “मुगें के बाँग देण तै पैहल्या तीन बर तू मेरा इन्कार करेगा।” अर वो बारणै ज्याके फूट-फूटके रोण लाग्या।

27

1 तड़के ए तड़के सारे प्रधान याजकां अर यहूदी अगुवां नै यीशु ताहीं मारण की सलाह करी।

2 उननै यीशु ताहीं बाँधया अर ले जाके पिलातुस राज्यपाल के हाथ्थां म्ह सौप दिया।

3 जिब उसकै पकड़वाण आळे यहूदा नै अहसास होया के यीशु ताहीं मौत की सजा सुणाई गई सै तो वो पसताया अर वे तीस चाँदी के सिक्के प्रधान याजकां अर यहूदी अगुवां ताहीं बोहड़ाया

4 अर कह्या, “मन्नै बेकसूर माणस ताहीं मारण के खात्तर पकड़वाके पाप करया सै।” उननै कह्या, “हमनै के मतलब? तू ए जाणै।”

5 फेर वो उन सिक्का नै मन्दर के आँगण म्ह बगाके बाहरणै चल्या गया, अर जाके अपने-आप ताहीं फाँसी लगा ली।

6 प्रधान याजकां नै उन सिक्का ताहीं लेके कह्या, “म्हारै नियम-कायदे इस बात की इजाजत कोनी देंदा के हम इन सिक्कयां नै मन्दर के खजान्ने म्ह धरा, क्यूँके इसका इस्तमाल किसे ताहीं मारवाण खात्तर करया गया सै, या लहू की किम्मत सै।”

7 आखर म्ह उननै सलाह करके उन सिक्कयां तै परदेशियाँ के गाड्डे जाणके खात्तर कुम्हार का खेत मोल ले लिया।

8 इस कारण वो खेत आज ताहीं लहू का खेत कुह्वावै सै।

* 26:71 26:71 नासरत नगर का रहण आळा

9 ताके जो वचन यिर्मयाह नबी के जरिये कह्या गया था वो पूरा होया: “उननै वे तीस सिक्के यानिके उस ठहराए होए मोल ताहीं (जिस ताहीं इस्राएल की ऊलाद म्ह तै कितन्याँ नै ठहराया था) ले लिया,

10 अर जिस तरियां प्रभु नै मेरे ताहीं हुकम दिया था, उससे तरियां ए उननै कुम्हार के खेत नै खरीदण खात्तर उसका इस्तमाल करया।”

11 जिव यीशु राज्यपाल के स्याम्ही खड्या था तो राज्यपाल नै उसतै बुझ्या, “के तू यहूदियाँ का राजा सै?” यीशु नै उसतै कह्या, “तू आप ए कहण लागरया सै।”

12 जिव प्रधान याजक अर यहूदी अगुवें उसपै इल्जाम लावै थे, तो उसनै कुछ जवाब कोनी दिया।

13 इसपै पिलातुस नै उसतै कह्या, “के तू न्ही सुणदा के ये तेरे बिरोध म्ह कितनी गवाही देवै सै?”

14 पर उसनै उस ताहीं एक बात का भी जवाब कोनी दिया, उरै ताहीं के राज्यपाल ताहीं घणी हैरानी होई।

15 राज्यपाल का यो रिवाज था के उस त्यौहार म्ह माणसां के खात्तर किसे एक कैदी नै जिसनै वे चाहवै थे, रिहा कर देवै था।

16 उस बखत उनके उरै बरअब्बा नाम का एक मान्या होइ कैदी था।

17 आखर जिव वो कट्टे होए, तो पिलातुस नै उनतै कह्या, “थम किसनै चाहो सो के मै थारे खात्तर रिहा करूँ? बरअब्बा ताहीं, या यीशु ताहीं जो मसीह कुह्लावै सै।”

18 क्यूँके उसनै बेरा था के उननै उस ताहीं जळण तै पकड़वाया था।

19 जिव वो न्याय की गद्दी पै बैठ्या होया था तो उसकी घरआळी नै उस ताहीं कुहवां भेज्या, “तू उस धर्मी के मामले म्ह हाथ ना गेरिये, क्यूँके मन्ने आज सपने म्ह उसके कारण घणा दुख टाया सै।”

20 प्रधान याजकां अर यहूदी अगुवां नै माणसां ताहीं उकसाया के वे बरअब्बा नै माँग ले, अर यीशु का नाश करावै।

21 राज्यपाल नै उसतै बुझ्या, “इन दोनुआ म्ह तै किसनै चाहो सो के मै थारे खात्तर छोड़ दियुँ?” उननै कह्या, “बरअब्बा ताहीं।”

22 पिलातुस नै उनतै कह्या, “फेर यीशु ताहीं, जो मसीह कुह्लावै सै, के करूँ?” सारया नै उसतै कह्या, “यीशु कूरूस पै चढ़ाया जावै।”

23 हाकिम नै कह्या, “क्यातै, उसनै के बुरा करया सै?” पर वे और भी रुक्के मारण लागगे, “वो कूरूस पै चढ़ाया जावै।”

24 जिव पिलातुस नै देख्या के किमे न्ही बण पडरया पर उल्टा दंगा बढदा जावै सै, तो उसनै पाणी लेके भीड़ के स्याम्ही अपणे हाथ धोए अर कह्या, “मै इस धर्मी के लहू तै बेकसूर सूँ: थमे जाणो।”

25 सारे माणसां नै जवाब दिया, “इसकी मौत के जिम्मेदार हम अर म्हारी ऊलाद होवांगे।”

26 इसपै उसनै बरअब्बा ताहीं उनके खात्तर रिहा कर दिया, अर यीशु के कोड़े लगवाके सौप दिया, के कूरूस पै चढ़ाया जावै।

27 फेर राज्यपाल के सिपाहियाँ नै यीशु ताहीं किले* म्ह ले जाके सारी पलटन उसके चौगदे नै कट्टी करी,

28 अर उसके लत्ते तारके उस ताहीं लाल रंग का चोगगा पहिराया,

29 अर काण्डयाँ का ताज गुन्दके उसके सिर पै धरया, अर उसके सोळे हाथ्यां म्ह सरकण्डा दिया अर उसके आगू गोड्डे टेके के उसका मखौल उड़ाण लागगे अर कह्या, “हे यहूदिया परदेस के राजा, नमस्कार!”

30 अर उसपै थुक्या; अर वोए सरकण्डा लेके उसके सिर पै मारण लागगे।

31 जिव उननै उसका मखौल कर लिया, तो वो चोगगा उसपै तै तारके फेर उससे के लत्ते उस ताहीं पहिराए, अर कूरूस पै चढ़ाण के खात्तर ले चाल्ले।

* 27:27 27:27 जो पिटोरियुम कुह्लावै सै

32 बाहरणै जान्दे होए, उन ताहीं शमौन नाम का एक कुरेनी माणस मिल्या। उननै उस ताहीं बेकार म्ह पकड्या के उसका कूरुस ठाकै ले चाल्लै।

33 उस जगहां पै पोहचे जो “खोपड़ी” यानी इब्रानी भाषा म्ह “गुलगुता” कुह्वावै सै।

34 उननै सिरका मिल्या होइ अंगूर का रस उस ताहीं पीण नै दिया, पर उसनै चाखकै पीणा न्ही चाह्या।

35 फेर उननै उस ताहीं कूरुस पै चढाया, अर पर्ची गेर कै उसके लत्ते बांड लिये,

36 अर ओड़ै बैठकै उसका पैहरा देण लागगे।

37 अर उसका दोषपत्र लिखकै उसके सिर पै लगाया, के, “यो यहूदियाँ का राजा यीशु सै।”

38 फेर उसके गेल्या दो डाकू एक सोळी ओइ अर एक ओळी ओइ, कूरुस पै चढाए गए।

39 राह म्ह आण-जाण आळे सिर हला-हलाकै उसकी बेजती करै थे,

40 अर वे कहवै थे, “हे मन्दर नै ढाण आळे अर तीन दिनां म्ह बणाण आळे, अपने-आपनै तो बचा! जै तू परमेसवर का बेट्टा सै, तो कूरुस पै तै उतर आ।”

41 इस्से तरियां तै प्रधान याजक भी शास्त्रियाँ अर यहूदी अगुवां सुधा मजाक करकै कहवै थे,

42 “इसनै औरां ताहीं बचाया, अर अपने-आपनै न्ही बचा सकदा। यो तो ‘इस्राएल का राजा’ सै। इब कूरुस पै तै उतर आवै तो हम उसपै बिश्वास करां।

43 उसनै परमेसवर पै भरोस्सा राख्या सै; जै वो इसनै चाहवै सै, तो इब इसनै छुड़ा लेवै, क्यूँके इसनै कह्या था, ‘मै परमेसवर का बेट्टा सूं।’”

44 इस्से ढाळ डाकू भी जो उसके गेल्या कूरुस पै चढाए गए थे, उसकी बेजती करै थे।

45 दोफारी तै लेकै तीन बजे ताहीं उस सारे देश म्ह अँधेरा छाया रह्या।

46 तीसरे पहर कै लोवै यीशु नै जोर तै बोल्या, “एली, एली, लमा शबक्तनी?” यानिके “हे मेरे परमेसवर, हे मेरे परमेसवर, तन्नै मेरै ताहीं क्यातै छोड़ दिया?”

47 जो उड़ै खड़े थे, कितन्याँ नै न्यू सुणकै कह्या, “वो तो एलिय्याह ताहीं बुलावै सै।”

48 उन म्ह तै एक जिब्बे भाज्या, अर स्पंज (फोम) लेकै सिरके म्ह डबोया, अर सरकण्डे पै धरकै उस ताहीं चुसाया।

49 औरां नै कह्या, “रहज्या, देखो एलिय्याह उसनै बचाण आवै सै के न्ही।”

50 फेर यीशु नै जोर तै किल्की मारकै जी दे दिया।

51 अर देखो, मन्दर का पड़दा उप्पर तै तळै ताहीं पाटकै दो टुकड़े होग्या अर धरती काम्बगी चट्टान तड़कगी,

52 अर कबरे खुलगी, अर मरे होइ भोत-से पवित्तर माणस जो पैहले मुर्दे थे वे जिन्दा होगये,

53 अर उसके जिन्दा होण के पाच्छे, वे कबरां म्ह तै लिकड़कै पवित्तर नगर म्ह गए अर घणाए ताहीं दिक्खे।

54 फेर सूबेदार अर जो उसके गेल्या पैहरा देरे थे, हाल्लण अर जो कुछ होया था उस ताहीं देखकै घणे डरगे अर कह्या, “साच्चए यो परमेसवर का बेट्टा था।”

55 ओड़ै घणखरी बिरबान्नी जो गलील परदेस तै यीशु की सेवा कर दी होई उसके गेल्या आई थी, दूर तै देखै थी।

56 उन म्ह मरियम[†] मगदलीनी, अर याकूब अर योसेस की माँ मरियम, अर जब्दी के बेटचाँ की माँ थी।

57 जब साँझ होई तो यूसुफ नामका अरिमतिया गाम का एक साहूकार माणस, जो खुदे यीशु का चेल्ला था।

58 उसनै पिलातुस धोरै जाकै यीशु की लाश माँगी। इस करकै पिलातुस नै यीशु की लाश देण का हुकम दिया।

59 यूसुफ नै यीशु की लाश ली, उस ताहीं धोळी चाहर म्ह लपेट्या,

[†] 27:56 27:56 मगदला गाम की मरियम

60 अर उस ताहीं अपणी नई कब्र म्ह धरया, जो उसनै चट्टान म्ह खुदवाई थी, अर कब्र के बारणै पै एक बड़ड़ा पत्थर गिरड़ा कै चल्या गया ।

61 मरियम मगदलीनी‡ अर दुसरी मरियम ओड़ैए कब्र के स्याम्ही बेट्टी थी ।

62 आगला दिन आराम का दिन§ था, उस दिन प्रधान याजकां अर फरीसियाँ नै पिलातुस कै धोरै कट्टे होकै कह्या,

63 “हे महाराज, म्हारै ताहीं याद सै के उस धोक्खेबाज नै जिब वो जिन्दा था, तो उसनै न्यू कह्या था, ‘मै मरण के तीन दिन पाच्छै, जिन्दा हो जाऊंगा ।’

64 इस करकै हुकम दे के तीसरे दिन ताहीं कब्र की रुखाळी सावधानी तै करी जावै, इसा ना हो के उसके चेल्लें आकै उसकी लाश नै चुरा ले जावै, अर माणसां तै कहण लाग्गै, ‘वो मरे होया म्ह तै जिन्दा होगया सै ।’ फेर पाच्छला धोक्खा पैहल्डे तै भी बड़ड़ा होगा ।” (पैहला धोक्खा के वो खुद नै परमेस्वर का बेट्टा बतावै सै, दुसरा यो के इब वो तीसरे दिन मरे होया मै तै जी उट्टुंगा)

65 “पिलातुस नै उनतै कह्या, ‘थारे धोरै पहेरेदार तो सै जाओ, अपणी समझकै मुताबिक कब्र की रुखाळी करो ।’

66 आखर वे पैहेरेदारां नै गैल लेकै गये, अर कब्र के पत्थर पै मोंहर लगाकै कब्र की रुखाळी करी ।”

28

1 आराम कै दुसरे दिन पाच्छै, हफ्तै कै पैहल्डे दिन, तड़कै ए तड़कै मगदला कस्बे की मरियम अर दुसरी मरियम कब्र नै देखण आई ।

2 अर देखो, एक बड़ड़ा हाल्लण आया, क्यूँके प्रभु का सुर्गदूत सुर्ग तै उतरया अर धोरै आकै उसनै पत्थर ताहीं गिरड़या दिया, अर उसपै बैठगया ।

3 उसका रूप बिजळी बरगा था अर उसके लत्ते पाळे की ढाळ धोळे थे ।

4 उसके डर तै पहेरेदार काम्बगें, अर मुदं की ढाळ होगये ।

5 सुर्गदूत नै बिरबानियाँ ताहीं कह्या, “मतना डरो, मन्नै बेरा सै के थम यीशु नै जो कूरुस पै चढ़ाया गया था, टोह्णो सो ।

6 वो उरै न्ही सै, पर अपणे वचन कै मुताबिक जिन्दा होगया सै । आओ, या जगहां देखो, जित्त प्रभु राख्या गया था,

7 अर तावळे जाकै उसके चेल्ल्यां ताहीं कहो के वो मरे होया म्ह तै जिन्दा होगया सै, अर वो थारे तै पैहल्ल्या गलील परदेस म्ह जावै सै, उड़ै उसका दर्शन पाओगे! देखो, मन्नै थारे तै कह दिया ।”

8 वे भय अर घणी खुशी कै गेल्या कब्र तै तावळी बोहड़कै उसके चेल्ल्यां ताहीं खबर देण नै भाज्जी गई ।

9 फेर यीशु उन ताहीं मिल्या । अर कह्या, “सुखी रहो ।” उननै धोरै आकै अर उसके पाँ पकड़कै उस ताहीं प्रणाम करया ।

10 फेर यीशु नै उनतै कह्या, “मतना डरो; मेरे चेल्ल्यां तै जाकै कहो के गलील परदेस म्ह चले जावै, उड़ै वो मन्नै देखेंगे ।”

11 जिब वे चेल्ल्यां ताहीं या खबर देण जाण लागरी थी । तो पैहेरेदारां म्ह तै, जो कब्र की रुखाळी करै थे, उन म्ह तै कईयाँ नै नगर म्ह आकै सारा हाल प्रधान याजकां तै कह सुणाया ।

12 फेर उननै यहूदी अगुवां कै गेल्या कट्टे होकै सलाह करी अर सिपाहियाँ ताहीं घणाए धन दैकै हुकम दिया,

13 “के माणसां तै न्यू कहियो के जिब हम रात नै सोण लागरे थे, तो उसके चेल्लें आकै उसकी लाश नै चुरा लेगे ।

14 जै थारे सोण की खबर राज्यपाल कै कान्नां ताहीं पोहोचैगी, तो हम उसनै समझा लेवैगें अर धमनै जोखिम तै बचा लेवांगें।”

15 आखर उननै रपिये लेके जिसे सिखाए गये थे, उस्से तरियां ए करया। या बात आज ताहीं यहूदी माणसां म्ह मान्नी जावै सै।

16 ग्यारहां चेल्लें गलील परदेस म्ह उस पहाड़ पै गये, जिस ताहीं यीशु नै उन ताहीं बताया था।

17 उननै उसका दर्शन पाके उस ताहीं प्रणाम करया, पर कईयाँ नै शक होया के यीशु जिन्दा होग्या सै।

18 यीशु नै उनकै धोरै आके कह्या, “सुर्ग अर धरती का सारा हक मेरै ताहीं दिया गया सै।

19 इस करके थम जाओ, सारी जात्तां के माणसां ताहीं चेल्ला बणाओ; अर उननै पिता, पुत्र अर पवित्र आत्मा कै नाम तै बपतिस्मा द्यो,

20 अर उननै सारी बात जो मन्नै थारे ताहीं हुकम दिया सै, मानना सिखाओ: अर देखो मै दुनिया कै अंत तक सदा थारे गैल रहूंगा।”

मरकुस के जरिये लिख्या गया सुसमाचार

~~~~~

मरकुस के जरिये लिख्या गया सुसमाचार इस बात तै शुरु होवै सै, “परमेसवर के बेट्टे यीशु मसीह का सुसमाचार।” इस म्ह यीशु ताहीं एक अधिकार के साथ काम करणीये माणस के रूप म्ह दिख्या गया सै। उसका अधिकार उसकी शिक्षाओं म्ह, ओपरी आत्मायाँ पै, उसके अधिकार म्ह, अर माणसां के पापां ताहीं माफ करण म्ह दिखाई देवै सै। इस म्ह यीशु अपणे-आप ताहीं “माणस का बेट्टा” कहवै सै। वो इस करके आया के माणसां नै पापां तै छुटकारा देण खात्तर अपणी जान देवै। मरकुस यीशु के वचन अर शिक्षा पै न्ही बल्कि उसके काम्मां पै जोर देवै सै। इस करके वो उसकी कहाँनी नै सीध्हे, आसान अर असरदार तरियां तै पेश कर सै। यूहन्ना बपतिस्मा देण आळा अर यीशु का बपतिस्मा अर उसकी परख तै जुड़ी एक साफ जानकारी के बाद, लेखक जिब्बे यीशु के चंगाई, शिक्षा अर सेवा के काम्मां का जिक्र करण लाग जावै सै। जिस तरियां बखत बीतता गया उस्से तरियां यीशु के चेल्लें उसनै और भी आच्छी तरियां समझदे गये, पर यीशु के बिरोधी और ज्यादा उग्र होन्दे गये। आखरी पाठ म्ह यीशु के संसारिक जीवन के आखरी हफता की घटनायां का जिक्र पेश करै सै। जिन म्ह तै खास सै, उसका क्रूस पै चढ़ाया जाणा अर उसका दुबारा जिन्दा हो जाणा।

रूपरेखा

सुसमाचार की शुरुआत 1:1-13

गलील परदेस म्ह यीशु के जरिये माणसां की सेवा करणा 1:14-9:50

गलील परदेस तै यरुशलेम नगर ताहीं का सफर 10:1-52

यरुशलेम नगर म्ह आखरी हफता 11:1-15:47

यीशु का दुबारा जिन्दा हो जाणा 16:1-8

जिन्दा हो जाणके बाद प्रभु का दिखाई देणा अर सुगं जाणा 16:9-20

~~~~~

(~~~~~ 3:1-12; ~~~~~ 3:1-18; ~~~~~ 1:19-28)

1 यो सुसमाचार यीशु मसीह के बारे म्ह सै। जो परमेसवर का बेट्टा सै। अर इसकी शुरुआत इस तरियां होई

2 जिसा के यशायाह नबी की किताब म्ह परमेसवर नै अपणे बेट्टे ताहीं कह्ला सै:

“देख, मै अपणे दूत नै तेरे आगवै भेजूं सुं,

जो तेरे खात्तर लोगगां नै तैयार करेगा।”*

3 जंगल-बिद्यावान म्ह एक रुक्का मारणीये का बोल सुणाई देवै सै के

प्रभु के आण खात्तर अपणे-आपनै तैयार करो।”†

4 वो दूत यूहन्ना था, जो जंगल-बिद्यावान म्ह कहवै था, “पाप करणा छोड़ दो अर बपतिस्मा ल्यो परमेसवर थारे पाप माफ कर देगा।”

5 सारे यहूदिया परदेस के, अर यरुशलेम नगर के सारे बासिन्दे लिक्डके उसके धोरे गए, अर अपणे पापां नै मानके यरदन नदी म्ह उसतै बपतिस्मा लिया।

6 यूहन्ना ऊँट के रूप के लत्ते पहरे, अर अपणी कड़ म्ह चमड़े की पेट्टी बाँधे रहवै था, अर टिड्डियाँ अर शहद खाया करै था।‡

7 अर न्यू प्रचार करै था, “मेरे पाच्छे, वो आण आळा सै, जो मेरे तै शक्तिशाली सै, मै इस लायक कोनी के झुकके उसके जूत्याँ के फित्ते खोल्लूँ।

8 मन्ने तो थारे ताहीं पाणी तै बपतिस्मा दिया सै पर वो थमनै पवित्र आत्मा तै बपतिस्मा देवैगा।”

* 1:2 1:2 मत्ती 11:10, मला-3:1 † 1:3 1:3 यशा-40:3 ‡ 1:6 1:6 2 राजा-1:8, मत्ती 3:4

⋯⋯⋯ ⋯⋯⋯⋯⋯⋯ ⋯⋯⋯⋯⋯⋯ ⋯⋯⋯⋯⋯⋯

(⋯⋯⋯⋯ 3:13-4:11; ⋯⋯⋯⋯ 3:21-22; 4:1-13)

9 उन दिनां म्ह यीशु नै गलील परदेस के नासरत नगर तै होके, यरदन नदी म्ह यूहन्ना तै बपतिस्मा लिया।

10 अर जिब वो पाणी म्ह तै लिकड़के उप्पर आया, तो जिब्वे उसनै अकास ताहीं खुल्दे अर पवित्र आत्मा ताहीं कबूतर की तरियां अपणे उप्पर आन्दे देख्या।

11 अर परमेसवर सुर्ग म्ह तै बोल्या, “तू मेरा प्यारा बेट्टा सै, तेरे तै मै राज्जी सूं।”

12 फेर पवित्र आत्मा नै जिब्वे उस ताहीं जंगल-बियावान कान्ही भेज्या।

13 जंगल-बियावान म्ह चाळीस दिन ताहीं शैतान उस ताहीं परखता रह्या, अर वो जंगल-बियावान म्ह पशुआं के गेल्या रह्या, अर सुर्गदूत उसकी सेवा करदे रहे।

⋯⋯⋯ ⋯⋯⋯⋯⋯⋯ ⋯⋯⋯ ⋯⋯⋯ ⋯⋯⋯

(⋯⋯⋯⋯ 4:12-17; ⋯⋯⋯⋯ 4:14-15)

14 यूहन्ना के पकड़े जाणके कुछ बखत पाच्छै, यीशु नै गलील परदेस म्ह आके परमेसवर के राज्य का सुसमाचार प्रचार करया,

15 अर कह्या, “बखत पूरा होया सै, अर परमेसवर का राज्य धोरे आरया सै; पाप करणा छोड़ द्यो, अर परमेसवर के सुसमाचार पै विश्वास करो।”

⋯⋯⋯⋯⋯⋯ ⋯⋯⋯⋯⋯⋯ ⋯⋯⋯

(⋯⋯⋯⋯ 4:18-22; ⋯⋯⋯⋯ 5:1-11)

16 गलील परदेस म्ह गलील समुन्दर के किनारे जान्दे होड़, उसनै शमौन अर उसके भाई अन्दरयास ताहीं समुन्दर म्ह जाळ गरे दे देख्या; क्यूँके वे मछ्वारे थे।

17 यीशु नै उनतै कह्या, “भैरे पाच्छै आओ, मै धमनै माणसां ताहीं कट्टे करण आळे बणाऊंगा ताके वो मेरे चेल्लें बणे।”

18 वे जिब्वे जाळां नै छोड़के उसके चेल्लें बणण खात्तर उसके पाच्छै हो लिये।

19 थोड़ा आगै चालके, उसनै जब्दी के बेट्टे याकूब अर उसके भाई यूहन्ना ताहीं, किस्ती पै जाळां ताहीं ठीक करदे देख्या।

20 उसनै जिब्वे उन ताहीं बुलाया; अर वे अपणे पिता जब्दी ताहीं मजदूरां के गेल्या किस्ती पै छोड़के, उसके चेल्लें बणण खात्तर उसके पाच्छै हो लिये।

⋯⋯⋯⋯⋯⋯ ⋯⋯⋯⋯⋯⋯ ⋯⋯⋯⋯⋯⋯ ⋯⋯⋯⋯⋯⋯ ⋯⋯⋯⋯⋯⋯

(⋯⋯⋯⋯ 4:31-37)

21 जिब यीशु अर उसके चेल्लें कफरनहूम नगर म्ह आए, अर वो जिब्वे आराम के दिन आराधनालय म्ह जाके उपदेश देण लाग्या।

22 अर माणस उसके उपदेश तै हैरान होगे; क्यूँके वो उननै शास्त्रियां की ढाळ न्ही, पर अधिकार तै उपदेश देवै था।

23 उससे बखत, उनके आराधनालय म्ह एक माणस था, जिसम्ह ओपरी आत्मा थी।

24 उसनै रुक्का मारके कह्या, “हे नासरत के यीशु, हमनै तेरे तै के काम? के तू म्हारा नाश करण नै आया सै? मै तन्नै जाणु सूं, तू कौण सै? तू परमेसवर की ओड़ तै भेज्या होया पवित्र मसीह सै!”

25 यीशु नै उसतै धमकाके कह्या, “चुपचाप रहै, अर इस माणस म्ह तै लिकड़ जा।”

26 फेर ओपरी आत्मा ऊँची आवाज म्ह किल्की मारके उस म्ह तै लिकड़गी।

27 इस बात पै सारे माणस अचम्भा करदे होए आप्स म्ह बहस करण लागगे, “या के बात सै? यो तो कोए नया-ए उपदेश सै! वो हक कै गेल्या ओपरी आत्मायां नै भी हुकम देवै सै, अर वे उसका हुकम मान्ने सै।”

28 अर उसका नाम जिब्वे गलील के पूरे परदेस म्ह हरेक जगहां फैलग्या।

⋯⋯⋯⋯⋯⋯⋯⋯⋯⋯⋯⋯⋯⋯⋯⋯⋯⋯⋯⋯⋯⋯⋯

(⋯⋯⋯⋯ 8:14-17; ⋯⋯⋯⋯ 4:38-41)

29 यीशु अर उसके सारे चेल्लें जिब्बे आराधनालय म्ह तै लिकइकै, याकूब अर यूहन्ना कै गेल्या शमौन अर अन्दरयास कै घरां आये।

30 शमौन की सास्सू कै बुखार चढ़रया था, अर उसके चेल्यां नै जिब्बे उसकै बाबत यीशु ताहीं बताया।

31 फेर यीशु नै धोरै जाकै उसका हाथ पकइकै उस ताहीं टाया, अर उसका बुखार उतर गया, अर वा उनकी सेवा-पाणी करण लागगी।

32 साँझ के बखत जिब सूरज डूबगया तो माणस सारे बिमारां ताहीं अर उननै, जीनम्ह ओपरी आत्मा थी, यीशु कै धोरै ल्याए।

33 अर साब्ता नगर दरबाजे पै कट्टा होया।

34 उसनै घणखरयां ताहीं जो कई ढाळ की बिमारियाँ तै दुखी थे, ठीक करया, घणखरी ओपरी आत्मायाँ ताहीं काढ्या, अर ओपरी आत्मायाँ ताहीं बोल्लण कोनी दिया, क्यूँके वे उसनै पिच्छाणै थी, के यीशु परमेसवर की ओड़ तै भेज्या होया मसीह सै।

Matthew 4:42-44

35 तड़कैए दिन लिकइण तै पैहल्या, यीशु शमौन के घर तै उठकै लिकइया, अर एक बियावान जगहां म्ह गया अर उड़ै प्रार्थना करण लागगया।

36 फेर शमौन अर उसके साथी उसकी टोह म्ह गए।

37 जिब वो मिल्या, तो उस ताहीं कह्या, “सारे नगर के माणस तन्नै टोहवै सै।”

38 उसनै उनतै कह्या, “आओ; हम और किते लोवै-धोवै की बस्तियाँ म्ह जावां, के मै उड़ै भी प्रचार करूँ, क्यूँके मै इसे खात्तर आया सूँ।”

39 अर वो सारे गलील परदेस म्ह उनके आराधनालयाँ म्ह जा-जाकै उन ताहीं उपदेश सुणान्दा अर ओपरी आत्मायाँ ताहीं लिकाइदा रह्या।

Matthew 8:1-4; Matthew 5:12-16

40 एक कोढ़ी उसके धोरै आया, उसतै बिनती करी, अर उसकै आगुँ गोड़डे टेककै उस ताहीं कह्या, “जै तू चाहवै तो मन्नै ठीक कर सकै सै।”

41 उसनै उसपै तरस खाकै हाथ बढ़ाकै, अर उस ताहीं छूँ के कह्या, “मै चाहूँ सूँ, के तू इस बीमारी तै ठीक हो ज्या।”

42 अर जिब्बे उसका कोढ़ जान्दा रह्या, अर वो ठीक होगया।

43 फेर उसनै उस ताहीं चेतावनी देकै जिब्बे बिदा करया,

44 अर उसतै कह्या, “लखा, किसे तै कुछ मतना कहिये, पर जाकै अपणे-आपनै याजक ताहीं दिखा, अर अपणे कोढ़ तै ठीक होण कै बारे म्ह जो कुछ मूसा नबी नै जो पवित्तर ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के तू ठीक होगया सै।”

45 पर वो बाहरणै जाकै इस बात का घणा प्रचार करण अर याडै ताहीं फैलाण लागगया के यीशु दुबारे सरेआम नगर म्ह कोनी जा सक्या, पर बाहरणै सुनसान स्थानां म्ह रह्या, अर चौगरदे तै माणस उसकै धोरै आन्दे रहे।

2

Matthew 9:1-8; Matthew 5:17-26

1 थोड़े दिनां पाच्छै, यीशु फेर कफरनहम नगर म्ह आया, अर माणसां नै सुण्या के वो घर म्ह सै।

2 फेर इतने माणस कट्टे होए के दरबाजे धोरै भी जगहां कोनी थी, अर वो उननै परमेसवर के वचन सुणाण लागरया था।

3 अर चार माणस एक लकवे के मरीज ताहीं बिस्तर पै लिटाकै उसकै धोरै ल्याए।

4 पर जब वे भीड़ के कारण उसके धोरे कोनी पोहच सके, तो उनने उसे छ्वात ताहीं जिसके तळै यीशु था, खोल दिया; तो उस बिस्तर समेत जिसपै वो लकवे का मरीज लेटचा था, नीचै उतार दिया।

5 यीशु नै उनका बिश्वास देखके उस लकवे के मरीज ताहीं कह्या, “हे बेट्टे, मन्नै तेरे पाप माफ कर दिये।”

6 फेर घणे शास्त्री जो उड़ै बेट्टे थे, अपणे-अपणे मन म्ह सोच्चण लागगे,

7 “यो माणस न्यू क्यातै कहवै सै? यो तो परमेसवर की बुराई करै सै! परमेसवर नै छोड़के और कौण पाप माफ कर सकै सै?”*

8 यीशु नै जिब्बे अपणे मन म्ह जाण लिया के वे अपणे-अपणे मन म्ह इसा विचार क्यातै करण लागरे सै? अर उनतै कह्या, “थम अपणे-अपणे मन म्ह यो विचार क्यूँ करण लागरे सो?”

9 आसान के सै? के लकवे के मरीज ताहीं यो कहणा के तेरे पाप माफ होए, या फेर यो कहणा के उठ अपना बिस्तर ठाके हाँड-फिर?

10 पर जिसतै थम जाण ल्यो के मुझ माणस के बेट्टे नै धरती पै पाप माफ करण का भी हक सै।” उसनै उस लकवे के मरीज ताहीं कह्या,

11 “मै तेरे तै कहूँ सूँ, उठ, अपणे बिस्तर ठाके अपणे घरां चल्या जा।”

12 वो उठचा अर जिब्बे बिस्तर ठाके उसके स्याम्ही तै लिकड़ग्या; इसपै सारे हैरान होगे, अर परमेसवर की बड़ाई करके कहण लागगे, “हमनै इसा पैहल्या कदे कोनी देख्या।”

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂ

(ⓂⓂⓂⓂⓂ 9:9-13; ⓂⓂⓂⓂ 5:27-32)

13 यीशु दुबारा लिकड़के गलील समुन्दर के किनारे गया, अर सारी भीड़ उसके धोरे आई, अर वो उननै उपदेश देण लाग्या।

14 जान्दे होए उसनै हलफई के बेट्टे लेवी जिसका नाम मत्ती था, चुंगी की चौकी पै बेट्टे देख्या, अर उसतै कह्या, “मेरा चेल्ला बणण खात्तर मेरै पाच्छै हो ले।” अर वो उठके उसके पाच्छै हो लिया।

15 जब वो मत्ती के घर म्ह खाणा खाण बेठचा, तो घणेए चुंगी लेण आळे अर जिननै लोग पापी कहवै थे, यीशु अर उसके चेल्यां गेल्या खाणा खाण बेट्टे; क्यूँके वे घणे सारे थे, अर उसके साथ हो लिए थे।

16 शास्त्रियाँ अर फरीसियाँ नै न्यू देखके के वो तो पापी अर चुंगी लेण आळा गेल्या खाणा खावै सै, उसके चेल्यां ताहीं कह्या, “वो तो चुंगी लेण आळे अर जिननै लोग पापी कहवै सै, उनके गेल्या खावै-पीवै सै।”

17 यीशु नै या सुणके उनतै कह्या, “आच्छे-बिच्छयां नै वैद की जरूरत कोनी, पर बिमारां नै सै: जो अपणे-आपनै धर्मी कहवै सै, मै उननै न्ही, पर जो अपणे-आपनै पापी कहवै सै उननै बुलाण आया सूँ।”

ⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 9:14-17; ⓂⓂⓂⓂ 5:33-39)

18 यूहन्ना के चेल्लें, अर फरीसी बरत करया करै थे, तो उननै आके उसतै कह्या, “यूहन्ना के चेल्लें अर फरीसियाँ के चेल्लें बरत क्यातै करै सै, पर तेरे चेल्लें बरत न्ही राखदे?”

19 यीशु नै उनतै कह्या, “जब ताहीं बन्दड़ा बरातियाँ के गेल्या सै, के वे बरत राख सकै सै? आखर जब ताहीं बन्दड़ा उनके गेल्या सै, जद ताहीं वे बरत कोनी कर सकदे।

20 पर वे दिन भी आवैगें जब बन्दड़ा उनतै न्यारा करया जावैगा; उस बखत वे बरत करैगें।

21 “नये लत्यां की थेगळी पुराणे लत्यां पै कोए न्ही लगान्दा, न्ही तो वा थेगळी उस म्ह तै खुस्का लेवैगी, यानिके नया, पुराणे तै, अर वो पैहल्या तै घणा पाट जावैगा।

* 2:7 2:7 (यशा-43:25)

22 नये अंगूर के रस ताहीं पुराणी मशकां म्ह कोए कोनी राखदा, न्ही तो अंगूर का रस मशकां नै पाड देवैगा, अर अंगूर का रस अर मशक दोनुआ का नाश हो जावैगा, पर नया अंगूर का रस नई मशकां म्ह भरया जावै सै।”

(***** 12:1-8; ***** 6:1-5)

23 न्यू होया के आराम के दिन यीशु चेल्यां के गैल खेत्तां म्ह तै होके जाण लागरया था, अर उसके चेल्ले चाल्दे होए गेहूँ की बाल तोड़ण लागगे।†

24 तो फरीसियाँ नै उस ताहीं कह्या, “देख, ये आराम के दिन वो काम क्यातै करै सै? जो नियम-कायदा के खिलाफ सै।”

25 यीशु नै उनतै कह्या, “के थमनै पवित्र ग्रन्थ म्ह यो न्ही पढ़या के जिव म्हारे पूर्वज दाऊद नै जरूरत होई, अर जिव वो अर उसके साथी भूक्खे होए, फेर उसनै के करया था?

26 उसनै किस ढाळ अबियातार महायाजक के बखत, परमेसवर के घर म्ह जाके भेंट की रोदटी खाई, जिनका खाणा याजकां नै छोड़ और किसे के खात्तर खाणा ठीक कोनी, अर अपने साथियाँ ताहीं भी दी?”

27 फेर उसनै उन ताहीं कह्या, “आराम का दिन माणस खात्तर बणाया गया सै, ना के माणस आराम के दिन के खात्तर।

28 इस करके मै माणस का बेट्टा आराम के दिन का भी माल्लिक सू।”

3

(***** 12:9-14; ***** 6:6-11)

1 यीशु फेर आराम के दिन आराधनालय म्ह गया; उडै एक माणस था जिसका हाथ सूखरया था,

2 अर फरीसी यीशु पै दोष लाण खात्तर उसकी टाह म्ह थे के देखे, वो आराम के दिन उसनै ठीक करै सै के न्ही।

3 उसनै सूखे हाथ आळे माणस तै कह्या, “बीच म्ह खड्या होज्या”

4 अर उनतै कह्या, “के मूसा के नियम-कायदा के मुताबिक आराम के दिन भला करणा ठीक सै या बुरा करणा, जान बचाणा या मारणा?” पर वे बोल-बाल्ले रहे।

5 फेर उसनै उनके मन की कठोरता तै काल होके, उन ताहीं छो तै चोगरदेनै देख्या, अर उस माणस ताहीं कह्या, “अपणा हाथ बढ़ा।” उसनै बढ़ाया, अर उसका हाथ ठीक हो गया।

6 फेर फरीसी बाहरणै जाके जिब्बे हेरोदेस राजा के समर्थकां के गेल्या उसके विरोध म्ह सलाह करण लागगे के उसका नाश किस तरियां करया जावै।

7 यीशु अपने चेल्यां गेल्या गलील समुन्दर कान्ही चल्या गया: अर गलील तै एक बड़डी भीड़ उसके पाच्छै हो ली;

8 अर यहूदिया नगर, अर यरुशलेम नगर, अर इद्मिया परदेस, अर यरदन नदी के परली ओड़, अर सूर अर सैदा नगर के लोवै-धोवै तै एक बड़डी भीड़ न्यू सुणके के वो किसे अचम्भे आळे काम करै सै, उसनै देखण आई।

9 यीशु नै अपने चेल्यां तै कह्या, “भीड़ की बजह तै एक छोटटी किस्ती मेरै खात्तर त्यार राखियों ताके वे मन्ने दाब न्ही सके।”

10 क्यूंके उसनै घणखरयां ताहीं ठीक करया था, इस करके जितने माणस बीमार थे, उस ताहीं छूण खात्तर उसपै पड़ण लागरे थे।

11 जिन म्ह ओपरी आत्मा भी जिव उस ताहीं देखै थी, तो उसके स्याम्ही गिर ज्या थी, अर किल्की मारके कहवै थी, तू परमेसवर का बेट्टा सै।

12 अर उसनै ओपरी आत्मायाँ तारीं चेतावनी देकै कह्या के मेरै बारै म्ह किसे तै ना कहियो के मै कौण सू।

ⓂⓂⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂ
(ⓂⓂⓂⓂ 10:1-4; ⓂⓂⓂⓂ 6:12-16)

13 फेर यीशु पहाड़ पै चढ़ग्या, अर जिन नै वो चाहवै था उन तारीं अपणे धोरै बुलाया; अर वे उसकै धोरै आए।

14 फेर उसनै उन म्ह तै बारहा चेल्यां तारीं नियुक्त करया के वे उसके गेल्या-गेल्या रहवै, अर वो उननै भेज्जै के वे प्रचार करै,

15 अर ओपरी आत्मा तारीं काढ़ण का हक राखै।

16 वे बारहा चेल्ले ये सै: “शमोन जिसका नाम उसनै पतरस धरया,

17 अर जब्दी का बेट्टा याकूब अर याकूब का भाई यूहन्ना, जिसका नाम उसनै बुअनरगिस यानिके गरजण का बेट्टा’ धरया।”

18 अर अन्दिरयास, अर फिलिप्पुस, अर बरतुल्मै, अर मत्ती, अर थोमा, अर हलफई का बेट्टा याकूब, अर तद्दै, अर शमौन कनानी,

19 अर यहूदा इस्करियोती जिसनै उस तारीं पकड़वा भी दिया था।

ⓂⓂⓂⓂ ⓂⓂ ⓂⓂⓂⓂⓂⓂ
(ⓂⓂⓂⓂ 12:22-32; ⓂⓂⓂⓂ 11:14-23; 12:10)

20 फेर यीशु घरां आया; अर इसी भीड़ कट्टी होई, के यीशु अर उसके चेल्यां पै रोट्टी भी कोनी खाई गई।

21 जिव उसके कुणवा आळा न्यू सुण्या, तो वे उस तारीं घरां ले जाण खात्तर लिकडे; क्यूँके वे कहवै थे, “के उसका दिमाग टिकाणै कोनी सै”

22 शास्त्री भी जो यरुशलेम नगर तै आये थे, वे कहवै थे, “उस म्ह शैतान सै,” अर न्यू भी के “वो ओपरी आत्मायाँ के सरदार शैतान की मदद तै ओपरी आत्मायाँ नै लिकाड़े सै।”

23 ज्यातै यीशु उननै धोरै बुलाकै उदाहरणां म्ह कहण लाग्या, “शैतान क्यूँकर ओपरी आत्मायाँ नै काढ सकै सै?”

24 जै किसे राज्य म्ह फूट पड़े, तो वो राज्य किस तरियां टिक्या रह सकै सै?

25 अर जै किसे घर म्ह फूट पड़े, तो वो घर क्यूँकर डट्या रह सकैगा?

26 इस करके जै शैतान खुद का ए बिरोधी होकै अपणे म्ह फूट गेरै, तो वो किस तरियां बण्या रहै सकै सै? उसका तो नाश हो जावै सै।

27 “पर कोए माणस किसे टाड़डे माणस के घर म्ह बड़के उसका माळ कोनी लूट सकदा, जिव तक के पैहल्या उस टाड़डे माणस तारीं ना जुड़ ले; जिव वो उसके घर नै लूट लेवैगा।

28 मै धमनै साच्ची-साच कहुँ सूँ के माणसां के सारे पाप अर बुराई जो वे करै सै, माफ करे जावैगे,

29 पर जो कोए पवित्तर आत्मा के बिरोध म्ह बुराई करै सै, वो कदे माफ कोनी करया जावैगा: बल्के वो अनन्त पाप का कसूरवार बण ज्यागा।”

30 क्यूँके वे न्यू कहवै थे के उस म्ह ओपरी आत्मा सै।

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂ
(ⓂⓂⓂⓂ 12:46-50; ⓂⓂⓂⓂ 8:19-21)

31 फेर यीशु की माँ अर उसके भाई आए, अर बाहरणै खड़े होकै उस तारीं बुलावा भेज्या।

32 भीड़ उसके लोवै-धोवै बेट्टी थी, अर उननै उसतै कह्या, “देख, तेरी माँ अर तेरे भाई बाहरणै तन्नै टोहवै सै।”

33 यीशु नै उनतै जवाब दिया, “मेरी माँ अर मेरे भाई कौण सै?”

34 अर जो उसके लोवै-धोवै बेट्टे थे, उनपै निगांह करके कह्या, “देखो, मेरी माँ अर मेरे भाई ये सै।

35 क्यूँके जो कोए परमेसवर की इच्छा पै चाल्लै, वोए मेरा भाई, मेरी बेब्बे, अर मेरी माँ सै।”

4

~~XXXXXXXXXX~~

(~~XXXXXXXXXX~~ 13:1-9; ~~XXXXXXXXXX~~ 8:4-8)

1 यीशु फेर गलील समुन्दर कै किनारे उपदेश देण लागगया: अर इसी बड़डी भीड़ उसकै धोरै कट्टी होगी के वो समुन्दर म्ह एक किस्ती पै चढ़कै बैठगया, अर सारी भीड़ जमीन पै समुन्दर कै किनारे खड़ी रही।

2 अर वो उनने उदाहरणां म्ह घणीए बात सिखाण लागया, अर अपणे उपदेश म्ह उन ताहीं कह्या,

3 “सुणो! एक किसान बीज बोण लिकइया।

4 बोदे बखत कुछ राही कै किनारे पड़े, अर पंछियाँ नै आकै उन ताहीं चुग लिया।

5 कुछ पथरीली धरती पै पड़े जड़े उसने घणी माट्टी ना मिली, अर ढुंधी माट्टी ना मिलण कै कारण तोळाए उगया,

6 अर जब सूरज लिकइया तो जळगे, अर जड़ ना पकड़ण कै कारण सुखगे।

7 कुछ झाड़ियाँ म्ह पड़े, अर झाड़ियाँ नै आगौ बढ़कै उन ताहीं दाब दिया, अर वो फळ कोनी ल्याये।

8 पर कुछ आच्छी धरती पै पड़े, अर वो उगया अर बढ़कै फळ ल्याये; अर कोए तीस गुणा, कोए साठ गुणा अर कोए सौ गुणा फळ ल्याया।”

9 फेर उसने कह्या, “जिसके कान हों, वो ध्यान तै सुण ले।”

~~XXXXXXXXXX~~

(~~XXXXXXXXXX~~ 13:10-17; ~~XXXXXXXXXX~~ 8:9-10)

10 जब यीशु एकला रहगया, तो उसके साथियाँ नै उन बारहां चेल्यां सुधा उसतै इन उदाहरणां कै बारे म्ह बुद्धझया।

11 उसने उनतै कह्या, “धारे ताहीं तो परमेसवर कै राज्य के भेद की समझ दे राक्खी सै, पर बाहर आळा खात्तर सारी बात उदाहरणां म्ह होवै सै।”

12 इस करकै के

“वे देखदे होए देखै पर उननै दिखाई ना देवै

अर सुणदे होए सुणै भी पर ना समझै;

इसा ना हो के वे पाप करणा छोड़दे, अर वे माफ करे जावै।”*

~~XXXXXXXXXX~~

(~~XXXXXXXXXX~~ 13:18-23; ~~XXXXXXXXXX~~ 8:11-15)

13 फेर यीशु ने उनतै कह्या, “के धम यो उदाहरण कोनी समझै? तो फेर और सारे उदाहरणां नै किस तरियां समझोगे?”

14 किसान जो बीज बोण आळा सै वो वचन बोण आळे कै समान सै।

15 राही के किनारे गिरे बीज उन माणसां की तरियां सै जो वचन सुणै सै, तो श्रैतान जिब्बे आकै वचन नै जो उन म्ह बोया गया था, ठा ले जावे सै।

16 उससे तरियां-ए जो पथरीली धरती पै बीज गिरे सै, ये वे सै जो वचन सुणकै जिब्बे खुश होकै अपना लैवै सै।

17 पर उनके भीत्तर जड़ न्ही पकड़ण कै कारण थोड़े-से दिनां के खात्तर रहै सै; इसकै बाद जब वचन कै कारण उनपै क्लेश या संकट आवै सै, तो वे जिब्बे ठोक्कर खा जावै सै।

18 जो झाड़ियाँ म्ह बीज गिरे ये वे सै जिन नै वचन सुण्या,

19 अर दुनिया की फिक्र, अर धन का धोक्खा, अर दुसरी चिज्जां का लालच म्ह पड़कै वचन नै दाब देवै सै अर वो फळदा कोनी।

* 4:12 4:12 (यशा-6:9-10, यिर्म-5:21)

20 अर जो आच्छी धरती पै बीज गिरे, ये वे सै जो वचन सुणकै अपना लेवै सै अर फळ ल्यावै सै, कोए तीस गुणा, कोए साठ गुणा अर कोए सौ गुणा ।”

☞☞☞ ☞☞☞☞☞☞☞☞☞
(☞☞☞☞ 8:16-18)

21 यीशु नै उनतै एक और उदाहरण दिया, “के दीवै नै इस खात्तर कोनी जळान्दे, के उसनै बरतन या खाट के तळै धर देवां? पर इस खात्तर के टांडी पै धरया जावै?”

22 इसा कुछ भी न्ही जो लुक्या हो, अर खोल्या न्ही जावैगा अर ना कुछ गुप्त सै, जिसके बारे म्ह बेरा ना लागै।

23 जै किसे के कान हों, तो ध्यान तै सुण ले ।”

24 फेर उसनै उनतै कहा, “चौक्कस रहियो की के सुणो सो । जिस नाप तै थम नाप्यो सों उससे नाप तै थारे खात्तर भी नाप्या जावैगा । अर थारे ताहीं घणा दिया जावैगा ।

25 क्यूंके जिसके धोरे सै, उस ताहीं दिया जावैगा, अर जिसके धोरे न्ही सै, उसतै वो भी जो उसके धोरे सै, ले लिया जावैगा ।”

☞☞☞ ☞☞☞☞☞☞☞☞☞

26 फेर यीशु नै उन ताहीं एक और उदाहरण दिया, “परमसवर का राज्य इसा सै, जिसा कोए माणस धरती पै बीज छिड़कै सै,

27 अर रात नै सोग्या अर सबेरै जाग गया, अर वो बीज इसा उगै अर बधे सै के उसनै बेराए कोनी लाग्या ।

28 धरती खुद-बै-खुद फळ लावै सै, पैहल्या अंकुर, फेर बाल, अर फेर बाल म्ह त्यार दाणा ।

29 पर जिब दाणा पक जावै सै, फेर वो जिब्वे दांती लावै सै, क्यूंके लामणी का बखत आण पोहचा सै ।”†

☞☞☞ ☞☞☞☞☞☞☞☞☞

(☞☞☞☞ 13:31-32-34; ☞☞☞☞ 13:18-19)

30 फेर यीशु नै उन ताहीं एक और उदाहरण दिया, “हम परमसवर के राज्य की बराबरी किसतै करां अर किस उदाहरण तै उसका खुलास्सा करां?”

31 वो राई के दाणे की ढाळ सै: जिब धरती म्ह बोया जावै सै तो धरती के सारे बीज्जां तै छोट्टा होवै सै,

32 पर जिब बोया गया, तो जामके सारे सागपात तै बड्डा हो जावै सै, अर उसकी इतनी बड्डी डाळी लिकडै सै के अकास के पंछी उसकी छाया तळै बसेरा कर सकै सै ।”

33 यीशु उन ताहीं इस तरियां के घणे उदाहरण दे-देके उनकी समझके मुताबिक वचन सुणावै था,

34 अर इस तरियां की शिक्षा देण खात्तर वो उदाहरणां का ए इस्तमाल करया करदा; पर एकले म्ह वो अपने चेल्यां ताहीं सारी बाततां का मतलब बतावै था ।

☞☞☞☞☞☞☞☞☞☞☞☞☞☞☞

(☞☞☞☞☞ 8:23-27; ☞☞☞☞ 8:22-25)

35 उससे दिन जिब साँझ हाई, तो यीशु नै चेल्यां तै कहा, “आओ, हम समुन्दर के परली ओड़ चाल्लां ।”

36 अर वे भीड़ नै छोड़के जिसा वो था, उसाए उस ताहीं किस्ती पै गेल्या ले चाल्ले; अर उसके गेल्या और भी किस्ती थी ।

37 फेर बड़ीए आँधी आई, अर पाणी की झाल किस्ती के उरै ताहीं लागगी के वा पाणी तै भरण नै होगी ।

38 पर यीशु पाच्छले हिस्से म्ह गद्दी लगाई सोण लाग रहा था । फेर उननै उस ताहीं जगाके उसतै कहा, “हे गुरु, के तन्नै चिन्ता कोनी के हम डूबके मरण आळे सां?”

39 फेर उसनै उठके आँधी ताहीं धमकाया, अर पाणी की झाल तै कहा, “शांत रहै, थम ज्या ।” अर आँधी थमगी अर पूरी तरियां शान्ति छागी ।

† 4:29 4:29 (योए-3:13)

40 उसनै उनतै कहा, “थम क्यूँ डरो सों? के थमनै इब ताहीं बिश्वास कोनी?”‡

41 वे घणे डरगे, अर आप्पस म्ह बोल्ले, “यो कौण सै के आँधी अर पाणी की झाल भी उसका हुकम मान्नै सै?”

5

ⲙⲁⲣⲕⲱⲥ ४:४०-४१ ⲙⲁⲣⲕⲱⲥ ५:२०-२१ ⲙⲁⲣⲕⲱⲥ ५:२२-२३ ⲙⲁⲣⲕⲱⲥ ५:२४-२५ ⲙⲁⲣⲕⲱⲥ ५:२६-२७ ⲙⲁⲣⲕⲱⲥ ५:२८-२९
(*ⲙⲁⲣⲕⲱⲥ ४:२८-३४; ⲙⲁⲣⲕⲱⲥ ४:२६-३९*)

1 यीशु अर उसके चेल्लें गलील समुन्दर के परली ओड़ गिरासेनियों के परदेस म्ह पोहचे,

2 जिव यीशु किस्ती पै तै उतरया तो जिब्बे एक माणस जिसम्ह ओपरी आत्मा थी, कबिरस्तान म्ह तै लिकड़के उसतै मिल्या ।

3 वो कबिरस्तान म्ह रह्या करै था अर कोए उस ताहीं बेल्लां तै भी कोनी जुड़ सकै था,

4 क्यूँके वो घणीए पर बेड़ियाँ अर बेल्लां तै जुडचां गया था, पर उसनै बेल्लां ताहीं तोड़ दिया था अर बेड़ियाँ के टुकड़े-टुकड़े कर दिये थे, अर कोए उस ताहीं बस म्ह कोनी कर सकै था ।

5 वो सारीहाण रात-दिन कबिरस्तानां अर पहाड़ां म्ह किल्की मारदा अर खुद नै पत्थरां तै जख्मी करै था ।

6 वो यीशु नै दूर तै ए देखकै भाजकै आया, उसके पायां म्ह पड़कै घुटने टेक दिए,

7 अर जोर तै किल्की मारकै कहा, “हे यीशु, परमप्रधान परमेसवर के बेट्टे, मन्नै तेरे तै के काम? मै तन्नै परमेसवर की कसम दियुँ सूँ के मन्नै काल ना करै ।”*

8 क्यूँके उसनै उसतै कहा था, “हे ओपरी आत्मा, इस माणस म्ह तै लिकड़ आ!”

9 यीशु नै उसतै बुद्धिया, “तेरा के नाम सै?” उसनै उस ताहीं कहा, “मेरा नाम सेना सै, क्यूँके हम घणे सां ।”

10 अर उसनै यीशु तै घणी बिनती करी, “के हमनै इस परदेस तै बाहरणै ना खन्दावै ।”

11 उड़े पहाड़ पै सूअरां का एक बड़ड़ा टोळ चरै था ।

12 ओपरी आत्मायाँ नै यीशु तै बिनती करकै कहा, “हमनै उन सूअरां म्ह भेजदे के हम उनकै भीत्तर समा जावां ।”

13 यीशु नै उन ताहीं हुकम दिया अर ओपरी आत्मा लिकड़कै सूअरां के भीत्तर समागी अर टोळ, जो कोए दो हजार का था, ढळान पै तै झपटकै गलील समुन्दर म्ह पड़कै डूब मरया ।

14 उनके पाळीयाँ नै जो डरे होए थे, भाजकै कस्बे अर गाम्मां म्ह खबर सुणाई, अर जो होया था, माणस उस ताहीं देखण आए ।

15 अर यीशु कै धौरै आकै वे उस ताहीं जिसम्ह ओपरी आत्मा थी, यानिके जिस म्ह सेना बड़री थी, लत्ते पहरे अर सोध्दी म्ह बेट्टे देख्या ।

16 अर देखण आळा नै उसका, जिसम्ह ओपरी आत्मा थी, अर सूअरां का पूरा किस्सा उन ताहीं कह सुणाया ।

17 फेर वे उसतै बिनती करकै कहण लाग्गे के म्हारी सीमा तै लिकड़ज्या ।

18 जिव यीशु किस्ती पै चढ़ण लागग्या, तो वो जिस म्ह पैहल्या ओपरी आत्मा थी, उसतै बिनती करण लाग्या, के “मन्नै अपणे गेल्या रहण दे ।”

19 पर यीशु नै उस ताहीं मंजूरी कोनी देई, अर उसतै बोल्या, “अपणे घरां जाकै अपणे माणसां नै बता, के तेरे पै दया करकै प्रभु नै तेरे खात्तर किसे बड़े-बड़े काम करे सै ।”

20 वो जाकै दिकापुलिस नगर म्ह इस बात का प्रचार करण लाग्या, के यीशु नै मेरै खात्तर किस ढाळ के बड़े काम करे; अर जिसनै भी यो सुण्या वे सारे अबम्मा करण लाग्गै ।

ⲙⲁⲣⲕⲱⲥ ५:२०-२१ ⲙⲁⲣⲕⲱⲥ ५:२२-२३ ⲙⲁⲣⲕⲱⲥ ५:२४-२५ ⲙⲁⲣⲕⲱⲥ ५:२६-२७ ⲙⲁⲣⲕⲱⲥ ५:२८-२९
(*ⲙⲁⲣⲕⲱⲥ ५:१८-२६; ⲙⲁⲣⲕⲱⲥ ५:४०-५६*)

21 जिव यीशु किस्ती तै दुसरे किनारे पै गया, तो एक बड्डी भीड़ उसके धोरे कट्ठी होगी; वो गलील समुन्दर का किनारा था।

22 आराधनालयों के सरदारों म्ह तै एक याईर नाम का आदमी आया, अर उसनै देखके उसके पायां के म्ह पड़गया,

23 अर न्यू कहके उस ताहीं बिनती करी, “मेरी छोट्टी छोरी मरण नै होरी सै: तू आके उसपै हाथ धरदे, तो वा ठीक होके जिन्दा हो जावै।”

24 फेर वो उसके गेल्या चाल्या; अर बड्डी भीड़ उसके पाच्छे हो ली, याड़े ताहीं के माणस उसपै पड़ण लागरे थे।

25 एक बिरबान्नी थी, जिसके बारहा साल तै लहू बहण की बीमारी थी।

26 उसनै घणे डाक्टरों तै ईलाज करवा के भी बड़ा दुख टाया, अर उसनै अपना सारा रपियाँ खर्च के भी कोए फायदा कोनी होया, पर उसकी बीमारी और भी घणी बढ़गी थी।

27 वा बिरबान्नी यो सुणके, यीशु माणसां नै ठीक करे सै भीड़ म्ह उसके पाच्छे तै आई अर उसके लत्ते ताहीं छू लिया,

28 अर वा या भी कहवै थी, “जै मै उसके लत्ते नै छू ल्युंगी, तो ठीक हो जाऊंगी।”

29 अर जिब्वे उसका लहू बहणा बन्द हो गया, अर उसनै अपने देह म्ह बेरा लागगया के मै उस बीमारी तै चंगी होगी सूं।

30 यीशु नै जिब्वे खुद तै बेरा पाटगया के मेरे म्ह तै सामर्थ लिकड़ी सै, अर भीड़ के पाच्छे फिरके बुद्धया, “मेरे लत्ते किसनै छुए?”

31 उसके चेल्यां नै उसतै कह्या, “तू देखे सै के भीड़ तेरपै गिरण-पड़ण लागरी सै, अर तू पूच्छे सै के किसनै मेरे ताहीं छुया?”

32 फेर उसनै उस ताहीं देखण खात्तर जिसनै यो काम करया था, चोगरदेनै निगाह घुमाई।

33 फेर वा बिरबान्नी न्यू जाणके के मेरी किसी भलाई होई सै, डरगी अर काम्बदी होई आई, अर उसके पायां म्ह पड़के उस ताहीं सारा हाल सच-सच कह दिया।

34 यीशु नै उसतै कह्या, “बेट्टी, तेरे विश्वास नै तेरे ताहीं ठीक करया सै, खुशी-खुशी जा, अर अपनी इस बीमारी तै ठीक रह।”†

35 यीशु न्यू कहवै था के आराधनालय के सरदार याईर के घर तै माणसां नै आके कह्या, “तेरी छोरी तो मर ली सै, इब गुरु नै क्यातै काल करे सै?”

36 जो बात वे कहे थे, उस ताहीं यीशु नै बेगौरी करके, आराधनालय के सरदार तै कह्या, “मतना डरै, सिर्फ विश्वास राख।”

37 अर उसनै पतरस अर याकूब अर उसके भाई यूहन्ना नै छोड़, किसे दुसरे ताहीं अपने गेल्या आण ना दिया।

38 आराधनालय के सरदार के घर म्ह पोहचके, उसनै माणसां ताहीं घणे रोन्दे अर किल्की मारदे देख्या।

39 फेर उसनै भीत्तर जाके उनतै कह्या, “थम क्यातै रोळा मचाओ अर रोओ सो, छोरी मरी कोनी, पर सोवै सै।”

40 वे उसका मजाक उड़ाण लागगे, पर उसनै सारया ताहीं बाहर लिकाड़के छोरी के माँ-बाप अर अपने चेल्यां के गेल्या भीत्तर गया, जित्त छोरी पड़ी थी।

41 अर छोरी का हाथ पकड़के उसतै कह्या, “तलिता कूमी!” जिसका मतलब सै, “हे छोरी, मै तेरे तै कहूँ सूं, उठ!”

42 अर वा छोरी जो बारहा साल की थी, जिब्वे उठके चाल्लण-फिरण लागगी; अर इसपै माणस घणे हैरान होगे।

† 5:34 5:34 (लूका 8:48)

43 फेर उसने उन ताहीं चेतावनी देकै हुकम दिया के इस बात का किसे नै भी बेरा ना पाट्टण दियो अर कह्या, “इसनै कुछ खाण नै द्यो।”

6

Matthew 13:53-58; Luke 4:16-30

1 कफरनहूम नगर तै लिकड़कै यीशु अपने नासरत नगर म्ह आया, अर उसके चेल्लें भी उसके पाच्छै गए।

2 आराम कै दिन वो आराधनालय म्ह उपदेश देण लागग्या, अर घणखरे माणसां नै सुणकै अचम्भा करया अर कहण लागगे, “इसनै इतनी बात कडै तै आगी?” यो कौण सा ज्ञान सै जो उस ताहीं दिया होया सै? किस ढाळ के सामर्थ के काम उसके हाथ्यां तै दिक्खै सै?

3 के यो वोए खात्ती कोनी, जो मरियम का छोरा, अर याकूब, योसेस, यहूदा, अर शमौन का भाई सै? के उसकी सारी बेब्बे याडै म्हारै बिचाळै कोनी रहून्दी? इस करकै उननै उसका विश्वास कोनी करा।

4 यीशु नै उनतै कह्या, “नबी का अपने गाम, अपने कुणवे, अर अपने घर नै छोड़कै और किते भी निरादर कोनी होन्दा।”

5 वो उडै कोए चमत्कार के काम न्ही कर सक्या, सिर्फ थोड़े-से बिमारां पै हाथ धरकै उन ताहीं ठीक करया।

6 अर यीशु नै उनकै अविश्वास पै हैरानी होई अर चौगरदे के गाम्मां म्ह उपदेश सुणान्दा हांडया।

Matthew 10:5-15; Luke 9:1-6

7 यीशु नै बारहां चेल्यां ताहीं अपने धौरै बुलाया अर उननै ओपरी आत्मायाँ पै हक दिया अर उननै दो-दो करकै भेजण लागग्या;।

8 उसनै चेल्यां ताहीं हुकम दिया, “रास्ते खात्तर लाट्टी नै छोड़ और कुछ ना लियो, ना तो रोट्टी, ना झोळी, ना बटुए म्ह पईसे,

9 जूते तो पैहरियो पर पैहरण खात्तर दो कुडते ना लियो।”

10 अर यीशु नै चेल्यां ताहीं कह्या, “जित्त किते थम जिस घर म्ह जाओ, तो जिव ताहीं उडै तै बिदा ना होइयो तब तक उसे घर म्ह ठहरे रहो।

11 जिस जगहां के माणस थमनै न्ही अपनावे अर थारी न्ही सुणे, उडै तै चाल्दे-ए अपने ताल्वां की धूळ झाड़ दियो के या उनकै बिरुध्द गवाही होवे।”

12 फेर चेल्यां नै जाकै प्रचार करया के पाप करणा छोड़ द्यो,

13 अर घणीए ओपरी आत्मा ताहीं काढचा, अर घणे बिमारां पै तेल मळ कै उन ताहीं ठीक करया।

Matthew 14:1-12; Luke 9:7-9

14 राजा हेरोदेस नै भी यीशु का जिक्र सुण्या, क्यूँके उसका नाम फैलग्या था, अर उसनै कह्या, के “यूहन्ना बपतिस्मा देण आळा मरया होया म्ह तै जिन्दा होया सै, इस्से करकै उसतै ये सामर्थ के काम होवे सै।”

15 दुसरे माणसां नै कह्या, “यो एलिय्याह सै।” पर कुछ दुसरयां नै कह्या, “वो एक नबी सै पुराणे नबियाँ म्ह तै किसे कै बरगा।”

16 हेरोदेस नै न्यू सुणकै कह्या, “जिस यूहन्ना का सिर मन्ने कटवाया था, वोए जिन्दा होया सै।”

17 हेरोदेस नै अपने भाई फिलिप्पुस की घरआळी हेरोदियास के कारण, जिसतै उसनै ब्याह कर लिया था, माणसां ताहीं भेजकै यूहन्ना ताहीं पकड़वाके जेळ म्ह गेर दिया था।

18 क्यूँके यूहन्ना नै हेरोदेस तै कह्या था, “अपणे भाई की घरआळी ताहीं राखणा मूसा के नियम-कायदा के मुताबिक तेरे खात्तर ठीक कोनी।”*

19 इस करके हेरोदियास यूहन्ना तै बैर राख्या करै थी अर वा चाहवै थी के उसनै मरवा देवै, पर इसा हो न्ही सक्या,

20 क्यूँके हेरोदेस यूहन्ना नै धर्मी अर पवित्र माणस जाणके उसतै डरै था, अर उसका बचाव करै था, अर उसकी बात सुणके घणा घबरावै था, फेर भी उसकी बातों नै आनन्द तै सुणै था।

21 आखिरकार एक इसा मौक्का आया, जिव हेरोदेस नै अपणे जन्म दिन पै अपणे प्रधानां, सेनापतियाँ, अर गलील के बड़े माणसां के खात्तर जीमणा करया।

22 तो हेरोदियास की बेट्टी भीत्तर आई, अर नाचके हेरोदेस ताहीं अर उसके गेल्या बैठण आळा ताहीं राज्जी करया। फेर राजा नै छोरी तै कह्या, “तू जो चाहवै मेरै तै माँग ले, मै तन्नै वोए दियुंगा।”

23 हेरोदेस नै कसम खाई, “मै अपना आध्वा राज्य तक जो कुछ तू मेरै तै माँगैगी मै तन्नै दियुंगा।”†

24 उसनै बाहरणे जाके अपनी माँ तै बुझया, “मै के माँगू?” वा बोल्ली, “यूहन्ना बपतिस्मा देण आळे का सिर।”

25 वा जिब्बे राजा धेरै भीत्तर आई अर उसतै बिनती करी, “मै चाहूँ सू के तू इब्बे यूहन्ना बपतिस्मा देण आळे का सिर एक थाळ म्ह मन्नै माँगवा दे।”

26 फेर राजा घणा दुखी होया, पर अपनी कसम के कारण अर गेल्या बैठण आळा के कारण उस ताहीं टाळणा कोनी चाह्या।

27 आखर म्ह राजा नै जिब्बे एक सिपाही ताहीं हुकम देके भेज्या के उसका सिर काट ल्यावै।

28 उसनै जेळखान्ने म्ह जाके उसका सिर काटचा, अर एक थाळ म्ह धरके ल्याया अर छोरी ताहीं दिया, अर छोरी नै अपनी माँ तै दिया।

29 न्यू सुणके यूहन्ना के चेल्ले आए, अर उसकी लाश नै लेगे अर कबर म्ह धर दी।

~~~~~

(~~~~~ 14:13-14; ~~~~~ 9:10)

30 चेल्ले बोहड़के यीशु के धेरै आये, जो कुछ उननै करया अर सिखाया था, सब कुछ उस ताहीं बता दिया।

31 यीशु नै चेल्यां तै कह्या, “आओ हम किसे एकान्त जगहां म्ह चालके माडा आराम करां।” क्यूँके घणे माणस आवै-जावै थे, अर उननै खाण का मौक्का भी कोनी मिलै था।

32 ज्यांतै वे किस्ती पै चढ़के सुनसान जगहां म्ह न्यारे चले गए।

~~~~~

(~~~~~ 14:15-21; ~~~~~ 9:11-17; ~~~~ 6:1-14)

33 घणा नै यीशु अर उसके चेल्यां ताहीं जान्दे देखके पिछ्छाण लिया, अर सारे नगरां तै कट्टे होके उड़ै पाए-पाँ भाज लिए अर उनतै पैहल्या जा पोहचे।

34 उसनै उतरके बड़डी भीड़ देखी, अर उनपै तरस खाया, क्यूँके वे उन भेडचा की तरियां थे, जिनका कोए रुखाळा ना हो; अर वो उननै घणीए बात सिखाण लागग्या।‡

35 जिव दिन घणा ढळग्या, तो उसके चेल्ले उसके धेरै आके कहण लागगे, “या सुनसान जगहां सै, अर दिन घणा ढळग्या सै।

36 उननै बिदा करके चौगरदेके गाम्सां अर बस्तियाँ म्ह जाके, अपणे खाण खात्तर कुछ मोल लियावै।”

37 यीशु नै जवाब दिया, “धमे उननै खाण नै छो।” चेल्यां नै उस ताहीं कह्या, “के हम दो सौ दीनार (200 दिन की मजदूरी) की रोट्टी मोल ल्यावां, अर उननै खुआवां?”

* 6:18 6:18 (लेव्य-18:16, लैव्य-20:21) † 6:23 6:23 (एस्ते-5:3,6, एस्ते-7:2) ‡ 6:34 6:34 (2 इति-18:16, 1 राजा-22:17)

38 यीशु नै उन ताहीं कह्या, “जाकै देखो थारे धोरै कितनी रोट्टी सै?” उननै कह्या, “पाँच रोट्टी अर दो मच्छी भी।”

39 फेर यीशु नै उन ताहीं हुकम दिया के सारया नै हरी घास पै टोळ म्ह बिटा द्यो।

40 वे सौ-सौ अर पचास-पचास करकै टोळ म्ह बैठगें।

41 यीशु नै उन पाँच रोट्टी अर दो मच्छियाँ ताहीं लिया, अर सुर्ग के कान्दी लखाकै परमेसवर का धन्यवाद करया, अर रोट्टी तोड़-तोड़कै चेल्यां ताहीं देन्दा गया के वे माणसां ताहीं बांडै, अर वे दो मच्छियाँ भी उन सारया म्ह बांड दी।

42 सारे खाकै धापगे,

43 अर उननै टुकड्या अर मच्छियाँ तै भरी होई बारहा टोकियाँ टाई।

44 जिन नै रोट्टी खाई, वे पाँच हजार आदमी थे।

📖 📖 📖 📖 📖 📖 📖

(📖 📖 14:22-33; 📖 📖 6:15-21)

45 फेर यीशु नै जिब्बे अपणे चेल्यां ताहीं किस्ती पै चढ़ण कै खात्तर मजबूर करया, ताके वे उसतै पैहल्या उस पार बैतसैदा नगर म्ह चले जावै, जिव तक के वो माणसां ताहीं विदा करै।

46 चेल्यां नै विदा करकै यीशु पहाड़ पै प्रार्थना करण खात्तर गया।

47 जिव साँझ होई, तो किस्ती समुन्दर कै विचाळै थी, अर यीशु एक्ला किनारे पै था।

48 जिव उसने देख्या के वे किस्ती चलाणा म्ह घणी मेहनत करण लागरे सै, क्यूँके हवा उनके स्याम्ही की थी, तो सबेरै तीन बजे कै लोवे-धोवै यीशु समुन्दर पै चाल्दे होए उनकै धोरै आया; अर उनतै आगै लिकड़ जाणा चाहवै था।

49 पर चेल्यां नै उस ताहीं समुन्दर पै चाल्दे देखकै समझया के भूत सै, अर किल्की मारण लागगे;

50 क्यूँके सारे उसनै देखकै घबरागे थे। पर उसनै जिब्बे उनतै बात करी अर कह्या, “होसला राखो, मै सूं; डरो मतना!”

51 फेर वो उनकै धोरै किस्ती पै आया, अर हवा थमगी: अर वे घणा अचम्भा करण लागगे।

52 चेल्लें उस रोट्टी की घटना के बारे म्ह कोनी समझै थे, क्यूँके उनके दिल कटोर होरे थे।

📖 📖 📖 📖 📖 📖 📖

(📖 📖 14:34-36)

53 वे गलील समुन्दर पार करकै गन्नेसरत परदेस म्ह पोहचे, अर किस्ती घाट पै लाई।

54 जिव यीशु किस्ती पै तै उतरया तो माणसां नै उस ताहीं पिच्छाण लिया,

55 लोवै-धोवै कै सारे नगर म्ह भाज्जे-भाज्जे, अर विमारां नै खाट्टां पै लादकै, जित्त-जित्त खबर मिली के यीशु ओडै सै, उड़ै-उड़ै लिए हान्डे।

56 अर जित्त किते भी वो गाम्मां, नगरां, या बस्तियाँ म्ह जावै था, माणस विमारां नै बजारां म्ह धरकै उसतै विनती करै थे के वो उननै अपणे लत्ते कै पल्ले तै ए छू लेण दे: अर जितने उसनै छुवै थे, सारे ठीक हो जावै थे।

7

📖 📖 📖 📖 📖 📖 📖

(📖 📖 15:1-9)

1 एक दिन कुछ फरीसी अर शास्तरी जो यरुशलेम नगर तै आए थे, यीशु कै धोरै कट्टे होए,

2 अर उननै उसके कुछ चेल्यां ताहीं बिना सुच्चे होए यानिके बिना हाथ धोए रोट्टी खांदे देख्या।

3 क्यूँके फरीसी अर सारे यहूदी, बड़े बुजुर्गा के रीति-रिवाजां पै चाल्ले सै अर जिव ताहीं ठीक ढाळ हाथ न्ही धो लेंदे जद ताहीं कोनी खान्दे।

4 अर बजार तै आकै, जिव तक के अपने हाथ न्ही धो लेते, जद ताहीं रोट्टी कोनी खान्दे; और घणीए बात सै, जो उनके रीति-रिवाजां का हिस्सा सै, जिस तरियां कटोरे, अर लोट्टे, अर ताम्बे के बरतनां ताहीं धोणा मान्जणा ।

5 इस करके उन फरीसियाँ अर शास्त्रियाँ नै यीशु तै बुद्धिया, “तेरे चेल्ले क्यंतै बड़े बुजुर्गां के रीति-रिवाजां पै कोनी चाल्दे, अर बिना हाथ धोए रोट्टी खावै सै?”

6 यीशु नै फरीसियाँ अर शास्त्रियाँ ताहीं कह्या, “यशयाह नबी नै थम कपटियाँ कै बारे म्ह घणी ठीक भविष्यवाणी करी; जिसा लिख्या सै: ‘ये माणस होट्टां तै तो मेरा आदर करै सै पर उनका मन मेरै तै दूर रहवै सै ।’”

7 वे खामखां मेरी पूजा करै सै,

क्यूँके माणसां कै हुकमां नै धर्म का उपदेश करके सिखावै सै ।”†

8 “क्यूँके थम परमेसवर कै हुकम नै टाळकै माणसां कै रिवाजां ताहीं मान्नी सो ।”

9 उसने उन ताहीं कह्या, “थम अपने रिवाजां नै मानण कै खात्तर परमेसवर का हुकम कितनी बढ़िया ढाळ टाळ्यो सो ।

10 क्यूँके मूसा नबी नै कह्या सै, ‘अपणे माँ-बाप की इज्जत कर’ अर ‘जो कोए अपने माँ-बाप नै भुंडा बोल्ले, वो जरूर मारया जावै ।’‡

11 पर थम कहो सो के जै कोए अपने माँ-बाप तै कहवै, ‘जो कुछ मनन् धारे ताहीं अपनी सम्पत्ति म्ह तै देणा था, वो मनन् परमेसवर ताहीं अर्पण कर दिया ।’

12 तो थम उननै उसके माँ बाप की कुछ भी सेवा करण न्ही देन्दे ।

13 इस तरियां थम अपनी रीत-रिवाजां तै, जिन ताहीं थमने ठहराया सै, परमेसवर का वचन टाळ्यो सो; अर इसे-इसे घणखरे काम करो सो ।”

ⓂⓂⓂⓂ ⓂⓂⓂⓂ ⓂⓂⓂⓂⓂ ⓂⓂ ⓂⓂⓂ ⓂⓂ
(ⓂⓂⓂⓂ 15:10-20)

14 फेर यीशु नै माणसां ताहीं अपने धारे बुलाकै कह्या, “थम सारे मेरी सुणो, अर समझो ।

15 इसी कोए चीज कोनी जो माणस म्ह बाहर तै बड़कै उस ताहीं अशुद्ध करै; पर जो चीज माणस कै भीत्तर तै लिकड़ै सै, वैए उस ताहीं अशुद्ध करै सै ।

16 (जै किसे के कान हो तो वो ध्यान तै सुण ले ।)”

17 जिव यीशु भीड़ नै छोड़कै घरां आया, तो उसके चेल्यां नै इस उदाहरण कै बारे म्ह उसतै बुद्धिया ।

18 यीशु नै उनतै कह्या, “के थम भी इसे नासमझ सो? के थमने न्ही बेरा के जो चीज बाहर तै माणस कै भीत्तर जावै सै वा उसनै अशुद्ध कोनी कर सकदी?

19 क्यूँके वा उसके मन म्ह न्ही, पर पेट म्ह जावै सै, अर संडास म्ह लिकड़ जावै सै?” न्यू कहकै उसनै सारी खाणे की चिज्जां ताहीं शुद्ध ठहराया ।

20 फेर उसनै कह्या, “जो माणस म्ह तै लिकड़ै सै, वोए माणस नै अशुद्ध करै सै ।

21 क्यूँके भीत्तर तै, यानिके माणस कै मन तै, भुन्डे-भुन्डे ख्याल, जारी, चोरी, हत्या, बिगान्नी विरबान्नी कै धारे जाणा,

22 लोभ, दुष्टता, छळ, लुचपण, जलन, बुराई, घमण्ड, अर बेअकली लिकड़ै सै ।

23 ये सारी भुंडी बात भीत्तर तै ए लिकड़ै सै अर माणस नै अशुद्ध करै सै ।”

ⓂⓂⓂⓂⓂⓂⓂⓂ ⓂⓂⓂⓂⓂ ⓂⓂ ⓂⓂ ⓂⓂⓂⓂ ⓂⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂ
(ⓂⓂⓂⓂ 15:21-28)

* 7:6 7:6 (यशा-29:13) † 7:7 7:7 (यशा-29:13) ‡ 7:10 7:10 (निगं-20:12, व्य-5:16)

24 फेर यीशु ओड़ै तै उठके सूर अर सैदा के परदेस म्ह आया; जित्त एक घर म्ह गया अर वो चाहवै था ताके किसे नै उनके बारें म्ह बेरा न्ही लागगै, पर वो लुहक न्ही सक्या।

25 अर जिव्हे एक बिरबान्नी जिसकी छोट्टी छोरी म्ह ओपरी आत्मा थी, उसका जिक्र सुणके आई, अर उसके पायां म्ह पड़गी।

26 वा सुरुफिनिकी परदेस के यूनानी जात की थी। बिरबान्नी नै उसतै बिनती करी के मेरी छोरी म्ह तै ओपरी आत्मा लिकाड़ दे।

27 उसनै उसतै कह्या, “पैहल्या मेरे बच्चें जो यहूदी सै उननै खा लेण दे, क्यूँके बाळकां की रोट्टी लेके कुत्याँ के आगगै गेरणा ठीक कोनी।” (यहूदी दुसरी जात के माणसां नै कुत्याँ के समान समझै थे)

28 उसनै उस ताहीं जवाब दिया, “साच्ची सै प्रभु; पर कुत्ते भी तो मेज के तळै बाळकां की रोट्टी के टुकड़े खा लैवें सै।”

29 यीशु नै उसतै कह्या, “तेरी बात सुणके तेरे बिश्वास का बेरा पाट्टै सै इस कारण चली जा; ओपरी आत्मा तेरी छोरी म्ह तै लिकड़गयी सै।”

30 उसनै अपने घरां आके देख्या के छोरी खाट पै पड़ी सै, अर ओपरी आत्मा लिकड़गयी सै।

[REDACTED]

31 फेर यीशु सूर अर सैदा के परदेसां तै लिकड़के दिकापुलिस नगर तै होंदा होड़ गलील समुन्दर पै पोहच्या।

32 तो आदमियाँ नै एक बैहरे ताहीं जो हाकळा भी था, उसके धोरै आके उसतै बिनती करी के अपना हाथ उसपै धरै।

33 फेर यीशु उसनै भीड़ तै न्यारा लेग्या, अपनी आन्गळी उसके कान्ना म्ह घाल्ली, अर अपनी आन्गळी पै धूकके उसकी जीभ ताहीं छुया;

34 अर सुगं कान्ही देखके आह भरी, अर उसतै कह्या, “इप्फत्तह!” यानिके “खुल ज्या!”

35 वो सही तरियां सुणण, अर वो सुथरी-ढाळ बोल्लण लाग्या।

36 फेर उसनै उन ताहीं चिताया कह्या के किसे तै ना कहियो; पर जितना यीशु नै उन ताहीं बताया उतनाए वे और प्रचार करण लागगे।

37 वे घणे हैरान होके कहण लागगे, “उसनै जो कुछ करया सारा ठीक करया सै; वो बैहरया नै सुणण की, गूंगा नै बोल्लण की ताकत देवै सै।”

8

[REDACTED]

[REDACTED] 15:32-39

1 एक दिन जिव भीड़ कट्टी होई, अर उनके धोरै इब कुछ खाण नै कोनी बचा था, तो यीशु नै अपने चेल्यां ताहीं धोरै बुलाके उनतै कह्या,

2 “मन्नै इस भीड़ पै तरस आवै सै, क्यूँके ये तीन दिनां तै बराबर मेरै गेल्या सै, अर इब उनके धोरै कुछ खाण नै भी कोनी बचा।

3 जै मै उननै भूक्खा घरां भेज दु, तो राह म्ह थक हार के बेहोस हो ज्यांगें; क्यूँके इन म्ह तै कई लोग दूर तै आरे सै।”

4 उसके चेल्यां नै जवाब दिया, “उरै जंगल-बियाबान म्ह इतनी रोट्टी कोए कित तै ल्यावै के वे छिक्क ज्या?”

5 यीशु नै उनतै बुझ्झया, “धारे धोरै कितनी रोट्टी सै?” उननै कह्या, “सात।”

6 फेर उसनै माणसां ताहीं धरती पै बैठण का हुकम दिया, अर वे सात रोट्टी ली अर परमेसवर का धन्यवाद करके तोड़ी, अर अपने चेल्यां नै देन्दा गया, अर उननै वे रोटी माणसां के आगगै परोस दी।

7 उनके धोरे माड़ी-सी छोट्टी मच्छियाँ भी थी; उसने परमेसवर का धन्यवाद करके उन ताहीं माणसां के आगगै धरण का हुकम दिया ।

8 वे खाकै छिकगे अर चेल्यां नै बचे होइ टुकड्या के सात टोकरे भरकै ठाए ।

9 अर सारे लोग चार हजार कै करीबन थे; फेर यीशु नै उन ताहीं भोज दिया,

10 अर वो जिब्वे अपणे चेल्यां कै गेल्या किस्ती म्ह चढकै दलमनूता परदेस नै चल्या गया ।

???????? ?? ????? ??????? ??????? ?? ?????
(16:1-4)

11 जब फरीसियाँ नै देख्या कै यीशु दलमनूता परदेस म्ह आ गया तो वे उसतै बहस करण लागगे, अर यो परखण खात्तर के परमेसवर नै यीशु ताहीं भेज्या सै, उसतै कोए सुर्गीय चिन्ह-चमत्कार की माँग करी ।

12 यीशु नै अपणी आत्मा म्ह आह भरकै कह्या, “इस बखत के माणस क्यातै चिन्ह-चमत्कार टोह्वै सै? मै थमनै साच्ची-साच कहूँ सूँ, के इस बखत के माणसां नै कोए चिन्ह-चमत्कार कोनी दिया जावैगा ।”

13 अर वो उननै छोड़कै फेर किस्ती पै चढग्या अर गलील समुन्दर के परली ओइ चल्या गया ।

?????????? ?? ??????? ?? ?????
(?????? 16:5-12)

14 चेल्लें रोट्टी लेणा भूलगे थे, पर किस्ती म्ह उनके धोरे सिर्फ एक-ए रोट्टी थी ।

15 यीशु नै उनकी कपट रूपी शिक्षा के बारे म्ह चिताया, “लखाओ, फरीसियाँ अर हेरोदेस के खमीर तै चौकन्ने रहो ।”

16 वे आप्पस म्ह विचार करकै कहण लागगे, “म्हारै धोरे तो रोट्टी सै कोनी ।”

17 न्यू जाणके यीशु नै उनतै कह्या, “थम क्यातै आप्पस म्ह यो विचार करे सो के म्हारै धोरे रोट्टी कोनी? के इब ताहीं थम न्ही जाणे अर न्ही समझे? के धारा मन कठोर होग्या सै?”

18 के आँख होते होए भी कोनी देखदे, अर कान होते होए भी कोनी सुणदे? के धारे याद कोनी ।

19 के जिब मन्नै पाँच हजार माणसां के खात्तर पाँच रोट्टी तोड़ी थी तो थमनै बचे होइ टुकड्या के कितने टोकरे भरकै ठाए थे, उननै उसतै कह्या, बारहा टोकरे ।”

20 “अर जिब चार हजार माणसां कै खात्तर सात रोट्टी थी तो थमनै बचे होइ टुकड्या के कितने टोकरे भरकै ठाए थे?” उननै उसतै कह्या, “सात टोकरे ।”

21 उसनै उनतै कह्या, “के थम इब ताहीं न्ही समझदे?”

?????????? ?? ?? ??????? ??????? ?? ?????

22 यीशु अर उसके चेल्लें बैतसेदा कस्बे म्ह आए; अर आदमी एक आन्धे नै उसके धोरे लियाये अर उसतै विनती करी के उसने छुवे ।

23 वो उस आन्धे का हाथ पकड़कै गाम तै बाहरणै लेग्या, अर अपणी आंगळी पै धूककै उसकी आँखां पै हाथ धरते होए उसतै बुझ्झया, “के तू कुछ देख्लै सै?”

24 उसनै निगांह ठाकै कह्या, “मै माणसां नै देख्लूँ सूँ; वे मन्नै चाल्दे होए दरख्तां की ढाळ दिक्खै सै ।”

25 फेर उसनै दुबारा उसकी आँखां पै हाथ धरे, अर आन्धे नै ध्यान तै देख्या । वो ठीक होग्या, अर सारा कुछ सुथरी-ढाळ देखण लाग्या ।

26 उसनै उस ताहीं न्यू कहकै घरां भेज्या, “इस गाम म्ह भी ना जाईये ।”

?????? ?? ?? ??????? ?? ??????? ?? ?????????????
(?????? 16:21-23; ????? 9:22)

27 यीशु अर उसके चेल्लें कैसरिया फिलिप्पी परदेस के गाम्मां म्ह चले गये । राह म्ह उसने अपणे चेल्यां तै बुझ्झया, “माणस मन्नै के कहवै सै?”

28 उननै जवाब दिया, “यूहन्ना बपतिस्मा देण आळा, पर कोए एलिय्याह अर कोए-कोए तो उसनै पुराणे नबियाँ म्ह तै एक सै भी कहवै सै।”

29 उसनै उनतै बुद्धया, “पर थम मननै के कहो सो?” पतरस नै जवाब दिया, “तू मसीह सै।”

30 फेर उसनै उन ताहीं समझाके कह्या के मेरै बारै म्ह यो किसे तै ना कहियो।

एक पाठ (16:24-28; 9:23-27)

31 फेर यीशु चेल्यां नै सिखाण लाग्या के माणस के बेटे (उसनै अपणे बोरें म्ह कह्या था) खात्तर जरूरी सै के वो घणा दुख ठावै, यहूदी अगुवें, प्रधान याजकां, अर शास्त्री उसनै तुच्छ समझके मार देवें, अर वो तीसरे दिन म्ह जिन्दा हो जावैगा।

32 उसनै या बात उनतै साफ-साफ कह दी। इसपै पतरस उसनै न्यारा ले जाके झिड़कण लाग्या, क्यूँके उसनै सोच्या के मसीह मर नही सकदा।

33 पर यीशु नै पलटके अपणे चेल्यां कान्ही देख्या, अर पतरस तै झिड़कके कह्या, “हे शैतान, मेरै स्याम्ही तै दूर हो; क्यूँके तू परमेसवर की बात्तां पै नही, पर माणसां की बात्तां पै मन लगावै सै।”

एक पाठ (16:24-28; 9:23-27)

(16:24-28; 9:23-27)

34 यीशु नै भीड़ ताहीं अपणे चेल्यां सुधा बुलाके कह्या, “जो कोए मेरा चेल्ला बणणा चाहवै, वो अपणी ए इच्छा पूरी ना करै बल्के अपणे दुखां का करूस ठाके, मेरै पाच्छै हो लेवै।

35 क्यूँके जो कोए अपणी जान बचाणा चाहवै वो अनन्त काल खात्तर गवावैगा, पर जो कोए मेरै अर सुसमाचार खात्तर अपणी जान गवावैगा, वो उसनै अनन्त काल खात्तर बचावैगा।

36 जै माणस सारी दुनिया की चिज्जां नै पा लेवै अर फेर भी अनन्त जीवन नै नही पा सकै, तो उसतै के फेयदा होगा?

37 कोए भी माणस अनन्त जीवन की तुलना दुनिया की किसी भी चीज तै नही कर सकता?

38 जो कोए इस जार अर पापी युग के बिचाळै मेरै तै अर मेरे वचन तै इन्कार करैगा, तो मै माणस का बेटा भी जिब पवित्र सुर्गदूतां के गेल्या अपणे पिता की महिमा सुधा आऊंगा, तो मै भी उसतै इन्कार करूंगा।”

9

एक पाठ (17:1-13; 9:28-36)

(17:1-13; 9:28-36)

1 यीशु नै उनतै कह्या, “मै थारै तै साच्ची कहुँ सूँ के जो उरै खड़े सै, उन म्ह तै कई इसे माणस सै, के जिब ताहीं परमेसवर के राज्य नै सामर्थ सुधा आन्दा होया नही देख लेवेंगे, जद तक नही मरेंगे।”

2 छः दिनां पाच्छै, यीशु नै पतरस अर याकूब अर यूहन्ना ताहीं गेल्या लिया, अर एकान्त म्ह किसे ऊँच्चे पहाड़ पै लोग्या। ओड़े उनकै स्याम्ही उसका रूप बदल गया,

3 अर उसके लत्ते इसे चमकण लाग्गे उरै ताहीं जमा धोळाधप होया, के धरती पै कोए धोव्बी भी उसा धोळा नही लिकाड़ सकदा।

4 अर उननै मूसा नबी के गेल्या एलिय्याह नबी दिख्या; वे यीशु के गेल्या बात करै थे।

5 इसपै पतरस नै यीशु तै कह्या, “हे गुरु, म्हारा उरै रहणा ठीक सै: इस करके हम तीन मण्डप बणावा; एक तेरे खात्तर, एक मूसा नबी खात्तर, एक एलिय्याह नबी खात्तर।”

6 क्यूँके उसनै कोनी बेरा था, के वो के जवाब देवै, ज्यांतै के वे घणे डरगे थे।

7 फेर एक बादळ उनपै छाग्या, अर उस बादळ म्ह तै परमेसवर नै कह्या, “यो मेरा प्यारा बेटा सै, इसकी सुणो।”*

8 फेर उननै चाणचक चौगरदेके निगांह घुमाई, अर यीशु नै छोड़ अपणे गेल्या और किसे ताहीं कोनी देख्या।

* 9:7 (2 पत-1:17, भज-2:7)

9 पहाड़ तै उतरदी आणी यीशु नै उन ताहीं हुकम दिया के जिब ताहीं मै माणस का बेट्टा मरे होया म्ह तै जिन्दा न्ही हो जाऊँगा, तब तक जो कुछ थमनै देख्या सै वो किसे तै ना कहियो ।

10 चेल्यां नै या बात अपणे मन म्ह ए राक्खी, अर आप्स म्ह बहस करण लागगे, के “मरे होया म्ह तै जी उठण का के मतलब हो सकै सै?”

11 अर उननै उसतै बुद्धया, “शास्त्री क्यातै कहवै सै के एलिय्याह नबी का पैहल्या आणा जरूरी सै?”

12 यीशु नै उन ताहीं जवाब दिया, “यो सच सै एलिय्याह नबी पैहल्या आकै सारा कुछ सुधारैगा, पर मेरे बारे म्ह पवित्र ग्रन्थ म्ह यो क्यातै लिख्या सै के वो घणा दुख ठावैगा, अर तुच्छ गिण्या जावैगा?”

13 पर मै थमनै कहूँ सूँ के एलिय्याह नबी तो (जो यूहन्ना सै) आ लिया, अर जिसा के उसके बारे म्ह पवित्र ग्रन्थ म्ह लिख्या सै, उननै जो कुछ चाह्या उसके गेल्या करया ।”

Matthew 17:14-21; Matthew 9:37-43

14 यीशु अर उसके तीन चेल्लें दुसरयां चेल्यां के धोरे आये, तो देख्या के उनके चौगरदे नै घणी भीड़ लागरी सै अर शास्त्री उनके गेल्या बहस करे सै ।

15 यीशु ताहीं देखदे ए सारे घणे हैरान होण लागगे, अर उननै यीशु कान्ही भाजके उसतै नमस्कार करया ।

16 यीशु नै उनतै बुद्धया, “थम इनतै के बहस करे सो?”

17 भीड़ म्ह तै एक नै उसतै जवाब दिया, “हे गुरु, मै अपणे बेट्टे ताहीं जिसम्ह ओपरी आत्मा सै, जो उसनै बोल्लण कोनी देती । मै उस ताहीं तेरे धोरे ल्याया था ।

18 जित्त किते ओपरी आत्मा उसनै पकड़े सै, उड़ेए पटक देवे सै: अर वो मुँह म्ह तै झाग भर लावै सै, अर दाँत पिसदा, अर सुखदा जावै सै । मन्नै तेरे चेल्यां तै कह्या के वे ओपरी आत्मा नै काढ देवै, पर वे काढ न्ही सके ।”

19 न्यू सुणके यीशु नै उनतै जवाब देके कह्या, “हे अविश्वासी माणसों, मै कद ताहीं थारे गेल्या रहूँगा? अर कद ताहीं थारी सहूँगा? बाळक नै मेरे धोरे ल्याओ ।”

20 फेर वे बाळक नै यीशु के धोरे लियाये: अर जिब ओपरी आत्मा नै यीशु ताहीं देख्या, तो उस ओपरी आत्मा नै जिब्बे उस ताहीं मरोड्या, अर वो धरती पै पड़ग्या, अर मुँह तै झाग बगान्दे होए लोटण लागया ।

21 यीशु नै उसके पिता तै बुद्धया, “इसकी या हालत कद तै सै?” उसनै कह्या, “बाळकपण तै ।

22 उसनै इस ताहीं नाश करण खात्तर कदे आग अर कदे पाणी म्ह गेरया, पर जै तू कुछ कर सकै, तो म्हारै पै तरस खाके म्हारा भला कर ।”

23 यीशु नै उसतै कह्या, “या के बात होई! जै तू कर सकै सै? विश्वास करण आळा खात्तर सारा कुछ हो सकै सै ।”

24 बाळक के पिता नै जिब्बे जोर तै कह्या, “हे प्रभु, मै विश्वास करूँ सूँ, मेरे अविश्वास का उपाय कर ।”

25 जिब यीशु नै देख्या के माणस भाजके भीड़ लावै सै, तो उस ओपरी आत्मा ताहीं न्यू कहके धमकाया, “हे गूँगी अर बैहरी करण आळी ओपरी आत्मा, मै तन्नै हुकम दिवूँ सूँ, उस म्ह तै लिकड़ आ, अर उस म्ह फेर कदे ना बड़ीये ।”

26 फेर वा किल्की मारके अर उस ताहीं घणा मरोड़के, लिकड़ आई, अर बाळक मरया होया-सा होग्या, उरै ताहीं के घणे आदमी कहण लागगे के वो मरग्या ।

27 पर यीशु नै उसका हाथ पकड़के उस ताहीं ठाया, अर वो खड्या होग्या ।

28 जिब वो घरां आया, तो उसके चेल्यां नै एक्ले म्ह उसतै बुद्धया, “हम उस ताहीं क्यातै न्ही काढ सके?”

29 उसनै उनतै कह्या, “या जात, बिना प्रार्थना किसे और उपाय तै कोनी लिकड़ सकदी ।”

ⓂⓂⓂⓂ ⓂⓂ ⓂⓂⓂⓂ ⓂⓂⓂ ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂⓂⓂ

(ⓂⓂⓂⓂⓂ 17:22-23; ⓂⓂⓂⓂⓂ 9:43-45)

30 फेर यीशु अर उसके चेल्यां नै ओड़े तै लिकइके, गलील परदेस का राह लिया। यीशु न्ही चाहवै था के कोए उननै जाणै, क्यूँके वो अपणे चेल्यां ताहीं सिखाणा चाहवै था

31 यीशु उपदेश देन्दा अर अपणे बारै म्ह चेल्यां तै कहवै था, मै “माणस का बेट्टा माणसां कै हाथ्यां म्ह पकड़वाया जाऊँगा, अर वे मन्नै मार देवैगें, अर मै मरण कै तीसरे दिन जिन्दा हो जाऊँगा।”

32 पर या बात उनकी समझ म्ह कोनी आई, अर वे उसतै बुझ्झण तै डैर थे।

ⓂⓂⓂⓂⓂ ⓂⓂ ⓂⓂⓂⓂⓂⓂⓂ ⓂⓂⓂⓂⓂ

(ⓂⓂⓂⓂⓂ 18:1-5; ⓂⓂⓂⓂⓂ 9:46-48)

33 यीशु अर उसके चेल्लें कफरनहूम कस्बे म्ह आये; अर घर म्ह आकै उसनै चेल्यां तै बुझ्झया, “राह म्ह थम किस बात पै बहस करे थे?”

34 वे बोल-बाल्ले रहे, क्यूँके राह म्ह उननै आप्पस म्ह या बहस करी थी के म्हारै म्ह तै बड़ड़ा कौण सै।

35 फेर यीशु नै बैठके वारहा चेल्यां ताहीं बुलाया अर उनतै कह्या, “जै कोए बड़ड़ा होणा चाहवै, तो सारया तै छोडटा अर सारया का सेवक बणै।”

36 अर उसनै एक बाळक लेके उनके बिचाळै खड्या करया अर उस ताहीं गोद्दी म्ह लेके उन ताहीं कह्या,

37 “जो कोए मेरै नाम तै इसे बाळकां म्ह तै किसे एक नै भी अपणावै सै, वो मन्नै अपणावै सै; अर जो कोए मन्नै अपणावै सै, वो मन्नै न्ही, बल्के मेरै भेजण आळे नै अपणावै सै।”

ⓂⓂ ⓂⓂⓂⓂⓂ ⓂⓂⓂ ⓂⓂⓂⓂ, ⓂⓂ ⓂⓂⓂⓂⓂ ⓂⓂⓂ ⓂⓂ

(ⓂⓂⓂⓂⓂ 9:49-50)

38 यूहन्ना नै यीशु ताहीं कह्या, “हे गुरु, हमनै एक माणस ताहीं तेरे नाम तै ओपरी आत्मा नै लिकाइदे देख्या अर हम उसनै मना करण लाग्गे, क्यूँके वो म्हारी तरियां तेरा चेल्ला न्ही था।”

39 उसनै कह्या, “उस ताहीं मना मत करो; क्यूँके इसा कोए न्ही जो मेरै नाम तै अदभुत काम करै, अर दुसरे पल मेरी बुराई करै

40 क्यूँके जो म्हारै बिरोध म्ह न्ही, वो म्हारै कान्ही सै।

41 जै कोए एक कटोरा पाणी भी थमनै ज्यांतै प्यावै के थम मसीह के सो तो मै थमनै सच कहूँ सँ के वो अपणा ईनाम किसे तरियां भी न्ही खोवैगा।”

ⓂⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂⓂ

(ⓂⓂⓂⓂⓂ 18:6-9; ⓂⓂⓂⓂⓂ 17:1-2)

42 पर जो कोए इन छोटटे बाळकां कै समान जो मेरै पै बिश्वास करै सै, किसे तै भी पाप करवावै तो उसकै खात्तर भला योए सै के एक बड़डी चाक्की का पाट उसकै गळ म्ह लटकाया जावै अर वो समुंदर म्ह गेरया जावै।

43 जै तेरा हाथ तेरे तै पाप करवावै तो उसनै काट दे। टुंडा होकै अनन्त जीवन म्ह बड़णा तेरे खात्तर भला सै इसके बजाये के दो हाथ रहंदे होए नरक की आग म्ह गेरया जावै जो कदे न्ही बुझै।

44 (जड़ै उनका कीड़ा कोनी मरदा अर आग कोनी बुझदी।)

45 जै तेरा पैर तेरे तै पाप करवावै तो उसनै काट दे। लंगड़ा होकै अनन्त जीवन म्ह बड़णा तेरे खात्तर भला सै इसके बजाये के दो पैर रहंदे होए नरक की आग म्ह गेरया जावै।

46 (जड़ै उनका कीड़ा कोनी मरदा अर आग कोनी बुझदी।)

47 जै तेरी आँख तेरे तै पाप करवावै तो उसनै लिकाइ दे। काणा होकै परमेसवर कै राज्य म्ह बड़णा तेरे खात्तर भला सै के दो आँख रहंदे होए तू नरक म्ह गेरया जावै।

48 “जड़ै उनका कीड़ा कोनी मरदा अर आग कोनी बुझदी।”

49 हरेक माणस आग तै शुद्ध करया जावैगा, जिस तरियां बलिदान नूण तै शुद्ध करया जावैगा।

50 “नूण एक जरूरत की चीज सै, पर जै नूण का सुवाद जान्दा रहवै तो उसनै किस तरियां नमकीन करोगे? अपने म्ह नूण जिसा गुण राख्खो, अर आप्पस म्ह मेळ-मिलाप तै रहो।”

10

ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂ 19:1-12; ⓂⓂⓂⓂⓂ 16:18)

1 यीशु ओड़ै तै उठकै यहूदिया नगर की सीमा नै पार करके, यरदन नदी कै परली ओड़ आया। भीड़ उसके धारे कट्टी होगयी, अर अपनी रीत कै मुताबिक उननै दुबारे उपदेश देण लागया।

2 फेर फरीसियाँ नै यीशु कै धारे आकै उस ताहीं परखण खात्तर उसतै बुद्धिया, “के यो ठीक सै के माणस अपनी घरआळी नै छोड़डै?”

3 यीशु नै उनतै पूच्छया, “मूसा नबी नै धारे ताहीं के हुकम दिया सै?”

4 उननै कह्या, “मूसा नबी नै तो तलाकनामा देकै अर छोड़ण का हुकम दिया सै।”

5 यीशु नै उनतै कह्या, “धारे मन की कठोरता कै कारण उसनै धारे खात्तर यो हुकम लिख्या।”

6 “पर सृष्टि की शुरुआत तै परमेसवर नै नर अर नारी करके उन ताहीं बणाया सै।

7 इस कारण माणस अपने माँ-बाप तै न्यारा होकै अपनी घरआळी गेल्या रहवैगा,

8 अर वे दोनु कट्टे रहवैगे; ज्यातै के वे इब दो न्ही पर एक तन सै।

9 इस करके जिस ताहीं परमेसवर नै जोड़या सै उस ताहीं माणस न्यारा ना करै।”

10 जब वे दोबारा घरां आये, तो चेल्यां नै तलाक कै बारे म्ह उसतै फेर बुद्धिया।

11 यीशु नै उनतै कह्या, “जो कोए अपनी घरआळी नै छोड़कै दुसरी तै ब्याह करै तो वो उस पैहल्डी कै विरोध म्ह जारी करै सै;

12 अर जै घरआळी अपने धणी नै छोड़कै दुसरे तै ब्याह करै तो वा जारी करै सै।”

ⓂⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 19:13-15; ⓂⓂⓂⓂⓂ 18:15-17)

13 फेर माणस अपने बाळकां नै उसके धारे ल्याण लागगे के वो उनपै हाथ धरै, पर चेल्यां नै उन ताहीं धमकाया।

14 यीशु नै न्यू देख छो म्ह होकै कह्या, “बाळकां नै मेरै धारे आण द्यो अर उननै मना मतना करो, क्यूँके परमेसवर का राज्य बाळकां के समान सै।

15 मै धमनै सच कहूँ सूँ के जो कोए परमेसवर के राज्य नै बाळक की तरियां न्ही अपनावै, वो उस म्ह कदे न्ही बड़ण पावैगा।”

16 अर उसनै उन ताहीं गोद्दी म्ह लिया, अर उनपै हाथ धरके उन ताहीं आशीर्वाद दिया।

ⓂⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 19:16-30; ⓂⓂⓂⓂⓂ 18:18-30)

17 जब यीशु अर उसके चल्ले यरुशलम की ओड़ जाण लागरे थे, तो एक माणस उसके धारे भाज्दा होया आया, अर उसके आग्रे घुटने टेक कै उसतै बुद्धिया, “हे उत्तम गुरु, अनन्त जीवन का हकदार होण खात्तर मै के करूँ?”

18 यीशु नै उसतै कह्या, “तू मन्नै उत्तम क्यातै कहवै सै? परमेसवर नै छोड़कै कोए उत्तम कोनी।

19 तन्नै हुकमां का तो बेराए सै: ‘खून न्ही करणा, जारी न्ही करणा, चोरी न्ही करणा, झूट्टी गवाही न्ही देणा, छळ न्ही करणा, अपने माँ-बाप का आदर करणा।’”*

20 उसनै यीशु तै कह्या, “हे गुरु, इन सारया नै मै बाळकपण तै मानता आऊँ सूँ।”

21 यीशु नै उसपै निगाह करके उसतै प्यार करया, अर उसतै कह्या, “तेरे म्ह एक बात की कमी सै। जा, जो कुछ तेरा सै उसनै बेचकै कंगालां ताहीं दे, अर तन्नै सुर्ग म्ह धन मिलैगा, अर आकै मेरा चेल्ला बणण खात्तर मेरै पाच्छै हो ले।”

* 10:19 10:19 रोम-13:9

22 इस बात तै उसके मुँह पै उदासी छाग्यी, अर वो दुखी होंदा होया चल्या गया, क्यूँके वो घणा साहूकार था।

23 यीशु नै चीगरदेकै देखके अपणे चेल्यां तै कह्या, “साहूकारां का परमेसवर कै राज्य म्ह दाखल होणा कितना ओक्खा सै।”

24 चेल्लें उसकी बात तै हैरान होए। इसपै यीशु नै उनतै दुबारे कह्या, “हे बाळकों, जो धन पै भरोस्सा राखै सै, उनके खात्तर परमेसवर कै राज्य म्ह बड़णा कितना ओक्खा सै।

25 ऊँट का सूई कै छेद म्ह तै लिकड़णा आसान हो सके सै। पर परमेसवर के राज्य म्ह साहूकार का बड़णा भोत मुश्किल सै।”

26 वे घणेए हैरान होके आप्स म्ह कहण लाग्गे, “तो फेर किसका उद्धार हो सके सै?”

27 यीशु नै उनकी ओड़ देखके कह्या, “माणसां तै तो यो न्ही हो सकदा, पर परमेसवर तै हो सके सै; क्यूँके परमेसवर खात्तर कुछ भी मुश्किल कोनी।”†

28 पतरस उसतै कहण लाग्या, “देख, हम तो सब कुछ छोड़के तेरे चेल्लें बणगे सा।”

29 यीशु नै कह्या, “मै धमनै साच्ची-साच कहूँ सूँ के इसा कोए कोनी, जिसनै मेरै अर मेरै सुसमाचार कै खात्तर घर, भाण-भाई, माँ-बाप, बाळ-बच्चे या जमीन-जायदाद ताहीं छोड़ दिया हो,

30 अर इब इस युग म्ह सताव के बदले म्ह घर, भाण-भाई, माँ-बाप या बाळ-बच्चे अर जमीन-जायदाद का सौ गुणा पर आण आळे बखत म्ह अनन्त जीवन पावैगा।

31 पर घणखरे जो पैहले सै, पाच्छले होंगे; अर जो पाच्छले सै, वे पैहले होंगे।”

~~~~~

(~~~~~ 20:17-19; ~~~~~ 18:31-34)

32 वे यरुशलम नगर म्ह जान्दे होए राह म्ह थे, अर यीशु उनके आगै-आगै जाण लाग रहया था: चेल्लें हैरान थे अर जो चेल्यां के गैल-गैल चाल्लै थे, वे डररे थे। फेर वो उन बारहां चेल्यां नै न्यारा ले ज्याकै उनतै ये बात कहुँ लाग्या, जो उसके गेल्या होण आळा था,

33 “देखो, हम यरुशलम नगर म्ह जावां सा, अर मै माणस का बेट्टा प्रधान याजकां अर शास्त्रियां कै हाथ्यां पकड़वाया जाऊंगा, अर वे मन्नै मारण खात्तर गैर यहूदियां कै हाथ्यां म्ह सौपैगे।

34 वे मेरा मजाक उड़ावेंगे, मेरै पै थूकेंगे, मेरै कोरडे मारेंगे अर मन्नै मार देवेंगे, अर तीसरे दिन मै जिन्दा हो जाऊंगा।”

~~~~~

(~~~~~ 20:20-28)

35 कुछ दिनां बाद जब्दी के दोन्नु बेट्टे याकूब अर यूहन्ना नै यीशु के धारे आके कह्या, “हे गुरु, हम चाहवां सां के जो कुछ हम तेरे तै माँगगा, वो तू म्हारै खात्तर करै।”

36 यीशु नै उनतै कह्या, “थम के चाहो सो के धारे खात्तर करै?”

37 उननै यीशु तै कह्या, “हमनै यो हक दे, के तेरी महिमा म्ह म्हारै म्ह तै एक तेरे सोळे अर दुसरा तेरे ओळै कान्ही बेट्टे।”

38 यीशु नै उनतै कह्या, “थम न्ही जाणदे के थम के माँगो सो? अर जो दुख का कटोरा मै पीण पै सूँ के थम पी सको सो? अर जो मौत का बपतिस्मा मै लेण पै सूँ के थम ले सको सो?”

39 उननै यीशु तै कह्या, “हम कर सका सां।” यीशु नै उनतै कह्या, “जो दुख का कटोरा मै पीण पै सूँ, थम पी ल्योगे; अर जो बपतिस्मा मै लेण पै सूँ, उसनै ले भी ल्योगे।

40 पर जिन खात्तर वा जगहां त्यार करी गई सै, उन ताहीं छोड़ और किसे नै अपणी सोळी अर अपणी ओळी ओड़ बिठाणा मेरा काम कोनी।”

41 न्यू सुणके बाकी दस चेल्लें याकूब अर यूहन्ना तै चिड़गे।

42 तो यीशु नै उन ताहीं धोरै बुलाकै उनतै कह्या, “थमनै बेरा सै के जो गैर यहूदियाँ के हाकिम समझे जावै सै, वे उनपै राज करै सै; अर उन म्ह जो बड़े सै, उनपै हक जमावै सै।

43 पर थारे म्ह इसा न्ही होणा चाहिये, बल्के जो कोए थारे म्ह बड़ड़ा होणा चाहवै वो थारा सेवक बणै;

44 अर जो थारे म्ह प्रधान होणा चाहवै, वो सारया का दास बणै।

45 क्यूँके मै माणस का बेट्टा ज्यांतै कोनी आया के अपणी सेवा-पाणी करवाऊँ, पर ज्यांतै आया के खुद सेवा-पाणी करूँ, अर घणखरयाँ के छुटकारै के खात्तर अपणी जान देऊँ।”

☞☞☞☞ ☞☞☞☞☞☞ ☞☞☞☞ ☞☞☞☞ ☞☞ ☞☞☞☞
(☞☞☞☞ 20:29-34; ☞☞☞☞ 18:35-43)

46 यीशु अर उसके चेल्लेँ यरुशलेम नगर जाते बखत यरीहो नगर म्ह आये, अर जिव वो अर उसके चेल्लेँ, अर एक बड़्डी भीड़ यरीहो नगर तै लिकड़े जाण लागरी थी, तो सड़क के किनारे एक आन्धा भिखारी बेट्या था, जो तिमाई का बेट्टा बरतिमाई था,

47 उसनै न्यू सुणके के नासरत का यीशु उरै सै, रुक्के मार-मारकै कहण लाग्या, “हे दाऊद की ऊलाद, यीशु मेरै पै दया कर!”

48 घणाए नै उस ताहीं धमकाया के बोल-बाल्ला रह, पर वो और भी रुक्के मारण लाग्या, “हे दाऊद की ऊलाद, मेरै पै दया कर!”

49 फेर यीशु नै ठहरकै कह्या, “उस ताहीं बुलाओ।” अर आदमियाँ नै उस आन्धे ताहीं बुलाकै उसतै कह्या, “धीरज धर! उठ! यीशु तन्नै बुलावै सै।”

50 वो अपणा चोगा बगाकै तोळा उठ्या, अर यीशु के धोरै आया।

51 इसपै यीशु नै उसतै कह्या, “तू के चाहवै सै के मे तेरे खात्तर करूँ?” आन्धे नै उसतै कह्या, “हे गुरु, योए के मै देखण लागू।”

52 यीशु नै उसतै कह्या, “बल्या जा, तेरे विश्वास नै तेरे ताहीं ठीक करया सै।” वो जिब्बे देखण लाग्या, अर राह म्ह उसके पाच्छै हो लिया।

11

☞☞☞☞☞☞ ☞☞☞☞☞☞☞☞ ☞☞☞☞☞☞☞☞
(☞☞☞☞☞ 21:1-11; ☞☞☞☞☞ 19:28-40; ☞☞☞☞ 12:12-19)

1 जिव यीशु अर उसके चेल्लेँ यरुशलेम नगर के लोवै, जैतून पहाड़ पै बैतफगे अर बैतनिय्याह गाम के धोरै आये तो उसनै अपणे चेल्यां म्ह तै दोयां ताहीं न्यू कहकै भेज्या,

2 “स्याम्ही के गाम म्ह जाओ, अर उस म्ह पोहचदे एक गधी का बच्चा, बन्धया होया थमनै मिलेगा। जिसकी सवारी किसे नै इब ताहीं न्ही करी सै, उसनै खोल ल्याओ।

3 जै थारे तै कोए बुद्धई, यो के करो सो? तो कहियो, “प्रभु नै इसकी जरूरत सै, अर वो तोळा उसनै भेज देवैगा।”

4 चेल्यां नै जाके उस गधी के बच्चे ताहीं बाहरणे दरबाजे के धोरै आँगण म्ह बन्धया होया पाया, अर खोल्लण लागे।

5 उन म्ह तै जो ओड़े खड़े थे, कई कहण लागगे, “यो के करो सो, गधी के बच्चे नै क्यांतै खोल्लो सो?”

6 जिसा यीशु नै कह्या था, उससे तरियां उननै कह दिया; फेर माणसां नै उन ताहीं जाण दिया।

7 चेल्यां नै गधी के बच्चे ताहीं यीशु के धोरै ल्याकै उसपै अपणे लत्ते बिछाये अर वो उसपै बैठग्या।

8 फेर घणखरे माणसां नै अपणे लत्ते राह म्ह बिछाये अर औरां नै खेत्तां म्ह तै डालियाँ काटकै फैला दी।

9 जो उसके आगै-आगै अर पाच्छै-पाच्छै चाल्लै थे, रुक्के मार-मारकै कहन्दे जावै थे, “होशाना!” “धन्य सै वो जो प्रभु के नाम तै आवै सै!”

10 म्हारे पिता दाऊद का राज्य जो आवै सै; “धन्य सै! अकास म्ह होशाना!”

11 यीशु यरुशलेम नगर पोहचकै मन्दर म्ह आया, अर चौगरदे की सारी चिज्जां नै देखकै बारहां चेल्यां कै गेल्या बैतनिय्याह गाम म्ह गया, क्यूँके साँझ होगयी थी।

XXXXXXXXXXXXXXXXXXXX
(XXXXXXXX 21:18-19)

12 आगले दिन सबेरै जिव यीशु अर उसके चेल्लें बैतनिय्याह गाम तै लिकड़े तो यीशु नै भूख लागगी।

13 यीशु दूर तै अंजीर का हरा दरखत देखकै उसके धोरै गया के, के बेरा उस म्ह कुछ पा ज्या: पर पत्या नै छोड़कै उस म्ह कुछ न्ही पाया; क्यूँके फळ लाग्गण का बखत कोनी था।

14 यीशु नै उस दरखत ताहीं देखकै उस ताहीं कह्या, “आज कै पाच्छे, कोए तेरा फळ न्ही खावैगा!” अर उसके चेल्लें सुणण लागरे थे।

XXXXXXXXXXXXXXXXXXXX
(XXXXXXXX 21:12-17; XXXXXX 19:45-48; XXXX 2:13-22)

15 फेर यीशु अर उसके चेल्लें यरुशलेम म्ह आये, अर वो मन्दर म्ह गया; अर ओड़ै जो व्यापार करै थे उननै बाहरणै लिकाड़ण लाग्या, सर्रांफां (पर्ईसा का लेण देण करण आळे) के पीढे अर कबूतर बेचणीयाँ की चौकियाँ उल्ट दी,

16 अर मन्दर म्ह किसे ताहीं भी व्यापार करण खात्तर आण-जाण कोनी दिया।

17 अर उपदेश देके उनतै कह्या, “के पबित्तर ग्रन्थ म्ह यो न्ही लिख्या सै, के मेरा घर सारी जात्तां कै खात्तर प्रार्थना का घर कुह्लावैगा? पर धमनै इस ताहीं डाकुआं की गुफा बणा दी सै।”*

18 या घटना सुणके सारे प्रधान याजक अर शास्त्री लोग उसनै मारण का मौक्का टोह्ल लागगे; पर वे भीड़ ते डरै थे, क्यूँके सारे माणस उसके उपदेश तै भोत परभावित होवै थे।

19 अर उस दिन साँझ होन्दे यीशु अर उसके चेल्लें रात काट्टण खात्तर यरुशलेम नगर तै बाहरणै चले गये।

XXXXXXXXXXXXXXXXXXXX
(XXXXXXXX 21:20-22)

20 फेर तड़कैए नै जिव यीशु अर उसके चेल्लें ओड़ै कै जावै थे तो उननै उस अंजीर कै दरखत ताहीं जड़ तै ए सूख्या होया देख्या।

21 पतरस नै वा बात याद आई, अर उसनै उसतै कह्या, “हे गुरु, देख! यो अंजीर का दरखत जिस ताहीं तन्नै श्राप दिया था, वो सूख गया सै।”

22 यीशु नै उस ताहीं जवाब दिया, “परमेसवर पै बिश्वास राक्खो।

23 मै धमनै साच्ची कहूँ सूँ के जो कोए इस पहाड़ नै कहवै, ‘तू उखड़ जा, अर समुन्दर म्ह जा पड़,’ अर अपणे मन म्ह शक ना करै, बल्के बिश्वास करै के जो कहूँ सूँ वो हो जावैगा, तो उसके खात्तर वोए होवैगा।

24 ज्यांतै मै धमनै कहूँ सूँ के जो कुछ धम प्रार्थना करकै माँगो, तो बिश्वास कर ल्यो के धमनै मिलग्या, अर थारे खात्तर हो जावैगा।

25 अर जिव कदे धम प्रार्थना खात्तर खड़े होओ, तो जै थारे मन म्ह किसे कै विरोध म्ह कुछ हो, तो उसनै माफ करो: ज्यांतै के थारा सुर्गीय पिता भी थारे अपराध माफ करै।

26 अर जै धम माफ ना करो तो थारा पिता भी जो सुर्गि म्ह सै, थारा कसूर माफ कोनी करैगा।”

XXXXXXXXXXXXXXXXXXXX
(XXXXXXXX 21:23-27; XXXXXX 20:1-8)

27 यीशु अर उसके चेल्लें फेर यरुशलेम म्ह आये, अर जिव वो मन्दर म्ह टहलरया था तो सारे प्रधान याजक अर शास्त्री अर यहूदी अगुवें उसके धोरै आकै बुद्धिण लागगे,

* 11:17 11:17 लूका 19:46

28 “तू ये काम किस हक तै करै सै? अर यो हक तेरे ताहीं किसनै दिया सै के तू ये काम करै?”

29 यीशु नै उनतै कह्या, “मै भी धारे तै एक बात बुझ्झु सूं; मन्नै जवाब दियो तो मै थमनै बताऊंगा के ये काम किस हक तै करूँ स।

30 यूहन्ना ताहीं बपतिस्मा देण का हक परमेसवर की ओड़ तै था या माणसां की ओड़ तै था? मन्नै जवाब द्यो।”

31 फेर वे आप्सस म्ह बहस करण लागगे के जै हम कह्यां, परमेसवर की ओड़ तै, तो वो कहवैगा, फेर थमनै विश्वास क्यातै न्ही करया?

32 अर जै हम कह्यां, माणसां की ओड़ तै, तो माणसां की भीड़ का डर सै, क्यूँके सारे जाणै सै के यूहन्ना साच्चीये नबी था।

33 उननै यीशु ताहीं जवाब दिया, “हमनै न्ही बेरा।” यीशु नै उनतै कह्या, “मै भी धारे तै कोनी बतान्दा के ये काम किस हक तै करूँ सूं।”

12

ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 21:33-46; ⓂⓂⓂⓂⓂ 20:9-19)

1 यीशु उदाहरणां म्ह उनतै बात करण लाग्या: “किसे माणस नै अंगूर का बाग लगाया, अर उसकै चौगरदे नै बाड़ा बाँधया, अर रस का कुण्ड खोद्या, अर रुखाळ खात्तर एक मचान बणाया; अर किसानां ताहीं उसका टेक्का देके परदेस चल्या गया।

2 फेर फळ तोड़ण का बखत लोवै आया, तो बाग के माल्लिक नै अपणे नौक्कर ताहीं उसका फळ लेण नै किसानां धोरै भेज्या के किसानां तै अंगूर के बाग के फळां का हिस्सा लेवै।

3 पर किसानां नै उस नौक्कर ताहीं पकड़कै छेत्या अर खाल्नी हाथ भेज दिया।

4 फेर उसनै एक और नौक्कर ताहीं उनकै धोरै भेज्या; उननै उसकी बेजती करी उसका सिर फोड़ दिया अर।

5 फेर उस माल्लिक नै एक और ताहीं भेज्या; उननै उस नौक्कर ताहीं भी मार दिया। फेर उसनै और घणाए ताहीं भेज्या; उन म्ह तै उननै कुछ तो छेत्ते अर कुछ मार दिये।”

6 “इब माल्लिक कै धोरै एकैए आदमी रहग्या जो उसका प्यारा बेट्टा था; आखर म्ह उसनै अपणे बेट्टे ताहीं भी उनकै धोरै न्यू सोचकै भेज्या के वे मेरै बेट्टे की इज्जत तो जरुर करैगें।”

7 पर उन किसानां नै आप्सस म्ह कह्या, “योए तो वारिस सै; आओ, हम इसनै मार द्या, फेर यो अंगूर का बाग म्हारा हो जावैगा।”

8 अर उननै उस ताहीं पकड़कै मार दिया, अर अंगूर के बाग तै बाहरणे बगा दिया।

9 इस करकै अंगूर के बाग का माल्लिक के करैगा? वो आकै उन किसानां का नाश करैगा, अर अंगूर के बाग का टेक्का दुसरे किसानां नै दे देवैगा।

10 के थमनै पवित्तर ग्रन्थ म्ह यो वचन कोनी पढ्या: जिस पत्थर ताहीं राजमिस्त्रियां नै बेकार बताया था, वोए कोणे का खास पत्थर होग्या;

11 यो प्रभु की ओड़ तै होया, अर यो म्हारे खात्तर अनोक्खा सै!

12 फेर यहूदियाँ के प्रधान नै उस ताहीं पकड़णा चाह्या; क्यूँके वे समझगे थे, के उसनै म्हारै विरोध म्ह यो उदाहरण कह्या सै: पर वे माणसां तै डरगे, अर उसनै छोड़कै चले गये।

ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 22:15-22; ⓂⓂⓂⓂⓂ 20:20-26)

13 फेर यहूदियाँ के प्रधान नै यीशु ताहीं बात्तां म्ह उलझाण खात्तर कुछ फरीसियाँ अर हेरोदेस राजा के समर्थकां ताहीं उसकै धोरै भेज्या।

14 उननै आकै यीशु तै कह्या, “हे गुरु, हमनै बेरा सै, के तू साच्चा सै, अर किसे की परवाह न्ही करदा, क्यूँके तू माणसां का मुँह देखके बात कोनी करदा, पर परमेसवर की बातें सच्चाई तै सिखावै सै। तो के कैसर* ताहीं कर देणा ठीक सै या कोनी?”

15 हम देवां, या न्ही देवां?” उसनै उनका कपट जाणके उनतै कह्या, “मन्नै क्यांतै परखो सो? एक दीनार (एक दिन की मजदूरी) मेरै धोरे ल्याओ, के मै उसनै देखवूँ।”

16 वे लियाए, अर उसनै उनतै कह्या, “या छाप अर नाम किसका सै?” उननै कह्या, “कैसर का।”

17 यीशु नै उनतै कह्या, “जो कैसर का सै वो कैसर ताहीं, अर जो परमेसवर का सै परमेसवर ताहीं द्यो।” फेर वे उसपै घणे हैरान होण लागगे।

Matthew 22:23-33; Mark 12:27-40

18 फेर सदूकी लोग भी, जो कहवै सै के मेरे होए जिन्दा होए न्ही सकदे; उसकै धोरे आकै उसतै बुझ्झया,

19 “हे गुरु, मूसा नबी नै म्हारै खात्तर पवित्तर ग्रन्थ म्ह लिख्या सै के जे किसे का भाई बेऊलादा मर जावै अर उसकी घरआळी रह जावै, तो उसका भाई उसकी घरआळी तै ब्याह कर लेवै अर अपणे भाई खात्तर पीढ़ी पैदा करै।

20 उदाहरण के तौर पै सात भाई थे। पैहल्ला भाई ब्याह करके बेऊलादा मरगया।

21 फेर दुसरे भाई नै उसकी बिरबान्नी तै ब्याह कर लिया अर वो भी बेऊलादा मरगया; अर उससे तरियां तीसरे नै भी करया।

22 अर सातुवां के ऊलाद कोनी होई। सारया पाच्छै वा बिरबान्नी भी मरगी।

23 आखर म्ह जिन्दा होण पै वा उन म्ह तै किसकी घरआळी होवैगी? क्यूँके वा सातुवां की घरआळी हो ली थी।”

24 यीशु नै उनतै कह्या, “थारी गलती या सै के थम पवित्तर ग्रन्थ अर परमेसवर की सामर्थ नै न्ही जाणते।

25 क्यूँके जी उठण के बाद ब्याह शादी कोनी होन्दी, पर सुर्ग म्ह वो परमेसवर के सुर्गदूतां की ढाळ होवेंगे।

26 मेरे होया के जिन्दा होण के बारे म्ह के थमनै मूसा नबी की किताब म्ह जळती होई झाड़ी की कथा म्ह कोनी पदया के परमेसवर नै उसतै कह्या, ‘मै अब्राहम का परमेसवर, अर इसहाक का परमेसवर, अर याकूब का परमेसवर सूं?’

27 परमेसवर मेरे होया का न्ही बल्के जिन्दयां का परमेसवर सै; थम बड्डी भूल म्ह पड़े सो।”

Matthew 22:34-40; Mark 10:25-28

28 शास्त्री समाज के माणसां म्ह तै एक नै आकै उन ताहीं बहस करदे सुण्या, अर न्यू जाणके उसनै उन ताहीं ठीक ढाळ तै जवाब दिया, अर उसतै बुझ्झया, “सारया तै खास हुकम कौण सा सै?”

29 यीशु नै उस ताहीं जवाब दिया, “सारे हुकमां म्ह तै यो खास सै: हे इस्राएल के माणसां सुणो! प्रभु म्हारा परमेसवर सिर्फ एक ही प्रभु सै,

30 अर तू प्रभु अपणे परमेसवर तै अपणे सारे मन तै, अर अपणे सारे प्राण तै, अर अपणी सारी समझ तै, अर अपणी सारी शक्ति तै प्यार राखणा।”

31 अर दुसरा यो सै, ‘तू अपणे पड़ोसी तै अपणे जिसा प्यार राखणा।’ इसतै बड्ड़ा और कोए हुकम कोनी।”

32 शास्त्री नै उसतै कह्या, “हे गुरु, जमा ठीक! तन्नै साच्ची कही के परमेसवर एक-ए सै, अर उस ताहीं छोड़के और कोए कोनी।

* 12:14 12:14 रोमी सम्राट

33 अर उसतै सारे मन तै, अर सारे पूराण तै, अर सारी समझ तै, अर सारी शक्ति तै प्यार राखणा; अर पड़ोसी तै अपणे जिसा प्यार राखणा, ये दोन्नु हुकम होमबलियाँ अर बलिदानां तै बाध सै।”

34 जिब यीशु नै देख्या के उसनै समझदारी तै जवाब दिया, तो उसतै कह्या, “तू परमेसवर के राज्य तै दूर कोनी।” अर किसे नै फेर उसतै बुद्धझण की हिम्मत कोनी होई।

~~~~~

(~~~~~ 22:41-46; ~~~~~ 20:41-46)

35 फेर यीशु नै मन्दर म्ह उपदेश देन्दे होए न्यू कह्या, “शास्त्री क्यूँ कहवै सै के मसीह दाऊद का बेटा सै?

36 क्यूँके दाऊद नै खुद ए पवित्र आत्मा म्ह होके कह्या सै, ‘परमेसवर यहोवा नै मेरै प्रभु तै कह्या, ‘मेरै सोळी ओड़ बैठ, जिब ताहीं के मै तेरे बैरियाँ नै हरा के, तेरे पायां की चौक्की न्ही बणा दियुं।’”

37 “दाऊद तो खुद ए उसनै प्रभु कहवै सै, फेर वो उसका बेटा किस ढाळ होया?” अर भीड़ के माणस उसकी राज्जी होके सुणै थै।

~~~~~

(~~~~~ 23:1-36; ~~~~~ 20:45-46)

38 यीशु नै अपणे उपदेश म्ह उनतै कह्या, “शास्त्रियाँ तै चौकन्ने रहियो, जो लाम्बे-लाम्बे चोगे पहेरे होड़ हाँडे अर बजारां म्ह नमस्कार चाहवै सै,

39 अर आराधनालयाँ म्ह खास-खास जगहां बैठणा, जिम्मण म्ह खास-खास जगहां भी चाहवै सै।

40 वे बिधवायाँ के घर खा जावै सै अर दिखाण खात्तर घणी वार ताहीं प्रार्थना करदे रहवै सै। ये घणा दण्ड पावैगें।”

~~~~~

(~~~~~ 21:1-4)

41 यीशु मन्दर के भण्डार के स्याम्ही बैठके देखै था के आदमी मन्दर के दानपात्र म्ह किस तरियां पईसे घालै सै; अर घणखरे साहूकारां नै घणाए कुछ घाल्या।

42 इतने म्ह एक कंगाल बिधवा नै आके दो दमड़ी घाल्लीं। (जो एक धेले के बराबर होवै सै)

43 फेर उसनै अपणे चेल्यां ताहीं धोरै बुलाके कह्या, “मै थमनै सच कहूँ सूँ के मन्दर के दानपात्र म्ह घाल्लण आळा म्ह तै इस कंगाल बिधवा नै सारया तै बाध घाल्या सै;

44 क्यूँके सारया नै अपणे धन की बढ़दी म्ह तै घाल्या सै, पर इसनै अपनी घटदी म्ह तै जो उसके धोरै जीवन चलाण खात्तर था, वो सारा घाल दिया।”

## 13

~~~~~

(~~~~~ 24:1-2; ~~~~~ 21:5-6)

1 जिब यीशु मन्दर तै लिकड़ै था, तो उसके चेल्यां म्ह तै एक नै उसतै कह्या, “हे गुरु, लखा, किसे बड़े-बड़े पत्थरां तै बणाये होए किसे सुथरे भवन सै।”

2 यीशु नै उनतै कह्या, “के थम ये बड़े-बड़े पत्थरां के भवन देखो सो: पर उरै एक पत्थर भी कोनी बचैगा जो गेरया न्ही जावैगा।”

~~~~~

(~~~~~ 24:3-14; ~~~~~ 21:7-19)

3 जिब यीशु मन्दर के स्याम्ही जैतून के पहाड़ पै बैठचा था, तो पतरस, याकूब, यूहन्ना अर अन्दरयास नै न्यारे जाके उसतै बुद्धझया,

4 “हमनै बता के ये बात कद होवैगी? अर जिब ये सारी बात पूरी होण पै होवैगी उस बखत की के निशान्नी होवैगी?”

5 यीशु उनतै कहण लाग्या, “चौकन्ने रहियो के कोए थमनै भकावै न्ही।

6 क्यूँके घणखरे मेरै नाम तै आकै कहवैगें, भै मसीह सूं! अर घणाए नै भकावैगें।

7 जिव थम रोळे, अर लड़ाईया का जिक्र सुणो, तो घबराईयो ना; क्यूँके इनका होणा जरूरी सै, पर उस बखत खात्मा कोनी होवैगा।

8 क्यूँके जात पै जात, राज्य पै राज्य चढ़ाई करैगा। भोत सारी जगहां पै हाल्लण आवैगें, अर अकाळ पड़ैगें, ये तो दुखां की शरुआत ए होवैगी।”

9 “पर थम अपणे बारै म्ह चौकन्ने रहो; क्यूँके माणस थारे ताहीं बड़डी सभा म्ह सौपैगें अर थम आराधनालयों म्ह छितोगे, अर मेरै कारण हाकिमां अर राजां कै आगुँ खड़े करे जाओगे, ताके थम मेरे बारें म्ह गवाही दे सको।

10 पर जरूरी सै के पैहल्या सुसमाचार सारी जात्तां म्ह प्रचार करया जावै।

11 जिव वे थमनै ले जाकै सौपैगें, तो पैहल्या तै फिकर ना करियो इब हम के कहवागें; पर जो कुछ थमनै उस बखत बताया जावै वोए कहियो; क्यूँके बोल्लण आळे थम कोनी सो, पर पवित्तर आत्मा सै।”

12 “भाई नै भाई, पिता नै बेट्टा मारण खात्तर सौप देगें, अर बाळक माँ-बाप कै बिरोध म्ह खड़े होकै उन ताहीं मरवा देवैगें।”

13 अर मेरै नाम कै कारण सारे माणस थारे तै वैर करैगें; पर जो आखर ताहीं धीरज धरैगा, उस्से का उद्धार होवैगा।”

~~~~~

(~~~~~ 24:15-28; ~~~~~ 21:20-24)

14 (पढ़ण आळा इस बात नै समझ लेवै) “जिस दिन थम मन्दर म्ह उस उजाड़ण आळी घृणित चीज नै खड़े देखो, जिस ताहीं मन्दर म्ह न्ही होणा चाहिये, तब जो यहूदिया परदेस म्ह हो वे पहाड़ां पै भाज जावै;

15 जो छात पै हो, वो घर म्ह कुछ लेण खात्तर भीत्तर ना जावै,

16 अर जो खेत म्ह हो, वो अपणे लत्तें लेण खात्तर घर नै ना बोहड़ें।

17 उन दिनां म्ह जो गर्भवती अर दूध पिलान्दी बिरबान्नी होवैगीं, उनकै खात्तर भागणा भी मुश्किल होगा!

18 अर प्रार्थना करया करो के यो जाड्यां म्ह न्ही हो।

19 क्यूँके वे दिन इसे क्लेश के होवैगें के सृष्टि की शरुआत तै, जो परमेसवर नै रचाई सै, इब ताहीं ना तो होए अर ना फेर कदे होवैगें।”†

20 अर जै प्रभु उन दिनां नै न्ही घटान्दा, तो कोए जीव भी कोनी बचदा; पर उन छोट्टि होया के कारण जिन ताहीं उसनै छाटया सै, उन दिनां ताहीं घटया।

21 उस बखत जै कोए थमनै कहवै, देखो, मसीह उरै सै, या देखो, ओड़े सै, तो विश्वास ना करियो;

22 क्यूँके झूठे मसीह अर झूठे नबी उठ खड़े होवैगें, अर बड़े-बड़े चमत्कार अर अनोक्खे काम दिखावैगें के जे हो सक्या तो छोट्टि होया ताहीं भी भका देवैगें।‡

23 पर थम चौकन्ने रहियो; देखो, मन्ने थारे तै सारी बात बखत तै पैहल्याए बता दी सै।

~~~~~

(~~~~~ 24:29-31; ~~~~~ 21:25-28)

24 उन दिनां म्ह, उस क्लेश के पाछ्छे, सूरज अन्धेरा हो जावैगा, अर चाँद चाँदणा कोनी देवैगा;

25 अर अकास के तारे पड़ण लागैगें; अर अकास की शक्तियाँ हलाई जावैगीं।§

\* 13:12 13:12 लुका 21:16 † 13:19 13:19 (मत्ती 24:21) ‡ 13:22 13:22 (मत्ती 24:24) § 13:25 13:25  
प्रका-6:13



26 फेर मुझ माणस कै बेट्टे नै बड्डी सामर्थ अर महिमा कै गेल्या सब लोग बादळां पै आन्दे देखेंगे।\*

27 उस बखत मै अपने सुर्गदूतां नै भेजकै, धरती कै इस सिरै तै अकास कै उस सिरै ताहीं, च्यारु दिशायां तै अपने चुणे होए माणसां नै कट्ठा करूंगा।†

☞☞☞☞ ☞☞ ☞☞☞☞ ☞☞☞☞☞☞

(☞☞☞☞ 24:32-35; ☞☞☞☞ 21:29-33)

28 अंजीर के दरखत तै यो उदाहरण सीक्खो: जिब उसकी डाळी कोमल हो जावै, अर पत्ते लिकड़ण लागै सै; तो थम जाण ल्यो सो के गर्मी का बखत लोवै सै।

29 इस्से तरियां जिब थम इन बाततां नै होन्दे देखो, तो जाण ल्यो के वो भोत तावळा आण आळा सै।

30 मै थमनै साच्ची कहूँ सूँ के जिब ताहीं ये बात न्ही हो लेन्दी, जद ताहीं ये पीढ़ी खतम न्ही होवैगी।

31 धरती अर अकास टळ जावेंगे, पर मेरी बात कदे न्ही टळैगी।‡

☞☞☞☞ ☞☞

(☞☞☞☞ 24:36-44)

32 “उस दिन या उस बखत कै बारै म्ह कोए न्ही जाणदा, ना सुर्गदूत अर ना बेट्टा; पर सिर्फ पिता जाणै सै।

33 लखाओ, जागदे अर परार्थना करदे रहो; क्यूँके थमनै न्ही बेरा के वो बखत कद आवैगा।

34 मेरे आण का बखत उस माणस के समान सै, जो परदेस जान्दे बखत अपना घर छोड़ जावै, अर अपने नौकरां ताहीं हक देवै, अर हरेक नै उसका काम बता देवै, अर पहरेदार ताहीं जागदे रहण का हुकम देवै।

35 “इस करके जागदे रहो, क्यूँके थमनै न्ही बेरा के घर का माल्लिक कद आवैगा, साँझ नै या आध्नी रात नै, या मुर्ग के बाँग देण के बखत या तड़कै ए तड़कै नै।

36 इसा ना हो के वो चाणचक आकै थमनै सोदे पावै।

37 अर जो मै थमनै कहूँ सूँ, वोए सारया नै कहूँ सूँ: जागदे रहो!”

## 14

☞☞☞☞ ☞☞ ☞☞☞☞☞☞☞☞☞☞

(☞☞☞☞ 26:1-5; ☞☞☞☞ 22:3-6; ☞☞☞ 11:45-53)

1 दो दिनां पाच्छै फसह अर अखमीरी रोट्टी का त्यौहार होण आळा था। प्रधान याजक अर शास्त्री इस बात की टाह म्ह थे के यीशु ताहीं किस ढाळ कपट तै पकड़कै मार देवै;

2 पर वे कहवै थे, “त्यौहार के दिन न्ही, कदे इसा ना हो के माणसां म्ह रोळा माच्चै।”

☞☞☞☞☞☞☞☞☞☞ ☞☞☞☞☞☞☞☞☞☞

(☞☞☞☞ 26:6-13; ☞☞☞ 12:1-8)

3 जिब यीशु बैतनिय्याह नगर म्ह आया, ओडै यीशु शमौन नाम के माणस जो कोढ़ तै ठीक होया था, उसके घरां खाणा खाण बेट्या, तो एक विरबान्नी संगमरमर के बरतन म्ह जटामांसी का शुद्ध महंगा खसबूदार तेल लेकै आई, अर बरतन तोड़कै महंगा खसबूदार तेल उसके सिर पै उंडेल दिया।

4 पर उन म्ह तै कई माणस अपने मन म्ह बड़बड़ाने लागगे, “इस महंगे खसबूदार तेल का क्यातै सत्यानाश कर दिया?”

5 क्यूँके यो महंगा खसबूदार तेल तो तीन सौ दीनार (तीन सौ दिन की मजदूरी) तै भी घणी किम्मत पै बेचकै कंगालां म्ह बांडया जा सकै था।” अर उस विरबान्नी ताहीं झिड़कण लागगे।

6 यीशु नै कह्या, “उस ताहीं छोड़ दो; उसनै क्यातै सताओ सो? उसनै मेरै गेल्या भलाई करी सै।

\* 13:26 13:26 प्रका-1:17 † 13:27 13:27 मत्ती 24:31 ‡ 13:31 13:31 लूका 21:33

7 कंगाल थारे गेल्या सारी हाण रहवै सै, अर थम जिब चाहो जद उनतै भलाई कर सको सो; पर मै थारे गेल्या सारी हाण कोनी रहूंगा।

8 जो कुछ वा कर सकी, उसनै करया; उसनै मेरै गाड्डे जाण की त्यारी म्ह पैहला ए म्हंग्गा खसबूदार तेल मेरी देह पै उंडेला सै।

9 मै थमनै साच्ची कहूँ सूँ के सारे दुनिया म्ह जित्त किते भी सुसमाचार प्रचार करया जावैगा, जो उसनै करया वो सदा याद करया जावैगा।”

**26:14-16; 22:3-6**

10 फेर यहूदा इस्करियोती जो बारहा चेल्यां म्ह तै एक था, प्रधान याजकां के धारे गया के यीशु ताहीं उनके हाथ पकड़वा देवै।

11 वे न्यू सुणके राज्जी होगे, अर उस ताहीं रपिये देण खात्तर मानगे; अर वो मौक्का टोह्ल लागया के उस ताहीं किसे ढाळ पकड़वाया जावै।

12 अखमीरी रोटी के त्यौहार के पैहल्ले दिन, जिसम्ह वे फसह खात्तर मेम्ने का बलिदान करै थे, उसके चेल्यां नै उसतै बुझ्झया, “तू कित्त जाणा चाहवै सै के हम जाके तेरे खात्तर फसह भोज की त्यारी करा?”

13 उसनै अपणे चेल्यां म्ह तै दो ताहीं न्यू कहकै भेज्या, “थरुशलेम नगर म्ह जाओ, अर एक माणस पाणी का पैदा टाए होए थमनै मिलेगा, उसके पाच्छै हो लियो;

14 अर वो जिस घर म्ह जावै, उस घर के माल्लिक ताहीं कहियो, ‘गुरु कहवै सै के बैठक कित्त सै? जिसम्ह मै अपणे चेल्यां गेल्या फसह भोज खाऊँ।’

15 वो थमनै एक सजी-सजाई, अर त्यार करी होइ बड़ी अटारी दिखा देवैगा, ओइ म्हारै खात्तर त्यारी करो।”

16 चेल्ले लिकड़के नगर म्ह आये, अर जिसा यीशु नै उनतै कह्या था, उससे तरियां पाया; अर फसह का भोज त्यार करया।

**26:17-25; 22:7-14; 21-23; 13:21-30**

17 जिब साँझ होई, तो यीशु बारहा चेल्यां के गेल्या आया।

18 जिब वे बेट्टे खाणा खावै थे, तो यीशु नै कह्या, “मै थमनै साच्ची कहूँ सूँ के थारे म्ह तै एक, जो मेरै गेल्या खाणा खाण लागरया सै, वो मन्नै धोक्खा देके पकड़वावैगा।”

19 उनपै उदासी छागयी अर वे एक-एक करके उसतै कहण लागगे, “के वो मै सूँ?”

20 उसनै उनतै कह्या, “वो बारहा चेल्यां म्ह तै एक सै, जो मेरै गेल्या थाळी म्ह हाथ घालै सै।

21 क्यूँके मै माणस का बेट्टा तो, जिसा मेरे बारै म्ह पवित्तर ग्रन्थ म्ह लिख्या सै; मेरा मर जाणा तो पक्का सै, पर उस माणस पै धिक्कार सै जिसके जरिये मै माणस का बेट्टा पकड़वाया जाऊँगा! जै उस माणस का जन्म ए न्ही होंदा, तो उसके खात्तर भला होंदा।”

**26:26-30; 22:14-20; 1 11:23-25**

22 जिब वे खाण ए लागरे थे, उसनै रोटी लेके परमेसवर का धन्यवाद करया, अर आशीष माँगेके तोड़ी, अर उन ताहीं दी, अर कह्या, “ल्यो, या मेरी देह सै।”

23 फेर यीशु नै अंगूर के रस का कटोरा लेके परमेसवर का धन्यवाद करया, अर उन ताहीं दिया; अर उन सारया नै उस म्ह तै पिया।

24 अर उसनै उनतै कह्या, “यो अंगूर का रस मेरे लहू नै दर्शावै सै, जिसका करार परमेसवर नै लोग्गां तै करया जो घणाए खात्तर बहाया जावै सै।”

25 “थमनै साच्ची कहूँ सूँ, के अंगूर के रस नै मै इब तै इसनै उस दिन तक न्ही पिऊँगा, जिब ताहीं परमेसवर के राज्य म्ह थारे गेल्या नया रस न्ही पीऊँ।”

26 फेर वे भजन गाके बाहरणै जैतून कै पहाड़ पै गए ।

~~~~~

(~~~~~ 26:31-35; ~~~~~ 22:31-34; ~~~~~ 13:36-38)

27 जिव यीशु अर उसके चेल्लें राह म्ह थे, तो उसनै उनतै कह्या, “थम सारे मेरा साथ छोड़के चले जाओगे,” “क्यूँके पवित्र ग्रन्थ म्ह लिख्या सै:” मै रुखाळे नै मारूँगा, अर झुण्ड की सारी भेड़ तित्तर-वितर हो जावैगी ।

28 पर मै अपणे जी उठण कै बाद थारे तै पैहल्या गलील परदेस म्ह मिलूँगा ।

29 पतरस नै उसतै कह्या, “जै सारे छोड़ै तो छोड़ै, पर मै तेरा साथ कदे न्ही छोड़ूँगा ।”

30 यीशु नै उसतै कह्या, “मै तेरे तै सच कहूँ सूँ आज ए इस्से रात नै मुर्गे के दो बर बाँग देण तै पैहल्या, तू तीन बर मेरे बारे म्ह मुकरैगा ।”

31 पर उसनै और भी पक्के विश्वास तै कह्या, “जै मननै तेरे गेल्या मरणा भी पड़ै, तोभी मै तेरा इन्कार कदे कोनी करूँगा ।” इस्से तरियाँ और सारया चेल्याँ नै भी कह्या ।

~~~~~

(~~~~~ 26:36-46; ~~~~~ 22:39-46)

32 फेर यीशु अर उसके चेल्लें गतसमनी नामक वाग म्ह एक जगहां म्ह आए, अर उसनै अपणे चेल्याँ तै कह्या, “उरै बेट्टे रहो, जिव ताहीं मै प्रार्थना करूँ ।”

33 अर वो पतरस, याकूब अर यूहन्ना ताहीं अपणे गेल्या लेगया; अर घणाए कॉल अर दुखी होण लागया,

34 अर उनतै कह्या, “मेरा मन घणा उदास सै, उरै ताहीं के मै मरण पै सूँ: थम उरै ठहरो, अर जागदे रहो ।”

35 फेर वो माड़ा आगूँ सरक्या अर धरती पै पड़के प्रार्थना करण लागया के जै हो सके तो या मुसीबत की घड़ी मेरे पै तै टळ जावै,

36 अर कह्या, “हे अब्बा, हे पिता, तू सारा कुछ कर सकै सै; इस दुख का कटोरे ताहीं मेरे धरै तै हटा ले: तोभी जिसा मै चाहूँ सूँ उसा न्ही, पर जो तू चाहवै सै वोए हो ।”

37 फेर यीशु आया अर चेल्याँ ताहीं सोन्दे पाके पतरस तै कह्या, “हे शमौन, तू सोवै सै? के तू एक घड़ी भी कोनी जाग सक्या?

38 जागदे रहो अर प्रार्थना करदे रहो के थम इम्तिहान म्ह ना पड़ो । इस म्ह कोए शक कोनी के आत्मा तो त्यार सै, पर देह कमजोर सै ।”

39 अर यीशु फेर चल्या गया अर दोबारा भी वाए प्रार्थना करी ।

40 फेर आके उन ताहीं सोन्दे पाया, क्यूँके चेल्याँ की आँख नींद तै भरी थी; अर न्ही जाणै थे, के उसनै के जवाब देवै ।

41 फेर तीसरी बर आके उनतै कह्या, “थम इब भी सोण लागरे सोण सों? बखत आ लिया; देखो, मै माणस का बेट्टा पापियाँ के हाथ्याँ पकड़वाया जाऊँ सूँ ।

42 उठो, चाल्लां! लखाओ, मेरा पकड़वाण आळा लोवै आण पोंहच्या सै ।”

~~~~~

(~~~~~ 26:47-56; ~~~~~ 22:47-53; ~~~~~ 18:3-12)

43 यीशु न्यू कहण ए लागरया था के यहूदा जो बारहा चेल्याँ म्ह तै एक था, अपणे गेल्या प्रधान याजकाँ अर शास्त्रियाँ अर यहूदी अगुवाँ की ओड़ तै एक बड़्डी भीड़ लेके जिब्बे आण पोंहच्या, जो तलवार अर लाट्टी लेरे थे ।

44 यीशु के पकड़वाण आळे नै उन ताहीं यो इशारा दिया था के जिस ताहीं मै चुमूँ वोए यीशु होगा, उस ताहीं पकड़के सावधानी तै ले जाईयो ।

45 वो आया, अर जिब्बे उसके धरै जाके बोल्या, “हे गुरु!” अर उस ताहीं चुम्या ।

46 फेर उननै उसपै हाथ गर के उस ताहीं पकड़ लिया ।

47 उन बारहा चेल्यां म्ह जो धोरै खडे थे, एक नै तलवार खिंचके महायाजक के नौक्कर पै चलाई, अर उसका कान उड़ा दिया।

48 यीशु नै उनतै कहा, “के थम डाकू जाणके मन्नै पकड़ण के खात्तर तलवार अर लाट्टी लैके लिकड़े सो?”

49 मै तो हरेक दिन मन्दर म्ह थारे गेल्या रहके उपदेश दिया करूँ था, अर जिब थमनै मैरे ताहीं कोनी पकड़था: पर न्यू ज्यातै होया सै के पवित्तर ग्रन्थ म्ह लिखी बात पूरी होवै।”

50 यो सब देखके सारे चेल्लें उसनै छोड़के भाजगे।

51 एक जवान अपनी उघाड़ी देह पै चादर ओढ़े होइ उसके पाच्छै हो लिया, अर माणसां नै उस ताहीं पकड़था।

52 पर वो चादर छोड़के उघाड़ा भाजगया।

26:57-68; 22:54,55; 18:13-14,19-24

(26:57-68; 22:54,55; 18:13-14,19-24)

53 फेर वे यीशु ताहीं महायाजक के धोरै लगे, अर सारे प्रधान याजक, यहूदी अगुवें अर शास्त्री उसके ओड़े कटटे होंगे।

54 पतरस दूर ए दूर उसके पाच्छै-पाच्छै महायाजक के आँगण के भीत्तर ताहीं गया, अर सिपाहियाँ के गेल्या बैठके आग पै सीकण लागया।

55 प्रधान याजक अर यहूदी अगुवां की सभा यीशु ताहीं माण के खात्तर उसके विरोध म्ह गवाही की टोह म्ह थे, पर कोन्या मिली।

56 क्यूँके घणखरे उसके विरोध म्ह झूट्टी गवाही देवै थे, पर उनकी गवाही एक सी कोनी थी।

57 फेर कुछ माणसां नै उठके यीशु के विरोध म्ह या झूट्टी गवाही दी,

58 “हमनै इस ताहीं कहन्दे सुणया सै, मै इस हाथ के बणाए होइ मन्दर नै गेर दियुंगा, अर तीन दिन म्ह दुसरा बणाऊंगा, जो हाथ्यां तै न्ही बणया हो।”

59 इस बात म्ह भी उनकी गवाही एक सी कोनी लिकड़ी।

60 फेर महायाजक नै बिचाळे खडे होके यीशु तै बुझया, “तू कोए जवाब न्ही देंदा? ये माणस तेरे विरोध म्ह के गवाही देवें सै?”

61 पर वो बोल-बाल्ला रहया, अर कुछ जवाब न्ही दिया। महायाजक नै उसतै दुबारा बुझया, “के तू ए परम धन्य परमेसवर का बेट्टा मसीह सै?”

62 यीशु नै कहा, “हाँ मै ए सूँ: अर थम मुझ माणस के बेट्टे ताहीं सर्वशक्तिमान परमेसवर की सोळी ओड़ बेट्टे, अर अकास के बादळां के गेल्या आन्दे देखोगे।”

63 फेर महायाजक नै अपणे लत्ते पाड़के कहा, “इब हमनै गवाह की और के जरूरत सै?”*

64 थमनै या बुराई सुणी। थारी के राय सै? उन सारया नै कहा के यो मारण के जोगगा सै।

65 फेर कई तो उसपै थूकते, अर कई उसका मुँह ढकते होए, कई उसके घुस्से मारते होए उसतै कहण लागगे, जै तू नबी सै, “तो भविष्यवाणी कर!” के तेरे कौण मारे सै, अर सिपाहियाँ नै उस ताहीं पकड़के थप्पड़ मारे।

26:69-75; 22:56-62; 18:15-18,25-27

(26:69-75; 22:56-62; 18:15-18,25-27)

66 जब पतरस तळै आँगण म्ह था, तो महायाजक की नौकराणियाँ म्ह तै एक उड़ै आई,

67 अर पतरस ताहीं आग सिक्दे देखके उस ताहीं गौर तै देख्या अर कहण लागगी, “तू भी तो उस नासरत के यीशु के गेल्या था।”

68 पतरस मुकरगया, अर बोल्या, “मै ना ए जाणदा अर ना ए समझू सूँ के तू के कहवै सै।” फेर वो बाहरणै देहळीया म्ह गया; अर मुगें नै बाँग दी।

* 14:63 14:63 (मत्ती 26:65)

69 वा नौकराणी उसनै ओड़ै देखकै उनतै जो धोरै खड़े थे, दुबारा कहण लागगी, “यो उन म्ह तै एक सै।”

70 पर वो फेर मुकरग्या। माड़ी बार पाच्छै उननै जो धोरै खड़े थे फेर पतरस ताहीं कह्या, “पक्का तू उन म्ह तै एक सै, क्यूँके तू गलीली भी सै।”

71 फेर वो धिक्कारण अर कसम खाण लाग्या, “मै उस माणस नै, जिसका थम जिक्र करो सो, कोनी जाणदा।”

72 फेर जिब्बे दुसरी बार मुर्गे नै बाँग देई। पतरस ताहीं वाए बात जो यीशु नै उसतै कही थी याद आई “मुर्गे कै दो बर बाँग देण तै पैहल्या तू तीन बार मेरा इन्कार करेगा।” अर वो इस बात नै सोचकै फूट-फूटकै रोण लाग्या।

15

ⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 27:1-2; 11-14; ⓂⓂⓂⓂ 23:1-4; ⓂⓂⓂ 18:28-38)

1 सवेरा होन्दे जिब्बे सारे प्रधान याजकां, यहूदी अगुवां अर शास्त्रियाँ नै बल्के यहूदी अगुवां की सभा नै सलाह करकै यीशु ताहीं बंधवाया, अर उस ताहीं ले जाकै यहूदिया परदेस के हाकिम पिलातुस कै हाथ्यां म्ह सौप दिया।

2 पिलातुस नै यीशु तै बुझ्झया, “के तू यहूदियाँ का राजा सै?” उसनै उस ताहीं जवाब दिया, “तू आप ए कहण लागरया सै।”

3 प्रधान याजक यीशु पै घणी वात्तां के इल्जाम लावै थे।

4 पिलातुस नै उसतै फेर बुझ्झया, “के तू कुछ जवाब कोनी देंदा, लखा, ये तेरे पै कितनी वात्तां के इल्जाम लावै सै?”

5 यीशु नै फेर कुछ जवाब कोनी दिया; उरै ताहीं के पिलातुस नै घणी हैरानी होई।

ⓂⓂⓂⓂⓂ-ⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 27:15-26; ⓂⓂⓂⓂ 23:13-25; ⓂⓂⓂ 18:39; 19:16)

6 पिलातुस उस त्यौहार म्ह किसे एक कैदी नै जिसनै वे चाहवै थे, उन माणसां खात्तर छोड़ दिया करै था।

7 बरअब्बा नाम का एक माणस उन रोळे करणीया गेल्या कैदी था, जिन नै रोळे म्ह खून करया था।

8 अर भीड़ पिलातुस कै धोरै जाकै उसतै बिनती करण लागगी, के जिसा तू म्हारै खात्तर करदा आया सै उस्से तरियां कर।

9 पिलातुस नै उन ताहीं जवाब दिया, “थम के चाह्दो, के मै थारे खात्तर यहूदियाँ के राजा नै छोड़ दियुँ?”

10 क्यूँके पिलातुस जाणै था के प्रधान याजकां नै यीशु ताहीं चाल तै पकड़वाया था।

11 पर प्रधान याजकां नै माणसां ताहीं उकसाया के वो यीशु की जगहाँ बरअब्बा नै छोड़ दे।

12 न्यू सुण पिलातुस नै उनतै फेर बुझ्झया, “तो जिसनै थम यहूदियाँ का राजा कही सो, उसका मै के करुँ?”

13 वे फेर रुके मारण लागगे, “उसनै करूस पै चढ़ा यो!”

14 पिलातुस नै उनतै फेर कह्या, “क्यातै उसनै के बुरा करया सै?” पर वे और भी रुके मारण लागगे, “उसनै करूस पै चढ़ा यो!”

15 फेर पिलातुस नै भीड़ ताहीं राज्जी करण की चाहन्ना तै, बरअब्बा ताहीं उनकै खात्तर छोड़ दिया, अर यीशु के कोरड़े लगवाकै सिपाहियाँ के हाथ म्ह सौप दिया के करूस पै चढ़ाया जावै।

ⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 27:27-31; ⓂⓂⓂ 19:2-3)

16 यीशु ताहीं सिपाही किले कै भीत्तर कै आँगण म्ह ले गये जो पिरटोरियुम कुद्दावै सै, अर सारी पलटन ताहीं बुला ल्याए।

17 फेर सिपाहियाँ नै उसका मजाक उड़ाण खात्तर उस ताहीं बैजनी लत्ते पिहराए अर काण्डियाँ का मुकुट गूँथके उसके सिर पै धरया,

18 अर न्यू कहकै उस ताहीं नमस्कार करण लागगे, “हे यहूदियों के राजा, नमस्कार!”

19 वे उसके सिर पै सरकण्डे मारदे, अर उसपै थूकदे, अर गोड्डे टेक कै उसनै पूरणाम करदे रहे।

20 जिव उननै उसका मजाक उड़ा लिया, तो उसपै तै बैजनी लत्ते उतारकै उस्से के लत्ते पिहराए; अर फेर उस ताहीं क्रूस पै चढ़ाण कै खात्तर बाहरणै ले गये।

~~XXXXXXXXXX~~

(~~XXXXXXXXXX~~ 27:32-44; ~~XXXXXXXXXX~~ 23:26-43; ~~XXXX~~ 19:17-27)

21 सिकन्दर अर रूफुस का पिता शमौन, जो कुरेन परदेस का बसिन्दा था, वो यरुशलेम की ओड़ आण लागरया था; उननै उस ताहीं बेकार म्ह पकडचा ताके यीशु का क्रूस टाके ले चाल्लै।

22 वे यीशु ताहीं गुलगुता नामक जगहां पै लियाए, जिसका मतलब खोपड़ी की जगहां सै।

23 ओड़ै उस ताहीं सिरका मिल्या होड़ अंगूर का रस देण लागगे, पर उसनै कोनी लिया।

24 फेर उननै उस ताहीं क्रूस पै चढ़ाया अर उसके लत्यां पै पर्ची गेर कै, के किसनै के मिलै, उननै बांड लिये।

25 अर सबैरे के नौ बजे थे, जिव उननै यीशु ताहीं क्रूस पै चढ़ाया।

26 अर उसका दोषपत्र लिखकै क्रूस कै उप्पर लगा दिया के “यहूदियाँ का राजा।”

27 उननै उसके गेल्या दो डाकू, एक उसकी सोळी अर एक उसकी ओळी ओड़ क्रूस पै चढ़ा दिये।

28 (तब पवित्र ग्रन्थ का वो वचन के वो अपराधियाँ गेल्या गिण्या गया, पूरा होया।)

29 अर राह म्ह जाण आळे सिर हला-हल्लाकै अर न्यू कहकै उसकी बेजती करै थे, “वाह! मन्दर के गेरण आळे, अर तीन दिन म्ह वणाण आळे!

30 क्रूस पै तै उतरकै अपणे-आपनै बचाले।”

31 इस्से तरियां तै प्रधान याजक भी, शास्त्रियाँ सुधा, आप्स म्ह मजाक करकै कहवै थे, “इसनै औरां ताहीं बचाया, पर अपणे-आपनै न्ही बचा सकदा।

32 इस्राएल का राजा, मसीह, इब क्रूस पै तै उतर आ, के हम देखकै विश्वास करया।” अर जो डाकू उसके गेल्या क्रूस पै चढ़ाए गए थे, वे भी उसकी बेजती करै थे।

~~XXXXXXXXXX~~

(~~XXXXXXXXXX~~ 27:45-56; ~~XXXXXXXXXX~~ 23:44-49; ~~XXXX~~ 19:28-30)

33 दोफारी होण पै सारे देश म्ह अँधेरा छागया, अर तीन बजे ताहीं रहया।

34 तीन बजे यीशु नै बड़े जोर तै रुकके मारकै कह्या, “इलोई, इलोई, लमा शबक्तनी?” जिसका मतलब यो सै, “हे मेरे परमेसवर, हे मेरे परमेसवर, तन्नै मेरै ताहीं क्यातै छोड़ दिया?”

35 जो धोरै खड़े थे, उन म्ह तै कितन्याँ नै न्यू सुणकै कह्या, “लखाओ, वो एलिय्याह ताहीं बुलावै सै।”

36 अर एक नै भाजकै फोम ताहीं सिरके म्ह डबोया, अर सरकण्डे पै धरकै उस ताहीं चुसाया अर कह्या, “टैहर जाओ, देख्वां, एलिय्याह उस ताहीं उतारण खात्तर आवै सै के न्ही।”

37 फेर यीशु नै बड़े जोर तै किल्की मारकै जी दे दिया।

38 अर मन्दर का पड़दा उप्पर तै तळै ताहीं पाटके दो टुकड़े होगया।

39 जो सूबेदार उसके स्याम्ही खडचा था, जिव उस ताहीं इस ढाळ किल्की मारकै जी देन्दे देख्या, तो उसनै कह्या, “साच्चए यो माणस, परमेसवर का बेट्टा था।”

40 कई बिरबान्नी भी दूर तै देक्खै थी: उन म्ह मरियम मगदलीनी*, छोट्टे याकूब अर योसेस की माँ मरियम, अर सलोमी थी।

41 जिव यीशु गलील परदेस म्ह था, तो ये जनानियाँ जो यीशु की चेल्ली थी, वो उसकी सेवा-पाणी करया करै थी; अर घणखरी बिरबान्नी भी थी, जो उसके गेल्या यरुशलेम नगर तै आई थी।

(***** 27:57-61; ***** 23:50-56; **** 19:38-42)

42 यो आराम के दिन का एक दिन पैहले की तैयारी का दिन था, अर इब साँझ हो गयी थी।†

43 अरिमतिया गाम का बासिन्दा यूसुफ आया, जो बड्डी सभा का खास माणस था अर खुद भी परमेसवर के राज्य की बाट देक्खै था। वो हिम्मत करके पिलातुस के धारे गया अर यीशु की लाश माँगी।

44 पिलातुस नै हैरानी होई के वो इतनी तावळी मरगया, उसनै सूबेदार ताहीं बुलाके बुद्धया, “के उस ताहीं मरे होए वार होई सै?”

45 जिव उसनै सूबेदार के जरिये हालत जाण ली, तो लाश यूसुफ ताहीं दुवा दी।

46 फेर उसनै मलमल की एक चादर मोल ली, अर लाश ताहीं उतारके उस चादर म्ह लपेटा, अर एक कवर म्ह जो चट्टान म्ह खोद राक्खी थी धरया, अर कवर के वारणै पै एक पत्थर गिरड़ा दिया।

47 मरियम मगदलीनी‡ अर योसेस की माँ मरियम देक्खै थी के वो कित धरया गया सै।

16

(***** 28:1-8; ***** 24:1-12; **** 20:1-10)

1 जिव आराम का दिन बीतगया, तो मरियम मगदलीनी*, अर याकूब की माँ मरियम, अर सलोमी नै खसबूदार चीज मोल ली, ताके आके यीशु की लाश पै मळै।

2 हफते के पैहल्ले दिन तड़के ए तड़के सूरज लिकड़ाए था, वे कवर पै आई,

3 अर आप्स म्ह कहवै थी, “म्हारै खात्तर कवर के दरबाजे पै तै पत्थर कौण गिरड़ावैगा?”

4 जिव उननै कवर की ओड़ निगांह करी, तो देख्या के पत्थर गिरड़या होया सै! यो घणाए बड्डी था।

5 कवर के भीत्तर जाके उननै एक जवान ताहीं धोळे लत्ते पहेरे होड़ सोळी ओड़ बेट्टे देख्या, अर उननै घणी हैरान होई।

6 उसनै उनतै कह्या, “हैरान मतना होवो, थम यीशु नासरी! नै टोह्णो सो, जो कूरस पै चढ़ाया गया था, वो जिन्दा होगया सै, अर उरै कोनी; लखाओ, याए वा जगहां सै, जित्त उननै यीशु की लाश ताहीं धरया था।

7 पर थम जाओ, अर उसके चेल्यां अर पतरस ताहीं कहो के वो थारे तै पैहल्या गलील परदेस म्ह जावैगा। जिंसा के उसनै थारे तै कह्या था, थम ओड़ए उसनै देक्खोगे।”

8 अर वे लिकड़के कवर तै बाहर भाजगयी; क्यूँके वे काम्बगी अर उनके घबराट होगी थी; अर उननै किसे तै कुछ न्ही कह्या, क्यूँके वे डरे थी।

(***** 28:9-10; **** 20:11-18)


9 हफते के पैहल्ले दिन सबेर होन्दे यीशु जिन्दा होके पैहलम-पैहल्या मरियम मगदलीनी ताहीं जिंसा म्ह तै उसनै सात ओपरी आत्मा काड्डी थी, दिख्या।

10 उसनै जाके यीशु के साथियाँ ताहीं खबर दी, जो दुख म्ह डूबरे थे, अर रोवै थे।

* 15:40 15:40 मगदला गाम की मरियम † 15:42 15:42 (यो सब कुछ विश्रामदिन की तैयारी के एक दिन पैहले होया)

‡ 15:47 15:47 मगदला गाम की मरियम * 16:1 16:1 मगदला गाम की मरियम † 16:6 16:6 नासरत नगर का रहण आळा

लूका के जरिये लिख्या गया सुसमाचार



लूका के जरिये लिखे गये सुसमाचार नै यीशु ताहीं इस्राएली माणसां के खात्तर करे होए वादे का मुक्तिदाता अर सारे मानव जाति का उद्धारकर्ता, दोनुआ ए के तौर पै पेश करया सै। लूका लिखै सै के यीशु ताहीं “कंगालां ताहीं सुसमाचार सुणाण खात्तर” प्रभु की आत्मा नै बुलाया था। इसे कारण यो सुसमाचार कई तरियां की समस्या म्ह पड़े माणसां की चिन्ता तै भरा पड्या सै। लूका के जरिये लिखे गये सुसमाचार म्ह आनन्द के भाव की भी झलक देखै सै, खासकर शरुआती पाठां म्ह, जिन म्ह यीशु के आण की घोषणा करी गई सै, अर आखर म्ह भी जड़े यीशु के सुगं जाण का जिक्र सै। यीशु के सुगं जाणके बाद मसीह बिश्वास की बढ़ोतरी अर ब्यौरे का खुलासा इस्से लेखक के जरिये प्रेरितां के जरिये करे गए काम की किताब म्ह दिया सै। दुसरे अर छटे भाग म्ह भोत सी बात सिर्फ इसे सुसमाचार म्ह पाई जावै सै। मिसाल के तौर पै, यीशु, के जन्म पै सुगंदूत्तां का गीत, पाळीयाँ का यीशु ताहीं देखण जाणा, यरुशलेम नगर के मन्दर म्ह बाळक यीशु, दयालु सामरी अर उड़ाऊ बेट्टे की कहाँनी आदि। पूरे सुसमाचार म्ह प्रार्थना, पवित्र आत्मा, यीशु के जरिये माणसां की सेवा म्ह बिरबानियाँ की भूमिका, अर परमेसवर के जरिये पापां की माफी पै घणा ज्यादा जोर दिया सै।

रूप-रेखा

जानकारी 1:1-4

यूहन्ना बपतिस्मा देण आळा अर यीशु का जन्म अर बचपन 1:5-2:52

यूहन्ना बपतिस्मा देण आळे के जरिये माणसां की सेवा 3:1-20

यीशु का बपतिस्मा अर इम्तिहान 3:21-4:13

गलील परदेस म्ह यीशु के जरिये माणसां की सेवा 4:14-9:50

गलील परदेस तै यरुशलेम नगर ताहीं का सफर 9:51-19:27

यरुशलेम नगर म्ह आखरी हफता 19:28-23:56

प्रभु का जिन्दा हो जाणा, दिखाई देणा, अर सुगं म्ह जाणा 24:1-53



1 हे जनाब थियुफिलुस, घणखरयां माणसां नै म्हारै बिचाळे घटी बाततां का ब्यौरा लिखण की कोशिश करी सै।

2 शरुआत तै ए जो यीशु मसीह की सेवकाई म्ह साथ थे अर वे बाद म्ह वचन के सेवक बणगे, उननै ए आंखां देखी बात म्हारे ताहीं बताई।

3 इस करके हे जनाब थियुफिलुस, मन्ने भी यो ठीक लागया के उन सारी बाततां का सारा हाल शरु तै आच्छी दाहू परख के, उननै तेरे खात्तर क्रमानुसार* लिखूँ

4 के तू या जाण ले के वो बात जिनकी तन्नै शिक्षा पाई सै, वो सच्ची सै।



5 यहूदिया परदेस के राजा हेरोदेस के बखत म्ह अबिय्याह के टोळ म्ह जकरयाह नाम का एक याजक था, अर उसकी घरआळी का नाम एलीशिबा था, अर दोन्नु हारुन की पीढ़ी के थे।

6 वे दोन्नु परमेसवर के स्याम्ही धर्मी थे, अर प्रभु के सारे हुकम अर नियमां पै बेखोट चालण आळे थे।

7 पर उनके कोए भी ऊलाद कोनी थी, क्यूँके एलीशिबा बाँझ थी, अर वे दोन्नु ए बूढ़े थे।

* 1:3 1:3 क्रमानुसार-लंगपतार म्ह

8 एक दिन मन्दर म्ह जिब याजक के काम की बारी जकरयाह के टोळ की आई, तो वो परमेसवर के स्याम्ही पूजा करण खात्तर ओड़ै मौजूद था,

9 तो याजकां की रीत कै मुताबिक उसके नाम की चिट्ठी लिक्डी के प्रभु कै मन्दर म्ह जाके धूप जळावै।

10 धूप जळाण कै बखत माणसां की भीड़ बाहरणै आँगण म्ह प्रार्थना करै थी।

11 उस बखत प्रभु का एक सुगंदूत धूप की वेदी[†] कै सोळी ओड़ खड्या दिख्या।

12 जकरयाह देखकै घबराग्या अर घणा डरग्या।

13 पर सुगंदूत उसतै बोल्या, “हे जकरयाह, डरै ना, क्यूँके परमेसवर नै तेरी प्रार्थना सुणली सै, अर तेरी घरआळी एलीशिबा तेरे खात्तर एक बेट्टा जाम्मैगी, अर तू उसका नाम यूहन्ना धरिये।

14 वो तेरे ताहीं तो आनन्द अर खुशी देवैगा, साथ म्ह भोत-से माणस भी उसके जन्म तै राज्जी होवैगें।

15 क्यूँके वो प्रभु कै स्याम्ही घणा महान् होगा, अर उस ताहीं कदे भी मदिरा, नशीली चीज न्ही पीणी सै, अर अपणी माँ की कोख तै ए पवित्र आत्मा तै भर ज्यागा।

16 अर इस्राएल के भोत-से माणसां के मन प्रभु परमेसवर की ओड़ मोड़ देवैगा।

17 यूहन्ना एलिय्याह नबी की आत्मा अर सामर्थ म्ह भरा होगा, अर वो परमेसवर के राह नै तैयार करैगा, वो माँ-बाप का मन बाळकां की ओड़ मोड़ देवैगा। हुकम ना मानण आळे अधर्मियाँ की सोच नै धर्मियाँ की सोच म्ह बदल देवैगा।”

18 जकरयाह नै सुगंदूत तै बुझया, “इस बात का मै किस तरियां विश्वास करूँ? के यो म्हारे गैल होवैगा, क्यूँके मै तो बूढ़ा सूँ, अर मेरी घरआळी भी बूढ़ी होरी सै।”

19 सुगंदूत नै उसतै जवाब दिया, “मै जिब्राईल सूँ, जो परमेसवर के आगवै खड्या रहूँ सूँ, अर मै तेरे तै बात करण अर सुसमाचार देण खात्तर भेज्या सूँ।

20 अर देख जिब ताहीं ये बात पूरी ना हो लेंगी, तू गुँगा रहवैगा अर बोल न्ही पावैगा क्यूँके तन्ने मेरी बातों का विश्वास न्ही करया, जो अपने बखत पै पूरी होंगी।”


21 बाहर जकरयाह की बाट देखण आळे माणस अचम्भे म्ह पड़गे, कै उसनै मन्दर म्ह इतनी वार क्यूँ लागगी।

22 जिब वो बाहर आया, तो उन ताहीं बोल न्ही पाया आखर वो जाणगे कै उसनै मन्दर म्ह कोए दर्शन पाया सै, अर वो उन ताहीं इशारे करदा रह्या, अर गुँगा होग्या।

23 जिब उसकी याजकीय सेवा कै दिन पूरे होए, तो वो यरुशलेम नगर नै छोड़ अपने घरां चल्या गया।

24 कई दिनां पाच्छै उसकी घरआळी एलीशिबा गर्भवती होगयी, अर पाँच महिन्ने तैई अपने-आप ताहीं ल्हकोए राख्या,

25 उसनै अपने-आप तै कह्या, प्रभु नै इन दिनां म्ह दया की मेहर करकै मेरै खात्तर इसा करया सै, “के माणसां के बीच म्ह मेरा अपमान दूर हो।”



26 एलीशिबा के छटा महिन्ना चढ़ रह्या था, परमेसवर की ओड़ तै जिब्राईल सुगंदूत, गलील परदेस के नासरत नगर म्ह,

27 एक कुँवारी कै धारे भेज्या जिसकी सगाई यूसुफ नाम कै दाऊद कै घराने कै एक माणस तै होई थी, उस कुँवारी का नाम मरियम था।

28 जिब्राईल सुगंदूत नै उसके धारे आकै कह्या, “आनन्द अर जयजयकार तेरी हो तेरे पै ईश्वर का अनुग्रह होया सै! प्रभु तेरे गेल्या सै!”

† 1:11 वेदी-परमेसवर ताहीं भेट चढ़ाण खात्तर एक जगहां

29 मरियम या बात सुणकै भोत घबरा गयी, अर सोच म्ह पडगी कै इन बातों का के मतलब हो सके सै?

30 सुर्गदूत नै उसतै कहा, “हे मरियम, डरै ना, क्यूँके परमेश्वर का अनुग्रह तेरे पै होया सै।

31 अर देख, तू गर्भवती होगी, अर तेरे एक छोरा पैदा होगा, तू उसका नाम यीशु धरिये।

32 वो महान् होगा अर परमप्रधान का बेटा कुह्वावैगा, अर प्रभु परमेश्वर उसके पूर्वज दाऊद का सिंहासन उसनै देवैगा,

33 अर वो इस्राएल के घराने पै सदा राज करैगा, अर उसके राज्य का अंत न्ही होगा।”

34 मरियम नै सुर्गदूत तै कहा, “यो किस तरियां होगा। मै तो कुंवारी सूं।”

35 सुर्गदूत नै उस ताहीं जवाब दिया, “पवित्र आत्मा तेरे पै आवैगा अर परमप्रधान की सामर्थ तेरे पै छाया करैगी, इस खात्तर वो जो बाळक पैदा होण आळा सै, पवित्र अर परमेश्वर का बेटा कुह्वावैगा।

36 अर सुण, तेरी रिस्तेदार जो एलीशिबा सै उसके भी बुढ़ापे म्ह बेटा होण आळा सै, जो बाँझ कुह्वावै थी यो उसका, छटा महिन्ना सै।

37 क्यूँके परमेश्वर खात्तर कुछ भी मुश्किल कोनी सै।”

38 मरियम नै कहा, “देख, मै प्रभु की दास्सी सूं, मेरै तै तेरे कहैए वचन कै मुताबिक हो।” फेर सुर्गदूत उसके धौरै तै चल्या गया।

~~~~~

39 कई दिनों बाद मरियम ताळी तैयार होके पहाड़ी परदेस के यहूदा नगर म्ह गयी,

40 अर जकरयाह कै घर म्ह जाके एलीशिबा ताहीं नमस्कार करया।

41 ज्योए एलीशिबा नै मरियम का नमस्कार सुणया, त्योए बाळक उसके पेट म्ह उछळ्या, अर एलीशिबा पवित्र आत्मा तै भरगी।

42 अर उसनै ऊँची आवाज म्ह बोलकै कहा, “तू विरवानियाँ म्ह धन्य सै, अर तेरी कोख का फळ धन्य सै!

43 मै खुशनसीब सूं जो प्रभु की माँ मेरै धौरै मिलण खात्तर आई?

44 देख, ज्योए तेरे नमस्कार का बोल मेरै कान्ना म्ह पडचा, त्योए बाळक मेरै पेट म्ह खुशी तै उछळ पडचा।

45 धन्य सै तू क्यूँके तन्ने बिश्वास करया कै जो बात प्रभु नै तेरे ताहीं कही, वे पूरी होई!”

~~~~~

46 फेर मरियम नै कहा,

“मेरा जी प्रभु की बड़ाई करै सै

47 अर मेरी आत्मा मेरै उद्धार करण आळे परमेश्वर तै खुश होई;”

48 “क्यूँके उसनै अपणी दास्सी की लाचारी पै निगांह करी सै;‡

इस खात्तर देखो, इब तै सारे युग-युग कै माणस मन्ने धन्य कहवैगें;”

49 “क्यूँके उस शक्तिशाली नै मेरै खात्तर बड़े-बड़े काम करै सै। उसका नाम पवित्र सै;”

50 “अर उसकी दया उनपै, जो उसतै डरै सै, पीढ़ी तै पीढ़ी बणी रहवै सै।”

51 “उसनै अपणी शक्ति तै बड़े-बड़े काम करै सै, अर जो अपणे-आप म्ह घमण्ड करै थे, उन ताहीं तित्तर-बितर कर दिया।”

52 “उसनै शासकों ताहीं उनके सिंहासनों पै तै गिरा दिया, अर नमूर लोगगों ताहीं ऊँचा उठा दिया।”

53 “उसनै भूख्या ताहीं बढ़िया चिज्जों तै छिकाया सै, अर साहूकारों ताहीं खाल्ली हाथ भेज दिया।”

54 “उसनै अपणे सेवक इस्राएल ताहीं सम्भाल लिया, ताके अपणी उस दया नै याद करै;”

55 “जो उसनै अब्राहम अर उसकी पीढ़ी पै सदा खात्तर दया करण का वादा करया सै।”

56 मरियम करीब तीन महिन्ने उसके गेल्या रहकै उल्टी अपणे घरों चली गयी।

XXXXXXXXXXXXXXXXXXXX

57 फेर एलीशिबा के दिन पूरे होए अर उसने बेट्टा जाम्या ।

58 उसके पड़ोसी अर रिश्तेदारों नै या सुणके के प्रभु नै उसपै बड़ी दया करी सै, उसके गेल्या खुशी मनाई,

59 आठवे दिन वे बाळक का खतना करण ताहीं आये, अर उसका नाम उसके पिता के नाम पै जकरयाह धरणा चाहवै थे ।

60 इस पर उसकी माँ एलीशिबा नै जवाब दिया, “ना, इसका नाम यूहन्ना धरो ।”

61 उननै उस ताहीं कह्या, “तेरे रिश्तेदारा म्ह किसे का यो नाम न्ही सै!”

62 फेर उसके पिता तै इशारा करके पूच्छ्या के तू उसका नाम के धरणा चाहवै सै?

63 उसनै लिखण की पट्टी पै लिख दिया, “उसका नाम यूहन्ना सै,” अर सारा नै अचम्भा होया ।

64 फेर उसकी आवाज बोहड़ आई, अर वो बोल्लण अर परमेसवर का धन्यवाद करण लाग्या ।

65 उसके लोवै-धोरै के सब रहण आळे डरगे, अर उन सारी बातों की चर्चा यूहूदिया परदेस के सारे पहाड़ी देश म्ह फैलगी,

66 अर सब सुणण आळा नै अपणे-अपणे मन म्ह विचार करके कह्या, “यो बाळक किसा होगा?” क्यूँके प्रभु की शक्ति उसके साथ सै ।

XXXXXXXXXX XX XXXXXX XX-XX XXX

67 उसका पिता जकरयाह पवित्र आत्मा तै भरग्या, अर भविष्यवाणी करण लाग्या:

68 “प्रभु इस्राएल का परमेसवर धन्य सै, क्यूँके उसनै अपणे माणसां पै निगांह करी अर उनका उद्धार करया सै,

69 अर अपणे दास दाऊद के घराने म्ह म्हारै खात्तर एक शक्तिशाली उद्धारकर्ता ताहीं भेज्या सै,

70 (भोत पैहले प्रभु नै अपणे पवित्र नबियाँ के जरिये यो कह्या था)

71 के वो हमनै दुश्मनां तै बचावैगा अर मेरे तै नफरत करण आळे की ताकत तै भी हमनै बचावैगा ।

72 उसनै कह्या, के वो म्हारै पूर्वजां पै दया करैगा अर अपणे पवित्र करार नै याद राखवैगा,

73 अर वो करार जो उसनै म्हारै पूर्वज अब्राहम तै करया था,

74 उसनै वादा करया सै, के वो म्हारे दुश्मनां के हाथ तै हमनै छुड़ावैगा,

75 ताके जिन्दगी भर उसके आगूँ पवित्रता अर धार्मिकता तै बिना डरें उसकी सेवा कर सकां ।

76 हे मेरे बेट्टे, तू परमप्रधान का नबी कुह्वावैगा, क्यूँके तू प्रभु का रास्ता तयार करण के खात्तर आगूँ-आगूँ चाल्लैगा,

77 तू उसके माणसां नै उद्धार का ज्ञान देगा, जो पापां की माफी तै मिलै सै ।

78 यो म्हारे परमेसवर की उस बड़ी दया तै होगा । जिस तरियां सूरज चमके सै, उसी तरियां मसीहा भी सुर्ग तै म्हारे धोरै आवैगा

79 ताके अन्धेरे अर मौत की छाया म्ह बैठण आळा नै रोशनी दे, वा रोशनी सही राह पै चाल्लण म्ह म्हारी मदद करैगी ।”

80 अर बाळक यूहन्ना देह अर आत्मा म्ह मजबूत होन्दा गया, अर इस्राएल के माणसां पै जाहिर होण तै पैहले वो जंगल-बियाबान म्ह रह्या ।

2

XXXXXX XX XXXXX

(XXXXXXXX 1:18-25)

1 उन दिनां म्ह औगुस्तुस कैसर की कान्ही तै हुकम लिक्ड्या के, सारे रोमी साम्राज्य के माणसां की जनगणना करके उनके नाम लिक्खे जावै ।

2 (या पैहली नाम लिखाई उस बखत होई, जिव क्विरिनियुस सीरिया परदेस के इलाके का राज्यपाल था) ।

- 3 सारे माणस नाम लिखाण कै खात्तर अपणे-अपणे पुश्टैनी नगर म्ह गए ।
 4 आखर यूसुफ भी इस करकै के वो भी दाऊद कै कुणबे अर पीढी का था, गलील परदेस कै नासरत नगर तै गया, यहूदिया परदेस म्ह दाऊद कै बैतलहम नगर म्ह आया,
 5 ताके अपणी मंगेतर मरियम कै गेल्या जो गर्भवती थी, उस जनगणना म्ह नाम लिखावै ।
 6 उनकै बैतलहम नगर रहन्दे होए उसके जाम्मण के दिन पूरे होए,
 7 अर मरियम नै अपना जेट्टा छोरा जाम्या अर उस ताहीं लत्ते म्ह लपेटकै खोर म्ह धरया, क्यूँके उनकै खात्तर सराये म्ह जगहां कोनी थी ।

?????????????? ?? ?????? ?????????? ?????? ??????

- 8 अर उस देश म्ह कई पाळी थे, जो रात नै मदानां म्ह रहके अपणी भेड्डां के टोळ की रुखाळ करै थे ।
 9 अर उससे रात नै प्रभु का एक सुगंदूत उनकै धोरै आण खड्या होया, अर प्रभु का प्रताप उसकै उपपर चमक्या, अर वे घण डरगे ।
 10 सुगंदूत नै उनतै कह्या, “मतना डरो, क्यूँके देख्खों, मै थमनै घणी खुशी की खबर सुणाऊँ सूँ, जो सारे माणसां खात्तर होगी,
 11 आज दाऊद कै नगर बैतलहम म्ह थारे खात्तर एक उद्धारकर्ता जाम्या सै, अर योए मसीह प्रभु सै ।
 12 अर उसकी थारे खात्तर या निशान्नी होगी के थम एक बाळक नै लत्ते म्ह लिपट्या होइ अर खोर म्ह लेट्या होइ पाओगे ।”
 13 फेर चाणचक उस सुगंदूत गेल्या सुगंदूतां का एक टोळ परमेसवर की भगति करदे होए अर न्यू कहन्दे दिख्या,
 14 “अकास म्ह परमेसवर की महिमा अर धरती पे उन माणसां म्ह जिनतै वो राज्जी सै, शान्ति हो ।”
 15 जिव सुगंदूत उसकै धोरै तै सुगं म्ह चले गए, तो पाळीयां नै आप्पस म्ह कह्या, “आओ, हम बैतलहम नगर जाकै या बात जो होई सै, अर जो प्रभु नै म्हारै ताहीं बताई सै, देख्खां ।”
 16 अर उननै जिब्बे जाकै मरियम अर यूसुफ ताहीं अर खोर म्ह उस बाळक ताहीं लेट्या देख्या ।
 17 जिव पाळीयां नै बाळक ताहीं देख्या तो उननै वे सारी बात जो सुगंदूत नै इस बाळक कै बाबत उनतै कही थी, यूसुफ अर मरियम ताहीं बताई ।
 18 अर पाळीयां की ये बात सुणकै सारे सुणण आळा नै अचम्भा करया ।
 19 पर मरियम ये बात अपणे मन म्ह धरकै सोचदी रई ।
 20 अर जिसा पाळीयां ताहीं सुगंदूतां नै कह्या था, सब कुछ उसाए सुणकै अर देखकै, वे परमेसवर की महिमा अर जय-जयकार करदे होए बोहङगे ।

???? ?? ????? ?? ???????

- 21 जिव आठ दिन पूरे होए अर उसके खतने का बखत आया, तो उसका नाम यीशु धरया गया, अर यो नाम सुगंदूत के जरिये, मरियम के गर्भ म्ह आण तै पैहल्या बताया गया था ।

?????? ??? ????? ?? ???????

- 22 जिव मूसा नबी कै नियम-कायदा के मुताबिक मरियम अर यूसुफ कै सूंचे होण के दिन पूरे होए, तो वे दोन्नु यीशु नै यरुशलेम नगर के मन्दर म्ह लेगे के प्रभु कै स्थाप्ती ल्याए,
 23 (जिसा के प्रभु के नियम-कायदा म्ह लिख्या होइ सै: हरेक जेट्टा बेट्टा प्रभु कै खात्तर पवित्तर ठहरैगा ।)
 24 अर प्रभु कै नियम-कायदा कै वचन के मुताबिक “एक कबूतर या मोड्डी कै दो बच्चे ल्याकै बलि करै ।”

?????? ?? ???

25 उस बखत यरुशलेम नगर म्ह शमौन नाम का एक माणस था। वो धर्मी अर परमेसवर का भगत था, अर वो मसीह की बाट देखण लागरया था, ताके इस्राएल के माणसां नै शान्ति मिलै अर पवित्र आत्मा उसपै था।

26 अर पवित्र आत्मा के जरिये उसपै जाहिर होया था के जिव तक वो प्रभु के मसीह नै देख न्ही लेगा, जद ताहीं मौत नै कोनी देखवैगा।

27 शमौन आत्मा की अगुवाई तै मन्दर म्ह आया, अर जिव माँ-बाप उस बाळक यीशु ताहीं भीत्तर ल्याए, ताके उसके खात्तर नियम-कायदा के रिवाज के मुताबिक करै,

28 फेर उसने बाळक यीशु ताहीं अपणी गोद्दी म्ह लिया अर परमेसवर का धन्यवाद करके कह्या

29 “हे प्रभु माल्लिक, इब तू अपणे दास नै अपणे वचन के मुताबिक शान्ति तै इब मर जाणदे,

30 क्यूँके मेरी आँखां नै उद्धारकर्ता ताहीं देख लिया सै,

31 जिस ताहीं तन्नै सारे देशां के माणसां के स्याम्ही भेज्या सै,

32 ताके वो गैर यहूदियाँ ताहीं चाँदणा देण के खात्तर उजाळा, अर तेरे अपणे माणस इस्राएल की महिमा हो।”

33 यीशु के माँ-बाप इन बाततां तै, जो शमौन नै यीशु के बारे म्ह कही थी, सुणके अचम्भा करै थे।

34 फेर शमौन नै उन ताहीं आशीर्वाद देके, उसकी माँ मरियम तै कह्या, “देख, यो बाळक इस्राएल म्ह भोत-से माणसां के पतन अर उत्थान का कारण बणैगा, अर या निशान्नी के रूप म्ह परमेसवर की ओड़ तै भेज्या होया सै, अर भोत सारे लोग उसके विरुध बोल्लेगे।

35 इसका नतिज्जा यो होगा के भोत सारे मनां के विचार जाहिर हो जावेंगे, अर एक भोत बड़ा दुख तेरे पै आवैगा*।”

~~~~~

36 अशेर के गोत म्ह तै हन्नाह नामक फनूएल की बेट्टी एक नबी थी। वा घणी बूढ़ी थी, अर ब्याह होण के सात साल पाच्छे उसका धणी गुजर गया।

37 वा चौरासी साल तै विधवा थी: अर मन्दर म्ह जाणा कोनी छोड्या करै थी, पर ब्रत अर प्रार्थना कर-करके रात-दिन भगति करया करै थी।

38 जिव यूसुफ, मरियम अर बाळक यीशु, मन्दर म्ह थे, तो हन्नाह उनके धोरै आई अर परमेसवर का धन्यवाद करण लागी, अर उसने उन सारया ताहीं इस बाळक यीशु के बारे म्ह बताया, जो यरुशलेम के छुटकारे की बाट देखै थे।

~~~~~

39 यहूदी नियम-कायदा नै पूरा करण के बाद यूसुफ अर मरियम गलील परदेस के नासरत नगर म्ह अपणे घरां बोहड़ आये।

40 अर बाळक यीशु बढ़दा, अर मजबूत होन्दा, अर बुद्धि तै भरपूर होंदा गया, अर परमेसवर का अनुग्रह उसपै था।

~~~~~

41 यीशु के माँ-बाप हरक साल फसह के त्यौहार म्ह यरुशलेम जाया करै थे।

42 जिव यीशु बारहां साल का होया, तो वे त्यौहार की रीति के मुताबिक यरुशलेम नगर म्ह गए।

43 जिव यीशु के माँ-बाप त्यौहार मनाके अपणे घरां बोहड़ण लागरे थे, तो बाळक यीशु यरुशलेम म्ह रह गया, अर इसका उसके माँ-बाप नै कोनी बेरा था।

44 वे न्यू समझके के वो दुसरे मुसाफिरां के गेल्या होगा, एक दिन का सफर पार करगे: अर उस ताहीं अपणे कुण्बे आळा म्ह अर जाण-पिच्छाण आळा म्ह टोह्ल लागे।

45 पर जिव कोनी मिल्या, टोन्दे-टोन्दे यरुशलेम म्ह दुबारे बोहड़गे,

\* 2:35 2:35 अर एक भोत बड़ा दुख तेरे पै आवैगा अर एक तलवार तेरे दिल पै चाल्लैगी † 2:39 2:39 यहूदी प्रभु के

46 अर तीन दिन कै पाच्छै उननै वो मन्दर के आँगण म्ह उपदेशकां कै बिचाळै बेट्टे, उनकी सुणदे अर उनतै सवाल बुझते पाया ।

47 जितने उसकी सुणै थे, वे सारे उसकी समझ अर उसके जवाब तै हैरान थे ।

48 फेर उसके माँ-बाप उस ताहीं देखकै हैरान होए अर उसकी माँ नै उसतै कह्या, “हे बेट्टे, तन्नै म्हारै गेल्या इसा बरताव क्यातै करया? देख, तेरा बाप अर मै तन्नै ढूँढ-ढूँढके परेशान होरे थे?”

49 उसनै उनतै कह्या, “थम मन्नै क्यातै टोहो सो? के बेरा कोनी मन्नै मेरे पिता कै घरां होणा जरूरी सै?”

50 पर जो बात उसनै उनतै कही, उननै कोनी समझया ।

51 फेर वो उनकै गेल्या गया, अर नासरत म्ह आया, अर उनकै बस म्ह रह्या, अर उसकी माँ नै ये सारी बात अपणे मन म्ह राक्खी ।

52 अर यीशु समझ अर कद-काट्टी म्ह, अर परमेसवर अर माणसां कै अनुग्रह म्ह बढ़ा गया ।

### 3

\*\*\*\*\*  
(लूका 3:1-12; मत् 1:1-8; लूका 1:19-28)

1 जिव रोम साम्राज्य म्ह तिविरियुस कैसर राजा बण्या तो उसके पंद्रहवें साल म्ह जिव चौथाई देश म्ह पुन्तियुस पिलातुस यहूदिया परदेस का राज्यपाल था, अर हेरोदेस गलील परदेस म्ह इतूरैया अर त्रखोनितिस परदेस म्ह उसका भाई फिलिप्पुस राज करै था, अर अबिलेने परदेस म्ह लिसानियास राज करै था

2 अर जिव हन्ना अर कैफा महायाजक थे, उस बखत परमेसवर का वचन जंगल-बियाबान म्ह जकरयाह के बेट्टे यूहन्ना के धोरै पोंहच्या ।

3 यूहन्ना यरदन नदी के लोवै-धोवै के साब्ले परदेस म्ह जाकै, पापां की माफी का प्रचार करण लागग्या, के पाप करणा छोड़ द्यो अर बपतिस्मा ल्यो ।

4 जिसा यशायाह नबी के कहे होए वचनां की किताब म्ह लिख्या सै:

“जंगल-बियाबान म्ह एक रुक्के मारणीये का वचन होरया सै के, प्रभु की राही त्यार करो, उसकी सड़क सीध्नी बणाओ ।

5 हरेक घाटी भर दी जावैगी, अर हरेक पहाड़ अर टिल्ला तळै करया जावैगा, अर जो टेढ़ा सै सीध्ना, अर जो ऊँचा नीच्चा सै वो बरोब्बर राह बणैगा ।

6 अर हरेक माणस परमेसवर के उद्दार नै देखैगा ।”

7 जो भीड़ की भीड़ उसतै बपतिस्मा लेण नै लिकड़ के आवै थी, उनतै यूहन्ना कहवै था, “हे साँप के सप्पोलो जेसे माणसां, थारे तै कौण बताग्या के परमेसवर के आण आळै छो तै भागो ।

8 इस खात्तर जै थमनै सच म्ह पाप करणा छोड़ दिया सै तो यो दिखाण खात्तर भले काम तो करो, अर अपणे-अपणे मन म्ह न्यू मतना सोचो के हम अब्राहम के वंश तै सां, क्यूँके मै थमनै कहूँ सँ के परमेसवर इन पत्थरां तै भी अब्राहम के खात्तर ऊलाद पैदा कर सके सै ।

9 इब कुहाड़ा दरखतां की जड़ पै धरया सै, इस करके जो-जो दरखत बढ़िया फळ न्ही ल्यांदा, वो काट्या अर आग म्ह झोक्या जावैगा ।” इसका मतलब यो सै परमेसवर उन सारया नै दण्ड देवैगा जो पाप करणा न्ही छोड़ते ।

10 फेर माणसां नै उसतै बुझया, “तो हम परमेसवर के दण्ड तै बचण खात्तर के करा?”

11 उसनै जवाब दिया, “जिसके धोरै दो कुड़ते हों, वो उसकै गेल्या जिसके धोरै न्ही सै उसकै गैल बांड ल्यो अर जिसके धोरै खाणा हो, वो भी न्यूए करै ।”

12 चुंगी लेण आळै भी बपतिस्मा लेण आए, अर उसतै बुझया, “हे गुरु, हम के करा?”

13 उसनै उनतै कह्या, “ईमानदार रहों अर जितना रोमी सरकार नै कर\* तय करया सै, उसतै ज्यादा ना लियो ।”

\* 3:13 3:13 कर चुंगी

14 कुछ सिपाहियाँ नै भी उसतै बुझया, “हम के करा?” उसनै उनतै कह्या, “किसे पै जुल्म करके पईसे ना लियो, अर ना झूटा इल्जाम लाइयो, अर अपणी तन्खा पै संतोष करियो।”

15 जब माणस मसीहा की आस लगाये होए थे, अर सारे अपणे-अपणे मन म्ह यूहन्ना के बाबत विचार करे थे, के योगे मसीह तो न्ही सै।

16 तो यूहन्ना नै उन सारया तै कह्या, “मै तो थमनै पाणी तै बपतिस्मा दिथुँ सूँ, पर वो आण आळा सै, जो मेरै तै घणा शक्तिशाली सै, मै तो इस लायक भी कोनी के उसके जूत्याँ के फिते खोल सकूँ, वो थमनै पवित् आत्मा अर आग तै बपतिस्मा देवैगा।

17 उसका छाज, उसके हाथ म्ह सै, अर वो अपना खलिहाण आच्छी तरियां साफ करैगा, अर नाज नै अपणे कोठार (गोदाम) म्ह कट्टा करैगा, पर भुरळी ताहीं उस आग म्ह जळावैगा जो कदे बुझै कोनी।”

18 आखर वो घणीए शिक्षा दे-देके माणसां तै सुसमाचार सुणान्दा रह्या।

19 पर जब उसनै चौथाई देश म्ह गलील परदेस के राजा हेरोदेस तै उसके भाई फिलिप्पुस की घर आळी हेरोदियास के बाबत अर सारे बुरे काम्मां के बाबत जो उसनै करे थे, उल्हाणा दिया,

20 तो हेरोदेस नै उन सारया तै बढ़के यो बुरा काम भी करया के यूहन्ना ताहीं जेळ म्ह गेर दिया।

☞☞☞ ☞☞ ☞☞☞☞☞☞

(☞☞☞☞ 3:13-17; ☞☞ 1:9-11)

21 जब सारे माणसां नै बपतिस्मा लिया अर यीशु भी बपतिस्मा लेके प्रार्थना कर रह्या था, तो अकास खुलग्या,

22 अर पवित् आत्मा शारीरिक रूप म्ह कबूतर की तरियां उसपै उतरया, अर परमेसवर सुर्ग म्ह तै बोल्या “तू मेरा प्यारा बेट्टा सै, मै तेरतै राज्जी सूँ।”

☞☞☞ ☞☞ ☞☞☞☞☞☞

(☞☞☞☞ 1:1-17)

23 जब यीशु खुद उपदेश देण लागग्या, तो करीबन तीस साल की उम्र का था अर (जिसा समझा जावै सै) यीशु यूसुफ का बेट्टा था, अर यूसुफ एली का बेट्टा था,

24 अर एली मत्तात का बेट्टा था, अर मत्तात लेवी का बेट्टा था, अर लेवी मलकी का बेट्टा था, अर मलकी यन्ना का बेट्टा था, अर यन्ना यूसुफ का बेट्टा था,

25 अर यूसुफ मत्तित्याह का बेट्टा था, अर मत्तित्याह आमोस का बेट्टा था, अर आमोस नहूम का बेट्टा था, अर नहूम असल्याह का बेट्टा था, अर असल्याह नोगह का बेट्टा था,

26 अर नोगह मात का बेट्टा था, अर मात मत्तित्याह का बेट्टा था, अर मत्तित्याह शिमी का बेट्टा था, अर शिमी योसेख का बेट्टा था, अर योसेख योदाह का बेट्टा था,

27 अर योदाह यूहन्ना का बेट्टा था, अर यूहन्ना रेसा का बेट्टा था, अर रेसा जरुब्बाविल का बेट्टा था, अर जरुब्बाविल शालतियेल का बेट्टा था, अर शालतियेल नेरी का बेट्टा था,

28 अर नेरी मलकी का बेट्टा था, अर मलकी अद्दी का बेट्टा था, अर अद्दी कोसाम का बेट्टा था, अर कोसाम इलमोदाम का बेट्टा था, अर इलमोदाम एर का बेट्टा था,

29 अर एर येशू का बेट्टा था, अर येशू इलाजार का बेट्टा था, अर इलाजार योरीम का बेट्टा था, अर योरीम मत्तात का बेट्टा था, अर मत्तात लेवी का बेट्टा था,

30 अर लेवी शमौन का बेट्टा था, अर शमौन यहूदा का बेट्टा था, अर यहूदा यूसुफ का बेट्टा था, अर यूसुफ योनान का बेट्टा था, अर योनान इलयाकीम का बेट्टा था,

31 अर इलयाकीम मलेआह का बेट्टा था, अर मलेआह मिन्नाह का बेट्टा था, अर मिन्नाह मत्तात का बेट्टा था, अर मत्तात नातान का बेट्टा था, अर नातान दाऊद का बेट्टा था,

32 अर दाऊद यिश्शै का बेट्टा था, अर यिश्शै ओवेद का बेट्टा था, अर ओवेद बोआज का बेट्टा था, अर बोआज सलमोन का बेट्टा था, अर सलमोन नहशोन का बेट्टा था,



33 अर नहशोन अम्मीनादाब का बेट्टा था, अर अम्मीनादाब अरनी का बेट्टा था, अर अरनी हिस्रोन का बेट्टा था, अर हिस्रोन फिरिस का बेट्टा था, अर फिरिस यहूदा का बेट्टा था,

34 अर यहूदा याकूब का बेट्टा था, अर याकूब इसहाक का बेट्टा था, अर इसहाक अब्राहम का बेट्टा था, अर अब्राहम तिरह का बेट्टा था, अर तिरह नाहोर का बेट्टा था,

35 अर नाहोर सरूग का बेट्टा था, अर सरूग रऊ का बेट्टा था, अर रऊ फिलिग का बेट्टा था, अर फिलिग एबिर का बेट्टा था, अर एबिर शिलह का बेट्टा था,

36 अर शिलह केनान का बेट्टा था, अर केनान अरफक्षद का बेट्टा था, अर अरफक्षद शेम का बेट्टा था, अर शेम नूह का बेट्टा था, अर नूह लिमिक का बेट्टा था,

37 अर लिमिक मथूशिलह का बेट्टा था, अर मथूशिलह हनोक का बेट्टा था, अर हनोक यिरिद का बेट्टा था, अर यिरिद महललेल का बेट्टा था, अर महललेल केनान का बेट्टा था,

38 अर केनान एनोश का बेट्टा था, अर एनोश शेत का बेट्टा था, अर शेत आदम का बेट्टा था, अर आदम परमेसवर का बेट्टा था।

## 4

???? ? ? ???????

(????? 4:1-11; ? 1:12-13)

1 फेर यीशु पवित्र आत्मा तै भरया होया, यरदन नदी तै बोहड़या, अर चाळीस दिन ताहीं पवित्र आत्मा कै सिखाण तै जंगल-बियाबान म्ह हाण्डदा रहया,

2 उन चाळीस दिनां म्ह शैतान उस ताहीं परखता रहया। उन दिनां म्ह उसनै कुछ न्ही खाया, अर जिब वे दिन पूरे होए, तो उसनै भूख लागगी।

3 फेर शैतान नै उसतै कह्या, “जै तू परमेसवर का बेट्टा सै, तो साबित करदे, अर इस पत्थर तै कह, के रोट्टी बण जावै, ताके तू इननै खा सकै।”

4 यीशु नै उस ताहीं जवाब दिया, “पवित्र ग्रन्थ म्ह लिख्या सै: भाणस सिर्फ रोट्टी तै जिन्दा कोनी रहन्दा।”

5 फेर शैतान\* उसनै घणे ऊँच्चे पहाड़ पै लेगया अर उस ताहीं माड़ी वार म्ह दुनिया के राज्य दिखाए,

6 अर उसतै बोल्या, “मै यो सारा हक, अर उसकी शानों-शोकत तन्नै दियुंगा, क्यूँके वो मेरैतै सौंप्या गया सै: अर जिसनै चाहूँ उसनै दे दियुं सूं।

7 इस करके जै तू मेरी भगति करै, तो यो सब कुछ तेरा हो ज्यागा।”

8 यीशु नै उस ताहीं जवाब दिया, “लिख्या सै: ‘तू प्रभु अपने परमेसवर की भगति कर, अर सिर्फ उससे की भगति कर।’”

9 फेर उसने उस ताहीं पवित्र नगर यरुशलेम म्ह ले जाके मन्दर की चोट्टी पै खड्या करया अर उसतै बोल्या, “जै तू परमेसवर का बेट्टा सै, तो अपने-आपने उरै तै तळे गेर दे अर अपने-आपने साबित करदे।”

10 “क्यूँके पवित्र ग्रन्थ म्ह लिख्या सै: ‘वो तेरे बाबत अपने सुगुदूतां नै हुकम देवैगा, के वे तेरी रुखाळी करै,’”

11 “अर वे तन्नै हाथों-हाथ उठा लेवैगें, इसा ना हो के तेरे पायां म्ह पत्थर तै ठेस लागौ।”

12 यीशु नै उस ताहीं जवाब दिया, “पवित्र ग्रन्थ म्ह यो भी लिख्या सै: ‘तू प्रभु अपने परमेसवर नै ना परखै।’”

13 जिब शैतान उस ताहीं परख कै हार लिया, तो कुछ बखत खातर उसकै धौरै तै चल्या गया।

????? ? ? ???????

(????? 4:12-17; ? 1:14-15)

\* 4:5 4:5 (इबलीस)

14 फेर यीशु पवित्र आत्मा की सामर्थ तै भरया होइ गलील परदेस बोहड़या, अर उसकी चर्चा लोवै-धोवै के सारे देशां म्ह फैलगी।

15 वो उनके आराधनालयों म्ह उपदेश सुणान्दा रह्या, अर सारे उसकी बड़ाई करै थे।

\*\*\*\*\*  
(\*\*\*\*\* 13:53-58; \*\* 6:1-6)

16 फेर यीशु नासरत नगर म्ह आया, जड़े पाळा-पोस्या गया था, अर अपनी रीति कै मुताबिक आराम कै दिन आराधनालय म्ह जाके पवित्रग्रन्थ पढ़ण के खात्तर खड्या होया।

17 यशायाह नबी की किताब उस ताहीं दी गई, अर उसने किताब खोल के, वा जगहां लिकाड़ी जड़े लिख्या था:

18 “प्रभु का आत्मा मेरै पै सै,

इस करके के उसने कंगालां ताहीं सुसमाचार

सुणान के खात्तर मेरा अभिषेक करया सै,

अर मेरै ताहीं इस करके भेज्या सै के कैदियां नै छुड़ाण का

अर आंध्यां नै देखण जोगगा बणाण की खुशी की खबर का प्रचार करूँ

अर कुचले होया नै छुड़ाऊँ,

19 अर प्रभु कै राज्जी रहण कै साल का प्रचार करूँ।”

20 फेर यीशु नै किताब बन्द करके सेवक के हाथ्यां म्ह दे दी अर बैठग्या, अर आराधनालय के सारे माणसां की निगांह उसपै थी।

21 फेर वो उनतै कहण लागग्या, “आज ए यो पवित्र ग्रन्थ म्ह लिख्या होइ वचन थारे स्याम्ही पूरा होया।”

22 सारया नै उस ताहीं सराहया, अर जो अनुग्रह की बात उसके मुँह तै लिकड़े थी, उनतै हैरान होए, अर कहण लागगे, “के यो यूसुफ का छोरा कोनी?”

23 उसने उनतै कहा, “थम मेरै पै या कहावत जरूर कहोगे के हे वैद्य, खुद नै ठीक कर! जो कुछ हमने सुण्या के कफरनहूम नगर म्ह करया गया सै, उसने उरै खुद के नगर म्ह भी कर।”

24 अर उसने कहा, “मे थमने सच-सच कहूँ सू कोए नबी अपने गाम म्ह आदर-मान कोनी पान्दा।

25 मेरी सुणो, के एलियाह नबी कै दिनां म्ह जब साढ़े तीन साल ताहीं अकास तै बारिस न्ही होई, उरै ताहीं के सारे देश म्ह बड़ड़ा अकाळ पड्या, तो इस्राएल देश म्ह घणीए बिधवा थी।

26 पर एलियाह उन म्ह तै किसे कै धोरै कोनी भेज्या गया, सिर्फ सैदा परदेस कै सारफत नगर म्ह एक बिधवा कै धोरै।

27 अर एलीशा नबी कै बखत इस्राएल देश म्ह घणे कोढ़ी थे, पर सीरिया परदेस का सेनापति नामान नामक कोढ़ी नै छोड़के उन म्ह तै कोए शुद्ध कोनी करया गया।”

28 ये बात सुणद-ए जितने आराधनालय म्ह थे, सारया कै छो उठग्या,

29 अर उठके उस ताहीं नगर तै बाहरणै लिकाड्या, अर जिस पहाड़ पै उनका नगर बसरया था, उसकी चोट्टी पै ले चाल्ले, ताके उसने उड़ै तै तळै गेरके मार दें।

30 पर यीशु उनके बिचाळै तै लिकड़के चल्या गया।

\*\*\*\*\*  
(\*\* 1:21-28)

31 फेर वो गलील परदेस कै कफरनहूम नगर म्ह गया, अर आराम कै दिन माणसां ताहीं उपदेश देवै था।

32 वे उसके उपदेश तै हैरान होगे क्यूँके उसका वचन हक सुधां था।

33 आराधनालय म्ह एक माणस था, जिस म्ह ओपरी आत्मा थी, उसने जोर तै किल्की मारी,

34 “हे नासरत के यीशु, हमनै तेरे तै के काम? के तू म्हाारा नाश करण नै आया सै? मै तन्नै जाणु सूं, तू कौण सै? तू परमेसवर की ओड़ तै भेज्या होया पवित्र मसीह सै!”

35 यीशु नै उसतै धमकाकै कह्या, “चुपचाप रहै, अर इस माणस म्ह तै लिकड़ जा!” फेर ओपरी आत्मा उसनै बिचाळै पटककै बिना नुकसान करे उस म्ह तै लिकड़गी

36 इसपै सारे हैरान होए, अर वे आप्स म्ह बतळाण लागगे, “यो किसा वचन सै? क्यूँके वो हक अर सामर्थ के गेल्या ओपरी आत्मायाँ नै हुकम देवै सै, अर वे लिकड़ जावै सै।”

37 इस करकै चौगरदे नै हरेक जगहां उसका जिक्र होण लाग्या।

????? ???? ???? ???? ???? ???? ???? ???? ???? ????  
(????? 8:14-17; ???? 1:29-34)

38 यीशु आराधनालय म्ह तै उठकै शमौन कै घरां गया। शमौन की सास्सू कै बुखार चढ़रया था, अर उननै उस खात्तर उसतै बिनती करी।

39 उसनै उसके धौरै खड्या होके बुखार ताहीं धमकाया अर बुखार उतर गया, अर वो जिब्बे उठकै उनकी सेवा-पाणी करण लागगी।

40 सूरज डूबदे बखत, जिन-जिनकै उरै माणस कई ढाळ की बिमारियाँ म्ह पड़े होए थे, वे सारे उननै उसके धौरै ल्याए, अर उसनै एक-एक पै हाथ धरकै उन ताहीं ठीक करया।

41 अर ओपरी आत्मा भी किल्ली मारदी अर न्यू कहन्दी होई के, “तू परमेसवर का बेट्टा सै” घणखरया म्ह तै लिकड़गी। पर वो उननै धमकांदा अर वोल्तण न्ही देवै था, क्यूँके वे जाणै थी के यीशु ए परमेसवर की ओड़ तै भेज्या होया मसीह सै।

???????????? ???? ???? ???? ????  
(???? 1:35-39)

42 जिव सबेरै होई तो यीशु लिकड़कै एक बियाबान जगहां म्ह गया, अर भीड़ की भीड़ उसनै टोहन्दी होई उसके धौरै आई, अर उसनै रोकण लागगी के वो उनके धौरै तै न्ही जावै।

43 पर उसनै उनतै कह्या, “मन्नै दुसरे नगरां म्ह भी परमेसवर के राज्य का सुसमाचार सुणाणा जरूरी सै, क्यूँके मै इसे खात्तर भेज्या गया सूं।”

44 अर वो गलील परदेस के आराधनालयाँ म्ह उपदेश सुणान्दा रह्या।

## 5

?????? ???? ???? ???? ????  
(????? 4:18-22; ???? 1:16-20)

1 जिव यीशु गन्नेसरत की झील\* कै किनारे पै खड्या था, तो भीड़ परमेसवर का वचन सुणण कै खात्तर उस ताहीं घेरे खड़ी थी, तो इसा होया

2 के उसनै झील कै किनारे दो किस्ती लागगी होड़ देक्खी, अर मछुआरे उनपै तै उतरकै मच्छियाँ के जाळ नै धोवै थे।

3 उन किस्तियाँ म्ह तै एक पै, जो शमौन की थी, चढ़कै यीशु नै उसतै बिनती करी के किनारे तै माड़ा सा डिगा ले चाल्ले। फेर वो किस्ती पै बैठकै माणसां नै उपदेश देण लागग्या।

4 जिव यीशु नै माणसां तै ये बात कर ली, तो शमौन तै बोल्या, “डुंघ्ये म्ह ले चाल, अर मच्छी पकड़ण खात्तर अपना जाळ गेर।”

5 शमौन नै उसतै जवाब दिया, “हे गुरु, हमनै सारी रात मेहनत करी अर कुछ न्ही मिल्या, फेरभी तेरे कहण तै जाळ गरूंगा।”

6 जिव पतरस अर उसके साथियाँ नै इसा करया, तो घणी मच्छी घेर ल्याए, अर उनके जाळ पाट्टण नै होण लागगे।

7 इस करके उननै दुसरी किस्ती म्ह बेटठे अपने साथियाँ ताहीं भी इशारा करकै मदद खात्तर बुलाया, वे आ गये अर उननै आकै दोन्नु किस्ती उरै ताहीं भर ली के डूबण लागगी।

\* 5:1 5:1 गलील समुन्दर

8 न्यू देखकै शमौन पतरस यीशु के पायां म्ह पड़गया, अर बोल्या, “हे प्रभु, मेरै धोरै तै जा, क्यूँके मै पापी माणस सूं!”

9 क्यूँके इतनी मच्छियाँ के पकड़े जाण तै उसनै अर उसके साथियाँ नै घणा अचम्भा होया,

10 अर उससे तरियां जब्दी के बेटे याकूब अर यूहन्ना नै भी, जो शमौन के दुसरे साथी थे, अचम्भा होया। फेर यीशु नै शमौन तै कह्या, “मतना डरो, इब तै मै थमनै माणसां ताहीं कट्टे करण आळे बणाऊंगा ताके वो मेरे चेल्लें बणे।”

11 अर वे किस्तियाँ नै किनारे पै लियाए अर वे जिब्बे सब कुछ छोड़के उसके चेल्लें बणण खात्तर उसके पाच्छे हो लिये।।

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂ ⓂⓂⓂ ⓂⓂⓂⓂ

(ⓂⓂⓂⓂⓂ 8:1-4; ⓂⓂ 1:40-45)

12 जिव वो किसे नगर म्ह था, तो उडै कोढ़ तै भरया होया एक माणस आया, अर उसनै यीशु ताहीं देखकै अर मोब्धा पड़कै बिनती करी, “हे प्रभु, जै तू चाहवै तो मन्नै ठीक कर सकै सै।”

13 उसनै हाथ बढ़ाकै उस ताहीं छुया अर बोल्या, “मै चाहूँ सूं, तू इस बीमारी तै ठीक हो ज्या।” अर उसका कोढ़ जिब्बे जान्दा रह्या।

14 फेर उसनै उस ताहीं समझाकै कह्या, “किसे तै ना कहिए, पर जाकै अपणे-आपने याजक ताहीं दिखा, अर अपणे कोढ़ तै ठीक होण के बारै म्ह जो कुछ मूसा नबी नै जो पवित्र ग्रन्थ म्ह चढ़ावा बताया सै उसनै चढ़ा, के माणसां खात्तर या गवाही हो, के तू ठीक होगया सै।”

15 पर यीशु का जिक्र हरेक जगहां फैल्दा गया, अर भीड़ की भीड़ उसकी सुणण के खात्तर अर अपणी बिमारियाँ तै ठीक होण के खात्तर कट्टी होई।

16 पर वो सुनसान जगहां म्ह न्यारा जाकै प्रार्थना करया करै था।

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂ ⓂⓂⓂ ⓂⓂⓂⓂ

17 एक दिन इसा होया के यीशु उपदेश देण लागरया था अर ठीक करण खात्तर प्रभु की सामर्थ उसके गेल्या थी, अर फरीसी अर शास्त्री उडैए बेट्टे थे, जो गलील अर यहूदिया परदेस के हरेक गाम अर यरुशलेम नगर तै आए थे।

18 उस बखत कई माणस एक माणस नै जो लकवे का बीमार था, खाट पै ल्याए, अर वे उसनै भीत्तर ले जाण अर यीशु के स्याम्ही धरण का जुगाड़ टोह्ल लागरे थे।

19 पर जिव भीड़ के कारण उसनै भीत्तर कोनी ले जा सके तो उननै छात पै चढ़कै अर टाट्टी हटाकै, उस ताहीं बिस्तर समेत बिचाळै यीशु के स्याम्ही उतार दिया।

20 उसनै उनका बिश्वास देखकै उसतै बोल्या, “हे भाई, मन्नै तेरे पाप माफ कर दिये।”

21 फेर शास्त्री अर फरीसी बहस करण लागगे, “यो कौण सै जो परमेसवर की बुराई करै सै? परमेसवर नै छोड़ और कौण पाप माफ कर सकै सै?”

22 यीशु नै उनके मन की बात जाणकै, उनतै कह्या, “थम अपणे मन म्ह क्यूँ विवाद करण लागरे सो की मै परमेसवर की बुराई करूँ सूं?”

23 आसान के सै? के यो कहणा के ‘तेरे पाप माफ होए’, या यो कहणा के ‘उठ अर हाँड-फिर’?

24 पर इस करकै के थम जाणो, के मुझ माणस के बेट्टे नै धरती पै पाप माफ करण का भी हक सै।” उसनै उस लकवे के मरीज तै कह्या, “मै तेरे तै कहूँ सूं के अपणे बिस्तर टाकै अपणे घरां चल्या जा।”

25 वो जिब्बे उनके स्याम्ही उठचा, अर जिस खाट पै पडचा था उसनै टाकै, परमेसवर की बड़ाई करदा होया अपणे घरां चल्या गया।

26 फेर सारे हैरान होए अर परमेसवर की बड़ाई करण लागगे अर घणे डरकै बोल्ते, “आज हमनै अनोक्खी बात देखी सै।”

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂ

27 इसके बाद यीशु बाहरणै गया अर लेवी नाम के एक चुंगी लेण आळे ताहीं चौकी पै बेट्टे देख्या, अर उसतै बोल्या, “मेरा चेल्ला बणण खात्तर मेरै पाच्छै हो ले।”

28 फेर वो सारा कुछ छोड़कै उसके पाच्छै हो लिया।

29 फेर लेवी नै अपणे घरां उसके खात्तर बड़ड़ा जिम्मण का न्योदा दिया, अर चुंगी लेण आळे अर दुसरे माणसां की जो उसके गेल्या खाणा खाण नै बेट्टे थे, एक बड़डी भीड़ थी।

30 इसपै फरीसी अर उनके शास्त्री उसके चेल्यां तै न्यू कहकै बिरड़ाण लागगे, “थम चुंगी लेण आळे अर जिननै लोग पापी कहवै सै, उनके गेल्या खाओ-पीओ सो?”

~~~~~

31 यीशु नै उनतै जवाब दिया, “वेद आच्छे-बिच्छयां खात्तर कोनी, पर बिमारां खात्तर जरूरी सै।”

32 मै धर्मियां नै न्ही, पर पापियां नै मन पलटन के खात्तर बुलाण आया सूं।”

33 उननै उसतै कह्या, “यूहन्ना के चेल्लें तो बराबर ब्रत अर प्रार्थना करया करै सै अर उससे तरियां फरीसियां के चेल्लें भी, पर तेरे चेल्लें तो खावै-पीवै सै।”

34 यीशु नै उनतै कह्या, “के थम बरातियां तै, जिब्वताहीं बन्दड़ा उनके गेल्या रहवें, ब्रत करा सको सो?”

~~~~~

35 “पर वे दिन भी आवेंगें, जिब बन्दड़ा न्यारा करया जावैगा, फेर वे उन दिनां म्ह ब्रत करैगें।”

36 यीशु नै एक और उदाहरण दिया, “कोए माणस नये लत्यां म्ह तै पाड़कै पुराणे लत्यां पै थेगळी न्ही लगान्दा, न्ही तो नया पाट ज्यागा अर वा थेगळी पुराणे पै मेळ भी न्ही खावैगी।

37 अर कोए नया अंगूर का रस पुराणी मशक म्ह न्ही भरदा, न्ही तो नया अंगूर का रस पुराणी मशकां नै पाड़कै बह ज्यागा, अर मशक फूट ज्या सै।

38 पर नया अंगूर का रस नई मशकां म्ह भरणा चाहिए।

39 कोए माणस पुराणा अंगूर का रस पीकै नया अंगूर का रस कोनी चाहन्दा क्यूँके वो कहवै सै, के पुराणा-ए बढ़िया सै।”

## 6

~~~~~

1 फेर आराम के दिन यीशु चेल्यां के गैल खेत्तां म्ह तै होके जाण लागरया था, अर उसके चेल्लें गेहूँ की बालें तोड़-तोड़कै अर हाथ्यां तै मसळ-मसळ के खाण लागरे थे।

2 फेर फरीसियां म्ह तै कुछ कहण लागगे, “थम यो काम क्यातै करो सो जो आराम के दिन करणा ठीक कोनी?”

3 यीशु नै उनतै जवाब दिया, “के थमनै पवित्र ग्रन्थ म्ह यो न्ही पढ़या के दाऊद नै, जिब वो अर उसके साथी भूक्खे थे तो के करया?”

4 वो किस तरियां परमेसवर के घर म्ह गया, अर भेंट की रोटी खाई, जिनका खाणा याजकां नै छोड़ और किसे खात्तर ठीक कोनी, अर अपणे साथियां ताहीं भी दी?”

5 अर उसने उनतै कह्या, “मै माणस का बेट्टा आराम के दिन का भी प्रभु सूं।”

~~~~~

6 इसा होया के किसे और आराम के दिन वो आराधनालय म्ह जाके उपदेश देण लागया, अर उड़ै एक माणस था जिसका सोळा हाथ सूखरया था।

7 शास्त्री अर फरीसी यीशु पै दोष लाण के मौक्के की टाह म्ह थे के देखै वो आराम के दिन ठीक करै सै के न्ही।

8 पर वो उनकी सोच जाणै था, इस करके उसनै सूखे हाथ आळे माणस कह्या, “उठ, बिचाळै खड्या होज्या।” वो उठ खड्या होया।

9 यीशु ने उनतै कहा, “मै थारे तै बुझ्नु सूं के मूसा के नियम-कायदा के मुताबिक आराम के दिन के ठीक सै, भला करणा या बुरा करणा, जान बचाणा या नाश करणा?”

10 फेर उसनै चोगरदेनै उन सारया कान्ही देखकै उस सूखे हाथ आळे माणस तै बोल्या, “अपणा हाथ बढ़ा!” उसनै न्यूए करया, अर उसका हाथ दुबारा ठीक होगया।

11 पर वे फरीसी अर शास्त्री आप्पे तै बाहर होकै आप्पस म्ह बहस करण लागगे के हम यीशु के गैल के करा?

~~~~~

12 उन दिनां म्ह यीशु पहाड़ पै प्रार्थना करण लागगया, अर परमेसवर तै प्रार्थना करण म्ह सारी रात बिताई।

13 ज़िब दिन लिकइया तो उसनै अपणे चेल्यां ताहीं बुलाकै उन म्ह तै बारहां छाँट लिए, अर उन ताहीं प्रेरित कहा,

14 अर वे ये सै: शमौन जिसका नाम उसनै पतरस भी धरया, अर उसका भाई अन्दरयास, अर याकूब, अर यूहन्ना, अर फिलिप्पुस, अर बरतुल्मै,

15 अर मत्ती, अर थोमा, अर हलफई का बेट्टा याकूब, अर शमौन जो जेलोतेस* कुह्वावै सै,

16 अर याकूब का बेट्टा यहूदा, अर यहूदा इस्करियोती जो उसका पकड़वाण आळा बणया।

~~~~~

17 फेर यीशु उनके गेल्या उतरके चौरस जगहां म्ह खड्या होया, अर उसके चेल्यां की बड्डी भीड़, अर सारे यहूदिया परदेस अर यरुशलैम नगर, सूर अर सैदा नगर के समुन्दर कै किनारे तै घणे माणस,

18 जो उसकी सुणण अर अपणी विमारियाँ तै चंगे होण खात्तर उसके धोरै आए थे, उडै थे, अर ओपरी आत्मा तै सताए होए भी ठीक करे जावै थे।

19 सारे उसनै छूणा चाहवै थे, क्यूँके उस म्ह तै सामर्थ लिकइके सारया नै ठीक करै थी।

~~~~~

20 फेर यीशु नै अपणे चेल्यां कान्ही देखकै कहा, “धन्य सो थम जो दीन सो, क्यूँके परमेसवर का राज्य थारा सै।”

21 धन्य सो थम जो इब भूखे सो, क्यूँके थम परमेसवर के जरिये छिकाए जाओगे। धन्य सो थम जो इब रोओ सो, क्यूँके हांसोगे।

22 धन्य सो थम ज़िब मुझ माणस कै बेट्टे के बाबत माणस थारे तै बैर करैगें, अर थमनै लिकाइ देवैगें, अर थारी बुराई करैगें, अर थारा नाम बुरा जाणकै काट देवैगें।

23 उस दिन आनन्द तै उछळियो, क्यूँके लखाओ, थारे खात्तर सुर्ग म्ह बड्ड़ा ईनाम सै, उनके पूर्वजां नै भी नबियाँ के गेल्या भी इसाए करया करै थे।

24 पर धिक्कार सै थारे पै! जो साहूकार सो, क्यूँके थमनै अपणे सारे सुख भोग चुके सों।

25 धिक्कार सै थारे पै! जो छिकरे सो, क्यूँके भूखे होओगे। धिक्कार सै थारे पै! जो इब हाँस्सो सो, क्यूँके थम बिलख-बिलख के रोओगे।

26 “धिक्कार सै थारे पै! ज़िब सारे माणस थारे ताहीं आच्छा कहवै, क्यूँके थारे पूर्वज भी झूट्टे नबियाँ के गेल्या भी इसाए करै थे।”

~~~~~

27 “पर मै थम सुणण आळा तै कहूं सूं, के अपणे बैरियाँ तै प्यार राखो, जो थारे तै बैर करै, उनका भला करो।

28 जो थमनै श्राप देवै, उननै आशीष दो, जो थारी बेजती करै, उनकै खात्तर प्रार्थना करो।

29 जो तेरे एक गाल पै थपपड़ मारै उसकी ओड़ दुसरा भी फेर दे, अर जो तेरी धोत्ती खोस ले, उसनै कुड़ता लेण तै भी मना मत करो।

\* 6:15 6:15 एक कट्टर पंथी राजनैतिक दल का नाम था जिसका वो सदस्य था

30 जो कोए तेरे तै माँगौ, उसनै दे, अर जो तेरी चीज खोस ले, उसतै माँगौ ना।

31 जिसा थम चाहो सो के माणस थारे गेल्या करै, थम भी उनकै गेल्या उसाए करो।”

32 “जै थम अपणे प्यार करण आळा तै ए प्यार करो, तो उसका के फायदा? क्यूँके पापी भी अपणे प्यार करण आळा कै गेल्या प्यार करै सै।

33 जै थम अपणे भलाई करण आळा ए गेल्या भलाई करो सों, तो थारी के बड़ाई? क्यूँके पापी भी इसाए करै सै।

34 जै थम उननै ए उधार द्यो सो जिनतै थमनै दुबारै मिल जाण की आस हो सै, तो कौण सी बड़ी बात सै? क्यूँके पापी, पापियाँ नै उधार देवै सै, के उतनाए दुबारै पावै।

35 बल्के अपणे बैरी तै प्यार करो, अर भलाई करो, अर दुबारै मिलण की उम्मीद राखकै उधार ना द्यो, तो थारे खात्तर बड़ड़ा ईनाम होवैगा, अर थम परमप्रधान की ऊलाद मान्ने जाओगे, क्यूँके परमेश्वर का धन्यवाद ना करण आळा अर बुरे माणस पै भी दया करै सै।

36 जिसा थारा पिता दयालु सै, उससे ए ढाळ थम भी दयालु बणो।”

☞☞☞☞☞☞

37 “दोष ना लाओ, तो थारे पै भी दोष न्ही लगाया जावैगा। कसूरवार ना ठहराओ, तो थमनै भी कोए कसूरवार कोनी ठहरावैगा। माफ कर द्यो, तो थम भी माफ करे जाओगे।

38 दूरया करो तो थारे ताहीं भी दिया जावैगा। माणस पूरा नाप दबा दबाकै अर हला-हलाकै अर उभरदा होया थारी गोद्री म्ह घाल्लैगें, क्यूँके जिस नाप तै थम नाप्यो सों, उससे नाप तै थारे खात्तर भी नाप्या जावैगा।”

39 फेर उसनै उनतै एक उदाहरण कह्या, “के आन्धा, आन्धे नै राह बता सकै सै? के दोन्नु खड्डे म्ह कोनी गिरैगें?”

40 चेल्ला अपणे गुरु तै बड़ड़ा न्ही, पर जो कोए आच्छा सीखा होगा, वो अपणे गुरु के ढाळ होगा।

41 “तू क्यूँ अपणे भाई की आँख कै तिनकै जिसी छोट्टी सी बुराई नै देख्ये सै, अर अपणी आँख म्ह लठ जिसी बड़ी बुराई तन्नै कोनी दिखदी?”

42 जब तू अपणी ए आँख का लठ कोनी देख्दा, तो अपणे भाई तै किस तरियां कह सकै सै, “हे भाई, आ मै तेरी आँख म्ह तै तिनका लिकाड़ द्यु?” हे कपटी, पैहल्या अपणी जीवन की बुराई दूर कर फेर तू अपणे भाई नै आच्छी दाऊँ बुराई तै बचा संकेगा।

☞☞☞☞☞☞☞☞☞☞

43 “कोए आच्छा दरखत कोनी जो बेकार फळ ल्यावै, अर ना तो कोए बेकार दरखत सै जो आच्छा फळ ल्यावै।

44 हरेक दरखत अपणे फळ तै पिच्छाणा जावै सै, क्यूँके माणस झाड़ियाँ तै अंजीर कोनी तोड़दे अर ना बड़बेरी तै अंगूर।

45 भला माणस अपणे मन के भले भण्डार तै भली बात लिकाड़े सै, अर बुरा माणस अपणे मन के बुरे भण्डार तै बुराई की बात लिकाड़े सै, क्यूँके जो मन म्ह भरया सै वोए उसकी जुवान पै आवै सै।”

☞☞☞☞☞☞☞☞☞☞

46 “जब थम मेरा कहणा न्ही मान्दे तो क्यातै मान्ने हे परभु, हे परभु” कहो सो?

47 जो कोए मेरे धरै आवै सै अर मेरी बातान नै सुणकै उननै मान्ने सै, मै थमनै बताऊँ सूँ के वो किसकी तरियां सै:

48 वो उस माणस की ढाळ सै, जिसनै घर बणादे बखत धरती डून्धी खोदकै चट्टान पर नीम बणाई, अर जब बाढ़ आई तो धारा उस घर पै लागगी पर उसनै हला न्ही सकी, क्यूँके वो पक्का बणरया था।

49 पर जो सुणकै कोनी मान्दा वो उस माणस की ढाळ सै, जिसनै माट्टी पै बिना नीम घर बणाया, जब उसपै धारा लागगी तो वो जिब्बे पड़गया अर पड़के उसका सत्यानाश होगया।”





22 अर उसनै उनतै कह्या, “जो कुछ धमनै देख्या अर सुण्या सै, जाकै यूहन्ना ताहीं कह द्यो, के आन्धे देख्वैं सै, लंगड़े चाल्लै-फिरै सै, कोढ़ी शुद्ध करे जावै सै, बहरे सुणै सै, मुर्दे जिन्दे करे जावै सै, अर कंगालां ताहीं सुसमाचार सुणाया जावै सै।

23 धन्य सै वे जो मेरै पै शक न्ही करते, अर बिश्वास करणा न्ही छोड़दे।”

24 जिव यूहन्ना के भेज्जे होइ माणस चले गये तो यीशु यूहन्ना के बारे म्ह माणसां तै कहण लागग्या, “थम जंगल-बियाबान म्ह के देखण गये थे? के हवा म्ह हाल्दे होए सरकंडे नै?”

25 तो फेर थम बण म्ह के देखण गये थे? के कोमल लत्ते पहरे होए माणस नै? लखाओ, जो चमकदे लत्ते पहरे अर असो-आराम म्ह रहवैं सै, वे राजघरां म्ह रहवैं सै।

26 तो फेर थम बण म्ह के देखण गये थे? के किसे नबी नै? हाँ, मै थमनै कहूँ सूं, बल्के नबी तै भी बड़े नै।

27 यो वोए सै, जिसकै बारे म्ह लिख्या सै: लखा, “मै अपने दूत नै तेरे आगगै-आगगै भेज्जू सूं, जो तेरे आगगै तेरी राही सीध्दी करैगा।”

28 “मै थमनै कहूँ सूं के जो बिरबानियाँ तै जणे सै, उन म्ह तै यूहन्ना बपतिस्मा देणआळे तै बड़इा कोए न्ही पर जो परमेसवर के राज्य म्ह छोड़टे तै छोड़टा सै, वो उसतै भी बड़इा सै।”

29 फेर हरेक किसे नै, जै ताहीं के चुंगी लेण आळे माणसां नै भी यूहन्ना की बात सुणके उसतै बपतिस्मा लेकै यो मान लिया के परमेसवर ए धर्मी सै।

30 पर फरीसियाँ अर शास्त्रियाँ नै यूहन्ना तै बपतिस्मा कोनी लेकै परमेसवर के मनसां ताहीं अपने बारे म्ह टाळ दिया।

31 “पर मे इस युग के माणसां की बराबरी किसतै करूँ के वे किसकी ढाळ सै?”

32 वे उन बाळकां की ढाळ सै जो बजारां म्ह बेट्टे होए एक-दुसरे तै रुकके मारके शिकायत करै सै, हमनै थोरे खात्तर बाँसली बजाई, अर थम कोनी नाच्चे, हमनै बिलाप करया, अर थम कोनी रोए!

33 क्यूँके यूहन्ना बपतिस्मा देण आळा ना रोटी खाया होया करदा अर ना अंगूर का रस पिया होया करदा, अर थम कहो सो, उस म्ह ओपरी आत्मा सै।

34 मुझ माणस के बेट्टे का खाण-पान और माणसां की तरियां साहा ए सै, लखाओ, थमनै मेरे ताहीं पेट्टू अर पियक्कड़ माणस, चुंगी लेणिये का अर पापियां का साथी घोषित कर दिया।

35 पर ज्ञान अपने काम्मां म्ह सच्चा ठहराया गया सै।

*~~~~~*

36 फेर किसे फरीसी नै उसतै बिनतो करी के वो उसके गेल्या खाणा खावै, आखर वो उस फरीसी के घरां जाके खाणा खाण बेठचा।

37 उस नगर की एक पापण\* बिरबान्नी न्यू जाणकै के यीशु फरीसी के घर म्ह खाणा खाण बेठचा सै, संगमरमर के बरतन म्ह महंगा खसबूदार तेल ल्याई,

38 अर उसके पायां के धौरे, पाच्छे खड़ी होकै, रोदी होई उसके पायां नै आसूआं तै भेण लागगी अर अपने सिर के बाळां तै पड़ण लागगी, अर उसके पायां नै बार-बार चूमके उनपै महंगा खसबूदार तेल मळ्या।

39 न्यू देखके शमौन फरीसी जिसनै यीशु ताहीं बुलाया था, अपने मन म्ह सोचचण लागग्या, “जै यो नबी होन्दा तो जाण जान्दा के या जो उसनै छूण लागरी सै, वा कौण अर किसी बिरबान्नी सै, क्यूँके वा तो पापण सै।”

40 यीशु नै उसके मन के विचार जाणके उस ताहीं उदाहरण म्ह कह्या, “हे शमौन, मननै तेरे तै कुछ कहणा सै।” वो बोल्या, “हे गुरु, कह।”

41 यीशु नै एक और उदाहरण दिया, “किसे साहूकार के दो देणदार थे, एक पाँच सौ अर दुसरा पचास दीनार (50 दिन की मजदूरी) का देणदार था।

\* 7:37 बेथ्या या किसे साथ गलत सम्बन्ध हो, बुरे चाल-चलण आळी

42 जब उनके धोरे चुकाण नै कुछ न्ही रह्या तो उसनै दोनुआ का कर्ज माफ कर दिया। इस करके उन दोन्नु माणसां म्ह तै कौण उसतै घणा प्यार राक्खैगा?"

43 शमौन नै जवाब दिया, "मेरी समझ म्ह वो माणस, जिसका घणा कर्जा माफ होया।" यीशु नै उसतै कह्या, "तन्नै ठीक कह्या सै।"

44 अर उस बिरबान्नी कान्ही पलटके उसनै शमौन तै कह्या, "तन्नै देख्या सै के इस बिरबान्नी नै के करया सै? मै तेरे घरां आया पर तन्नै मेरे पैर धोण नै पाणी भी कोनी दिया, पर इसनै मेरे पैर आंसुआँ तै भेये अर अपणे बाळां तै पूजे।

45 तन्नै मेरे ताहीं चुम्या<sup>†</sup> न्ही, पर जब तै मै आया सूं जिब्बे तै इसनै मेरे पायां ताहीं चुमना न्ही छोड्या।

46 तन्नै मेरे सिर पै तेल कोनी मळ्या, पर इसनै मेरे पायां पै इतर मळ्या सै।

47 इस करके मै तन्नै कहूँ सूं के इसनै कई पाप करे थे, जो माफ होगे, क्यूँके इसनै मेरे तै घणा प्यार करया सै, पर जिसका पाप कम माफ होया सै, वो कम प्यार करै था।"

48 अर उसनै बिरबान्नी तै कह्या, "तेरे पाप माफ होए।"

49 फेर जो माणस उसके गेल्या खाणा खाण नै बेटुटे थे, वे अपणे-अपणे मन म्ह सोच्चण लागे, "यो के परमेसवर सै, जो पापां नै भी माफ कर सकै सै?"

50 पर उसनै उस बिरबान्नी ताहीं कह्या, "परमेसवर नै तेरे ताहीं बचाया सै, क्यूँके तन्नै मेरे पै बिश्वास करया सै, खुश होकै चली जा।"

## 8

### उदाहरण १

1 इसके बाद यीशु नगर-नगर अर गाम-गाम्मां म्ह प्रचार करदा होया, अर परमेसवर के राज्य का सुसमाचार सुणादा होया हाडण लाग्या, अर वे बारहां चेल्लेँ उसके गेल्या थे,

2 अर कुछ बिरबान्नी भी थी जो ओपरी आत्मायाँ तै अर बिमारियाँ तै छुटाई गई थी, अर वे ये सै: \*मरियम जो मगदलीनी कुह्वावे थी, जिसम्ह तै सात ओपरी आत्मा लिकड़ी थी,

3 अर हेरोदेस राजा के भण्डारी खुजा की घरआळी योअन्ना, अर सूसन्नाह, अर घणखरी दुसरी बिरबान्नी। ये अपणे धन तै यीशु अर उसके चेल्यां की सेवा-पाणी करै थी।

### उदाहरण २

4 जब बड्डी भोड़ कट्टी हाई अर नगर-नगर के माणस उसके धोरे चालके आवे थे, तो उसनै उदाहरण म्ह कह्या

5 "एक किसान बीज बोण लिकड्या। बोदे होए कुछ बीज राही के किनारे पड़े, अर रोंद्या गया, अर अकास के पंछियाँ नै उस ताहीं चुग लिया।

6 कुछ बीज चट्टान पै पड्या, अर जामग्या, पर नमी ना मिलण के कारण सूख गया।

7 कुछ झाड़ियाँ के बिचाळे पड्या, अर झाड़ियाँ नै गेलै-गेलै बढके उस ताहीं दबा लिया।

8 कुछ आच्छी धरती पै पड्या, अर उगके सौ गुणा फळ ल्याया।" न्यू कहके वो जोर तै बोल्या, "जिसके कान हो वो ध्यान तै सुण ले।"

### उदाहरण ३

9 उसके चेल्यां नै उसते बुद्धिया के इस उदाहरण का के मतलब सै?

10 उसनै कह्या, "थारे ताहीं परमेसवर के राज्य के भेद की समझ दे राक्खी सै, पर औरां नै उदाहरणां म्ह सुणाया जावे सै, इस करके के वे देखे होए भी कोनी देखै, अर सुणदे होए भी कोनी समझै।"

### उदाहरण ४

11 उदाहरण का मतलब यो सै: बीज परमेसवर का वचन सै

† 7:45 7:45 चुमना-यहूदी संस्कृति के मुताबिक स्वागत करण \* 8:2 8:2 मगदला गाम की मरियम

12 राही के किनारे के वे सै, जिन नै सुण्या, फेर शैतान आके उनके मन म्ह तै वचन टा ले जावै सै के कदे इसा ना हो के वे बिश्वास करके उद्धार पावै।

13 चट्टान पै के वे सै, के ज़िब सुणै सै, तो खुश होके वचन नै अपणावै सै, पर जड़ कोनी पकड़दे वे माड़ी वार ताहीं बिश्वास राखै सै अर मुसीबत के बखत बहक जावै सै।

14 जो झाड़ियाँ म्ह पड्या, यो वे सै जो सुणै सै, पर आगै जाके फिकूर, अर धन, अर जिन्दगी के ऐसो-आराम म्ह फँस जावै सै अर उनका फळ कोनी पकदा।

15 पर आच्छी धरती के वे सै, जो वचन सुणके भले अर आच्छे मन तै साम्ये राखै सै, अर धीरज तै फळ ल्यावै सै।

???? ??

16 “कोए दीवा जळा के बरतन तै कोनी ढकदा, अर ना खाट तळै धरै सै, पर टांडी पै धरै सै ताके भीत्तर आण आळे नै चाँदणा मिलै।

17 कुछ लुहक्या कोनी जो दिखाया कोनी जावै, अर ना किमे लुहक्या सै जिसका बेरा न्ही पटे।

18 ज्यातै चौक्कस रहो के थम किस तरियां सुणो सो? क्यूँके जिसके धरै सै उसतै दिया जावैगा, अर जिसके धरै न्ही सै उसतै वो भी ले लिया जावैगा, जिसनै वो अपणा समझै सै।”

???? ??

19 यीशु की माँ अर उसके भाई उसके धरै आए, पर भीड़ के कारण उसतै मिल न्ही सके

20 उसतै कहा गया, “तेरी माँ अर तेरे भाई बाहरणै खड़े होए, तेरे तै मिलणा चाहवै सै।”

21 यीशु नै इसके जवाब म्ह उनतै कहा, “मेरी माँ अर मेरे भाई येए सै, जो परमेसवर का वचन सुणे अर मान्नै सै।”

???? ???? ???? ???? ???? ???? ??

22 फेर एक दिन वो अर उसके चेल्ले किस्ती पै चढ़े, अर उसनै उनतै कहा, “आओ, समुन्दर के परली ओड़ चाल्लां।” आखर उननै किस्ती खोल दी।

23 पर ज़िब किस्ती चालरी थी, तो वो सोग्या अर समुन्दर पै आँधी आगी, अर किस्ती पाणी तै भरण लागगी अर वे खतरे म्ह थे।

24 फेर उननै धरै आके उस ताहीं जगाया, अर कहा, “हे माल्लिक! हे माल्लिक! हम डूबके मरण आळे सां।” फेर उसनै उठके आँधी ताहीं अर पाणी की झाल्लां ताहीं धमकाया अर वे थमगे अर शान्ति होई।

25 फेर उसनै उनतै कहा, “थारा बिश्वास किन्त था?” पर वे डरगे अर हैरान होके आप्स म्ह कहण लागे, “यो कौण सै जो आँधी अर पाणी नै भी हुकम देवै सै, अर वे उसकी मान्नै सै?”

?? ???? ???? ???? ???? ???? ???? ???? ???? ??

26 फेर वे गिरासनिया के देश म्ह पोहच, जो उस पार गलील समुन्दर के स्याम्ही सै।

27 ज़िब वो किनारे पै उतरया तो उस नगर का एक माणस उसतै मिल्या जिसम्ह ओपरी आत्मा थी। वो घणे दिनां तै उघाड़ा था अर ना घरां रहवै था बल्के कब्रिस्तान म्ह रह्या करै था।

28 वो यीशु नै देखके जोर तै किल्की मारके उसके स्याम्ही पड़के जोर तै बोल्या, “हे परमप्रधान परमेसवर के बेटे यीशु! मन्नै तेरे तै के काम? मै तेरे तै बिनती करूँ सूँ, मन्नै काल ना करै।”

29 क्यूँके वो उस ओपरी आत्मा ताहीं उस माणस म्ह तै लिकड़ण का हुकम देवै था, इस करके के वो उसपै बार-बार हावी होवै थी। ऊतो माणस उसनै साँकळां अर बेलां तै जुड़ै थे फेरभी वो बन्धनां नै तोड़ देवै था, अर ओपरी आत्मा उसनै बण म्ह भजाए फिरे थी।

30 यीशु नै उसतै बुझ्या, “तेरा के नाम सै?” उसनै कहा, “सेना,” क्यूँके घणीए ओपरी आत्मा उस म्ह रहवै थी।

31 उननै यीशु बिनती करी के हमनै अथाह कुण्ड म्ह जाण का हुकम ना देवै।

32 उड़ै पहाड़ पै सूअरां का एक बड़ड़ा टोळ चरै था, इस करके उननै उसतै बिनती करी के हमनै उन म्ह बैठणे दे। उसनै उन ताहीं जाण दिया।

33 फेर ओपरी आत्मा उस माणस म्ह तै लिकड़कै सूअरां म्ह जा पड़ी अर वो टोळ ढळान पै तै झपटकै गलील समुन्दर म्ह जा पड्या अर डूब मरया ।

34 पाळी यो जो होया था देखकै भाज्ये, अर नगर म्ह अर गाम्मां म्ह जाकै उसकी खबर दी ।

35 माणस जो होया था उसनै देखण नै लिकड़े, अर यीशु कै धोरै आकै जिस माणस तै ओपरी आत्मा लिकड़ी थी, उसनै यीशु के पायां कै धोरै लत्ते पहर अर सोध्दी म्ह बेट्टे देखकै डरगे,

36 अर देखण आळा नै उन ताहीं बताया के वो ओपरी आत्मायाँ का काल करया होइ माणस किस तरियां ठीक होया ।

37 फेर गिरासेनियों कै लोवै-धोवै के सारे माणसां नै यीशु तै बिनती करी के म्हारै उरै तै चल्या जा, क्यूँके वे घणे डरगे थे । आखर म्ह वो किस्ती पै चढकै बोहड़ आया ।

38 जिस माणस म्ह ओपरी आत्मा लिकड़ी थी वो उसतै बिनती करण लागया के मन्नै अपणे गेल्या रहण दे, पर यीशु नै उस ताहीं बिदा करकै कहा,

39 “अपणे घरां बोहड़ जा अर माणसां तै बता के परमेसवर नै तेरे खात्तर किसे बड़े-बड़े काम करे से ।” वो जाके सारे नगर म्ह प्रचार करण लागया के यीशु नै मेरै खात्तर किसे बड़े-बड़े काम करे ।

~~~~~

40 जिव यीशु बोहड़या तो माणस उसतै राज्जी होके मिले, क्यूँके वे सारे उसकी बाट देखै थे ।

41 इतनै म्ह याईर नाम का एक माणस आया, जो आराधनालय का सरदार था, अर यीशु कै पायां म्ह पड़कै उसतै बिनती करण लागग्या के मेरै घरां चाल,

42 क्यूँके उसकी बारहां साल की एकलौती बेट्टी थी, अर वा मरण नै होरी थी । जिव वो जाण लागरया था, जद माणस उसपै पड़ण लागरे थे ।

43 एक बिरबान्नी नै जिसकै बारहां साल तै लहू बहण की बीमारी थी, अर जो अपणी सारी कमाई डाक्टरां कै पाच्छे बरतगी थी, फेरभी किसे कै हाथ तै चंगी कोनी हो सकी थी,

44 पाच्छे तै आकै उसकै लत्ते ताहीं छुया, अर जिब्बे उसका लहू बहणा बन्द होगा ।

45 इसपै यीशु नै कहा, “मेरैताहीं किसनै छुया?” जिव सारे नाट्टण लागगे, तो पतरस अर उसके साथियाँ नै कहा, “हे माल्लिक, तन्नै तो भीड़ दबाण लागरी सै अर तेरे पै पड़ण लागरी सै ।”

46 पर यीशु नै कहा, “किसे नै मेरै ताहीं छुआ सै, क्यूँके मन्नै बेरा पाटग्या के मेरै म्ह तै सामर्थ लिकड़ी सै ।”

47 जिव बिरबान्नी नै देख्या के मै लुहक कोनी सकदी, फेर काम्बदी होई आई अर उसकै पायां पै पड़कै सारे माणसां कै स्याम्ही बताया के उसनै किस कारण उस ताहीं छुया, अर किस तरियां जिब्बे चंगी होई ।

48 उसनै उसतै कहा, “बेट्टी, तेरे बिश्वास नै तेरे ताहीं ठीक करया सै, खुशी-खुशी चली जा ।”

49 वो न्यू कहवै था के किसे नै आराधनालय कै सरदार याईर कै उरै तै आके कहा, “तेरी छोरी मर ली सै: गुरु नै काल ना करै ।”

50 यीशु नै न्यू सुणकै उसतै जवाब दिया, “मतना डरै, सिर्फ बिश्वास राख, तो वा बच जावैगी ।”

51 घर म्ह आकै उसनै पतरस, यूहन्ना, याकूब, अर छोरी के माँ-बाप नै छोड़ दुसरे किसे नै अपणे गेल्या भीत्तर कोनी आण दिया ।

52 सारे उसकै बाबत रोण-पिट्टण लागरे थे, पर उसनै कहा, “रोओ मतना, वा मरी कोनी पर सोवै सै ।”

53 वे न्यू जाणकै के वा मरगी सै उसका मजाक उड़ाण लागये ।

54 पर उसनै उसका हाथ पकड्या, अर रुक्का मारकै कहा, “हे छोरी, उठ !”

55 फेर उसका जी बोहड़ आया अर वा जिब्बे उठ बेट्टी । फेर उसनै हुकम दिया के उसनै कुछ खाण नै द्यो ।

56 उसकै माँ-बाप हैरान होए, पर उसनै उन ताहीं चिताया के यो जो होया सै किसे तै ना कहियो ।

9

XXXXXXXXXXXXXXXXXX XX XXXXXXXX XXXXX

- 1 फेर उसने अपणे बारहां चेल्यां ताहीं बुलाके उननै सारी ओपरी आत्मायाँ अर बिमारियाँ ताहीं दूर करण की सामर्थ अर हक दिया,
- 2 अर उननै परमेसवर कै राज्य का प्रचार करण अर बिमारां ताहीं आच्छा करण खात्तर भेज्या ।
- 3 उसनै उनतै कह्या, “राह खात्तर कुछ ना लियो, ना तो लाट्टी, ना झोळी, ना रोट्टी, ना रपिये अर ना दो-दो कुड़ते ।
- 4 जिस किसे घर म्ह उतरो, उड़ैए रहो, अर उड़ैए तै बिदा होइयो ।
- 5 जो कोए थमनै न्ही अपणावै, उस नगर तै जान्दे होए अपणे पायां की धूळ झाड़ दियो के उनपै गवाही होवै ।”
- 6 आखर म्ह वे लिकड़के गाम-गाम सुसमाचार सुणान्दे, अर हरेक माणसां नै ठीक करदे होए हांडदे रहे ।

XXXXXXXXXX XX XXXXX

- 7 चौथाई देश के गलील परदेस का राजा हेरोदेस यो सारा सुणके घबराग्या, क्यूँके कईयाँ नै कह्या, के यूहन्ना मरे होया म्ह तै जिन्दा होया सै,
- 8 अर कईयाँ नै न्यू कह्या के एलिय्याह दिख्या सै, अर औरां नै न्यू के पुराणे नबियाँ म्ह तै कोए जिन्दा होया सै ।
- 9 पर हेरोदेस नै कह्या, “यूहन्ना का तो मन्नै सिर कटवाया, इव यो कौण सै जिसके बावत इसी बात सुणु सु?” अर उसनै उस ताहीं देखण की चाहन्ना करी ।

XXXXX XXXX XXXXXXXX XXXXX XXXXXXXX

- 10 फेर प्रेरितां नै बोहड़के जो कुछ उननै करया था, उस ताहीं बता दिया, अर वो उननै न्यारे करके बैतसैदा नामक नगर म्ह लेग्या ।
- 11 न्यू जाणके भीड़ उसके पाच्छे हो ली, अर वो राजजी होके उनतै मिल्या, अर उनतै परमेसवर के राज्य की बात करण लाग्या, अर जो चंगे होणा चाहवै थे उन ताहीं ठीक करया ।
- 12 जिव दिन छिपण लाग्या तो बारहां नै आके उसतै कह्या, “भीड़ नै जाणदे के चौगरदे के गाम्मां अर बस्तियाँ म्ह जाके ठहरै अर खाणे का जुगाड़ करै, क्यूँके हम उरै बियावान जगहां म्ह सां ।”
- 13 यीशु नै उनतै कह्या, “थमे उननै खाण नै द्यो ।” उननै कह्या, “म्हारै धौरै पाँच रोट्टी अर दो मच्छियाँ नै छोड़के और कुछ कोनी, पर हाँ, जै हम जाके इन सारया खात्तर खाणा मोल ल्यावां, फेर हो सकै सै ।” वे माणस तो पाँच हजार माणसां कै करीबन थे ।
- 14 फेर उसनै अपणे चेल्यां तै कह्या, “उननै पचास-पचास करके लैणपतार म्ह बिठा द्यो ।”
- 15 उननै न्यूए करया, अर सारया ताहीं बिठा दिया ।
- 16 फेर यीशु नै वे पाँच रोट्टी अर दो मच्छियाँ ली, सुगं कान्ही लखाके परमेसवर का धन्यवाद करया, अर रोट्टी तोड़-तोड़के चेल्यां ताहीं देंदा गया के माणसां ताहीं बाँडे ।
- 17 फेर सारे खाके छिकगे, अर चेल्यां नै बचे होड़ टुकड्या तै भरी होई बारहां टोकरी ठाई ।

XXXXX XX XXXXX XXXXXXX XXXXX XXXXXXXX XXXXX

- 18 जिव वो एक्ले म्ह प्रार्थना करे था अर चेल्लेँ उसके गेल्या थे, तो उसनै उनतै बुद्धिया, “माणस मन्नै के कहवै सै?”
- 19 उननै जवाब दिया, “यूहन्ना बपतिस्मा देण आळा, अर कोए एलिय्याह, अर कोए यो के पुराणे नबियाँ म्ह तै कोए जिन्दा होया सै ।”
- 20 उसनै उनतै बुद्धिया, “पर थम मन्नै के कहो सो?” पतरस नै जवाब दिया, “परमेसवर का मसीह ।”
- 21 फेर उसनै उनतै चिताके कह्या के यो किसे तै ना कहियो ।।

२२ फेर उसने कहा, "मुझ माणस के बेटे खातर जरूरी से के मे घणा दुख ठाऊँ, अर यहूदी अगुवें,

प्रधान याजक अर शास्त्री मनै तुच्छ समझके मार देवे, अर मै तीसरे दिन जिन्दा हो जाऊँगा।"

२३ उसने सारया तै कहा, "जो कोए मेरे मेरा चेल्ला बणणा चाहवै, वो अपनी ए इच्छा पूरी ना

करै बल्के हरेक दिन अपने दुखां का करूस ठाके, मेरे पाच्छे हो लेवे।

२४ क्यूँके जो कोए अपनी जान बचाणा चाहवैगा वो उसने खोवैगा, पर जो कोए मेरी खातर अपनी जान खोवैगा वोए उसने बचावैगा।

२५ जै माणस सारी दुनिया नै पा लेवै अर अपनी जान खो दे या उसका नुकसान ठावै, तो उसने के फायदा?

२६ जो कोए मेरे तै अर मेरी बाततां तै सरमावैगा, मै माणस का बेटा भी, जिव अपनी अर अपने पिता की अर पवितर सुगंदतां की महिमा सुधां आऊँगा, तो उसतै सरमावैगा।

२७ "मै थमनै साच्ची कहूँ सँ, के जो याडै खड़े से, उन म्ह तै कुछ इसे से के जिव ताहीं परमेसवर का राज्य ना देख लेवें, जद ताहीं मौत उननै कदे छू भी न्ही पावैगी।"

२८ इन बाततां के कोए आठ दिनां पाच्छे, वो पतरस, यूहन्ना अर याकूब नै गेल्या लेके प्रार्थना

करण खातर पहाड़ पै गया।

२९ जिव वो प्रार्थना करै था, तो उसके मुँह का रूप बदल गया, अर उसके लते धोळे होके चमकण लागे।

३० अर लखाओ, मूसा नबी अर एलिय्याह नबी ये दो माणस उसके गेल्या बतळावै थे।

३१ ये महिमा सुधां दिक्खे अर यीशु के मरण का जिक्र करै थे, जो यरुशलेम म्ह होण आळा था।

३२ पतरस अर उसके साथी नीद म्ह होरे थे, अर जिव ठीक तरियां सोध्दी म्ह आए, तो उसकी महिमा अर उन दो माणसां नै, जो उसके गेल्या खड़े थे, देख्या।

३३ जिव वे उसके धौरै तै जाण लागे, तो पतरस नै यीशु तै कहा, "हे माल्लिक, म्हारा उरै रहणा भला सै: आखर म्ह हम तीन मण्डप बणावा, एक तेरे खातर, एक मूसा नबी खातर, एक एलिय्याह नबी के खातर।" उसने बेरा कोनी था के कह के रह्या सै।

३४ वो न्यू कहवैए था के एक बादळ आके उनपै छाग्या, अर जिव वे उस बादळ तै घिरण लागे तो वे डरगे।

३५ फेर उस बादळ म्ह तै या वाणी लिकड़ी, "यो मेरा बेटा अर मेरा चुण्या होया सै, इसकी सुणो।"

३६ या आवाज होन्दे यीशु एकला होग्या, अर वे बोल-बाल्ले रहे, अर जो कुछ देख्या था उसकी कोए बात उन दिनां म्ह किस तै न्ही कही।

३७ दुसरे दिन जिव वो पहाड़ तै उतरया तो एक बड्डी भीड़ उसतै आ मिली।

३८ अर लखाओ, भीड़ म्ह तै एक माणस नै किल्की मारके कहा, "हे गुरु, मै तेरे तै बिनती करूँ सँ के मेरे बेटे पै दया की निगाह फेर दे, क्यूँके वो मेरा एकला बेटा सै।

३९ अर दे, एक भुंडी ओपरी आत्मा उसने पकडै थी, अर वो चाणचक किल्की माँरै था, अर वा उसने इसा मरोडै थी के वो मुँह म्ह तै झाग भर लावे सै, उसने रोदके घणी मुश्किल तै छोड्डे थी।

४० मनै तेरे चेल्यां तै बिनती करी के उसने लिकाडै, पर वे कोनी काढ सके।"

४१ यीशु नै जवाब दिया, "हे अबिश्वासी अर जिद्दी माणसां, मै कद ताहीं थारे गेल्या रहूँगा अर थारी सहूँगा? अपने बेटे नै उरै लिया।"

४२ जिव वो आवै था तो ओपरी आत्मा नै उस ताहीं पटकके मरोड्या, पर यीशु नै उस ओपरी आत्मा ताहीं थमकाया अर छोरै ताहीं ठीक करके पिता तै थमा दिया।

43 फेर सारे माणस परमेसवर कै घणे सामर्थ तै हैरान होए । पर जबि सारे माणस उन सारे काम्मां तै जो वो करै था, हक्के-बक्के थे, तो उसनै अपणे चेल्यां तै कह्या,

~~~~~

44 “थम इन बातों पे गौर करो, क्यूँके मै माणस का बेट्टा माणसां के हाथ्यां म्ह पकड़वाया जाण पै सूँ ।”

45 पर वे इस बात नै कोनी समझे थे, अर या बात उनतै लुक्ही रही के उननै उसका बेरा न्ही पाट्टे, अर वे इस बात कै बारै म्ह उसतै बुद्धिण तै डरै थे ।

~~~~~

46 फेर उन म्ह या बहस होण लागी के म्हारे तै बड़ड़ा कौण सै ।

47 पर यीशु नै उनकै मन के विचारां ताहीं पढ़ लिया, अर एक बाळक नै लेकै अपणे धौरै खड्या करया,

48 अर उनतै कह्या, “जो कोए मेरै नाम तै इस बाळक नै अपणावै सै, वो मन्नै अपणावै सै, अर जो कोए मन्नै अपणावै सै, वो मेरै भेजण आळे नै भी अपणावै सै, क्यूँके जो थारे म्ह सारया म्ह छोट्टे तै छोट्टा सै, वोए बड़ड़ा सै ।”

~~~~~

49 फेर यूहन्ना नै कह्या, “हे स्वामी, हमनै एक माणस ताहीं तेरे नाम तै ओपरी आत्मा लिकाइदे देख्या, अर हमनै उसतै मना करया, क्यूँके वो म्हारी तरियां तेरा चेल्ला न्ही था ।”

50 यीशु नै उसतै कह्या, “उसनै नाट्टो ना, क्यूँके जो थारे बिरोध म्ह न्ही, वो थारे कान्ही सै ।”

~~~~~

51 जबि उसके उप्पर टाए जाण के दिन पूरे होण पै थे, तो उसनै यरुशलेम जाण का विचार पक्का करया ।

52 उसनै अपणे आगू दूत भेज्जै । वे सामरियां कै एक गाम म्ह गए ताके उसके खात्तर जगहां त्यार करै ।

53 पर उन माणसां नै उस ताहीं उतरण कोनी दिया, क्यूँके वो यरुशलेम जावै था ।

54 न्यू देखकै उसके चेल्लें याकूब अर यूहन्ना नै कह्या, “हे प्रभु, तू के चाहवै सै के हम हुकम देवां, के अकास तै आग गिरकै उननै भस्म करदे?”

55 पर उसनै बोहड़के उन ताहीं धमकाया (अर कह्या, “थम न्ही जाणदे के थम किसी आत्मा के सो । क्यूँके माणस का बेट्टा लोग्गां नै जान तै मारण कोनी आया, बल्के उननै बचाण आया सै ।”)

56 अर वे किसे दुसरे गाम म्ह चले गये ।

~~~~~

57 जबि वे राह म्ह जावै थे, तो किसे नै उसतै कह्या, “जित्त-जित्त तू जावैगा, मै तेरे पाच्छै हो लूँगा ।”

58 यीशु नै उसतै कह्या, “लोमडियां की घुरखाण अर अकास के पंछियां के बसेरे हो सै, पर माणस के बेट्टे खात्तर सिर छिपाण की भी जगहां कोनी ।”

59 उसनै दुसरे तै कह्या, “मेरै पाच्छै हो ले ।” उसनै कह्या, “हे प्रभु, पैहले मन्नै घर जाणदे, मै अपणे पिता के मरण कै बाद उस ताहीं दफना के आऊँगा, फेर तेरा चेल्ला बणुगाँ ।”

60 उसनै उसतै कह्या, “जो आत्मिक रूप तै मर चुके सै, उननै मुदें दफणाण दे । पर तू जाकै परमेसवर के राज्य की कथा सुणा ।”

61 एक और नै भी कह्या, “हे प्रभु, मै तेरे पाच्छै हो लूँगा, पर पैहल्या मन्नै जाणदे के अपणे घर के माणसां तै बिदा ले आऊँ ।”

62 यीशु नै उसतै कह्या, “जो कोए अपणा हाथ हळ पै धरकै पाच्छै देखै सै, वो परमेसवर के राज्य कै जोग्गा कोनी ।”

## 10

XXXXXXXXXX XX XXXXXXXX XXXX

1 इन बातों के बाद प्रभु यीशु ने सत्तर और चेल्लें तैयार करे, अर जिस-जिस गाम अर जगहां पै वो खुद जाण आळा था, उडै उननै दो-दो करके अपणे आगँ भेज्या।

2 उसनै अपणे चेल्यां तै कह्या, “पके होए खेत्तां की तरियां लोग तो भोत सै जो परमेसवर के वचन नै सुणणा अर समझणा चाहवै सै। पर फसल काटटण आळे थोड़े लोग सै, जो उन ताहीं जाकै परमेसवर का वचन सुणा अर समझा सकै। इस करके खेत के माल्लिक यानी परमेसवर तै बिनती करो, के वो और लोगां नै भेज्जै, ताके परमेसवर का वचन सारे लोगां तक पोहच सकै सै।”

3 जाओ, देख्खों, मै थमने भेड्डां की तरियां भेड्डियाँ के बिचाल्ये भेज्जू सूं।

4 इस करके ना बटुआ, ना झोळी, ना जूते ल्यो, अर ना राह म्ह किसे तै नमस्कार करो।

5 जिस किसे घर म्ह जाओ, पैहले कहो, इस घर का कल्याण हो।

6 जै उडै कोए कल्याण के जोगगा होगा, तो थारा कल्याण उसपै थमैगा, न्ही तो थारे धोरै उल्टा ए आ ज्यागा।

7 उससे घर म्ह रहो, अर जो कुछ उनतै मिलै, वोए खाओ-पीओ, क्यूँके मजदूर नै अपनी मजदूरी मिलणी चाहिए, घर-घर न्ही हांडणा।

8 जिस नगर मै जाओ, अर उडै के माणस थमनै उतारै, तो जो कुछ थारे स्याम्ही धरया जावै वोए खाओ।

9 उडै के बिमारां नै ठीक करो अर उनतै कहो, परमेसवर का राज्य थारे धोरै आण पोंहच्या सै।

10 पर जिस नगर म्ह जाओ, अर उडै के माणस थमनै न्ही अपनावै, तो उनके बजारां म्ह जाके कहो,

11 थारे नगर की धूळ भी, जो म्हारे पायां म्ह लागगी सै, हम थारे स्याम्ही झाड़ देवां सां, फेरभी न्यू जाण ल्यो के परमेसवर का राज्य थारे धोरै आण पोंहच्या सै।

12 मै थमनै कहूँ सूं, “के उस दिन उस नगर की हालत तै सदोम नगर की हालत घणी सहण जोगगी होवैगी।”

XXXXXXXXXX XXXXX XX XXXXXXXX

13 “धिक्कार सै थारे पै खुराजिन नगर के माणसों! धिक्कार सै थारे पै बैतसैदा नगर के माणसों! जो सामर्थ के काम थारे म्ह करे गये, जै वे सूर अर सैदा नगर म्ह करे जान्दे, तो टाट ओढ़ के, अर राख म्ह बैठके वे कदे के पाप करणा छोड़ देन्दे।

14 पर न्याय के दिन थारी हालत तै सूर अर सैदा नगर की हालत घणी सहण जोगगी होवैगी।

15 अर हे कफरनहूम नगर, तू के सोचै सै, के तू सुर्ग ताहीं ऊँचा करया जावैगा? तू तो अधोलोक तक नीचै जावैगा।

16 “जो थारी सुणै सै, वो मेरी सुणै सै, अर जो थमनै तुच्छ समझै सै, वो मन्नै तुच्छ समझै सै, अर जो मन्नै तुच्छ समझै सै, वो मेरे भेजण आळे ताहीं तुच्छ समझै सै।”

XXXXXXXXXX XXXXXXXX XX XXXXXXXX

17 वे सत्तर चेल्लें राज्जी होन्दे होए बोहड़े अर बोल्ले, “हे प्रभु, तेरे नाम तै ओपरी आत्मा भी म्हारा कहणा मान्नै थी।”

18 यीशु नै उनतै कह्या, “जिब थम ओपरी आत्मायाँ नै लिकाड़ो थे तो मन्नै शैतान ताहीं सुर्ग तै बिजळी की तरियां पड़ता होया देख्या।

19 लखाओ, मन्नै थारे ताहीं साँपां अर बिच्छुआं ताहीं पायां तळै रोंदण का, अर बैरी की सारी सामर्थ पै हक दिया सै, अर किसे चीज तै थमनै कुछ नुकसान कोनी होवैगा।

20 फेरभी इतने राज्जी मतना होवो के आत्मा थारा कहणा मान्नै सै, पर इसतै राज्जी होवो थारे नाम सुर्ग पै लिक्खे सै।”

XXXXX XX XXXXXXXX XXXXX



21 उससे बखत यीशु पवित्र आत्मा म्ह होके खुशी तै भरग्या, अर कहा, “हे पिता, सुर्ग अर धरती के प्रभु, मै तेरा शुक्रियादा करूं सूं, के तन्नै इन बाततां ताहीं ज्ञानियाँ अर समझदारां तै लकोए राख्या, अर बाळकां ताहीं दिखा दिया सै।” हाँ, हे पिता, क्यूँके तन्नै योए भाया।

22 मेरे पिता नै मेरे ताहीं सब कुछ सौप दिया सै, अर किसे नै न्ही बेरा के बेटटा कौण सै, सिवा पिता के, अर पिता कौण सै न्यू भी किसे नै कोनी बेरा सिवाए बेटटे के, अर वो जिसपै बेटटा उस ताहीं जाहिर करणा चाहवै।

23 फेर चल्यां की ओड़ बोहड़के एक्ले म्ह बोल्या, “धन्य सै वे आँख, जो ये बात जो थम देखो सो।

24 क्यूँके मै थमनै कहूं सूं के घणखरे नबियाँ अर राजयां नै चाह्या के जो बात थम देखो सो, देखवै, पर न्ही देखी, अर जो बात थम सुणो सो, सुणै पर न्ही सुणी।”

### ~~~~~

25 एक दिन यीशु माणसां नै उपदेश देण लागरया था, तो एक शास्त्री उठ्या अर न्यू कहके उस ताहीं परखण लाग्या, “हे गुरु, अनन्त जीवन का वारिस होण खात्तर मै के करूं?”

26 यीशु नै उसतै कहा, “नियम-कायदा म्ह के लिख्या सै? अर तू उसनै किस तरियां समझै सै?”

27 उसनै जवाब दिया, “तू प्रभु, अपणे परमेसवर तै अपणे सारे मन, अपणे पूरे प्राण अर अपणे सारी शक्ति अर अपणी सारी बुद्धि के गेल्या प्यार राख, अर अपणे पड़ोसी तै अपणे जिसा प्यार राख।”

28 यीशु नै उसतै कहा, “तन्नै ठीक कहा, न्यूए करिये जिब्बे तू अनन्त जीवन पावैगा।”

29 पर उसनै खुद ताहीं धर्मी जाहिर करण की इच्छा तै यीशु तै बुझ्या, “तो मेरा पड़ोसी कौण सै?”

30 यीशु नै एक कहाँनी बताके जवाब दिया, “एक माणस यरुशलेम नगर तै यरीहो नगर म्ह जावै था, के डाकुआं नै घेर के, उसका सब कुछ खोस के, उस ताहीं नंगा कर दिया, अर पिट-छेतके उस ताहीं अधमरा छोड़के चले गये।

31 अर इसा होया के उससे राही तै एक यहूदी याजक जावै था, पर उसनै उस ताहीं देखके उसकी मदद कोनी करी अर चल्या गया।

32 इस्से ढाळ एक लेवी\* उस जगहां पै आया, उसनै भी उसकी मदद कोनी करी, अर वो चल्या गया।

33 फेर सामरी गाम का एक राहगीर ओड़ै तै लिकड़या, अर उस माणस ताहीं देखके उसपै तरस खाया।

34 उसनै उसके धोरै आके उसके घायाँ पै तेल अर अंगूर का रस गेर के पट्टी बाँधी, अर अपणे गधे पै चढ़ाके सराय† म्ह लेग्या, अर उसकी सेवा-पाणी करी।

35 दुसरे दिन उसनै दो दीनार (दो दिन की मजदूरी) काढ के सराय के मालिक तै दिये, अर कहा, इसकी सेवा-पाणी करिये, अर जो कुछ तेरा और लागैगा, वो मै बोहड़दा होया भर दुगां।”

36 यीशु नै उस ताहीं कहा, “इब यो बता तेरी समझ तै जिस माणस ताहीं डाकुआं नै घायल करा था, उन तीनां म्ह तै उस माणस का सच्चा पड़ोसी कौण था?”

37 उसनै कहा, “वोए जिसनै उसपै दया करी।” यीशु नै उसतै कहा, “जा, तू भी न्यूए करया कर।”

### ~~~~~

38 जिव यीशु अर उसके चेल्ले जावै थे तो वो एक गाम म्ह गया, अर मार्था नाम की एक विरबान्नी नै बड़ी उदारता तै उसका आदर-सत्कार करया।

39 मरियम नाम की उसकी एक बेब्वे थी। वा प्रभु के पायां म्ह बैठके उसका वचन सुणै थी।

\* 10:32 10:32 (मन्दर म्ह यहूदी याजक की मदद करण आळा एक माणस) † 10:34 10:34 (धर्मशाला)

40 पर मार्था सेवा-पाणी करदे-करदे परेशान होगी, अर उसके धोरै आकै कहण लागगी, “हे प्रभु, के तन्नै कुछ भी फिकर कोनी के मेरी बेब्बे नै सारा काम का बोझ मेरै पै गेर दिया सै? इस करके उसतै कह के मेरी मदद करै।”

41 प्रभु यीशु मसीह नै मार्था तै जवाब दिया, “मार्था, हे मार्था, तू घणी बाततां खात्तर फिकर करै, अर परेशान हो ज्या सै।

42 पर एक बात जरूर सै, अर उस बढ़िया हिस्से ताहीं मरियम नै छोट्ट लिया सै जो उसतै खोस्या कोनी जावैगा।”

## 11

\*\*\*\*\*

1 यीशु किसे जगहां प्रार्थना करण लागरया था। जब उसने प्रार्थना कर ली, तो उसके चेल्यां म्ह तै एक नै उसतै कह्या, “हे प्रभु, जिस तरियां यूहन्ना नै अपने चेल्यां ताहीं प्रार्थना करणी सिखाई उसे तरियां ए तू भी हमनै सीखा दे।”

2 उसने उनतै कह्या, “जिब थम प्रार्थना करो, तो कहो, हे पिता,

तेरा नाम पवित्तर मान्या जावै,

तेरा राज्य आवै,

3 म्हारी दिन भर की रोटी हरैक दिन हमनै दिया कर,

4 अर म्हारे पापां नै माफ कर,

क्युंके हम भी अपने हरैक कसूरवार ताहीं माफ करां सां,

अर म्हारे ताहीं परखै ना।”

\*\*\*\*\*

5 फेर यीशु नै चेल्यां तै कह्या, “मान ल्यो थारा एक दोस्त सै, अर थम आध्धी रात नै उसके धोरै ज्याकै उसतै बिनती करो, हे दोस्त, मन्नै तीन रोटी दे।

6 क्युंके मेरा एक दोस्त सफर करके मेरै धोरै आया सै, अर उस ताहीं खुआण खात्तर मेरै धोरै कुछ भी कोनी।”

7 अर वो भीत्तर तै थमनै जवाब देवै सै, मन्नै दुखी ना करै, इब तो मन्नै कुवाड़ मूंद राखे सै अर मेरे बाळक मेरै धोरै बिछाणा पै सै, इस करके मै उटकै तन्नै कुछ भी न्ही दे सकदा?

8 मै थमनै कहूँ सूँ, हालाकि वो माणस उस ताहीं रोटी ना भी देणा चाहवै, तोभी दोस्त होण के नाते वो जरूर उठेगा, अर दोस्त के बार-बार बिनती करण पै, उसकी जरूरत के मुताबिक उस ताहीं जरूर देवैगा।”

9 अर मै थारैतै कहूँ सूँ, के माँगो तो थमनै दिया जावैगा, टोव्होगे, तो थम पाओगे, खटखटाओ, तो थारे खात्तर खोल्या जावैगा।

10 क्युंके जो कोए माँगै सै, उसनै मिलै सै, अर जो टोह्णै सै, वो पावै सै, अर खटखटावै सै, उसके खात्तर खोल्या जावैगा।

11 थारे म्ह तै इसा कोण पिता होगा, के जिब उसका बेटटा रोटी माँगै, तो उसने पत्थर देवै, या मच्छी माँगै, तो बदले म्ह उसनै साँप देवै?

12 या अंडा माँगै तो उसनै बिच्छु दे?

13 इस करके जिब थम बुरे होके, अपने बाळकां नै आच्छी चीज देणा जाणो सां, तो थारा सुर्गीय पिता अपने माँगण आळा नै पवित्तर आत्मा क्युं न्ही देवैगा।

\*\*\*\*\*

14 फेर यीशु नै एक गूंगा माणस म्ह तै ओपरी आत्मा ताहीं लिकाइया। जिब ओपरी आत्मा लिकइगी तो गूंगा बोलण लागरया, अर माणसां के अचम्भा होया।

15 पर उन म्ह तै कुछ नै कह्या, “यो तो ओपरी आत्मायाँ के प्रधान शैतान की मदद तै ओपरी आत्मायाँ नै लिकाडै सै।”

16 औराँ नै उस ताहीं परखण के खात्तर उसतै अकास की एक निशान्नी माँगी।

17 पर उसनै उनकै मन की बात जाणकै, उनतै कह्या, “जिस-जिस राज्य म्ह फूट आवै सै, वो राज्य उजड़ जावै सै, अर जिस घर म्ह फूट होवै सै, वो नाश हो जावै सै।”

18 जै शैतान खुद का बिरोधी हो जावै, तो उसका राज्य किस तरियाँ बणया रहवैगा? क्यूँके धम मेरै बाबत कहो सो के यो शैतान की मदद तै ओपरी आत्मायाँ नै काड्डै सै।

19 भला जै मै शैतान की मदद तै ओपरी आत्मायाँ नै काढू सूं, तो थारी ऊलाद किसकी मदद तै काड्डै सै? इस करकै वैए थारा न्याय करैगें।

20 पर जै मै परमेसवर के सामर्थ तै ओपरी आत्मायाँ नै काढू सूं, तो परमेसवर का राज्य थारे धौरै आण पोंहच्या सै।

21 जिव ठाड्डा माणस हथियार लिये होए अपने घर की रुखाळी करै सै, तो उसका धन बचा रहवैगा।

22 पर जिव उसतै बाध कोए और ठाड्डा धावा बोलकै उसनै जीत लेवे सै, तो उसके वे राष्ट्र जिनपै उसका विश्वास था, खोस लेवे सै अर उसका धन लूटके बांड देवे सै।

23 जो मेरै गेल्या न्ही वो मेरै बिरोध म्ह सै, अर जो मेरै गेल्या न्ही कट्टा करदा, वो खिंडावै सै।

~~~~~

24 “जिव ओपरी आत्मा माणस म्ह तै लिकड़कै जावै सै, तो सूकखी जगहां म्ह आराम टोहन्दी फिरै सै, अर वा पांदा कोनी। फेर वा कहवै सै, ‘मै उस्से माणस म्ह जड़ै तै लिकड़ी थी बोहड़ जाऊंगी।’ अर आके उस माणस ने घर जिसा झाड़ा-बुहारा अर सजा-धज्या पावे सै।

25 अर आके उसनै झाड़ा-बुहारा अर सजा-धज्या पावे सै।

26 फेर वा ओपरी आत्मा जाके अपने तै भुंडी सात और आत्मायाँ नै अपने गेल्या ले आवै सै, अर वे उस म्ह बड़कै वास करै सै, अर उस माणस की पाच्छली हालत पैहल्या तै भी भुंडी हो जावै सै।”

~~~~~

27 जिव यीशु ये बात कहवै था तो भीड़ म्ह तै किसे बिरबान्नी नै जोर तै बोलकै कह्या, “धन्य सै वो बिरबान्नी जिस तू जन्मा अर उसका तन्नै दूध पिया।”

28 उसनै कह्या, “हाँ, पर धन्य वे सै, जो परमेसवर का वचन सुणै अर मान्नै सै।”

~~~~~

29 जिव बड़डी भीड़ कट्टी होदी जावै थी तो वो कहण लाग्या, “इस युग के माणस बुरे सै, वे चिन्ह-चमत्कार टोह्नै सै, पर योना नबी के चिन्ह-चमत्कार नै छोड़कै उन ताहीं कोए और चिन्ह-चमत्कार कोनी दिया जावैगा।

30 जिसा योना नबी निनवे के आदमियाँ खात्तर निशान्नी ठहरी, उस्से तरियाँ मै माणस का बेटटा भी इस युग के आदमियाँ के खात्तर ठहरूंगा।

31 दक्षिण देश की राणी न्याय के दिन इस बखत के माणसाँ के गेल्या उठकै उन ताहीं कसूरवार टैहरावैगी, क्यूँके वा राजा सुलेमान का ज्ञान सुणण खात्तर धरती के सिरे तै आई, अर देख्को, उरे वो सै जो राजा सुलेमान तै भी बड़ड़ा सै।

32 निनवे नगर के माणस न्याय के दिन इस युग के माणसाँ के गेल्या उठकै, उन ताहीं कसूरवार टैहरावैगें, क्यूँके उननै योना नबी का प्रचार सुणके अपने पापाँ ताहीं स्वीकार करया, अर देख्को, उरे वो सै जो योना नबी तै भी बड़ड़ा सै।

~~~~~

33 “कोए माणस दीवा जळा के बरतन के तळै न्ही धरदा, पर टांडी पै धरे सै के भीत्तर आण आळा नै चाँदणा मिलै।

34 देह का दीवा आँख सै, इस करके जिब तेरी निगांह आच्छी सै तो तेरी सारी देह भी उजाळा होगा। पर जिब तेरी आँख ठीक कोनी सै तो तेरी सारी देह भी अँधेरे म्ह सै।

35 इस करके चौकन्ने रहो के जो चाँदणा थारे म्ह सै वो अँधेरा ना हो जावै।

36 इस करके जै तेरी देह म्ह चाँदणा हो अर उसका कोए हिस्सा अन्धेरे म्ह ना रहवै तो सारा का सारा इसा चाँदणा होगा, जिसा उस बखत होवै सै जिब दीवा अपनी चमक तै थारे ताहीं चाँदणा देवे सै।”

?????????????? ?? ?????????? ?? ??????????

37 जिब वो बात करे था तो किस फरीसी ने उसते बिनती करी के मेरे उँर आके खाणा खाईयो। वो भीत्तर जाके खाणा खाण नै बेठचा।

38 फरीसी नै न्यू देखके हैरानी होई के उसने खाणा खाण तै पैहल्या हाथ कोनी धोए।

39 प्रभु ने उसके मन के विचारां ताहीं पढ़के उसतै कहा, “हे फरीसियों, थम कटोरे अर थाळी नै उप्पर-उप्पर तै तो माँजो सो, पर थारे भीत्तर अन्धेर अर बुराई भरी सै।

40 हे बेअकलो! जिसने बाहरणे का हिस्सा बणाया, के उसने भीत्तर का हिस्सा कोनी बणाया?

41 पर हाँ, भीत्तर आळी चिज्जां नै दान कर द्यो, तो देखो, सारा कुछ थारे खात्तर पवित्र हो जावैगा।”

42 पर हे फरीसियों, थारे पै धिक्कार सै! थम पुदीने अर सुदाब का अर कई तरियां के साग-पात का दसमां हिस्सा द्यो सो, पर न्याय ताहीं अर परमेसवर के प्यार ताहीं टाळ द्यो सो, आच्छा तो था के इन्नै भी करदे रहन्दे अर उननै भी कोनी छोड़दे।

43 हे फरीसियों, थारे पै धिक्कार सै! थम आराधनालयों म्ह खास-खास आसन नै चाहो सो अर बजारां म्ह नमस्कार चाहो सो।

44 “धिक्कार सै थारे पै! क्यूँके थम उन लुकही होई कबरां की तरियां सो, जिनपै माणस चाल्लै सै पर कोनी जाणदे।”

45 फेर एक शास्त्री नै उसतै जवाब दिया, “हे गुरु, इन बाततां नै कहके तू म्हारी बुराई करे सै।”

46 पर यीशु नै जवाब दिया, “हे शास्त्रियो थारे पै धिक्कार सै! थम नियम-कायदा का इसा बोझ जिनका ठाणा ओक्खा सै, माणसां पै लादो सो, पर थम खुद उनकी मदद खात्तर उस बोझ नै अपनी आन्गळी तै भी कोनी छुन्दे।”

47 “धिक्कार सै थारे पै! थम उन नबियाँ की कबर बणाओ सो, जिन ताहीं थारे पूर्वजां नै मार दिया था।”

48 आखर म्ह थम गवाह सो, अर अपने पूर्वजां के काम्मां तै रजामंद सो, क्यूँके उननै उन ताहीं मार दिया अर थम उनकी कबर बणाओ सो।

49 इस करके परमेसवर की समझ नै भी कहा सै, “के मै उनके धारे नबियाँ अर प्रेरितां नै भेज्जूंगी, अर वे उन म्ह तै कईयाँ नै मार देंगे, अर कईयाँ नै दुखी करेगें।”

50 ताके जित्त नबियाँ का लहू दुनिया की शरुआत तै बहाया गया सै, सारया का ब्यौरा इस युग के माणसां तै लिया जावै,

51 हाबिल की हत्या तै लेके जकर्याह की हत्या ताहीं, जो वेदी अर मन्दर के बिचाळै मारया गया। मै थारे तै सच कहूँ सूँ, इन सारया का ब्यौरा इस्से बखत के माणसां तै लिया जावैगा।

52 “धिक्कार सै थम शास्त्रियाँ पै! थमनै ज्ञान की ताळी तो ले ली, पर थम खुद कोनी दाखल होए, अर दाखल होण आळे ताहीं भी रोक द्यो सो।”

53 जिब वो उड़ै तै लिकड़या, तो शास्त्री अर फरीसी भुण्डी तरियां उसके पाच्छे पड़गे अर छेड़ण लागगे के वो घणखरी बाततां का जिक्र करे,

54 अर ताक म्ह लागगे रहे के उसके मुँह तै कही होई कोए बात पकड़ै।

1 इतने म्हे जब हजारों की भीड़ लागगी, उरै ताहीं के वे एक-दुसरे पै पड़ण लागगे थे, तो यीशु नै सारया तै पैहल्या अपणे चेल्यां तै यो कह्या, “फरीसियाँ के कपट रूपी खमीर तै चौकन्ने रहो।

2 कुछ ढकया कोनी, जो उचाड़या न्ही जावैगा, ना कुछ लुहक्या सै, जिसका बेरा न्ही पटै।

3 इस करके जो कुछ धमनै अन्धेरे म्हे कह्या सै, वो उजाळै म्हे सुण्या जावैगा, अर जो धमनै कोटडियाँ म्हे चुपके-चुपके कह्या सै, वो छात पै तै प्रचार करया जावैगा।

**??????**

4 “मे थारे तै जो मेरे साथी सो कहूँ सूँ, के जो देह नै घात करै सै पर उसतै ज्यादा और कुछ न्ही कर सकदे, उनतै ना डरियो।

5 मै धमनै समझाऊँ सूँ के धमनै किसतै डरणा चाहिये, घात करण के बाद, जिस ताहीं नरक म्हे गेरण का हक सै, उससे तै डरियो। हाँ, मै थारे तै कहूँ सूँ उससे तै डरियो।

6 के दो पिस्या की पाँच गौरैयाँ (एक छोटी चिड़ियाँ) न्ही बिकदी? फेरभी परमेसवर उन म्हे तै एक नै भी कोनी भुल्दा।

7 थारे सिर के एक-एक बाळ भी गिणे होड़े सै, इस करके डरो मतना, धम घणी गौरैयाँ तै बढ़के सो।”

**???? ????? ??????? ? ? ??????? ?**

8 “मे थारे तै कहूँ सूँ जो कोए माणसां के स्याम्ही मन्ने मान लेवैगा, उसनै मै माणस का बेट्टा भी परमेसवर के सुर्गदत्तां के स्याम्ही मान लेऊँगा।

9 पर जो माणसां के स्याम्ही मेरा इन्कार करैगा, उसका भी परमेसवर के सुर्गदत्तां के स्याम्ही इन्कार करया जावैगा।”

10 जो कोए मुझ माणस के बेट्टे के विरोध म्हे कोए बात कहवै, उसका वो कसूर माफ कर दिया जावैगा, पर जो पवित्तर आत्मा की बुराई करै, उसका वो कसूर माफ कोनी करया जावैगा।

11 जब माणस धमनै आराधनाल्याँ अर हाकिमां अर अधिकारियां के स्याम्ही ल्यावै, तो फिक्र ना करियो के हम किस तरियां तै, या के जवाब देवां, या के कहवागें।

12 क्यूँके पवित्तर आत्मा उससे बखत धमनै सीखा देगा के, के कहणा चाहिये।

**?? ??????? ??????? ? ? ???????**

13 फेर भीड़ म्हे तै एक नै यीशु तै कह्या, “हे गुरु, मेरे भाई तै कह के बाप के जमीन-जायदाद नै मेरै गेल्या बांड लेवै।”

14 उसनै उसतै कह्या, “हे भले माणस, किसनै मेरै ताहीं थारा जमीन-जायदाद बटवारा करण आळा न्यायी बणा दिया सै?”

15 अर यीशु नै उनतै कह्या, “चौकन्ने रहो, अर सारी तरियां के लोभ-लालच तै खुद नै बचाके राखो, क्यूँके किसे का जीवन उसके घणी जमीन-जायदाद तै कोनी होंदा।”

16 यीशु नै उनतै एक उदाहरण देके कह्या, “किसे साहूकार की धरती म्हे घणी पैदावार होई।”

17 फेर वो अपणे मन म्हे विचार करण लाग्या, मै के करै? क्यूँके मेरै धोरे जगहां कोनी जित्त अपणी उपज वैगरा धरै।

18 अर उसनै कह्या, मै न्यू करूँगा मै अपणे नाज के गोदाम नै तोड़के, उनतै नाज के और बड़े गोदाम बणाऊँगा, अर उड़ै अपणा सारा नाज अर धन धरूँगा,

19 अर अपणे-आप तै कहूँगा, के तेरे धोरे घणे साल खात्तर घणा धन धरया सै, चैन कर, खा, पी, मौज कर।

20 पर परमेसवर नै उसतै कह्या, हे बेकूफ, तू इस्से रात मर जावैगा, फेर जो कुछ तन्नै कट्टा करया सै, वो किसका होगा?

21 “इस्से तरियां वो माणस भी सै, जो अपणे खात्तर धन कट्टा करै सै, पर परमेसवर की निगांह म्हे साहूकार कोनी।”

**???????? ? ? ??????? ???????**

22 फेर यीशु नै अपणे चेल्यां तै कह्या, “इस करके मै थमनै कहूँ सूँ, अपणे जीवन के खात्तर या चिंता ना करो के हम के खावांगें, ना अपणी देह की के, के पैहरागें।

23 क्यूँके जीवन खाणे तै बढ़के सै, अर देह लत्यां तै बढ़के सै।

24 कागगा\* पै ध्यान द्यो, वे ना बोवै सै, ना काटै सै, अर ना उनके भण्डार अर गोदाम होवै सै, फेरभी परमेसवर उननै पाळै सै। थारी किम्मत पंछियाँ तै बाध सै।”

25 थारे म्ह तै इसा कौण सै, जो चिंता करण तै अपणी उमर का एक पल भी बढ़ा सकै सै?

26 इस करके जै थम अपणी जिन्दगी म्ह छोटटे-छोटटे काम भी न्ही कर सकदे, तो जिन्दगी की बड़ी-बड़ी बातों खात्तर क्यातै फिकर करो सो?

27 “जंगळी फूल्लां पै ध्यान करो, के वे किस तरियां बढ़े सै, वे मेहनत करके अपणे खात्तर लत्तें कोनी बणाते। तोभी मै थारे तै कहूँ सूँ, के राजा सुलेमान भी, अपणे सारे शानों-शोकत म्ह, उन म्ह तै, किसे के समान लत्ते पैहरे होए कोनी था।

28 इस करके जै परमेसवर मैदान की घास नै, जो आज सै अर काल बाड़ म्ह झोक्की जावैगी, इसे लत्तें पहरावै सै, तो हे विश्वास म्ह कमजोर माणसों, वो थारी चिन्ता क्यूँ न्ही करैगा?

29 अर थम इस बात की टोह म्ह ना रहो के, के खावांगें अर के पीवांगें, अर शक ना करो।

30 क्यूँके परमेसवर ताहीं ना जाणण आळे लोग, इन सारी चिज्जां की टोह म्ह रहवै सै: पर थारा सुर्गीय पिता जाणै सै, के थमनै इन चिज्जां की जरूरत सै।

31 पर परमेसवर के राज्य की खोज करो तो ये चीज भी थमनै मिल ज्यागीं।”

~~~~~

32 “हे छोटटे टोळ, मतना डरै, क्यूँके थारे सुर्गीय पिता नै न्यू भाया सै, के थमनै अपणा राज्य देवै।

33 अपणा धन बेचके दान कर द्यो, अर अपणे खात्तर इसे बट्टए बणाओ, जो पुराणे कोनी होन्दे, यानिके परमेसवर नै खुश करण आळे भले काम करके सुर्ग म्ह इसा धन कट्टा करो जो खतम कोनी होन्दा, अर जिसके धोरे चोर कोनी जान्दा, अर कीड़ा कोनी बिगाड़दा।

34 क्यूँके जड़ै थारा धन सै, उड़ै थारा मन भी लागया रहवैगा।”

~~~~~

35 “हमेशा परमेसवर के काम्मां खात्तर तैयार रहों, अर थम प्रभु के आण खात्तर, दीवे जळा के तैयार रहों,

36 अर थम उन माणसां के बरगे बणो, जो अपणे माल्लिक की बाट देखते रहवै सै, के वो व्याह ते कद बोहड़ैगा, ताके जिब आके दरबाजा खटखटावै, तो जिब्वे उसके खात्तर खोल द्यो।

37 धन्य सै वे नौक्कर जो माल्लिक के बोहड़ण की बाट देखते होए तैयार रहवै सै, मै थमनै साच्ची कहूँ सूँ, के माल्लिक भी खुद एक नौक्कर की तरियां उन ताहीं खाणा खुआण खात्तर बिठावैगा, अर खुद उनकी सेवा-पाणी करैगा।

38 जै वो आध्धी रात नै या उसके बाद आके उन ताहीं तैयार पावै, तो वे नौक्कर धन्य सै।

39 पर न्यू जाण ल्यो, के जै घर का माल्लिक नै बेरा हो, के चोर ठीक किस घड़ी आवैगा तो वो तैयार रहन्दा, अर अपणे घर म्ह चोरी न्ही होण देन्दा।

40 थम भी मेरे बोहड़ के आण खात्तर तैयार रहो, क्यूँके जिस घड़ी के बाँरे म्ह थम सोचदे भी कोनी, उस्से घड़ी मै माणस का बेट्टा सुर्ग तै आ जाऊँगा।”

~~~~~

41 फेर पतरस बोल्या, “हे प्रभु, के यो उदाहरण तन्ने म्हारे खात्तर दिया से या सारया खात्तर दिया सै।”

42 प्रभु नै जवाब दिया, “वो विश्वास जोगगा अर अकलमंद भण्डारी कौण सै, जिसका माल्लिक उस ताहीं नौक्कर-चाकरां पै सरदार ठेहरावै, के उननै बखत पै खाणा देवै।”

* 12:24 12:24 कौवों

43 धन्य सै वो नौक्कर, जिस ताहीं उसका माल्लिक आकै इसाए करदा पावै।

44 मै थमनै साच्ची कहूँ सूँ, वो उस ताहीं अपणी सारी धन-सम्पत्ति का माल्लिक बणावैगा।

45 पर जै वो नौक्कर सोचचण लागगै के मेरा माल्लिक आण म्ह वार कर रह्या सै, उसके साथ के नौक्कर नौकराणियाँ ताहीं मारण लागज्या अर खाण-पीण अर दारूबाज होण लागगे।

46 तो उस नौक्कर का माल्लिक इसे दिन आवैगा, जिव वो उसकी बाट देख्दा ना हो, अर इसे बखत म्ह आवैगा जिसका उसनै ना बेरा हो, अर उसनै भारी सजा देकै उसकी गिणती विश्वास लायक माणसां म्ह कोनी करी जावैगी।

47 वो नौक्कर घणा छित्तैगा, जो अपणे माल्लिक की मर्जी जाणै था, अर तैयार न्ही रह्या अर ना उसकी मर्जी के मुताबिक चाल्या।

48 पर हरेक वो नौक्कर जो अपणे माल्लिक की मर्जी नै कोनी जाणै, फेर इसा काम करै सै जो मार खाण के लायक सै, वो कम छित्तैगा। इस करके जिस ताहीं घणा दिया गया सै, उसतै घणा माँग्या जावैगा, अर जिस ताहीं घणा सौप्या सै, उसतै घणा लिया जावैगा।

~~~~~

49 "मै धरती पै आग लाण नै आया सूँ, अर कितना आच्छा होन्दा, के या इस्से बखत सुलग जान्दी!

50 मन्नै तो एक बड़ी भारी बिपदा का बपतिस्मा लेणा सै, अर जिव ताहीं वो ना हो ले जद ताहीं मै इस्से बिपदा म्ह रहूँगा!

51 के थम समझो सो के मै धरती पै मिलाप करवाण आया सूँ? मै थमनै कहूँ सूँ, ना, बल्के न्यारे करण आया सूँ।

52 क्यूँके इब तै एक घर म्ह पाँच माणस आप्स म्ह बिरोध राक्खैगें, तीन जन जो मेरे पै विश्वास न्ही करते, वो उन दो जन का बिरोध करैगें जो मेरे पै विश्वास राक्खै सै।

53 पिता बेट्टे तै, अर बेट्टा बाप तै बिरोध राक्खैगा, माँ बेट्टी तै, अर बेट्टी माँ तै, सास्सू बहू तै, अर बहू सास्सू तै बिरोध राक्खैगी।"

~~~~~

54 यीशु नै भीड़ तै कह्या, "जिव थम बादळ नै पश्चिम[‡] तै उठदे देखो सो, तो जिव्हे कहो सो के मिह आवैगा, अर न्यूए होवै सै,

55 अर जिव दक्षिणी हवा[‡] चाल्दी देखो सो, तो कहो सो के बड़ी गर्मी पडैगी, अर न्यूए हो सै।

56 हे कपटियों! थम धरती अर अकास के रूप-रंग म्ह भेद जाण सको सो, पर परमेसवर जो इस युग म्ह करण लागरया सै उसका भेद क्यातै न्ही जाणदे?

~~~~~

57 "थम खुद फैसला क्यातै कोनी कर लेंदे के ठीक सै?"

58 जिव तू अपणे बैरी के गेल्या हाकिम के धोरै जावै सै, तो राही म्ह उसतै छुटण की कोशिश करले, इसा ना हो के वो तन्नै न्यायाधीश के धोरै घसीट के ले जावै, अर न्यायाधीश तन्नै सिपाही के हवालै करदे अर सिपाही तन्नै जेळ म्ह गेर दे।

59 मै तेरे तै कहूँ सूँ के जिव ताहीं तू पाई-पाई न्ही भर देवैगा, तब तक जेळ तै छुटण न्ही पावैगा।

## 13

~~~~~

1 उस बखत कुछ माणस आण पोहचे, अर यीशु तै उन गलीली माणसां का जिक्र करण लागगे, जिन ताहीं पिलातुस नै मन्दर म्ह बलिदान करते बखत मार दिया था, अर उनका ए लहू बलिदान की भेट तै मिला दिया था।

† 12:54 12:54 पश्चिम-भूमध्यसागर तै उठण आळा बादल ‡ 12:55 12:55 दक्षिणी हवा-नेगिस्तान तै आन्दी हवा

2 न्यू सुणकै उसनै उनतै जवाब म्ह कह्या, “के थम समझो सो के ये गलीली माणस और बाकी सारे गलीलवासियाँ तै घणे पापी थे के उनपै इसी बिप्टा आण पड़ी?

3 मै थमनै कहूँ सूँ के ना, पर जै थम पाप करणा न्ही छोड़ोगे तो थम भी इस्से तरियां नाश होओगे।

4 अर थम के सोच्चों सों, के उन अठारह माणसां के बारे म्ह जिनपै शीलोह का गुम्मत पड्या, अर वे दब कै मरगे: यरुशलेम के दुसरे सारे वासिन्दयां तै घणे अपराधी थे?

5 मै थमनै कहूँ सूँ, के जै थम पाप करणा न्ही छोड़ोगे तो थम भी इस्से तरियां नाश होओगे।”

॥॥॥॥ ॥॥॥॥ ॥॥॥॥ ॥॥॥॥ ॥॥॥॥

6 फेर यीशु नै यो उदाहरण भी देकै कह्या, “किस अंगूर के बाग म्ह अंजीर का दरखत लागरया था। वो उस म्ह फळ टोह्ल आया, पर कोनी मिल्या।

7 फेर उसनै बाग कै रुखाळे तै कह्या, लखा, तीन साल तै म्ह इस अंजीर कै दरखत पै फळ टोह्ल आऊँ सूँ, पर कोनी पान्दा। इसनै काट बगा के यो धरती नै भी क्यूँ रुधै।”

8 उसनै उसतै जवाब दिया, “हे माल्लिक, इस साल और रहण दे के मै इसके चौगरदेकै माट्टी खोदके खाद गेरू।

9 जै आगले साल इसके फळ आ गया तो ठीक, न्ही तो इसनै कटवा दियो।”

॥॥॥॥ ॥॥॥॥ ॥॥॥॥॥॥॥॥॥॥॥॥॥॥॥॥॥॥॥ ॥॥॥॥ ॥॥॥॥

10 आराम के दिन यीशु एक आराधनालय म्ह उपदेश देवै था।

11 उडै एक बिरबान्नी थी जिसम्ह अठारह साल तै एक कमजोर करण आळी ओपरी आत्मा थी, अर वा कुबड़ी होगी थी अर किसे तरियां भी सीध्धी कोनी हो सके थी।

12 यीशु नै उस ताहीं देखकै बुलाया अर कह्या, “हे नारी, तू अपणे इस रोग तै मुक्त होगी सै।”

13 फेर उसनै उसपै हाथ धरया, अर वा जिब्बे सीध्धी होगी अर परमेसवर की बड़ाई करण लागगी।

14 इस करके के यीशु नै आराम के दिन उस ताहीं ठीक करया था, आराधनालय का सरदार चिड़ कै माणसां तै कहण लागया, “काम करण के छः दिन सै, उन ए दिनां म्ह आकै अपणे रोग ठीक कराओ, पर आराम के दिन न्ही।”

15 न्यू सुणकै प्रभु यीशु नै जवाब दिया, “हे कपटियों, के आराम के दिन थारे म्ह तै हरेक अपणे बळध या गधे नै थान म्ह तै खोल कै पाणी पियाण कोनी ले जान्दा?

16 तो के या बिरबान्नी जो अब्राहम की पीढ़ी सै, जिस ताहीं शैतान नै अठारह साल तै जुड राख्या था, के इस ताहीं आराम के दिन इसके बन्धन तै मुक्त करणा न्ही चाहिये था?”

17 जब यीशु नै ये बात कही, तो उसके सारे बिरोधी शर्मिन्दा होगे, अर साबती भीड़ उन महान् काम्मां तै जो वो करै था, राज्जी होई।

॥॥॥ ॥॥॥॥ ॥॥॥॥ ॥॥॥॥ ॥॥॥॥

18 फेर यीशु नै कह्या, “परमेसवर का राज्य किस जिसा सै? अर मै उसका उदाहरण किसतै द्यु?

19 वो राई कै दाणै की ढाळ सै, जिस ताहीं किसे माणस नै लेकै अपणे बाग म्ह बोया: अर वो बढ़कै दरखत बणगया, अर अकास के पंछियाँ नै उसकी डाळियाँ पै बसेरा करया।”

॥॥॥॥ ॥॥॥॥ ॥॥॥॥

20 यीशु नै दुबारे कह्या, “मै परमेसवर के राज्य का उदाहरण किसतै द्यु?

21 वो खमीर की ढाळ सै, जिस ताहीं किसे बिरबान्नी नै लेकै तीन पसेरी (पन्द्रह किलो) चून म्ह रळ्हाया, अर होन्दे-होन्दे सारा चून खमीर बणगया।”

॥॥॥॥ ॥॥॥॥

22 यीशु अर उसके चेल्लें नगर-नगर, अर गाम-गाम होकै उपदेश देन्दे होए यरुशलेम नगर की ओड़ जावै थे,

23 तो किसे नै उसतै बुझ्झया, “हे प्रभु, के थोड़े ए माणसां का उद्धार होगा?” यीशु नै उनतै कह्या,

24 “भीड़े दरबाजे तै बड़ण की कोशिश करो, क्यूँके मै थमनै कहूँ सूँ के घणखरे उस म्ह बड़णा चाहवैगें, अर कोनी बड़ सकैगें।

25 क्यूँके परमेशवर जो घर का मालिकक सै उठकै दरवाजा भेड़ देगा, अर थम बाहरणै खड़े होए खटखटाकै कहण लागो, हे प्रभु, म्हारै खात्तर दरवाजा खोल दे, अर वो जवाब देवै, मै थमनै कोनी जाणदा, थम कित्त के सो?"

26 फेर थम कहण लागोगे, हमनै तेरे स्याम्ही खाया-पिया अर तन्नै म्हारे बजारां म्ह उपदेश दिया ।

27 पर वो कहवैगा, मै थमनै कहुँ चुक्या सूं, मै कोनी जाणदा, थम कित्त के सो । हे भुन्डे काम करण आळो, थम सारे मेरै तै दूर रहो ।

28 जिव अब्राहम अर इसहाक अर याकूब अर सारे नबियाँ ताहीं परमेशवर राज्य म्ह वेट्टे, अर खुद नै बाहरणै लिकाड़े होए देखोगे, "उड़ै रोणा अर दाँत पिसणा होगा ।

29 पूरी दुनिया के माणस आकै परमेशवर कै राज्य के भोज म्ह शामिल होवैगे ।

30 अर सच्चाई या सै के जो पाच्छले सै वे पैहले होंगे, अर जो पैहले सै वे पाच्छले होंगे ।"

31 उससे बखत कुछ फरीसियाँ नै आकै यीशु तै कह्या, "उरै तै लिकड़ज्या, क्यूँके हेरोदेस तन्नै मार देणा चाहवै सै ।"

32 यीशु नै उनतै कह्या, "जाकै उस लोमड़ी* तै कह द्यो के लखा, मै आज अर काल ओपरी आत्मार्याँ नै कादहू सूं अर बिमारां नै ठीक करूं सूं, अर तीसरे दिन अपना काम पूरा करूंगा ।

33 फेर भी यो जरूरी सै के मै आज, काल अर परसो सफर करूं, क्यूँके हो न्ही सकदा के कोए नबी यरुशलेम नगर कै बाहरणै मारया जावै ।

34 "हे यरुशलेम के माणसों! हे यरुशलेम के माणसों! तन्नै भोत-से नबियाँ ताहीं मारया सै, जो भोत पैहले रहवै थे, अर उन माणसां ताहीं भी पत्थरां तै मार दिया जिन ताहीं थारे धौरै भेज्जे थे । कितनी ए वर मन्नै न्यू चाह्या के जिस ढाळ मुर्गी अपणे बच्चां नै अपणे पाक्खां तळै कट्टे करै सै, उससे तरियां ए मै भी तेरे बाळकां नै कट्टा करूं, पर थमनै न्यू न्ही चाह्या ।

35 देखो, थारा घर थारे खात्तर उजाड़ छोड्या जावै सै, मै थमनै कहुँ सूं: जिव ताहीं थम न्ही कहोगे, 'थन्य सै वो, जो प्रभु कै नाम तै आवै सै,' जद ताहीं थम मन्नै दुबारै कदे न्ही देखोगे ।"

14

1 एक खास मौक्के पे जिव मसीह आराम कै दिन फरीसियाँ के सरदारां म्ह तै किसे के घरां रोट्टी खाण नै गया, अर वे सारे उननै घणी उत्सुकता तै देखण लागरे थे ।

2 उड़ै एक माणस था, जिसम्ह जलोदर* की बीमारी थी ।

3 इसपै यीशु नै शास्त्रियाँ अर फरीसियाँ तै कह्या, "के नियम-कायदा के मुताबिक आराम कै दिन आच्छा करणा ठीक सै या न्ही?"

4 पर वे बोल-बाल्ले रहे । फेर यीशु नै उस रोगी पै हाथ धरकै उस ताहीं ठीक करकै, उस ताहीं बिदा कर दिया ।

5 अर उनतै कह्या, "थारे म्ह तै इसा कौण सै, के जै थारा बेट्टा या बळध कुएँ म्ह आराम कै दिन पड़ज्या अर वो उसनै जिब्बे बाहरणै कोनी लिकड़े?"

6 वे इन बाततां का कुछ जवाब कोनी दे पाए ।

7 जिव यीशु नै देख्या के न्यांदे होए माणस किस तरियां खास-खास जगहां छॉट लेवै सै तो एक उदाहरण देकै कह्या,

* 13:32 13:32 लोमड़ी चलाक होवै सै इस करके यीशु नै हरोदेस ताहीं लोमड़ी कह्या सै * 14:2 14:2 (जलोदर एक इसा रोग सै जिस म्ह रोगी के हाथ-पां सूज जावै सै)

8 “जिब कोए तन्नै ब्याह म्ह बुलावै, तो खास माणसां की जगहां पै न्ही बैठणा, कदे इसा ना हो के उसनै तेरे तै भी बड़े ताहीं न्योद राख्या हो,

9 अर जिसनै तेरे ताहीं अर उस ताहीं दोनु आ ताहीं न्योदा दिया सै, आकै कहवै, इसनै जगहां दे; अर फेर तन्नै शर्मिन्दा होकै सारया तै पाच्छे बैठणा पड़े।

10 पर जिब तू न्योदा जावै तो सारया तै पाच्छली जगहां बैठ के जिब वो, जिसनै तेरे ताहीं न्योदा सै आवै, तन्नै कहवै, हे दोस्त, आगु बै बढकै बैठ; फेर तेरे गेल्या बैठण आळा कै स्याम्ही तेरी बड़ाई होवैगी।

11 क्यूके जो कोए अपणे-आपनै बड़ड़ा बणावैगा, वो छोट्टा करया जावैगा, अर जो कोए अपणे-आपनै छोट्टा बणावैगा, वो बड़ड़ा करया जावैगा।”

12 फेर यीशु नै फिरीसी तै जिसनै उसका न्योदा दिया था उसतै कह्या, “जिब तू दिन का या रात का भोज करै, तो अपणे साथियाँ या भाईयाँ या कुणबे या साहूकार पड़ोसियाँ नै ना न्योद, कदे इसा ना हो के वे भी तन्नै न्योदा देवै, अर तेरा बदला हो जावै।

13 पर जिब तू भोज करै तो कंगाल, टुंडे, लंगड़े अर आंध्याँ नै न्योद।

14 तब तू धन्य होवैगा, क्यूके उन माणसां कै धरै बदले म्ह देण खात्तर कुछ कोनी, परमेसवर तन्नै उस काम का बदला धर्मियाँ के जिन्दा होण के बाद देवैगा।”

~~~~~

15 यीशु के गेल्या खाणा खाण आळा म्ह तै एक नै ये बात सुणकै उसतै कह्या, “धन्य सै वो जो परमेसवर के राज्य म्ह भोज खावैगा।”

16 यीशु नै उसतै कह्या, “किसे माणस नै बड़ड़ा भोज करया अर घणा ताहीं न्योदा।

17 जिब खाणा त्यार होगया तो उसनै अपणे नौक्कर कै हाथ न्योदे होए माणसां ताहीं कहवां भेज्या, ‘आओ, इब खाणा त्यार सै।’”

18 “पर वे सारे के सारे माफी माँगण लागगे। पैहलडे नै उसतै कह्या, ‘मन्नै खेत मोल लिया सै, अर जरूरी सै के उसनै देक्खूँ, मै तेरे तै बिनती करूँ सूँ मन्नै माफ करदे।’”

19 दुसरे नै कह्या, “मन्नै पाँच जोड़े बळध मोल लिए सै, उननै परखण जाऊँ सूँ, मै तेरे तै बिनती करूँ सूँ, मन्नै माफ करदे।”

20 एक और नै कह्या, “मन्नै ब्याह करया सै, इस करके मै न्ही आ सकदा।”

21 उस नौक्कर नै आकै अपणे माल्लिक ताहीं ये बात कह सुणाई। फेर घर कै माल्लिक नै खुन्दक म्ह आकै, अपणे नौक्कर तै कह्या, “नगर के बजारां अर गळियाँ म्ह इब्बे जाके कन्गालाँ नै, टुंड्यां नै, लंगड्यां नै, अर आंध्याँ नै उरै लेके आओ।”

22 नौक्कर नै दुबारे कह्या, “हे माल्लिक, जिस ढाळ तन्नै कह्या था, उससे तरियाँ ए करया गया सै, अर फेर भी जगहां सै।”

23 माल्लिक नै नौक्कर तै कह्या, “सड़कां पै अर वाड़या की कान्ही जा अर माणसां नै मजबूर करके लिया ताके मेरा घर भरज्या।

24 क्यूके मै धमनै कहूँ सूँ के उन पैहले बुलाए होइ माणसां म्ह तै कोए मेरै खाणे नै कोनी चाखैगा।”

~~~~~

25 जिब बड़ड़ी भोड़ यीशु के गेल्या जावै थी, तो उसनै बोहड़के उनतै कह्या,

26 जै कोए मेरा चेल्ला बणणा चाहवै सै, अर अपणे माँ-बाप अर घरआळी अर बाळकां नै अर भाईयाँ नै अर भाणां नै बल्के अपणे जीवन नै भी मेरे तै ज्यादा प्यार करै सै, तो वो मेरा चेल्ला न्ही हो सकदा।

27 अर जो कोए अपणे दुखां का करूस ना ठावै, अर मेरै पाच्छे न्ही आवै, वो भी मेरा चेल्ला कोनी हो सकदा।

28 उदाहरण के तौर पै “थारे म्ह तै कौण सै जो घर बणाणा चाहन्दा हो, अर पैहल्या बैठके खर्चा न्ही फैळावे के पूरा करण की गुंजास मेरै धरै सै के न्ही?

29 जै वो आस ना होया करदा हो, तो जिब वो नीम धर ले पर काम पूरा ना कर पावै, तो सारे देखण आळे न्यू कहकै उसका मखौल उड़ावैगो,

30 के यो माणस बणाण तो लाग्या पर पूरा कोनी कर पाया?"

31 या कौण इसा राजा सै जो दुसरे राजा तै युध्द करण जान्दा हो, अर जो विचार करले के जो बीस हजार सैनिक लेकै मेरै पै चढ़या आवै सै, के मै दस हजार सैनिक लेकै उसका सामना कर सकूँ सूं के न्ही?

32 न्ही तो उसके दूर रहन्दे होए वो दूतां नै भेजकै उसतै मिलाप करणा चाहवैगा।

33 इस्से ढाळ थारे म्ह तै कोए अपना सारा कुछ त्याग न्ही देवै, वो मेरा चेल्ला कोनी हो सकदा।

~~~~~

34 "नूण† तो बढ़िया सै, पर जै नूण का सुवाद जान्दा रहवै, तो वो किस चीज तै नमकीन करया जावैगा।

35 वो ना तो धरती कै अर ना खाद कै खात्तर काम म्ह आवै सै: उसनै तो माणस बाहरणै बगा देवै सै। जिसके कान हों वो ध्यान तै सुण ले।"

## 15

~~~~~

1 सार चुंगी लेण आळे अर पापी माणस, यीशु के धोरै आया करै थे ताके उसकी सुणै।

2 पर फरीसी अर शास्त्री बरड़ाके कहण लागो, "यो तो पापियाँ तै मिले सै अर उनके गेल्या खावै भी सै।"

3 फेर उसनै उनतै यो उदाहरण कहा

4 "थारे म्ह तै कौण सै जिसकी सो भेड़ हों, अर उन म्ह तै एक खुज्या, तो निन्यानमै नै बण म्ह छोड़कै, उस खुई होइ नै जिब ताहीं पा न्ही लेन्दी टोहन्दा ना रहवै?

5 अर जिब पा ज्या सै, फेर वो घणा राज्जी होकै उस ताहीं कंधे पै ठा लेवै सै,

6 अर अपने घरां आकै साथियाँ अर पड़ोसियाँ नै कट्ठा करकै कहवै सै, 'मेरै गेल्या खुशी मनाओ, क्यूँके मेरी खुई होइ भेड़ पागी सै।'

7 मै धमने कहूँ सूं, के इस्से तरियां तै पापां नै छोड़ण आळे एक पापी खात्तर उन निन्यानबे धर्मियाँ की तुलना म्ह सुगं म्ह इसतै भी घणा आनन्द मनाया जावै सै, जिननै पापां की माफी माँगण की जरूरत कोनी।"

~~~~~

8 यीशु ने एक और उदाहरण दिया "के कौण इसी बिरबान्नी होगी जिसके धोरै दस सिक्के हों, अर उन म्ह तै एक खुज्या, तो वा दीवा बाळ कै अर घर झाड़-बुहारके, जिब ताहीं पा न्ही जावै जी लाकै टोहन्दी ना रहवै?

9 अर जिब पा ज्या सै, तो वा अपनी सहेलियाँ अर पड़ोसणां नै कट्ठा करकै कहवै सै, 'मेरै गेल्या खुशी मनाओ, क्यूँके मेरा खुया होया सिक्का पाग्या सै।'

10 मै धमने कहूँ सूं के इस्से ढाळ जिब कोए माणस अपने पापां नै छोड़के परमेसवर की राह पै चाल्लणा शरू करै सै तो उसके खात्तर भी, परमेसवर के सुगंदूतां कै स्याम्ही उतणा ए आनन्द मनाया जावै सै।"

~~~~~

11 फेर यीशु ने एक और उदाहरण देके कहा, "किसे माणस के दो बेटे थे।

12 उन म्ह तै छोड़के नै पिता तै कहा, 'हे पिता, सम्पत्ति म्ह तै जो मेरा बांडे आवै सै वो मन्नै इब्बे दे द्यो। इस करके पिता नै उन ताहीं अपनी सम्पत्ति का बंडवारा कर दिया।

† 14:34 14:34 नमक-यीशु के चेल्यां के बारे म्ह बताया गया सै

13 घणे दिन कोनी बीते थे के छोटा बेटा सारा कुछ कटा करके दूर देश म्ह चल्या गया, अर उड़े बुरे काम्मां म्ह अपना धन उड़ा दिया।

14 जब वो सारा कुछ खर्च कर गया, तो उस देश म्ह भारया अकाळ पड्या, अर वो कंगाल होगया, अर उसके धौरे खाण नै कुछ भी न्ही रह्या।

15 इस करके वो उस देश के बाशिंदां म्ह तै एक कै धौरे काम करण खात्तर, अर उसनै उस ताहीं अपने खेत्तां म्ह सूअर चरण खात्तर भेज्या।

16 वो भोत भूखा था अर वो चाहवै था के उन फळियाँ म्ह तै जिन नै सूअर खावै थे, अपना पेट भरै, अर उस ताहीं कोए कुछ कोनी देवै था।

17 जब छोटे बेटे के होश ठिकाणै आये अर अपने-आप तै कहण लाग्या, मैरे पिता कै धौरे इसे भोत मजदूर सै जिनके खाणा खाण कै बाद भी घणाए बच जावै सै, पर मै उरै भूखा मरण लाग रह्या सूं।

18 इस करके मै इब उठके अपने पिता धौरे जाऊंगा अर उसतै कहूंगा के पिता जी, मन्ने परमेसवर जो सुर्ग म्ह सै, उसके अर तेरे बिरोध म्ह पाप करया सै।

19 इब इस जोगगा कोनी रह्या के तेरा बेटा कुह्लाऊँ, मन्ने अपने एक मजदूर की ढाळ राख ले।”

20 “पर वो उस देश नै छोड़ के अपने बाप कै घर की ओड़ चाल्या, वो इब्वे कुछ ए दूर था के उसके बाप नै उस ताहीं देख्या उसपै तरस आया, अर भाजके अपने बेटे ताहीं छात्ती कै लगाके, उस ताहीं चुम्ता रह्या।

21 बेटे नै उसतै कह्या, पिता जी, मन्ने परमेसवर जो सुर्ग म्ह सै, उसके अर तेरे बिरोध म्ह पाप करया सै, अर इब इस जोगगा कोनी रह्या के तेरा बेटा कुह्लाऊँ।

22 पर बाप नै अपने नौकरां तै कह्या, ताळ करके सुथरे-सुथरे लत्ते लिकाड़के उसनै पहराओ, अर उसके हाथ्यां म्ह गुट्ठी, अर पायां म्ह जूत्ती पहराओ,

23 अर बढ़िया भोज तैयार करो ताके हम खावां अर खुशी मनावं।

24 क्यूँके मेरा यो बेटा मरगया था, दुबारै जीगया सै: खुगया था अर इब पागया सै।” अर वे खुशी मनाण लागे।

25 पर उसका जेटा बेटा खेत म्ह काम करण लागरया था। जब वो आन्दे होए घर कै धौरे पोंहच्या, तो उसनै गाण-बजाण अर नाचण का बोल सुणया।

26 आखर म्ह उसनै एक नौकर बुलाके बुझया, यो के होण लाग रह्या सै?

27 उसनै उस ताहीं कह्या, तेरा भाई बोहड़ आया सै, अर तेरे बाप नै बढ़िया भोज तैयार करवाया सै, इस करके के वो ठीक-ठाक घरा आ गया सै।

28 न्यू सुणके वो छोटै भरगया अर भीत्तर जाणा कोनी चाह्या, पर उसका बाप बाहरणै आके उसनै मनाण लाग्या।

29 उसनै बाप तै कह्या, देख, मै इतने साल तै तेरी सेवा-पाणी कर रह्या सूं, अर कदे भी तेरा हुकम कोनी टाळया, फेरभी तन्नै मैरे ताहीं कदे भी कोए बढ़िया चीज कोनी दी, ताके मै अपने साथियाँ गेल्या आनन्द कर सकूं।

30 पर जब तेरा यो बेटा आया, जिसनै तेरी सम्पत्ति अयाशियाँ म्ह उड़ा दी सै, तो उसके खात्तर तन्नै बढ़िया भोज तैयार करया।

31 उसके बाप नै उसतै कह्या, मेरे बेटे, तू सारी हाण मेरे गेल्या सै, अर जो कुछ मेरा सै वो सारा तेराए सै।

32 पर इब आनन्द अर मगन होणा चाहिये क्यूँके यो तेरा भाई जो मेरे होए माणसां की तरियां था दुबारा जी गया सै, खुगया था, इब पागया सै।”

1 फेर यीशु नै चेल्यां ताहीं एक और उदाहरण देकै कह्या, “किसे साहूकार का एक भण्डारी था, अर लोग्गं नै उसकै स्याम्ही उसपै यो इल्जाम लाया के वो तेरा सारा धन उड़ा देवै सै।

2 आखर म्ह उसनै अपणे भण्डारी ताहीं बुलाकै कह्या, ‘यो के सै मै तेरे बाबत के सुणु सू?’ अपणे भण्डारीपण का हिसाब दे, क्यूँके तू आगुँ तै भण्डारी कोनी रह सकदा।”

3 फेर भण्डारी सोच्चण लागया, इब मै के करूँ? क्यूँके मेरा माल्लिक इब भण्डारी का काम मेरै तै खोस्सै सै। माट्टी खोदण का काम मेरै तै होवै कोनी, अर भीख माँगदे होए मन्नै शर्म आवैगी।

4 मै जाण गया के मै के करूँ, ताके मै जिब भण्डारी कै काम तै हटाया जाऊँ तो माणस मन्नै अपणे घरां म्ह ले लेवै।

5 फेर उसनै अपणे माल्लिक के देणदारां ताहीं एक-एक करकै बुलाया अर पैहल्या तै बुझ्झया, “तेरे उप्पर मेरै माल्लिक का कितना कर्जा सै?”

6 उसनै कह्या, “सौ मण* तेल,” फेर उसनै उसतै कह्या, “अपणा खात्ता अर बही ले अर बैठके तावळा पचास लिख दे।”

7 फेर उसनै दुसरे तै बुझ्झया, “तेरे पै कितना कर्जा सै?” दुसरे नै कह्या, सौ मण† गेहूँ, फेर उसनै उसतै कह्या, “अपणा खात्ता अर बही लेकै अर बैठके अस्सी लिख दे।”

8 माल्लिक नै उस अधर्मी भण्डारी ताहीं सराहया के उसनै कितनी चतुराई तै काम करया सै। क्यूँके इस दुनिया के माणस अपणे बखत के माणसां के गेल्या व्यवहार म्ह चाँदणे के माणसां‡ तै घणे चलाक सै।

9 अर मै थमनै कहूँ सूँ के दुनिया की धन-दौलत तै भले काम करकै अपणे खात्तर साथी बणा ल्यो, ताके जिब वो धन दौलत न्ही रहवै तो अनन्त काल के घर म्ह थारे स्वागत हो।

10 वे लोग जो थोड़े-तै भी थोड़े म्ह भी विश्वास जोगगे सै, वे घणे म्ह भी विश्वास जोगगे होंगे, जो थोड़े-तै भी थोड़े म्ह बेईमान सै, वो घणा म्ह भी बेईमान होंगे।

11 इस करकै जिब थम संसारिक धन म्ह विश्वास जोगगा न्ही ठहरे, तो साच्चा धन थमनै कौण देवैगा?

12 अर जै थम संसारिक धन-दौलत न इस्तमाल करण म्ह भरोस्सेमंद न्ही ठहरे, तो परमेसवर थमनै सुर्गीय धन क्यूँ देवैगा?

13 “कोए नौक्कर दो मालिकां की सेवा एक बखत पै न्ही कर सकदा, क्यूँके वो एक तै बैर अर दुसरे तै प्यार राक्खैगा, या एक तै मिल्या रहवैगा अर दुसरे नै छोट्टा जाणैगा। थम परमेसवर अर धन दोनुआ की सेवा न्ही कर सकदे।”




14 फरीसी जो लोभ्भी थे, ये सारी बात सुणकै, मखौल करण लागगे।

15 यीशु नै उनतै कह्या, “थम तो माणसां कै स्याम्ही खुद नै धर्मा ठहराओ सो, पर परमेसवर थारे मन नै जाणै सै, क्यूँके जो चीज माणसां की निगांह म्ह महान् सै, वा परमेसवर कै लोवै घृणित सै।”

16 जब तक यूहन्ना आया, जिब ताहीं मूसा के नियम-कायदे अर नबी का प्रभाव माणसां पै रह्या। उस बखत तै परमेसवर के राज्य का सुसमाचार सुणाया जाण लागरया सै, अर हरेक उस म्ह तेज्जी तै इसकी ओड़ खिचे आण लागरे सै।

17 अकास अर धरती का टळ जाणा आसान सै, पर नियम-कायदा की हर छोट्टी बात भी पूरी होकै रहवैगी।

18 उदाहरण के तौर पै “जो कोए अपनी घरआळी नै छोड़के दुसरी तै ब्याह करै सै, वो जारी करै सै, अर जो कोए इसी छोड़डी होई विरबान्नी तै ब्याह करै सै, वो भी जारी करै सै।”



* 16:6 16:6 3700 लिटर † 16:7 16:7 4000 किलो ‡ 16:8 16:8 चाँदणे के माणस-विश्वासी माणसां नै कहवै सै

19 फेर यीशु नै कह्या, “एक साहूकार माणस था जो बैजनी अर मलमल के महंगे लत्ते पहरदा अर हरेक दिन ऐसो-आराम तै अर मौज तै रहवै था।

20 लाजर नाम का एक कंगाल जिसके घा: होरे थे उसकी देहली पै छोड़ दिया जावै था।

21 अर वो चाहवै था, के साहूकार के मेज की जूटण तै अपना पेट भरै, उरै ताहीं के कुत्ते भी आकै उसके घा: नै चाट्या करै थे।”

22 इसा होया के वो कंगाल मरग्या, अर सुगंदूतां नै उस ताहीं लेकै अब्राहम की गोद म्ह पोंहच्या। वो साहूकार भी मारया अर गाड्या गया,

23 साहूकार नरक म्ह गेरया गया, अर नरक की ताड़ना तै दर्द म्ह पड़े होए अपनी निगांह टाई, दूर तै ए अब्राहम के साथ लाजर ताहीं देख्या।

24 फेर उसनै रुक्का मारकै कह्या, हे पिता अब्राहम, मेरै पै दया करकै लाजर नै भेजदे, ताके वो अपनी आन्गळी का कुणा पाणी म्ह डबोकै मेरी जीभ नै शीळी करै, क्यूँके मै इस आग तै तड़फू सूं।

25 “पर अब्राहम बोल्या, हे बेटे, याद कर, के तन्नै अपनी जिन्दगी म्ह बढ़िया तै बढ़िया चीज ले ली सै”, अर उससे तरियां लाजर नै तुच्छ चीज, पर इब वो उरै सुख अर शान्ति पा रह्या सै, अर तू तड़फ रह्या सै।

26 इन सबके अलावा म्हारै अर तेरे बिचाळै एक बड़ी खाई ठहराई गई सै, के जो उरै तै तेरी ओड़ आणा चाहवै, वे ना जा सकै, अर ना कोए उड़ै इस पासै म्हारै धोरै आ सकै।”

27 साहूकार बोल्या, तो हे पिता, मै तेरे तै बिनती करूँ सूं, के उस ताहीं मेरै बाप कै घरां भेज,

28 क्यूँके मेरे पाँच भाई सै, वो उनकै स्याम्ही इन बात्तां की गवाही दे, इसा ना हो के वे भी दुख की जगहां म्ह आवै।

29 अब्राहम नै उसतै कह्या, उनकै धोरै तो मूसा के नियम-कायदे, नबी अर नबियाँ की किताब सै, वे उनकी सुणै।

30 साहूकार बोल्या, “न्ही, पिता अब्राहम, पर जै कोए मरे होया म्ह तै उनकै धोरै जावै, तो वे पाप करणा छोड़ देंगे।”

31 अब्राहम नै उसतै कह्या, “जिब वे मूसा नबी अर नबियाँ की न्ही सुणदे, तो जै मरे होया म्ह तै कोए जी भी जा, तोभी उसकी कोनी मान्गें।”

17

1 फेर यीशु नै अपण चेल्यां तै कह्या, “हो न्ही सकदा के ठोक्कर ना लागगै, पर धिक्कार सै, उस माणस पै जिसकै बाबत ठोक्कर लागगै सै।

2 पर जो कोए इन छोट्या बाळकां समान जो मेरै पै बिश्वास करै सै, किसे तै भी पाप करवावे तो उसके खात्तर भला योए सै के एक बड़्डी चाक्की का पाट उसके गळ म्ह लटकाया जावै अर वो समुंदर म्ह गेरया जावै।”

3 सावधान रहों, “जै तेरा बिश्वासी भाई पाप करै तो उसनै समझा, अर जै पछतावै तो उसनै माफ करदे।

4 जै हरेक दिन वो तेरे बिरुद्ध म्ह सात बार भी पाप करै, अर सात्तु बार तेरे धोरै आकै कहवै, मै पछताऊँ सूं, तो उसनै माफ करदे।”

5 फेर परेरितां नै प्रभु यीशु तै बिनती करी, “के म्हारे बिश्वास नै बढ़ा।”

6 प्रभु बोल्या, “जै थमनै राई कै दाणै बराबर भी बिश्वास होन्दा, तो थम इस शहतूत कै दरखत नै कहन्दे के जड़ तै उखड़के समुन्दर म्ह जा लाग, तो वो थारी मान लेन्दा।”

7 फेर यीशु नै कह्या, “मान ल्यो थारे म्ह तै किसे कै धोरै एक नौक्कर सै जो नौक्कर हळ चलान्दा या भेड़ चरान्दा हो, अर जिब वो खेत तै बोहड़ आवै, तो के थम उसतै कहोंगे, ‘आकै मेरे गैल खाणा खाण बैठ ज्या?’

8 पर इसके बजाये के वो अपणे नौक्कर न्यू कोनी कहवैगा, ‘मेरे खात्तर खाणा त्यार कर, अर मेरे ताहीं खाणा परोसण खात्तर तैयार हो ज्या, जिब ताहीं मै खाऊँ पीऊँ तब ताहीं मेरी सेवा-पाणी कर, इसकै पाच्छै तू भी खा-पी लिये?’

9 के वो उस नौक्कर का श्रयान मान्नेगा के उसनै वैए काम करे जिसका हुकम दिया सै?

10 इस्से तरियां तै थम भी जिब उन सारे काम्मां नै कर ल्यो जिसका हुकम थारे ताहीं दिया गया सै, तो उस ताहीं कर लेण के बाद थमनै कहणा चाहिये, ‘हम नौक्कर सां, हम किसे बड़ाई के हकदार कोनी हमनै तो बस अपना फर्ज निभाया सै।’”

~~~~~

11 फेर जिब यीशु यरुशलेम जाण लागरया था तो सामरिया अर गलील परदेस कै बिचाळै की सीमा तै होन्दा होया लिकड्या।

12 तो गाम म्ह बड़दे बखत उसनै दस कोढ़ी मिले वे दूर खड़े थे।

13 वे जोर तै रुक्का मारकै बोल्ले, “हे यीशु, हे माल्लिक, म्हारै पै दया कर!”

14 यीशु नै उन कान्ही लखाकै कह्या, “यरुशलेम के मन्दर म्ह जाओ, अर खुद नै याजकां ताहीं दिखाओ, ताके वो भी देखै के थम ठीक होए सां के न्ही।” अर जान्दे ए जान्दे वे कोढ़ तै मुक्त होगये।

15 फेर उन म्ह तै एक न्यू देखकै के मै ठीक होगया सूं, जोर-जोर तै परमेसवर की बड़ाई करदा होया यीशु के धोरै बोहड़या,

16 अर यीशु के पायां पै मुँह के बळ पड़कै उसका धन्यवाद करण लागया, अर वो सामरी था।

17 इसपै यीशु नै कह्या, “के दस कोढ़ी चंगे न्ही होए, तो फेर नौ कित सै?”

18 के गैर यहूदी नै छोड़ कोए और न्ही लिकड्या जो परमेसवर की बड़ाई करदा?”

19 फेर उसनै उस ताहीं कह्या, “उठके चल्या जा, तन्नै विश्वास करया इस खात्तर तू ठीक होगया सै।”

~~~~~

20 फेर फरीसियां नै यीशु तै बुद्धिया के परमेसवर का राज्य कद आवैगा, तो उसनै उनतै जवाब दिया, “परमेसवर का राज्य इस ढाळ आवैगा के थम उसनै अपनी आँखां तै न्ही देख सकदे।

21 अर ना ए माणस इसके बारे म्ह न्यू कह सकेंगे, देख्खों यो से परमेसवर का राज्य। क्यूँके परमेसवर का राज्य थारे बिचाळै सै।”

22 फेर यीशु नै चेल्यां तै कह्या, “वो दिन आवैगा, जिब थम उस दिन नै देखणा चाहोंगे जिब मै माणस का बेट्टा बोहड़ के आऊँगा पर थम उस दिन नै देख न्ही पाओगे।”

23 माणस थारे तै कहवैगें, लखाओ, “मसीहा उड़ै सै!” या लखाओ, “वो आड़ै सै!” पर थम यो सुणके चले ना जाइयो, अर ना उनकै पाच्छै लागियो।

24 क्यूँके जिस तरियां बिजळी अकास कै एक छोर तै कोंध कै अकास कै दुसरे छोर ताहीं चमके सै, उस्से तरियां मै माणस का बेट्टा भी अपणे दिनां म्ह जाहिर होऊँगा।

25 पर पैहल्या जरूरी सै के मै घणा दुख ठावै, अर इस युग कै माणस मेरे ताहीं नकार देंगें।

26 जिसा पूर्वज नूह के दिनां म्ह होया था, उस्से तरियां मुझ माणस के बेट्टे के दिनां म्ह भी होवैगा।

27 जिस दिन तक नूह जहाज म्ह न्ही चढया, उस दिन तक माणस खावै-पीवै थे, अर उन म्ह ब्याह होवै थे। फेर बाढ़ नै उन सारया का नाश करया।

28 ठीक याए हालात लूत के दिनां म्ह होई थी, जिब वो सदोम नगर म्ह रहवै था। माणस खावै-पीवै, लेणा-देणा करदे, दरखत लगान्दे अर घर चिणें थे,

29 पर जिस दिन लूत सदोम तै लिकड्या, उस दिन आग अर गन्धक अकास तै बरसी सारे नगर के माणसां ताहीं नाश कर दिया।

- 30 यो उस दिन की तरियां होगा जिब मै माणस का बेट्टा बिना बताये आ जाऊँगा।
- 31 “उस दिन जो छात पै हो, अर उसका समान घर म्ह हो, अर वो उसनै लेण खात्तर तळै न्ही उतरै, अर उस्से तरियां जो खेत्तां म्ह हो, वो पाचछै, न्ही बोहडै।
- 32 याद राखियों लूत की घरआळी कै गैल के होया था!
- 33 जो कोए अपणी जान बचाणा चाहवै, वो उसनै खोवैगा, अर जो कोए उसनै खोवै वो उसनै जिन्दा राखवैगा।
- 34 मै थमनै कहूँ सूँ, उस रात नै दो माणस एक खाट पै होंगे, एक ठाया जावैगा अर दुसरा छोड दिया जावैगा।
- 35 दो बिरबान्नी एक साथ चाक्की पीसदी होवैगी, एक ठाली जावैगी अर दुसरी छोड दी जावैगी।
- 36 (दो जणे खेत म्ह होंगे, एक ठाया जावैगा अर दुसरा छोडचा जावैगा।)”
- 37 न्यू सुण उननै उसतै बुद्धझया, “हे प्रभु, यो कित्त होवैगा?” यीशु नै उनतै कह्या, “जडै लाश हो सै, उडैए चील कट्टे होवै सै, उस्से तरियां यो हरेक कोए जाण लेवैगा के यो कित्त होगा।”

18

?????? ?????????? ?? ????? ?? ?????

- 1 फेर यीशु नै अपणे चेल्यां तै इसके बाबत कह्या, के रोज प्रार्थना करणी चाहिये अर हिम्मत न्ही हारनी चाहिये, उनतै यो उदाहरण दिया,
- 2 “किसे नगर म्ह एक न्यायाधीश रहवै था, जो ना परमेसवर तै डरै था अर ना किसे माणस की परवाह करया करै था।
- 3 उस्से नगर म्ह एक बिधवा भी रहवै थी, जो उसकै धोरै आ-आकै कह्या करै थी, मेरा न्याय चुकाकै मन्नै वैरी तै बचा।”
- 4 कुछ बखत ताहीं तो वो कोनी मान्या पर आखर म्ह मन म्ह सोचकै बोलया, “ऊंतो मै परमेसवर तै कोनी डरदा, अर ना माणसां की कुछ परवाह करूँ सूँ,
- 5 फेरभी या बिधवा मन्नै काल राखवै सै, इस करकै मै उसका न्याय चूकाऊँगा, कदे इसा ना हो के घड़ी-घड़ी आकै आखर म्ह मेरी नास्सा म्ह दम करदे।”
- 6 प्रभु यीशु नै कह्या, “सुणो, इस अधर्मी न्यायाधीश नै देख के सीखों।
- 7 के परमेसवर अपणे चुणे होया का न्याय कोनी करैगा, जो दिन-रात उसके नाम की दुहाई देंदे रहवै सै? के वो उनकी मदद करण म्ह वार लगावैगा?
- 8 मै थमनै कहूँ सूँ, वो जिब्बे उनका न्याय करैगा। फेर भी मै माणस का बेट्टा जिब आऊँगा, तो के मै धरती पै मेरे पै बिश्वास करणीया नै पाऊँगा?”

?????? ?? ?????????? ??? ??? ?? ?????

- 9 यीशु नै उन माणसां तै यो उदाहरण दिया, जो अपणे बारे म्ह यो सोचवै थे, के हम धर्मी सां, अर दुसरयां नै नकारै थे।
- 10 “दो माणस मन्दर म्ह प्रार्थना करण नै गए, एक फरीसी था अर दुसरा चुंगी लेण आळा,
- 11 फरीसी खडचा होकै अपणे मन म्ह न्यू प्रार्थना करण लागया, हे परमेसवर, मै तेरा धन्यवाद करूँ सूँ के मै और माणसां की तरियां अन्धेर करण आळा, जुल्मी, अर जार कोनी, अर ना इस चुंगी लेण आळे की तरियां सूँ।
- 12 मै हफ्तै म्ह दो बर बरत राखूँ सूँ, मै अपणी सारी आमदणी का दसमां हिस्सा भी तेरे ताहीं देऊँ द्यु सूँ।”
- 13 पर चुंगी लेण आळे नै दूर खडे होकै, सुर्ग के कान्ही निगांह टाणा भी कोनी चाह्या, बल्के दुखी होकै अपणी छात्ती पीट-पीटके कह्या, “हे परमेसवर, मुझ पापी पै दया कर!”

14 “विश्वास करो वास्तव म्ह योए चुंगी लेण आळा माणस (परमेसवर की ओड तै) धर्मी ठहराया जाकै घरां गया, ना के वो फरीसी माणस। क्यूँके जो कोए अपणे-आपनै बड्डा बणावैगा, वो छोट्टा करया जावैगा, अर जो कोए अपणे-आपनै छोट्टा बणावैगा, वो बड्डा करया जावैगा।”

~~~~~

15 फेर माणस अपणे बाळकां नै भी उसके धोरै ल्याण लागगे के वो उनपै हाथ धरै, पर चेल्यां नै देख उन ताहीं धमकाया।

16 यीशु नै बाळकां ताहीं धोरै बुलाकै कह्या, “बाळकां नै मेरै धोरै आण द्यो अर उननै रोक्को मतना: क्यूँके परमेसवर का राज्य इसाए का सै।

17 मै थमनै सच कहूँ सूँ के जो कोए परमेसवर के राज्य नै बाळक की तरियां कोनी अपणावै वो उस म्ह कदे न्ही बड़ सकदा।”

~~~~~

18 किसे सरदार नै उसतै बुझ्झया, “हे उत्तम गुरु, अनन्त जीवन का हकदार होण खात्तर मै के करूँ?”

19 यीशु नै उसतै कह्या, “तू मन्नै उत्तम क्यांतै कहवै सै? कोए उत्तम कोनी, सिर्फ एक, यानिके परमेसवर।

20 तन्नै हुकमां का तो बेराए सै: ‘जारी ना करिये, खून ना करिये, अर चोरी ना करिये, अर झूट्टी गवाही ना दियो, अपणे माँ-बाप का आदर करियो।’”

21 उसनै कह्या, “मै तो इन सारया नै बाळकपण तै ए मन्दा आऊँ सूँ।”

22 न्यू सुणकै यीशु नै उसतै कह्या, “तेरे म्ह इब भी एक बात की कमी सै, अपणा सब कुछ बेचके कंगालां ताहीं बांड दे, अर तन्नै सुर्ग म्ह धन मिलैगा, अर आकै मेरा चेल्ला बणण खात्तर मेरै पाच्छै हो ले।”

23 वो न्यू सुणकै घणा उदास होया, क्यूँके वो घणा साहूकार था।

24 यीशु नै उस ताहीं देखकै कह्या, “साहूकारां का परमेसवर के राज्य म्ह बड्डा कितना ओक्खा सै।

25 जिस तरियां तै ऊँट का सुई के मोरै म्ह तै लिकडणा मुश्किल सै। उससे तरियां परमेसवर के राज्य साहूकार का बड्डा भी मुश्किल सै।”

26 इसपे सुणण आळा नै कह्या, “तो फेर किसका उद्धार हो सकै सै?”

27 उसनै कह्या, “जो माणसां तै न्ही हो सकदा वो परमेसवर तै हो सकै सै।”

28 पतरस नै कह्या, “लखा, हम तो घर-बार छोडकै तेरे पाच्छै हो लिये सां।”

29 उसनै उनतै कह्या, “मै थमनै साच्ची-साच कहूँ सूँ के इसा कोए कोनी जिसनै परमेसवर के राज्य के खात्तर घर, या घरआळी, भाई, या माँ-बाप, या बाळ-बच्चे ताहीं छोड दिया हो,

30 अर इस बखत कई गुणा घणा न्ही पावै अर परलोक म्ह अनन्त जीवन।”

~~~~~

31 फेर उसने बारहा चेल्यां ताहीं गैल लेके उनतै कह्या, “देक्वो, हम यरुशलेम नगर म्ह जावां सां, अर जितनी बात मुझ माणस के बेट्टे खात्तर नबियां नै लिक्खी होई सै, वे सारी पूरी होवैगी।

32 क्यूँके मै गैर यहूदियां के हाथ्यां म्ह सौप्या जाऊँगा, अर मेरा मजाक उड़ावैगें, मेरी बेजती करैगें, अर मेरे पै थूकैगें,

33 अर मेरै कोडे मारैगें, अर मन्नै छेतैगें अर मार देवैगें, अर मै तीसरे दिन जिन्दा हो जाऊँगा।”

34 पर उननै इन बाततां म्ह तै कोए बात न्ही समझी, अर या बात उनतै लुकही रही, अर जो कह्या गया था वो उनकी समझ कोनी आया।

~~~~~

35 जिव वो यरीहो नगर के लोवे पोहच्या, तो एक आन्धा सडक के किनारे बेटचा होया भीख माँगण लागरया था।

- 36 वो भीड़ के चाल्लण की आवाज सुणके बुझण लागया, “यो के होरया सै?”
 37 उननै उसतै बताया, “यीशु नासरी* जाण लागरया सै।”
 38 फेर उसनै रुक्का मारकै कह्या, “हे यीशु, दाऊद की ऊलाद, मेरै पै दया कर!”
 39 जो आगगै-आगगै जाण लागरे थे, वे उसनै धमकाण लागये के बोल-वाल्ला रहै, पर वो और भी रुक्का मारण लागया, “हे दाऊद की ऊलाद, मेरै पै दया कर!”
 40 फेर यीशु नै खड़े होके हुकम दिया के उसनै मेरै धौरै ल्याओ, अर जिव वो धौरै आया तो उसनै उसतै बुझ्झया,
 41 “तू के चाहवै सै के मै तेरे खात्तर करूँ?” उसनै कह्या, “हे पूरभु, योए के मै देखण लागू।”
 42 यीशु नै उसतै कह्या, “देखण लाग, तेरे बिश्वास नै तेरे ताहीं ठीक करया सै।”
 43 फेर वो जिब्बे देखण लागया अर परमेसवर की बड़ाई करदा होया उसके पाच्छै हो लिया, अर सारे आदमियाँ नै देखके परमेसवर की जै-जै कार करी।

19

- 1 यीशु यरीहो नगर म्ह बड़ण लागरया था।
 2 ओड़े जक्कई नाम का एक माणस था जो चुंगी लेण आळा का सरदार, अर साहूकार था।
 3 वो यीशु नै देखणा चाहवै था के वो कौण सै। पर भीड़ के कारण देख नही सकै था, क्यूँके वो वोन्ना था।
 4 फेर उस ताहीं देखण खात्तर वो आगगै भाजकै गुलर के दरखत पै चढ़गया, क्यूँके यीशु नासरी* उससे राह तै जाण आळा था।
 5 जिव यीशु नासरी उसके धौरै आया, तो उप्पर लखाकै उसनै कह्या, “हे जक्कई, तोळा उतरया, क्यूँके आज मन्ने तेरे घरां जरुर रहणा सै।”
 6 वो दरखत तै उतरकै राज्जी होकै यीशु नै अपणे घरां लेगया।
 7 न्यु देखके सारे माणस बरड़ाण लागगे, “वो तो एक पापी माणस के घरां रुकरया सै।”
 8 जिव यीशु जक्कई के घर खाणा खाण लागरया था तो जक्कई नै खड़े होके पूरभु तै कह्या, “हे पूरभु यीशु, देख, मै अपणी आश्वी सम्पत्ति कंगालां नै द्यु सूं, अर किसे का कुछ भी जुल्म करके ले लिया सै तो उस ताहीं चौगुणा बोहड़ा द्यु सूं।”
 9 फेर यीशु नै उसतै कह्या, “आज इस घर के माणसां पै उद्धार आया सै, इस करके के यो भी अब्राहम के वंश तै सै।
 10 मै माणस का बेट्टा खोए होया नै टोळ्ळ अर उनका उद्धार करण आया सूं।”

- 11 जिव वं ये बात सुणे थं, तो यीशु नै एक उदाहरण देके कह्या, इस करके के वो यरुशलम के धौरै था, अर वे समझै थे के परमेसवर का राज्य इब्बे जाहिर होण आळा सै।
 12 आखर उसनै कह्या, “एक साहूकार माणस दूर देश तै चल्या के राजपद पाकै बोहड़ा।”
 13 उसनै अपणे नौकरां म्ह तै दस ताहीं बुलाकै उन ताहीं दस मोहर दी अर उनतै कह्या, “मेरै बोहड़ण ताहीं लेण-देण करियो।”
 14 पर उसके नगर के बासिन्दे उसतै बैर राक्खै थे, अर उसके पाच्छै, दूतां तै कुह्हा भेज्या, “हम नही चाहन्दे के यो म्हारै पै राज करै।”
 15 “जिव माल्लिक राजपद पाकै बोहड़या, तो इसा होया के उसनै अपणे नौकरां ताहीं जिन ताहीं रपिये दिये थे, अपणे धौरै बुलाया ताके बेरा करै के उननै लेण-देण म्ह के-के कमाया।”
 16 फेर पैहल्डे नै आकै कह्या, “हे माल्लिक, तेरी मोहर तै दस और मोहर कमाई सै।”

* 18:37 18:37 नासरत नगर का रहण आळा * 19:4 19:4 नासरत नगर का रहण आळा

17 उसने उसतै कहा, “शाबाश, हे आच्छे, नौक्कर! तू घणेण थोडे म्ह भरोसमंद लिकडया इव दस नगरां का हक राख ।”

18 दुसरे नौक्कर नै आकै कहा, “हे माल्लिक, तेरी मोंहर तै पाँच और मोंहर कमाई सै ।”

19 माल्लिक नै उसतै कहा, “तू भी पाँच नगरां पै हाकिम होज्या ।”

20 तीसरे नौक्कर नै आकै कहा, “हे माल्लिक, देख, तेरी मोंहर या सै: जिस ताहीं मननै अंगोच्छे म्ह जुड़ राक्खी थी ।

21 क्यूँके मै तेरे तै डरूँ था, इस करके के तू कठोर माणस सै: जो तन्नै न्ही धरया उसनै ठा ले सै, अर जो तन्नै न्ही बोया, उस ताहीं काट्टै सै ।”

22 माल्लिक नै उसतै कहा, “हे दुष्ट नौक्कर, मै तेरेण मुँह तै तन्नै कसूरवार ठहराऊँ सूँ । जिव तन्नै मेरा बेरा सै के करड़ा माणस सूँ, जो मननै न्ही धरया उसनै ठा ल्यु सूँ, अर जो मननै न्ही बोया, उस ताहीं काट्टू सूँ,

23 तो तन्नै मेरे रपिये सर्राफा के धोरै क्याते कोनी धरे के मै आकै ब्याज सुभां ले लेन्दा?”

24 अर जो माणस धोरै खडे थे, उसनै उनतै कहा, “वा मोंहर उसतै ले ल्यो, अर जिसके धोरै दस मोंहर सै उसनै दे वो ।”

25 उननै उसतै कहा, “हे माल्लिक, उसके धोरै दस मोंहर तो सै ।”

26 “मै थमनै कहूँ सूँ के जिसके धोरै सै, उस ताहीं दिया जावैगा, अर जिसके धोरै न्ही सै, उसतै वो भी जो उसके धोरै सै ले लिया जावैगा ।

27 पर मेरे उन बैरियां ताहीं जो न्ही चाहवै थे के मै उनपै राज करूँ, उन ताहीं उरै ल्याकै मेरै स्याम्ही घात करो ।”

~~~~~

28 ये बात कहके यीशु यरुशलम नगर के कान्ही चेल्यां के आगुँ-आगुँ चाल्या ।

29 जिव वो जैतून नामक पहाड़ पे बैतफगे अर बैतनिय्याह गाम के धोरै पोंहच्या, तो उसनै अपणे चेल्यां म्ह तै दोयां ताहीं न्यू कहके भेज्या,

30 “स्याम्ही के गाम म्ह जाओ, अर उस म्ह पोहोचदये एक गधी का बच्चा जिसपै कोए कदे न्ही बैठया हो, बन्धया होड़ थमनै मिलैगा, उसनै खोल के लियाओ ।

31 जै धारे तै कोए बुद्धे के क्याते खोल्लो सो, तो कहियो के प्रभु नै इसकी जरूरत सै ।”

32 जो भेज्जै गए थे, उननै जाकै जिसा यीशु नै कहा था, उससे तरियां पाया ।

33 जिव वे गधी के बच्चे नै खोल्लै रहे थे, तो उसके मालिकां नै उनतै बुद्धया, “इस बच्चे नै क्यातै खोल्लो सो?”

34 चेल्यां नै कहा, “प्रभु नै इस ताहीं काम म्ह ल्याणा सै ।”

35 वे उसनै यीशु के धोरै लियाए, अर अपणे लत्ते उस गधी के बच्चे पै गेरकै यीशु ताहीं उसपै बिठा दिया ।

36 जिव वो जाण लागरया था, तो वे अपणे लत्ते राह म्ह बिछान्दे जावै थे ।

37 यरुशलम नगर के धोरै आन्दे होए जिव यीशु जैतून पहाड़ की ढलाण पै पोंहच्या, तो चेल्यां का सारा टोळ उन सारे सामर्थ के काम्मां के कारण जो उननै देखे थे, राज्जी होके जोर तै परमेसवर की जय-जयकार करण लागे

38 “धन्य सै वो राजा, जो प्रभु के नाम तै आवै सै! सुगं म्ह शान्ति अर अकास मण्डप म्ह महिमा हो ।”

39 फेर भीड़ म्ह तै कुछ फरीसी यीशु तै कहण लागे, “हे गुरु, इस बात के कारण अपणे चेल्यां नै धमका ।”

40 उसनै जवाब दिया, “मै थमनै कहूँ सूँ, जै ये बोल-बाल्ले रहे तो स्तुति इन पत्थरां तै लिकडण लागैगी ।”

~~~~~

41 जिव यीशु यरुशलम नगर के धोरै आया तो नगर नै देखके माणसां खातर रोया

42 अर बोल्या, “कितना भला होन्दा के तू, हाँ, तू ए आज इतणाए समझ लेन्दा की परमेसवर के साथ शान्ति का के मतलब सै, पर यो तेरे तै लहको के राख्या गया सै।

43 क्यूँके वे दिन तेरे म्ह आवैगें के तेरे बैरी मोर्चा बाँधकै तन्नै घेर लेवैगें, अर चौगरदे तै तन्नै दबावैगें ताके थारा राह बन्द होज्या,

44 अर तेरा बैरी तन्नै अर तेरे बाळकां ताहीं जो तेरे म्ह सै, माट्टी म्ह मिलावैगें, अर तेरे म्ह पत्थर पै पत्थर भी कोनी रहवैगा, जो गेरया ना जावैगा, क्यूँके तन्नै उस मौकै ताहीं जिब तेरे पै दया की निगाह होई थी तो तन्नै कोनी पिच्छाणा।”

????? ?? ?????????????? ?? ??????? ???? ?

45 फेर वो मन्दर म्ह जाके समान बेचण आळा ताहीं बाहरणै लिकाइण लाग्या,

46 अर उनतै कह्या, “पवित्र शास्त्र म्ह लिख्या सै, मेरा घर प्रार्थना का घर होगा,’ पर थमनै इस ताहीं डाकुआं की गुफा बना दिया।”

47 वो हरेक दिन मन्दर म्ह उपदेश दिया करै था, अर प्रधान याजक अर शास्त्री अर माणसां के मुखिया उसका नाश करण का मौकका टोह्लें थे।

48 पर कोए जुगाड कोनी काढ सकै थे, के यो किस तरियां करा, क्यूँके सारे माणस घणे चाह तै उसकी सुणै थे।

20

????? ?? ?????????? ?? ??????? ?

1 एक दिन इसा होया के जिब यीशु मसीह मन्दर म्ह माणसां नै उपदेश देवै था अर सुसमाचार सुणावै था, तो प्रधान याजक अर शास्त्री, यहूदी अगुवां के गेल्या धरै आके खड़े होए,

2 अर कहण लागगे, “म्हारै ताहीं बता, तू इन काम्मां नै किसकै हक तै करै सै, अर वो कौण सै जिसनै तेरे ताहीं यो हक दिया सै?”

3 उसनै उनतै कह्या, “मै भी धारे तै एक बात बुद्धु सुं, मन्नै बताओ।

4 यूहन्ना का बपतिस्मा सुर्ग की ओड़ था या माणसां की ओड़ तै था?”

5 फेर वे आप्स म्ह कहण लागगे, “जै हम कह्लां, ‘सुर्ग की ओड़,’ तो वो कहवैगा, ‘फेर थमनै उसका बिश्वास क्यातै न्ही करया?”

6 अर जै हम कह्लां, ‘माणसां की ओड़,’ तो सारे माणस म्हारै पै पत्थर बरसावैगें, क्यूँके सारे जाणै सै के यूहन्ना साच्चीये नबी था।”

7 आखर उननै जवाब दिया, “हमनै न्ही बेरा के वो किस ओड़ तै था।”

8 यीशु नै उनतै कह्या, “तो मै भी कोनी बतान्दा के मै ये काम किस हक तै करूँ सुं।”

????? ?????????? ?? ??????? ?

9 फेर वो माणसां तै यो उदाहरण कहण लाग्या: “किसे माणस नै अंगूर का बाग लगाया, अर किसानां तै उसनै ठेक्का दे दिया अर घणे दिनां खात्तर परदेस चल्या गया।

10 जिब बखत आया तो उसनै किसानां के धरै एक नौक्कर ताहीं भेज्या के वे अंगूर के बाग के कुछ फळां का हिस्सा उसनै देवै, पर किसानां नै उस ताहीं छेतकै रित्ते हाथ्यां बोहड़ा दिया।

11 फेर उसनै एक और नौक्कर ताहीं भेज्या, अर उननै उस ताहीं भी छेतकै अर उसकी बेजती करकै रित्ते हाथ्यां बोहड़ा दिया।

12 फेर उसनै तीसरा भेज्या, उननै उस ताहीं भी घायल करकै लिकाइ दिया।”

13 फेर अंगूर के बाग के माल्लिक नै कह्या, “मै के करूँ? मै अपने प्यारे बेट्टे नै भेज्जुगा, हो सकै सै वे उसकी इज्जत करै।”

14 जिब किसानां नै उस ताहीं देख्या तो आप्स म्ह विचार करण लागगे, “यो तो वारिस सै, आओ, हम इसने मार दया के विरासत म्हारी हो जावै।”

15 अर उननै उस ताहीं अंगूर के बाग तै बाहरणै लिकाड़के मार दिया। इस करके अंगूर के बाग का मालिक उनके गेल्या के करेगा?

16 वो आके उन किसानां का नाश करेगा, अंगूर के बाग औरां नै सोपेगा। न्यू सुणके उननै कह्या, “परमेसवर करै इसा ना हो।”

17 उसनै उनकी ओइ देखके कह्या, फेर यो के लिख्या सै: “जिस पत्थर नै राजमिस्त्रियाँ नै निकम्मा ठहराया था, वोए कोणे का सिरा होग्या।

18 “जो कोए उस पत्थर पै पड़ैगा वो चकणाचूर हो ज्यागा, अर जिसपै वो पड़ैगा, उसनै पिस देवैगा।”

~~~~~

19 उससे बखत शास्त्रियाँ अर प्रधान याजकां नै उस ताहीं पकड़णा चाह्या, क्यूँके वे समझगे थे के उसनै म्हारै पै यो उदाहरण कह्या, पर वे माणसां तै डरगे।

20 अर वे उसकी टाह म्ह लागे अर भेदिए भेज्जै के धर्म का भेष धरके उसकी कोए ना कोए बात पकड़ै, ताके उस ताहीं राज्यपाल के हाथ अर अधिकार म्ह सौंप दें।

21 उननै उसतै न्यू बुद्धया, “हे गुरु, हमनै बेरा सै के तू ठीक कहवै अर सिखावै भी सै, अर किसे की मेरै कोनी लेन्दा, बल्के परमेसवर की राह सच्चाई तै बतावै सै।

22 के म्हारा कैसर तै चुंगी देणा ठीक सै या कोनी?”

23 उसनै उनकी श्याणपत ताहीं ताड़के उनतै कह्या,

24 “एक दीनार (एक दिन की मजदूरी) मन्ने दिखाओ। इसपै किसकी छाप अर नाम सै?” उननै कह्या, “कैसर का।”

25 उसनै उन ताहीं कह्या, “तो जो कैसर का सै, वो कैसर नै द्यो, अर जो परमेसवर का सै, वो परमेसवर नै द्यो।”

26 वे माणसां के स्याम्ही इस बात म्ह उसनै पकड़ कोनी सके, बल्के उसके जवाब तै हैरान होके बोल-बाल्ले रहगे।

~~~~~

27 फेर सद्की जो कहवै सै के मेरे होया का जिन्दा होणा सै ए कोनी उन म्ह तै कुछ नै उसके धारै आके बुद्धया,

28 “हे गुरु, मूसा नबी नै म्हारै खात्तर यो लिख्या सै: जै किसे का भाई अपणी घरआळी के रहन्दे बेऊलादा मर जावै, तो उसका भाई उसकी घरआळी तै ब्याह करले, अर अपणे भाई के खात्तर पीढ़ी पैदा करै।

29 सात भाई थे, पैहल्डा भाई ब्याह करके बेऊलादा मरग्या।

30 फेर दुसरे

31 अर तीसरे नै भी उस बिरबान्नी तै ब्याह कर लिया। इस तरियां तै सातु बेऊलादे मरगे।

32 आखर म्ह वा बिरबान्नी भी मरगी।

33 आखर म्ह जिन्दा होण पै वा उन म्ह तै किसकी घरआळी होवैगी, क्यूँके वा सातुवां की घरआळी हो ली थी।”

34 यीशु नै उनतै कह्या, “इस युग की ऊलादां म्ह ब्याह होवै सै,

35 पर जो माणस इस जोगगे ठहरैगें के उस युग नै अर मेरे होया म्ह तै जिन्दा उट्टणके पद नै पा लेवै, उन म्ह ब्याह शादी कोनी होन्दी।

36 वे दुबारे मरण के भी कोनी, क्यूँके वे सुगंदतां की ढाळ होवैगें, अर पुनरुत्थान की ऊलाद होणे तै परमेसवर की भी ऊलाद होवैगें।

37 पर इस बात ताहीं के मेरे होए जिन्दा होवै सै, मूसा नबी नै भी झाड़ी की कहाँनी म्ह दिखाया सै के वो प्रभु ताहीं अब्राहम का परमेसवर, अर इसहाक का परमेसवर अर याकूब का परमेसवर कहवै सै।”

38 परमेसवर तो मुर्दा का कोनी पर जिन्दा का परमेसवर सै: क्यूँके उसके लोवै सारे जिन्दे सै।”

39 फेर न्यू सुणकै शास्त्रियाँ म्ह तै कुछ नै न्यू कह्या, “हे गुरु, तन्नै ठीक कह्या।”

40 अर उननै दुबारे उसतै कुछ और बुद्धझण की हिम्मत कोनी करी।

~~~~~

41 फेर उसने उनतै बुद्धझया, “मसीह नै दाऊद की ऊलाद किस तरियां कहवै सै?”

42 दाऊद खुदे भजन संहिता की किताब म्ह कहवै सै:

43 प्रभु नै मेरै प्रभु तै कह्या, “मेरै सोळे कान्ही बैठ, जिब ताहीं के मै तेरे बैरियाँ तेरे पायां म्ह न्ही झुका दियुँ।”

44 दाऊद तो उसनै प्रभु कहवै सै, “तो फेर वो उसकी ऊलाद किस ढाळ होया?”

~~~~~

45 जिब सारे सुणै थ, तो उसनै अपणे चेल्यां तै कह्या,

46 “शास्त्रियाँ तै चौकन्ने रहियो, जिनताहीं लाम्बे-लाम्बे चोगे पहरकै हांडणा आच्छा लागै सै, अर जिन नै बजारां म्ह नमस्कार, अर आराधनालयाँ म्ह खास बैठणा अर जिम्मण म्ह खास जगहां प्यारी लागै सै।

47 वे बिधवायाँ के घर खा जावै सै, अर दिखाण खात्तर घणी वार ताहीं प्रार्थना करदे रहवै सै: ये घणा दण्ड पावैगें।”

21

~~~~~

1 फेर उसनै निगाह ठाकै सहकारां ताहीं अपणा-अपणा दान भण्डार म्ह घालदे देख्या।

2 उसने एक कंगाल बिधवा ताहीं भी उस म्ह दो दमड़ी (जो एक धेले के बराबर होवै सै) घालदे देख्या।

3 फेर उसनै कह्या, “मै थमनै सच कहूँ सूं के इस कंगाल बिधवा नै सारया तै बाध घाल्या सै।

4 क्यूँके उन सारया नै अपणी-अपणी बढदी म्ह तै दान म्ह कुछ घाल्या सै, पर इसनै अपणी घटी म्ह तै अपणी सारी कमाई घाल्ली सै।”

~~~~~

5 जिब घणखरे माणस मन्दर के बाबत कहरे थ के वो किसे सुथरे पत्थरां अर भेटां की चिज्जां तै समारया गया सै, तो उसनै कह्या,

6 “वे दिन आवैगें, जिन म्ह यो सारा जिन नै थम देक्खो सो, उन म्ह तै उरै किसे पत्थर पै पत्थर भी कोनी रहवैगा, जो गेरया न्ही जावैगा।”

~~~~~

7 उननै उसतै बुद्धझया, “हे गुरु, यो सारा कद होवैगा? अर ये बात जिब पूरी होण पै होवैगी, तो उस बखत की के निशान्नी होवैगी?”

8 उसनै कह्या, “चौकन्ने रहियो के भकाए ना जाओ, क्यूँके घणखरे मेरै नाम तै आकै कहवैगें, ‘मै वोए सूं,’ अर न्यू भी के, ‘बखत लोवै आण पोंहच्या सै।’ थम उनकै पाच्छै ना चले जाइयो।

9 जिब थम रोळे अर झगड़े का जिकर सुणो तो घबराईयो ना, क्यूँके इनका पैहल्या होणा जरूरी सै, पर उस बखत जिब्बे खात्मा कोनी होवैगा।”

10 फेर उसनै उनतै कह्या, “जात पै जात अर राज्य पै राज्य चढाई करैगा,

11 अर बड़े-बड़े हाल्लण आवैगें, अर जगहां-जगहां अकाळ अर महामारियाँ पड़ैगी, अर अकास म्ह खतरनाक बात अर बड़े-बड़े निशान जाहिर होवैगें।”

12 पर इन सारी बाततां तै पैहल्या मेरै नाम के बाबत थमनै पकड़ैगें, अर काल करैगें, अर आराधनालयाँ म्ह सौपैगें, अर जेळ म्ह गिरवावैगें, राज्यपालों अर राजयां के स्याम्ही ले जावैगें।

13 पर यो थारे खात्तर गवाही देण का मौक्का हो जावैगा।

14 इस करके अपणे-अपणे मन म्ह टान ल्यां के हम पैहल्या तै जवाब देण की फिक्कर कोनी करागें।

15 क्यूँके मै थारे ताहीं इसा बोल अर समझ दियुँगा के थारे सारे बिरोधी सामना या खण्डन कोनी कर सकैगें ।

16 थारे माँ-बाप, अर भाई अर कुण्वा, अर साथी भी थमनै पकड़वावैगें, उरै ताहीं के थारे म्ह तै कईयाँ नै मरवा देवैगें ।

17 मेरे नाम के कारण सारे माणस थारे तै बैर राक्खैगें ।

18 पर थारे सिर का एक बाळ भी बाँका कोनी होवैगा ।

19 अपने धीरज तै थम अपनी जान नै बचाए राक्खोगे ।

?????? ? ? ? ? ? ? ? ? ? ? ? ? ? ? ? ?

20 “जिब थम यरुशलेम की पलटन तै घिरया होया देख्खो, तो जाण लियो के उसका उजड़ जाणा लोवे सै ।

21 फेर जो यहूदिया परदेस म्ह हों पहाड़ां पै भाज जावै, अर जो यरुशलेम नगर के भीत्तर हों वे बाहरणै लिकड़ जावै, अर जो गाम्मां म्ह हों वे उस म्ह न्ही जावै ।

22 क्यूँके ये बदला लेण के इसे दिन होंगे, जिन म्ह लिक्खी होई सारी बात पूरी हो जावैगी ।

23 उन दिनां म्ह जो गर्भवती अर दूध पिलान्दी बिरवान्नी होवैगीं, उनके खात्तर भागणा भी मुश्किल होगा! क्यूँके देश म्ह बड़ड़ा कळश अर इन माणसां पै बड़ड़ा परकोप होवैगा ।

24 वे तलवार की कौर हो जावैगें, अर सारे देश के माणसां म्ह कैदी होकै पोहुचाये जावैगें, अर जिब ताहीं गैर यहूदी का बखत पूरा कोनी होवै, जद ताहीं यरुशलेम गेरजात्तां तै रोँद्या जावैगा ।

???? ? ? ? ? ? ? ? ? ? ? ? ? ? ? ? ?

25 “सूरज, चाँद, अर तारां म्ह निशान्नी दिखैगी, अर धरती पै देश-देश के आदमियाँ पै संकट होगा, क्यूँके वे समुन्दर के गरजण अर लहरां के रोळें तै घबरां जावैगें ।

26 भय के कारण अर दुनिया पै आण आळी घटनायां की बाट देखदे-देखदे माणसां के जी म्ह जी कोनी रहवैगा, क्यूँके अकास की शक्तियाँ हलाई जावैगी ।

27 फेर वे माणस के बेटटे नै सामर्थ अर बड़डी महिमा के गेल्या बादळां पै आन्दे देखैगें ।

28 जिब ये बात होण लागै, तो सीधे होकै अपने सिर उप्पर ठाईयो, क्यूँके थारा छुटकारा लोवे होगा ।”

???? ? ? ? ? ? ? ? ? ? ? ? ? ? ? ? ?

29 यीशु ने उनतै एक उदाहरण देके कह्या, “अंजीर के दरखत अर सारे दरखतां नै देख्खो ।

30 ज्योए उन म्ह कोंपले लिकड़े सै, तो थम खुद जाण ल्यो सो, के गर्मी का बखत लोवे सै ।

31 इस तरियां तै जिब थम ये बात होन्दे देख्खो, तो जाण ल्यो के परमेसवर का राज्य लोवे सै ।”

32 मै थमनै साच्ची कहूँ सूँ के जिब ताहीं ये सारी बात न्ही हो ले, जद तक इस पीढ़ी का कदे भी अन्त कोनी होवैगा ।

33 धरती अर अकास टळ जावैगें, पर मेरी बात कदे न्ही टळैगी ।

???? ? ? ? ?

34 “इस करके चौकन्ने रहियो, इसा ना हो के थारा मन खुमार, अर मतवालेपण, अर इस जिन्दगी की फिक्र तै सुस्त हो जावै, अर वो दिन थारे पै फन्दे की ढाळ चाणचक आण पड़ै ।

35 क्यूँके वो सारी धरती के सारे बासिन्दा पै इस तरियां आण पड़ैगा ।

36 इस करके जागदे रहो अर हर बखत प्रार्थना करदे रहो के थम इन सारी आण आळी घटनायां तै बचण अर माणस के बेटटे के स्याम्ही खड़े होण के जोगगे बण सको ।”

37 वो दिन म्ह मन्दर म्ह उपदेश देवै था, अर रात नै बाहरणै जाकै जैतून नामक पहाड़ पै रह्या करै था,

38 अर सबैरै नै तड़के सारे माणस उसकी सुणण की खात्तर मन्दर म्ह उसकै धोरै आया करै थे ।

## 22

\*\*\*\*\*

- 1 अखमीरी रोट्टी का त्यौहार जो फसह कुह्वावै सै, धोरै था,
- 2 अर प्रधान याजक अर शास्त्री इस बात की टोहू म्ह थे। के यीशु नै किस तरियां मारै, पर वे माणसां तै डरै थे।

\*\*\*\*\*

- 3 फेर शैतान यहूदा म्ह बडगया, जो इस्करियोती कुह्वावै अर बारहां चेल्यां म्ह गिण्या जावै था।
- 4 उसनै जाकै प्रधान याजकां अर पहरेदार के सरदारां के गेल्या बातचीत करी के किस तरियां यीशु नै उनके हाथ पकड़वांवां।
- 5 वे राज्जी होए, अर उस ताहीं रुपिये देण का वादा किया।
- 6 वो मान गया अर मौक्का टोह्ल लागया के जिव भीड़ न्ही हो तो उसनै उनके हाथ पकड़वा दे।

\*\*\*\*\*

- 7 फेर अखमीरी रोट्टी के त्यौहार का दिन आया, जिसम्ह फसह का मेम्ना बलि करणा जरूरी था।
- 8 यीशु नै पतरस अर यूहन्ना ताहीं यो कहकै भेज्या, “जाकै म्हारै खाण खात्तर फसह त्यार करो।”
- 9 उननै यीशु तै बुझया, “तू कित्त चाहवै सै के हम उसनै त्यार करा?”
- 10 यीशु नै चेल्यां ताहीं कह्या, देखो, नगर म्ह बडतेए एक आदमी पाणी का पैदा टाए होए थमनै मिलैगा, जिस घर म्ह वो जावै थम उसके पाच्छै चले जाइयो,
- 11 अर उसके घर के माल्लिक तै कहियो, “गुरु तेरे तै बुझ्यै सै के वा बैठक कित्त सै जिस म्ह नै अपने चेल्यां के गेल्या फसह खाऊँ?”
- 12 वो थमनै एक सजी-सजाई बड़ी अटारी दिखा देवैगा, ओड़ैए त्यारी करियो।
- 13 उननै जाकै, जिसा उसनै उनतै कह्या था, उससे तरियां पाया अर फसह का भोज त्यार करया।

\*\*\*\*\*

- 14 जद वा घड़ी आगी, के यीशु पुरेरितां गेल्या खाणा खाण बेठचा।
- 15 अर उसनै उन ताहीं कह्या “मन्नै बड़ी लालसा थी के मरण तै पैहलया यो फसह भोज थारे गेल्या खाऊँ।
- 16 क्यूँके मै थमनै सच कहूँ सूँ के मै इसनै जिव तक न्ही खाऊँगा जब तक यो परमेसवर के राज्य म्ह पूरा न्ही हो।”
- 17 फेर उसनै अंगूरां के रस का कटोरा लेकै परमेसवर का धन्यवाद करया अर कह्या, “इसनै ल्यो अर आप्स म्ह बाँट ल्यो।
- 18 क्यूँके के मै थमनै कहूँ सूँ के जिव ताहीं परमेसवर का राज्य न्ही आवै तब तक मै अंगूर का रस डब तै कदे न्ही पिऊँगा।”
- 19 फेर यीशु नै रोट्टी ली अर परमेसवर का धन्यवाद करकै तोड़ी, अर चेल्यां ताहीं या कहकै दी, “या मेरी देह सै जो थारे खात्तर दी जा सै: मेरी याद म्ह न्युए करया करो।”
- 20 इसे तरियां तै उसनै खाणे के पाच्छै कटोरा भी यो कहन्दे होए दिया, “यो कटोरा मेरै उस लहू म्ह जो थारे खात्तर बहाया जा सै नया करार सै।
- 21 पर देखो, जो मन्नै पकड़वावैगा वो म्हारे गेल्या इस भोज म्ह शामिल सै।
- 22 क्यूँके मै माणस का बेट्टा तो जिसा मेरे खात्तर तय करया गया सै, ठीक उससे तरियां होण लागरया सै, पर धिक्कार सै उस माणस पै जिसकै जरिये मै पकड़वाया जाऊँ सूँ!”
- 23 फेर वे आप्स म्ह पूच्छताछ करण लागये के म्हारै म्ह तै कौण सै, जो यो काम करैगा।

\*\*\*\*\*

- 24 उन म्ह या बहस भी होगी के म्हारे मै तै कौण बड़ड़ा समझा जावै सै।



25 यीशु ने उन ताहीं कह्या, “और गैर यहूदियाँ के राजा उनपै राज करै सै, अर जो उनपै हक जमावै सै वे भले कुह्वावै सै।

26 पर थम इसे ना होइयो, बल्के जो थारे म्ह बड्डा सै वो छोट्टे के बरोब्बर अर जो प्रधान सै, वो सेवक के बरोब्बर बणै।

27 क्यूँके बड्डा कोण सै, वो जो खाणे पै बैठचा सै, या वो जो सेवा करै सै? के वो न्ही जो ज़िम्मण बैठचा सै? पर मै थारे बिचाळै सेवक बरोब्बर सूं।

28 थम वो सों, जो मेरी मुसीबतां म्ह लगातार मेरै गेल्या रहे,

29 अर जिस तरियां मेरै पिता नै मेरे खात्तर एक राज्य ठहराया सै, उस्से तरियां मै भी थारे खात्तर ठहराऊँ सूं,

30 ताके थम मेरै राज्य म्ह मेरी मेज पै खाओ-पीओ बल्के सिंहासनां पै बैठके इस्त्राएल के बारहां गोत्रां का न्याय करो।”

~~~~~

31 “शमोन, हे शमोन! देख शेतान नै परमसवर तै हुकम ले लिया सै, के थारे ताहीं परखै जिस तरियां किसान गेहूँ नै भूसी तै न्यारा करै सै।

32 पर मन्नै तेरे खात्तर बिनती करी ताके थम मेरे पै विश्वास करणा ना छोड़ दे, अर जिव थम पाप करणा छोड़ दे, तो अपणे भाईयाँ नै भी इसाए करण खात्तर कहियो।”

33 उसनै उसतै कह्या, “हे प्रभु मै, तेरे गेल्या जेळ जाण, बल्के मरण नै भी त्यार सूं।”

34 उसनै कह्या, “हे पतरस, मै तन्ने सच कहूँ सूं, के आज मुर्गा बाँग न्ही देवैगा जब ताहीं तू तीन बार मेरै बारै म्ह मुकरैगा जावैगा, के मै तन्ने न्ही जाणदा।”

~~~~~

35 फेर यीशु नै चेल्यां ताहीं कह्या, “जिव मन्नै थारे ताहीं वचन सुणाण खात्तर बटुए, अर झोळी, अर जूत्याँ के बिना भेज्या था, तो के थमनै किसे चीज की कमी होई थी?” उननै कह्या, “किसे चीज की न्ही।”

36 उसनै चेल्यां तै कह्या, “पर इब जिसके धोरै बटुआ ना हो वो उसनै ले अर उस्से तरियां जिसके धोरै तलवार न्ही हो तो वो अपणे लत्ते बेचके एक मोल लेवै।

37 क्यूँके मै थमनै कहूँ सूं, यो जो पवित्र ग्रन्थ म्ह लिख्या सै, वो गुन्हेगार गेल्या गिण्या गया, उसका मेरै म्ह पूरा होणा जरूरी सै, क्यूँके मेरै बारै म्ह लिखी सारी बाततां का होणा जरूरी सै।”

38 चेल्यां नै कह्या, “हे प्रभु याइँ दो तलवार सै।” यीशु नै उन ताहीं कह्या, “भतेरी सै।”

~~~~~

39 फेर यीशु वारणे लिकड़के अपणी रीत के मुताबिक जैतून के पहाड़ पै गया, अर चेल्लें उसके पाच्छे हो लिये।

40 उस जगहां पोहुच के उसनै चेल्यां तै कह्या, “प्रार्थना करो के थम परखे ना जाओ।”

41 अर आप उनतै न्यारा एक डळा फेकण के बराबर जितनी दूर गया, अर गोड्डे टेक के प्रार्थना करण लाग्या,

42 “हे पिता जै तू चाहवै तो इस दुख के कटोरे नै मेरै धोरै तै हटा ले, तोभी मेरी न्ही पर तेरी मर्जी पूरी हो।”

43 फेर सुर्ग तै एक सुर्गदूत उसनै दिख्या जो उसनै सामर्थ दिया करै था।

44 वो और घणे संकट म्ह काल होके और भी मन तै प्रार्थना करण लाग्या, अर उसका पसीन्ना मान्नो लहू की बड्डी-बड्डी बूँदां के जू धरती पै गिरै था।

45 फेर वो प्रार्थना तै उठचा अर अपणे चेल्यां के धोरै आके उन ताहीं उदासी के मारे सोन्दे पाया।

46 अर उनतै कह्या, “क्यूँ सोवों सों? उट्टो, प्रार्थना करो के थम परखे ना जाओ।”

~~~~~

47 यीशु न्यू कहण ए लागरया था, के एक भीड़ आई, अर उन बारहां चेल्यां म्ह तै एक जिसका नाम यहूदा था उसके आगै-आगै आण लाग रह्या था। वो यीशु के धोरे आया के उसनै चूम ले।

48 यीशु नै उसतै कह्या, “हे यहूदा, के तू चुम्मा लेके माणस के बेट्टा नै पकड़वावै सै?”

49 उसके साथियां नै जद देख्या के, के होण आळा सै, तो कह्या “हे प्रभु, के हम तलवार चलावां?”

50 अर उन म्ह तै एक ने महायाजक के नौकर पे तलवार चलाके उसका सोळा कान उड़ा दिया।

51 इसपै यीशु नै कह्या, “इब बस करो।” अर उसका कान छूके उस ताहीं ठीक करया।

52 फेर यीशु नै प्रधान याजकां अर मन्दर के पैहरेदारां के सरदारां अर यहूदी अगुवां तै, जो उसपै चढ़ गये थे, कह्या, “के थम मन्नै डाकू जाणके तलवार अर लाट्टी लेके लिकड़े सो?”

53 जद मै मन्दर म्ह हरेक दिन थोरे गेल्या था, तो थमनै मेरै हाथ भी कोनी लाया, पर यो थारा बखत सै, अर अन्धकार का हक सै।”

### ~~~~~

54 फेर वे यीशु नै पकड़के ले चाल्ले, अर महायाजक के घर म्ह लाये, पतरस दूरे ए दूर उसके पाच्छै-पाच्छै चाल्ले था।

55 अर जद वे आंगण म्ह आग सुलगाके कट्टे बेट्टे, तो पतरस भी उसके बिचाल्ले बैठगया।

56 फेर एक नौकराणी उस ताहीं आग के चाँदणे म्ह बेठचा देखके अर उस कान्ही देखके कहण लागगी, “यो भी तो उसके गेल्या था।”

57 पर पतरस नै यो कहके मना कर दिया, के “हे, जनानी मै उसने कोनी जाणदा।”

58 थोड़ी हाण पाच्छै किसे और नै पतरस ताहीं देखके कह्या, “तू भी तो उन म्ह तै ए सै।” उसने कह्या, “हे भाई, मै वो कोनी।”

59 कोए एक घंटे के पाच्छै एक और माणस पक्के विश्वास तै कहण लाग्या, “सही म्ह यो भी तो उसके गेल्या था, क्यूँके यो गलीलवासी सै।”

60 पतरस नै कह्या, “हे भाई, मै न्ही जाणदा के तू के कहवै सै!” वो या कहवैए था के मुर्गे नै बाँग देई

61 फेर घूमके प्रभु नै पतरस की ओड़ देख्या अर पतरस नै प्रभु की बात याद आई जो उसने कही थी: “आज मुर्गे के बाँग देण तै पैहल्या, तू तीन वर इन्कार करैगा।”

62 अर वो बारणै लिकड़के नै फूट-फूटके रोण लाग्या।

### ~~~~~

63 जो माणस यीशु नै पकड़े होए थे, वे उसका मजाक बणाके पीटण लागगे,

64 अर उसकी आँख ढँक के उसतै बुझ्या, “भविष्यवाणी करके बता के तेरे किसनै मारया!”

65 अर उननै घणीए बुराई की बात उसके विरोध म्ह कही।

### ~~~~~

66 जब दिन लिकड़या तो यहूदी अगुवें, प्रधान याजक अर शास्त्री कट्टे होए, अर उस ताहीं अपणी बड़डी सभा म्ह ल्याके बुझ्या,

67 “जै तू मसीह सै, तो म्हारै ताहीं कह दे!” उसने उनतै कह्या, “जै मै थारे तै कहूँ, तो विश्वास कोनी करोगे,

68 अर जै बुझ्हु, तो जवाब न्ही दोगे।

69 पर इब तै मै माणस का बेट्टा सर्वशक्तिमान परमेसवर के सोळी ओड़ बेठचा रहूँगा।”

70 इसपै सब नै कह्या, “तो के तू परमेसवर का बेट्टा सै?” यीशु नै उन ताहीं कह्या, “थम अपणे-आप्ये कहो सों, क्यूँके मै सूँ।”

71 फेर उननै कह्या, “इब हमनै गवाह की के जरूरत सै, क्यूँके हमनै आप्ये उसके मुँह तै सुण लिया सै।”

## 23

~~~~~

- 1 फेर सारी मंडळी उठके यीशु नै राज्यपाल पिलातुस कै धोरै लेग्यी ।
- 2 वो ये कहकै उसपै इल्जाम ल्याण लागगे, “हमनै इस ताहीं माणसां नै भकादे, अर कैसर नै चुंगी देण तै मना करदे, अर खुद नै मसीह, राजा कहन्दे होए सुण्या सै ।”
- 3 पिलातुस नै उसतै बुझ्झया, “के तू यहूदियाँ का राजा सै?” उसनै उस ताहीं जवाब दिया, “तू आप ए कहण लागरया सै ।”
- 4 फेर पिलातुस नै प्रधान याजकां तै अर माणसां तै कह्या, “मन्नै इस आदमी म्ह कोए खोट न्ही पाया ।”
- 5 पर वे और भी विश्वास के गेल्या कहण लागगे, “यो गलील परदेस तै लेके याडै ताहीं, सारे यहूदिया परदेस के माणसां नै उपदेश देकै दंगा करवावे सै ।”
- 6 या सुणकै पिलातुस नै बुझ्झया, “के यो आदमी गलीलवासी सै?”
- 7 अर या जाणके के वो हेरोदेस की रियासत का सै, उस ताहीं हेरोदेस के धोरै भेज दिया, क्यूँके उस बखत वो भी यरुशलेम म्ह था ।

~~~~~

- 8 हेरोदेस यीशु नै देखके घणा राज्जी होया, क्यूँके वो घणे दिनां तै उसनै देखणा चाहवै था, इस खात्तर के उसके बारै म्ह सुण्या था, अर उसतै किमे चमत्कार देखण की आस राक्खै था ।
- 9 वो उसतै भोत-सी बात बुझता रह्या, पर उसनै उस ताहीं कोए भी जवाब न्ही दिया ।
- 10 प्रधान याजक अर शास्त्री खडे होए तन मन तै उसपै इल्जाम लगान्दे रहे ।
- 11 फेर हेरोदेस नै अपणे सिपाहियाँ के गेल्या उसकी बेजती करके मजाक उड़ाया, अर भड़कीले लत्ते पिराह के उस ताहीं पिलातुस के धोरै भेज दिया ।
- 12 उससे दिन पिलातुस अर हेरोदेस साथी बणगे, इसतै पैहल्या वे एक-दुसरे के दुश्मन थे ।

~~~~~

- 13 पिलातुस नै प्रधान याजकां, सरदारां अर माणसां नै बुलाकै उन ताहीं कह्या,
- 14 “थम इस आदमी नै माणसां का भकाण आळा बताकै मेरै धोरै ल्याए सों, अर देखको, मन्नै धारे स्याम्ही उसकी जाँच करी, पर जिन वात्तां का थम उसपै इल्जाम लगाओ सों उन वात्तां के बारै म्ह मन्नै इस म्ह कोए भी खोट कोनी पाया,
- 15 ना हेरोदेस नै दोषी पाया, क्यूँके उसनै इस ताहीं म्हारै धोरै भेज दिया सै: अर देखको, उसतै इसा कुछ कोनी होया के वो मौत की सजा के काबिल ठहराया जावे ।
- 16 इस खात्तर मै इसने छित्वा के छोड़ द्यु सूं ।”
- 17 (पिलातुस त्योंहार के बखत उनके खात्तर एक कैदी नै छोड़ण पै मजबूर था ।)
- 18 फेर सारे मिलकै चिल्ला उठे, “इसका काम तमाम करदे, अर म्हारै खात्तर बरअब्बा नै छोड़दे!”
- 19 वो किसे बलवे के कारण जो नगर म्ह होया था, अर हत्या के कारण जेळ म्ह गेरया गया था
- 20 पर पिलातुस नै यीशु ताहीं छोड़ण की इच्छा तै माणसां ताहीं फेर समझाया,
- 21 आखर उननै रुक्के मारके कह्या, “उसनै क्रूस पै चढ़ा, क्रूस पै!”
- 22 उसनै तीसरी बर उन ताहीं कह्या, “क्यातै उसनै के बुरा करया सै? मन्नै उस म्ह मौत की सजा के काबिल कोए बात कोनी पाई । इस तरियां मै इसने छित्वा के छोड़ देऊ सूं ।”
- 23 पर वे रुक्के मार-मारके पाच्छै पड़ गये के वो क्रूस पै चढ़ाया जावे, अर उनका रुक्के मारणा तेज होगया ।
- 24 आखर पिलातुस नै हुकम दिया के उनकी बिनती के मुताबिक करया जावै ।
- 25 उसनै उस आदमी के जो बलवे अर हत्या के कारण जेळ म्ह गेरया गया था, अर जिसनै वो माँग्ये थे, छोड़ दिया, अर यीशु नै उनकी इच्छा के मुताबिक सौप दिया ।

~~~~~

26 जिव वो यीशु नै लेके जावै थे, तो उननै एक माणस जिसका नाम शमौन कुरेनी था, जो गाम म्ह तै आवै था, पकड़के उसपै क्रूस लाद दिया के उस्से यीशु के पाच्छे-पाच्छे ले चाल्ले।

27 माणसां की भीड़ उसके पाच्छे-पाच्छे हो ली उन म्ह घणीए विरबान्नी भी थी जो उसके खात्तर छात्ती पीट्टै अर रोवै धोवै थी।

28 यीशु नै उनकै कान्ही मुड़के कह्या, “हे यरुशलम की बेटियों, मेरै खात्तर ना रोओ, पर अपणे अर अपणे बाळकां के खात्तर रोओ

29 क्यूँके देख्खो, वे दिन आवै सै, जिन म्ह माणस कहवैगें, “धन्य सै वे जो विरबान्नी जो बाँझ सै अर वे गर्भ जिननै ऊलाद न्ही पैदा करी, अर वे स्तन जिन नै दूध न्ही पियाया।”

30 उस बखत माणस पहाड़ां अर टीलां तै कहण लाग्ये के म्हारै पै आण पड़ो, अर हमनै ढँक ल्यो।”

31 क्यूँके वे जिव हरे रुखां गेल्या इसा करै सै, तो सूख्या के गेल्या के किमे न्ही करया ज्यागा?

32 वे और दो माणसां नै भी जो बुरे काम करण आळे थे यीशु के गेल्या मारण नै ले चाल्ले।

33 जद वे उस जगहां पै पोहचे जो “खोपड़ी” यानी इब्रानी भाषा म्ह “गुलगुता” कुह्वावै सै, तो उननै ओड़ै यीशु ताहीं अर बुरे काम करण आळे ताहीं भी, एक नै सोळी अर दुसरे नै ओळी ओड़ क्रूस पै चढ़ाए।

34 फेर यीशु नै कह्या, “हे पिता इन्हनै माफ कर, क्यूँके ये न्ही जाणदे के ये के करै सै।” अर उननै पर्ची गेर के उसके लत्ते बांड लिए।

35 माणस खड़े-खड़े देखै थे, अर सरदार भी मजाक करके कहवै थे “इसनै औरां ताहीं बचाया, जै यो परमेसवर का मसीह सै, अर उसका छाटचा होए सै, तो अपणे-आपनै बचाले।”

36 सिपाही भी धोरै आके अर सिरका देके उसका मजाक बणा के कहवै थे,

37 “जै तू यहूदियाँ का राजा सै, तो अपणे-आपनै बचाले!”

38 अर उसके उप्पर एक दोषपत्र भी लगा दिया: “यो यहूदियाँ का राजा सै।”

~~~~~

39 जो बुरे काम करणीये ओड़ै लटकाए गए थे, उन म्ह तै एक नै उसकी बेजती करके कह्या, “के तू मसीह कोनी? फेर अपणे-आपनै अर हमनै बचा!”

40 इसपै दुसरे नै उस ताहीं धमका के कह्या, “के तू परमेसवर तै भी कोनी डरदा? तू भी तो वाए सजा पा रया सै,

41 हम तो न्याय के मुताबिक सजा पारे सां, क्यूँके हम अपणे काम्मां की ठीक सजा पारे सां, पर उसनै कोए गलत काम न्ही करया।”

42 फेर उसनै कह्या, “हे यीशु, जद तू अपणे राज्य म्ह आवै, तो मेरी खियास करिये।”

43 उसनै उस ताहीं कह्या, “मै तन्नै सच कहूँ सूँ के आजै तू मेरै गेल्या सुर्गलोक म्ह होगा।”

44 करीबन दोफ्फारै तै तीन बजे ताहीं सारे देश म्ह अन्धेरा होया रह्या,

45 अर सूरज का चाँदणा जान्दा रह्या, अर मन्दर का पड़दा विचाळै तै पाटग्या,

46 अर यीशु नै जोर तै किल्की मारके कह्या, “हे पिता, मै अपनी आत्मा तेरे हाथ्थां म्ह सौंपू सूँ।” अर या कह के जी दे दिया।

47 सूबेदार नै जो कुछ होया था देखके परमेसवर की बड़ाई करी, अर कह्या, “पक्का यो माणस धर्मी था।”

48 अर भीड़ जो यो देखखण नै कट्ठी होई थी, इस घटना नै देखके दुख के मारे छात्ती पीटती होई बोहड़गी।

49 पर उसके सब जाण-पिच्छाण, अर जो विरबान्नी गलील परदेस तै उसके गेल्या आई थी, दूर खड़ी यो सब देखै थी।

~~~~~

50 ओड़ै यूसुफ नाम का यहूदी अगुवां की सभा का एक सदस्य था जो आच्छा अर धर्मी आदमी था

51 वो सभा के फैसले अर इस काम तै राज्जी कोनी था। वो यहूदिया परदेस के नगर अरिमतिया गाम का रहण आळा अर परमेसवर के राज्य की बाट देखण आळा था।

52 उसनै पिलातूस के धोरै जाकै यीशु की लाश माँगी,

53 अर उस ताहीं उतार के मलमल की चादर म्ह लपेट्या, अर एक कवर म्ह धरया, जो पत्थरां म्ह खुदी होए थी, अर उस म्ह कोए कदे न्ही राख्या गया था।

54 वो त्त्यारी का दिन था, अर आराम का दिन शुरु होण आळा था।

55 उन बिरबानियाँ नै जो उसके गेल्या गलील परदेस तै आई थी, पाच्छै-पाच्छै जाकै उस कवर ताहीं देख्या, अर यो भी के उसकी लाश किस रीति तै राक्खी गयी सै।

56 फेर उननै घर बोहड़ के खुशबुदार चीज अर इत्र त्त्यार करया, अर आराम कै दिन उननै हुकम के मुताबिक आराम करया।

## 24

\*\*\*\*\*

1 पर हफ्ते के पहलड़े दिन तड़के-तड़के नै वे उन खुशबुदार चिज्जां नै जो उननै बणाई थी, लेकै यीशु की कवर पै आई।

2 उननै पत्थर कवर पै तै गिरइया होया पाया,

3 पर भीत्तर जाकै प्रभु यीशु की लाश कोनी पाई।

4 जब वे इस बात तै हेरान होरी थी तो देखो दो माणस चमकदे होए लत्ते पहरी होए उनके धोरै आण खड़े होए।

5 जब वे डरगी अर धरती की ओड़ मुँह झुकाए रही तो उननै उन ताहीं कह्या, “थम जान्दे नै मरे होया म्ह क्यूँ टोहो सो?”

6 वो उरै कोनी, पर जिन्दा होगया सै। याद करो कै उसनै गलील परदेस म्ह रहंदे होए थारे तै कै कह्या था,

7 जरूरी सै कै मै माणस का बेट्टा पापियाँ कै हाथ्यां म्ह पकड़वाया जाऊँ, अर क्रूस पै चढ़ाया जाऊँ, अर तीसरे दिन जी उठु।”

8 फेर उसकी बात उनके याद आई,

9 अर कवर तै उल्टे आके उननै उन ग्यारहां नै अर, सारया ताहीं ये सब बात कह दी।

10 जिन नै प्रेरितां तै ये बात कही वे \*मरियम मगदलीनी अर योअन्ना अर याकूब की माँ मरियम अर उसके साथ की और भी बिरबान्नी थी।

11 पर उनकी बात उन ताहीं कहाँनी-सी लागगी, अर उननै उसका बिश्वास कोनी करया।

12 फेर पतरस कवर पै भाज्या गया, अर झुककै लत्यां की पट्टियाँ का ढेर पड़े देखे, अर जो होया था उसतै अचम्भा होया करदा होया अपणे घरां चल्या गया।

\*\*\*\*\*

13 उससे दिन उन म्ह तै दो चले इम्माऊस नाम के गाम म्ह जाण लागरे थे, जो यरुशलेम तै कोए सात कौंस की दूरी पै था।

14 वे इन सब बातों पै जो होई थी, आप्स म्ह बातचीत करदे जाण लागरे थे,

15 अर जद वे आप्स म्ह बातचीत अर पूछताछ करै थे तो यीशु खुद धोरै आके उनके गेल्या चाल्लण लाग्या।

16 पर परमेसवर नै उनकी आँख न्यू बन्द कर दी थी कै यीशु ताहीं पिच्छाण ना सकै।

17 यीशु नै उनतै बुझ्या, “ये कै बात सै, जो थम चाल्दे-चाल्दे आप्स म्ह करो सों?” वे खड़े होगे अर उनका मुँह भोत उदास था।

\* 24:10 24:10 मगदला गाम की

18 या सुणकै चेल्यां म्ह तै क्लियुपास नाम के एक चेल्लें नै कह्या, “इसा लागूँ सै के तू यरुशलेम म्ह एकला परदेशी सै, जो न्ही जाण्दा के इन दिनां म्ह इस नगर म्ह के-के होया सै?”

19 यीशु नै उनतै बुझया, “कौण सी बात? उननै उस ताहीं कह्या, यीशु नासरीं जो नबी था उसकी बात, जो परमेसवर अर सारे माणसां के स्याम्ही काम अर वचन म्ह सामर्थी था।

20 अर प्रधान याजकां अर म्हारै सरदारां नै उस ताहीं पकडवा दिया ताके उसतै मौत का हुकम दिया जावै, अर उस ताहीं कूरुस पै चढवाया।

21 पर हमनै उम्मीद थी के योए इस्राएल नै रोमी साम्राज्य तै छुटकारा देवैगा। इन सारी बाततां के सिवा इस घटना नै होए आज तीसरा दिन सै,

22 अर म्हारै म्ह तै कई बिरबानियां नै भी म्हारै ताहीं उळझन म्ह गेर दिया, जो आज सबेरै कब्र पै गयी थी,

23 अर जब उसकी लाश कोनी पाई तो वा या कहन्दी आई के हमनै सुगंदूत्तां के दर्शन पाये, जिन नै कह्या के यीशु जिन्दा सै।

24 फेर म्हारै साधियां म्ह तै कई कब्र पै गये, अर जिसा बिरबानियां नै कह्या था उसाए पाया, पर वो कोनी देख्या।”

25 फेर यीशु नै उन दो चेल्यां तै कह्या, “हे सब बेकुफों अर नबियां की सारी बाततां पै बिश्वास करण म्ह नासमझों!

26 के जरूरी कोनी था के मसीह ये दुख उठाकै अपनी महिमा म्ह दाखल हो?”

27 फेर उसनै मूसा नबी तै अर सारे नबियां तै शरु करके सारे पवित्र ग्रन्थां म्ह तै अपने वारै म्ह लिखी बाततां का मतलब, उन ताहीं समझा दिया।

28 इतनै म्ह वो उस गाम के धोरै पोहचे जित्त वे जावै थे, अर उसके ढंग तै इसा लाग्या के वो आगूँ जाणा चाहवै सै।

29 पर उननै यो कहकै उस ताहीं रोक्या, “म्हारै गेल्या रह, क्यूँके साँझ होली सै अर दिन इब घणा ढळग्या सै।” फेर वो उनकै गेल्या रहण के खात्तर भीत्तर गया।

30 जद वो उनकै गेल्या खाणा बेटचा, तो उसनै रोटी लेकै धन्यवाद करया अर उस ताहीं तोडकै उननै देण लाग्या।

31 फेर उनकी आँख खुलगी, अर उननै उस ताहीं पिच्छाण लिया, अर वो उनकी आँखां तै ओन्झळ होग्या।

32 उननै आपस म्ह कह्या, “जद वो म्हारै तै रास्ते म्ह बात करै था अर पवित्र ग्रन्थ का मतलब हमनै समझावै था, तो के म्हारै मन म्ह जोश न्ही आया?”

33 वो उस्से बखत जिब्बे उठकै यरुशलेम नगर म्ह चले गये, अर उन ग्यारहां चेल्यां अर उनके साधियां ताहीं उननै कट्टे मिलगे।

34 वो कहवै थे, “परभु साच्चे जी उठचा, अर शमौन नै दिख्या।”

35 फेर उन दो चेल्यां नै भी राह म्ह होई घटना के बारे ब्यौरा सुणया अर किस तरियां खाणा खान्दे बखत उननै मसीह यीशु ताहीं पिच्छाणा लिया था।



36 वे ये बात करे ए थ के वो खुद ए उनके विचाळे आण खडचा होया, अर उन ताहीं कह्या, “थमनै शान्ति मिलै।”

37 पर वे घबरागे अर डरगे, अर समझे के हम किसे भूत नै देख्वां सां।

38 यीशु नै उनतै कह्या के, “क्यूँ घबराओ सों? अर थारे मन म्ह क्यूँ बैहम हो सै?”

39 मेरे हाथ-पायां नै देख्को के मै वोए सूँ। मननै छूँ के देख्को, क्यूँके आत्मा के हाड-माँस कोनी होन्दे जिसा मेरै म्ह देख्को सों।”

40 न्यू कहकै उसनै उन ताहीं अपने हाथ पैर के घा दिखाए।

41 जद खुशी के मारै उननै बिश्वास कोनी होया, अर वो अचम्भा मान्ने थे, तो यीशु नै उन ताहीं बुझया, “के याडै थारे धोरै किमे खाण नै सै?”

42 चेल्यां नै उस ताहीं भुनी होई मच्छी का टुकड़ा दिया ।

43 उसनै वो मच्छी का टुकड़ा लेकै उनकै आगगै खाया ।

44 फेर उसनै उन ताहीं कह्या, “थे मेरी वे बात सै, जो मन्नै थारे गेल्या रहंदे होए थारे तै कही थी के जरूरी सै जितनी बात मूसा नबी की नियम-कायदा अर नबियाँ अर भजनां की किताबां म्ह मेरै बारै म्ह लिक्खी सै, सारी पूरी हों ।”

45 फेर उसनै पवित्र ग्रन्थ बुझण के खात्तर उनकी बुद्धि खोल दी,

46 अर उनतै कह्या, “यो पवित्र ग्रन्थ म्ह लिख्या सै के मसीह दुख ठावैगा, अर तीसरे दिन मरे होया म्ह तै जी उठैगा,

47 अर यरुशलेम तै लेकै सारी जात्तां म्ह पापां नै छोड़ण का अर पापां की माफी का प्रचार, उसकै-ए नाम तै करया जावैगा ।

48 थम इन सारी बातों के गवाह सों ।

49 अर देखो, मे थारे पै पवित्र आत्मा भेज्जूंगा जिसा मेरे पिता नै कह्या सै, जिब तैई पवित्र आत्मा थारे पै न्ही आवै, अर थम सुर्ग तै सामर्थ ना पाओ, जब ताहीं इसे नगर म्ह रुके रहो ।”

~~~~~

50 फेर यीशु उननै बैतनिय्याह गाम ताहीं बाहर लेग्या, अर अपणे हाथ ठाकै उन ताहीं आशीर्वाद दिया,

51 अर उननै आशीष देंदे होए वो उनतै न्यारा होग्या अर सुर्ग पै उठा लिया ।

52 फेर वो उसनै नमस्कार करकै बड़ी खुशी तै यरुशलेम चले गए,

53 अर वे लगातार मन्दर म्ह हाज्जर होकै परमेसवर की भगति करया करै थे ।

यूहन्ना के जरिये लिख्या गया सुसमाचार



यूहन्ना के जरिये लिखे गये सुसमाचार म्ह यीशु ताहीं परमेसवर अनन्त वचन के तौर पे पेश करया गया सै, जिसनै देह धारण करके म्हारे बीच म्ह डेरा करया। इस किताब म्ह यो साफ कह्या सै, कै यो सुसमाचार ज्यातै लिखा गया के इसके पढ़णियें विश्वास करै, के यीशु ए वादा करया होया, मुक्ति देणिया अर परमेसवर का बेट्टा सै, अर वे सारे यीशु मसीह म्ह विश्वास के जरिये जिन्दगी पा सकै (20:31) सै। भूमिका म्ह यीशु ताहीं परमेसवर के अनन्त वचन के रूप म्ह दिखाया गया सै, उसके बाद सुसमाचार के पैहले भाग म्ह सात चमत्कारां या अदभुत काम्मां का जिक्र सै, उनतै यो जाहिर होवै सै, के यीशु वादा करया होया उद्धारकर्ता अर परमेसवर का बेट्टा सै। दुसरा भाग उपदेश सै। उन म्ह यो समझाया गया सै, के इन चमत्कारां का मतलब के सै। इस भाग म्ह यो बताया गया सै, के किस तरियां कुछ माणसां नै यीशु पै विश्वास करया अर उसके चेल्लें बणगे, जिव के दुसरे माणसां नै उसका विरोध करया अर विश्वास करण तै नाटगे थे। 13-17 पाठ म्ह यीशु ताहीं पकड़वाये जाण आळी रात नै, यीशु की उसके चेल्यां के गैल गहरी संगति, अर सूळी पै चढ़ाये जाण तै पैहले साँझ नै चेल्यां ताहीं तैयार करणा अर उननै होसला देण आळे यीशु के वचनां का विस्तारपूर्वक वर्णन सै। आखरी के पाटां म्ह यीशु का पकड़वाया जाणा अर मुकदमे, उसका क्रूस पै चढ़ाया जाणा, जिन्दा हो जाणा, अर जिन्दा होण के बाद चेल्यां पै जाहिर होण का वर्णन सै। यूहन्ना मसीह के जरिये अनन्त जीवन के दान पै जोर देवै सै। यो एक इसा दान सै जो इब शरु होवै सै, अर उन ताहीं मिलै सै जो यीशु नै राह, सच्चाई अर जिन्दगी के रूप म्ह पावै सै। आत्मिक बात्तां नै दिखाण खात्तर रोज की साधारण चिज्जां नै निशान्नी के तौर तै इस्तमाल करणा, यूहन्ना की एक खास बात सै, जिस तरियां-पाणी, रोटी, चाँदणा, पाळी अर उसकी भेड़, अर अंगूर की बेल अर उसके फळ।

रूप-रेखा

जानकारी 1:1-18

यूहन्ना बपतिस्मा देण आळा अर यीशु के पैहले चेल्लें 1:19-51

यीशु के जरिये माणसां की सेवा 2:1-12:50

यरुशलेम नगर म्ह आखर के थोड़े दिन 13:1-19:42

प्रभु यीशु का जिन्दा हो जाणा अर उसका दिखाई देणा 20:1-31

समापन गलील परदेस म्ह दुबारा दिखाई देणा 21:1-25



- 1 दुनिया बणण तै पैहल्या वचन था, अर वचन परमेसवर कै गेल्या था, अर वचन परमेसवर था।
- 2 यो वचन ए शरुआत तै परमेसवर कै गेल्या था।
- 3 दुनिया की हरेक चीज उससे कै जरिये बणी सै, अर उसके बिना किसे भी चीज की रचना न्ही होई।
- 4 वो जीवन का जरिया था, अर वो जीवन मानव जाति कै खात्तर चाँदणा था।
- 5 चाँदणा अन्धेरै म्ह चमकै सै, अर अन्धेरा उस ताहीं बुझा न्ही सक्या।
- 6 परमेसवर कै ओड़ तै भेज्जा होया एक माणस आया, जिसका नाम यूहन्ना था।
- 7 वो गवाही देण खात्तर आया के माणसां नै चाँदणे की गवाही देवै, के सारे माणस उसके जरिये चाँदणे पै विश्वास करै।

चाँदणे पै विश्वास करै।

8 वो खुद तै वो चाँदणा कोनी था, पर माणसां नै उससे चाँदणे की गवाही देण खात्तर आया था।

9 जो साच्चा चाँदणा था, हरेक माणस नै ज्ञान का चाँदणा देवै सै, वो धरती पे आण आळा था।

10 वो दुनिया म्ह था, अर दुनिया उसके जरिये बणी, अर दुनिया के माणसां नै उस ताहीं न्ही पिच्छाणया।

11 वो अपने यहूदी माणसां के धारै आया अर उसके अपने लोग्गां नै उस ताहीं कोन्या अपनाया।

12 पर जितन्या नै उस ताहीं अपणाया, उसनै उन ताहीं परमेसवर के उलाद होण कि हक दिया ।

13 वे कुदरती तौर पै ना तो पूर्वजां तै, ना देह की मर्जी तै, ना माणसां की मर्जी तै, पर परमेसवर की मर्जी तै पैदा होए सै ।

14 अर वचन देह धारण करके आया, अर अनुग्रह अर सच्चाई तै भरकै म्हारै बिचाळै रहण लाग्या, अर हमनै उसकी इसी महिमा देखी, जिसी पिता के इकलौते बेटे की महिमा ।

15 यूहन्ना नै उसके बारे म्ह गवाही दी, अर रुक्का मारकै बोल्या, “यो वोए सै, जिसका मन्ने जिक्र करया के जो मेरै पाच्छै, आण लागरया सै, वो मेरतै घणा महान् सै क्यूँके वो मेरतै पैहल्या था ।”

16 क्यूँके उसकी करुणा अर सच्चाई की भरपूरी म्ह तै हम सारया नै आशीष पै आशीष पाई ।

17 इस खात्तर के नियम-कायदे तो मूसा नबी तै मिले, पर अनुग्रह अर सच्चाई यीशु मसीह के जरिये पोहची ।

18 परमेसवर ताहीं किसै नै कदे कोन्या देख्या, पर परमेसवर के इकलौते बेटे नै, जो सदा परमपिता के गैल सै, उससे नै म्हारे ताहीं दिखाया ।

~~~~~  
 (~~~~~ 3:1-12; ~~~~ 1:1-8; ~~~~ 3:1-18)

19 यूहन्ना की गवाही या सै, के जित यहूदी अगुवां नै यरुशलेम तै याजकां अर लेवियां नै उसतै यो बुद्धझण नै भेज्या, के “तू कौण सै?”

20 फेर उसनै नाट्या कोनी, पर मान लिया के “मै मसीह कोनी ।”

21 फेर उननै यूहन्ना तै बुद्धझया, “तो फेर तू कौण सै? के तू एलिय्याह नबी सै?” उसनै साफ-साफ कह दिया के, “मै मसीह कोनी ।” “तो के तू वो नबी सै?” उसनै जवाब दिया, “ना ।”

22 फेर उननै यूहन्ना तै बुद्धझया, “फेर तू सै कौण? ताके हम अपणे भेजण आळा ताहीं जवाब देवां । तू अपणे बारे म्ह के कहवै सै?”

23 वो बोल्या, “जिसा यशायाह नबी नै बोल्या सै: ‘मै जंगल-वियाबान म्ह एक रुक्का देवण आळे का वचन सुं, के थम परभु का रास्ता सीध्या करो ।’”

24 वे फरीसियों के कान्ही तै भेज्जै होइ थे ।

25 उननै उसतै यो सवाल बुद्धझया, “जै तू ना मसीह सै, अर ना एलिय्याह, अर ना वो नबी सै, तै फेर बपतिस्मा क्यातै देवै सै?”

26 यूहन्ना नै उन ताहीं जवाब दिया, “मै तो थमनै पाणी तै बपतिस्मा देऊं सुं, पर थारे बीच म्ह एक माणस खड्या सै जिसनै थम कोनी जाणदे ।

27 यानी मेरै पाच्छै आण आळा सै, जिसके जूत्याँ के फिते भी मै खोल्लण जोगगा कोनी ।”

28 ये बात यरदन नदी तै परली ओइ बैतनिय्याह गाम म्ह होई, जडै यूहन्ना माणसां ताहीं बपतिस्मा दिया करदा ।

~~~~~

29 दुसरे दिन यूहन्ना नै यीशु ताहीं अपणी ओइ आन्दे देखकै बोल्या, “देक्खो, यो परमेसवर का मेम्ना सै जो दुनिया का पाप ठावै सै ।

30 यो वोए सै जिसके बारे म्ह मन्ने कहा था, एक माणस मेरै बाद आवै सै जो मेरतै महान् सै, ज्यातै वो मेरतै पैहल्या था ।

31 मै खुद तो उसनै कोनी पिच्छाणु था, पर इस्से खात्तर मै पाणी तै बपतिस्मा देन्दा होया आया, ताके इस्राएल के माणस उसनै जान ले ।”

32 अर यूहन्ना नै या गवाही दी: “मन्ने सुर्ग तै पवित्र आत्मा ताहीं कबूतर की तरियां अकास तै उतरदे अर उस ताहीं मसीह यीशु पै ठहरते देख्या सै ।”

33 मैं तो उसने पिच्छाणु कोनी था, पर जिसने मेरे ताहीं पाणी तै बपतिस्मा देण कै खात्तर भेज्या, उससे नै मेरे ताहीं कह्या, “जिसपै तू आत्मा नै उतरदे अर ठहरदे देख्खे, वोए पवित्र आत्मा तै बपतिस्मा देणिया सै।”

34 “अर मन्ने देख्या, अर गवाही दी सै, के योए परमेसवर का बेट्टा सै।”

~~~~~

35 आगले दिन यूहन्ना अपने दो चेल्यां के गैल फेर ओड़े खड़े थे,

36 अर उसने यीशु ताहीं जो उसके धौरै तै जाण लागरया था, उसकी ओड़ लखाकै बोल्या, “देख्खो, यो परमेसवर का मेम्ना सै।”

37 जिब्बे वे दोन्नु चेल्ले उसकी या बात सुणकै यीशु के गैल हो लिए।

38 यीशु नै मुड़कै उन ताहीं गैल आन्दे देख्या अर उनतै बोल्या, “थम के चाह्णो सो?” वे उसतै बोल्ले, “हे गुरु, तू कित्त रहवै सै?”

39 यीशु उनतै बोल्या, “चाल्लों, तो देख लियो।” फेर उनने उसके रहण की जगहां देख्खी, अर उस दिन उसके गेल्या रहे। क्यूँके साँझ के करीब चार बजगे थे।

40 उन दोनुआ म्ह तै, जो यूहन्ना की बात सुणकै यीशु के गेल्या हो लिए थे, एक तो शमौन पतरस का भाई अन्दरयास था।

41 उसने पैहल्या अपने सगे भाई शमौन तै मिलकै उसतै बोल्या, “हमने खिरस्त यानी मसीह (परमेसवर का अभिषिक्त) मिलग्या।”

42 फेर अन्दरयास शमौन नै यीशु के धौरै ल्याया। यीशु नै उसकी ओड़ लखाकै कह्या, “तू यूहन्ना का बेट्टा शमौन सै: तू कैफा यानिके पतरस कुआवैगा।”

~~~~~

43 आगले दिन यीशु नै गलील परदेस जाण का इरादा करया। वो फिलिप्पुस तै मिल्या अर बोल्या, “मेरे पाच्छे हो ले।”

44 फिलिप्पुस, अन्दरयास अर पतरस के नगर बैतसैदा का रहणीया था।

45 फिलिप्पुस नतनएल तै मिल्या अर उसतै बोल्या, “जिसका जिक्र मूसा नबी नै नियम-कायदा म्ह अर नबियां नै करया सै, वो हमने मिलग्या सै! वो यूसुफ का बेट्टा, यीशु नासरी* सै।”

46 नतनएल नै उसतै बुझ्झया, “के कोए उत्तम चीज भी नासरत तै लिकड़ सकै सै?” फिलिप्पुस उसतै बोल्या, “चालकै देख ले।”

47 यीशु नै नतनएल ताहीं अपनी ओड़ आन्दे देखकै उसके बारे म्ह कह्या, “देख्खो, यो साच्चए इस्राएली सै: इस म्ह कपट कोनी।”

48 नतनएल नै उसतै बुझ्झया, “तू मन्ने किस तरियां जाणै सै?” यीशु नै उस ताहीं जवाब दिया, “इसतै पैहल्या के फिलिप्पुस नै तेरे ताहीं बुलाया, तो मन्ने तेरे ताहीं देख्या था जिब तू अंजीर के दरखत तठै था।”

49 नतनएल नै उस ताहीं जवाब दिया, “हे गुरु, तू परमेसवर का बेट्टा सै, तू इस्राएल का राजा सै।”

50 यीशु नै उस ताहीं जवाब दिया, “मन्ने जो तेरे तै कह्या के मन्ने तेरे ताहीं अंजीर के दरखत तठै देख्या, के तू इससे बात पै बिश्वास करै सै? तू इसतै भी बड़े-बड़े काम देख्खैगा।”

51 फेर उसने कह्या, “मै तेरे तै सच-सच कहूँ सूँ, के थम सुर्ग नै खुल्या होड़ अर परमेसवर के सुर्गदूतां ताहीं मुझ माणस के बेट्टे के खात्तर नीच्वे उतरदे अर उप्पर जान्दे होए देख्खोगे।”

2

~~~~~

\* 1:45 1:45 नासरत नगर का रहण आळा

1 फेर तीसरे दिन गलील परदेस कै काना नगर म्ह किसे का ब्याह था, अर यीशु की माँ भी ओड़ैए थी।

2 यीशु अर उसके चेल्लें भी उस ब्याह म्ह न्योद राक्खे थे।

3 जिव अंगूर का रस खतम होगया, फेर यीशु की माँ उसतै बोल्ली, “उनकै धरै अंगूर का रस कोनी रहया।”

4 यीशु नै उसतै कह्या, “हे नारी, या बात तू मेरे तै क्युँ कहवै सै? इब्बै मेरा बखत कोनी आया।”

5 पर उसकी माँ नै नौकरां तै कह्या, “जो कुछ यो धारे ताहीं कहवै, न्युए करियो।”

6 यहूदी परम्परा के मुताबिक शुद्ध\* करणां के खात्तर ओड़ै छः पत्थर के पैण्डे धरे थे, जिन म्ह दो-दो, तीन-तीन मण‡ पाणी आवै था।

7 यीशु नै उनतै कह्या, “पैदा म्ह पाणी भर दो।” अर उननै वे मुँह तक भर दिए।

8 फेर यीशु नै नौकरां ताहीं कह्या, “इब काढकै भोज कै प्रधान धरै ले जाओ।” अर वे लेगे।

9 जिव भोज कै प्रधान नै वो पाणी चाख्या, जो अंगूर का रस बणगया था अर वे न्ही जाणै था के वो कड़ै तै आया सै पर जिन नौकरां नै पाणी काढचा था वे जाणै थे फेर भोज कै प्रधान नै बन्दे ताहीं बुलाकै उसतै कह्या,

10 “हरेक माणस पैहल्या बढिया अंगूर का रस देवै सै, अर जिव माणस पीकै छिक्क जावै सै, फेर हल्का देवै सै, पर तन्नै बढिया अंगूर का रस इब ताहीं राख राख्या सै।”

11 यीशु नै गलील परदेस के काना नगर म्ह अपना यो पैहला चिन्ह-चमत्कार दिखाकै अपनी महिमा जाहिर कर दी अर जिसकी बजह तै उसके चेल्यां नै उसपै विश्वास करया।

12 इसके बाद वो अर उसकी माँ अर उसके भाई अर उसके चेल्लें कफरनहूम नगर म्ह गए अर ओड़ै कुछ दिन रहे।

~~~~~

~~~~~ 21:12-13; ~~~~ 11:15-17; ~~~~~ 19:45-46)

13 यहूदियाँ का फसह का त्योहार लोवे था, अर यीशु यरुशलेम नगर म्ह गया।

14 उसनै मन्दर म्ह बळध, भेड़ अर कबूतर बेच्चण आळे अर सरांफां (पईसा का लेण देण करण आळे) ताहीं बेट्टे होए पाया।

15 फेर उसनै जेवड़ियां का कोरड़ा बणाकै, सारी भेड़ों अर बळ्धां ताहीं मन्दर तै काढ दिया, अर सरांफां के पईसे खिन्डा दिए अर उनके पीढ़े पलट दिए,

16 अर कबूतर बेचण आळा ताहीं बोल्या, “इन्हनै उरै तै ले जाओ। मेरै पिता कै घर नै व्यापर का घर ना बणाओ।”

17 फेर उसके चेल्यां नै याद आया के पवित्तर ग्रन्थ म्ह लिख्या होइ सै, “तेरे घर की धुन मन्नै खा ज्यागी।”

18 इसपै यहूदी अगुवां नै यीशु तै कह्या, “तू म्हारै ताहीं कौण सा अदभुत निशान दिखा सकै सै?” जो इस तरियां के काम तू करै सै, यो साबित हो सकै, के तू उसका हक राक्खै सै।

19 यीशु नै उन ताहीं जवाब दिया, “इस मन्दर नै ढा दो, मै इसनै तीन दिन म्ह बणा दियुंगा।”

20 यहूदी अगुवां नै कह्या, “इस मन्दर के बणाण म्ह छियालिस साल लागगे सै, अर के तू इसनै तीन दिन म्ह बणा देवैगा?”

21 पर यीशु नै उनतै अपनी देह रूपी मन्दर कै बारे म्ह कह्या था।

22 आखर म्ह जिव वो मेरे होया म्ह तै जिन्दा होया, जिव उसके चेल्यां नै याद आई, के उसनै यो कह्या था, अर उननै पवित्तर ग्रन्थ के वचन जो यीशु के जिन्दा होण के बारे म्ह बतावै सै, अर उननै यीशु के जरिये कहे होए वचनां पै विश्वास करया।

~~~~~

* 2:6 2:6 शुद्ध सुच्चा † 2:6 2:6 शुद्ध करण यहूदी परम्परा के मुताबिक हाथ-पैर धोणा ‡ 2:6 2:6 मण सौ सवा सौ लिटर

- 23 फसह के त्यौहार के दिन्नां म्ह जिब यीशु यरुशलेम नगर म्ह था, तो उसके जरिये करे गये चिन्ह-चमत्कार के काम्मां नै देखके घणे माणसां नै उसपै विश्वास करया।
- 24 पर यीशु नै अपणे-आप ताहीं उनकै भरौसै पै कोनी छोडया, ज्यातै वो सारया नै जाणै था,
- 25 अर उसनै इस बात की जरूरत कोनी थी के कोए आकै उसनै माणसां के बारै म्ह बतावै, क्यूँके वो खुदे जाणै था के माणस के मन म्ह के सै?

3

???? ? ? ?????????

- 1 फरीसियाँ म्ह तै नीकुदेमुस नाम का एक माणस था, जो यहूदियाँ का प्रधान था।
- 2 उसनै रात नै यीशु के धोरै आके उस ताहीं कह्या, “हे गुरु, हमनै बेरा सै के तू परमेसवर की ओड तै म्हारे ताहीं सिखाण खात्तर आया सै, ज्यातैए कोए इन चिन्ह-चमत्कारां नै जिननै तू दिखावै सै, जै परमेसवर उसके गेल्या ना हो, तो दिखा कोन्या सकदा।”
- 3 यीशु नै उस ताहीं जवाब दिया, “मै थारे ताहीं सच कहूँ सूँ, जै कोए नए सिरे तै ना जन्म ले तो परमेसवर का राज्य देख नही सकदा।”
- 4 नीकुदेमुस नै उस ताहीं कह्या, “माणस जिब बूढा होज्या, तो किस ढाळ जन्म ले सकै सै? के वो अपणी माँ के गर्भ म्ह दुसरी बर भीत्तर बड़के जन्म ले सकै सै।”
- 5 यीशु नै जवाब दिया, “मै तेरे तै सच कहूँ सूँ, जिब ताहीं कोए माणस पाणी* अर आत्मा तै ना जन्मे तो वो परमेसवर के राज्य म्ह बड़ नही सकदा।
- 6 क्यूँके मानव देह म्ह जन्म सिर्फ देह का जन्म सै, जिब के आत्मा तै जन्म नया जन्म सै।
- 7 हैरान ना होवै, के मन्नै तेरे तै कह्या, के थारे ताहीं नए सिरे तै जन्म लेणा जरूरी सै।
- 8 हवा जितोड चाहवै सै उतोड चाल्लै सै, अर तू उसकी आवाज सुणै सै, पर जाण्डा कोनी, के वा कड़ै तै आवै सै अर कितोड नै जावै सै? जो कोए पवित्तर आत्मा तै जन्मा सै वो इसाए सै।”
- 9 नीकुदेमुस नै उस ताहीं जवाब दिया, के या बात किस ढाळ हो सकै सै?
- 10 या सुणकै यीशु नै उस ताहीं जवाब दिया, “तू इस्राएलियाँ का गुरु होकै भी के इन बाततां नै कोनी समझदा?”
- 11 मै तेरे तै साच्ची-साच कहूँ सूँ के हम जो जाणां सां, वो कह्णां सां, अर जिस ताहीं हमनै देख्या सै उसकी गवाही देवां सां, अर जो हम कह्णां सां, उसका थम विश्वास कोनी करदे।
- 12 जिब मन्नै थारैतै दुनिया की बात कही, अर थम विश्वास नही करदे, तो जै मै थमनै सुर्ग की बात कहूँ, तो फेर किस ढाळ विश्वास करोगे?
- 13 अर कोए सुर्ग पै कोनी चढ़ा, सिर्फ वोए एक सै जो सुर्ग तै उतरा यानिके मै माणस का बेट्टा।
- 14 अर जिस ढाळ तै मूसा नबी नै जंगल-बियावान म्ह कांस्सी का साँप बणाके उस ताहीं ऊँच्चे पै चढ़ाया, उससे ढाळ तै जरूरी सै के मै माणस का बेट्टा भी ऊँच्चे पै चढ़ाया जाऊँ।
- 15 ताके जो कोए मेरे पै विश्वास करै वो अनन्त जीवन पावै।
- 16 क्यूँके परमेसवर नै दुनिया के माणसां तै इसा प्यार राख्या के उसनै अपना इकलौता बेट्टा दे दिया, ताके जो कोए उसपै विश्वास करै, वो नाश कोनी होवै, पर अनन्त जीवन पावै।
- 17 क्यूँके परमेसवर नै अपना बेट्टा दुनिया म्ह इस खात्तर नही भेज्या, के दुनिया पै दण्ड का हुकम देवै, पर इस खात्तर भेज्या के दुनिया उसकै जरिये उद्धार पावै।
- 18 जो परमेसवर के बेट्टे पै विश्वास करै सै, उसपे दण्ड का हुकम कोन्या होन्दा, पर जो उसपै विश्वास नही करदा, वो कसूरवार बणैगा, ज्यातै के उसनै परमेसवर के इकलौते बेट्टे के नाम पै विश्वास कोनी करया।

* 3:5 3:5पाणी अर आत्मा बपतिस्मा नै दिखावै सै

19 अर दण्ड के हुकम का कारण यो सै के चान्दणा दुनिया म्ह आया सै, अर माणसां नै अन्धेरै ताहीं चाँदणे तै घणा प्यारा जाण्या क्यूँके उनके काम बुरे थे।

20 क्यूँके जो कोए पाप करै सै, वो चाँदणे तै बैर राक्खै सै, अर चाँदणे धोरै कोनी आन्दा, क्यूँके उसके पाप उजागर हो जावेंगे।

21 पर जो सच्चाई पै चाल्लै सै वो चाँदणे धोरै आवै सै, ताके ये साबित हो जावै के उसके काम परमेसवर की ओड़ तै कराये गये सै।

~~~~~

22 फेर यीशु अर उसके चेल्ले यहूदिया परदेस म्ह पोहचे, अर वो ओड़ै उनके गेल्या रहके माणसां ताहीं बपतिस्मा देण लाग्या।

23 यूहन्ना भी शालेम नगर के धोरै ऐनोन नामक गाम म्ह बपतिस्मा देवै था, क्यूँके ओड़ै घणाए पाणी था, अर माणस आके बपतिस्मा लेवै थे।

24 यूहन्ना उस बखत ताहीं जेठखान्ने म्ह कैद न्ही करया था।

25 ओड़ै यूहन्ना के कुछ चेल्यां का किसे यहूदी गेल्या पाणी तै शुद्धिकरण के बारे म्ह बहस होगी।

26 अर यूहन्ना के चेल्यां नै आके उस ताहीं कह्या, “हे गुरु, जो माणस यरदन नदी के परली ओड़ तेरी गेल्या था, अर जिसके बारे म्ह तन्ने कह्या सै, देख, वो यीशु बपतिस्मा देवै सै, अर सारे उसके धोरै आवै सै।”

27 यूहन्ना नै जवाब दिया, “माणस नै तब तक कुछ न्ही मिल सकता, जब तक वो सुर्ग तै ना दिया जावै।”

28 धारे ताहीं तो पैहले मन्ने बताया था के “मै मसीह कोनी, पर उसतै पैहले भेज्या गया सूं।”

29 बन्दड़ा बन्दड़ी तै ब्याह करै सै, पर बन्दड़े का साथी जो खड्या होया उसकी आवाज सुणै सै, बन्दड़े के वचन तै घणा खुश होवै सै, अर मै भी खुश सूं।

30 जरूरी सै के वो बधै अर मै घटूं।

31 जो सुर्ग तै आवै सै, वो सारया म्ह सबतै महान् सै, जो धरती कान्ही तै आवै सै वो धरती का सै, अर धरतीए की बात कहवै सै: जो सुर्ग कान्ही तै आवै सै, वो सारया तै उप्पर सै।†

32 उसनै जो कुछ देख्या अर सुण्या सै, वो उससे की बात करै सै, पर उसकी गवाही कोए न्ही मानता।

33 जिसनै उसकी गवाही अपणाई उसनै इस बात पै छाप लगा दी के परमेसवर साच्चा सै।

34 क्यूँके जिस ताहीं परमेसवर नै भेज्या सै, वो परमेसवर की बात कहवै सै, क्यूँके परमेसवर उननै बिना किसे माप के पवित्तर आत्मा देवै सै।

35 पिता अपणे बेट्टे तै प्यार करै सै, अर उसनै सारी चीज उसके हाथ्यां म्ह दे दी सै।

36 जो बेट्टे पै बिश्वास करै सै, अनन्त जीवन उससे का सै, पर जो बेट्टे की बात कोनी मान्दा, उसनै वो अनन्त जीवन कोनी मिलै, इसकी बजाये उसपै परमेसवर का छो बण्या रहवैगा।

## 4

~~~~~

1 फेर जब यीशु नै बेरा पाट्या के फरीसियां नै सुण्या सै के यीशु यूहन्ना तै घणे चेल्ले बणावै सै अर उननै बपतिस्मा देवै सै।

2 (ऊतो यीशु खुद न्ही बल्कि उसके चेल्ले बपतिस्मा देवै थे)

3 फेर वो यहूदिया परदेस नै छोड़के दुबारे गलील परदेस म्ह चलया गया,

4 इस बार उसनै सामरिया परदेस होके जाणा पड्या था।

5 इस करके वो सामरिया परदेस के सूखार नामक एक नगर म्ह आया, यो नगर उस जगहा के धोरै था जो याकूब नै अपणे बेट्टे यूसुफ ताहीं दिया था।

6 अर याकूब का कुआँ भी ओड़ैए था। यीशु सफर का थक्या होइ उस कुएँ पै न्यूए बैठग्या। दोपहर का बखत होरया था।

7 इतनै म्ह एक सामरी बिरबान्नी पाणी भरण आई। यीशु नै उस ताहीं कह्या, “मन्नै पाणी पिया।”

8 क्यूँके उसके चेल्लें नगर म्ह खाणा मोल लेण जारे थे।

9 उस सामरी बिरबान्नी नै उस ताहीं कह्या, “तू यहूदी होके मेरे तै सामरी बिरबान्नी तै पाणी क्यांतै माँगै सै?” (क्यूँके यहूदी सामरियाँ तै नफरत करै थे।)

10 यीशु नै जवाब दिया, “जै तू जाणदी के परमेसवर तन्नै के देणा चाहवै सै, अर वो कौण सै, जो तेरे तै कहवै सै, ‘मन्नै पाणी पिया,’ फेर तू उसतै माँगदी, अर वो तन्नै जीवन का पाणी देन्दा।”

11 बिरबान्नी नै उस ताहीं कह्या, “हे प्रभु, तेरे धौरै पाणी भरण नै तो किमे सै भी कोनी, अर कुआँ झन्धा सै, तो फेर वो जीवन का पाणी तेरे धौरै कड़े तै आया?”

12 के तू म्हारै पूर्वज याकूब तै बड़डा सै, जिसनै म्हारै ताहीं यो कुआँ दिया, अर खुद भी अपणे ऊलादां, अर अपणे डान्गरां सुधा इस म्ह तै पिया?”

13 यीशु नै उस ताहीं जवाब दिया, “जो कोए यो पाणी पीवैगा वो फेर तिसाया होगा,

14 पर जो कोए उस पाणी म्ह तै पीवैगा जो मै उस ताहीं दियुँगा वो फेर अनन्त काल ताहीं तिसाया कोनी होवैगा, बल्के जो पाणी मै उस ताहीं दियुँगा वो उस म्ह तै एक चोवा बण ज्यागा जो अनन्त जीवन खात्तर उमड़दा रहवैगा।”

15 बिरबान्नी नै उस ताहीं कह्या, “हे प्रभु, वो पाणी मन्नै दे ताके मै तिसाई ना होऊँ अर ना पाणी भरण नै इतनी दूर आऊँ।”

16 यीशु नै उस ताहीं कह्या, “जा अपणे धणी नै याड़े बुला ल्या।”

17 बिरबान्नी नै जवाब दिया, “मै बिना धणी की सूँ।” यीशु नै उस ताहीं कह्या, “तू ठीक कहवै सै, मै बिना धणी की सूँ।”

18 क्यूँके तन्नै पाँच धणी कर लिए सै, अर जिस माणस के गेल्या तू इब सै वो भी तेरा धणी कोनी। या तन्नै साच्ची-ए कही सै।”

19 बिरबान्नी नै उस ताहीं कह्या, “हे प्रभु, मन्नै लाग्गै सै तू नवी सै।

20 म्हारै सामरी पूर्वजां नै इस्से पहाड़ पै भगति करी, अर यहूदी लोग कहवै सै, के वा जगहां जड़े भगति करणी चाहिए यरुशलेम नगर म्ह सै।”

21 यीशु नै उस ताहीं कह्या, “हे नारी,” मेरी बात का भरोस्सा कर, के वो बखत आवै सै, के थम ना तो इस पहाड़ पै पिता की भगति करोगे, ना यरुशलेम म्ह।

22 थम जिसनै कोनी जाणदे, उसकी भगति करो सो, अर हम यहूदी लोग जिसनै जाणा सा उसकी भगति करा सां, क्यूँके उद्धार यहूदियाँ म्ह तै सै।

23 पर वो बखत आवै सै, बल्कि इब भी सै, जिसम्ह सच्चे भगत पिता की भगति आत्मा अर सच्चाई तै करैगें, क्यूँके पिता अपणे खात्तर इसे भगतां नै टोहवै सै।

24 परमेसवर आत्मा सै अर जरूरी सै के उसकी भगति करण आळे आत्मा अर सच्चाई तै उसकी भगति करै।

25 बिरबान्नी नै उस ताहीं कह्या, “मै जाणु सूँ के मसीह” जो ख्रिस्त कुहावै सै, “आण आळा सै, जिब वो आवैगा, फेर म्हारै ताहीं सारी बात बता देवैगा।”

26 यीशु नै उस ताहीं कह्या, “मै जो तेरे तै बोल्लण लागरया सूँ, मै वोए सूँ।”



27 इतनै म्ह उसके चेल्लें आण पोहचे, अर हैरान होण लागगे के वो बिरबान्नी तै बतळावै था, फेर भी किसे नै कोनी बुझ्झया, “तू के चाहवै सै? या क्यातै उसतै बतळावै सै?”

28 फेर बिरबान्नी अपणा पैदा छोड़के नगर म्ह चली गई, अर माणसां तै कहण लागगी,

29 “आओ एक माणस नै देखो, जिसनै सारा किमे जो मन्नै करया मेरै तै बता दिया। कदे योए तो मसीह न्ही सै?”

30 तब वे नगर के बासिन्दे गाम तै लिकड़कै यीशु कै धोरै आण लागगे।

31 इस बिचाळै उसके चेल्यां नै यीशु तै या बिनती करी, “हे गुरु, किमे खा ले।”

32 पर उसनै उन ताहीं कह्या, “मेरै धोरै खाण खात्तर इसा खाणा सै जिसनै थम कोनी जाणदे।”

33 फेर चेल्यां नै आप्पस म्ह कह्या, “के कोए उसकै खात्तर खाणा लैके आया सै?”

34 यीशु नै उनतै कह्या, “मेरा खाणा यो सै के अपणे भेजण आळे की मर्जी के मुताबिक चाल्लुं अर उसके काम नै पूरा करुं जो उसनै कह्या सै।

35 के थम कोनी कहन्दे, “लामणीयां के इब्बै चार महिन्ने रहे सै?” अपणी आंखां तै देख्खो जितने माणस आण लागरे सै, वो उस खेत की तरियां सै जो काट्टण खात्तर तैयार सै।

36 पैहले तै मजदूर काम करण लागरया सै अर अपणी मजदूरी पाण लागरया सै, इसका मतलब यो सै के वो माणसां नै कट्टा करण लागरया सै जो अनन्त जीवन पागे।

37 क्यूँके याइँ या कहावत ठीक बेट्टे सै: बोणआळा और सै, अर काट्टण आळा और।

38 मन्नै थारे ताहीं वो खेत काट्टण खात्तर भेज्या जिसम्ह थमनै मेहनत कोन्या करी दुसरयां नै मेहनत करी अर थम उनकी मेहनत कै फळ म्ह हिस्सेदार होए।”

~~~~~

39 उस नगर के घणखरे सामरियां नै उस बिरबान्नी कै कहण तै यीशु पै बिश्वास करया, क्यूँके उसनै कह्या था, के “उसनै सारा किमे जो मन्नै करया सै, मेरै तै बता दिया।”

40 ज्यांतै जिब सामरी उसके धोरै आए, तो उसतै बिनती करण लागगे के म्हारै याइँ रह। आखर म्ह वो ओइँ दो दिन ताहीं रहया।

41 उसके वचन कै कारण और भी घणखरे माणसां नै बिश्वास करया

42 अर उस बिरबान्नी तै कह्या, “इब हम तेरे कहण तैए बिश्वास कोनी करदे, क्यूँके हमनै खुदे सुण लिया, अर जाणगे सा के योए साच्चए म्ह दुनिया का उद्धार करणीया सै।”

43 फेर दो दिनां कै पाच्छे वो ओइँ तै लिकड़कै गलील परदेस म्ह गया।

44 क्यूँके यीशु नै खुदे गवाही दी के नबी अपणे गाम म्ह आदर मान कोनी पान्दा।

45 जिब वो गलील परदेस म्ह आया, तो गलील परदेस के माणस राज्जी होकै उसतै मिले, क्यूँके जितने काम उसने यरुशलैम म्ह त्यौहार के बखत करे थे, उननै उन सारया ताहीं देख्या था, क्यूँके वे भी त्यौहार म्ह जारे थे।

~~~~~

46 फेर वो दुबारे गलील परदेस के काना नगर म्ह आया, जइँ उसनै पाणी ताहीं अंगूर का रस बनाया था। ओइँ राजा का एक कर्मचारी था जिसका बेट्टा कफरनहूम नगर म्ह बीमार था।

47 वो या सुणकै के यीशु यहूदिया परदेस तै गलील परदेस म्ह आ रहया सै, उसके धोरै गया अर उसतै बिनती करण लागरया के चालकै मेरै बेट्टे नै ठीक कर दे: क्यूँके वो मरण आळा था।

48 यीशु नै उस ताहीं कह्या, “जिब ताहीं थम चमत्कार अर अचम्भे के काम कोनी देखदे जद ताहीं कदे भी बिश्वास कोनी करोगे।”

49 राजा के कर्मचारी नै उसतै कह्या, “हे प्रभु, मेरै बाळक की मौत होण तै पैहल्ल्या चाल।”

50 यीशु नै उस ताहीं कह्या, “जा, तेरा बेट्टा जिन्दा सै।” उस माणस नै यीशु की कही होईँ बात का बिश्वास करया अर चल्या गया।

51 वो रास्ते म्ह था के उसके नौक्कर उसतै आ मिले अर कहण लागगे, “तेरा छोरा जिन्दा सै।”

52 उसनै उसतै बुझ्झया, “किस बखत वो ठीक होण लागरया?” उननै उस ताहीं कह्या, “काल दोफहरै एक बजे उसका बुखार उतर गया।”

53 फेर बाप जाण गया के यो उससे बखत होया जिस बखत यीशु नै उस ताहीं कह्या, “तेरा बेट्टा जिन्दा रहवैगा,” अर उसनै अर उसके सारे कुण्वे नै बिश्वास करया।

54 यो दुसरा अचम्भे का काम था जो यीशु नै यहूदिया परदेस तै गलील परदेस म्ह आकै दिखाया ।

5

~~~~~

1 इन बातों के पाच्छे, यहूदियाँ का एक त्यौहार आया, अर यीशु यरुशलेम नगर म्ह गया ।

2 यरुशलेम म्ह भेड़-फाटक के धारै एक कुण्ड सै जो इब्रानी भाषा म्ह बैतहसदा कुद्दावै सै, उसके पाँच घाट सै ।

3 इन म्ह घणखरे बीमार, आन्धे, लंगड़े अर सूखे अंगआळे (पाणी कै हाल्लण कै आस म्ह) पड़े रहवै थे ।

4 (क्यूँके खास बखत पै परमेसवर के सुर्गादत कुण्ड म्ह उतरकै पाणी नै हलाया करै थे । पाणी हाल्दे जो कोए पैहल्या उतरदा वोए ठीक हो जान्दा चाहे उसके कोए बीमारी क्यूँ ना हो ।)

5 उड़ै एक माणस था, जो अड़तीस साल तै बीमारी म्ह पडचा था ।

6 यीशु नै उस ताहीं पडचा होया देखकै अर न्यू जाणके के वो घणे दिना तै इसी हाल्लत म्ह पडचा सै, उसतै बुद्धया, “के तू ठीक होणा चाहवै सै?”

7 उस बीमार नै उस ताहीं जवाब दिया, “हे प्रभु, मेरै धारै कोए माणस कोनी के जिब पाणी हलाया जावै, तो मन्ने कुण्ड म्ह उतारै, पर मेरे पोहोचदे-पोहोचदे दुसरा मेरतै पैहल्या पाणी म्ह उतर जावै सै ।”

8 यीशु नै उस ताहीं कह्या, “उठ, अपणे बिस्तर ठाकै, हाँड-फिर ।”

9 वो माणस जिब्बे ठीक होगया, अर अपणे बिस्तर ठाकै हाँडण-फिरण लागगया ।

10 वो आराम का दिन था । ज्यांतै यहूदी उस ताहीं जो ठीक होया था, कहण लागगे, “आज तो आराम का दिन सै, तेरा बिस्तर ठाणा नियम-कायदा के मुताबिक ठीक कोनी ।”

11 उसनै उन ताहीं जवाब दिया, “जिसनै मेरै ताहीं ठीक करया, उससे नै मेरै ताहीं कह्या, ‘अपणा बिस्तर ठा अर हाँड-फिर ।’”

12 उननै उसतै बुद्धया, “वो कौण माणस सै जिसनै तेरे तै कह्या, ‘बिस्तर ठा, अर हाँड-फिर?’”

13 पर जो ठीक होया था वो कोनी जाणै था के वो कौण सै, क्यूँके उस जगहां पै भीड़ होण के कारण यीशु ओड़ै तै चला गया था ।

14 इन बातों के पाच्छे, वो यीशु नै मन्दर म्ह मिल्या । यीशु नै उस ताहीं कह्या, “देख, तू ठीक होगया सै: दुबारा पाप ना करिये, इसा ना हो के इसतै कोए भारी संकट तेरे पै आण पड़े ।”

15 उस माणस नै जाकै यहूदियाँ तै कह दिया के जिसनै मेरै ताहीं ठीक करया वो यीशु सै ।

16 इस कारण यहूदी अगुवें यीशु नै तंग करण लागगे, क्यूँके वो इसे काम आराम के दिन करया करदा ।

17 इसपै यीशु नै उन ताहीं कह्या, “मेरा पिता सारी हाण काम करै सै, अर मेरे ताहीं भी करते रहणा सै ।”

18 यीशु की बात के कारण यहूदी अगुवें और भी घणे उस ताहीं मारण खात्तर कोशिश करण लागगे, क्यूँके वो ना सिर्फ आराम के दिन का नियम तोडचा करदा, पर परमेसवर नै अपणा पिता कहकै खुद ताहीं परमेसवर के बरोबर भी ठैहरावै था ।

~~~~~

19 इसपै यीशु नै उस ताहीं कह्या, “मै धारै ताहीं साच्ची-साच कहुँ सूँ, बेट्टा* खुद तै किमे न्ही कर सकदा, सिर्फ वो जो पिता नै करदे देखवै सै, क्यूँके जिन-जिन काम्मां नै वो करै सै उननै बेट्टा भी इस्से ढाळ करै सै ।

20 क्यूँके पिता बेट्टे तै प्यार करै सै अर जो-जो काम वो खुद करै सै, वो सारे उसतै दिखावै सै: अर वो इसतै भी बड़े काम उस ताहीं दिखावैगा, ताके थम हैरान होओ ।

* 5:19 5:19 बेट्टा यीशु खुद नै बेट्टा कहकै सम्बोधित करै से

21 जिसा पिता मरे होया नै ठावै अर जिवांवै सै उस्से ढाळ बेट्टा भी जिननै चाहवै सै उननै जिवांवै सै ।

22 पिता किसे का न्याय कोनी करदा, पर न्याय करण का सारा काम बेट्टै ताहीं सौंप राख्या सै,

23 ताके सारे माणस जिस ढाळ पिता की इज्जत करै सै उस्से ढाळ बेट्टै की भी इज्जत करै । जो बेट्टै की इज्जत कोनी करदा, वो पिता की भी इज्जत कोनी करदा, जिसनै उस ताहीं भेज्या सै ।”

24 मै थारैतै साच्ची-साच कहूँ सूँ, जो मेरा वचन सुणकै उसपै विश्वास करै सै, जिसनै मेरै ताहीं भेज्या सै, वो अनन्त जीवन पावै सै, अर उसपै दण्ड का हुकम कोनी होन्दा, पर वो मौत नै पार करकै जीवन म्ह दाखल हो लिया सै ।


25 “मै थारैतै साच्ची-साच कहूँ सूँ, वो बखत आवै सै, अर इब सै, जिसम्ह मरे होइ परमेसवर के बेट्टै का वचन सुणैगें, अर जो सुणैगें वे जिवेंगे ।

26 क्यूँके जिस ढाळ तै पिता खुद म्ह जीवन राखवै सै, उस्से ढाळ तै उसनै बेट्टै ताहीं भी यो अधिकार दिया सै के खुद जीवन राखवै ।

27 बल्के मेरे ताहीं माणसां के न्याय करण का भी अधिकार दिया सै, ज्यांतै के मै माणस का बेट्टा सूँ ।”

28 इसतै हैरान मतना होओ: क्यूँके वो बखत आवै सै के जितने मरे होए लोग कबरां म्ह सै वे मेरा वचन सुणकै लिकइ आवैगें ।

29 जिन नै भले काम करे सै वे जीवन के पुनरुत्थान खात्तर जी जावेंगे अर जिन नै बुरे काम करे सै वे दण्ड के पुनरुत्थान खात्तर जी जावेंगे ।



30 “मै खुद तो कुछ कोनी कर सकदा, जिसा सुणु सूँ, उस्से तरियां न्याय करूँ सूँ, अर मेरा न्याय साच्चा सै, क्यूँके मै अपणी मर्जी कोनी पर अपने भेजण आळे की मर्जी चाहूँ सूँ ।”

31 जै मै खुदे अपणी गवाही दूँ, तो मेरी गवाही साच्ची कोनी ।

32 एक और सै जो मेरा पिता सै, वो मेरी गवाही देवै सै, अर मै जाणु सूँ, के मेरी जो गवाही वो देवै सै, वा साच्ची सै ।

33 थमनै यूहन्ना तै बुझवाया अर उसनै सच्चाई की गवाही दी सै ।

34 पर मै अपने बारे म्ह माणसां की गवाही कोनी चाहन्दा, फेर भी मै ये बात ज्यांतै कहूँ सूँ के थारा उद्धार हो ।

35 यूहन्ना तो बळदे अर चमकदे होए दीवै के समान था, अर थमनै किमे वार ताहीं उसके चाँदणे म्ह मगन होणा भाया ।

36 पर मेरै धारै जो गवाही सै वा यूहन्ना की गवाही तै बड्डी सै, क्यूँके जो काम पिता नै मेरै ताहीं निपटाण नै सौप्या सै यानिके योए काम जो मै करूँ सूँ, वे मेरे गवाह सै के पिता नै मेरै ताहीं भेज्या सै ।

37 अर पिता जिसनै मेरै ताहीं भेज्या सै, उस्से नै मेरी गवाही दी सै । थमनै ना कदे उसका वचन सुण्या, अर ना उसकी शकल देखी सै,

38 अर उसकै वचन ताहीं मन म्ह बणाए कोनी राखदे, क्यूँके जिस ताहीं उसनै भेज्या थम उसका विश्वास कोनी करदे ।

39 थम पवित्र ग्रन्थ म्ह टोव्हो सो, क्यूँके समझों सो के उस म्ह अनन्त जीवन थारे ताहीं मिलै सै, अर यो वोए सै जो मेरी गवाही देवै सै,

40 फेर भी थम अनन्त जीवन पाण खात्तर मेरै धारै आणा कोनी चाहन्दे ।

41 मै माणसां तै आदर कोनी चाहन्दा ।

42 पर मै थमनै जाणु सूँ, के थारे म्ह परमेसवर खात्तर प्यार कोनी ।

43 थम मेरे ताहीं पसन्द न्ही करते जिब के मै अपने पिता के नाम तै आया सूं, जै दुसरा कोए खुद के नाम तै आवै, तो उसनै थम अपना लोगे।

44 थम मेरै पै किस तरियां बिश्वास कर सको सो? क्यूँके थम तो आप्स म्ह एक-दुसरे तै तारीफ सुणणा चाहो सो, अर उस तारीफ की ओड़ देखते भी कोनी जो एकमात्र परमेसवर तै आवै सै।

45 न्यू ना समझियों के मै पिता के स्याम्ही थारे म्ह खोट कादहू सूं, थारे म्ह खोट काढणिया तो मूसा नबी सै, जिसपै थमनै भरोस्सा करया सै।

46 क्यूँके जै थम मूसा नबी पै बिश्वास करदे, तो मेरा भी बिश्वास करदे, ज्यांतै के उसनै मेरै बौर म्ह लिख्या सै।

47 पर जै थम उसके पवित्तर ग्रन्थ म्ह लिक्खी होई बात्तां पै बिश्वास कोनी करदे, तो मेरी बात्तां पै किस तरियां बिश्वास करोगे?

6

ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂⓂ 14:13-21; ⓂⓂ 6:30-44; ⓂⓂⓂⓂⓂⓂ 9:10-17)

1 इन बात्तां के पाच्छै, यीशु गलील समुन्दर यानिके तिविरियास की झील कै धोरै गया।

2 अर एक बड़डी भीड़ उसके गेल्या हो ली क्यूँके जो अचम्भे के काम वो बिमारां पै दिखावै था वे उननै देख्या करै थे।

3 फेर यीशु पहाड़ पै चढ़कै अपने चेल्यां कै गेल्या बैठगया।

4 यहूदियां कै फसह का त्यौहार लोवै था।

5 जिब यीशु नै अपनी आँख ठाके एक बड़डी भीड़ ताहीं अपने कान्ही आन्दे देख्या, फेर फिलिप्पुस ताहीं कह्या, “हम इनके खाणे कै खात्तर कड़ै तै रोट्टी मोल ल्यावां?”

6 उसनै या बात उस ताहीं आजमाण ताहीं बोल्ली, क्यूँके वो खुदे जाणै था के वो के करैगा।

7 फिलिप्पुस नै उस ताहीं जवाब दिया, “दो सौ दीनार (200 दिन की मजदूरी) की रोट्टी भी उन खात्तर पूरी कोनी पड़ै के उन म्ह तै हरेक नै माड़ी-माड़ी मिल जा।”

8 उसके चेल्यां म्ह तै शमौन पतरस का भाई अन्दर्यास नै उस ताहीं कह्या,

9 “याड़ै एक छोरा सै जिसके धोरै जौ की पाँच रोट्टी अर दो मच्छी सै, पर इतने माणसां खात्तर वे के सै?”

10 यीशु बोल्या, “माणसां नै बिठा द्यो।” उस जगहां घणी घास थी: फेर माणस जिन म्ह आदमियां की गिणती करीबन पाँच हजार की थी, बैठगे।

11 फेर यीशु नै रोट्टी ली अर परमेसवर का धन्यवाद करके बैठण आळा ताहीं बांड दी: अर उससे ढाळ मच्छियां म्ह तै जितनी वे चाहवै थे, बांड दी।

12 जिब वे खाके छिकगे फेर वो चेल्यां तै बोल्या, “बचे होड़ टुकड़े कटटे कर ल्यो के किमे बगायां न्ही जावै।”

13 आखर म्ह उननै कटठा करया, अर जौ की पाँच रोट्टियां के टुकड्या तै जो खाण आळा तै बची होड़ थी, बारहा टोकरी भरी।

14 फेर जो अचम्भे के काम उसनै कर दिखाये उसने वे माणस देखके कहण लागगे, “वो नबी जो दुनिया म्ह आण आळा था, पक्का योए सै।”

15 यीशु न्यू जाणके के वे मन्नै राजा बणाण खात्तर पकड़णा चाहवै सै, फेर पहाड़ पै एक्ला चल्या गया।

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂⓂ 14:22-33; ⓂⓂ 6:45-52)

16 जिब साँझ होई, तो उसके चेल्ले झील कै किनारे गए,

17 अर किस्ती पै चढ़कै झील कै परली ओड़ कफरनहूम नगर म्ह जाण लागगे। उस बखत अन्धेरा होगया था, अर यीशु इब ताहीं उनके धोरै कोनी आया था।

18 अर आँधी के कारण समुन्दर म्ह झांल उट्टण लागगी।

19 जिब वे खेते-खेते तीन-चार कोस के करीबन लिकड़गे, फेर उननै यीशु ताहीं समुन्दर पै चाल्दे अर किस्ती के धोरै आन्दे देख्या, अर डरगे।

20 पर उसनै उनतै कह्या, “मै सूं, डरो मतना।”

21 आखर म्ह वे उसनै किस्ती पै चढाण नै राज्जी होए अर जिब्वे वा किस्ती उस जगहां पै जा पोहची जडै वे जाण लागरे थे।

?????? ? ? ? ? ? ? ? ?

22 जो लोग गलील समुन्दर के उस पार रहगे थे, उननै दुसरे दिन देख्या के याडै सिर्फ एक ए किस्ती थी, अर यीशु अपणे चेल्यां गेल्या उस किस्ती पै कोनी चढया था, पर सिर्फ उसके चेल्लें एक्ले ए चले गए थे।

23 तिविरियास नगर की कुछ किस्ती उस जगहां के धोरै आके रुकी, जडै प्रभु नै परमेसवर का धन्यवाद करके भीड़ ताहीं रोट्टी खुआई थी।

24 जिब भीड़ नै देख्या के याडै ना यीशु सै अर ना उसके चेल्लें, फेर वे भी छोट्टी-छोट्टी किस्तियाँ पै चढके यीशु नै टोन्दे होए कफरनहूम नगर पोहचे।

???? ? ? ? ? ? ? ? ?

25 गलील समुन्दर के परली आड़ जिब वे उसतै मिले तो बोल्ले, “हे गुरु, तू याडै कद आया?”

26 यीशु नै उन ताहीं जवाब दिया, “मै थारेताहीं साच्ची-साच कहूँ सूं, थम मन्नै ज्यातै कोनी टोव्हो सो के थमनै अचम्भे के काम देक्खे, पर ज्यातै के थमनै पेट भरके रोट्टी खाई थी।”

27 उस खाण खात्तर मेहनत ना करो जो सड़ जावै सै, पर उस खाण खात्तर जतन करो जो कदे खराब न्ही होंदा अर अनन्त जीवन देवै सै, मे माणस का बेट्टा यो खाणा थारे ताहीं देऊंगा, क्यूँके पिता परमेसवर नै मेरे ताहीं इसा करण का हक दिया सै।

28 वे उसतै बोल्ले, “परमेसवर के काम करण खात्तर हम के करा?”

29 यीशु नै उन ताहीं जवाब दिया, “परमेसवर चाहवै सै, के थम उसपै बिश्वास करो, जिस ताहीं उसनै भेज्या सै।”

30 फेर वे उसतै बोल्ले, “फेर तू कौण सा निशान दिखावै सै के हम उसनै देखके तेरा बिश्वास करा? तू कौण सा काम दिखावै सै?”

31 म्हारै पूर्वजां नै जंगल-बियावान म्ह मन्ना खाया, जिसा पवित्र शास्त्र म्ह लिख्या सै, परमेसवर नै उन ताहीं खाण खात्तर सुर्ग तै रोट्टी देई।”

32 यीशु नै उनतै कह्या, “मै थारे ताहीं साच्ची-साच कहूँ सूं, के मूसा नबी नै थारे ताहीं वा रोट्टी सुर्ग तै कोनी दी, पर मेरा पिता थमनै सुर्ग तै असली रोट्टी देवै सै।

33 क्यूँके परमेसवर की रोट्टी वाए सै, जो सुर्ग तै उतरके दुनिया के माणसां ताहीं जिन्दगी देवै सै।”

34 फेर यो सुणके यीशु तै बिनती करी, “के हे प्रभु, वा रोट्टी हमनै सदा दिया कर।”

35 यीशु नै उनतै कह्या, “जीवन की रोट्टी मै सूं: जो मेरै धोरै आवेगा, वो कदे भूक्खा कोनी रहवैगा, अर जो कोए मेरै पै बिश्वास करैगा, वो कदे तिसाया कोनी होवैगा।

36 पर मन्नै थारे ताहीं पैहले तै कह्या था, के थमनै मेरैताहीं देख भी लिया सै, फेर भी बिश्वास कोनी करदे।

37 वे सारे जो पिता नै मेरे ताहीं दिये सै, वे मेरै धोरै आवैगें, अर हर एक जो कोए मेरै धोरै आवैगा उसनै मै कदे भी कोनी छोड़ूंगा।

38 पर मै अपणी मर्जी कोनी पर अपणे भेजण आळे पिता की मर्जी पूरी करण खात्तर सुर्ग तै उतरया सूं।

39 अर मेरै भेजण आळे की मर्जी या सै के जो किमे उसनै मेरै ताहीं दिया सै, उस म्ह तै मै किसे नै ना खोऊं, पर उसनै आखर के दिनां म्ह दुबारे जिन्दा कर दूँ।

40 क्यूँके मेरै पिता की मर्जी या सै के जो कोए बेट्टै नै अपणा के उसपै विश्वास करै, वो अनन्त जीवन पावै, अर मै उसनै आखरी के दिनां म्ह दुबारै जिन्दा करूँगा।”

41 इसपै यहूदी उसपै बिरझाण लागगे, क्यूँके उसनै कह्या था, “जो रोट्टी सुर्ग तै उतरी, वा मै सूँ।”

42 अर वे बोल्ले, “के यो यीशु सै, यूसुफ का बेट्टा, जिसके माँ-बाप नै हम जाणां सां? फेर वो किस ढाळ कह सकै सै के मै सुर्ग तै उतरया सूँ?”

43 यीशु नै उन ताहीं जवाब दिया, “आप्स म्ह मतना बिरझाओ।”

44 कोए मेरै धौरै कोनी आ सकदा जिब ताहीं पिता, जिसनै मेरैताहीं भेज्या सै, उसनै खीच न्ही लेवै, अर मै उसनै आखर के दिनां म्ह फेर जिन्दा करूँगा।

45 नवियाँ के लेखां म्ह यो लिख्या सै: “वे सारे परमेसवर की ओड़ तै सिखाए होए होवैगें।” जिस किसे नै पिता तै सुण्या अर लिख्या सै, वो मेरै धौरै आवै सै।

46 किसे नै पिता ताहीं कोनी देख्या, सिवाए उसके, जो परमेसवर की ओड़ तै सै, सिर्फ उस्से नै पिता ताहीं देख्या सै।

47 मै थारैताहीं साच्ची-साच कहूँ सूँ, के जो कोए विश्वास करै सै, अनन्त जीवन उस्से का सै।

48 जीवन की रोट्टी मै सूँ।

49 थारे पूर्वजां नै जंगल-बियावान म्ह मन्ना खाया अर मरगे।

50 या वा रोट्टी सै जो सुर्ग तै उतरी सै, ताके माणस उस म्ह तै खावै अर ना मरै।

51 जीवन की रोट्टी जो सुर्ग तै उतरी सै, मै सूँ। जै कोए इस रोट्टी म्ह तै खावै, तो सारी हाण जिन्दा रहवैगा, अर जो रोट्टी मै दुनिया के जीवन खात्तर दियुँगा, वो मेरा माँस सै।

52 इसपै यहूदी न्यू कहकै आप्स म्ह बहस करण लागगे, “यो माणस किस ढाळ हमनै अपणा माँस खाण नै दे सकै सै?”

53 यीशु नै उन ताहीं कह्या, “मै थारैताहीं साच्ची-साच कहूँ सूँ, के जिब ताहीं थम मुझ माणस के बेट्टे का माँस ना खाओ, अर मेरा लहू ना पियो, थारे म्ह जीवन कोनी।

54 जो मेरा माँस खावै अर मेरा लहू पीवै सै, अनन्त जीवन उस्से का सै, अर आखरी के दिनां म्ह मै उसनै दुबारै जिन्दा कर दियुँगा।


55 क्यूँके मेरा माँस सच म्ह खाण की चीज सै, अर मेरा लहू सच म्ह पीण की चीज सै।

56 जो मेरा माँस खावै अर मेरा लहू पीवै सै वो मेरै म्ह डटया रहवै सै, अर मै उस म्ह।

57 जिसा जिन्दे पिता नै मेरैताहीं भेज्या सै, अर मै पिता के कारण जिन्दा सूँ, उस्से ढाळ वो भी जो मन्ने खावैगा मेरै कारण जिन्दा रहवैगा।

58 जो रोट्टी सुर्ग तै उतरी सै याए सै, उस रोट्टी बरगी कोनी जो पूर्वजां नै खाई अर मरगे, जो कोए या रोट्टी खावैगा, वो सदा ताहीं जिन्दा रहवैगा।”

59 ये बात उसनै कफरनहूम नगर के एक आराधनालय म्ह उपदेश देन्दे बखत कही।



60 उसके चेल्यां म्ह तै घणखरा नै या सुणकै कह्या, “या सख्त शिक्षा सै, इसनै कौण सुण सकै सै?”

61 यीशु नै अपणे मन म्ह न्यू जाणकै के मेरै चेल्लें आप्स म्ह इस बात पै बिरझावै सै, उन ताहीं बुझ्या, “के इस बात तै थारे ताहीं ठेस लागै सै?”

62 जै थम मुझ माणस के बेट्टे नै जड़े मै पैहल्या था, ओड़ैए उप्पर जान्दे देखोगे, तो के होगा?

63 आत्मा ए सै जो देह नै जीवन देवै सै, देह का कोए महत्व कोनी, जो वचन मन्ने थारैतै कह्ये सै, वे आत्मा सै, अर जीवन भी।

64 पर थारे म्ह तै किमे इसे सै जो विश्वास कोनी करदे। क्यूँके यीशु पैहल्या तै ए जाणै था के जो विश्वास न्ही करदे, वे कौण सै, अर कौण मेरै ताहीं पकड़वावैगा।

65 अर वो बोल्या, “ज्यातै मन्नै थारे ताहीं कह्या था के जिव ताहीं किसे नै पिता की ओड़ तै यो वरदान ना मिलै तब ताहीं वो मेरै धरै कोनी आ सकदा।”

~~~~~

66 इसपै उसके चेल्यां म्ह तै घणखरे उल्टे हटगे अर उसके बाद उसके गेल्या कोनी चाल्ले।

67 फेर यीशु नै उन बारहां चेल्यां तै कह्या, “के थम भी चले जाणां चाहो सो?”

68 शमौन पतरस नै उस ताहीं जवाब दिया, “हे प्रभु, हम किसके धरै जावां? अनन्त जीवन की बात तो तरैए धरै सै,

69 अर हमनै विश्वास करया अर जाणगे सै के परमेसवर का पवित्र जन तूए सै।”

70 यीशु नै उन ताहीं जवाब दिया, “के मन्नै थम बारहां चेल्यां ताहीं कोन्या छाट्या? फेरभी थारे म्ह तै एक जन शैतान सै।”

71 यो उसनै शमौन इस्करियोती के बेट्टै यहूदा के बारै म्ह कह्या था, क्यूँके वोए जो बारहां चेल्यां म्ह तै एक था, उस ताहीं पकड़वाण म्ह था।

## 7

~~~~~

1 इन बात्तां के हो लेण के पाच्छे, यीशु गलील परदेस म्ह सफर करण लाग्या, वो यहूदिया परदेस म्ह जाणा कोनी चाहवै था, क्यूँके यहूदी लोग उस ताहीं मारण की ताक म्ह थे।

2 यहूदियां का झोपड़ियां का त्यौहार लोवै था।

3 ज्यातै उसके भाईयां नै उस ताहीं कह्या, “याडै तै यहूदिया परदेस नै जा, ताके जो काम तू करै सै उननै तेरे चेल्लें ओड़ै भी देखवै।

4 क्यूँके इसा कोए न्ही होगा जो मशहुर होणा चाहवै, अर लुहक के काम करै। जै तू यो काम करै सै, तो खुद नै दुनिया म्ह साबित कर।”

5 क्यूँके उसके भाई भी उसपै विश्वास कोनी करै थे।

6 फेर यीशु नै उनतै कह्या, “मेरे खात्तर इब्बै सही बखत कोनी आया, पर थारे खात्तर सारा बखत सही सै।

7 दुनिया थारे तै बैर कोनी कर सकदी, पर वा मेरै तै बैर करै सै क्यूँके मै उसके बिरोध म्ह या गवाही दियुं सूं के उसके काम भुन्डे सै।

8 थम त्यौहार म्ह जाओ, मै इब्बै इस त्यौहार म्ह कोनी जान्दा, क्यूँके इब्बै मेरा सही बखत कोनी आया।”

9 वो उनतै ये बात कहकै गलील परदेस म्ह रहग्या।

~~~~~

10 पर जिव उसके भाई त्यौहार म्ह जा लिए तो वो खुद भी, जाहिर म्ह न्ही पर मान्नो गुप्ती तै गया।

11 त्यौहार म्ह कुछ यहूदी लोग यीशु ताहीं टोहन्दे होए पूछताछ करण लागरे थे, “के वो कडै सै?”

12 फेर भी यीशु के बोरें म्ह बड़ी बहस होण लागरी थी, कई माणस कहवै थे, “के वो भला माणस सै।” अर कईयां का कहणा था, “के ना, वो माणसां नै बहकावै सै।”

13 फेर भी यहूदियां के डरकै मारे कोए भी माणस यीशु के बारै म्ह खुलकै कोनी बोल्लै था।

~~~~~

14 जिव त्यौहार के आधे दिन बीतगे, फेर यीशु मन्दर म्ह जाके उपदेश देण लागग्या।

15 फेर यहूदियां नै हैरान होकै कह्या, “इसनै बिना पढ़े ज्ञान किस तरियां आ गया?”

16 यीशु नै उन ताहीं जवाब दिया, “जो उपदेश मै देऊं सूं, मेरा अपणा कोनी, पर उसतै आवै सै जिसनै मेरे ताहीं भेज्या सै।

17 जै कोए माणस उसकी मर्जी पै चाल्लण का प्रण करै, तो उस ताहीं यो बेरा लाग ज्यागा, के यो उपदेश परमेसवर की ओड़ तै सै, या मै अपणी ओड़ तै देऊँ सू।

18 जो अपणी ओड़ तै कुछ कहवै सै, वो खुद की बड़ाई चाहवै सै, पर जो अपणे भेजण आळे की बड़ाई चाहवै सै वोए साच्चा सै, अर उस म्ह अधर्म कोनी।

19 के मूसा नबी नै थारैताहीं नियम-कायदे कोनी दिये? फेरभी थारैम्ह तै कोए नियम-कायदा पै कोनी चाल्दा। थम मन्नै क्यातै मारणा चाहो सो?"

20 माणसां नै जवाब दिया, "तेरे म्ह ओपरी आत्मा सै! कौण तन्नै मारणा चाहवै सै?"

21 यीशु नै उन ताहीं जवाब दिया, "मन्नै आराम कै दिन एक चमत्कार करया, अर थम सारे छो म्ह होंगे।

22 इस्से खात्तर मूसा नबी नै थारैताहीं खतने का नियम दिया था (यो नियम मूसा नबी का न्ही था बल्के या थारे पूर्वजां तै ए लाग लागरी सै) अर थम आराम कै दिन माणस का खतना करो सो।

23 जिब आराम कै दिन माणस का खतना करया जावै सै ताके मूसा नबी कै नियम-कायदा का हुकम न्ही टळै। फेर थम मेरै पै क्यातै छो करो सो के मन्नै आराम कै दिन एक माणस ताहीं पूरी तरियां ठीक करया।

24 मुंह देख्या न्याय मतना करो, पर सही-सही न्याय करो।"

?? ???? ? ???? ??

25 फेर यरुशलम म्ह रहण आळे माणसां म्ह तै कईयां नै कह्या, "के यो वोए कोनी जिस ताहीं यहूदी अगुवें मार देणा चाहवै सै?"

26 पर लखाओ, "वो तो सरेआम बात करै सै अर कोए उसतै किमे कोनी कहन्दा। के यो न्ही हो सकता के यहूदी अगुवां नै साच्ये बेरा पाटग्या सै, के योए मसीह सै?"

27 इसकै बारे म्ह हमनै बेरा सै यो कितका सै, पर मसीह जिब आवैगा तो कोए कोनी जाणै के वो कितका सै।"

28 फेर यीशु नै मन्दर म्ह उपदेश देन्दे होए रुक्का मारकै कह्या, "थम मन्नै जाणो सो, अर न्यू भी जाणो सो के मे कित्त तै आया सू। मै तो खुद कोनी आया, पर मेरा भेजण आळा साच्चा सै, उसनै थम कोनी जाणदे।

29 पर मै उसनै जाणु सू, क्यूँके मै उसके कान्ही तै आया सू, अर उस्से नै मेरै ताहीं भेज्या सै।"

30 यो सुणकै यहूदी अगुवां नै यीशु ताहीं पकड़णा चाह्या, फेरभी किसे नै उसके हाथ कोनी लाया, क्यूँके उसके मरण का सही बखत इब्बै कोनी आया था।

31 फेर भी भीड़ म्ह तै घणखरे माणसां नै उसपै विश्वास करया, अर बोल्ले, "मसीह जिब आवैगा तो के इसतै घणे अचम्भे के काम दिखावैगा जो इसनै दिखाए?"

???? ???? ???? ?? ???? ?

32 फरीसियां नै भीड़ म्ह माणस ताहीं यीशु के बारे म्ह चुपके-चुपके बात करते सुण्या, तो प्रधान याजक अर फरीसियां नै यीशु ताहीं पकड़ण खात्तर मन्दर के सिपाहियां ताहीं भेज्या।

33 मसीह यीशु बोल्या, "मै थोड़ी बार ताहीं थारे गेल्या सू, फेर अपणे भेजण आळे धौरै उल्टा चल्या जाऊँगा।

34 थम मन्नै टोहओगे, पर कोनी पाओगे, अर जडै मै सू, ओडै थम कोनी आ सकदे।"

35 इसपै यहूदी अगुवां नै आप्स म्ह कह्या, "यो कित्त जावैगा, के हम इसनै कोनी टोह सकदे? के यो जो यूनानी परदेशियां म्ह तो बसणा न्ही चाहन्दा, ताके यूनानियां ताहीं भी उपदेश दे?"

36 इसकी इस बात का के मतलब सै? जो उसनै बोल्ली सै, के थम मन्नै टोहओगे, पर कोनी पाओगे, अर जडै मै सू, ओडै थम न्ही आ सकदे।"

????-?? ?? ???? ?

37 त्यौहार के आखरी दिन, जो खास दिन सै, यीशु खड्या होया अर रुक्का मारकै कह्या, “जै कोए तिसाया हो तो मेरै धोरै आवै अर पीवै।

38 जो कोए मेरै पै बिश्वास करैगा, जिसा पवित्र ग्रन्थ म्ह लिख्या सै, ‘उसकी अंतरआत्मा म्ह तै जीवन के जल की नदियाँ बह लिकड़ैगी, जो अनन्त जिन्दगी देवै सै।’”

39 यीशु नै यो वचन पवित्र आत्मा के बारे म्ह कह्या, जो बिश्वास करण आळा नै मिलण आळी थी, क्यूँके इब ताहीं पवित्र आत्मा कोनी उतरया था, क्यूँके यीशु इब ताहीं अपनी महिमा म्ह कोनी पोंहच्या था।

40 फेर भीड़ म्ह तै कईयाँ नै या बात सुणकै कह्या, “साच्ये योए वो नबी सै, जिसके आण की हम आस देख्वां थे।”

41 अर कईयाँ नै कह्या, “यो मसीह सै” पर कई बोल्ले, “मसीह गलील परदेस तै तो न्ही आवैगा?”

42 पवित्र ग्रन्थ यो कहवै सै, के मसीह दाऊद की पीढ़ी तै अर बैतलहम नगर तै आवैगा, जड़ै दाऊद रहवै था?

43 आखर म्ह उसकै कारण माणसां म्ह फूट पड़ी।

44 उन म्ह तै कई उस ताहीं पकड़णा चाहवै थे, पर किसे नै उसके हाथ कोनी लाया।

~~~~~

45 फेर सिपाही, प्रधान याजकां अर फरीसियाँ के धोरै बोहड़ आए, उननै उन ताहीं कह्या, “थम उसनै क्यातै न्ही ल्याए?”

46 सिपाहियाँ नै जवाब दिया, “इसी बात बताण आळा माणस हमनै आज ताहीं कदे भी कोनी मिल्या।”

47 फरीसियाँ नै उन ताहीं जवाब दिया, “के थम भी भळोई म्ह आगै?”

48 के सदरां या फरीसियाँ म्ह तै किसे नै भी उसपै बिश्वास करया सै?

49 पर ये माणस जो मूसा नबी के नियम-कायदे कोनी जाणदे, परमेसवर की ओड़ तै सरापित सै।”

50 नीकुदेमुस जो उन म्ह तै एक था, वो मसीह यीशु तै पैहल्या मिल चुका था, उन ताहीं बोल्या,

51 “के म्हारे नियम-कायदे किसे माणस नै, जिव ताहीं पैहल्या उसकी सुणकै जाण ना लवै, के वो के करै सै, कसूरवार मान्ने सै?”

52 उननै नीकुदेमुस ताहीं जवाब दिया, “तू भी गलील परदेस का सै? पवित्र ग्रन्थ म्ह ढूँढ़ अर देख के गलील परदेस तै कोए नबी कोनी आवै।”

53 फेर सारे अपणे-अपणे घरां चले गए।

## 8

~~~~~

1 यीशु अपणे चल्यां के गेल जेतून के पहाड़ पै गया।

2 तड़केए आगले दिन यीशु फेर मन्दर म्ह आया। भोत सारे माणस उसकै धोरै आए अर वो बैठकै उननै उपदेश देण लाग्या।

3 जिव वो बोलण लागरया था, तो जिब्बे शास्त्री अर फरीसी एक विरबान्नी नै ल्याए, जो जारी करते होए रंगे हाथ पकड़ी गयी थी, अर उस ताहीं माणसां के स्याम्ही खड्या कर दिया, अर यीशु ताहीं कह्या,

4 “हे गुरु, या विरबान्नी जारी कर दी रंगे हाथ पकड़ी गयी सै।

5 मूसा नबी के नियम-कायदा म्ह उसनै म्हारे ताहीं हुकम दिया सै, के इसी विरबान्नी नै पत्थर बरसा के मार दो। पर तू इस विरबान्नी के बारे म्ह के कहवै सै?”

6 उननै यीशु ताहीं परखण खात्तर या बात कही, ताके उस म्ह खोट लिकाइण का कोए सुराग मिलै जावै। पर यीशु कोइडा होके आन्गळी तै धरती पै लिखण लाग्या।

7 जिव वे बार-बार उसतै सवाल करते रहे, तो फेर उसनै सीध्धा होके उन ताहीं कह्या, “थारे म्ह जिसने भी कोए पाप न्ही करया हो, वोए उसके सबतै पैहला पत्थर मारे।”

8 फेर यीशु कोडडा होके आन्नाळी तै धरती पै लिखण लाग्या ।

9 जिब माणसां नै यो सुण्या तो सबतै पैहले बूढ़े माणस अर फेर एक-एक करके ओडै तै खिसकण लागगे, क्यूँके वे सब जाणै थे, के हम सब पापी सां, अर सिर्फ यीशु अर वा बिरबान्नी ओडै रहगे ।

10 यीशु खड्या होया अर उस बिरबान्नी ताहीं कह्या, “हे नारी, वे कित्त गए? के किस्से नै तेरे ताहीं दण्ड न्ही दिया?”

11 वा बोल्नी, “हे पुरभु, किसे नै न्ही ।” यीशु बोल्या, “मै भी तेरे ताहीं दण्ड न्ही देऊंगा, जा, अर दुवारा कदे पाप ना करिए ।”

~~~~~

12 मन्दर म्ह अपणे उपदेश नै दुबारै शरु करदे होए यीशु नै माणसां तै कह्या, “दुनिया का चाँदणा मै सूँ, जो कोए मेरै पाच्छै चाल्लैगा, वो अन्धेरै म्ह कदे कोनी चाल्लैगा, पर वो चाँदणा पावैगा जो अनन्त जीवन देवै सै ।”

13 फरीसियाँ नै उस ताहीं कह्या, “तू अपणी गवाही खुद देवै सै, इस खात्तर तेरी गवाही साच्ची कोनी ।”

14 यीशु नै उन ताहीं जवाब दिया, “भलाए मै अपणी गवाही खुद देऊँ सूँ, फेर भी मेरी गवाही मान्नी जावैगी, क्यूँके मै जाणु सूँ, के मै कित्त तै आया सूँ, अर कितोड जाऊँ सूँ? पर थम कोनी जाणदे के मै कित्त तै आऊँ सूँ, या कितोड जाऊँ सूँ ।

15 थम मानवीय सोच तै, न्याय करो सो, मै किसे का न्याय कोनी करदा ।

16 जै मै न्याय करूँ भी तो वो सही ए होगा, क्यूँके मै एकला कोनी, पर परम पिता, जिसनै मेरै ताहीं भेज्या सै, वो अर मै दोन्नु मिलके न्याय करा सां ।

17 थारे मूसा नबी के नियम-कायदा म्ह भी लिख्या सै, के दो जण्यां की गवाही सच के रूप म्ह मान्नी जा सके सै ।

18 एक तो मै खुद अपणी गवाही दियुँ सूँ, अर दुसरा मेरा पिता मेरी गवाही देवै सै, जिसनै मेरै ताहीं भेज्या ।”

19 उननै उस ताहीं कह्या, “तेरा पिता कित्त सै?” यीशु नै जवाब दिया, “ना थम मन्ने जाणो सो, ना मेरै पिता नै, जै मन्ने जाणदे तै मेरै पिता नै भी जाणदे ।”

20 यीशु नै ये वचन मन्दर म्ह उपदेश देन्दे होए भण्डार घर म्ह बोल्नी, अर किसे नै उस ताहीं कोनी पकड्या, क्यूँके उसके दुख ठाण का अर मरण का बखत इब ताहीं कोनी आया था ।

~~~~~

21 यीशु नै फेर उन ताहीं कह्या, “मै जाऊँ सूँ, अर थम मन्ने टोहओगे, अर अपणे पाप म्ह मरोगे । जडै मै जाऊँ सूँ, ओडै थम न्ही आ सकदे ।”

22 इसपै यहूदी अगुवां नै कह्या, “के वो खुद नै मार देवैगा, जो कहवै सै, ‘जडै मै जाऊँ सूँ, ओडै थम न्ही आ सकदे?’ ”

23 यीशु नै उन ताहीं कह्या, “थम इस दुनिया म्ह पैदा होए सां, अर मै सुर्ग तै आया सूँ । थम इस दुनिया के सो, मै इस दुनिया का कोनी ।

24 ज्यांतै मन्ने थारे ताहीं कह्या के थम अपणे पापां म्ह मरोगे, जै थारा मेरे म्ह बिश्वास कोनी के मै कौण सूँ, तो थम मरोगे, अर थारे पाप माफ कोनी होंगे ।”

25 यहूदी अगुवां नै यीशु ताहीं कह्या, “के तू कौण सै?” वो उनतै बोल्या, जिब तै मन्ने प्रचार करणा शरु करया सै, तब तै मै थमनै कहन्दा आया सूँ, “के मै कौण सूँ?”

26 “थारे बारे म्ह कहण खात्तर अर फैसला करण खात्तर मेरे धरै भोत कुछ सै, पर सच्चाई याए सै के जिसनै मेरे ताहीं भेज्या सै, मै वोए कहूँ सूँ, जो मन्ने उसतै सुण्या सै, वोए दुनिया के माणसां तै कहूँ सूँ ।”

27 वे न्यू न्ही समझै के म्हारै तै, पिता के बारे म्ह कहवै सै ।

28 फेर यीशु बोल्या, “जिब थम मुझ माणस कै बेट्टै नै ऊँच्चे पै चढाओगे, जिब जाणोगे के मै वोएँ सूं। मै खुद तै किमे कोनी करदा, पर जिस तरियाँ मेरै पिता नै, मेरै ताहीं सिखाया सै, उस्से ढाळ ये बात कहूँ सूं।

29 मेरा भेजण आळा मेरै गेल्या सै, उसनै मेरैताहीं एकला कोनी छोड्या क्यूँके मै सारी हाण वैएँ काम करूँ सूं, जिसतै वो राज्जी होवै सै।”

30 वो ये बात कहणे लागरया था, के घणखरयां नै उसपै बिश्वास करया।

☞ ☞☞☞ ☞☞☞☞ ☞☞☞☞ ☞☞☞☞

31 फेर यीशु नै उन यहूदियाँ तै जिन् नै उसपै बिश्वास करया था, बोल्या, “जै थम मेरै वचन म्ह बणे रहोगे, तो साच-ए मेरे चेल्लेँ ठहरोगे।”

32 थम सच नै जाणोगे अर सच थमनै आजाद करैगा।

33 उननै उस ताहीं जवाब दिया, “हम तो अब्राहम के वंशज सा, कदे किसे के गुलाम कोनी बणे। फेर तू किस तरियाँ कहवै सै, के थम आजाद हो जाओगे?”

34 यीशु नै उन ताहीं जवाब दिया, “मै थारैतै साच्ची-साच कहूँ सूं, के जो कोएँ पाप करै सै, वो पाप का गुलाम सै।

35 गुलाम सारी हाण घर म्ह कोनी रहन्दा, बेट्टा सारी हाण घरां रहवै सै।

36 ज्यांतै जै बेट्टा थमनै आजाद करैगा, तो साच्चे थम आजाद हो जाओगे।

37 मै जाणूँ सूं, के थम अब्राहम के वंश के सो, फेर भी थम मेरे वचनां नै कोनी मानते, ज्यांतै थम मन्नै मारणा चाहो सो।

38 मै वोएँ कहूँ सूं, जो मेरे पिता नै मेरे ताहीं दिखाया सै, अर थम वोएँ करो सो, जो थमनै अपणे पिता तै सुणया सै।”

39 उननै उस ताहीं जवाब दिया, “म्हारा पूर्वज तो अब्राहम सै।” यीशु उनतै बोल्या, “जै थम अब्राहम के वंशज होन्दे, तो अब्राहम जिसे काम करदे।

40 पर इब थम मेरै ताहीं मारणा चाहो सो, जिसनै थारे ताहीं वो साच्चा वचन बताया जो परमेसवर तै सुणया, इस तरियाँ तो अब्राहम नै कोनी करया था।

41 थम अपणे पिता कै जिसे काम करो सो।” उननै यीशु ताहीं कह्या, “हम जारी तै कोनी जणे, म्हारा एक ए पिता सै यानिके परमेसवर।”

42 यीशु उनतै बोल्या, “जै परमेसवर थारा पिता होन्दा, तो थम मेरै तै प्यार करदे, क्यूँके मै परमेसवर की ओड़ तै आया सूं। मै खुद कोनी आया, पर उस्से नै मेरै ताहीं भेज्या।

43 थम मेरी बात क्यांतै न्ही समझदे? ज्यांतै के थम मेरे वचनां नै अपणादे कोनी।

44 थम अपणे पिता शैतान की ओड़ तै सो, अर अपणे पिता की मर्जी पूरी करणा चाहो सो। वो तो शरू तै ए खून्नी सै, अर सच पै टिक्या ए कोनी रहया, क्यूँके सच उस म्ह सै ए कोनी। जिब वो झूठ बोल्लै सै, तो अपणे सुभाव तै ए बोल्लै सै, क्यूँके वो झूट्टा सै बल्के झूठ का बाप सै।

45 पर मै जो सच बोल्लूँ सूं, इस्से करके थम मेरा बिश्वास कोनी करदे।

46 थारे म्ह तै कौण मन्नै पापी ठैहरावै सै? जै मै सच बोल्लूँ सूं, तो थम मेरा बिश्वास क्यांतै न्ही करदे?

47 जो परमेसवर कान्ही तै होवै सै, वो परमेसवर की बात सुणे सै, अर थम ज्यांतै कोनी सुणदे के परमेसवर की ओड़ तै कोनी सो।”

☞☞☞☞ ☞☞☞☞☞☞☞☞☞☞

48 न्यू सुण यहूदियाँ नै उस ताहीं कह्या, “के हम ठीक कोनी कहन्दे के तू सामरी सै, अर तेरे म्ह भुन्डी ओपरी आत्मा सै?”

49 यीशु नै जवाब दिया, “मेरै म्ह भुन्डी ओपरी आत्मा कोनी,” पर मै अपणे बाप की इज्जत करूँ सूँ, अर थम मेरी बेजती करो सो।

50 पर मैं अपना मान-सम्मान कोनी चाहन्दा, हाँ, एक से जो चाहवै सै, अर न्याय करण आळा सै।

51 मैं धमनै साच्ची-साच कहूँ सूँ, “के जै कोए माणस मेरे वचनां नै मान्नेगा, तो वो अनन्त काल ताहीं कोनी मरै।”

52 यहूदियाँ नै उस ताहीं कह्या, “इब हम जाणगे के तेरे म्ह भुन्डी ओपरी आत्मा सै। अब्राहम मरग्या अर नबी भी मरग्ये सै, अर तू कहवै सै, ‘जै कोए मेरे वचनां नै मान्नेगा, तो वो अनन्त काल ताहीं कोनी मरै।’

53 म्हारा पूर्वज अब्राहम तो मरग्या। के तू उसतै भी बड्डा सै? अर नबी भी मरग्ये। तू अपने-आपने के मान्ने सै?”

54 यीशु नै जवाब दिया, “जै मैं खुद अपनी महिमा करूँ, तो मेरी महिमा किमे कोनी। पर मेरी महिमा करण आळा मेरा पिता सै, जिसनै धम कहां सो के वो थारा परमेसवर सै।

55 धमनै तो उस ताहीं कोनी जाण्या, पर मैं उस ताहीं जाणु सूँ। जै मैं कहूँ के मैं उस ताहीं कोनी जाण्दा, तो मैं थारी ढाळ झूट्टा ठहरूँगा, पर मैं उस ताहीं जाणु अर उसके वचनां नै मान्नु सूँ।

56 थारा पूर्वज अब्राहम मेरा दिन देख्खण की आस म्ह घणा मगन था, अर उसनै देख्या अर आनन्द करया।”

57 यहूदियाँ नै उस ताहीं कह्या, “इब ताहीं तू पचास साल का कोनी, फेरभी तन्नै अब्राहम ताहीं देख्या सै?”

58 यीशु उनतै बोल्या, “मैं धमनै साच्ची-साच कहूँ सूँ, के पैहल्या इसकै के अब्राहम पैदा होया, मैं सूँ।”

59 या बात सुणके माणसां नै यीशु ताहीं मारण खात्तर पत्थर ठाए, पर यीशु लुहकके मन्दर तै लिकड़ गया।

9

9:1-12

1 ओड़ तै जान्दे होए रह म्ह एक यीशु ताहीं जन्म तै आन्धा एक माणस मिला।

2 उसके चेल्यां नै उसतै बुद्धया, “हे गुरु, किसनै पाप करया था के यो आन्धा पैदा होया, इस माणस नै या इसके माँ-बाप नै?”

3 यीशु नै जवाब दिया, “ना तो इसनै पाप करया था, ना इसके माँ-बाप नै पाप करया, पर यो ज्यांतै आन्धा पैदा होया ताके परमेसवर की शक्ति दिखाई जा सकै।

4 जिसनै मेरै ताहीं भेज्या सै, हमनै उसके काम दिन-ए-दिन म्ह करणा जरूरी सै। वा रात आण आळी सै, जिस म्ह कोए माणस काम न्ही कर पावैगा।

5 जिव ताहीं मैं दुनिया म्ह सूँ, जद ताहीं दुनिया का चान्दणा सूँ।”

6 न्यू कहके यीशु नै धरती पै थुक्या, अर उस थूक तै माट्टी का लेप बनाया, अर उस लेप ताहीं आँधे की आँखां पै लगाके।

7 उसतै बोल्या, “जा,” “शीलोह कै कुण्ड म्ह” (शीलोह का मतलब भेज्या होया सै)। उसनै जाके अपना मुँह धोया, अर जिव वो बोहड़ा तो उसनै दिक्खण लाग्या।

8 फेर भिखारी के पड़ोसी अर उन माणसां नै जिननै उस ताहीं पैहल्या भीख माँगदे देख्या था, एक-दुसरे तै कहण लागगे, “के यो वोए न्ही सै, जो बेट्या भीख माँग्या करै था?”

9 कई माणस बोल्ले, “यो वोए सै,” दुसरे बोल्ले, “कोनी, पर उसकै जिसा सै।” उसनै कह्या, “मैं वोए सूँ।”

10 फेर वे उसतै बुद्धया लागगे, “तेरी आँखां की रोशनी किस तरियां आगी?”

11 उसनै जवाब दिया, “यीशु नामक एक माणस नै माट्टी का लेप बनाया, अर मेरी आँखां पै लाके मेरै ताहीं बोल्या, ‘जा, शीलोह म्ह जाके अपना मुँह धो ले,’ बस फेर के था मैं गया अर अपना मुँह धोया अर देख्खण लाग्या।”

12 उननै उसतै बुद्धया, “वो माणस कित्त सै?” वो बोल्या, “मैं कोनी जाण्दा।”

XX

- 13 माणस उसने जो आन्धा था फरीसियों के धारे ले आए।
- 14 जिस दिन यीशु ने माट्टी लगाके उसकी आँख खोल्ली थी, वो आराम का दिन था।
- 15 फेर फरीसियाँ ने भी उनते बुद्धया के उसकी आँखां की रोशनी किस ढाळ मिली। उसने उन ताहीं कह्या, “उसने मेरी आँखां पै माट्टी लाई, फेर मन्ने अपना मुँह धो लिया, अर इब देखूँ सूँ।”
- 16 इसपै कई फरीसी कहण लागगे, “यो माणस परमेसवर की ओड़ तै कोनी, क्यूँके वो आराम कै दिन ने कोनी मान्दा।” दुसरे बोल्ले, “पापी माणस इसे अचम्भे के काम किस ढाळ दिखा सकै सै?” आखर म्ह उन म्ह फूट पड़गी।
- 17 उनने उस आंधे तै फेर कह्या, “जिस माणस ने तेरे ताहीं आँखां की रोशनी दी सै। तू उसके बारे म्ह के कहणा चाहवै सै?” उसने कह्या, “वो नबी सै।”
- 18 पर यहूदी अगुवां नै बिश्वास कोनी होया, के वो आन्धा था, अर इब वो देखवै सै, इस खात्तर उनने उसके माँ-बाप ताहीं बुलाया।
- 19 अर उनतै बुद्धया, “के यो थारा बेट्टा सै, जिसके बारे मै थम कहां सां, के वो जन्म तै आन्धा था? फेर इब वो किस तरियां देखवै सै?”
- 20 उसके माँ-बाप नै जवाब दिया, “हाँ, या तो जाणा सा के यो म्हारा बेट्टा सै, अर या भी के यो आन्धा जन्मा था,
- 21 पर न्यू कोनी जाणदे, के इब यो किस तरियां देखण लागया, अर ना न्यू जाणदे के किसने इसकी आँखां की रोशनी दी सै। वो बाळक कोनी सै, उस्से तै बुझल्यो, वो अपने बारे म्ह खुद ए बतावैगा।”
- 22 ये बात उसके माँ-बाप नै ज्यांतै कही क्यूँके वे यहूदी अगुवां तै डरे थे, क्यूँके यहूदी अगुवां नै एक्का कर लिया था, के जै कोए कहवै के वो मसीह सै, तो उस ताहीं आराधनालय म्ह तै लिकाड़ दिया जावैगा।
- 23 इस्से कारण उसके माँ-बाप नै कह्या, “वो बाळक कोनी, उस्से तै बुझल्यो।”
- 24 फेर यहूदी अगुवां नै उस माणस ताहीं जो आन्धा था, दुसरी बर बुलाकै उसतै कह्या, “सच बता अर जो तू ठीक होया सै, तो तू सच बोलके परमेसवर की महिमा कर, हम जाणां सां के वो माणस पापी सै।”
- 25 उसने जवाब दिया, “मै न्ही जाणदा, के वो पापी सै के न्ही, मै एक बात जाणु सूँ, के मै आन्धा था अर इब देखूँ सूँ।”
- 26 उनने उस ताहीं फेर दुबारे कह्या, “उसने तेरे गेल्या के करया? अर किस ढाळ तेरी आँखां की रोशनी आगी?”
- 27 उसने उन ताहीं कह्या, “मन्ने तो थारे ताहीं पैहले भी बता दिया, पर थम उस बात नै सुणते कोनी, इब दुसरी बर क्यांतै सुणणा चाहवो सो? के थम भी उसके चेल्ले बणाणा चाहवो सो?”
- 28 फेर वे उसतै आच्छा-भुन्ड़ा कहके बोल्ले, “तूए उसका चेल्ला सै, हम तो मूसा नबी के चेल्ले सां।
- 29 हम जाणा सां, के परमेसवर नै मूसा नबी तै बात करी, पर इस माणस नै कोनी जाणदे के कइ तै आया सै।”
- 30 उसने उन ताहीं जवाब दिया, “या तो अचम्भे की बात सै, के थम न्ही जाणदे के वो कित्त का सै, फेर भी उसने मेरी आँखां की रोशनी दे दी।
- 31 हम जाणां सां, के परमेसवर पापियां की कोनी सुणदा, पर जै कोए परमेसवर का भगत हो अर उसकी मर्जी पै चाल्दा हो, तो वो उसकी जरूर सुणै सै।
- 32 दुनिया के शरूआत तै यो कदे सुणने म्ह कोनी आया, के किसे नै जन्म तै आन्धे की आँखां की रोशनी दी हो।
- 33 जै यो माणस परमेसवर कै कान्ही तै न्ही होन्दा, तो किमे भी कोनी कर सकदा।”
- 34 उनने उस ताहीं जवाब दिया, “तू तो जमाए पापां म्ह जन्मा सै, तू हमने के सिखावै सै?” अर उनने उस ताहीं आराधनालय तै बाहरणे लिकाड़ दिया।

~~~~~

35 यीशु ने सुण्या के उनसे उस ताहीं बाहरणै लिकाड़ दिया सै, अर जब उसतै मिल्या तो बोल्या, “के तू परमेसवर के बेटे पे बिश्वास करै सै?”

36 उसने जवाब दिया, “हे जनाब, परमेसवर का बेटा कौण सै, के मे उसपे बिश्वास करूँ?”

37 यीशु ने उस ताहीं कहा, “तन्ने उस ताहीं देख्या भी सै, अर जो तेरे गेल्या बात करण लाग ह्या सै, वो मै ए सूँ।”

38 उसने कहा, “हे प्रभु, मै तेरे पे बिश्वास करूँ सूँ।” अर उस ताहीं मोध्या पड़के प्रणाम करया।

39 फेर यीशु बोल्या, “मै इस दुनिया म्ह न्याय खात्तर आया सूँ, ताके जो आन्धे सै, वे देखे, अर जो देखे सै, वे आन्धे हो जावै।”

40 जो फरीसी उसके गेल्या थे, उनसे या बात सुणके उस ताहीं कहा, “के हम भी आन्धे सां?”

41 यीशु ने उन ताहीं कहा, “जै थम आन्धे होन्दे तो पापी कोनी होते, पर इब जिसा के थम कहो सो, के थम देखे सो, तो सच म्ह थारा पाप माफ न्ही हो सकदा।”

## 10

~~~~~

1 यीशु ने कहा, “मे थारे ताहीं साच्ची-साच कहूँ सूँ, के जो कोए भेड्या के बाड़े म्ह दरबाजे तै न्ही आन्दा, बल्के बाड़ा कूदके बड़े सै, वो चोर अर डाकू सै।

2 पर जो दरबाजे तै भीत्तर बड़े सै वो भेड्यां का पाळी सै।

3 उस खात्तर द्वारपाल दरबाजा खोल देवे सै, अर भेडू उसका बोल सुणे सै, अर वो अपनी उन भेड्यां नै नाम ले-लेके बुलावे सै, अर बाड़े तै बाहरणै ले जावे सै।

4 जब वो अपनी सारी भेड्यां नै बाहरणै काढ लेवे सै, तो उनके आगै-आगै चाल्लै सै, अर भेडू उसके गैल-गैल हो ले सै, क्यूँके वे उसका बोल पिच्छाणे सै।

5 पर भेडू बिगान्ने के गेल्या कोनी चाल्लै, पर उसतै भाज्जैगी, क्यूँके वे बिगान्ने का बोल कोनी पिच्छाणदी।”

6 यीशु ने उन ताहीं यो उदाहरण देके कहा, पर वे कोनी समझे के वो उनतै के समझणा चाहवै।

~~~~~

7 फेर यीशु ने उन ताहीं दुबारे कहा, “मे थारे ताहीं साच्ची-साच कहूँ सूँ, भेड्यां का दरबाजा मै सूँ।

8 जितने मेरे तै पैहल्या आए वे सारे चोर अर डाकू सै, पर मेरी भेड्यां नै उनकी एक न्ही सुणी।

9 दरबाजा मै सूँ, जै कोए मेरे जरिये भीत्तर बड़े सै, तो वो उद्धार पावैगा, अर भीत्तर बाहर आण-जाण लाग ज्यागा अर खाण खात्तर खाणा पावैगा।”

10 चोर किसे और काम खात्तर कोनी पर सिर्फ चोरी करण अर घात करण अर नुकसान करण नै आवै सै, मै ज्यांतै आया के वे जिन्दगी पावै अर भोत-ए घणी पावै।

11 आच्छा पाळी मै सूँ, आच्छा पाळी भेड्यां के खात्तर अपनी मर्जी तै जान देवे सै।

12 मजदूर जो ना पाळी सै अर ना भेड्यां का मालिक सै, भेडिये नै आन्दे देखके भेड्यां नै छोड़के भाज जावै सै, अर भेडिया उनसे पकड़े सै, अर उनपै हमला करै देवे सै।

13 वो ज्यांतै भाज जावे सै क्यूँके वो मजदूर सै, उसने भेड्यां की फिकर कोनी।

14 “कामल चरवाहा मै सूँ, मै अपनी भेड्यां नै जानु सूँ, अर मेरी भेडू मन्ने जाणे सै।

15 जिस ढाळ पिता मन्ने जाणे सै, अर मै पिता नै जानु सूँ, अर मै अपनी भेड्यां खात्तर अपनी जान दिवूँ सूँ।

16 मेरी और भी भेडू सै, जो इस बाड़े की कोनी। मन्ने उन ताहीं भी ल्याणा जरूरी सै। वे मेरा बोल पिच्छाणेगी, फेर एकेए रेवड़ अर एकेए पाळी होगा।

17 पिता ज्यांतै मेरे तै प्यार करै सै, क्यूँके मै अपनी जान अपनी मर्जी तै दिवूँ सूँ, के उसने दुबारे ले लूँ।

18 कोए मेरी जान मेरे तै खोसदा कोनी, बल्के मै उसने खुदे उसने अपनी मर्जी तै दियुं सूं। मन्ने उसकै देण का भी हक सै, अर उस ताहीं दुबारा लेण का भी हक सै, यो हुकम मेरे पिता नै मेरे ताहीं दिया सै।”

19 इन बाततां के कारण यहूदियाँ म्ह दुबारे फूट पड़ी।

20 उन म्ह तै घणखरे माणस कहण लागगे, “उस म्ह ओपरी आत्मा सै, अर वो बावळा सै, उसकी क्यातै सुणो सो?”

21 दुसरे माणसां नै कह्या, “ये वचन इसे माणस की न्ही हो सकदे, जिसम्ह ओपरी आत्मा हो। के ओपरी आत्मा आन्धयां नै आँखां की रोशनी दे सकै सै?”

?????? ? ? ???????

22 यरुशलेम नगर म्ह स्थापन का त्यौहार मनाया जायथा, अर जाडयां का मौसम था।

23 यीशु मन्दर म्ह सुलैमान के बराम्दा म्ह हान्डण लागरया था।

24 फेर यहूदियाँ नै उस ताहीं आ घेरया अर बुझया, “तू म्हारै मन नै कद ताहीं दुबिध्या म्ह गेरे राकखैगा? जै तू मसीह सै, तो म्हारै तै साफ-साफ बता दे।”

25 यीशु नै उन ताहीं जवाब दिया, “मन्ने थारैतै कह दिया पर थम विश्वास करदेए कोनी। जो काम मै अपने पिता के नाम तै करूं सूं, वैए मेरे गवाह सै,

26 पर थम ज्यातै विश्वास कोनी करदे क्यूके थम मेरी भेड्डां म्ह तै कोनी सो।

27 मेरी भेड मेरा बोल पिच्छाणै सै, मै उननै जाणु सूं, अर वे मेरे पाच्छे-पाच्छे चाल्लै सै

28 अर मै उन ताहीं अनन्त जीवन दियुं सूं। वे कदे नाश कोनी होवैगीं, अर कोए उननै मेरे हाथ तै खोस न्ही सकदा।

29 मेरा पिता, जिसने उन ताहीं मेरे तै दिया सै, सारया तै बड्डा सै, अर कोए उननै पिता के हाथ्यां तै खोस कोनी सकदा।

30 मै अर पिता एक सां।”

31 यहूदियाँ नै यीशु पै मारण खात्तर दुबारा पत्थर ठा लिये।

32 इसपै यीशु नै उन ताहीं कह्या, “मन्ने थारे तै अपने पिता की ओड़ तै घणे भले काम दिखाए सै, उन म्ह तै कौण सै काम खात्तर थम मेरे पै पत्थर मारणा चाह्णो सो?”

33 यहूदियाँ नै उस ताहीं जवाब दिया, “भले काम खात्तर हम तेरे पै पत्थर कोनी मारदे, पर परमेसवर की बुराई करण के कारण, अर ज्यातै के तू माणस होके खुद नै परमेसवर कहवै सै।”

34 यीशु नै उन ताहीं जवाब दिया, “के थारे मूसा नबी के नियम-कायदा म्ह कोनी लिख्या सै, मन्ने कह्या, थम ईश्वर सो?”

35 जै उसने उन ताहीं ईश्वर कह्या, जिनके थारै परमेसवर का वचन पोंहच्या (अर पवित्र ग्रन्थ की बात झूठ न्ही हो सकदी),

36 तो जिस ताहीं पिता नै पवित्र ठहराके दुनिया म्ह भेज्या सै, थम मेरे ताहीं कहो सो, ‘तू बुराई करै सै, ज्यातै के मन्ने यो कह्या,’ मै परमेसवर का बेट्टा सूं?”

37 जै मै अपने पिता के काम कोनी करदा, तो मेरा विश्वास ना करो।

38 पर जै मै करूं सूं, तो चाहे मेरा बिश्वास ना भी करो, पर उन काम्मां का तो विश्वास करो, ताके थम जाणो अर समझो के पिता मेरे म्ह सै अर मै पिता म्ह सूं।”

39 फेर यहूदियाँ नै दुबारे उस ताहीं पकड़ण की कोशिश करी पर वो उनके हाथ्यां तै लिक्ड गया।

40 यीशु दुबारे यरदन नदी के परली ओड़ै उस जगहां पै चल्या गया, जडै यूहन्ना पैहल्या बपतिस्मा दिया करै था, अर वो ओड़ैए रहया।

41 घणखरे माणस उसके थारे आके कहवै थे, “यूहन्ना नै तो कोए चमत्कार कोनी दिखाया, पर जो किमे यूहन्ना नै इसके बारे म्ह कह्या था, वो सारा कुछ साच्ची था।”

42 अर ओड़ै भोत-से माणसां नै यीशु पै विश्वास करया।

## 11

████████████████████

1 लाजर नामका एक माणस बीमार था, जो बैतनिय्याह गाम का था, अर उसकी दो भाण थी मरियम अर मार्था।

2 या वाए मरियम थी जिसने बाद म्ह प्रभु पै खसबूदार तेल गेर के उसके पायां ताहीं बाळां तै पुन्जयां था\*, लाजर इस्से का भाई था जो बीमार था।

3 इस करके उसकी भाणां नै यीशु ताहीं कुहवां भेज्या, “हे प्रभु, लखा, जिसतै तू प्यार करै सै, वो बीमार सै।”

4 न्यू सुणकै यीशु न्यू बोल्या, “या बीमारी मरण का कारण कोनी, पर परमेसवर की महिमा खात्तर सै, ताके उसके जरिये परमेसवर कै बेट्टै की महिमा होवै।”

5 मार्था उसकी बेब्बे अर लाजर तै यीशु प्यार करै था।

6 पर जिव उसनै सुण्ये के लाजर बीमार सै, तो जिस जगहां पै वो था, ओडै दो दिन और रुक गया।

7 दो दिन बाद फेर उसनै चेल्यां ताहीं कह्या, “आओ, हम फेर यहूदिया परदेस म्ह चाल्लां।”

8 चेल्यां नै उस ताहीं कह्या, “हे गुरु, कुछ दिन पैहल्या तो यहूदी तेरे पै पत्थर बरसा कै तन्नै मारणा चाहवै थे, अर के तू फेर भी उडैए जाणा चाहवै सै?”

9 यीशु नै जवाब दिया, “के दिन के बारहा घन्टे कोनी होन्दे? जै कोए दिन म्ह चाल्लै तो टोक्कर कोनी खान्दा, क्यूँके वे इस दुनिया के उजाळै नै देखै सै।

10 पर जै कोए रात म्ह चाल्लै तो टोक्कर खावै सै, क्यूँके उस म्ह उजाळा कोनी।”

11 उसनै ये बात कही, अर इसके बाद उन ताहीं कहण लाग्या, “के म्हारा साथी लाजर सो गया सै, पर मै उसनै जगाण जाऊँ सूँ।”

12 फेर चेल्यां नै उस ताहीं कह्या, “हे प्रभु, जै वो सो गया सै तो वो ठीक हो ज्यागा।”

13 यीशु नै तो उसकी मौत कै बाबत कह्या था, पर उननै सोच्या के उसनै नींद तै सोण कै बाबत कह्या सै।

14 फेर यीशु नै उन ताहीं साफ-साफ कह दिया, “लाजर मर लिया सै,

15 यो थारे ए हित म्ह सै, के मै उडै कोनी था, क्यूँके इब थम मेरे पै बिश्वास कर सकोगे, आओ, हम उसके धोरै चाल्लां।”

16 फेर थोमा नै जो दिदुमुस कुह्वावै सै, अपणे गेल्या के चेल्यां ताहीं कह्या, “आओ, हम भी प्रभु कै गेल्या मरण नै चाल्लां।”

████████████████████

17 बैतनिय्याह गाम पोहचे पाच्छै, यीशु नै न्यू बेरया पाट्या के लाजर नै कबर म्ह धरे चार दिन हो लिए सै।

18 बैतनिय्याह गाम यरुशलेम कै धोरै कोए दो कोसां की दूरी पै था,

19 घणखरे यहूदी माणस मार्था अर मरियम कै धोरै उसके भाई की मौत कै बाबत दीलास्सा देण नै आरे थे।

20 जिव मार्था नै यीशु कै आण की खबर सुणी, तो मार्था उसतै मिलण खात्तर गई, पर मरियम घरा ए बेट्टी रही।

21 मार्था नै यीशु ताहीं कह्या, “हे प्रभु, जै तू आडै होंदा, तो मेरा भाई कदे न्ही मरदा।

22 अर इब भी मन्नै बेरा सै, जो कुछ तू परमेसवर तै माँग्या, परमेसवर तन्नै देवैगा।”

23 यीशु नै उस ताहीं कह्या, “तेरा भाई जी ज्यागा।”

24 मार्था नै उस ताहीं कह्या, “मन्नै बेरा सै, के आखर के दिन म्ह पुनरुत्थान के बखत वो जी ज्यागा।”

\* 11:2 11:2 12:1-8 † 11:18 11:18 तीन किलो. मी.

25 यीशु ने मार्था तै कह्या, “पुनरुत्थान अर जीवन मै ए सू, जो कोए मेरै पै विश्वास करैगा, वो जै मर भी जावै फेर भी जिवैगा,

26 अर जो कोए जीवै सै, अर वो मेरै पै विश्वास करै सै, वो अनन्त काल ताहीं कोनी मरैगा। के तू इस बात पै विश्वास करै सै।”

27 मार्था ने यीशु तै कह्या, “हाँ, हे प्रभु, मै विश्वास करूँ सू, के परमेश्वर का बेटा मसीह जो दुनिया म्ह आण आळा था, वो तूए सै।”

???? ???? ?

28 न्यू कहकै मार्था चली गयी, अर अपनी बेब्बे मरियम ताहीं एकले म्ह बुलाकै चुपके तै कह्या, “गुरु याडैए सै अर तन्नै बुलावै सै।”

29 न्यू सुण तिए मरियम जिब्बे उठकै उसके धोरै आई।

30 यीशु इब्बे गाम तै बाहरे था, पर उस्से जगहां था जडै मार्था उसतै मिली थी।

31 फेर जो यहूदी माणस उसके गेल्या घर म्ह थे अर उस ताहीं दीलास्सा देवै थे, न्यू देखकै के मरियम जिब्बे उठकै बारणै चली गयी सै, न्यू समझे के वा कब्र पै रोण नै जावै सै, तो उसके पाच्छै हो लिये।

32 जिव मरियम उडै गई जडै यीशु था, तो उसनै देखदे उसके पायां म्ह पडकै कह्या, “हे प्रभु, जै तू आडै होन्दा फेर मेरा भाई कोनी मरदा।”

33 जिव यीशु नै जो यहूदी माणस उसके गेल्या आये थे, रोन्दे होए देख्या, तो आत्मा म्ह घणाए दुखी अर उदास होग्या,

34 अर कह्या, “थमनै उसकी लाश कित धर राक्खी सै?” उननै उस ताहीं कह्या, “हे प्रभु, चालकै देख ले।”

35 यीशु रोण लाग्या।

36 फेर यहूदी माणस कहण लागगे, “लखाओ, वो लाजर तै कितना प्यार करै था।”

37 पर उन म्ह तै कईयाँ नै कह्या, “के यो जिसनै आंध्याँ ताहीं रोशनी दे दी, के यो लाजर ताहीं मरण तै न्ही बचा सकै था?”

???? ? ? ? ? ? ? ? ? ? ? ? ? ? ? ?

38 यीशु मन म्हए फेर घणाए दुखी होकै कब्र पै आया। वा एक गुफा थी अर एक पत्थर उसपै धरया था।

39 यीशु नै कह्या, “पत्थर हटादो।” लाजर की बेब्बे मार्था उसतै कहण लागगी, “हे प्रभु, उस म्ह तै इब तो बदवू आवै सै, क्यूँके उसनै मरे चार दिन हो लिए सै।”

40 यीशु नै उन ताहीं कह्या, “के मन्नै तेरे तै कोनी कह्या था के जै तू विश्वास करैगी, तो परमेश्वर की महिमा नै देखैगी।”

41 फेर उननै पत्थर ताहीं हटाया। यीशु नै सुर्ग कान्ही निगांह ठाके कह्या, “हे पिता, मै तेरा धन्यवाद करूँ सू, के तन्नै मेरी सुण ली सै।

42 अर मन्नै बेरा था के तू सारी हाण मेरी सुणै सै, पर जो भीड़ असै-पासै खडी सै, उनकै बाबत मन्नै कह्या, ताके वे विश्वास करै, के तन्नै मेरैताहीं भेज्या सै।”

43 न्यू कहकै टाइडू आवाज म्ह रुक्का मारया, “हे लाजर, लिकड़ आ।”

44 जो मर लिया था उसके हाथ पैर पट्टियाँ तै बंधे हुए थे, अर उसके मुँह पै अंगोच्छा लिपटरया था। यीशु नै उन ताहीं कह्या, “उसनै खोलदो अर जाण द्यो।”

???? ? ? ? ? ? ? ? ? ? ? ? ? ? ? ?

(???? 26:1-5; ? 14:1-2; ? 22:1-2)

45 फेर जो यहूदी मरियम धोरै मिलण आरे थे, अर उसका यो चमत्कार देख्या था, उन म्ह तै घणखरयां नै उसपै विश्वास करया।

46 पर उन म्ह तै कईयाँ नै फरीसियाँ धोरै जाकै यीशु के काम्मां की खबर दी।

47 ज्यातै प्रधान याजकां अर फरीसियाँ नै यहूदी अगुवां की सभा करी, अर कह्या, “हमनै के करणा चाहिये? यो माणस तो घणे चमत्कार दिखावे सै।

48 जै हम उसनै न्यूए करण द्या, तो फेर सारे उसपै विश्वास करैगें, अर रोमी सैनिक आकै म्हारे देश अर मन्दर दोनुवां पै कब्जा कर लेवैगें।”

49 फेर उन म्ह तै काइफा नामका एक माणस नै जो उस साल का महायाजक था, उन ताहीं कह्या, “थम किमे न्ही जाणदे!

50 अर ना ए थमनै इस बात की समझ सै, के इस्से म्ह थारा फायदा सै, के बजाये इसके के सारे माणस ए नाश हो जावै, सब खात्तर एक आदमी नै मरणा होगा।”

51 पर या बात उसनै अपणी ओड़ तै कोन्या कही, पर उस साल का महायाजक होण के नाते या भविष्यवाणी करी, के यीशु उस जात खात्तर मरैगा।

52 अर ना सिर्फ यहूदी जात खात्तर बल्के ज्यातै के परमेसवर की खिंड-मिंड ऊलादां नै एक करदे।

53 इस तरियां उस्से दिन तै यहूदी अगुवें उस ताहीं मारण खात्तर साजिस रचाण लागे।

54 ज्यातै यीशु उस बखत तै यहूदी लोगगां म्ह घाट दिक्खण लागग्या, अर यरुशलेम नगर नै छोड़के वो जंगल-वियाबान कै धोरै इफ्राईम नामक एक नगर कान्ही चल्या गया, अर अपणे चेल्यां गैल उड़ैए रहण लाग्या।

55 यहूदियाँ का फसह का त्यौहार लोवै था, अर घणेए माणस फसह तै पैहल्या अपणे गाम्मां म्ह तै यरुशलेम नगर म्ह गए, के खुद नै पवित्र करै।

56 वे यीशु नै टोह्ल लागे अर मन्दर म्ह खड़े होकै आप्पस म्ह बतलाण लागे, “थम के सोचो सो? के वो त्यौहार म्ह कोनी आवैगा?”

57 अर प्रधान याजकां अर फरीसियाँ नै हुकम दे राख्या था, के जै कोए न्यू जाणै सै, के यीशु कित्त सै तो बतावै, ताके वे उसनै पकड़ ले।

## 12

*Matthew 26:6-13; Mark 14:3-9*

1 फेर यीशु फसह का त्यौहार तै छः दिन पैहल्या बैतनिय्याह गाम म्ह आया जित्त लाजर था, जिस ताहीं यीशु नै मरया होड़ म्ह तै जिन्दा करया था।

2 उड़ै उननै यीशु कै खात्तर भोज तैयार करया, अर मार्था सेवा करण लागरी थी, अर लाजर भी उन म्ह तै एक था जो उसके गेल्या खाणा खाण बेट्टे थे।

3 फेर मरियम नै जटामांसी फूल का आध्था सेर घणा महंगा खसबूदार तेल लैके यीशु के पायां पै गेरया, अर अपणे बाळां तै उसके पैर पुन्झे, अर खसबूदार तेल की खस्बू तै घर खसबूदार होग्या।

4 पर उसके चेल्यां म्ह तै यहूदा इस्करियोती नामका एक चेल्ला जो उस ताहीं पकड़वाणा चाहवै था, कहण लाग्या,

5 “यो महंगा खसबूदार तेल तीन सौ दीनार (तीन सौ दिन की मजदूरी) म्ह बेचके कंगालां ताहीं क्यातै कोनी दिया गया?”

6 उसनै या बात ज्यातै कोनी कही के उसने कंगालां की फिक्र थी बल्के ज्यातै के वो चोर था, अर उसके धोरै पिस्या की थैल्ली रह्या करै थी अर उस म्ह जो कुछ गेरया जान्दा, वो काढ लेवै था।

7 यीशु नै कह्या, “उस ताहीं यो करण द्यो, यो मेरे गाडडे जाण की तैयारी कै खात्तर सै।

8 क्यूंके कंगाल तो थारे गेल्या सारी हाण रहवैगे, पर मै थारे गेल्या सारी हाण कोनी रहूंगा।”

*Matthew 26:6-13; Mark 14:3-9*



9 फसह का त्यौहार म्ह आई यहूदियाँ की एक बड़ीए भीड़ नै जिब बेरा लागग्या के वो बैतनिय्याह गाम म्ह सै, तो वे ना सिर्फ यीशु के बाबत आये पर ज्यातै भी के लाजर नै देवखै, जिस ताहीं यीशु मसीह नै मरया होइ म्ह तै जिन्दा करया था।

10 फेर प्रधान याजकां नै लाजर ताहीं भी मारण की सलाह करी।

11 क्यूँके उसके बाबत घणखरे यहूदी चले गये अर यीशु पै बिश्वास करया।

~~~~~

(~~~~~ 21:1-11; ~~~~ 11:1-11; ~~~~~ 19:28-40)

12 दुसरे दिन घणखरे माणसां नै जो फसह के त्यौहार म्ह आरे थे न्यू सुण्या, के यीशु यरुशलेम नगर म्ह आरया सै।

13 ज्यातै उननै खजूर की डाळी ली, अर उसतै फेट्टण नै लिकड़े, अर रुके मारण लागगे, "होशाना! (मतलब जै-जै कार हो) धन्य इस्राएल का राजा, जो प्रभु के नाम तै आवै सै।"

14 जिब यीशु यरुशलेम नगर के धोरे आया, तो उसनै एक गधे का बच्चा मिल्या, फेर वो उसपै बैठग्या,

15 जिसा पवित्र शास्त्र म्ह लिख्या सै,

"हे सियोन की बेटटी, मतना डरे, लखा, तेरा राजा गधी के बच्चे पै चढ़ा होइ चाल्या आवै सै।"

16 यीशु के चेल्ले ये बात पैहल्या कोनी समझे थे, पर जिब यीशु की महिमा दिक्खी फेर उनकै याद आया के ये बात उसके बाबत लिक्खी होइ थी, अर माणसां नै उसके गेल्या न्यूए बरताव करया था।

17 फेर उसकै गैल जो भीड़ थी उननै या गवाही दी, जो उस बखत उसकै गेल्या थे, जिब उसनै लाजर ताहीं कबर म्ह तै बुलाकै मरया होया म्ह तै जिन्दा करया था।

18 ज्यातै माणस यीशु तै फेट्टण नै आरे थे क्यूँके उननै सुण्या था के उसनै यो अचम्भे का काम करया था।

19 फेर फरीसियां नै आप्स म्ह कह्या, "सोचकै तो देखो, के थारे तै कुछ भी कोनी बणदा। लखाओ, दुनिया उसकै गैल हो ली सै।"

~~~~~

20 जो माणस उस फसह के त्यौहार म्ह भगति करण नै आये थे उन म्ह तै कुछ यूनानी थे।

21 उननै गलील परदेस के बैतसैदा नगर के वासिन्दे फिलिप्पुस के धोरे आके उसतै बिनती करी, "श्रीमान, हम यीशु तै फेटणा चाहवां सां।"

22 फिलिप्पुस नै आके अन्दरयास तै कह्या, फेर अन्दरयास अर फिलिप्पुस नै जाकै यीशु ताहीं कह्या।

23 इसपै यीशु नै उन ताहीं कह्या, "वो बखत आ गया सै के मुझ माणस के बेट्टै की महिमा हो।

24 मै थारे तै साच्ची-साच कहूँ सूँ, के जिब ताहीं गेहूँ का दाणा धरती म्ह पड़कै मर न्ही जान्दा, वो एक्ला रहवै सै, पर जिब मर जावै सै, तो वो अनगणित दाण्या नै जन्म देवै सै।

25 जो अपणे जीवन नै प्यारा जाणै सै, वो उसनै खो देवै सै, अर जो इस दुनिया म्ह अपणे जीवन नै प्यारा कोनी जाण्दा, वो अनन्त जीवन के खात्तर उसकी रुखाळी करैगा।

26 जै कोए मेरी सेवा करै, तो वो मेरा चेल्ला बण जावै, अर जिब जइ मै सूँ, उइ मेरा सेवक भी होवैगा। जै कोए मेरी सेवा करै, तो पिता उसका आदर करैगा।

~~~~~

27 "इब मेरा जी भोत दुखी सै। ज्यातै इब मै के कहूँ? हे पिता, मन्नै इस दुख की घड़ी तै बचा?" पर मै इस्से खात्तर इस दुनिया म्ह आया सूँ, ताके मै दुख सहू।

28 हे पिता अपणे नाम की महिमा कर।" फेर या अकास वाणी होई, "मन्नै इसकी महिमा करी सै, अर फेर भी करैगा।"

29 फेर जो माणस खड़े होए सुणरे थे, उननै कह्या के बाइळ गरजा। दुसरयां नै कह्या, "कोए सुगंदूत उसतै बोल्या।"

30 इसपै यीशु नै कह्या, “या आवाज मेरै खात्तर न्ही, पर थारे खात्तर आई सै।

31 इब इस दुनिया का न्याय होवै सै, इब इस दुनिया का अधिकारी कादचा जावैगा।

32 अर मै जै धरती पै तै ऊँच्चे पै चढ़ाया जाऊँगा, तो सारया नै अपणे कान्ही खिचुगाँ।”

33 न्यू कहकै उसनै यो बता दिया के वो किस ढाळ की मौत तै मरैगा।

34 इसपै माणसां नै यीशु ताहीं कह्या, “हमनै मूसा नबी के नियम-कायदा की या बात सुणी सै के मसीह सदा जिन्दा रहवैगा, फेर तू क्यातै कहवै सै के माणस का बेट्टा ऊँच्चे पै चढ़ाया जाना जरूरी सै? यो माणस का बेट्टा कौण सै?”

35 यीशु नै उन ताहीं कह्या, “चाँदणा (यीशु नै अपणे-आप तै कह्या सै) इब थोड़ी देर ताहीं थारे बिचाळे सै। जिव ताहीं चाँदणा थारे गेल्या सै जद ताहीं चाल्दे रहो, इसा ना हो के अँधेरा थारे ताहीं घेर लेवै, जो अँधेरे म्ह चाल्लै सै वो कोनी जाण्डा के कड़े जावै सै।

36 जिव ताहीं चाँदणा थारे गेल्या सै, चाँदणे पै बिश्वास राक्खो ताके थम चाँदणे की ऊलाद बणो।” ये बात कहके यीशु चल्या गया अर उनतै दूर रह्या।

~~~~~

37 यीशु मसीह नै उनके स्याम्ही इतने चमत्कार दिखाए, फेर भी उननै उसपै बिश्वास कोनी करया,

38 ताके यशायाह नबी का वचन पूरा हो जो उसनै कह्या “हे प्रभु, म्हारै संदेश का किसनै बिश्वास करया सै? अर प्रभु की शक्ति किसपै जाहिर होई सै?”

39 इस बाबत वे बिश्वास कोनी कर सके, क्यूँके यशायाह नै न्यू भी कह्या सै:

40 “उसनै उनकी आँख आँधी, अर उनके मन कटोर कर दिए सै, कदे इसा ना हो के वे आँखां तै देक्खै, अर मन तै समझै, अर पलटै, अर मै उननै ठीक करूँ।”

41 यशायाह नै ये बात ज्यातै कही, के उसनै यीशु मसीह की महिमा देक्खी, अर उसनै उसके बारे म्ह बताया।

42 फेरभी यहूदी सरदारों म्ह तै घणाए नै उसपै बिश्वास करया, पर फरीसियाँ के कारण खुलके कोनी मान्नै थे, क्यूँके उननै डर था कदे वे आराधनालय म्ह तै लिकाड़े ना जावै

43 क्यूँके माणसां की ओड़ तै करी जाण आळी बड़ाई उननै परमेसवर की ओड़ तै बड़ाई की बराबरी म्ह घणी प्यारी लागै थी।

~~~~~

44 यीशु नै रुक्का मारके कह्या, “जो मेरै पै बिश्वास करै सै, वो मेरै पै न्ही बल्के मेरै खन्दानआळे पै बिश्वास करै सै।

45 अर जो मन्नै देक्खै सै, वो मेरै खन्दानआळे नै देक्खै सै।

46 मै दुनिया म्ह चाँदणा बणके आया सूं, ताके जो कोए मेरै पै बिश्वास करै वो अँधेरे म्ह कोनी रहवै।”

47 “जै कोए मेरै वचन सुणकै भी उननै न्ही मानता, तोभी मै उसनै कसूरवार कोनी ठहरान्दा, क्यूँके मै दुनिया के माणसां ताहीं कसूरवार ठहराण खात्तर कोनी, पर दुनिया के माणसां का उद्धार करण खात्तर आया सूं।

48 जो कोए मन्नै नकारै सै, अर मेरै सुसमाचार नै कोनी अपणावै, उस ताहीं कसूरवार ठहराण आळा तो एके सै, यानिके जो वचन मन्नै कह्या सै, वोए पाच्छले दिन म्ह उस ताहीं कसूरवार ठहरावैगा।

49 क्यूँके मै अपणी ओर तै बात न्ही कहन्दा, पर पिता जिसनै मेरै ताहीं भेज्या सै, उसनै मेरै ताहीं हुकम दिया सै के, के मै कहूँ अर किस तरियां बोल्तूँ?

50 अर मन्नै बेरा सै के उसका हुकम अनन्त जीवन देवै सै। ज्यातै मै जो कुछ कहूँ सूं, ठीक उसाए कहूँ सूं, जिसा पिता नै मेरै ताहीं कहण का हुकम दिया सै।”

1 फसह के त्यौहार तै पैहल्या, जिब यीशु नै बेरा लागग्या, के मेरा वो बखत आ लिया सै, के दुनिया छोड़के पिता के धोरै उल्टा जाऊँ, तो अपने मानण आळा तै, जो दुनिया म्ह थे, जिसा प्यार वो करया करदा, आखर ताहीं उसाए प्यार करदा रह्या।

2 यीशु अर उसके चेल्लें साँझ नै खाणा खाण लागरे थे। शमौन के बेटटे यहूदा इस्करियोती के मन म्ह शैतान नै यो विचार घाल दिया था, के वो यीशु के गेल्या धोकसा करै।

3 यीशु यो जाणै था, के पिता नै सब कुछ उसके हाथ म्ह सौप दिया सै, अर यो भी के वो परमेसवर की ओड़ तै आया सै, परमेसवर के धोरै ए उल्टा जाण लागरया सै।

4 इस खात्तर वो खाणा छोड़के खड्या होग्या, उसनै अपने उप्परले लत्ते उतार दिये, अंगोच्छा लेके अपनी कमर म्ह बाँध लिया।

5 फेर बास्सन म्ह पाणी भरके चेल्यां के पैर धोये, अर जो अंगोच्छा कमर पै बाँध राख्या था, उससे तै पूँझण लागग्या।

6 जिब वो शमौन पतरस के धोरै आया, फेर पतरस नै उस ताहीं कह्या, “हे प्रभु, के तू मेरे पैर धोवैगा?”

7 यीशु नै उस ताहीं जवाब दिया, “जो मै करूँ सूँ, तू उसका मतलब इब्बे न्ही समझ पावैगा, पर इसके बाद समझैगा।”

8 पतरस नै उस ताहीं कह्या, “मै अपने पैर तेरे ताहीं कदे न्ही धोण दियुँगा।” न्यू सुणके यीशु नै उस ताहीं कह्या, “जै मै तेरे पैर ना धोऊँ, तो तू मेरा चेल्ला न्ही कुह्लावैगा।”

9 शमौन पतरस नै उस ताहीं कह्या, “हे प्रभु, फेर मेरे पैर ए न्ही बल्के मेरे हाथ अर सिर भी धोदे।”

10 यीशु नै उस ताहीं कह्या, “जो माणस न्हा लिया हो उस ताहीं पैर के सिवाय और कुछ धोण की जरूरत कोनी, पर वो पूरी तरियां साफ हो चुका सै, थम सारे साफ सो, पर एक नै छोड़ के।”

11 यीशु तो अपने पकड़वाण आळे नै जाणै था, ज्याँतै उसनै कह्या, “थम सारे साफ सो, पर एक नै छोड़ के।”

12 जिब यीशु नै पैर धो लिये, अर अपने लत्ते दुबारा पहरके फेर बैठग्या, तो उन ताहीं कहण लागग्या, “के थम समझे के मन्नै थारे गेल्या के करया?”

13 थम मन्नै गुरु अर प्रभु कहो सो, अर सही कहो सो, क्यूँके मै वोए सूँ।

14 जिब मन्नै गुरु अर प्रभु होके थारे पैर धोए, तो थमनै भी मेरी तरियां एक-दुसरे के पैर धोणे चाहिये।

15 क्यूँके मन्नै थारे ताहीं नमूना दिखाया सै, के जिसा मन्नै थारे गेल्या करया सै, थम भी उसाए करया करो।

16 मै थारे तै साच्ची-साच कहूँ सूँ, नौक्कर अपने माल्लिक तै बड़ड़ा कोनी, अर ना प्रेरित अपने भेजण आळे तै।

17 इब थम ये बात जाणगे सों, जै उनपै चाल्लों तो थम सुखी रहोगे।

18 मै थम सारया के बारे म्ह कोनी कहन्दा, मै उनने जाणु सूँ, जिनताहीं मन्नै छाँट लिया सै, (अर यो भी के यहूदा विश्वासघाती सै) क्यूँके मन्नै उस ताहीं इस खात्तर छाट्या सै, ताके पवित्र ग्रन्थ का यो वचन पूरा हो, “जो मेरी रोट्टी खावे सै, उसनै मेरे पै लात टाई।”

19 “ये सब कुछ मन्नै थारे ताहीं पैहले ए बता दिया था, के जब न्यू हो जावै तो थम विश्वास करियो के मै वोए सूँ।

20 मै थारे ताहीं साच्ची-साच कहूँ सूँ, के जो मेरे भेज्जै होया नै अपनावै सै, वो मन्नै अपनावै सै, अर जो मन्नै अपनावै सै, वो मेरे भेजण आळे नै अपनावै सै।”

21 ये बात कहकै यीशु आत्मा म्ह दुखी होया अर या गवाही दी, "मै थारे ताहीं साच्ची-साच कहूँ सूँ, के थारे म्ह तै एक मन्नै धोकखा देकै पकड़वावैगा ।"

22 चेल्लें यो शक करते होए के वो किसकै बाबत कहवै सै, एक-दुसरे के कान्ही लखाण लागगे ।

23 उसके चेल्यां म्ह तै यूहन्ना जिस ताहीं यीशु प्यार राखै था, यीशु के धोरै बेटघा था ।

24 शमौन पतरस नै यूहन्ना कान्ही इशारा करकै उस ताहीं बुझ्झया, "बता तो, वो किसकै बाबत कहवै सै?"

25 फेर उसनै उस्से ढाळ यीशु की छात्ती के कान्ही झुककै उस ताहीं बुझ्झया, "हे प्रभु, वो कौण सै?"

26 यीशु नै जवाब दिया, "जिस ताहीं मै यो रोट्टी का टुकड़ा डुबोकै द्युगां वोए सै ।" अर उसनै टुकड़ा डुबोकै शमौन के बेटटे यहूदा इस्करियोती ताहीं दिया ।

27 टुकड़ा खान्दे शैतान यहूदा इस्करियोती म्ह बड़ग्या । फेर यीशु नै उस ताहीं कह्या, "जो तू करै सै, तोळा कर ।"

28 भोज पै बैठण आळे चेल्यां म्ह तै किसे नै भी यो कोनी बेरा लाग्गण पाया के उसनै या बात उसतै किस मतलब तै कही ।

29 कईयाँ नै सोच्या के रपियाँ की थैल्ली यहूदा के धोरै रहवै सै, ज्यांतै यीशु उस ताहीं कहवै सै के त्यौहार के खात्तर जरूरी समान मोल ले आओ या गरीबां नै कुछ देवै, इस खात्तर यहूदा नै रोट्टी का टुकड़ा लिया ।

30 आखर म्ह वो टुकड़ा खाकै जिब्बे बाहरणै लिकड़ग्या, अर रात का बखत था ।

☞ ☞ ☞ ☞ ☞

31 जिव यहूदा बाहरणै लिकड़ग्या तो यीशु नै कह्या, "इब मुझ माणस के बेटटे की महिमा होई सै, अर परमेसवर की महिमा मेरे म्ह होई सै,

32 परमेसवर भी अपणे बेटटे की महिमा करैगा, अर वो जिब्बे करैगा ।"

33 हे बाळकों, मै थोड़ी सी वार और थारे धोरै सूँ, फेर थम मन्नै टोहओगे, अर जिसा मन्नै यहूदियाँ ताहीं कह्या, "जड़ै मै जाऊँ सूँ, उड़ै थम कोनी आ सकदे, न्यू इब मै थारे ताहीं भी कहूँ सूँ ।"

34 "मै थमने नया हुकम द्यु सूँ, के एक-दुसरे तै प्यार करो, जिसा मन्नै थारैतै प्यार करया सै, उस्से तरियां थम भी एक-दुसरे तै प्यार करो ।

35 जै आपस म्ह प्यार राखोगे, तो इसतै सारया नै बेरा पाट्टैगा के थम मेरे चेल्लें सो ।"

☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞

(☞☞☞☞ 26:31-35; ☞☞ 14:27-31; ☞☞☞☞ 22:31-34)

36 शमौन पतरस नै उस ताहीं कह्या, "हे प्रभु, तू कित्त जा सै?" यीशु नै जवाब दिया, "जड़ै मै जाऊँ सूँ, उड़ै तू इब्बे मेरै पाच्छै न्ही आ सकदा, पर इसकै बाद मेरै गेल्या आवैगा ।"

37 पतरस नै उसतै कह्या, "हे प्रभु, इब्बे मै तेरे पाच्छै क्यातै न्ही आ सकदा? मै तो तेरी खात्तर अपणी जान भी देण नै तैयार सूँ ।"

38 यीशु नै जवाब दिया, "के तू मेरी खात्तर अपणी जान दे देवैगा? मै तेरे तै सच कहूँ सूँ, के मुगें के बाँग देण तै पैहल्या तू तीन बार मेरे बारें म्ह मुकरैगा ।

14

☞☞☞☞☞☞ ☞ ☞ ☞☞☞☞☞☞ ☞ ☞ ☞☞☞☞☞☞

1 "अपणे मन नै दुखी ना होण द्यो, थम परमेसवर पै बिश्वास राखो सो, अर मेरै पै भी बिश्वास राखो ।

2 मेरै पिता के घर म्ह घणीए रहण की जगहां सै, जै न्ही होंदी तो मै थारे ताहीं कह देदा, क्यूँके मै थारे खात्तर जगहां त्यार करण नै जाऊँ सूँ ।

3 अर जै मै जाकै थारे खात्तर जगहां त्यार करूँ, तो फेर दुबारे आकै थमनै अपने उरै ले जाऊँगा के जड़ै मै रहूँ उड़ै थम भी रहो।

4 अर जित्त म्ह जाऊँ सूँ, थम ओड़ै की राह जाणो सों।”

5 थोमा नै उसतै सवाल करया, “हे प्रभु, हमनै तेरे ठिकाणै का ए कोनी बेरा तो उसका राह किस तरियां जाण सका सां?”

6 यीशु नै उस ताहीं जवाब दिया, “मै ए वो राह अर सच अर अनन्त जीवन सूँ, बिना मेरै जरिये कोए पिता धोरै कोनी पोहच सकदा।

7 जै थम सच म्ह ए मन्नै जाणदे होन्दे, तो मेरै पिता नै भी जाणदे, इसकै बाद थमनै उस ताहीं जाण लिया सै, अर उस ताहीं देख भी लिया सै।”

8 फिलिप्पुस नै उस ताहीं कह्या, “हे प्रभु, तू म्हारै ताहीं पिता के दर्शन ए करा दे, वोए म्हारै खात्तर भतेरा होगा।”

9 यीशु नै उस ताहीं कह्या, “हे फिलिप्पुस, मै इतने दिन तै थारे गेल्या सूँ, के तू मन्नै कोनी जाणदा? जिसनै मेरै ताहीं देख्या सै उसनै पिता ताहीं देख्या सै। फेर क्यातै कहवै सै के पिता नै म्हारै ताहीं दिखा?”

10 के तन्नै विश्वास कोनी के मै पिता म्ह सूँ, अर पिता मेरै म्ह सै? ये वचन जो मै थारे ताहीं बताऊँ सूँ, अपनी ओड़ तै कोनी बतान्दा, पर मेरे भित्तर बसा पिता ए सै, जो मेरे म्ह होके अपने काम पूरा करण लागरया सै।

11 मेरा-ए विश्वास करो के मै पिता म्ह सूँ, अर पिता मेरै म्ह सै, ना तो काम्मां के कारण मेरा विश्वास करो।

12 मै थारैतै साच्ची-साच कहूँ सूँ, के जो मेरै पै विश्वास राखवै सै, ये काम जो मै करूँ सूँ, वो भी करैगा, बल्के इनतै भी बड़े-बड़े काम करैगा, क्यूँके मै इब पिता के धोरै जाऊँ सूँ।

13 मेरै नाम तै थम जो कुछ माँगोगे, वोए मै करूँगा, जिसतै बेट्टे के जरिये पिता की महिमा हो।

14 जै थम मेरै तै मेरै नाम तै कुछ माँगोगे, तो मै उस ताहीं पूरा करूँगा।

?????? ???? ? ? ?????????

15 “जै थम मेरे तै प्यार करो सो, तो मेरे हुकमां नै मान्नेगे।

16 मै पिता तै बिनती करूँगा, अर वो थारे ताहीं एक और मददगार देवैगा के वो सारीहाण थारे गेल्या रहवै।

17 यानिके सच का आत्मा, जिस ताहीं दुनिया कोनी अपना सकदी, क्यूँके वो ना उसनै देखवै सै, अर ना उस ताहीं जाणै सै, थम उसनै जाणो सो, क्यूँके आज वो थारे गेल्या सै, अर आण आळे बखत म्ह भी वो थारे म्ह बणा रहवैगा।”

18 “मै थारे ताहीं अनाथ कोनी छोड़ूँगा, मै थारे धोरै बोहड़ के आऊँगा।

19 थोड़ा ए बखत बाकी सै, जिव दुनिया मेरै ताहीं कोनी देखवैगी, पर थम मन्नै देखवोगे, ज्यांतै के मै जिन्दा सूँ, थम भी जिन्दा रहोगे।

20 जिव मै बोहड़ के आऊँगा, उस दिन थमनै बेरा लागवैगा, के मै अपने पिता म्ह सूँ, अर थम मेरै म्ह, मै थारे म्ह।

21 वो, जो मेरे हुकम नै मान्ने सै अर उननै निभावै सै, वोए मेरतै प्यार करै सै, अर जो मेरतै प्यार करै सै, वोए मेरे पिता का पिरयजन होगा, मै उसतै प्यार करूँगा, अर अपने-आप ताहीं उसपै जाहिर करूँगा।”

22 उस यहूदा नै (जो इस्करियोती कोनी था) यीशु ताहीं कह्या, “हे प्रभु, इसा के होया के तू अपने-आप ताहीं म्हारै पै जाहिर करणा चाहवै सै, अर दुनिया के माणसां पै न्ही?”

23 यीशु नै उस ताहीं जवाब दिया, “जै कोए मेरै तै प्यार करै सै, तो वो मेरी शिक्षा का पालन करैगा, वो मेरे पिता का पिरयजन बणैगा, अर हम उसकै धोरै आके उसकै गेल्या वास करागें।”

24 वो, जो मेरतै प्यार कोनी करदा, वो मेरै वचन नै कोनी मानता, अर जो वचन थम सुणो सो वो मेरे कोनी बल्के पिता के सै, जो मेरा भेजण आळा सै।

25 “ये बात मननै थारे गेल्या रहंदे होए थारैतै कही।

26 पर मददगार यानिके पवित्तर आत्मा जिस ताहीं पिता मेरै नाम तै भेज्जैगा, वो थारे ताहीं इन सारी बातों की शिक्षा देवैगा, अर जो कुछ मननै थारे तै कह्या सै, वो सारा कुछ थारे ताहीं याद दुआवैगा।”

27 मै थारे ताहीं शान्ति देकै जाऊँ सूँ, अपनी शान्ति थारे ताहीं दियुँ सूँ, जिसी दुनिया थारे ताहीं शान्ति देवे सै, मै थमनै उसी शान्ति कोनी देदा अपने मन नै दुखी ना होण द्यो अर ना डरियो।

28 थमनै सुण्या के मननै थारे ताहीं के कह्या, “मै जाऊँ सूँ, अर थारे धारै फेर आऊँगा।” जै थम मेरै तै प्यार करदे, तो यो जाणके राज्जी होन्दे, के मै पिता के धारै जाऊँ सूँ, जो मेरै तै घणा महान् सै।

29 यो सब होण तै पैहल्या मननै थारे ताहीं इसके बारे म्ह बता दिया सै, के जिव यो हो जावै, तो थम विश्वास करो।

30 मै इब थारे तै घणा कुछ न्ही कहूँगा, क्यूँके इस दुनिया का शासक (शैतान) आवै सै। मेरै पै उसका कोए हक कोनी,

31 दुनिया यो समझ ले के मै पिता तै प्यार करूँ सूँ, योए कारण सै के मै उसके सारे हुकमों का पालन करूँ सूँ। उठो, हम याडै तै चाल्लां।

15



1 यीशु ने कह्या, “मै सच्ची अंगूर की बेल की तरियां सूँ, अर मेरा पिता किसान की तरियां सै।

2 मेरे मै लागी हरेक डाळी जो फळ न्ही देन्दी, उस ताहीं वो काट देवै सै, पर हरेक एक फळ देण आळी डाळी ताहीं छांगै सै ताके वा और घणा फळ ल्यावै।

3 थम तो उस वचन के कारण जो मननै थारेताहीं कह्या सै, शुद्ध होगे सो।

4 थम मेरै म्ह बणे रहो, अर मै थारे म्ह, जिस तरियां डाळी जै अंगूर की बेल म्ह बणी न्ही रहवै तो खुद तै कोनी फळ सकदी, उससे तरियां थम भी जै मेरै म्ह बणे न्ही रहो तो कोनी फळ सकदे।”

5 मै अंगूर की बेल की ढाळ सूँ अर थम डाळी सो। जो मेरै म्ह बण्या रहवै सै अर मै उस म्ह, वो घणाए फळ फळै सै, क्यूँके मेरै तै न्यारे पाटकै थम कुछ न्ही कर सकदे।

6 जै कोए मेरै म्ह न्ही बण्या रहदा, तो वो डाळी की तरियां बगा दिया जावैगा, अर सूख जावै सै, अर माणस उन ताहीं कटटे करके आग म्ह झोक देवै सै, अर वे बळ जावै सै।

7 जै थम मेरै म्ह बणे रहो अर मेरे वचन थारे म्ह बणे रहवै, तो थारे माँगण पै थारी इच्छा पूरी करी जावैगी।

8 थारे फळ की भरपूरी म्ह मेरै पिता की महिमा अर धारा मेरे चेल्लें होण का सबूत सै।

9 जिसा पिता नै मेरै तै प्यार करया, उसाए मननै थारैतै प्यार करया, मेरै प्यार म्ह बणे रहो।

10 जै थम मेरे हुकमों नै मान्गो, तो मेरै प्यार म्ह बणे रहोगे, जिस ढाळ के मननै अपने पिता का हुकम मान्या सै, अर उसके प्यार म्ह बणा रहूँ सूँ।

11 मननै ये बात थारे तै ज्यांतै कही, के जो आनन्द मेरे म्ह सै, वो थारे म्ह भी हो अर बढ़ता जावै।

12 “मै थमनै नया हुकम द्युँ सूँ, के एक-दुसरे तै प्यार करियो, जिसा मननै थारैतै प्यार करया सै, उसाए थम भी एक-दुसरे तै प्यार करियो।

13 इसतै बड्डा प्यार किसे का कोनी के कोए अपने दोस्तों के खात्तर अपनी जान दे।

14 जो हुकम मै थारे ताहीं दियुँ सूँ, जै थम उसपै चाल्लों सों तो थम मेरे साथी सो।”

15 मननै थारे ताहीं नौकर न्ही, पर साथी मान्या सै, क्यूँके नौकर मालिक के काम्मों तै अनजाण रहवै सै, मननै थारे ताहीं वे सारी बात बता दी सै, जो मननै पिता तै मिली सै।

16 थमनै मेरै ताहीं कोनी चुण्या पर मन्नै थारे ताहीं चुण्या सै अर थारैताहीं काम पै लाया सै, के थम जाके फळ ल्याओ अर थारा फळ बणा रहवै, के थम मेरै नाम तै जो कुछ पिता तै माँगो, वो थारे ताहीं दे दे।

17 मेरा हुकम यो सै के थम एक-दुसरे तै प्यार करो।

~~~~~

18 “जै दुनिया के माणस थारैतै बैर राक्खै सै, तो जाण ल्यो के उसनै थारैतै पैहल्या मेरै तै बैर राख्या सै।

19 जै थम दुनिया के माणसां जिसे होन्दे, तो दुनिया थारे तै आपण्यां जिसा प्यार करदी, पर थम दुनिया के कोनी, बल्के मन्नै थारैताहीं दुनिया म्ह तै छाँट लिया सै, इस करके दुनिया के माणस थारे तै बैर राक्खै सै।

20 याद राक्खाँ मन्नै थारे तै के कह्या था, ‘नौक्कर अपणे माल्लिक तै बड़्हा कोनी होंदा,’ जिव उननै मेरै सताया, तो थारैताहीं भी सतावेंगे। जै उननै मेरी शिक्षा मानी, तो थारी भी माँनैंगे।

21 पर यो सब कुछ माणस मेरै नाम कै कारण थारे गेल्या करैंगे, क्यूँके माणस मेरै भेजण आळे नै कोनी जाणदे।

22 जै मै न्ही आन्दा, अर उनतै बात न्ही करदा, फेर वे पापी कोनी ठहरदे, पर इब उननै उनकै पाप खात्तर कोए बहान्ना कोनी।

23 जो मेरै तै बैर राक्खै सै, वो मेरै पिता तै भी बैर राक्खै सै।

24 जै मै उनके बीच म्ह वे काम न्ही करदा, जो और किस नै कोनी करे, तो वे पापी कोनी ठहरदे, पर इब तो जो कुछ मन्नै करया सै उननै मेरै ताहीं देख लिया सै, उननै मेरै ताहीं अर मेरे पिता दोनुआ तै बैर करया।

25 पर यो इस करके होया के जो उनके नियम-कायदा म्ह लिख्या सै वो सच हो सकै, उननै मेरै तै खामखाँ बैर करया।”

26 पर जिव वो मददगार (सच का आत्मा जो पिता की ओड़ तै आवै सै) धारे आवैगा, जिसनै मै धारे धारे पिता की ओड़ तै भेज्जूंगा, तो वो मेरी गवाही देवैगा,

27 अर थम भी मेरे गवाह सो, क्यूँके थम शरु तै मेरै गेल्या रहे सो।

## 16

1 “ये बात मन्नै थारैतै ज्यांतै बताई सै के थारा विश्वास डगमगा न्ही जावै।”

2 वे थमनै आराधनालयाँ म्ह तै काढ देवैंगे, बल्के वो बखत आवै सै, के जो कोए थमनै मार देवैगा, वो न्यु समझैगा के मै परमेसवर की सेवा करूँ सूँ।

3 इसा वे ज्यांतै करैंगे के उननै ना पिता ताहीं जाणया सै, अर ना मन्नै जाणै सै।

4 पर ये बात मन्नै ज्यांतै थारैतै कही, के जिव इनका बखत आवै तो थमनै याद रहवै के मन्नै थारैतै पैहल्याए उसकै बारे म्ह बता दिया था। “मन्नै शरु म्ह थारैतै ये बात ज्यांतै कोनी कही क्यूँके मै थारे गेल्या था।”

~~~~~

5 पर इब मै अपण भेजण आळे के धारे जाऊँ सूँ, अर थारे म्ह तै कोए मेरै तै कोनी बुझता, “तू कित्त जावै सै?”

6 पर मन्नै जो ये बात थारैतै कही सै, ज्यांतै थारा मन दुख तै भरगया सै।

7 फेरभी मै थारैतै साच्ची कहुँ सूँ, के मेरा जाणा थारे खात्तर ठीक सै, क्यूँके जै मै ना जाऊँ तो वो मददगार थारे धारे कोनी आवैगा, पर जै मै जाऊँगा, तो उस ताहीं थारे धारे भेज्जूंगा।

8 वो आके दुनिया के माणसां ताहीं पाप अर धार्मिकता अर न्याय के बाबत बतावैगा।

9 पाप के बारे म्ह ज्यांतै के वे मेरै पै विश्वास कोनी करदे।

10 अर धार्मिकता के बारे म्ह ज्यांतै के मै पिता के धारे जाऊँ सूँ, अर थम मन्नै दुबारै कोनी देखोगे,

11 न्याय के बारे म्ह ज्यांतै के दुनिया का शासक कसूरवार ठहराया जा चुक्या सै।

12 मन्नै थारे तै और भी घणीए बात कहणी सै, पर इब्बे थम उननै सह न्ही सकदे।

13 पर जब वो यानिके सच का आत्मा आवैगा, तो थम सारया नै सच का रास्ता बतावैगा, क्यूँके वो अपणी ओड़ तै कोनी कहवैगा पर जो कुछ सुणैगा वोए कहवैगा, अर होण आळी बात थारे ताहीं बतावैगा।

14 वो मेरी महिमा करैगा, क्यूँके उस ताहीं मेरी ओड़ तै जो मिला सै, वो थारे ताहीं मेरी बाततां म्ह तै लेकै बतावैगा।

15 वो सब कुछ, जो पिता का सै, वो सारा मेरा सै, ज्यांतै मन्नै कह्या के वो मेरी बाततां म्ह तै लेकै थारे ताहीं बतावैगा।

~~XXXXXXXXXXXXXXXXXXXX~~

16 “थोड़ी देर म्ह थम मन्नै कोनी देक्खोगे, अर फेर थोड़ी देर म्ह मन्नै दुबारा देक्खोगे।”

17 फेर उसके कुछ चेल्यां नै आप्स म्ह कह्या, “उसका इस बात तै के मतलब सै जो वो म्हारै ताहीं कहवै सै, थोड़ी देर म्ह थम मन्नै कोनी देक्खोगे, अर फेर थोड़ी देर म्ह मन्नै दुबारा देक्खोगे? अर यो ‘ज्यांतै के मै पिता के धारै जाऊँ सूँ?’ ”

18 फेर उननै कह्या, “यो ‘थोड़ी देर’ जो वो कहवै सै, या के बात सै? हम कोनी जानदे के वो के कहवै सै।”

19 यीशु नै न्यू जाणके के वे मेरते बुझणा चाहवै सै, उन ताहीं कह्या, “के थम आप्स म्ह मेरी इस बात बाबत जाँच-पड़ताळ करो सो, थोड़ी देर म्ह थम मन्नै कोनी देक्खोगे, अर फेर थोड़ी देर म्ह मन्नै दुबारा देक्खोगे?”

20 मै थारे तै साच्ची-साच कहूँ सूँ, के जब मै मरूँगा तो थम रोओगे अर बिलाप करोगे, पर दुनिया राज्जी होवैगी। थमने दुख होगा, पर थारा दुख आनन्द म्ह बदल जावैगा।

21 जाप्पे के बखत बिरबान्नी नै दुख होवै सै, क्यूँके उसके दुख का बखत आरया सै, पर जब वा बाळक नै जन्म दे सै, तो इस खुशी तै, के दुनिया म्ह एक माणस पैदा होया, उस दुख नै फेर याद कोनी कर दी।

22 उस्से तरियां थारे म्ह भी इब तो दुख सै, पर मै थारे तै दुबारा मिलूँगा अर थारे मन आनन्द तै भर जावैगे, थारा आनन्द कोए थारे तै खोस न्ही सकदा।

23 उस बखत थम मेरतै कुछ न्ही बुझ्झोगे। मै थारैतै सच कहूँ सूँ, जै थम पिता तै कुछ माँगोगे, तो वो मेरै नाम तै थमनै देवैगा।

24 इब ताहीं थमनै मेरै नाम तै पिता तै कुछ न्ही माँगया, माँगो, तो पा ल्योगे ताके थारा आनन्द पूरा हो जावै।

~~XXXXXXXXXX~~

25 “मन्नै ये बात थारैताहीं उदाहरणां म्ह कही सै, पर वो बखत आवै सै, जब पिता के बारे म्ह मै उदाहरणां म्ह न्ही कहूँगा, पर साफ शब्दां म्ह थारे ताहीं बताऊँगा।

26 उस दिन थम मेरै नाम तै माँगोगे, अर मै थारैतै न्यू कोनी कहन्दा के मन्नै ए थारे खात्तर पिता तै बिनती करणी पड़ैगी,

27 क्यूँके मेरा पिता तो खुदे थारैतै प्यार करै सै, ज्यांतै के थमने मेरतै प्यार करया सै अर यो विश्वास करया सै के मै पिता की ओड़ तै भेज्या होड़ सूँ।

28 मै पिता की ओड़ तै दुनिया म्ह आया सूँ, अर इब दुनिया नै छोड़के पिता के धारै जाऊँ सूँ।”

29 उसकै चेल्यां नै कह्या, “हाँ, इब तू उदाहरणां म्ह न्ही, बल्के साफ शब्दां म्ह समझाण लागरया सै।

30 इब हम समझगे सां, के तू सब कुछ जाणै सै, अर इब किसे नै तेरे तै कोए सवाल पूच्छण जरुर कोनी, इस खात्तर हम विश्वास करा सां के तू परमेसवर की ओड़ तै आया सै।”

31 न्यू सुणके यीशु नै उन ताहीं कह्या, “के थमने इब विश्वास होया सै?”

32 लखाओ, वो बखत आवै सै बल्के आण पहोंच्या सै के थम सारे खिंड-मिन्ड होकै अपणे-अपणे घर बोहड़ जाओगे, अर मन्नै एकला छोड़ दोगे, फेरभी मै एकला कोनी क्यूँके पिता मेरै गेल्या सै।

33 “मन्ने ये बात थारैतै ज्यांतै कही सै, के थम मेरै म्ह शान्ति पाओ। दुनिया म्ह थारे पै क्लेश होवै सै, पर हिम्मत राखियो, मन्ने दुनिया ताहीं जीत लिया सै।”

17

???? ? ? ?????????? ?????????? ???? ? ? ?????

1 यीशु नै ये बात कही अर अपणी नजर अकास कान्ही ठाके कह्या, “हे पिता, वो बखत आण पहाँच्या सै, अपणे बेटटे की महिमा कर, के बेट्टा भी तेरी महिमा कर सकै,

2 क्यूँके तन्नै उस ताहीं सारी मानवजाति पै हक दिया, के वो सब नै अनन्त जीवन देवै जो तन्नै उस ताहीं सौप्या सै।

3 अर अनन्त जीवन यो सै के वे तुझ, जो के एकमात्र सच्चे परमेसवर अर यीशु मसीह नै जिस ताहीं तन्नै भेज्या सै, जाणै।

4 जो काम तन्नै मेरै ताहीं सौप्या था, उस ताहीं पूरा करके मन्ने धरती पै तेरी महिमा करी सै।

5 जो महिमा मेरी तेरे गैल दुनिया की सृष्टि तै पैहल्या थी, इब हे पिता, तू अपणे गेल्या मन्ने भी महिमावान कर।”

????? ??????? ? ? ??????? ???????????

6 “मन्ने तेरा नाम उन माणसां पै जाहिर करया सै दुनिया म्ह तै जिनताहीं तन्नै छाटकै मेरै ताहीं सौप्या था, वे तेरे थे पर तन्नै उन ताहीं मेरै ताहीं सौप्या सै, अर उननै तेरे वचन का पालन करया सै।”

7 इब जाणगे सै के जो कुछ तन्नै मेरै ताहीं दिया सै, वो सारा तेरी ओड़ तै सै,

8 क्यूँके जो बात तन्नै मेरै ताहीं बताई, मन्ने उन ताहीं उनकै धोरै पहाँच्या दी सै, अर उननै उन ताहीं अपणालिया, अर सच म्ह ए जाण लिया सै के मै तेरी ओड़ तै आया सूं, अर उननै विश्वास भी कर लिया सै के तू ए मेरा भेजण आळा सै।

9 मै उन खात्तर बिनती करूं सूं, दुनिया के माणसां कै खात्तर बिनती कोनी करदा पर उननैए कै खात्तर करूं सूं जिन ताहीं तन्नै मेरै ताहीं दिया सै, क्यूँके वे तेरे सै,

10 अर जो कुछ मेरा सै वो सारा तेरा सै, अर जो तेरा सै वो मेरा सै, अर मन्ने उनके जरिये महिमा पाई सै।

11 इब मै इस दुनिया म्ह कोनी रहूंगा, अर मै तेरे धारे आऊँ सूं, पर ये दुनिया म्ह रहवेंगे, हे पवित्तर पिता, अपणे नाम की शक्ति तै उनकी रुखाळ कर, जो तन्नै मेरै ताहीं दिया सै, ताके जिस तरियां मै अर तू एक सां, वे भी एक हो सके।

12 जिव मै उनकै गेल्या था, तो मन्ने उन ताहीं तेरे नाम म्ह, जो तन्नै मेरै ताहीं दिया था, उनकी रुखाळ करी, अर उन म्ह तै किसे का नाश कोनी होया, सिवाए उसके जिस ताहीं खोणा जरूरी था, वो भी ज्यांतै के पवित्तर ग्रन्थ म्ह जो लिख्या होइ सच हो।

13 पर इब मै तेरे धारे आऊँ सूं, अर ये बात दुनिया म्ह रहते होए कहुँ सूं, ताके वे अपणे मनां म्ह मेरे भरपूर आनन्द नै पा सकै।

14 मन्ने तेरा वचन उन ताहीं पोहोचा दिया सै, अर दुनिया के माणसां नै उनतै बैर करया, क्यूँके जिस तरियां मै इस दुनिया का कोनी, उस्से तरियां वे भी इस दुनिया के कोनी।

15 मै या बिनती कोनी करदा के उननै तू दुनिया तै लिकाइ ले, बल्के तू उननै उस शैतान तै बचाए राख।

16 जिस तरियां मै दुनिया का कोनी, उस्से तरियां वे भी दुनिया के कोनी।

17 तेरा वचन साच्चा सै, सच कै जरिये तू उननै अलग करण खात्तर समर्पित* कर।

18 जिस तरियां तन्नै मेरै ताहीं दुनिया म्ह भेज्या, उस्से तरियां मन्ने भी उन ताहीं दुनिया म्ह भेज्या,

* 17:17 17:17 समर्पित पवित्तर कर

19 मैं उनके खात्तर खुद नै तेरी सेवा म्ह समर्पित करूँ सू, ताके वे भी सच कै खात्तर समर्पित हो जावै ।

~~~~~

20 "मै केवल इन्हे खात्तर बिनती कोनी करदा, पर उन माणसां खात्तर भी जो इनकै वचन कै जरिये मेर पै विश्वास करैंगें,

21 ताके वे सब एक हों, जिस तरियां हे पिता तू मेरै म्ह सै, अर मै तेरे म्ह सू, उस्से तरियां वे भी म्हारै म्ह एक हो, जिसतै दुनिया के माणस विश्वास करै के तन्नै ए मेरै ताहीं भेज्या सै ।

22 वा महिमा जो तन्नै मेरै ताहीं दी, मन्नै उन ताहीं दी सै, ताके वे उस्से तरियां ए एक होवै जिस तरियां हम एक सा,

23 मै उन म्ह अर तू मेरे म्ह ताके वे सिध्द होकै एक हो जावै, अर दुनिया नै बेरा पाट्टै के तन्नै ए मेरै ताहीं भेज्या, अर जिस तरियां तन्नै मेरै तै प्यार करया उस्से तरियां उनतै प्यार करया ।"

24 हे पिता, मै चाहूँ सू, के जिन ताहीं तन्नै मेरैताहीं सौप्या सै, जड़े मै सू उड़ै वे भी मेरै गेल्या हो, के वे मेरी उस महिमा नै देखै जो तन्नै मेरैताहीं दी सै, क्यूँके तन्नै दुनिया नै बणाण तै पैहलया मेरतै प्यार करया सै ।

25 हे धार्मिक पिता, दुनिया के माणसां नै तो तेरे ताहीं कोनी जाणया, पर मन्नै तेरे ताहीं जाण लिया सै, अर मेरे चेल्यां नै भी बेरा पाटगया के तन्नै ए मेरैताहीं भेज्या सै ।

26 मन्नै तेरे ताहीं उनपै जाहिर करया सै, अर जाहिर होन्दा रहूँगा, के जो प्यार तन्नै मेरतै करया था वोए प्यार उन म्ह बस जावै, अर मै उन म्ह रहूँ ।"

## 18

~~~~~

(~~~~~ 26:47-56; ~~~~ 14:43-50; ~~~~~ 22:47-53)

1 जिव यीशु नै प्रार्थना खतम कर ली, तो वो अपणे चेल्यां कै गेल्या किद्रोन नाळे कि परली ओड़ गया । उड़ै एक फूल्लां का बाग था, जिस म्ह वो अर उसके चेल्लें गए ।

2 यीशु का पकड़ाण आळा यहूदा भी उस जगहां नै जाणै था, क्यूँके यीशु अपणे चेल्यां कै गैल उड़ै जाया करै था ।

3 फेर यहूदा, सिपाहियाँ कै एक टोळ नै अर प्रधान याजकां अर फरीसियाँ की ओड़ तै मन्दर के पेहेरेदारां नै लेकै, दीवे अर मशाल अर हथियारां नै लेकै उड़ै आया ।

4 फेर यीशु, उन सारी बात्तां नै जो उसपै वीत्तण आळी थी जाणकै, लिकड़कै उन ताहीं पृछा, "किसने टोहो सो?"

5 उननै उस ताहीं जवाब दिया, "यीशु नासरी* नै ।" यीशु नै उन ताहीं कह्या, "मैए सू ।" यीशु नै पकड़वाण आळा यहूदा भी उनके गेल्या खड्या था ।

6 जिव यीशु नै उनतै कह्या, "मै सू," वे पाच्छै हटकै धरती पै पड़गे ।

7 फेर उसनै दुवारै उन ताहीं बुद्धयाया, "थम किसनै टोहो सो?" वे बोल्ले, "यीशु नासरी* नै ।"

8 यीशु नै जवाब दिया, "मन्नै तो थारे ताहीं कह दिया सै के वो मै सू, जै थम मन्नै टोहो सो तो इन माणसां नै जाण दो ।"

9 यो इस करकै के खुद उसके जरिये कह्या गया यो वचन पूरा हो, "मन्नै उन म्ह तै एक भी न्ही खोया, जिन ताहीं तन्नै मेरतै सौप्या था ।"

10 फेर शमौन पतरस नै तलवार, जो उसके धोरै थी, खींची अर महायाजक के नौक्कर पै चलाकै उसका सोळा कान उड़ा दिया, उस नौक्कर का नाम मलखुस था ।

* 18:5 18:5 नासरत नगर का रहण आळा † 18:7 18:7 नासरत नगर का रहण आळा

11 फेर यीशु नै पतरस तै कह्या, “अपणी तलवार म्यान म्ह धर। जो दुख का कटोरा पिता नै मेरै ताहीं दिया सै, के मै उसनै न्ही पीऊँ?”

~~~~~

12 फेर रोमी सिपाहियाँ अर उनके सूबदार अर यहूदिया परदेस के मन्दर के पैहरेदारां नै यीशु ताहीं पकड़के बाँध लिया,

13 अर पैहल्या उस ताहीं हन्ना के धौर ले गए, क्यूँके वो उस साल के महायाजक काइफा का सुसरा था।

14 यो वोए काइफा था, जिसनै यहूदियाँ ताहीं सलाह दी थी के म्हारे माणसां खात्तर एक आदमी का मरणा ठीक सै।

~~~~~

15 शमोन पतरस अर एक और दुसरा चेल्ला भी यीशु के पाच्छे हो लिए। यो चेल्ला महायाजक का जाण-पिच्छाण का था, ज्यातै वो यीशु के गेल्या महायाजक के आँगण म्ह गया,

16 पर पतरस बाहरणै दरबाजे पै खड्या रह्या। फेर दुसरा चेल्ला जो महायाजक की जाण-पिच्छाण का था, वो बाहरणै लिकड्या अर पहरेदारणी तै कहके पतरस ताहीं भीत्तर लियाया।

17 उस नौकराणी नै, जो पहरेदारणी भी थी, पतरस तै कह्या, “कदे तू भी इस माणस के चेल्यां म्ह तै तो न्ही सै?” उसनै कह्या, “मै कोनी।”

18 नौक्कर अर मन्दर के पहरेदारां नै जाड्डे के कारण आग जळा राक्खी थी, अर खडे होके सेक्के थे, अर पतरस भी उनके गेल्या खड्या आग सेक्के था।

~~~~~

19 फेर महायाजक नै यीशु तै उसके चेल्यां के बाबत अर उसके उपदेशां के बाबत जाँच-पड़ताळ करी।

20 यीशु नै उस ताहीं जवाब दिया, “मन्नै हरेक माणस तै खुलके बात करी, मन्नै सभायां अर आराधनालयां म्ह, जडे सारे यहूदी कट्टे होया करै सै, सारी हाण उपदेश दिया अर लुहक के कुछ कोनी कह्या।

21 तू क्यूँ मेरे तै सवाल बुझ्झै सै? सवाल उनतै कर जिननै मेरे वचन सुणे सै, वे जाणे सै, के मन्नै उन ताहीं के-के कह्या।”

22 जिव उसनै न्यू कह्या, तो मन्दर के पैहरेदारां म्ह तै एक नै जो धौर खड्या था, यीशु के थप्पड़ मारके कह्या, “के तन्नै महायाजक ताहीं इस तरियां जवाब देण की हिम्मत किसी करी?”

23 यीशु नै उसतै जवाब दिया, “जै मेरा कहणा गलत सै तो साबित करो पर मन्नै जो कह्या सै वो सही सै तो फेर थम मेरै क्यूँ मारण लागरे सों?”

24 इस खात्तर यीशु ताहीं जो इब भी बाँधे होए थे, हन्ना नै काइफा महायाजक के धौर भेज दिया।

~~~~~

25 शमोन पतरस खड्या होया आग सेक्के था, फेर उननै उसतै कह्या, “कदे तू भी उसके चेल्यां म्ह तै तो न्ही सै?” उसनै नाट-के कह्या, “मै कोनी।”

26 महायाजक के नौकरां म्ह तै एक, जो उसके कुणवे म्ह तै था, जिसका कान पतरस नै काट दिया था, बोल्या, “के मन्नै तेरे ताहीं यीशु के गेल्या फूल्लां के बाग म्ह कोनी देख्या था?”

27 पतरस फेर नाटग्या, अर जिब्बे मुर्गे नै बाँग देई।

~~~~~

28 फेर वे यीशु ताहीं काइफा के धौर तै किले<sup>‡</sup> म्ह लगे, अर तडकेए का बखत था, पर वे खुद किले के भीत्तर कोनी गए ताके वे फसह का भोज खाण तै पैहल्या अशुद्ध ना हों जावै।

29 फेर राज्यपाल पिलातुस उनके धौर बाहरणै लिकडके आया अर कह्या, “थम इस माणस पै किस बात का दोष लाओ सो?”

‡ 18:28 18:28 जो पिरटोरियम कुहावे सै

30 उननै उस ताहीं जवाब दिया, “जै वो बुरे काम करणीया न्ही होंदा तो हम इसनै तेरे धारै कोनी ल्यान्दे।”

31 पिलातुस नै उनतै कह्या, “थमे इसनै ले जाकै अपणे नियम-कायदा कै मुताबिक इसका न्याय करो।” यहूदी अगुवां नै उसतै कह्या, “हमनै हक कोनी के किसै की जानलेवां।”

32 “यो इस करकै होया, ताके यीशु की वा बात पूरी हो जो उसनै यो इशारा देंदे होइ कही थी के उसकी मौत किस ढाळ होगी।”

33 फेर पिलातुस दुबारै किले कै भीत्तर गया, यीशु ताहीं बुलाकै उसनै बुझ्झया, “के तू यहूदियाँ का राजा सै?”

34 यीशु नै जवाब दिया, “के तू या बात अपनी ओइ तै कहवै सै या दुसरयां नै मेरै बाबत तेरे तै न्यू कह्या सै?”

35 पिलातुस नै जवाब दिया, “के मै यहूदी न्ही सू, तेरी-ए कोम अर प्रधान याजकां नै तेरे ताहीं मेरै हाथ म्ह सौंप्या सै। तन्नै के करया सै?”

36 यीशु नै जवाब दिया, “मेरा राज्य इस दुनिया का कोनी, जै मेरा राज्य इस दुनिया का होंदा, तो मेरे सेवादार लड़दे के मै यहूदी अगुवां के हाथ्यां सौंप्या कोनी जान्दा पर सच्चाई तो या सै के मेरा राज्य आड़े का सै ए कोनी।”

37 पिलातुस नै उसतै कह्या, “के तू राजा सै?” यीशु नै जवाब दिया, “तू कहवै सै के मै राजा सूं। मन्नै ज्यातै जन्म लिया अर ज्यातै दुनिया म्ह आया सूं, के सच की गवाही दियुं। जो कोए सच का सै, वो मेरा वचन सुणै सै।”

~~~~~

38 पिलातुस नै उसतै कह्या, “सच के सै?” न्यू कहकै वो फेर यहूदी अगुवां के धारै लिकड़ आया अर उन ताहीं कह्या, “मै तो उस म्ह कुछ खोट कोनी पांदा।”

39 पर थारे यो रिवाज सै के मै फसह पै थारे खात्तर एक माणस नै छोड़ दियुं। आखर के थम चाहो सो, “के मै थारे खात्तर यहूदियाँ के राजा नै छोड़ दियुं?”

40 फेर उननै रुक्के मारकै कह्या, “इसनै न्ही, पर म्हारै खात्तर बरअब्बा नै छोड़दे।” जिव के बरअब्बा विद्रोही था।

19

1 फेर पिलातुस राज्यपाल नै यीशु कै कोड़े लगवाण खात्तर सिपाहियाँ के हाथ सौंप दिया।

2 सिपाहियाँ नै काण्डयाँ का मुकुट गूँथके उसकै सिर पै धरया, अर उस ताहीं बैजनी लत्ते पिहराये,

3 अर उसके धारै आ-आके कहण लागगे, “हे यहूदियाँ के राजा, प्रणाम!” अर उसके थप्पड़ भी मारे।

4 फेर पिलातुस नै दुबारै बाहरणै लिकड़कै माणसां ताहीं कह्या, “लखाओ, मै उसनै थारे धारै फेर ल्याया सूं, ताके थमनै बेरा लाग्गै के मै उस म्ह कुछ भी खोट कोनी पान्दा।”

5 फेर यीशु ताहीं काण्डयाँ का मुकुट अर बैजनी लत्ते पहरे होइ बाहरणै लेग्या, अर पिलातुस नै उन ताहीं कह्या, “देक्खों, इस माणस नै!”

6 जिव प्रधान याजकां अर मन्दर के पैहरेदारां नै उस ताहीं देख्या, तो रुक्के मारकै कह्या, “उस ताहीं करूस पै चढ़ा, करूस पै!” पिलातुस नै उनतै कह्या, “थमे उसनै ले जाकै करूस पै चढ़ाओ, क्यूँके मै उस म्ह कोए खोट कोनी पान्दा।”

7 यहूदी अगुवां नै उस ताहीं जवाब दिया, “म्हारे नियम-कायदे सै अर उस नियम-कायदा कै मुताबिक इस माणस नै मौत की सजा मिलणी चाहिये, क्यूँके इसनै खुद ताहीं परमेसवर का बेट्टा होण का दावा करया सै।”

8 जिव पिलातुस नै या बात सुणी तो और भी घणा डरग्या,

9 अर दुवारै किले* कै भीत्तर गया अर यीशु तै कह्या, “तू कितका सै?” पर यीशु नै उसतै कुछ भी जवाब कोनी दिया।

10 इसपै पिलातुस नै उसतै कह्या, “मेरतै क्यातै न्ही बोल्दा? के तन्नै कोनी बेरा के तेरे ताहीं छोड़ देण का हक मेरे ताहीं सै, अर तेरे ताहीं क़रूस पै चढ़ाण का भी मेरे ताहीं हक सै।”

11 यीशु नै जवाब दिया, “जै तेरे ताहीं परमेसवर की ओड़ तै हक न्ही दिया जान्दा, तो तेरा मेरे पै कोए हक कोनी होंदा, ज्यातै जिसनै मेरे ताहीं तेरे हाथ पकड़ाया सै उसका पाप घणा सै।”

12 इस बात नै सुणके पिलातुस नै उस ताहीं छोड़ देणा चाह्या, पर यहूदी माणसां की भीड़ नै रुक्के मार-मारके कह्या, “जै तू इसनै छोड़ देवैगा, तो तू कैसर का विरोधी बण जावैगा। जो कोए खुद नै राजा होण का दावा करै सै, वो कैसर का विरोध करै सै।”

13 ये बात सुणके पिलातुस यीशु नै बाहरणे ल्याया अर उड़ै न्याय की गद्दी पै बैठग्या, जो इब्रानी भाषा म्ह “गब्बता” कुह्वावे सै, जिसका मतलब चोतरा हो सै।

14 यो फसह की ल्यारी का दिन था, अर दोफाहरा का बखत था। फेर उसनै यहूदी माणसां ताहीं कह्या, “यो रह्या धारा राजा!”

15 पर उननै और ऊँची आवाज म्ह कह्या, “उस ताहीं मार द्यो! उस ताहीं मार द्यो! उस ताहीं क़रूस पै चढ़ा!” पिलातुस नै उनतै कह्या, “के मै थारे राजा नै क़रूस पै चढ़ाऊँ?” प्रधान याजकां नै जवाब दिया, “कैसर नै छोड़ म्हारा और कोए राजा कोनी।”

16 फेर पिलातुस नै यीशु ताहीं क़रूस पै चढ़ाण खात्तर उनकै हवालै कर दिया।

~~~~~

17 फेर सिपाही यीशु नै ले गए, अर यीशु अपना क़रूस टाए होए उस जगहां तक बाहर गया, जो “खोपड़ी” यानी इब्रानी भाषा म्ह “गुलगुता” कुह्वावे सै।

18 उड़ै उननै उस ताहीं अर उसके गेल्या और दो माणसां ताहीं क़रूस पै चढ़ाया, एक इस ओड़ अर एक दुसरी ओड़, अर बिचाळै यीशु ताहीं।

19 पिलातुस नै एक दोषपत्र लिखके क़रूस पै लगवा दिया, अर उसपै लिख्या होया था, “यीशु नासरी†, यहूदियाँ का राजा।”

20 यो दोषपत्र घणखरे यहूदियाँ नै पढ़या, क्यूँके यरुशलेम नगर जड़ै यीशु क़रूस पै चढ़ाया गया था नगर कै धरै थी, अर दोषपत्र इब्रानी अर लतीनी अर यूनानी म्ह लिख्या होया था।

21 फेर यहूदियाँ के प्रधान याजकां नै पिलातुस तै कह्या, “यहूदियाँ का राजा” मतना लिखै पर यो के उसनै कह्या, ‘मै यहूदियाँ का राजा सूँ।’”

22 पिलातुस नै जवाब दिया, “मन्नै जो लिखणा था, लिख दिया।”

23 जिव सिपाहियाँ नै यीशु ताहीं क़रूस पै चढ़ा दिया, तो उसके लत्ते लैके चार हिस्यां म्ह बांड लिए, हरेक सिपाही खात्तर एक हिस्सा, अर कुड़ता भी लिया, पर कुड़ता बिन सिलाई उप्पर ते तळे ताहीं सिम्या होया था।

24 इस करके सिपाहियाँ नै आप्स म्ह कह्या, “हम इस ताहीं पाड़ा कोनी, पर इसपै पर्ची गेर कै, के यो किसका होवैगा।” न्यू इस करके होया के पवित्तर ग्रन्थ म्ह जो लिख्या होया वो पूरा हो, “उननै मेरे लत्ते आप्स म्ह बांड लिए अर मेरे लत्ते पै पर्ची गेरी।”

25 आखर म्ह सिपाहियाँ नै इसाए करया। यीशु कै क़रूस कै धरै यीशु की माँ, अर उसकी मौस्सी, क्लोपास की घरआळी मरियम, अर मगदल गाम की मरियम खड़ी थी।

26 जिव यीशु नै अपना माँ, अर उस चेल्लें ताहीं जिसतै वो प्यार करै था, धरै खड़े देख्या तो अपना माँ तै कह्या, “हे नारी, लखा, यो तेरा बेट्टा सै।”

27 फेर उस चेल्लें तै कह्या, “था तेरी माँ सै।” अर उससे बखत वो चेल्ला उस ताहीं अपने घरों लेग्या।

* 19:9 19:9 जो पिरटोरियम कुह्वावे सै † 19:19 19:19 नासरत नगर का रहण आळा

२२२२ २२ २२२

28 इसके पाच्छे यीशु ने बेरा लागग्या के इब उसनै सारा काम पूरा कर लिया सै, ज्यातै के पवित्तर ग्रन्थ म्ह जो कह्या गया वो पूरा हो, कह्या, “मै तिसाया सू।”

29 उड़े सिरके तै भरया होइ एक बास्सण धरया था, आखर म्ह सिपाहियाँ नै सिरके म्ह भेकै स्पंज (फोम) ताहीं जुफे की लाट्ठी पै धरके उसके मुँह के लगाया

30 जब यीशु ने वो सिरका चख्या, तो कह्या, “पूरा होया,” अर सिर झुकाके जी दे दिया।

२२२२ २२ २२२२ २२२२

31 इब यो त्यारी का दिन था, अर आगला दिन आराम का दिन अर फसह का दिन था, यो यहूदी माणसां खात्तर एक खास दिन था, अर वे न्ही चाहवै थे, के इस दिन देह क्रूस पै टंगी रहवै, इस करके यहूदियाँ नै पिलातुस तै बिनती करी के उन माणसां की टाँग तोड़ दी जावे, जो क्रूस पै चढ़ाये गये थे।

32 आखर म्ह सिपाहियाँ नै आके उन माणसां म्ह तै पैहले की टाँग तोड़ी फेर दुसरे की भी, जो उसके गेल्या क्रूस पै चढ़ाए गए थे,

33 पर जब यीशु के धोरे आके देख्या के वो मर लिया सै, तो उसकी टाँग कोनी तोड़ी।

34 पर सिपाहियाँ म्ह तै एक नै बरछी तै उसका पंजर चीर दिया, अर उस म्ह तै जिब्बे लहू अर पाणी लिकइया।

35 जिस माणस नै यो देख्या, उसनै गवाही दी सै, अर उसकी गवाही साच्ची सै, अर उननै बेरा सै के वो साच्ची कह सै के थम भी विश्वास करो।

36 ये बात ज्यातै होई के पवित्तर ग्रन्थ म्ह जो कह्या गया वो पूरा हो, “उसकी कोए हाड्डी कोनी तोड़ी जावेगी।”

37 फेर एक और जगहां पै पवित्तर ग्रन्थ म्ह न्यू लिख्या सै, “जिस ताहीं उननै बेधा सै, उसनै वे देखैगें।”

२२२२ २२ २२२२२२ २२२२

38 इन बातों पाच्छे अरिमतिया गाम के यूसुफ नै जो यीशु का चेल्ला था, पर यहूदी अगुवां के डर के मारे इस बात नै लकोए राखै था, पिलातुस तै बिनती करी, के वो यीशु की लाश ले जा सके सै। पिलातुस नै उसकी बिनती सुणी, अर वो आके उसकी लाश लेग्या।

39 नीकुदेमुस भी, जो पैहले यीशु के धोरे रात नै गया था, पचास सेर के करीबन रळा होइ गन्धरस अर एलवा (काण्डियाँ आळा पौधा) लियाया।

40 फेर उननै यीशु की लाश ली, अर यहूदियाँ के गाड्डण के रिवाज के मुताबिक उस ताहीं खुशबुदार द्रव्य के गेल्या कफन म्ह लपेट्या।

41 उस जगहां पै जड़े यीशु क्रूस पै चढ़ाया गया था, एक फूल्लां का बगीचा था, अर उस फूल्लां की क्यारी म्ह एक नई कबर थी जिसम्ह कदे कोए कोनी राख्या गया था।

42 ज्यातै उननै यीशु की लाश ताहीं उससे कबर म्ह धर दिया, क्यूँके वा लोवै ए थी, अर वो यहूदियाँ के आराम की त्यारी का दिन भी था।

20

२२२२ २२२२

1 हफ्ते के पैहलडे दिन तड़केए सूरज लिकड़ण तै पैहल्या अन्धेरै रहंदे ए मगदल गाम की मरियम कबर पै गई, अर पत्थर ताहीं कबर पै तै हटया होइ देख्या।

2 फेर वा भाज्जी अर शमौन पतरस अर उस दुसरे चेल्लै के धोरे जिसतै यीशु प्यार राखै था, आके कह्या, “वे प्रभु की लाश नै कबर म्ह तै काढ लेगे सै, अर हमनै न्ही बेरा के उस ताहीं कित धर दिया सै।”

- 3 फेर पतरस अर वो दुसरा चेल्ला* लिकड़कै कबर कै कान्ही चाल्ले ।
 4 वे दोन्नु गैल-गैल भाजरे थे, पर दुसरा चेल्ला पतरस तै तेज भाजकै कबर पै पैहल्या पोंहच्या,
 5 अर झुककै लत्ते पड़े देखे, तोभी वो भीत्तर कोनी गया ।
 6 फेर शमौन पतरस उसकै पाच्छै-पाच्छै पोंहच्या, अर कबर कै भीत्तर गया अर उसनै भी लत्ते पड़े देखे,
 7 अर वो अंगोच्छा जो उसकै सिर पै बन्धया होइ था, लत्यां कै गेल्या कोनी पडचा था, पर न्यारा एक जगहां लपेटकै धरया होया देख्या ।
 8 फेर दुसरा चेल्ला भी जो कबर पै पैहल्या पोंहच्या था, भीत्तर गया अर देखकै विश्वास करया कै यीशु मुदां म्ह तै जिन्दा होगया ।
 9 पतरस अर दुसरा चेल्ला इब ताहीं पवित्तर ग्रन्थ की वा बात कोनी समझे थे के उसनै मरे होया म्ह तै जी उठणा होगा ।
 10 फेर चेल्ले अपणे घरां बोहड़गे ।

~~~~~

- 11 पर मरियम† रोदी होई कबर कै धारे ए बाहरणै खड़ी रही, अर रोन्दे-रोन्दे कबर कै कान्ही कोडडी होकै,  
 12 दो सुर्गदूतां ताहीं धोळे-चमकदे लत्ते पहेरे होइ एक सिरहाणै अर दुसरे ताहीं पांयां की ओड़ बेट्टे देख्या, जइ यीशु की लाश धरी गई थी ।  
 13 उननै उस ताहीं कह्या, “हे नारी, तू क्यातै रोवै सै?” उसनै उन ताहीं कह्या, “वे मेरै प्रभु की लाश नै टा लेगे अर मन्नै कोनी बेरा के उसनै कित्त धर राख्या सै ।”  
 14 न्यू कहकै वा पाच्छै मुड़ी अर यीशु ताहीं खड़े देख्या, पर पिच्छाणया कोनी के यो यीशु सै ।  
 15 यीशु नै उसतै कह्या, “हे नारी, तू क्यातै रोवै सै? किसनै टोहवै सै?” उसनै माळी समझकै उस ताहीं कह्या, “हे श्रीमान, जै तन्नै उस लाश ताहीं टा लिया सै, तो मन्नै बता के उस ताहीं कित्त धर राख्या सै, अर मै उसनै ले जाऊंगी ।”  
 16 यीशु नै उस ताहीं कह्या, “मरियम!” उसनै बोहड़कै उस ताहीं इब्रानी म्ह कह्या, “रब्बुनी!” यानिके “हे गुरु” ।  
 17 यीशु नै उस ताहीं कह्या, “पैरां म्ह लिपटकै मन्नै मतना छुओ, क्यूंके मै इब ताहीं पिता के धारे उप्पर कोनी गया, पर मेरे भाईयाँ के धारे जाके उनतै कह दे, के मै अपणे पिता अर थारे पिता, अर अपणे परमेसवर अर थारे परमेसवर के धारे उप्पर जाके आऊँ सूं ।”  
 18 मरियम मगदलीनी नै जाकै चेल्यां ताहीं बताया, “मन्नै प्रभु ताहीं देख्या, अर उसनै मेरे तै ये बात कही ।”

~~~~~

- 19 उससे दिन जो हफतै का पैहल्डा दिन था, साँझ कै बखत यहूदियाँ के डर के मारे चेल्ले जिव किवाड़ मुंदे होइ एक कमरे म्ह थे, तो यीशु उनके बिचाळे आ खडचा होया अर उनतै बोल्या, “थमनै शान्ति मिलै ।”
 20 अर न्यू कहकै उसनै अपणे हाथ्यां के घा अर अपणा पंजर उनतै दिखाए । फेर चेल्ले यीशु नै देखकै राज्जी होए ।
 21 यीशु नै फेर उनतै कह्या, “थमनै शान्ति मिलै: जिस तरियां पिता नै मेरे ताहीं दुनिया म्ह भेज्या सै, उससे तरियां ए मै थमनै दुनिया म्ह भेज्जू सूं ।”
 22 न्यू कहकै उसनै उनपै फूक मारी अर उसनै कह्या, “पवित्तर आत्मा ल्यो ।
 23 जिनके पाप थम माफ करो, वे उनकै खात्तर माफ करे गए सै, जिनके थम राखो, वे राखे गए सै ।”

* 20:3 20:3 दुसरा चेल्ला यूहन्ना † 20:11 20:11 मरियम मगदला गाम की

२२२२ २२ २२२२ २२२२

24 पर बारहा चेल्यां म्ह तै एक, यानिके थोमा जो दिदुमुस कुह्वावै सै, जिब यीशु आया तो उनके गेल्या कोनी था।

25 जिब दुसरे चेल्लें उसतै कहण लागगे, “हमनै परभु ताहीं देख्या सै,” फेर उसनै उनतै कह्या, “जिब ताहीं मै उसके हाथ्यां म्ह कील्लां के छेद न्ही देख ल्युँ, अर कील्लां के छेदां म्ह अपणी आंगळी न्ही घाल ल्युँ, अर उसके पंजर म्ह अपणा हाथ ना घाल ल्युँ, जद ताहीं विश्वास कोनी करुंगा।”

26 आठ दिन कै पाच्छै उसके चेल्लें फेर घर कै भीत्तर थे, अर थोमा उनके गेल्या था, अर किवाड़ मूंद राक्खे थे, फेर यीशु आया अर उनके बिचाळै खड्या होकै कह्या, “थमनै शान्ति मिलै।”

27 फेर उसनै थोमा तै कह्या, “अपणी आंगळी याडै ल्याकै मेरै हाथ्यां नै देख अर अपणा हाथ ल्याकै मेरै पंजर म्ह घाल, अर अविश्वासी न्ही पर विश्वासी बण।”

28 न्यू सुणके थोमा नै जवाब दिया, “हे मेरे परभु, हे मेरे परमेसवर!”

29 यीशु नै उसतै कह्या, “तन्नै तो मेरै ताहीं देखके विश्वास करया सै, धन्य वे सै जिन नै बिन देखे विश्वास करया।”

२१ २२२२२२ २२ २२२२

30 यीशु नै ओर भी घणखर चमत्कार चेल्यां कै आगै दिखाए, जो इस किताब म्ह कोनी लिक्खे गए,

31 पर ये ज्यातै लिक्खे गए सै के थम विश्वास करो के यीशु ए परमेसवर का बेट्टा मसीह सै, अर विश्वास करके उसके नाम म्ह अनन्त जिन्दगी पाओ।

21

२२२२२२२२ २२ २२ २२२२२२ २२२२२२ २२ २२२२ २२२२

1 इन बात्तां के पाच्छै यीशु नै खुद ताहीं तिवरियास झील के किनारे चेल्यां पै जाहिर करया, अर इस ढाळ जाहिर करया

2 शमौन पतरस, अर थोमा जो दिदुमुस कुह्वावै सै, अर गलील परदेस कै काना नगर का नतनएल, अर जब्दी के बेट्टे*, अर उसके चेल्यां म्ह तै दो और जणे कठटे थे।

3 शमौन पतरस नै उन ताहीं कह्या, “मै मच्छी पकड़ण नै जाऊँ सूं।” उननै उसतै कह्या, “हम भी तेरे गेल्या चाल्लां सां।” इस करके वे लिकड़के किस्ती पै चढ़े, पर उस रात उननै कुछ न्ही पकड्या।

4 सबेर होन्दे-ए यीशु किनारे पै आ खड्या होया, फेरभी चेल्यां नै कोनी पिच्छाणा के यो यीशु सै।

5 फेर यीशु नै उन ताहीं कह्या, “हे बाळकों, के थारे धोरै कुछ खाण नै सै?” उननै जवाब दिया, “कोनी।”

6 यीशु नै उन ताहीं कह्या, “किस्ती कै सोळी ओड़ जाळ गेरो फेर पाओगे।” आखर उननै जाळ गेरया, अर इब घणी मच्छियाँ कै बाबत जाळ उनपै खिच्या कोनी।

7 फेर उस चेल्लें† नै जिसतै यीशु प्यार करै था, पतरस तै कह्या, “यो तो परभु सै!” शमौन पतरस नै न्यू सुणके के वो तो परभु सै, अपणा बाहरी कपड़ा लपेट्या अर झील म्ह कूद पड्या, क्यूँके उस बखत वो अंगोच्छें-अंगोच्छें म्ह था।

8 पर दुसरे चेल्लें डोंगी पै मच्छी तै भरया होड़ जाळ खिचदे होए आए, क्यूँके वे किनारे तै घणी दूर कोनी, पर कोए दो सौ हाथ (सौ मीटर) की दूरी पै थे।

9 जिब चेल्लें किनारे पै उतरे, तो उननै कोयले की आग अर उसपै मच्छी धरी होई, अर रोट्टी देक्खी।

10 यीशु नै उनतै कह्या, “जो मच्छी थमनै इब्बे पकड़ी सै, उन म्ह तै कुछ ल्याओ।”

11 फेर शमौन पतरस नै डोंगी पै चढ़के एक सौ तरेपन बड्डी मच्छियाँ तै भरया होड़ जाळ किनारे पै खिच्या, अर इतनी मच्छी होन्दे होए भी जाळ कोनी पाट्या।

* 21:2 21:2 जब्दी के बेट्टे यूहन्ना अर याकूब † 21:7 21:7 उस चेल्लें यूहन्ना

12 यीशु नै उनतै कह्या, “आओ, खाणा खाओ।” चेल्यां म्ह तै किसे की हिम्मत कोनी होई, के उसतै बुद्धै, “तू कौण सै?” क्यूँके उननै बेरा था, के हो ना हो यो प्रभु ए सै।

13 यीशु आया अर रोटी लेके उन ताहीं दी, अर उस्से ढाळ मच्छी भी।

14 यो तीसरी बार सै के यीशु मरे होया म्ह तै जिन्दा उट्टण के पाच्छै, चेल्यां नै दिखाई दिया।

~~~~~

15 खाणा खाणे के पाच्छै, यीशु नै शमौन पतरस तै कह्या, “हे शमौन, यूहन्ना के बेटटे, के तू चेल्यां तै बाध मेरतै प्यार करै सै?” उसनै उसतै कह्या, “हाँ प्रभु, तन्नै तो बेरा सै के मै तेरे तै प्यार राक्खूँ सूँ।” उसनै उसतै कह्या, “मेरे मेम्ना नै चरा।”<sup>‡</sup>

16 उसनै दुसरी बर उसतै कह्या, “हे शमौन, यूहन्ना के बेटटे, के तू मेरै तै प्यार राक्खै सै?” उसनै उसतै कह्या, “हाँ प्रभु, तन्नै तो बेरा सै के मै तेरे तै प्यार राक्खूँ सूँ।” उसनै उसतै कह्या, “मेरी भेङ्गां की रुखाळी कर।”

17 उसनै तीसरी बर उस ताहीं कह्या, “हे शमौन, यूहन्ना के बेटटे, के तू मेरतै प्यार राक्खै सै?” पतरस कॉल होया के उसनै उसतै तीसरी बर इसा कह्या, “हे शमौन, यूहन्ना के बेटटे, के तू मेरतै प्यार राक्खै सै?” अर उसतै कह्या, “हे प्रभु, तन्नै तो सारा कुछ बेरा सै, तन्नै न्यू बेरा सै के मै तेरे तै प्यार राक्खूँ सूँ।” यीशु नै उसतै कह्या, “मेरी भेङ्गां नै चरा।”

18 मै तेरे तै साच्ची-साच कहूँ सूँ, “जिब तू जवान था तो अपणी कड़ बाँधके जड़ै चाहवै था उड़े हाँडे था, पर जिब तू बूढ़ा होगा तो अपने हाथ पसरैगा, अर दुसरा तेरी कड़ बाँधके जड़ै तू ना चाहवैगा उड़े तन्नै ले जावैगा।”

19 यीशु नै इन बाततां तै इशारा करया के पतरस किसी मौत तै परमेसवर की महिमा करैगा, अर फेर उसनै उसतै कह्या, “मेरै पाच्छै हो ले।”

~~~~~

20 पतरस नै बोहड़के उस चेल्ले ताहीं पाच्छै आन्दे देख्या, जिसतै यीशु प्यार राक्खै था, जो खाणे के बखत उसके साथ बेटचा था, उसतै बुद्धया, “हे प्रभु, तेरा पकड़वाण आळा कौण सै?”

21 उस ताहीं देखके पतरस नै यीशु तै कह्या, “हे प्रभु, इसका के हाल होगा?”

22 यीशु नै उसतै कह्या, “जै मै चाहूँ के वो मेरै आण ताहीं रुक्या रहवै, तो तन्नै इसतै के? तू मेरै पाच्छै हो ले।”

23 ज्यातै भाईयाँ म्ह या बात फैलगी के वो चेल्ला कोनी मरैगा, फेरभी यीशु नै उसतै न्यू कोनी कह्या के वो कोनी मरैगा, पर यो के, “जै मै चाहूँ के वो मेरै आण ताहीं रुक्या रहवै, तो तन्नै इसतै के?”

~~~~~

24 यो वोए चेल्ला<sup>§</sup> सै जो इन बाततां की गवाही देवै सै अर जिसनै इन बाततां ताहीं लिख्या सै, अर हमनै बेरा सै के उसकी गवाही साच्ची सै।

25 और भी घणेए काम सै, जो यीशु नै करे, जै वे एक-एक करके लिखे जान्दे, तो मै समझूँ सूँ के किताब जो लिक्खी जान्दी वा दुनिया म्ह भी कोनी समान्दी।

‡ 21:15 21:15 इन शब्दां नै यीशु अपने अनुयायियों के खातर इस्तमाल म्ह लाता था नाम था यूहन्ना § 21:24 21:24 वोए चेल्ला उसका

## प्रेरितां के काम का वर्णन



प्रेरितां के काम का वर्णन लूका के जरिये लिखे गये सुसमाचार के आगमै का जिक्र सै। इसका खास मकसद यो बताणा सै, के यीशु के शरुआती चेल्यां नै पवित्र आत्मा के अगुवाई म्ह, यीशु के बारे म्ह सुसमाचार ताहीं यरुशलेम नगर अर सारे यहूदिया अर सामरिया परदेस म्ह, अर धरती के छोर ताहीं (1:8) किस तरियां फैलाया। यो मसीह आन्दोलन का ब्यौरा सै, जो यहूदी माणसां के बीच म्ह शरु होया, अर बढ़ के सारे दुनिया के माणसां का विश्वास बणग्या। लेखक इस बात का ध्यान राखै सै, के उसके पाठकां नै यो पक्का यकिन हो जावै के मसीह माणस रोमी साम्राज्य के खात्तर एक विद्रोही राजनैतिक शक्ति न्ही थे, अर मसीह विश्वास यहूदी धर्म की पूर्ति था। प्रेरितां के काम की किताब ताहीं तीन भागां म्ह बाटया जा सकै सै, जो लगातार बढ़ते क्षेत्र नै दिखावै सै, जिस म्ह यीशु मसीह का सुसमाचार प्रचार करया गया अर कलीसियां बणाई गईं (: 1) यीशु के सुर्ग जाण के बाद यरुशलेम म्ह मसीह आन्दोलन की शरुआत; 2) पलस्तीन के दुसरे हिस्सां म्ह इसका बढ़णा, अर 3) भूमध्य सागर के देशां म्ह रोम ताहीं इसका विस्तार। प्रेरितां के काम की एक भोत बड़ी खासियत सै, पवित्र आत्मा का काम करणा। पवित्र आत्मा पिन्तेकुस्त के दिन यरुशलेम म्ह कट्टे होए विश्वासियाँ पै बड़ी शक्ति के गैल उतरै सै, अर इस किताब म्ह बिच्ची घटनाओं के दौराण कलीसिया अर उसके अगुवां ताहीं राह दिखाणा अर उननै शक्ति देणा सै। प्रेरितां के काम म्ह दिए गये कई उपदेशां म्ह शरुआती मसीह सन्देश का सार पेश करया गया सै, अर इस म्ह लिखी घटनाएँ विश्वासियाँ के जिन्दगी म्ह अर कलीसिया की संगति म्ह इस सन्देश की शक्ति नै दिखावै सै।

### रूप-रेखा

गवाही खात्तर तैयारी 1:1-26

क-यीशु का आखरी हुकम अर करार 1:1-14

ख-यहूदा का उत्तराधिकारी 1: 15-26

यरुशलेम नगर म्ह गवाही 2:1-8:3

यहूदिया अर सामरिया परदेस म्ह गवाही 8:4-12:25

पौलुस की सेवकाई 13:1-28:31

क-पैहली प्रचार-यात्रा 13:1-14:28

ख-यरुशलेम म्ह सम्मेलन 15:1-35

ग-दुसरी प्रचार-यात्रा 15:36-18:22

घ-तीसरी प्रचार-यात्रा 18:23-21:16

च-यरुशलेम, कैसरिया नगर अर रोम देश म्ह बन्दी पौलुस 21:17-28:31



1 हे थियुफिलुस, मन्नै पैहलड़ी किताब उन सारी बात्तां के बारे म्ह लिक्खी, जो यीशु शरु तै लेके सुर्ग म्ह टाए जाण तक करदा अर सिखान्दा रहया,

2 पर यीशु ताहीं परमेसवर के जरिये सुर्ग म्ह उटाए जाण तै पैहले उसनै अपणे चुणे होए प्रेरितां ताहीं पवित्र आत्मा के जरिये हुकम दिया।

3 यीशु के दुख ठाण के पाच्छे, उन प्रेरितां के स्याम्ही भोत-से पक्के सबूत दिखाए के वो जिन्दा सै, अर वो चाळीस दिन तक उननै दिखदा रहया, अर परमेसवर के राज्य की बात करदा रहया।

4 अर एक दिन मसीह यीशु नै उनतै कट्टे करके उन ताहीं हुकम दिया, “यरुशलेम नगर नै ना छोड़डो, पर पिता की उस प्रतिज्ञा की पूरे होण की बाट देखदे रहो, जिसका जिक्र थम मेरै तै सुण चुके सो।

5 क्यूँके यूहन्ना नै तो पाणी तै बपतिस्मा दिया सै पर थोड़े दिनां पाच्छै थम पवित्त्र आत्मा तै बपतिस्मा पाओगे।”

~~~~~

6 चेल्लें जिब यीशु तै दुबारा मिले तो उननै उसतै बुद्धिया, “हे प्रभु, के वो बखत आ गया सै, के तू इस्राएल ताहीं छोड़वा के उसनै दुबारा बसाके राजा के रूप म्ह सब पै शासन करैगा।”

7 उसनै उनतै कह्या, “उस बखत या युगा ताहीं, जिन ताहीं पिता नै अपणे अधिकार म्ह कर राख्या सै, उननै जाणणा थारा काम कोनी।

8 पर जिब पवित्त्र आत्मा थारे पै आवैगा फेर थम सामर्थ पाओगे, अर यरुशलेम नगर अर सारे यहूदिया और सामरिया परदेसां म्ह, अर धरती के सिरे ताहीं मेरे बारें म्ह गवाही दोगे।”

9 न्यू कहके यीशु उनके देखदे-देखदे परमेसवर के जरिये उप्पर टा लिया गया, अर बाहळ नै उस ताहीं उनकी आँखां तै लहको लिया।

10 उसके जान्दे बखत जिब वे अकास की ओड़ देख्लै थे, तो देखको, चाणचक दो माणस धोळे लत्ते पहरे ओड़ उनके लोवे आण खड़े होए,

11 अर उनतै कह्या, “हे गलील परदेस के माणसों, थम खड़े अकास कान्ही क्यातै लखाओ सो? योए यीशु, जो परमेसवर के जरिये थारे धोरै तै सुगं पै टा लिया गया सै, जिस तरियां तै थमनै उस ताहीं सुगं नै जान्दे देख्या उससे तरियां तै वो दुबारा आवैगा।”

~~~~~

12 जिब सुगंदूत चले गये, तो चेल्लें जैतून नाम के पहाड़ तै जो यरुशलेम नगर तै करीब आधे कोस\* की दूरी पै सै, यरुशलेम नगर म्ह बोहड़े।

13 जिब वे नगर पोहचे तो उस चुबारे पै गये, जित्त पतरस अर यूहन्ना अर याकूब अर अन्दिरयास अर फिलिप्पुस अर थोमा अर बरतुल्मै अर मत्ती अर हलफई का बेट्टा याकूब अर शमौन, जेलोतेसां अर याकूब का बेट्टा यहूदा ये सारे माणस ओड़ै थे।

14 ये सारे कई बिरबानियां अर यीशु की माँ मरियम अर उसके भाईयां के गेल्या कट्टे होके एक मन तै प्रार्थना म्ह लागगे रहे।

15 उन्हे दिनां म्ह पतरस विश्वासियां के विचाळे म्ह जो एक सौ बीस आदमियां के करीबन थे, खड्या होके कहण लाग्या,

16 हे भाईयो, जरूरी था के पवित्त्र ग्रन्थ का वो लेख पूरा हो जो पवित्त्र आत्मा नै दाऊद के मुँह तै यहूदा के बाबत, जो यीशु के पकड़वाण आळा का अगुवां था, पैहल्याए तै कह्या था।

17 क्यूँके वो तो म्हारै म्ह गिण्या गया, अर इस सेविकाई म्ह साइझी होया।

18 “जिसा थम जाणो सों (उसनै पाप की कमाई तै एक खेत मोल लिया, अर सिर के बळ गिरया अर उसका पेट पाटग्या अर उसकी सारी आन्दड़ी लिकड़गी।

19 इस बात ताहीं यरुशलेम नगर के सारे रहणीये जाणगे, उरै ताहीं के उस खेत का नाम उनकी भाषा म्ह ‘हक्कलदमा’ यानिके ‘लहू का खेत’ पड़ग्या।)”

20 “दाऊद नै भजन संहिता म्ह लिख्या सै, ‘उसका घर उजड़ जावै, अर यो भी लिख्या सै, के उस म्ह कोए न्ही बसै,’ अर ‘उसका पद कोए और ले लेवै।’”

\* 1:12 1:12 एक किलो. मी. † 1:13 1:13 एक कट्टर पंथी राजनैतिक दल का नाम था जिसका वो सदस्य था

21 “इस करके यो जरूरी सै के एक इसा माणस छाटया जावै, जो प्रभु यीशु के सारे काम्मां के हरेक बखत का गवाह हो, प्रभु यीशु ताहीं यूहन्ना के जरिये बपतिस्मा दिये जाण तै लैके, सुगं म्ह स्वीकार किये जाण तक,

22 वो माणस म्हारे गैल प्रभु यीशु के जिन्दा होण का गवाह बणै।”

23 फेर उननै दो नाम सुझाए, एक यूसुफ जो बरसब्बा कुह्वावै था, जिसका उपनाम यूसतुम सै, दुसरा मत्तियाह ताहीं,

24 अर या प्रार्थना करी, “हे प्रभु, तू जो सारया के मनां नै जाणै सै, न्यू बता के इन दोनुआ म्ह तै तन्नै किस ताहीं चुण्या सै,

25 के वो इस सेवा के काम अर प्रेरितों की वा खाल्ली जगहां ले, जिसनै यहूदा छोड़के अपनी जगहां चल्या गया, जित्त उसनै जाणा चाहिए था।”

26 फेर उननै उनकै बाबत पर्ची गेरी, अर पर्ची मत्तियाह के नाम लिक्डी। आखर वो उन ग्यारहां प्रेरितां के गेल्या गिण्या गया।

## 2

?????? ???? ? ?

1 यहूदियां के पिन्तेकुस्त त्योहार के दिन, यीशु के चेल्लें एक जगहां कट्टे थे।

2 चाणचक अकास तै तेज आँधी जिसी आवाज आई, अर उसतै सारा घर जित्त वे वेढे थे, गूँजग्या।

3 अर उननै एक आग की लपट दिक्खी, जो जीभ के समान थी, वा आग की लपट अलग-अलग होके उन सब के उप्पर आ उतरी।

4 वे सारे पवित्तर आत्मा तै भरगे, अर जो वरदान पवित्तर आत्मा नै उन ताहीं दिया, उसके मुताबिक वो अन्य-अन्य भाषा बोल्लण लागगे।

5 उस बखत पूरी दुनिया की हरेक जात म्ह तै यहूदी-भगत यरुशलेम नगर म्ह रहण लागरे थे।

6 जब आँधी जिसा शब्द गरजा, तो भीड़ लागगी अर आदमी घबरागे, क्यूँके हर एक अपनी-अपनी भाषा म्ह चेल्यां ताहीं बोलदे सुणण लागरे थे।

7 वे सारे हैरान अर अचम्भा करके कहण लागगे, “देक्खो, जो वे बोल्लण लागरे सै के सारे गलीलवासी कोनी?”

8 तो यो के होण लागरया सै, के जो म्हारे म्ह तै हर एक इन ताहीं अपनी-अपनी जन्म-भूमि की भाषा म्ह बात करते सुणै सै!

9 हम जो पारथी अर मेदी अर एलामी अर मेसोपोटामिया अर यहूदिया अर कप्पूकिया अर पुन्तुस अर आसिया परदेस,

10 कुछ फरुगिया, पंफूलिया परदेस अर कुछ मिस्र देश अर लीबिया देश जो कुरेने नगर के लोवै-धोरै सै, इन सारे देशां के रहण आळे अर रोमी प्रवासी,

11 यानिके यहूदी माणस अर यहूदी पंथ धारण करण आळे, कुरेतो दीप अर अरब देश के माणस भी सै, पर अपनी-अपनी भाषा म्ह उनतै परमेसवर के बड़े-बड़े काम्मां का जिक्र सुणै सै।”

12 अर वे सारे हैरान होए अर घबराके एक-दुसरे तै कहण लागगे, “यो के होण लागरया सै?”

13 पर औरां नै मखौल करके कहा, “वे तो नई मदिरा के नशै म्ह चूर सै।”

???? ? ?

14 जब पतरस उन ग्यारहां प्रेरितां के गेल्या खड्या होया, अर टाड़ू आवाज म्ह बोल्या, “हे यहूदियासियों अर हे यरुशलेमवासियों, न्यू जाण ल्यो, अर कान लाके मेरी बात सुणो।”

15 जिसा थम समझरे सो, ये आदमी नशै म्ह कोनी, क्यूँके इब्बे दिन के नौ बजे सै।

16 जो थम म्हारे साथ होते होए देखण लागरे सों, यो योएल नबी के जरिये कही गई भविष्यवाणी का पूरा होणा सै।

17 “परमेसवर कहवै सै, के अन्त के दिनां म्ह इसा होवैगा के मै अपणा आत्मा सारे माणसां ताहीं दियुंगा, अर थारे बेट्टे अर थारी बेट्टी भविष्यवाणी करैगी, अर थारे जवान दर्शन देखेंगे, अर थारे बुजुर्ग सपना देखेंगे।”

18 उन दिनां म्ह, मै अपणे दास्सां, अर दासियाँ ताहीं अपणी आत्मा दियुंगा, अर वे भविष्यवाणी करेंगे।

19 अर मै उप्पर अकास म्ह अनोक्खे काम अर तळै धरती पै निशान, यानिके लहू अर आग अर धुम्मै का बाहळ दिखाऊंगा।

20 प्रभु के महान् अर तेजस्वी दिन के आण तै पैहल्या सूरज अँधेरा अर चाँद लहू-सा हो जावैगा।

21 अर जो कोए प्रभु का नाम लेवैगा, उसका उद्धार होवैगा।

22 “हे इस्राएलियों, इन बातों नै सुणो यीशु नासरी एक माणस था जिसका परमेसवर की ओड़ तै होण का सबूत उन सामर्थ के काम्मां अर हैरानी के काम्मां अर चमत्कारां तै जाहिर सै, जो परमेसवर नै थारे बिचाळै उसके जरिये कर दिखाए जिसके बारे म्ह थमनै खुदे बेरा सै।

23 उससे यीशु ताहीं, जो परमेसवर की ठहराई होई योजना अर पूर्व ज्ञान के मुताबिक पकड़वाया गया, थमनै अधर्मियाँ के हाथ्यां तै क्रूस पै चढ़ाके उस ताहीं मार दिया।

24 पर उससे ताहीं परमेसवर नै मौत के बन्धनां तै छुड़ाके जिन्दा करया, क्यूँके यीशु ताहीं अपणे बस म्ह राखणा मौत खात्तर असम्भव था।”

25 राजा दाऊद यीशु के बारे म्ह कहवै सै, “मै प्रभु नै सारी हाण अपणे धोरै देख्दा रहया क्यूँके वो मेरी सोळी ओड़ सै, मै उनतै न्ही डरूंगा जो लोग मेरा नुकसान करणा चाहवै सै।”

26 इससे कारण मेरा मन आनन्दित होया, अर मै खुशी तै गाऊंगा, बल्के मेरी आस भी उससे म्ह बणी रहवैगी।

27 क्यूँके तू मेरै प्राणां नै अधोलोक म्ह कोनी छोड़डैगा, अर ना अपणे पवित्र माणस नै सड़ण देवैगा।

28 “तन्नै मेरै ताहीं जीण का राह बताया सै, तू मन्नै दर्शन के जरिये आनन्द तै भर देवैगा।”

29 “हे भाईयो, मै कुलपति राजा दाऊद के बारे म्ह थारे तै हिम्मत करके कहूँ सूँ के वो तो मरगया अर गाड्या भी गया अर उसकी कबर आज ताहीं म्हारै उरै न्यू-की-न्यू सै।

30 वो नवी था अर उसनै बेरा था के परमेसवर नै मेरै तै वादा करया सै के मै तेरी पीढी म्ह तै एक माणस नै तेरे सिंहासन पै बिठाऊंगा,

31 उसनै होण आळी बात ताहीं पैहल्याए तै देखके मसीह के जिन्दा उठण के बारे म्ह भविष्यवाणी करी के ना तो उसका प्राण अधोलोक म्ह छोड़या गया अर ना उसकी देह सड़ण पाई।

32 इससे यीशु ताहीं परमेसवर नै जिन्दा करया, जिसके हम सारे गवाह सां।

33 इस तरियां परमेसवर के सोळे हाथ पै सबतै ऊँचा पद पाके, अर पिता तै वो पवित्र आत्मा पाके जिसका वादा लिया गया था, उसनै यो उण्डेल दिया सै जो थम देखे अर सुणो सो।

34 क्यूँके दाऊद तो सुर्ग पै कोनी चढ्या, पर वो खुद कहवै सै, ‘प्रभु परमेसवर नै मेरे प्रभु तै कह्या, मेरै सोळी ओड़ नै बैठ,

35 “जिब ताहीं के मै तेरे बैरियाँ नै तेरे कदमां तळै ना झुका दियुँ।”

36 “आखर इस्राएल का सारा खानदान पक्की तरियां तै जाण लेवै के परमेसवर नै उससे यीशु ताहीं जिस ताहीं थमनै क्रूस पै चढ़ाया, प्रभु भी ठहराया अर मसीह भी।”

37 जिब माणसां नै यो सुण्या, तो बिश्वास होगया था के उननै गलत काम करया सै, अर वे पतरस अर बाकी प्रेरितां तै बुद्धण लागगे, “हे भाईयो, हम के करा?”

38 पतरस नै उनतै कह्या, “पाप करणा छोड़्यो, अर थारे म्ह तै हरेक अपणे-अपणे पापां की माफी के खात्तर यीशु मसीह के नाम तै बपतिस्मा लेवे, जिब थम पवित्र आत्मा का दान पाओगे।

39 क्यूँके या प्रतियज्ञा थम, अर थारी ऊलादां, अर उन सारे दूर-दूर के आदमियाँ खात्तर भी सै जिन ताहीं प्रभु म्हाारा परमेसवर अपणे धौरै बुलावैगा ।”

40 पतरस नै कई और बात्तां तै, भी गवाही दे-देकै समझाया के अपणे-आपनै इस टेढ़ी जात तै बचाओ ।

41 आखर जिननै उसके वचन पै विश्वास करकै बपतिस्मा लिया, अर उस्से दिन तीन हजार माणसां कै करीबन उन म्ह मिलगे ।

42 जिननै पतरस के वचन पै विश्वास करया, वे प्रेरितां तै शिक्षा लेन्दे, अर संगति राखदे, अर रोट्टी तोड़ण, अर प्रार्थना करण म्ह मगन रहे ।

?????????????? ?? ?????

43 अर सारे के यरुशलेम माणस डरगे, अर घणे अनोक्खे काम अर चमत्कार प्रेरितां कै जरिये जाहिर होवै थे ।

44 अर सारे विश्वास करणीये कट्टे रहवै थे, अर उनकी सारी चीज साझे म्ह थी ।

45 वे अपणी-अपणी जायदाद अर सामान बेच-बेचकै जिसकी जरूरत होवै थी बांड दिया करै थे ।

46 वे हरेक दिन एक मन होकै मन्दर म्ह कट्टे होवै थे, घर-घर रोट्टी तोड़दे होए खुशी अर मन की सीधाई तै खाणा खावै थे,

47 अर परमेसवर की जय-जयकार करै थे, अर सारे माणस उनतै राज्जी थे जो उद्धार पावै थे, उन ताहीं प्रभु हरेक दिन उन म्ह मिला देवै था ।

### 3

???????? ?????????? ?? ??? ?????

1 पतरस अर यूहन्ना दोफाहरै के तीन बजे पाच्छे प्रार्थना के बखत मन्दर म्ह जाण लागरे थे ।

2 अर माणस एक जन्म तै लंगड़े नै ल्यावै थे, जिस ताहीं वे हरेक दिन मन्दर कै बाहरणै पै जो सुन्दर नामक फाटक कुह्वावै सै, बिठा देवै थे, के वो मन्दर म्ह जाण आळा तै भीख माँगै ।

3 जब उसनै पतरस अर यूहन्ना ताहीं मन्दर म्ह जान्दे देख्या, तो उनतै भीख माँगी ।

4 पतरस नै यूहन्ना कै गेल्या उसकी ओड़ गौर तै देखके कहा, “म्हारी ओड़ लखा!”

5 आखर वो उनतै कुछ पाण की आस राखते होए उनकी ओड़ लक्षण लागया ।

6 फेर पतरस नै कहा, “चाँदी अर सोन्ना तो मेरै धौरै सै न्ही, पर जो मेरै धौरै सै वो तन्नै दियुँ सू, यीशु मसीह नासरी के नाम तै उठ अर चाल-फिर ।”

7 पतरस नै उसका सोळा हाथ पकड़के उस ताहीं टाया, अर जिब्बे उसके पायां अर टाखण्यां म्ह ताकत आगी ।

8 वो उछळते-कूदते खड्या होगया अर चाल्लण-फिरण लागया, अर चाल्दा, अर कुदा, अर परमेसवर की जय-जयकार करदा होया उनके गेल्या मन्दर म्ह गया ।

9 सारे आदमियाँ नै उस ताहीं चाल्दे-फिरदे अर परमेसवर की जय-जयकार करदे होए देखके,

10 उस ताहीं पिच्छाण लिया के यो वोए सै जो मन्दर कै “सुन्दर” नामक फाटक पै बैठके भीख मांग्या करै था, अर उस घटना तै जो उसके गेल्या होई थी वे घणे अचम्मित अर हैरान होए ।

???????? ??? ?????? ?? ?????

11 जब वो पतरस अर यूहन्ना ताहीं पकड़े होए था, तो सारे माणस घणे हैरान होन्दे होए उस बराम्दा म्ह जो सुलैमान का कुह्वावै सै, उनके धौरै भाज्जे आये ।

12 न्यू देखके पतरस नै माणसां तै कहा, “हे इस्राएलियों, थम इस माणस पै क्यातै हैरान होवो सो, म्हारी ओड़ क्यातै इस ढाळ लखाओ सों, के मान्नों हमनै-ए अपणी सामर्थ या भगति तै इस ताहीं चाल्लण-फिरण जोगगा बणा दिया ।

13 अब्राहम अर इसहाक अर याकूब के परमेसवर, म्हारे पूर्वजां के परमेसवर नै अपणे सेवक यीशु मसीह की महिमा करी, जिस ताहीं थमनै पकड़वा दिया, अर जिब राज्यपाल पिलातुस नै उस ताहीं छोड़ देण का विचार करया, फेर थमनै उसके स्याम्ही उसका इन्कार करया ।

14 थमनै उस धर्मी अर पवित्र का इन्कार करया, अर बिनती करी के एक खून्नी ताहीं थारे खात्तर छोड़ दिया जावै,

15 अर थमनै अनन्त जीवन के कर्ता ताहीं मार दिया, जिस ताहीं परमेसवर नै मरे होया म्ह तै जिन्दा करया, अर इस बात के हम गवाह सां ।

16 मसीह यीशु के नाम म्ह बिश्वास के कारण इस माणस नै जिसनै थम जाणो सां, जिसनै थम इस बखत देखण लागरे सां, उस ताहीं ताकत दी सै, यो माणस यीशु के नाम म्ह अर मसीह यीशु पै बिश्वास के जरिये कती भला चंगा होया सै, जिसा के थम खुद देख सको सां ।”

17 “इब हे भाईयो, मन्नै बेरा सै के थमनै अर थारे अगुवां नै यो काम अज्ञानता म्ह करया, क्यूँके थम न्ही जाणो थे के वो मसीह सै ।

18 पर जिन बाततां ताहीं परमेसवर नै सारे नबियाँ के मुँह तै पैहल्याए तै बता दिया था, के उसका मसीह दुख ठावैगा, उन ताहीं उसनै इस्से ढाळ पूरा करया ।

19 इस करके, पाप करणा छोड़ द्यो अर बोहड़ आओ के थारे पाप मिटाए जावै, जिसतै प्रभु के स्याम्ही तै सुख-चैन के दिन आवै,

20 अर वो यीशु ताहीं भेज्जै, जो थारे खात्तर पैहल्या तै ए मसीह ठहराया गया सै ।

21 जरूरी सै के वो सुर्ग म्ह उस बखत ताहीं रहवै जिब ताहीं के वो सारी बाततां का सुधार ना कर लेवै जिसका जिक्र पुराणे बखत तै परमेसवर नै अपणे पवित्र नबियाँ के मुँह तै करया सै ।

22 जिस ढाळ के मूसा नबी नै कह्या, ‘परमेसवर थारे भाईयाँ म्ह तै थारे खात्तर मेरै जिसा एक नबी भेज्जैगा, जो किमे वो थारे तै कहवै उसकी सुणीयो ।’

23 पर हरेक माणस जो उस नबी की न्ही सुणै, आदमियाँ म्ह तै नाश करया जावैगा ।”

24 “अर शमूएल तै लेकै उसके पाच्छै आळा ताहीं जितने नबी बोल्ले उन सारया नै इन दिनां का सन्देशा दिया सै ।

25 थम सारे नबियाँ की ऊलाद अर उस करार के हिस्सेदार सो, जो परमेसवर नै थारे बाप-दादां तै करया, जिब उसनै अब्राहम तै कह्या, तेरी पीढ़ी के जरिये धरती के सारे खानदान आशीष पावेंगे ।’

26 परमेसवर नै अपणे सेवक ताहीं मरे होया म्ह तै ठाकै सब तै पैहल्या थारे धोरै भेज्या, के थारे म्ह तै हरेक ताहीं उसकी बुराईयाँ तै पलटा के आशीष देवै ।”

## 4

### \*\*\*\*\*

1 जिब वे आदमियाँ तै न्यू कहण लागरे थे, तो याजक अर मन्दर के सरदार अर सद्की दल के लोग उनपै चढ़ आये ।

2 क्यूँके वे घणे खुन्दक म्ह थे के वे आदमियाँ ताहीं सिखावै थे, अर यीशु का उदाहरण दे-देकै प्रचार करै थे, के परमेसवर मुदां नै एक दिन जिन्दा करेगा जिसा उसनै यीशु ताहीं करया ।

3 उननै उन ताहीं बन्दी बणाके दुसरे दिन तक हवालात म्ह राख्या क्यूँके साँझ होगयी थी ।

4 पर वचन के सुणण आळा म्ह तै घणाए नै बिश्वास करया, अर उनकी गिणती पाँच हजार माणसां के करीबन होगयी थी ।

5 दुसरे दिन इसा होया के उनके सरदार, यहूदी अगुवें, शास्त्री

6 अर महायाजक हन्ना, कैफा, यहून्ना, सिकन्दर अर जितने महायाजक के कुण्वे के थे, सारे यरुशलेम नगर म्ह एक जगहां कठटे होए ।

7 वे उन ताहीं विचाळै खड्या करके बुद्धिण लागगे के थमनै यो काम किसके सामर्थ तै अर किसके नाम तै करया सै ।

8 फेर पतरस नै पवित्तर आत्मा तै भरकै उनतै कह्या,

9 “हे माणसां के सरदारो अर यहूदी अगुवों, इस कमजोर माणस गेल्या जो भलाई करी गयी सै, जै आज म्हारै तै उसके बारे म्ह पूछताछ करी जावै सै, के वो किस ढाळ ठीक होया।”

10 तो थम सारे अर सारे इस्राएली आदमी जाण लेवै के यीशु मसीह नासरी के नाम तै जिस ताहीं थमनै क़ूस पै चढ़ाया, अर परमेसवर नै मरे होया म्ह तै जिन्दा करया, यो माणस थारे स्याम्ही भला-चंगा खड्या सै।

11 यीशु मसीह ए वो पत्थर सै जिस ताहीं थम राजमिस्त्रियाँ नै नकार दिया, अर वो सिरे का पत्थर होग्या।

12 “यीशु के अलावा किसे दुसरे नाम म्ह उद्धार कोनी, क्यूँके सुर्ग के तळै माणसां म्ह और कोए दुसरा नाम कोनी दिया गया, सिर्फ यीशु के जरिये हम उद्धार पा सकां सां।”

13 जिव उननै पतरस अर यूहन्ना की हिम्मत देखी, अर न्यू बेरा लाग्या के ये अनपढ़ अर साधारण सा माणस सै, तो अचम्भा करया, फेर उन ताहीं पिच्छाणया के ये यीशु के गेल्या रहे सै।

14 उस माणस ताहीं जो ठीक होया था, पतरस अर यूहन्ना के गेल्या खड़े देखके, वे विरोध म्ह किमे न्ही कह सके।

15 पर उन ताहीं यहूदी अगुवां की सभा तै बाहर जाण का हुकम देकै, वे आप्स म्ह विचार करण लागे,

16 “हम इन माणसां के गेल्या के करा? क्यूँके यरुशलेम नगर के सारे रहणीया नै बेरा पाटरया सै, के इनके जरिये एक मशहूर चमत्कार दिखाया गया सै, अर हम उसके बारे म्ह नाट न्ही सकदे।

17 पर माणसां म्ह इस सुसमाचार का और घणा प्रसार ना हो।”

18 फेर उन ताहीं बुलाया अर चेतावनी देकै न्यू कह्या, “यीशु के नाम पै ना तो वे चर्चा करै अर ना सिखाइयो।”

19 पर पतरस अर यूहन्ना नै उन ताहीं जवाब दिया, “थमे न्याय करो, के यो परमेसवर के धोरे भला सै के हम परमेसवर की बात तै बढ़कै थारी बात मान्नां।

20 क्यूँके यो तो म्हारै तै न्ही हो सकदा के जो हमनै देख्या अर सुण्या सै, वो न्ही कहां।”

21 फेर उननै उन ताहीं और धमकाके छोड़ दिया, क्यूँके आदमियाँ के कारण उन ताहीं सजा देण का कोए मौक्का न्ही मिल्या, इस करके के जो घटना होई थी उसके कारण सारे आदमी परमेसवर की बड़ाई करै थे।

22 वो माणस जो अचम्भे के काम तै ठीक होया था, चाळीस बरस तै घणी उम्र का था।

~~~~~

23 वे छूट के अपणे साथियाँ के धोरे आए, अर जो किमे प्रधान याजकां अर यहूदी अगुवां नै उनतै कह्या था, उन ताहीं सुण्या दिया।

24 न्यू सुणके उननै एक मन होकै टाड़ू आवाज तै परमेसवर तै कह्या, “हे माल्लिक,” तू वोए सै जिसनै सुर्ग अर धरती अर समुन्दर अर जो किमे उन म्ह सै बणाया सै।

25 तन्ने पवित्तर आत्मा के जरिये अपणे सेवक म्हारे पूर्वज दाऊद के मुँह तै कह्या, “गैर यहूदियाँ नै रोळा क्यातै मचाया? अर देश-देश के माणसां नै क्यातै बेकार म्ह बात सोच्ची?”

26 प्रभु अर उसके अभिषिक्त के विरोध म्ह धरती के राजा खड़े होए, अर हाकिम एक सेती कट्टे होए।

27 “क्यूँके साच्चए तेरे सेवक यीशु के विरोध म्ह, जिसका तन्ने अभिषेक करया, हेरोदेस अर पुन्तियुस पिलातुस भी गैर यहूदियाँ अर इस्राएलियाँ के गेल्या इस नगर म्ह कट्टे होए,

28 के जो किमे पैहल्या तै तेरी सामर्थ अर बुद्धि तै ठहरा था वोए करै।

29 इब हे प्रभु, उनकी धमकियाँ नै सुण, अर अपणे दास्तां ताहीं यो वरदान दे के तेरा वचन बड़ी हिम्मत तै सुणावै।

30 ठीक करण कै खात्तर तू अपणा हाथ बढ़ा के चमत्कार अर अनोक्खे काम तेरे पवित्तर सेवक यीशु के नाम तै करे जावै।”

31 जिव उननै प्रार्थना कर ली, तो वा जगहां जित्त वे कट्टे थे काम्बगी, अर वे सारे पवित्तर आत्मा तै भरगे, अर परमेसवर का वचन हिम्मत तै सुणान्दे रहे।

~~~~~

32 विश्वास करण आळा का टोळ एक चित्त अर एक मन का था, उरै ताहीं के कोए भी अपणी सम्पत्ति अपणी न्ही कहवै था, पर सारा किमे साइझै म्ह था।

33 प्रेरित बड़ी सामर्थ तै प्रभु यीशु के जिन्दा होण की गवाही देन्दे रहे, अर उन सारया पै घणा अनुग्रह था।

34 अर उन विश्वासियाँ म्ह कोए भी गरीब कोनी था, क्यूँके जिनके धरै धरती या घर थे, वे उननै बेच-बेचके, बिकी होई चिज्जां का दाम ल्यावे थे, अर उस ताहीं प्रेरितां के पायां म्ह धरै थे।

35 अर जिसी जिसकी जरूरत होवै थी, उसके मुताबिक हरेक ताहीं बांड दिया करै थे।

36 यूसुफ नाम का साइप्रस टापू का एक लेवी था जिसका नाम प्रेरितां नै बरनबास (यानिके उत्साहित करण आळा) धरया था।

37 उसकी किमे धरती थी, जिस ताहीं उसनै बेच्या, अर दाम के रपिये प्रेरितां के पायां म्ह धर दिए।

## 5

~~~~~

1 हनन्याह नाम का एक माणस अर उसकी घरआळी सफीरा नै अपणी कुछ जमीन बेचची।

2 अर उसके दाम म्ह तै कुछ अपणे खात्तर राख लिया, अर या बात उसकी घरआळी भी जाणै थी, उसका एक हिस्सा ल्याके प्रेरितां के पायां म्ह धर दिया।

3 पतरस बोल्या, “हे हनन्याह! शैतान नै तेरे मन म्ह या बात क्यातै घाल्ली के तू पवित्तर आत्मा तै झूठ बोल्ले, अर जमीन के दाम म्ह तै किमे राख लेवै?”

4 के बेचण तै पैहल्या वा जमीन तेरी कोनी थी? अर जिव बिकगी तो उस धन पै तेरा हक कोनी था? तन्नै या बात अपणे मन म्ह क्यातै सोचची? तन्नै माणसां तै न्ही, पर परमेसवर तै झूठ बोल्या सै।”

5 या बात सुणदे हनन्याह जमीन पै गिर पड्या अर जी लिकड़ग्या, सारे सुणण आळे घणे डरगे।

6 फेर जवानां नै उठके उसकी लाश ताहीं कपड़े म्ह लपेटा अर बाहरणै ले जाके गाड़ दिया।

7 करीबन तीन घंटा के पाच्छै उसकी घरआळी, जिसनै बेराए कोनी था जो किमे होया था, भीत्तर आई।

8 फेर पतरस नै उसतै कह्या, “मन्नै बता के थम दोनुआं नै वा जमीन इतनै म्ह बेचची थी?” वा बोल्ली, “हाँ, इतनै ए म्ह।”

9 पतरस नै उसतै कह्या, “या के बात सै के थम दोनुआं नै प्रभु की आत्मा ताहीं परखण खात्तर एक्का करया? लखा, तेरे धणी नै गाड़डण आळे बाहरणै ए खड़े सै, अर तन्नै भी बाहरणै ले जावेंगे।”

10 फेर वा जिब्वे उसके पायां म्ह गिर पड़ी, अर जी लिकड़ग्या, अर जवानां नै भीत्तर आके उस ताहीं मरया पाया, अर बाहरणै ले जाके उसके धणी के धरै ए उस ताहीं भी गाड़ दिया।

11 यरुशलैम की सारी कलीसिया अर इन बात्तां के सारे सुणनिये भोत घणे डरगे।

~~~~~

12 प्रेरितां के जरिये घणे चमत्कार अर अनोक्खे काम आदमियाँ कै बिचाळे दिखाए जावै थे, अर वे सारे एक चित्त होके सुलैमान के बरामदे म्ह कट्टे होया करै थे।

13 पर औरां म्ह तै किसे और की या हिम्मत कोनी होवै थी के उन म्ह जा मिलै, फेर भी आदमी उनकी बड़ाई करै थे।

14 प्रभु म्हे विश्वास करण आळी की गिणती बढती गई भोत घणे विश्वासी प्रभु म्हे आ मिले, लोग-लुगाईयाँ का एक भोत बड़ा टोळ बणग्या ।

15 जो प्रेरित करण लागरे थे, उसकी बजह तै माणस, बिमारां ताहीं सडकां पै ल्या-ल्याकै, खाट-खटोल्यां पै लिटा देवै थे, के जिब पतरस आवै, तो उसकी छाया-ए उन म्हे तै किसे पै पड जावै ।

16 यरुशलेम नगर के लोवै-धोवै के नगरां तै भी घणे माणस बिमारां अर भुंडी ओपरी आत्मायाँ के सताए होया ताहीं चेल्यां कै धोरै ल्या-ल्याकै, कट्टे होवै थे, अर सारे ठीक कर दिए जावै थे ।

### XXXXXXXXXX XX XXXXXXXXXXXX

17 फेर महायाजक अर उसके सारे मित्तर जो सद्कियाँ के पंथ के थे, प्रेरितां तै जळण लागगे ।

18 अर प्रेरितां ताहीं पकड़कै जेळ म्हे बन्द कर दिया ।

19 पर रात नै प्रभु के एक सुगद्दत नै जेळ के किवाड खोल के उन ताहीं बाहरणै ल्याकै कह्या,

20 “जाओ, मन्दर म्हे खडे होकै अनन्त जीवन की सारी बात आदमियाँ ताहीं सुणाओ ।”

21 वे न्यु सुणकै सबेरा होन्दे मन्दर म्हे जाकै उपदेश देण लागगे । फेर महायाजक अर उसके मित्तरां नै आकै यहूदी अगुवां की सभा अर इस्राएलियाँ के सारे बुजुर्गां ताहीं कट्टे करया, अर जेळ म्हे कहवां भेज्या के उन ताहीं ल्याओ ।

22 पर मन्दर के पैहरेदारां नै उडै पोहचकै उन ताहीं जेळ म्हे कोन्या पाया, अर बोहडकै संदेशां दिया,

23 “हमनै जेळ ताहीं घणी चौकसी तै बन्द कर राख्या था, अर पैहरेदारां ताहीं बाहरणै दरवाज्यां पै खडे पायां, पर जिब खोल्या, तो भीत्तर कोए ना मिल्या ।”

24 जिब मन्दर के सरदार अर प्रधान याजकां नै या खबर सुणी, तो वे घबरागे थे, अर वे यो विचार करण लागगे के इन बातों का नतिज्जा के होगा!

25 इतनै म्हे किसे नै आकै उन ताहीं बताया, “देखो, जिन ताहीं थमनै जेळ म्हे बन्द कर राख्या था, वे माणस मन्दर म्हे खडे होकै आदमियाँ नै उपदेश देण लागरे सै ।”

26-27 फेर सरदार, पैहरेदारां के गेल्या ओडै जाकै, प्रेरितां ताहीं यहूदी अगुवां की सभा कै स्याम्ही लीआया, पर हंगे तै न्ही, क्यूँके वे आदमियाँ तै डरै थे के कदे म्हारै पै पत्थर ना बरसा देवै । फेर महायाजक नै उनतै बुझ्झया,

28 “के हमनै थारे ताहीं चिताकै हुकम न्ही दिया था के थम इस नाम तै उपदेश ना दियो? फेरभी, थमनै सारे यरुशलेम नगर ताहीं अपने उपदेश तै भर दिया सै अर उस माणस की हत्या का कसूर थम म्हारै पै लगाणा चाहो सो ।”

29 फेर पतरस अर दुसरे प्रेरितां नै जवाब दिया, “माणसां के हुकम तै बढकै परमेसवर के हुकम का पालन करणा ए म्हारा फर्ज सै ।

30 म्हारै पूर्वजां के परमेसवर नै यीशु ताहीं मुर्दा म्हे तै जिन्दा करया, जिस ताहीं थमनै क्रूस पै लटकाके मार दिया था ।

31 उस्से ताहीं परमेसवर नै प्रभु अर उद्धारकर्ता ठैहराया अर परमेसवर नै मसीह यीशु ताहीं अपने सोळे हाथ कान्ही बैठाया, ताके इस्राएल के माणस पाप करणा छोडे दे, अर अपने पापां खात्तर उन ताहीं माफी मिल सके ।

32 हम इन बातों के गवाह सां अर उस्से तरियां पवित्तर आत्मा भी, जिस ताहीं परमेसवर नै उन ताहीं दिया सै जो उनका हुकम मान्ने सै ।”

33 यहूदी अगुवां की सभा के सारे माणस या बात सुणकै जळगे, अर प्रेरितां ताहीं मारणा चाह्या ।

34 पर गमलीएल नामक एक फरीसी नै जो शास्त्री अर सारे आदमियाँ म्हे आदर-मान राक्खै था, यहूदी अगुवां की सभा म्हे खडे होकै प्रेरितां ताहीं थोड़ी देर खात्तर बाहरणै ले जाण का हुकम दिया ।

35 फेर वो बोल्या, “हे इस्राएलियों, थम जो किमे इन माणसां गैल करणा चाहवो सो, सोच-समझकै करियो ।

36 इन दिनां तै पेहल्या थियूदास भी दावा करै था के मै भी किमे सूं, अर तकरीबन चार सौ माणस उसकै चेल्लें बणगे, पर वो मारया गया, अर उस ताहीं मानण आळे सब लोग बिखरगे अर उनका नामो-निशान भी कोनी रह्या ।

37 उसके पाच्छे, नाम लिखाई के दिनां म्ह गलीलवासी यहूदा आया, अर कई आदमी अपनी ओड़ कर लिये, वो भी मर गया, अर जितने आदमी उसनै मान्नै थे, सारे तित्तर-बितर होगये ।

38 ज्यांतै मै थारे तै कहूँ सूं, इन माणसां तै दूर ए रहो अर इनतै किमे काम ना राक्खो, क्यूँके जै यो धर्म या काम माणसां की ओड़ तै हो फेर तो मिट जावैगा ।

39 पर जै परमेसवर की ओड़ तै सै, तो थम उन ताहीं कदे भी न्ही मिटा सकदे । कदे इसा ना हो के थम परमेसवर तै भी लड़णआळे ठहरो ।” फेर उननै उसकी बात मान ली ।

40 अर प्रेरितां ताहीं बुलाकै छितवाया, अर यो हुकम देके छोड़ दिया के यीशु कै नाम तै दुबारा कोए बात ना करणा ।

41 वे इस बात तै राज्जी होकै यहूदी अगुवां की सभा कै स्याम्ही तै चले गये, के हम यीशु कै नाम कै खात्तर बेईज्जत होण कै जोगगे तो ठहरे ।

42 वे हरेक दिन मन्दर म्ह अर घर-घर म्ह उपदेश करण तै, अर इस बात का सुसमाचार सुणाण तै के यीशु ए मसीह सै न्ही रुके ।

## 6

### ॥॥॥ ॥॥॥॥॥॥ ॥॥ ॥॥॥॥॥॥ ॥॥॥॥॥॥

1 उन दिनां म्ह जिब चेल्यां की गिणती घणी बधण लाग्गी, फेर यूनानी भाषा बोल्लण आळे यहूदी चेल्लें इब्रानी भाषा बोल्लण आळे यहूदी चेल्यां पै विरड्डाण लाग्गे, के हरेक दिन पईसा अर खाणे के मामलै म्ह म्हारी बिधवायाँ की सुध कोनी ली जान्दी ।

2 फेर उन बारहां चेल्यां नै उन विश्वासियाँ ताहीं जो यरुशलेम म्ह थे, अपणे धौरे बुलाकै कह्या, “यो ठीक कोनी के हम परमेसवर का वचन छोड़कै खिलाण-पिलाण की सेवा म्ह रह्यां ।

3 इस करकै, हे विश्वासी भाईयो, अपणे म्ह तै सात बढ़िया नाम्मी माणसां ताहीं जो पवित्र आत्मा अर बुद्धि तै भरे हो, जिनके बारें म्ह सब नै बेरा हो, छाँट ल्यो, के हम उननै इस काम पै ला देवां ।

4 पर हम तो प्रार्थना म्ह अर वचन के प्रचार अर शिक्षा देण की सेवा म्ह लाग्गे रहवांगे ।”

5 या बात सारे टोळ नै आच्छी लाग्गी, अर उननै स्तिफनुस नामक एक माणस ताहीं जो विश्वास अर पवित्र आत्मा तै भरया था, अर फिलिप्पुस, अर प्रूखुरुस, अर नीकानोर, अर तीमोन, अर परमिनास, अर अन्ताकियावासी नीकुलाउस ताहीं जो यहूदी पंथ म्ह आ गया था, छाँट लिया ।

6 इन ताहीं प्रेरितां कै स्याम्ही ल्याए अर उननै प्रार्थना करके उनपै हाथ धरे, ताके वे उस काम नै करै ।

7 परमेसवर का वचन फैलदा गया अर यरुशलेम नगर म्ह चेल्यां की गिणती घणी बढ़दी गई, अर भोट सारे यहूदी याजक भी प्रभु यीशु के सुसमाचार पै विश्वास करके मानणआळे होगे ।

### ॥॥॥॥॥॥ ॥॥ ॥॥॥॥॥॥

8 स्तिफनुस अनुग्रह अर सामर्थ तै भरया-पूरा होके आदमियाँ म्ह बड़े-बड़े अनोक्खे काम अर चमत्कार दिखाया करै था ।

9 फेर वो आराधनालय म्ह तै जो लिवरितिनो की कुह्वावै थी, अर कुरेनी अर सिकन्दरिया अर किलिकिया अर आसिया परदेस के आदमियाँ म्ह तै कई माणस उठके स्तिफनुस तै बहसण लाग्गे ।

10 पर उस ज्ञान अर उस पवित्र आत्मा का जिसतै वो बात करै था, वे सामना न्ही कर सके ।

11 इसपै उननै कई आदमियाँ ताहीं उकसाया जो कहण लाग्गे, “हमनै इस ताहीं मूसा नबी अर परमेसवर कै बिरोध म्ह बुराई की बात कहन्दे होए सुणया सै।”

12 उननै स्तिफनुस के बिरुध माणसां, यहूदी अगुवां अर शास्त्रियाँ ताहीं उकसाया अर आकै उस ताहीं पकड़कै यहूदी अगुवां की सभा कै स्याम्ही ले गये।

13 अर उननै झूठे गवाह खडे करे, जिननै स्तिफनुस पै यो इलजाम लगाकै, कहा, “यो माणस इस पवित्र जगहाँ अर मूसा के नियम-कायदे कै बिरोध म्ह बुराई करणा न्ही छोड़दा।

14 क्यूँके हमनै उस ताहीं न्यू कहन्दे सुणया सै के योए यीशु नासरी\* इस मन्दर नै गेर देवैगा, अर उन रिवाज्जां नै बदल देवैगा जो मूसा नबी नै म्हारै ताहीं सौंपी सै।”

15 फेर सारे आदमियाँ नै जो यहूदी अगुवां की सभा म्ह बेट्टे थे, उसपै निगांह गड़ाई तो उसका मुँह सुगंदूत जिसा दिख्या।

## 7

\*\*\*\*\*

1 फेर महायाजक नै स्तिफनुस तै बुझिया, “के यो इलजाम सच सै?”

2 उसनै कहा, “हे भाईयो, अर बुजुर्गों सुणो। म्हारा पूर्वज अब्राहम हारान नगर म्ह बसण तै पैहल्या जिब वो मेसोपोटामिया परदेस म्ह था, तो तेजोमय परमेसवर नै उस ताहीं दर्शन दिया,

3 अर उसतै बोल्या, ‘तू अपने देश अर अपने कुण्वे म्ह तै लिकड़के उस देश म्ह जा, जिस ताहीं मै तन्नै दिखाऊंगा।’”

4 फेर अब्राहम कसदियो\* के देश तै लिकड़के हारान नगर म्ह जा बस्या। उसके पिता की मौत कै पाच्छे, परमेसवर नै उस ताहीं ओड़ै तै इस देश म्ह ल्याकै बसाया जिसम्ह इब हम बसां सां,

5 अर उस ताहीं कुछ भी विरासत न्ही दी, बल्के पै धरण भर की भी उस म्ह जगहाँ कोनी देई, पर परमेसवर नै वादा करया, के मै यो देश तेरे अर तेरे बाद तेरे वंश कै हाथ कर दियुंगा, हालाकि उस बखत उसके कोए बेट्टा कोनी था।

6 अर परमेसवर नै यो भी कहा, “वे लोग उननै गुलाम बना लेंगे, अर चार सौ साल ताहीं उनकै गैल भुंडा बरताव करैगें।”

7 फेर परमेसवर नै यो भी कहा, “के जिस जात के वे गुलाम होवेंगें, उस ताहीं मै सजा देऊंगा, अर इसके बाद वे लिकड़के इस्से देश म्ह मेरी भगति करैगें।”

8 अर परमेसवर नै अब्राहम के गैल खतने का करार करया, जिब अब्राहम के बेट्टे इसहाक का जन्म होया, तो आंटवै दिन उसका खतना करया गया, अर इसहाक तै याकूब अर याकूब तै बारहां कुलपति पैदा होए।

9 “कुलपतियाँ नै अपने भाई यूसुफ तै जळण करके उस ताहीं मिस्र देश जाण आळा ताहीं बेच्या। पर परमेसवर उसके गेल्या था,

10 अर परमेसवर नै यूसुफ ताहीं उसके सारे क्लेशां तै छुड़कै मिस्र देश कै राजा फिरौन की निगांह म्ह अनुग्रह अर बुद्धि दी, अर फिरौन नै उस ताहीं मिस्र देश पै अर अपने सारे घर पै हाकिम बना दिया।

11 “जिब यूसुफ मिस्र देश का हाकिम था, तो सारे मिस्र देश अर कनान देश म्ह अकाळ पड़ग्या, जिसतै हरेक जगहाँ हाहाकार माचग्या, अर म्हारे पूर्वजां ताहीं नाज कोनी मिलै था।

12 पर याकूब नै न्यू सुणकै के मिस्र देश म्ह नाज सै, म्हारे पूर्वजां ताहीं नाज मोल लेण खात्तर पैहली बार भेज्या।

13 जिब वे दुसरी बार नाज मोल लेण खात्तर गये, तो यूसुफ नै खुद ताहीं अपने भाईयाँ पै जाहिर करया, अर यूसुफ के परिवार के बारे म्ह फिरौन नै बेरा पाटग्या।

\* 6:14 6:14 नासरत का यीशु

\* 7:4 7:4 यह वो जगहाँ सै जहाँ बाल्दे लोग रहते थे और यो मेसोपोटामिया का दुसरा नाम भी सै।

14 फेर यूसुफ नै अपने बाप याकूब अर अपने साबतै कुणवे ताहीं, जो पचत्तर माणस थे, बुलवा भेज्या ।

15 फेर याकूब मिस्र देश गया, अर कुछ साल्लां बाद ओडैए वो अर म्हारे पूर्वज मरग्ये ।

16 उनकी लाश शकेम नगर म्ह पहुँचकै उस कबर म्ह धरी गई, जिस ताहीं अब्राहम नै चाँदी देकै शकेम नगर म्ह हमोर की ऊलाद तै मोल लिया था ।”

17 “पर जब उस वादा के पूरे होण का बखत लोवै आया जो परमेसवर नै अब्राहम तै करया था, तो मिस्र देश म्ह वे आदमी बढ़ग्ये अर घणे होग्ये ।

18 फेर मिस्र देश म्ह दुसरा राजा होया जो यूसुफ ताहीं कोनी जाणै था ।

19 उसनै म्हारे जाति भाईयाँ तै हेरा-फेरी करकै म्हारे पूर्वजां कै गेल्या उरै ताहीं भुंदा बीवार करया, के अपने माँ-बाप नै अपने बाळकां ताहीं बगाणे पड़गे, के एक भी बाळक जिन्दा ना रहवैं ।

20 “उस बखत मूसा नबी पैदा होया । वो परमेसवर की निगांह म्ह घणा सुथरा था । वो तीन महिन्ने ताहीं अपने बाप के घरां लुहूको कै पाळया गया ।

21 जब उसके परिवार आळे उस ताहीं और न्ही लहूको सके, तो उननै मूसा ताहीं छोड़णा पड्या, फेर फिरौन की बेटी नै उस ताहीं ठा लिया, अर अपना बेटी करकै पाळया ।

22 मूसा नबी नै मिस्र देश की सारी विद्या पढ़ाई गई, अर वो बोलण म्ह अर काम करण म्ह, दोनुआ म्ह सामर्थी था ।”

23 “जब मूसा नबी चाळीस साल का होया, तो उसके मन म्ह आया के मै अपने इस्राएली भाईयाँ तै मिलूं ।

24 उसनै एक इस्राएली माणस पै जुल्म होन्दे देखकै उस ताहीं बचाया, अर उस मिस्री आदमी ताहीं मारकै सताए होए का बदला लिया ।

25 मूसा नै सोच्या के उसके भाई-बन्धु जाण जावेंगे के उन ताहीं गुलामी तै छुटकारा दुआण खात्तर परमेसवर उसका इस्तमाल करण लाग रह्या सै, पर वे इस ताहीं समझ न्ही पाये ।

26 दुसरे दिन जब वे आप्स म्ह लड़े थे, तो वो उड़ै तै आण लिकड़या, अर न्यू कहकै उननै मेल करण कै खात्तर समझाया, हे भले माणसों, थम तो भाई-भाई सो, एक-दुसरे पै क्यातै जुल्म करो सो?”

27 “पर जो अपने पड़ोसी पै जुल्म करै था, उसनै उस ताहीं न्यू कहकै धक्का दिया, तेरे ताहीं किसनै म्हारै पै हाकिम अर न्यायाधीश ठहराया सै?”

28 के जिस ढाळ तै तन्नै काल उस मिस्री आदमी ताहीं मार दिया मन्नै भी मार देणा चाहवै सै?”

29 या बात सुणकै मूसा नबी डरकै भाज्या अर मिधान देश म्ह परदेशी होकै रहण लागया, अर ओडै उसके दो बेट्टे पैदा होए ।”

30 “जब मूसा ताहीं ओडै रहन्दे पूरे चाळीस साल बीतगे, तो परमेसवर नै एक सुगंदूत के रूप म्ह सीनै पहाड़ के बण म्ह उस ताहीं बळदी होई झाड़ी की ज्वाला म्ह दर्शन दिया ।

31 मूसा नबी नै वो बळदी होई झाड़ी का दर्शन देखकै हैरानी होई, अर जब देखण खात्तर लोवै गया, तो प्रभु की या वाणी सुणाई दी,

32 मै तेरे पूर्वज, अब्राहम, इसहाक, याकूब का परमेसवर सूँ, फेर मूसा नबी डर के मारे काम्बग्या, उरै ताहीं के उसकी देखण की हिम्मत भी कोनी होई ।”

33 “फेर प्रभु नै मूसा नबी तै कह्या, ‘अपणे पायां तै जूती उत्तर ले, क्यूँके जिस जगहां तू खड्या सै, वा पवित्र धरती सै ।

34 मन्नै साच्ये अपने आदमियाँ की जो मिस्र देश म्ह सै, भुन्डी हालत देखी सै, अर उनकी आह अर उनका रोणा सुण्या सै, ज्यातै उन ताहीं छोड़ण के खात्तर उतरया सूँ । इब आ, मै तन्नै मिस्र देश भेज्जूंगा ।”

35 “जिस मूसा नबी ताहीं उननै न्यू कहकै नकारा दिया था, तेरे ताहीं किसनै म्हारै पै हाकिम अर न्यायाधीश ठहराया सै?” उस्से ताहीं परमेसवर नै हाकिम अर छुड़ाण आळा ठहराकै उस सुर्गदूत के जरिये जिसनै उस ताहीं झाड़ी म्ह दर्शन दिया था, भेज्या।

36 योए माणस मिस्र देश अर लाल समुन्दर अर जंगळ म्ह चाळीस साल ताहीं अनोक्खे काम अर चमत्कार दिखा-दिखाकै उन ताहीं लिकाड़ ल्याया।”

37 यो वोए मूसा नबी सै, जिसनै इस्राएल के माणसां तै कह्या, “परमेसवर थारे भाईयाँ म्ह तै थारे खात्तर मेरै जिसा एक नबी ठावैगा।

38 यो वोए सै, जिसनै जंगळ म्ह इस्राएली मण्डळी कै बिचाळै उस सुर्गदूत के साथ सीनै पहाड़ पै उसतै बात करी, अर म्हारे पूर्वजां कै गेल्या था, उस्से ताहीं जिन्दा वचन मिल्या ताके म्हारै तक पोहोचावै।”

39 पर म्हारे पूर्वजां नै उसकी मानणी कोनी चाह्यी, बल्के उस ताहीं हटाकै अपणे मन मिस्र देश की ओड़ पलटे,

40 अर मूसा नबी के भाई हारुन तै, कह्या, म्हारै खात्तर इसा देवता बणा, जो म्हारै आगै-आगै चाल्लै, क्यूँके यो मूसा नबी जो हमनै मिस्र देश तै लिकाड़ ल्याया, हमनै न्ही बेरा के उसके के होया?

41 उन दिनां म्ह उननै एक बाछड़े की मूर्ति बणाकै उसके आगै बलि चढ़ाई, अर अपणे हाथ्यां तै बणाई होई मूर्ति तै मगन होण लागे।

42 इस खात्तर परमेसवर नै मुँह मोड़कै उन ताहीं छोड़ दिया, के अकास के सूरज चाँद सितारां ताहीं परमेसवर मानकै पुजै, जिसा नबियाँ की किताब म्ह लिख्या सै, “हे इस्राएल के घराने, के थम जंगळ म्ह चाळीस साल ताहीं पशुबलि अर अन्नबलि मेरै ताहीं ए चढ़ान्दे रहे?”

43 “थम उस तम्बू ताहीं जिस म्ह मोलेक देवता की मूर्ति अर अपणे रिफान देवता, के तारे नै लिये फिरे, यानिके उन मूरतां ताहीं जिन ताहीं थमनै आराधना करण कै खात्तर बणाया था। इस करकै मै थारे ताहीं बेबीलोन देश तै परली ओड़ ले जाकै बसाऊंगा।”

44 “मिलापआळे तम्बू की जंगल-बियाबान म्ह म्हारै पूर्वजां कै बिचाळै था, जिसा उसनै ठहराया जिसनै मूसा नबी तै कह्या, ‘जो रूप तन्नै देख्या सै, उसके मुताबिक इसनै बणा।’

45 उस्से तम्बू नै म्हारे पूर्वज पाच्छले बखत तै पाकै यहोशू के गेल्या उरै लियाये, जिस बखत के उननै उन दुसरी जात्तां पै हक पाया, जिन ताहीं परमेसवर नै म्हारै पूर्वजां कै स्याम्ही तै लिकाड़ दिया, अर वो तम्बू राजा दाऊद के बखत ताहीं रहया।

46 दाऊद पै परमेसवर नै अनुग्रह करया, राजा दाऊद नै याकूब के परमेसवर कै खात्तर रहण की जगहां बणाण की बिनती करी।

47 पर उसके बेटटे राजा सुलैमान नै उसके खात्तर घर बणाया।”

48 पर परमप्रधान हाथ के बणाए होए घरां म्ह कोनी रहन्दा, जिसा के यशायाह नबी की किताब म्ह कह्या,

49 “परमेसवर कहवै सै, सुर्ग मेरा सिंहासन अर धरती मेरी पायां तळै की पीढ़ी सै, मेरै खात्तर थम किस ढाळ का घर बणाओगे? अर मेरै आराम कि कौण-सी जगहां होवैगी?”

50 के ये सारी चीज मेरे जरिये न्ही बणाई गई सै?

51 “हे जिद्दी, अर मन अर कान के खतनारहित आदमियो, थम सारी हाण पवित्तर आत्मा का बिरोध करो सो। जिसा थारे पूर्वज करै थे, उस्से तरियां ए थम भी करो सो।

52 के कोए इसा भी नबी था, जिस ताहीं थारे पूर्वजां नै न्ही सताया हो? उननै तो उस ताहीं भी मार दिया, जिननै भोत पैहले ए तै उस मसीहा के आण की मुनादी कर दी थी, जिस ताहीं इब थमनै धोक्खे तै पकड़वा दिया अर मार दिया।

53 थमनै सुर्गदूतां कै जरिये ठहराये होए नियम-कायदे तो पाए, पर उसका पालन कोनी करया।”



54 ये बात सुणकै यहूदी अगुवें छो म्ह भरगे अर स्तिफनुस पै दाँत पिस्सन लागगे ।

55 पर उसनै पवित्तर आत्मा तै पूरी तरियां भरकै सुर्ग की ओड़ देख्या अर परमेसवर की महिमा अर यीशु ताहीं परमेसवर के सोळी ओड़ खडचा देखकै

56 कह्या, “देखवो, मै सुर्ग नै खुल्या होया, अर माणस के बेट्टे ताहीं परमेसवर के सोळी ओड़ खडचा देखु सूं ।”

57 फेर ये बात सुणते ए सुणण आळा नै चीखते होए अपने कान्ना पै हाथ रख लिये, अर वे छो म्ह एक साथ उसपै टूट पड़े,

58 अर स्तिफनुस ताहीं यरुशलेम नगर के बाहरणै लिकाइकै उसपै पत्थर बरसाण लागगे । गवाहां नै अपने लत्ते शाऊल नामक एक जवान के पायां के धौरै उतारकै धर दिए ।

59 वे स्तिफनुस पै पत्थर बरसान्दे रहे, अर वो न्यू कहकै प्रार्थना करवा रह्या, “हे प्रभु यीशु, मेरी आत्मा ताहीं अपनाले ।”

60 फेर गोड्डे टेककै टाइडू आवाज म्ह रुक्का मारया, “हे प्रभु, यो पाप उनपै मतना ला ।” अर न्यू कह के उसनै अपने प्राण दे दिए ।

## 8

### प्रेरितों के काम 8:1-13

1 शाऊल उसके मारण म्ह सहमत था । उससे दिन यरुशलेम नगर की कलीसिया म्ह घणा दंगा शरु होगया अर प्रेरितां नै छोड़कै सारे के सारे यहूदिया अर सामरिया परदेस म्ह खिंड-मिंड होगये ।

2 कुछ परमेसवर भगतां नै स्तिफनुस ताहीं कबर म्ह धरया अर उसके खात्तर घणा बिलाप करया ।

3 शाऊल कलीसिया नै सताण लागरया था, अर घर-घर म्ह बड़कै माणसां अर लुगाईयां ताहीं घिसड़ा-घिसड़ा के जेळ म्ह गरे था ।

### प्रेरितों के काम 8:14-25

4 जो विश्वासी खिंड-मिन्ड होए थे, वे सुसमाचार सुणान्दे होए हान्डे,

5 अर फिलिप्पुस सामरिया परदेस के एक नगर म्ह जाकै माणसां म्ह मसीह का प्रचार करण लागया ।

6 जो बात फिलिप्पुस नै कही उन ताहीं आदमियां नै सुणकै अर जो चमत्कार वो दिखावै था उन ताहीं देख देखकै, एक चित्त होके मन लगाया ।

7 क्यूके घणखरयां म्ह तै भुंडी ओपरी आत्मा टाइडू आवाज म्ह किल्की मारदी होई लिकइग्यी, अर घणखरे लकवे के बीमार अर लंगडे भी ठीक करे गये,

8 अर उस नगर म्ह घणी खुशी मनाई गई ।

### प्रेरितों के काम 8:26-40

9 उस नगर म्ह शमौन नाम का एक माणस था, जो जादू-टोणा करकै सामरिया परदेस के आदमियां नै हैरान करवा अर खुद ताहीं एक बड़ड़ा माणस बतावै था ।

10 छोट्या तै लेकै बड़डयां ताहीं सारे उसका आदर करकै कहवै थे, “यो माणस परमेसवर की वा शक्ति से, जो महान् कुह्वावै से ।”

11 उसनै घणे दिनां तै उन ताहीं अपने जादू के काम्मां तै हैरान कर राख्या था, ज्यांतै वे उसकी घणी मान्ने थे ।

12 पर जिब माणसां नै परमेसवर के राज्य अर यीशु मसीह के नाम का सुसमाचार, फिलिप्पुस के संदेश म्ह सुणया, तो सारे माणसां अर लुगाईयां नै विश्वास करया अर सब नै बपतिस्मा ले लिया ।

13 फेर शमौन नै खुद भी फिलिप्पुस के संदेश का विश्वास करया अर बपतिस्मा लेकै उसकै गेल्या रहण लागया । वो चमत्कार अर बड़े-बड़े सामर्थ के काम होन्दे देखकै हैरान होवै था ।

### प्रेरितों के काम 8:41-43

14 जिब प्रेरितां नै जो यरुशलेम नगर म्ह थे, सुण्या के सामरिया परदेस के माणसां नै परमेसवर का वचन मान लिया सै तो पतरस अर यूहन्ना ताहीं उनकै धोरै भेज्या ।

15 उननै ओइ जाकै उनकै खात्तर प्रार्थना करी के पवित्तर आत्मा पावै ।

16 क्यूँके वो इब ताहीं इन म्ह तै किसे पै भी कोनी उतरया था, उननै तो सिर्फ प्रभु यीशु कै नाम तै बपतिस्मा लिया था ।

17 फेर प्रेरितां नै उनपै हाथ धरे अर उननै पवित्तर आत्मा पाया ।

18 जिब शमौन नै देख्या के प्रेरितां कै हाथ धरण तै पवित्तर आत्मा दिया जावै सै, तो उनकै धोरै रपिये ल्याकै कह्या,

19 “या शक्ति मन्ने भी द्यो, के जिस किसे पै हाथ धरूँ वो पवित्तर आत्मा पावै ।”

20 पतरस नै उसतै कहा, “तेरे रपिये तेरे गेल्या नाश होज्या, क्यूँके तन्नै परमेसवर का दान रपियाँ तै मोल लेण का विचार करया ।

21 इस बात म्ह ना तेरा हिस्सा सै, ना हक, क्यूँके तेरा मन परमेसवर कै आगै सच्चा कोनी ।

22 इस करके अपणी इस बुरी सोच नै छोड़कै प्रभु तै प्रार्थना कर, हो सकै सै वो तेरे मन का यो बुरा विचार माफ करदे ।

23 क्यूँके मै देखूँ सूँ के तू कड़वाहट तै भरया सै अर पाप के चुंगल म्ह फँसा सै ।”

24 शमौन नै जवाब दिया, “थम मेरै खात्तर प्रभु तै प्रार्थना करो के जो बात थमनै कही, उन म्ह तै कोए भी मेरै पै न्ही आवै ।”

25 आखर म्ह वे गवाही देकै प्रभु यीशु का वचन सुणाकै यरुशलेम नगर नै बोहड़गे, अर सामरिया के घणखरे गाम्मां म्ह सुसमाचार सुणान्दे गये ।

?????????? ?? ??? ??? ?? ???????

26 फेर प्रभु के एक सुगंदूत नै फिलिप्पुस तै कहा, “उठ अर दक्षिण की ओइ उस राह पै जा, जो यरुशलेम नगर तै गाज़ा नगर म्ह जावै सै ।” यो बियाबान राह सै ।

27 वो उठकै चल दिया, अर देखो, कूश देश का एक माणस आण लागरया था जो खोजा (किन्नर) अर कूशियों की राणी कन्दाके का मंत्री अर खजांची था । वो आराधना करण खात्तर यरुशलेम नगर म्ह आया था ।

28 वो अपणे रथ पै बेटचा होया था, अर यशायाह नबी की किताब पढ़दा होया बोहड़ण लागरया था ।

29 फेर पवित्तर आत्मा नै फिलिप्पुस ताहीं कहा, “लोवै जाकै इस रथ कै गेल्या हो ले ।”

30 फिलिप्पुस दौड़ के रथ के धोरै पोहचा अर उस ताहीं यशायाह नबी की किताब पढ़ते होए सुण्या, अर बुद्धिया, “तू जो पढ़े सै, के उसनै समझै भी सै?”

31 वो बोल्या, “जिब ताहीं कोए मेरै ताहीं न्ही समझावै तो मै किस ढाळ समझूँ ।” अर फिलिप्पुस तै बिनती करी के वो रथ पै चढ़कै उसकै धोरै बेट्टै ।

32 पवित्तर ग्रन्थ का जो पाठ वो पढ़ै था, वो यो था: “वो भेड़ की ढाळ मारण खात्तर पोहचाया गया, अर जिस तरियां मेम्ना अपणे ऊन काट्टण आळा कै स्याम्ही बोल-बाल्ला रहवै सै, उससे तरियां ए उसनै भी अपणा मुँह कोनी खोल्या ।”

33 “उस ताहीं अपमानित करया गया अर उस ताहीं कोए न्याय न्ही मिल्या । उसकै बखत के माणसां का ब्यौरा कौण देवैगा? क्यूँके धरती तै उसका प्राण टा लिया जावै सै ।”

34 इसपै खोजे (किन्नर) नै फिलिप्पुस तै बुद्धिया, “मै तेरे तै बिनती करूँ सूँ, न्यू बता के नबी यो किसकै बारै म्ह कहवै सै, अपणे या किसे दुसरे के बारै म्ह?”

35 फेर फिलिप्पुस नै बताणा शरु करया, अर इस्से पवित्तर ग्रन्थ तै शरु करके उस ताहीं यीशु का सुसमाचार सुणाया ।

36 राह म्ह चाल्दे-चाल्दे वे किसे तालाब कै धोरै पोहचे । फेर खोजे नै कहा, “लखा उरै पाणी सै, इब मन्ने बपतिस्मा लेण म्ह के रोक सै ।”



37 फिलिप्पुस बोल्या, “जै तू पूरे मन तै विश्वास करै से तो ले सकै सै।” उसनै जवाब दिया, “मै विश्वास करूँ सूँ के यीशु मसीह परमेसवर का बेटा सै।”

38 फेर उसनै रथ खड्या करण का हुकम दिया, अर फिलिप्पुस अर खोजा (किन्नर) दोन्नु तालाब म्ह बडगे, अर उसनै खोजा (किन्नर) ताहीं बपतिस्मा दिया।

39 जिब वे पाणी म्ह तै लिकड़के ऊपरान आये, तो प्रभु का आत्मा फिलिप्पुस ताहीं ठा लेग्या, अर खोजे नै उस ताहीं दुबारा न्ही देख्या, अर वो खुश था क्यूँके परमेसवर नै उस ताहीं बचा लिया सै।

40 फिलिप्पुस अशदोद नगर म्ह आ लिकड़्या, अर जिब ताहीं कैसरिया नगर म्ह न्ही पोंहच्या, तब तक नगर-नगर सुसमाचार सुणान्दा गया।

## 9

### शाऊल जो इब ताहीं प्रभु यीशु के चेल्यां ताहीं धमकाण अर मारण की धुन म्ह था, महायाजक के धोरै गया

1 शाऊल जो इब ताहीं प्रभु यीशु के चेल्यां ताहीं धमकाण अर मारण की धुन म्ह था, महायाजक के धोरै गया

2 अर उसतै दमिश्क नगर के आराधनालयों के नाम पै इस बाबत म्ह चिट्ठियाँ माँगी के, के चाहे माणस हो, चाहे लुगाई हो, जिन नै वो इस पंथ म्ह पावै उन ताहीं बाँधके यरुशलेम नगर लियावै।

3 पर चाल्दे-चाल्दे जिब शाऊल अर उसके साथी दमिश्क नगर के लोवै पोहच्ये, तो चाणचक अकास तै उसके चौगरदे नै चाँदणा चमक्या,

4 अर वो धरती पै पड़ग्या अर परमेसवर का यो शब्द सुण्या, “हे शाऊल, हे शाऊल, तू मन्नै क्यातै सतावै सै?”

5 उसनै बुझ्झया, “हे प्रभु, तू कौण सै?” उसनै कह्या, “मै यीशु सूँ, जिस ताहीं तू सतावै सै।

6 पर इब उठके नगर म्ह जा, अर जो तन्नै करणा सै वो तेरे तै कह्या जावैगा।”

7 जो माणस उसके गेल्या थे, वे हैरान रहग्ये, क्यूँके बोल तो सुणै थे पर किसे ताहीं देखै कोनी थे।

8 फेर शाऊल धरती पै तै उठ्या, पर जिब आँख खोल्ली तो उस ताहीं किमे कोनी दिख्या, अर वे उसका हाथ पकड़के दमिश्क नगर म्ह ले गये।

9 वो तीन दिन ताहीं कोनी देख सक्या, अर ना खाया अर ना पिया।

10 दमिश्क नगर म्ह हनन्याह नामक एक चेल्ला था, उसतै प्रभु यीशु नै दर्शन म्ह कह्या, “हे हनन्याह!” वो बोल्या, “हाँ, प्रभु!”

11 फेर प्रभु नै उसतै कह्या, “उठके उस गळी म्ह चल्या जा जो ‘सीध्धी’ कुह्यावै सै, अर यहूदा के घर म्ह शाऊल नामक एक तरसुसवासी नै बुझ, क्यूँके देख, वो प्रार्थना करण लागरया सै,

12 अर उसनै दर्शन म्ह हनन्याह नामक एक माणस ताहीं भीत्तर आन्दे अर अपणे उप्पर हाथ धरदे देख्या सै, ताके दुबारा आँखां की रोशनी पावै।”

13 हनन्याह नै जवाब दिया, “हे प्रभु, मन्नै इस माणस के बारे म्ह घणाए तै सुण्या सै के इसनै यरुशलेम नगर म्ह तेरे आदमियाँ गेल्या बड्डी-बड्डी बुराई करी सै,

14 अर उरै भी इस ताहीं प्रधान याजकां की ओड़ तै हक मिल्या सै के जो माणस तेरे म्ह विश्वास राखै सै, उन सारया नै बाँधके यरुशलेम ले जा।”

15 पर प्रभु नै उसतै कह्या, “तू चल्या जा, क्यूँके वो तो गैर यहूदी अर राजयां अर इस्राएलियों के स्याम्ही मेरा नाम का प्रचार करण के खात्तर चुण्या होया पात्र सै।

16 अर मै उसनै बताऊँगा, के मेरै बारें बताण के खात्तर उसनै किसा-किसा दुख टाणा पडैगा।”

17 फेर हनन्याह उठके उस घर म्ह गया जँडे शाऊल रुक्या था, अर उसपै अपना हाथ धरके कह्या, “हे भाई शाऊल, प्रभु, यानिके यीशु, जो उस राह म्ह, जिसतै तू आया तेरे ताहीं दिख्या था, उससे नै मेरै ताहीं भेज्या सै के तू दुबारा आँखां की रोशनी पावै अर पवित्र आत्मा तै भरया-पूरा हो जावै।”

18 अर जिब्वे उसकी आँखां तै छिल्के-से पड़े अर वो देखण लाग्या, अर उठके बपतिस्मा लिया,

XXXXXXXX XXX XXX XXXX XX XXXXXX

19 फेर खाणा खाकै हिम्मत पाई । शाऊल कई दिन उन चेल्याँ के गेल्या रहया जो दमिश्क नगर म्ह थे ।

20 अर वो जिब्बे दमिश्क नगर के आराधनालयौं म्ह यीशु का प्रचार करण लागया, के वो परमेसवर का बेट्टा सै ।

21 सारे सुणण आळे हैरान होकै कहण लागगे, “के यो वोए माणस न्ही सै जो यरुशलेम नगर म्ह उन ताहीं जो यीशु मसीह के विश्वासी थे, उनका नाश करया करै था, अर उरै भी इस्से खात्तर आया था, के उननै बाँधकै प्रधान याजकाँ के धोरै ले जावै?”

22 पर शाऊल और भी सामर्थी होंदा गया, अर इस बात का सबूत दे-देकै, के मसीह यीशु-ए सै, दमिश्क नगर के रहणीये यहूदियाँ का मुँह बन्द करदा रहया ।

23 जिब शाऊल नै ओड़ै रहन्दे होए भोत दिन बीतगे, तो यहूदियाँ नै मिलकै उस ताहीं मारण की साजस रची ।

24 पर उनकी साजिस का शाऊल नै बेरा पाटगया । वे तो उसनै मारण खात्तर रात-दिन फाटकाँ पै घात म्ह लागगे रहवै थे ।

25 पर रात नै उसके चेल्याँ नै उस ताहीं टोकरे म्ह बिठाया, अर दमिश्क नगर की चारदीवारी पै ते लटकाकै उतार दिया ।

XXXXXXXX XXX XXX XXXX

26 यरुशलेम नगर म्ह पोहचके शाऊल नै चेल्याँ के गेल्या मिल जाण की कोशिश करी, पर सारे उसतै डरै थे, क्यूँके उननै विश्वास कौनी होवै था, के वो भी चेल्ला सै ।

27 पर बरनबास नै उस ताहीं अपणे गेल्या प्रेरिताँ के धोरै ले जाकै उन ताहीं बताया के इसनै किस ढाळ तै राह म्ह प्रभु यीशु ताहीं देख्या, अर यीशु नै इसतै बात करी, फेर दमिश्क नगर म्ह इसनै किस तरियाँ हिम्मत दिखाके यीशु के नाम का प्रचार करया ।

28 वो उनके गेल्या यरुशलेम नगर म्ह आन्दा-जान्दा रहया

29 अर बेधड़क होकै प्रभु का नाम तै प्रचार करै था, अर यूनानी भाषा बोल्लण आळे यहूदियाँ के गेल्या बोलचाल अर बहस करै था, पर वे उसनै मारण की कोशिश करण लागगे ।

30 न्यू जाणके भाई उस ताहीं कैसरिया नगर लिआये, अर तरसुस नै भेज दिया ।

31 इस तरियाँ सारे यहूदिया परदेस, अर गलील परदेस, अर सामरिया परदेस की कलीसिया नै चैन मिल्या, अर उसकी बढोतरी होन्दी गई, अर वा प्रभु के भय अर पवित्र आत्मा की शान्ति म्ह चाल्दी अर बढदी गई ।

XXXXXXXX XXX XX XXXX XXX XXX XXXX

32 फेर इसा होया के पतरस हरक जगहाँ हाडदा होया, उन पवित्र आदमियाँ के धोरै भी पोंहच्या जो लुद्दा नगर म्ह रहवै थे ।

33 ओड़ै उसनै एनियास नामक लकवे का रोगगी एक माणस मिल्या, जो आठ साल तै खाट पै पड्या था ।

34 पतरस नै उसतै कह्या, “हे एनियास! यीशु मसीह तन्नै ठीक करै सै । उठ, अपना बिच्छाणा ठा ।” फेर वो जिब्बे उठ खड्या होया ।

35 फेर लुद्दा नगर अर शारोन के सारे रहणीये उस ताहीं देखकै प्रभु की ओड़ फिरे ।

36 याफा नगर म्ह तबीता यानिके दोरकास नाम की एक विश्वासण रहवै थी । वा घणे भले-भले काम अर दान करया करै थी ।

37 उन्हे दिनाँ म्ह जिब पतरस लुद्दा नगर म्ह था, तो वा बीमार होकै मरगयी, अर उननै उस ताहीं नुह्वाकै चुवारै पै धर लिया ।

38 लुद्दा नगर याफा नगर के धोरै था, चेल्याँ नै न्यू सुणके पतरस ओड़ै सै, दो माणस भेजके उसतै बिनती करी, “म्हारै धोरै आण म्ह वार ना लावै ।”

39 फेर पतरस उठके उसके गेल्या हो लिया, अर जब वो पोंहच्या तो वे उसने उस चौबारे म्ह ले गये। सारी बिधवां रोंदी होई उसके धौरे आण खड़ी होई, अर जो कुड़ते अर लत्ते दोरकास नै उनके गेल्या रहंदे होए बणाए थे, दिखाण लागगी।

40 फेर पतरस नै सारया ताहीं बाहरणै कर दिया, अर गोड्डे टेक के प्रार्थना करी अर लाश की ओड़ लखाके कह्या, “हे तबीता, उठ!” फेर उसने अपनी आँख खोल दी, अर पतरस ताहीं देखके उठ बेठ्ठी।

41 उसने हाथ बढ़ाके उस ताहीं ठाया, अर पवित्र आदमी अर बिधवायां ताहीं बुलाके उस ताहीं जिन्दा दिखा दिया।

42 या बात साब्वत याफा नगर म्ह फैलगयी, अर घणखरयां नै प्रभु यीशु पै विश्वास करया।

43 अर पतरस याफा नगर म्ह शमौन नामक किसे चमड़े का धन्धा करणीये के उरै घणे दिनां ताहीं रहया।

## 10

### XXXXXXXXXX XX XXXX XXXXX XXXXXXXX

1 केसरिया नगर म्ह कुरनेलियुस नाम का एक माणस था, जो इतालियानी नामक पलटन का सुवेदार था।

2 वो भगत था, अर अपने साब्वे कुण्वे सुधा परमेसवर तै डरै था, अर गरीब यहूदी आदमियाँ ताहीं घणा दान देवै था, अर बराबर परमेसवर की प्रार्थना करै था।

3 उसने दिन के बजे के लोवै दर्शन म्ह साफ तौर तै देख्या के परमेसवर का एक सुर्गदूत उसके धौरे भीत्तर आके कहवै सै, “हे कुरनेलियुस!”

4 कुरनेलियुस नै उस ताहीं गौर तै देख्या अर डरके कह्या, “हे प्रभु, के हुकम सै?” उसने उसतै कह्या, “तेरी प्रार्थनाएँ अर तेरे दान याद के खात्तर परमेसवर के स्याम्ही पोहचे सै,

5 अर याफा नगर म्ह माणस भेजके शमौन नै, जो पतरस कुह्वावै सै, बुलवा ले।

6 वो शमौन, चमड़े का धन्धा करण आळे के उरै मेहमान सै, जिसका घर समुन्दर के किनारे सै।”

7 जब वो सुर्गदूत जिसने उसतै बात करी थी चल्या गया, तो कुरनेलियुस नै दो नौक्कर, अर जो उसके लोवै हाजिर रहया करै थे उन म्ह तै एक भगत सिपाही ताहीं बुलाया,

8 अर उन ताहीं सारी बात बताके याफा नगर की ओड़ भेज्या, ताके पतरस ताहीं ले आवै।

### XXXX XX XXXXX

9 दुसरे दिन जब वे तीन आदमी जो कुरनेलियुस जरिये भेज्जे गये थे, चाल्दे-चाल्दे नगर के धौरे पोहचे, तो दोफारी के लोवै पतरस छ्वात पै प्रार्थना करण चढया।

10 उसने भूख लागगी अर कुछ खाणा चाहवै था, पर जब वे खाणा त्यार करै थे तो वो बेसुध होगया,

11 अर उसने देख्या, के अकास खुलगया, अर एक बड्डी चादर च्यारु कुणयां तै लटकदी होई, धरती की ओड़ उतरै सै।

12 जिस म्ह धरती के सारे ढाळ के चार पैरां आळे अर रेंगणेआळे जिनोर अर अकास के पंछी थे।

13 उसने एक इसा बोल सुण्या, “हे पतरस उठ, मार अर खा।”

14 पर पतरस नै कह्या, “ना प्रभु, कती भी न्ही, क्यूँके मन्ने कदे कोए अशुद्ध चीज न्ही खाई सै।”

15 फिर दुसरी बर उस ताहीं बोल सुणाई दिया “जो किमे परमेसवर नै शुद्ध कर दिया सै, उस ताहीं अशुद्ध मतना कहवै।”

16 तीन बर इस तरियां ए होया, फेर जिब्वे वा चादर अकास म्ह ठा ली गई।

17 जब पतरस अपने मन म्ह दुबिध्या म्ह था, के यो दर्शन जो मन्ने देख्या इसका के मतलब हो सके सै, तो देख्खो, वे माणस जिन ताहीं कुरनेलियुस नै भेज्या था, शमौन के घर का पता लगाके दरवाजे पै आण खड़े होए,

18 अर रुक्का मारके बुझ्झण लागगे, “के शमौन जो पतरस कुह्वावै सै, याडैए सै के?”

19 पतरस तो उस दर्शन पै सोचण ए लागरया था, के पवित्र आत्मा नै उसतै कह्या, “देख, तीन माणस तेरी टोहू म्ह सै।

20 आखर उठकै तळै जा, अर बेझिझक उनकै गेल्या हो ले, क्यूँके मन्ने ए उन ताहीं भेज्या सै।”

21 फेर पतरस नै उतरकै उन माणसां ताहीं कह्या, “देखो, जिसकी टोहू म्ह थम सो, वो मै सूँ। थारे आण का के कारण सै?”

22 वे बोल्ले, “कुरनेलियुस सूबेदार जो धर्मी अर परमेसवर तै डरणआळा अर सारी यहूदी जात म्ह नाम्मी माणस सै, उसनै एक पवित्र सुर्गदूत तै यो निर्देश पाया सै के तेरे ताहीं अपणे घरां बुलाकै तेरे तै वचन सुणै।”

23 फेर उसनै उन ताहीं भीत्तर बुलाकै उनकी मेहमान-नवाजी करी।

~~~~~

दूसरे दिन वो उनके गेल्या गया, अर याफा नगर के विश्वासी भाईयाँ म्ह तै कुछ उसके गेल्या हो लिए।

24 आगले दिन वे कैसरिया नगर पोहचे, अर कुरनेलियुस अपणे कुण्बे आळा अर प्यारे साथियाँ ताहीं कट्टा करकै उनकी बाट देखै था।

25 जिव पतरस भीत्तर आवै था, तो कुरनेलियुस उसतै मिल्या, अर उसके पायां म्ह पड़के उस ताहीं प्रणाम करया,

26 पर पतरस नै उस ताहीं ठा कै कह्या, “खड्या हो, मै भी तो माणस सूँ।”

27 अर उसके गेल्या बतळान्दा भीत्तर गया, अर घणे आदमियाँ ताहीं कट्टे देखकै

28 पतरस नै उनतै कह्या, “थमनै बेरा सै के हम यहूदियाँ कै खात्तर गैर यहूदियाँ तै संगति करणा या उसके उरै जाणा कानून के खिलाफ सै, पर परमेसवर नै मेरै तै बताया सै के किसे माणस ताहीं अपवित्र या अशुद्ध ना कहूँ।

29 ज्यांतै मै जिव बुलाया गया तो बिना कुछ कहे चल्या आया। इब मै बुद्धु सूँके मेरै ताहीं किस काम कै खात्तर बुलाया गया?”

30 कुरनेलियुस बोल्ल्या, “इस्से घड़ी, पूरे चार दिन होए, मै अपणे घर म्ह दोफाहुरै पाच्यै तीन बजे प्रार्थना करण लागरया था, तो एक माणस चमकीला बाणा पहरे होए, मेरै स्याम्ही आण खड्या होया

31 अर कहण लाग्या, ‘हे कुरनेलियुस, तेरी प्रार्थनाएँ अर तेरे दान याद कै खात्तर परमेसवर कै स्याम्ही पोहचे सै।’

32 इस करकै किसे नै याफा नगर भेजकै शमौन जो पतरस कुह्वावै सै, बुलवा ले। वो शमौन, चमड़े का धन्धा करण आळे कै उरै मेहमान सै, जिसका घर समुन्दर कै किनारे सै।’

33 फेर मन्ने जिब्बे तेरे धोरै आदमी भेज्जै, अर तन्ने भला करया जो आ गया। इब हम सारे उरै परमेसवर कै स्याम्ही सां, ताके जो किमे परमेसवर नै तेरे तै कह्या उस ताहीं सुणां।”

~~~~~

34 फेर पतरस बोल्ल्या, “इब मेरै पक्का यकिन होगया के परमेसवर किसे का पक्षपात कोनी करदा,

35 बल्के हरेक जात म्ह जो परमेसवर तै डरै अर धर्म के काम करे सै, वो उसनै भावै सै।

36 थम जाणो सो के परमेसवर नै इस्राएल के माणसां ताहीं अपणा संदेश भेज्जा, उसनै शान्ति के बारै म्ह सुसमाचार सुणाया जो माणसां ताहीं यीशु मसीह पै विश्वास करण कै जरिये मिलै सै।

37 वो वचन थमनै बेरा सै, जो यूहन्ना के बपतिस्मा के प्रचार कै पाच्यै गलील परदेस तै शरु होकै साबुते यहूदिया परदेस म्ह फैलगया।

38 परमेसवर नै किस तरियां तै यीशु नासरी ताहीं पवित्र आत्मा अर सामर्थ तै अभिषेक करया, वो भलाई करदा अर सारया ताहीं जो शैतान के सताए होइ थे, आच्छा करदा फिरया, क्यूँके परमेसवर उसके गेल्या था।”

39 “हम उन सारे काम्मां के गवाह सां, जो उसनै यहूदिया परदेस अर यरुशलेम नगर म्ह भी करे, अर उननै उस ताहीं कूरुस पै लटकाकै मार दिया।

40 उस ताहीं परमेसवर नै तीसरे दिन जिन्दा करया, अर जाहिर भी कर दिया सै,

41 सारे आदमियाँ पै न्ही बल्के उन गवाह पै जिन ताहीं परमेसवर नै पैहल्या तै छ्वाँट लिया था, यानिके म्हारै पै जिन नै उसके मरे होया म्ह तै जिन्दा उठण के पाच्छे, उसके गेल्या खाया-पिया,

42 अर उसनै म्हारै ताहीं हुकम दिया के आदमियाँ म्ह प्रचार करो अर गवाही द्यो, के यो वोए सै जिस ताहीं परमेसवर नै जिन्दा अर मरया होया का न्यायी ठहराया सै।

43 उसकी सारे नबी गवाही देवै सै के जो कोए उसपै विश्वास करैगा, उस ताहीं उसके नाम तै पापां की माफी मिलैगी।”

~~~~~

44 पतरस ये बात कहण ए लागरया था के पवित्त्र आत्मा वचन के सारे सुणण आळा पै उतर आया।

45 अर जितने खतना करे होए विश्वासी पतरस कै गेल्या आये थे, वे सारे हैरान होए के गैर यहूदियाँ पै भी पवित्त्र आत्मा का दान ढाळा गया सै।

46 क्यूँके उननै उन ताहीं कई ढाळ की भाषा बोल्दे अर परमेसवर की बड़ाई करदे सुणया। इसपै पतरस नै कह्या,

47 “के कोए पाणी नै रोक सकै सै के ये वपतिस्मा ना पावै, जिननै म्हारै की ढाळ परमेसवर की ओड़ तै पवित्त्र आत्मा पाया सै?”

48 अर उसनै हुकम दिया के उननै यीशु मसीह कै नाम म्ह वपतिस्मा दिया जावै। फेर उननै उसतै बिनती करी के वो कुछ दिन और उनके गेल्या रहवै।

11

~~~~~

1 फेर प्रेरितां अर विश्वासी भाईयाँ नै जो यहूदिया परदेस म्ह थे सुणया के गैर यहूदियाँ नै भी परमेसवर का वचन मान लिया सै।

2 आखर म्ह जब पतरस यरुशलेम नगर म्ह आया, तो खतना किये होए आदमी उसतै बहस करण लागे,

3 “तन्नै खतनारहित आदमियाँ के उरै जाकै उनके गेल्या खाया।”

4 फेर पतरस नै उन ताहीं शरु तै आखर ताहीं सारा किमे कह सुणाया

5 “मै याफा नगर म्ह प्रार्थना करण लागरया था, अर बेसुध होके एक दर्शन देख्या के एक बड्डी चादर च्यार कुणयां तै लटकदी होई, अकास तै उतरकै मेरै धरै आई।”

6 जब मन्नै उसपै गौर करया, तो उस म्ह धरती के चार पैरां आळे अर बणपशु अर रेंगण आळे जिनोर अर अकास के पंछी देखे,

7 अर यो बोल भी सुणया, “हे पतरस उठ, मार अर खा।”

8 मन्नै कह्या, “ना प्रभु, ना, क्यूँके कोए अशुद्ध चीज मेरै मुँह म्ह कदे न्ही गई।”

9 इसकै जवाब म्ह अकास तै दुसरी बर आवाज होई, “जो किमे परमेसवर नै शुद्ध ठहराया सै, उस ताहीं अशुद्ध मतना कहवै।”

10 तीन बर इसा होया, फेर सारा किमे दुबारा अकास पै खींच लिया गया।

11 जिब्बे तीन माणस जो कुरनेलियुस नै कैसरिया परदेस तै मेरै धरै भेज्जे थे, उस घर पै जिसम्ह हम थे, आण खड़े होए।

12 फेर पवित्त्र आत्मा नै मेरै तै बेझिझक होके उनके गेल्या जाण खात्तर कह्या, अर छः भाई भी मेरै गेल्या हो लिये, अर हम उस माणस के घरां गये।

13 उसने म्हारै ताहीं बताया, के उसने एक सुगंदूत ताहीं अपणे घर म्ह खड्या देख्या, जिसने उसतै कह्या, “याफा नगर म्ह माणस भेजकै शमोन ताहीं जो पतरस कुह्वावै सै, बुलवा ले।

14 वो थारे तै इसी बात कहवैगा, जिनकै जरिये तू अर तेरा सारा घराना उद्धार पावैगा।”

15 जिव म्ह बात करण लाग्या, तो पवित्तर आत्मा उनपै उससे तरियां तै उतरया जिस तरियां तै शरु म्ह म्हारै पै उतरया था।

16 फेर मनै प्रभु का यो वचन याद आया, जो उसने कह्या था, “यूहन्ना नै तो पाणी तै बपतिस्मा दिया, पर थम पवित्तर आत्मा तै बपतिस्मा पाओगे।

17 इस खात्तर जिव परमेसवर नै उन ताहीं भी वोए दान दिया, जो म्हारै ताहीं प्रभु यीशु मसीह पै विश्वास करण तै मिल्या था, तो मै कौण था जो परमेसवर नै रोक सकदा?”

18 यो सुणण के बाद उसके जवाब म्ह वे यहूदी विश्वासी कुछ भी न्ही बोल पाए, अर परमेसवर की बड़ाई करकै कहण लागगे, “फेर तो परमेसवर नै गैर यहूदियाँ ताहीं भी अनन्त जीवन के खात्तर पापां की माफी अर यीशु मसीह पै विश्वास करण का दान दिया सै।”

### XXXXXXXXXX XXXX XX XXXXXXXXXXXX

19 जो आदमी उस क्लेश के मारे जो स्तिफनुस के कारण पड्या था, खिंड-मिंड हो गये थे, वे हांडदे-हांडे फीनीके परदेस अर साइप्रस टापू अर अन्ताकिया नगर म्ह पोहचे, पर यहूदियाँ नै छोड़ किसे और ताहीं वचन कोनी सुणावै थे।

20 पर उन म्ह तै कुछ विश्वासी साइप्रस टापू अर कुरेनवासी थे, जो अन्ताकिया नगर म्ह आकै यूनानियाँ ताहीं भी प्रभु यीशु का सुसमाचार सुणाण लागगे।

21 प्रभु का हाथ उनपै था, अर घणे आदमी विश्वास करकै प्रभु की ओड़ फिरे।

22 जिव उनका जिक्र यरुशलेम नगर की कलीसिया के लोग्गां के सुणण म्ह आया, तो उननै बरनबास ताहीं अन्ताकिया नगर भेज्या।

23 वो उड़ै पोहचकै अर परमेसवर के अनुग्रह नै देखकै राज्जी होया, अर सारया ताहीं उपदेश दिया के तन-मन लगाकै प्रभु तै लिपटे रहो।

24 वो एक भला माणस था, अर पवित्तर आत्मा अर विश्वास तै पूरा भरया था, अर दुसरे घणखरे आदमी प्रभु म्ह आ मिले।

25 फेर वो शाऊल नै टोह्ण कैं खात्तर तरसुस नगर म्ह चल्या गया।

26 जिव वो उसतै मिल्या तो उस ताहीं अन्ताकिया नगर ल्याया, अर इसा होया के वे एक साल ताहीं कलीसिया के गेल्या मिलदे अर प्रभु यीशु मसीह का घणे आदमियाँ ताहीं उपदेश देन्दे रहे, अर चेल्लें सारया तै पैहल्या अन्ताकिया नगर ए म्ह मसीह कुहाए।

27 उननै दिनां म्ह कई नबी यरुशलेम नगर तै अन्ताकिया नगर आए।

28 उन म्ह तै अगबुस नामक एक नबी नै खड़े होकै आत्मा की प्रेरणा तै न्यू बताया के सारी दुनिया म्ह बड़ड़ा अकाळ पड़ैगा, वो अकाळ (रोम के सम्राट) क्लौदियुस के बखत म्ह पड्या।

29 फेर चेल्ल्यां नै फैसला लिया के हरेक अपणी-अपणी पूंजी के मुताबिक यहूदिया परदेस म्ह रहण आळे भाईयाँ की मदद के खात्तर किमे भेज्जै।

30 उननै इस तरियां ए करया, अर बरनबास अर शाऊल के हाथ कलीसिया के अगुवां के धोरै कुछ भेज दिया।

## 12

### XXXXXXXXXX XXXX XX XXXXXXXXXXXX

1 उस बखत हेरोदेस राजा ने कलीसिया के कई माणसां ताहीं सताण के मकसद तै बन्दी बना लिया।

2 उसने प्रेरित यूहन्ना के भाई याकूब ताहीं तलवार तै मरवा दिया।

3 जब उसने देखा के यहूदी माणस इसतै राज्जी होवै सै, तो उसने पतरस ताहीं भी पकड़ लिया। वे अखमीरी रोट्टी के त्यौहार के दिन थे।

4 हेरोदेस नै उस ताहीं पकड़के जेठ म्ह गेरया, अर चार-चार सिपाहियाँ के चार पहरया म्ह राख्या, इस विचार तै के फसह के बाद उसने आदमियाँ के स्याम्ही ल्यावै।

5 जेठ म्ह पतरस बन्द था, पर कलीसिया उसके खात्तर लौ लाके परमेसवर तै प्रार्थना करण लागरी थी।

6 जब हेरोदेस राजा उसने आदमियाँ के स्याम्ही ल्याण आळा था, उससे रात पतरस दो जंजीरां तै बंध्या होइ दो सिपाहियाँ के विचाळै सोण लागरया था, अर पहेरदार दरबाजे पै जेठ की रुखाळी करे थे।

7 तो देखो, प्रभु का एक सुर्गदूत आण खडचा होया अर उस कोठड़ी म्ह चाँदणा चमक्या, अर उसने पतरस की पासळी पै हाथ मारके उस ताहीं जगाया अर बोल्या, “उठ, तावळ कर।” अर उसके हाथ्यां तै बेड़ी खुलकै गिरगी।

8 फेर सुर्गदूत नै उसतै कह्या, “कमर बाँध, अर अपने जूते पहर ले।” उसने उससे ढाळ करया। फेर उसने उसतै कह्या, “अपणे लते पहरकै मेरै पाच्छै हो ले।”

9 वो लिकड़के उसके पाच्छै हो लिया, पर उसने न्यू न्ही बेरा था के जो किमे सुर्गदूत कर रह्या सै वो साच्ची सै, बल्के न्यू समझै था के जणु मै दर्शन देखण लागरया सू।

10 फेर वे पैहल्या अर दुसरे पहेर तै लिकड़के उस लोहे के फाटक पै पोहचे, जो नगर की ओइ सै। वो उनकै खात्तर अपने-आपे खुलग्या, अर वे लिकड़के एक गळी म्ह गए, अर जिब्बे ए सुर्गदूत उसने छोड़के चल्या गया।

11 फेर पतरस नै चेत म्ह होके कह्या, “इब मननै सच का बेरा पटया सै के प्रभु नै अपना सुर्गदूत भेजके मेरै ताहीं हेरोदेस राजा के हाथ्यां तै छुड़ा लिया, अर यहूदी अगुवां की सारी मनसा पै पाणी फेर दिया सै।”

12 न्यू जानकै वो उस यूहन्ना की माँ मरियम के घरां आया, जो मरकुस कुह्वावै सै। ओड़े घणे आदमी कटठे होके प्रार्थना करण लागरे थे।

13 जब उननै दरबाजा खटखटाया, तो रुदे नामक एक नौकराणी देखण नै आई।

14 पतरस का बोल पिच्छाणकै उसने खुशी के मारे दरबाजा न्ही खोल्या, पर भाजकै भीत्तर गई अर बताया के पतरस दरबाजे पै खडचा सै।

15 उननै उसतै कह्या, “तू बावळी सै।” पर वा पूरे विश्वास तै बोल्ली के पतरस ए सै। फेर उननै कह्या, “उसका सुर्गदूत होगा।”

16 पर पतरस खटखटान्दा ए रहया आखर म्ह उननै दरबाजा खोल्या, अर उस ताहीं देखके हैरान होग्ये।

17 फेर उसने उन ताहीं हाथ तै इशारा करया के बोल-बाल्ले रहवै, अर उन ताहीं बताया के प्रभु किस ढाळ उस ताहीं जेठ तै लिकाड़ ल्याया सै। फेर बोल्या, “याकूब अर दुसरे भाईयाँ नै या बात बता दियो।” फेर लिकड़के दुसरी जगहां चल्या गया।

18 तड़कैए जेठ के सिपाहियाँ म्ह घणी भगदड़ माचगी के पतरस कित्त गया।

19 जब हेरोदेस राजा नै उसकी टोहया-टाही करवाई अर न्ही मिल्या, तो पैहेरदारां की जाँच करके हुकम दिया के वे मार दिये जावे, अर वो यहूदिया परदेस नै छोड़के कैसरिया नगर म्ह जाके रहण लाग्या।



20 हेरोदेस राजा सूअर अर सेदा नगर के लोगगां तै घणा नाराज था। वे एक टोळ बणाके उसतै मिलण आये, राजा का एक खास कर्मचारी बलास्तुस ताहीं मनकै राजा तै मेल करणा चाह्या, क्यूँके राजा के देश म्ह उनकै देश का पालन-पोषण होवै था।

21 खास दिन पै हेरोदेस राजा राजसी-बाणा पहरकै सिंहासन पै बैठचा, अर उन ताहीं खुलास्सा करण लाग्या।

22 फेर आदमियाँ नै रुक्का मारया, “यो तो माणस का न्ही ईश्वर का बोल सै।”

23 उससे घड़ी परभु कै एक सुगंदूत नै जिब्बे आकै हेरोदेस राजा ताहीं झिडका, अर वो कीड़े पड़कै मरगया। क्यूँके उसनै परमेसवर की महिमा कोनी करी,

24 पर परमेसवर का वचन बढ़दा अर फैलदा गया।

25 जिव बरनबास अर शाऊल नै अपणी सेवा पूरी कर ली तो यूहन्ना जो मरकुस कुह्वावै था, गेल्या लेकै यरुशलेम नगर तै बोहूडे।

## 13

### अन्ताकिया नगर की कलीसिया म्ह कई नबी अर उपदेशक थे, यानी बरनबास, शमौन जो नीगर

(काळा आदमी) कुह्वावै सै, अर शाऊल अर कुरेनी लूकियुस, मनाहेम जिसका पालन-पोषण चौथाई देश के राजा हेरोदेस कै गैल होया था।

2 जिव ये लोग परभु की आराधना अर ब्रत करण लागरे थे, तो पवित्र आत्मा नै उनतै कह्या, “मेरै खात्तर बरनबास अर शाऊल नै उस काम कै खात्तर न्यारा करो जिसकै खात्तर मन्नै उन ताहीं बुलाया सै।”

3 फेर उननै ब्रत अर प्रार्थना करकै अर उनपै हाथ धरकै उन ताहीं परमेसवर के काम खात्तर विदा करया।

### शाऊल अर बरनबास पवित्र आत्मा के भेज्जे होए सिलूकिया बन्दरगाह गये, अर ओड़ै तै

जहाज पै चढ़कै साइप्रस टापू कान्ही चाल्ले,

5 अर सलमीस नगर म्ह पोहचकै, परमेसवर का वचन यहूदियाँ के आराधनालयाँ म्ह सुणाया। यूहन्ना उनका सेवक था।

6 वे उस सारे टापू म्ह होन्दे होए पाफुस परदेस ताहीं पोहचे। ओड़ै उननै बारयीशु नामक एक यहूदी जादूगर अर झूठठा नबी मिल्या।

7 वो राज्यपाल सिरगियुस पौलुस कै गेल्या था, जो अकलमंद माणस था। उसनै बरनबास अर शाऊल ताहीं अपणे धोरै बुलाकै परमेसवर का वचन सुणणा चाह्या।

8 पर इलीमास जादूगर नै (क्यूँके योए उसकै नाम का मतलब सै) उनका विरोध करकै हाकिम ताहीं यीशु पै विश्वास करण तै रोकणा चाह्या।

9 फेर शाऊल नै जिसका नाम पौलुस भी सै, पवित्र आत्मा तै पूरी तरियाँ भरकै उसकी ओड़ टकटकी लाकै देख्या अर बोल्या,

10 “हे सारे कपट अर सारी ढाळ कि चतुराई तै भरे होड़ शैतान की ऊलाद, सारे धर्माँ के बैरी, के तू परभु के सीध्धी राही नै टेढ़ी करणा न्ही छोड़ैगा?”

11 इब लखा, “परभु का हाथ तेरे विरोध म्ह उठचा सै, अर तू कुछ बखत ताहीं आन्धा रहवैगा अर सूरज नै कोनी देखैगा।” फेर जिब्बे धुँधळापण अर अन्धेरा उसपै छा गया, वो आस्तै-पास्तै टटोळण लाग्या ताके कोए उसका हाथ पकड़कै ले चाल्लै।

12 फेर हाकिम नै जो होया था उस ताहीं देखकै अर परभु के उपदेश तै हैरान होकै यीशु पै विश्वास करया।

### पौलुस अर उसके मित्र पाफुस परदेस तै पाणी का जहाज खोल कै पंफूलिया परदेस के पिरगा

नगर म्ह आये, अर यूहन्ना उननै छोड़कै यरुशलेम नगर बोहूड गया।

14 पिरगा नगर तै आगै बढ़कै वे पिसिदिया परदेस के अन्ताकिया नगर म्ह पोहचे, अर आराम कै दिन आराधनालय म्ह जाके बैठये।



15 मूसा के नियम-कायदे अर नबियाँ की किताब नै पढ़ण के पाच्छै आराधनालय के सरदारान नै उनके धारे कहवां भेज्या, “हे भाईयो, जै आदमियाँ के उपदेश के खात्तर थारे मन म्ह कोए बात हो तो कहो।”

16 फेर पौलुस नै खड़े होके अर हाथ तै इशारा करके कह्या, “हे इस्राएलियों, अर गैर यहूदी जो परमेसवर तै डरण आळो, सुणो!”

17 इस्राएल के परमेसवर नै म्हारै पूर्वजां ताहीं छोट लिया, अर जिब वे मिस्र देश म्ह परदेशी होके रहवै थे, तो उनकी बढ़ोतरी करी, अर अपनी शक्ति के दम पै उननै लिकाड़ ल्याया।

18 वो कोए चाळीस साल ताहीं जंगल-बियाबान म्ह उनकी सहण करादा रहया,

19 अर कनान देश की सात जात्तां का नाश करके उनका देश कोए साढ़े चार सौ साल म्ह इनकी वसियत म्ह कर दिया।

20 “इसके बाद परमेसवर नै शमूएल नबी ताहीं उन म्ह न्यायाधीश ठहराया।

21 इसके पाच्छै उननै शमूएल तै उनपै एक राजा ठहराण की माँग करी, फेर परमेसवर नै चाळीस साल के खात्तर बिन्यामीन के गोत्र म्ह तै एक माणस, यानिके कीश के बेटे शाऊल ताहीं उनपै राजा ठहराया।

22 फेर परमेसवर नै शाऊल ताहीं पद तै हटाके दाऊद ताहीं उनका राजा बणाया, जिसके बारे म्ह उसनै गवाही दी, भन्नै एक माणस यिषै का बेटा दाऊद, जो मेरी इच्छा के मुताबिक मिलगया सै, वोए मेरी सारी इच्छा पूरी करेगा।”

23 इस्से पीढ़ी म्ह तै परमेसवर नै अपने वादा के मुताबिक इस्राएल के धारे एक उद्धारकर्ता, यानिके यीशु भेज्या।

24 यीशु के आण तै पैहल्या यहून्ना नै सारे इस्राएलियों नै अपने पाप मान के परमेसवर की ओड़ मुड़ण का अर बपतिस्मा का प्रचार करया।

25 जिब यहून्ना अपनी सेवा पूरी करण पै था, तो उसनै कह्या, “थम मन्नै के समझो सो? मै मसीह कोनी! बल्के देखो, मेरे पाच्छै एक आण आळा सै, जो भोत महान सै, जिसके जूत्याँ के फिते भी मै खोल्लण जोगगा कोनी।”

26 “हे भाईयो, थम जो अब्राहम की ऊलाद सो, अर थम गैर यहूदी जो परमेसवर तै डरो सो, थारे धारे इस उद्धार का वचन भेज्या गया सै।

27 यरूशलेम नगर के रहणआळो अर उनके सरदारान नै, ना मसीह यीशु ताहीं पिच्छाणा अर ना नबियाँ की बात समझी, जो हरेक आराम के दिन पढ़ी जावै सै, ज्यांतै उस ताहीं कसूरवार ठहराके उन बातान नै पूरा करया।

28 उननै मारण के जोगगा कोए कसूर उस म्ह कोनी पाया, फेरभी राज्यपाल पिलातुस तै बिनती करी, के वो मार दिया जावै।

29 जिब उननै उसके बारे म्ह पवित्र ग्रन्थ लिखी होई सारी बात पूरी करी, तो उस ताहीं क्रूस पै तै उतारके कबर म्ह धरया।

30 पर परमेसवर नै उस ताहीं मरे होया म्ह तै जिन्दा करया,

31 अर वो उन ताहीं जो उसके गेल्या गलील परदेस तै यरूशलेम नगर आये थे, घणे दिनां ताहीं अपने चेल्यां नै दिख्दा रहया, आदमियाँ के स्याम्ही इब वैए उसके गवाह सै।”

32 हम थमनै उस वादा के बारे म्ह जो बाप-दादा तै करया गया था, यो सुसमाचार सुणावां सां,

33 के परमेसवर नै यीशु ताहीं जिन्दा करके, वोए वादा म्हारी ऊलाद के खात्तर पूरा करया, जिसा के भजन संहिता दो म्ह लिख्या सै, “तू मेरा बेटा सै, आज तै ए मै तेरा पिता बणग्या सूं।”

34 अर उसके इस तरियां तै मरे होया म्ह तै जिन्दा होण के बारे म्ह भी के वो कदे न्ही सड़े, परमेसवर नै यो कह्या सै, “मै दाऊद पै की पवित्र अर अटल दया तेरे पै करेगा।”

35 दाऊद नै और जगहां भी भजन संहिता म्ह भी लिख्या सै, “तू अपने पवित्र माणस नै सड़ण न्ही देवैगा।”

36 दाऊद तो परमेश्वर की मर्जी के मुताबिक अपने बखत म्ह सेवा करके मर गया, अर अपने बाप-दादा म्ह जा मिल्या, अर सड़ भी गया।

37 पर जिस ताहीं परमेश्वर नै जिन्दा करया, वो सड़ण कोनी पाया।

38 ज्यातै, हे भाईयो, थम जाण ल्यो के इस्से के जरिये पापां की माफी का सुसमाचार थारे ताहीं दिया जावै सै,

39 अर पापां तै मुक्त करण म्ह मूसा नबी के नियम-कायदे हमेशा नाकामयाब रहे सै, हरेक जो विश्वास करै सै, वो यीशु के जरिये सारे पापां तै मुक्त करया जावै सै।

40 ज्यातै चौकन्ने रहो, इसा ना हो के जो नबियाँ की किताब म्ह आया सै, थारे पै भी आण पड़े

41 “हे बुराई करण आळो, देखो, अर हैरान होवो, अर मिट जाओ, क्यूँके मे थारे दिनां म्ह एक काम करेँ सूँ, इसा काम के जे कोए थारे तै उसका जिक्र करै, तो थम भी विश्वास कोनी करोगे।”

42 जब पौलुस अर बरनबास यहूदी सभाघर तै बाहरणै निकड़ण लागरे थे, तो माणस उनतै बिनती करण लागगे के आगले आराम के दिन म्हारै ताहीं ये बात फेर सुणाई जावै।

43 जब सभा उठ ली फेर भोत-से यहूदी अर यहूदी पंथ म्ह आये होए भगतां म्ह तै घणखरे पौलुस अर बरनबास के पाच्छै हो लिये, अर उननै उन ताहीं बात करके समझाया के परमेश्वर के अनुग्रह म्ह बणे रहो।

*XXXXXXXXXX XXX XXXXX XX XXXXX*

44 आगले आराम के दिन नगर के तकरीबन सारे लोग परमेश्वर का वचन सुणण नै कट्टे हो गये।

45 पर यहूदी भीड़ नै देखके मन ए मन म्ह जळण लागगे, अर बुराई करदे होए पौलुस की बातों के विरोध म्ह बोल्लण लागगे।

46 फेर पौलुस अर बरनबास हिम्मत करके कहण लागगे, “जरूरी था के परमेश्वर का वचन पैहल्या थारे तै सुणाया जान्दा, इब जब के थमनै इस ताहीं नकार दिया सै, अर यो करते होए अपने-आप ताहीं अनन्त जीवन के खात्तर अयोग्य घोषित कर दिया सै, तो देखो, हम गैर यहूदियाँ के कान्ही फिरां सां।

47 क्यूँके प्रभु नै म्हारै ताहीं यो हुकम दिया सै, भन्नै तेरे ताहीं गैर यहूदियाँ के खात्तर चाँदणा ठहराया, ताके तू धरती के छोर ताहीं उद्धार का दरबाजा हो।”

48 न्यू सुणके गैर यहूदी राज्जी होए, अर परमेश्वर के वचन की बड़ाई करण लागगे, अर जितने अनन्त जीवन के खात्तर ठहराए गये थे, उननै विश्वास करया।

49 फेर प्रभु का वचन उस सारे देश म्ह फैलाण लागया।

50 पर यहूदी अगुवां नै भगत अर अच्छे खानदान की लुगाईयाँ ताहीं अर नगर के खास आदमियाँ ताहीं उकसाया, अर पौलुस अर बरनबास के खिलाफ दंगा करा के उन ताहीं अपनी सीमा तै लिकाड़ दिया।

51 फेर पौलुस अर बरनबास उनके स्याम्ही पायां की धूळ झाड़के इकुनियुम नगर म्ह चले गये।

52 अर चेल्लेँ आनन्द अर पवित्र आत्मा तै भरदे चले गये।

## 14

*XXXXXXXXXX XXX XXXXX XX XXXXX*

1 इकुनियुम नगर म्ह इसा होया के वे यहूदियाँ के आराधनालय म्ह गैल-गैल गये, अर इस ढाळ बात करी के यहूदियाँ अर यूनानियाँ म्ह घणखरयां नै विश्वास करया।

2 पर विश्वास ना करण आळे गैर यहूदियाँ के मन विश्वासी भाईयाँ के विरोध म्ह उकसाये अर कड़वापण पैदा करया।

3 पौलुस अर बरनबास घणे दिन ताहीं उड़ै रहे, अर प्रभु कै भरोसै पै हिम्मत तै बात करै थे, अर वो उनके हाथ्यां तै चमत्कार अर अनोक्खे काम करवा कै अपने अनुग्रह के वचन ताहीं साबित करदा रह्या।

4 पर नगर के लोग्गां म्ह फूट पड़गी थी, इसतै घणेए तो यहूदियां कान्ही अर घणेए प्रेरितां कान्ही होग्ये।

5 जिव गैर यहूदी अर यहूदी उनकी बेजती करण नै अर उनके पत्थर मारण कै खात्तर अपने सरदारों सुधा उन कान्ही भाज्जे,

6 फेर वे इस बात नै जाणगे अर लुकाउनिया परदेस के लुस्त्रा अर दिरबे नगरां म्ह, अर लोवै-धोरै के परदेसां म्ह भाज्जे

7 अर ओड़ै सुसमाचार सुणाण लाग्गे।

~~~~~

8 लुस्त्रा नगर म्ह एक माणस बठचा था, जो पायां तै लाचार था। वो जन्म तै ए लंगड़ा था, अर कदे न्ही चाल्या था।

9 वो पौलुस नै बात करदे सुणै था। पौलुस नै उसकी ओड़ टकटकी लाकै देख्या के उसनै ठीक होण का विश्वास सै,

10 अर टाड़ू आवाज म्ह बोल्या, “अपणे पायां कै बळ सीध्या खडचा हो।” फेर वो उछळकै चाल्लण-फिरण लाग्या।

11 लोग्गां नै पौलुस का यो काम देखकै लुकाउनिया की भाषा म्ह टाड़ू आवाज म्ह कह्या, “देवता माणस कै रूप म्ह होकै म्हारै धोरै उतर आये सै।”

12 उननै बरनबास ताहीं ज्यूस देवता, अर पौलुस ताहीं हिरमस कहा क्युँके वो खास संदेश देण आळा था।

13 ज्यूस देवता के उस मन्दर का पुजारी जो उनके नगर कै स्याम्ही था, बळध अर फूल्लां के हार फाटकां पै ल्याकै लोग्गां कै गेल्या बलिदान करणा चाहवै था।

14 पर बरनबास अर पौलुस प्रेरितां नै जिव यो सुण्या, तो अपने लत्ते पाड़े अर भीड़ म्ह लपके, अर रुक्का मारकै कहण लाग्गे,

15 “हे भले माणसां, थम के करो सो? हम भी तो थारे तरियां दुख-सुख भोग्गण आळे माणस सां, अर थमनै सुसमाचार सुणावां सां के थम इन बेकार चिज्जां तै न्यारे होकै जिन्दे परमेसवर कै कान्ही फिरो, जिसनै सुर्ग अर धरती अर समुन्दर अर जो किमे उन म्ह सै बणाया सै।

16 उसनै बीत्ते होए बखत म्ह सारी जात्तां ताहीं अपने-अपणे रास्तयां पै चाल्लण दिया।

17 फेर भी वो अपने भले काम करण के जरिये अपने बारे म्ह गवाही देंदा रह्या, अर अकास तै मिह अर फळआळी ऋतु देकै थारे मन नै खाणे अर खुशी तै भरदा रह्या।”

18 न्यू कहकै भी उननै लोग्गां ताहीं बड्डी मुश्किलां तै रोक्का के उनकै खात्तर बलिदान ना करै।

19 पर कुछ यहूदियां नै अन्ताकिया नगर अर इकुनियुम नगर तै आकै लोग्गां ताहीं अपनी ओड़ कर लिया, अर पौलुस पै पत्थर बरसाए, अर मरया होड़ सोचकै उस ताहीं नगर कै बाहरणै घसीट लेगे।

20 पर चेल्ले जिव उसकै चौगरदेकै आण खड़े होए, तो वो उठकै नगर म्ह गया अर दुसरे दिन बरनबास कै गेल्या दिरबे नगर कान्ही चल्या गया।

~~~~~

21 वे उस नगर के लोग्गां ताहीं सुसमाचार सुणाकै अर घण चेल्ले बणाकै, लुस्त्रा अर इकुनियुम अर अन्ताकिया नगर नै बोहड़ आये,

22 अर चेल्यां के मनां नै स्थिर करदे अर उत्साहित करते होए या शिक्षा देते रह्ये के विश्वास म्ह बणे रहो, अर न्यू कहवै थे, “हमनै घणे दुख ठाकै परमेसवर के राज्य म्ह बड़णा होगा।”

23 अर उननै हरेक कलीसिया म्ह उनके खात्तर अगुवें ठहराए, अर ब्रत सुधा प्रार्थना करकै उन ताहीं प्रभु के हाथ्यां म्ह सौप्या जिसपै उननै विश्वास करया था।

- 24 फेर पिसिदिया परदेस तै होन्दे होए वे पंफूलिया परदेस पोहचे,  
 25 फेर पिरगा नगर म्ह वचन सुणाकै अत्तलिया नगर म्ह आये,  
 26 अर ओड़ै तै वे पाणी के जहाज तै अन्ताकिया नगर गये, जित्त वे उस काम कै खात्तर जो उननै पूरा करया था परमेसवर के अनुग्रह म्ह सौपे गये थे।  
 27 अन्ताकिया नगर पोहचकै उननै कलीसिया कट्टी करी अर बताया के परमेसवर नै उनके गेल्या होकै किसे बड़े-बड़े काम करे, अर गैर यहूदियाँ के खात्तर विश्वास का बारणा खोल दिया।  
 28 अर वे चेल्याँ के गेल्या घणे दिन ताहीं रहे।

## 15

XXXXXXXX XXX XX XXX

- 1 फेर कुछ यहूदी विश्वासी यहूदिया परदेस तै आकै भाईयाँ नै सिखाण लागगे “जै मूसा नबी की रीत पै धारा खतना न्ही हो तो थम उद्धार कोनी पा सकदे।”  
 2 जिव पौलुस अर बरनबास का उनतै घणा वाद-विवाद अर बहस होई तो यो फैसला लिया गया के पौलुस अर बरनबास अर उन म्ह तै कुछ माणस इस बात कै बारै म्ह प्रेरितां अर कलीसिया के अगुवाँ के धारै यरुशलेम नगर म्ह जावै।  
 3 कलीसिया नै उन ताहीं बिदा करया, अर वे फीनीके अर सामरिया परदेसां तै होन्दे होए गैर यहूदियाँ के जरिये यीशु मसीह पै विश्वास करण का जिक्र करते गये, जिसतै सारे विश्वासी भाई घणे राज्जी होए।  
 4 जिव वे यरुशलेम नगर पोहचे, तो कलीसिया अर प्रेरित अर कलीसिया के अगुवें उनतै खुशी कै गैल मिले, अर पौलुस अर बरनबास नै बताया के परमेसवर नै उनके गेल्या होकै किसे-किसे काम करे थे।  
 5 पर फरीसियाँ के पंथ म्ह तै जिन नै विश्वास करया था, उन म्ह तै कितन्याँ नै उठकै कहा, “गैर यहूदियाँ ताहीं खतना करण अर मूसा नबी के नियम-कायदे नै मानण का हुकम देणा चाहिए।”  
 6 फेर प्रेरित अर कलीसिया के अगुवें इस बात कै बारै म्ह विचार करण के खात्तर कट्टे होए।  
 7 फेर पतरस नै घणी बहस हो जाणके पाच्छे, खड़े होकै उनतै कहा, “हे भाईयो, थमने बेरा से के घणे दिन होए परमेसवर नै थारे म्ह तै मेरै ताहीं छाँट लिया के मेरै मुँह तै गैर यहूदी सुसमाचार का वचन सुणके विश्वास करै।  
 8 मन के जाँचण आठे परमेसवर नै उन ताहीं भी म्हारै की तरियां पवित्तर आत्मा देकै यो बताया से के वे सब भी उसके माणस से,  
 9 अर विश्वास कै जरिये उनके मन शुद्ध करकै म्हारै म्ह अर उन म्ह किमे फर्क कोनी राख्या।  
 10 तो इब थम क्यातै परमेसवर नै परखो सों, ताके गैर यहूदी चेल्याँ के कंध्या पै इसा जूआ धरो, जिसनै ना म्हारे बाप-दाहे ठा सकै थे अर ना हम ठा सकां सां?  
 11 हाँ, म्हारा यो यकिन से के जिस तरियां तै वे प्रभु यीशु के अनुग्रह तै उद्धार पावेंगे, उस्से तरियां तै हम भी पावांगे।”  
 12 फेर सारी सभा चुपचाप बरनबास अर पौलुस की सुणण लागगी, के परमेसवर नै उनके जरिये गैर यहूदियाँ म्ह किसे बड़े-बड़े चमत्कार, अर अनोक्खे काम दिखाए।  
 13 उनके भाषण के खतम होण पै याकूब सभा ताहीं कहण लागया, “हे भाईयो, मेरी सुणो।”  
 14 शमौन पतरस नै बताया के परमेसवर नै पैहले-पहल गैर यहूदियाँ पै किसी दया की निगाह करी के उन म्ह तै अपणे नाम के खात्तर एक प्रजा बणा ले।  
 15 नबियाँ लेख भी इस बात का समर्थन करे से, जिसा के पवित्तर ग्रन्थ म्ह लिख्या से  
 16 “इसके पाच्छे, मै फेर आके दाऊद का पड्या होइ डेरा उठाऊंगा, अर उसके खण्डरां नै दुबारा बणाऊंगा, अर उस ताहीं खड्या करूंगा,”

17 जिसके कारण बाकी की बची होड़ मानवजाति परमेसवर नै पा सकै, अर वे सारी गैर यहूदी भी, जिनपै मेरै नाम की छाप लागगी सै, प्रभु नै टोहवै,

18 यो वोए प्रभु कहवै सै जो दुनिया की शरूआत तै इन बाततां की खबर देदा आया सै ।

19 “ज्यातै मेरा विचार यो सै के हम उन गैर यहूदियाँ खात्तर कोए मुसीबत पैदा ना करा, जो परमेसवर कै कान्ही फिरै सै, हम उन ताहीं दुख ना देवां,

20 पर आच्छा तो यो होगा के हम उन ताहीं यो हुकम लिख भेज्जा, के वे मूर्तियाँ नै चढाण आळी चिज्जां अर जारी अर गळा घोट्टे होया के माँस तै अर लहू तै दूर रहवै ।

21 क्यूँके गुजरे बखत तै नगर-नगर मूसा नबी के नियम-कायदे का प्रचार करण आळे होन्दे चले आये सै, अर वा हरेक आराम कै दिन आराधनालय म्ह पढ़ी जावै सै ।”

*~~~~~*

22 फेर सारी कलीसिया सुधा प्रेरितां अर कलीसिया के अगुवां नै आच्छा लाग्या के अपणे म्ह तै कुछ माणसां नै चुणे, यानिके यहूदा जो बरसब्बा कुह्वावे सै, अर सीलास ताहीं जो भाईयाँ म्ह मुखिया थे, अर उन ताहीं पौलुस अर बरनबास कै गेल्या अन्ताकिया नगर खन्दावै ।

23 उननै उनकै हाथ या चिट्ठी लिख भेजी “अन्ताकिया नगर, सीरिया अर किलिकिया परदेस के रहण आळे भाईयाँ नै जो गैर यहूदियाँ म्ह तै सै, प्रेरितां अर कलीसिया के अगुवें भाईयाँ का नमस्कार ।

24 हमनै सुण्या सै के म्हारै म्ह तै कुछां नै ओड़ै जाकै, थारे ताहीं अपणी बाततां तै डरा दिया, अर थारे मन उल्ट दिये सै पर हमनै उन ताहीं हुकम कोनी दिया था ।

25 इस करके हमनै एक चित्त होकै ठीक जाणया के छोट्टे होड़ माणसां ताहीं अपणे प्यारे बरनबास अर पौलुस कै गेल्या थारे धोरै भेज्जा ।

26 ये इसे माणस सै जिन नै अपणी ज्यांन म्हारै प्रभु यीशु मसीह कै नाम कै खात्तर जोखम म्ह गेरी सै ।

27 ज्यातै हमनै यहूदा अर सीलास ताहीं भेज्या सै, के थम खुद उनकै ए मुँह तै इस वारें म्ह सुण सकी ।

28 पवित्र आत्मा नै अर हमनै ठीक जाण पाट्टी के इन जरूरी बाततां नै छोड़, थारे पै और बोझ ना गेरै,

29 के थम मूर्तियाँ पै बलि करे होया तै अर लहू तै, अर गळा घोट्टे होए पशुआं के माँस तै, अर जारी तै दूर रहो । इनतै दूर रहो तो थारा भला होगा । बाकी सब ठीक-ठाक सै ।”

30 फेर वे बिदा होकै अन्ताकिया नगर पोहचे, अर सभा नै कट्टी करके वा चिट्ठी उन ताहीं दे दी ।

31 वे चिट्ठी पढ़के उस उपदेश की बात तै घणे राज्जी होए ।

32 यहूदा अर सीलास नै जो आप भी नबी थे, घणी बाततां तै विश्वासी भाईयाँ ताहीं उपदेश देकै पक्का करया ।

33 वे कुछे दिन रहकै, विश्वासी भाईयाँ तै शान्ति कै गेल्या बिदा होए के अपणे खन्दाण आळा कै धोरै जावै ।

34 (पर सीलास नै ओड़ै रहणा आच्छा लाग्या ।)

35 पर पौलुस अर बरनबास अन्ताकिया नगर म्ह रह गये अर और घणखरे आदमियाँ कै गेल्या प्रभु यीशु कै वचन का उपदेश करदे अर सुसमाचार सुणान्दे रहे ।

*~~~~~*

36 कुछे दिनां पाच्छे, पौलुस नै बरनबास तै कह्या, “जिन-जिन नगरां म्ह हमनै प्रभु का वचन सुणया था, आओ, फेर उन म्ह चालके अपणे विश्वासी भाईयाँ ताहीं देखके के वे किस तरियाँ सै ।”

37 फेर बरनबास नै यूहन्ना ताहीं जो मरकुस कुह्वावे सै, गेल्या लेण का विचार करया ।

38 पर पौलुस नै उस ताहीं जो पंपूलिया परदेस म्ह उनतै न्यारा होग्या था, अर काम पै उनकै गेल्या कोनी गया, गेल्या ले जाणा ठीक कोनी समझया ।

39 आखर म्ह इसा वाद-विवाद होया के वे एक-दुसरे तै न्यारे पाटगे, अर बरनबास, मरकुस नै लेकै जहाज पै साइप्रस टापू चल्या गया ।

40 पर पौलुस नै सीलास ताहीं छाँट लिया, अर बिश्वासी भाईयाँ तै परमेसवर के अनुग्रह म्ह सौंप्या जाकै ओड़ै तै चल्या गया,

41 अर वो कलीसियाओं ताहीं स्थिर करदा होया सीरिया अर किलिकिया परदेस तै होन्दे होए लिकइया ।

## 16

\*\*\*\*\*

1 फेर वो दिरबे अर लुस्त्रा नगर म्ह भी गया । ओड़ै तीमुथियुस नाम का एक चेल्ला था, उसकी माँ एक यहूदी बिश्वासी थी, पर उसका बाप यूनानी था ।

2 वो लुस्त्रा अर इकुनियुम नगर के भाईयाँ म्ह उसका आच्छा नाम था ।

3 पौलुस की मर्जी या थी के वो उसके गेल्या जावै, अर जो यहूदी माणस उन जगहां म्ह थे उनकै कारण उननै उनका खतना करया, क्यूँके वे सारे जाणै थे, के उनका बाप यूनानी था ।

4 पौलुस अर उसका साथी नगर-नगर जान्दे होइ चेल्यां ताहीं वे सारे हुकम सौंपते जावै थे, जो यरुशलेम नगर के प्रेरितां अर कलीसिया के अगुवां नै तय करी थी ।

5 इस तरियां कलीसिया बिश्वास म्ह पक्की होंदी गई अर गिणती दिन-ब-दिन बधती गई ।

\*\*\*\*\*

6 वे फरुगिया अर गलातिया परदेसां म्ह तै होकै गये, क्यूँके पवित्त्र आत्मा नै उननै आसिया परदेस म्ह वचन सुणाण तै मना करया ।

7 उननै मूसिया परदेस कै लोवै पोहचकै, बिथुनिया परदेस म्ह जाणा चाह्या, पर पवित्त्र आत्मा नै उन ताहीं जाण कोनी दिया ।

8 आखर म्ह वे मूसिया परदेस तै होकै त्रोआस म्ह आये ।

9 ओड़ै पौलुस नै रात नै दर्शन देख्या के एक मकिदुनिया परदेस का माणस खड्या होया उनतै बिनती करकै कहण लागरया सै, “पार उतरकै मकिदुनिया परदेस म्ह आ, अर म्हारी मदद कर ।”

10 उसकै यो दर्शन देखदे हमनै जिब्बे मकिदुनिया परदेस जाणा चाह्या, न्यू सोचकै के परमेसवर नै म्हारै ताहीं उनतै सुसमाचार सुणाण कै खात्तर बुलाया सै ।

\*\*\*\*\*

11 इस करकै त्रोआस नगर तै जहाज खोल कै हम सीधे सुमात्राके टापू अर दुसरे दिन नियापुलिस नगर म्ह आये ।

12 ओड़ै तै हम फिलिप्पी नगर पोहचे, जो मकिदुनिया परदेस का खास नगर अर रोमियों का मोहल्ला सै, अर हम उस नगर कुछे दिन रहे ।

13 आराम के दिन हम नगर के फाटक के बाहरणै नदी के किनारे न्यू सोचकै गये के ओड़ै प्रार्थना करण की जगहां होगी, अर बैठकै उन लुगाईयाँ तै जो कट्ठी होई थी, बतळाण लागगे ।

14 थुआतीरा नगर की बैजनी लत्ते बेचण आळी एक लुदिया नाम की परमेसवर की भगतणी उनकी बात सुणाण लागरी थी । प्रभु नै उसका मन खोल्या ताके वा पौलुस की बातों पै मन लगावै ।

15 जिव उसनै अपणे कुणबे सुधा बपतिस्मा लिया, तो उसनै म्हारै तै बिनती करी, “जै थम मन्ने प्रभु की बिश्वासिणी समझो सो, तो चालकै मेरे घर म्ह रहो,” अर वा हमनै मनाके ले गई ।

\*\*\*\*\*

16 ज़िब हम प्रार्थना करण की जगहां पै जाण लागरे थे, तो हमनै एक कम उमर की दास्सी मिली जिसमह भविष्य बताण आळी आत्मा थी, अर वा भविष्य बताके अपणे मालिकां के खात्तर घणाए कमा लेवै थी।

17 वा पौलुस कै अर म्हारै पाच्छै, आकै नै किल्की मारण लागगी, “ये माणस परमप्रधान परमेसवर के दास सै, जो म्हारै ताहीं उद्धार के राह की कथा सुणावै सै।”

18 वा घणे दिनां ताहीं न्यूए कर दी रही, पर पौलुस परेशान होगया, अर बोहडकै उस ओपरी आत्मा तै बोल्या, “मै तन्नै यीशु मसीह कै नाम तै हुकम दियुं सूं के उस म्ह तै बाहरणै लिकड़ जा।” अर वा उससे बखत लिकड़गी।

19 ज़िब उसके मालिकां नै देख्या के म्हारी कमाई की आस खतम होगयी, तो पौलुस अर सीलास नै पकड़कै चौक म्ह प्रधानां कै धोरै खींच ल्याए,

20 अर उन ताहीं न्यायाधीश कै धोरै ल्याए अर बोल्ले, “ये माणस जो यहूदी सै, म्हारे नगर म्ह दंगा मचाण लागरे सै,

21 अर इसे रीति-रिवाज बतावै सै, जिन ताहीं हम रोमियाँ कै खात्तर अपणाना सही कोनी।”

22 फेर भीड़ के माणस उनके बिरोध म्ह कट्टे होके उनपै चढ़ याए, अर हाकिमां नै उनके लत्ते पाड़कै उतार दिये, अर उनके बैत मारण का हुकम दिया।

23 घणी बैत मारे पाच्छै उननै उन ताहीं जेळ म्ह गेर दिया अर दरोगगा ताहीं हुकम दिया के उननै चौकस राखिये।

24 उसनै इसा हुकम पाकै उन ताहीं भित्तरी कोठड़ी म्ह राख्या अर उनके पाँ काठ की बेड़ियाँ तै जकड़ दिये।

~~~~~

25 आध्नी रात के बखत पौलुस अर सीलास प्रार्थना करदे होए परमेसवर के भजन गाण लागरे थे, अर कैदी उनकी सुणण लागरे थे।

26 इतनै म्ह चाणचक बड़ड़ा हाल्लण आ गया, उरै ताहीं के जेळ की नीम भी हालगी, अर जिब्बे सारे दरबाजे खुलगे, अर सारया के बन्धन खुलके पड़गे।

27 दरोगगा जागगया, अर जेळ के दरबाजे खुल्ले देखकै समझ गया के कैदी भाजगे सै, इस करके उसनै तलवार खिंचकै खुद ताहीं मारणा चाह्या।

28 पर पौलुस नै टाड़ू आवाज म्ह रुक्का मारया, “अपणे-आपनै किमे नुकसान ना पोहोचाइये, क्यूँके हम सारे उरैए सां।”

29 फेर दरोगगा दिवां मँगाकै भित्तरी आया, अर काम्बदा होया पौलुस अर सीलास कै आगुँ पडचा,

30 अर उन ताहीं बाहरणै ल्याकै बोल्या, “हे भले माणसां, उद्धार पाण कै खात्तर मै के करहँ?”

31 उननै कह्या, “प्रभु यीशु मसीह पै विश्वास कर, तो तू अर तेरा कुण्बा उद्धार पावैगा।”

32 अर उननै उस ताहीं अर उसके सारे घर के माणसां ताहीं प्रभु का वचन सुणाया।

33 रात नै उससे बखत उसनै उन ताहीं ले जाकै उनके घाव धोये, अर उसनै अपणे सारे माणसां सुधा जिब्बे बपतिस्मा लिया।

34 फेर दरोगगै नै उन ताहीं अपणे घरां ले जाकै उनके आगुँ खाणा धरया, अर साब्बे कुण्वे सुधा परमेसवर पै विश्वास करके आनन्द करया।

35 आगले दिन फेर हाकिमां नै सिपाहियाँ के हाथ्यां कहवां भेज्या के उन माणसां नै छोड़ द्यो।

36 दरोगगै नै ये बात पौलुस तै कही, “हाकिमां नै धारे ताहीं छोड़ देण का हुकम दिया सै। ज्यातै इब खुश होके जाओ।”

37 पर पौलुस नै उनतै कह्या, “उननै म्हारै ताहीं जो रोमी माणस सै, कसूरवार ठहराए बिना माणसां कै स्याम्ही मारया अर जेळ म्ह गेरया। इब के हमनै बोल-बाल्ले लिकाड़ण लागरे सै? इसा कोनी, पर वे खुद आकै हमने बाहरणै लिकाड़े।”

38 सिपाहियाँ नै ये बात हाकिमां तै कही, अर वे न्यू सुणकै के वे रोम के बासिन्दे सै, डरगे,

39 अर आकै उन ताहीं मनाया, अर बाहरणै ले जाकै बिनती करी के नगर चले जाओ ।

40 वे जेठ तै लिकड़कै लुदिया कै उरै गये, अर विश्वासी भाईयाँ तै भेंट करकै उन ताहीं शान्ति देई, अर चले गये ।

17

XXXXXXXXXX XXX XXX

1 पौलुस अर सीलास अम्फिपुलिस अर अपुल्लोनिया नगरां तै होकै थिस्सलुनीके नगर म्ह आये, जित्त यहूदियाँ का एक आराधनालय था ।

2 पौलुस अपणी रीत कै मुताबिक उनकै धोरै गया, अर तीन्नु आराम कै दिनां म्ह पवित्र ग्रन्थ म्ह तै उनके गेल्या बहस करी,

3 अर वो उनका मतलब खोल-खोल कै समझावै था के मसीह नै दुख ठाणा, अर मरे होया म्ह तै जिन्दा उठणा, जरूरी था, अर “योए यीशु जिसकी मै थमनै कथा सुणाऊँ सूं, मसीह सै।”

4 कितने यहूदी अर परमेसवर के भगत यूनानियाँ म्ह तै घणखरयां नै, अर घणी आच्छे खानदान की लुगाईयाँ नै मान लिया, अर पौलुस अर सीलास कै गेल्या मिलगे ।

5 पर यहूदियाँ नै जळण तै भरकै बाजारू माणसां म्ह तै कुछ दुष्ट माणसां ताहीं अपणे गेल्या लिया, अर भीड़ कट्टी करकै नगर म्ह दंगा मचाण लागगे, अर यासोन कै घर पै चढ़ाई करके उन ताहीं आदमियाँ कै स्याम्ही ल्याणा चाह्या ।

6 उननै जिव वे ओड़ै न्ही मिले तो वे किल्की मारदे होए यासोन अर कुछ विश्वासी भाईयाँ ताहीं नगर के हाकिमां कै स्याम्ही खींच ल्याए, “थे माणस जिन नै दुनिया ताहीं उल्टा-पुल्टा कर दिया सै, उरै भी आ लिए सै ।

7 यासोन नै उन ताहीं अपणे घरां रहण की इजाजत दी सै । ये सारे के सारे न्यू कहवै सै के यीशु राजा सै, अर कैसर के हुकमां का बिरोध करै सै ।”

8 उननै आदमियाँ ताहीं अर नगर के हाकिमां ताहीं न्यू सुणाकै डरा दिया ।

9 ज्यातै उननै यासोन अर बाकी माणसां तै जमानत पै उन ताहीं छोड़ दिया ।

XXXXXXXXXX XXX XXX

10 विश्वासी भाईयाँ नै जिब्बे राते-रात पौलुस अर सीलास ताहीं बिरिया नगर भेज दिया, अर वे ओड़ै पोहचकै यहूदियाँ के आराधनालय म्ह गये ।

11 ये माणस तो थिस्सलुनीके नगर के यहूदियाँ तै आच्छे थे, अर उननै घणे चाहू तै वचन अपणाया, अर हर-रोज पवित्र ग्रन्थां म्ह टोहन्दे रहे के ये बात न्यू सै के न्ही ।

12 ज्यातै उन म्ह तै घणखरयां नै, अर यूनानी आच्छे खानदान की बिरबानियाँ म्ह तै अर माणसां म्ह तै भी घणखरयां नै विश्वास करया ।

13 पर जिव थिस्सलुनीके नगर के यहूदी जाणगे के पौलुस बिरिया नगर म्ह भी परमेसवर का वचन सुणावै सै, तो ओड़ै भी माणसां ताहीं उकसाण अर गड़बड़ मचाण लागगे ।

14 फेर विश्वासी भाईयाँ नै जिब्बे पौलुस ताहीं बिदा करया के समुन्दर कै किनारे चल्या जावै, पर सीलास अर तीमुथियुस बिरिया रहगे ।

15 पौलुस के मददगार उस ताहीं एथेंस नगर तक लेगे, अर सीलास अर तीमुथियुस कै खात्तर या आज्ञा पाके बिदा होए के उसकै धोरै घणी तगाजै तै आवै ।

XXXXXXXXXX XXX XXX

16 जिव पौलुस एथेंस नगर म्ह उसकी बाट देखै था, तो नगर नै मूर्तियाँ तै भरया होड़ देखकै भोत परेशान होगया ।

17 इस करकै वो आराधनालय म्ह यहूदियाँ तै अर भगतां तै, अर चौक म्ह जो माणस उसतै फेटै थे उनतै हरेक दिन बहस करया करै था ।

18 फेर इपिकूरी अर स्तोईकी उपदेशकां म्ह तै कुछे उसतै तर्क करण लागगे, अर कुछां नै कह्या, “यो बकवादी के कहणा चाहवै सै?” पर दुसरयां नै कह्या, “वो दुसरे देवत्यां का प्रचारक दिक्खै सै” क्यूँके वो यीशु का अर पुनरुत्थान का सुसमाचार सुणावै था।

19 फेर वे उसनै अपणे गेल्या अरियुपगुस नामक आराधनालय म्ह लेगे अर बुद्धया, “के हम जाण सकां सां के यो नया पंथ जो तू सुणावै सै, के सै?”

20 क्यूँके तू अनोक्खी बात म्हारै ताहीं सुणावै सै, ज्यातै हम जाणणा चाहवां सां के इनका के मतलब सै।”

21 (ज्यातै के सारे एथेंसवासी अर परदेशी जो ओडै रहवै थे, नयी-नयी बात कहण अर सुणण कै सिवाए और किसे काम म्ह बखत कोनी बितावै थे।)

XXXXXXXXXX XX XXX XXX XXXXX XX XXXX

22 फेर पौलुस नै अरियुपगुस के बिचाळे खड्ड होके कह्या, “हे एथेंस के माणसां, मै देखूँ सू के थम हर बात म्ह देवत्यां के घणे मानण आळे सो।

23 क्यूँके मै हांडदे होए जिब थारी पूज्जण की चिज्जां नै देखण लागरया था, तो एक इसी वेदी* भी मिली, जिसपै लिख्या था, ‘अनजाणे ईश्वर कै खात्तर।’ इस करके जिसनै थम बिना बेरे पूज्जो सो, मै थमनै उस्से परमेसवर का सुसमाचार सुणाऊँ सू।”

24 जिस परमेसवर नै धरती अर उसकी सारी चिज्जां ताहीं बनाया, वो सुर्ग अर धरती का मालिक होके, हाथ के बनाए होइ मन्दरां म्ह कोनी रहन्दा,

25 उसनै माणसां की जरूरत कोनी, क्यूँके वो तो खुदे सारया ताहीं जिन्दगी अर साँस अर सारा किमे देवै सै।

26 उसनै एक ए मूल तै माणसां की सारी जात सारी धरती पै रहण कै खात्तर बनाई सै, अर उनकै ठहराए होइ बखत अर रहण या निवास की हदां ताहीं ज्यातै बाँधया सै,

27 के वे परमेसवर नै टोहवै, कदाचित उस ताहीं टटोळकै पावै, फेरभी वो म्हारै म्ह तै किसे तै दूर कोनी।

28 क्यूँके उस्से म्ह म्हारा जीवन, चलणा-फिरणा अर म्हारी पहचान बणै सै, जिस ढाळ थारे कितने कवियाँ नै भी कह्या सै, “हम तो उस्से के वंशज सां।”

29 “इस करके म्ह परमेसवर का वंश होके म्हारा यो समझणा सही कोनी के ईश्वरत्व सोन्ने-चाँदी, पत्थर के जिसा सै, जो माणसां की कारीगरी अर कल्पना तै गढ़े गये हों।

30 ज्यातै परमेसवर नै अज्ञानता के बखत पै खियास कोनी करी, पर इब हरेक जगहां सारे माणसां ताहीं पाप छोड़ण का हुकम देवै सै।

31 क्यूँके उसनै एक दिन तय करया सै, जिसम्ह वो धार्मिकता म्ह खुद के जरिये ठहराया गये उस माणस के जरिये दुनिया का न्याय करैगा, जिन ताहीं उसनै मरे होया म्ह तै दुबारा जिन्दा करके या बात सारे माणसां के स्याम्ही साबित कर दी सै।”

32 मरे होया के पुनरुत्थान की बात सुणके कुछ तो मखौल करण लागगे, अर कुछां नै कह्या, “या बात हम तेरे तै फेर कदे सुणांगे।”

33 इसपै पौलुस उनकै बिचाळे तै लिकड़गया।

34 पर कई माणस प्रभु यीशु के गेल्या मिलगे, अर विश्वास करया, जिन म्ह दियुनुसियुस जो अरियुपगुस का सदस्य था, अर दमरिस नामकी एक लुगाई थी, अर उनकै गेल्या कुछ और भी माणस थे।

18

XXXXXXXXXX XXX XXX

1 इसके पाछे, पौलुस एथेंस नगर नै छोड़के कुरिन्थुस नगर म्ह आया।

* 17:23 17:23 वेदी-परमेसवर ताहीं भेट चढ़ाण खात्तर एक जगहां

2 ओडै उसने अक्विला नामक एक यहूदी मिल्या, जिसका जन्म पुन्तुस परदेस म्ह होया था। वो अपणी घरआळी पिरसकिल्ला के गेल्या इटली देश तै इब्बे आया था, क्यूँके सम्राट क्लौदियुस नै सारे यहूदियाँ ताहीं रोम तै लिकड़ जाण का हुकम दिया था। ज्यांतै वो उनके उरै गया।

3 पौलुस अर अक्विला का एक ए काम-धन्धा था, इस करके वो उनके गेल्या रहया अर वे काम करण लागगे, अर उनका काम-धन्धा तम्बू बणाण का था।

4 पौलुस हरेक आराम कै दिन आराधनालय म्ह बहस करके यहूदियाँ अर यूनानियाँ ताहीं भी समझावै था, के यीशु ए मसीह सै।

5 जिव सीलास अर तीमुथियुस मकिदुनिया परदेस तै आये, तो पौलुस वचन सुणाण की धुन म्ह यहूदियाँ ताहीं गवाही देण लागया के यीशु ए मसीह सै।

6 पर जिव यहूदी बिरोध अर बुराई करण लागगे, तो उसने अपणे लत्यां तै धूळ झाड़के उनतै कह्या, “इब जै परमेसवर थमनै इस पाप की सजा देवै तो उसकी मौत के जिम्मेदार थम खुदे हो! मै बेकसूर सूँ। इब तै मै गैर यहूदियाँ के धोरै जाऊँगा।”

7 पौलुस यहूदी आराधनालय तै लिकड़के वो तीतुस यूस्तुस नामक परमेसवर के एक भगत कै घरां आया, जिसका घर आराधनालय तै लागया होड़ था।

8 फेर आराधनालय के सरदार किरस्पुस नै अपणे सारे कुणवे सुधा प्रभु पै बिश्वास करया, अर घणखरे कुरिन्थवासी सुणके बिश्वास लाये, अर बपतिस्मा लिया।

9 प्रभु नै एक रात दर्शन के जरिये पौलुस तै कह्या, “मतना डरै, बल्के कहे जा अर बोल-बाल्ला मतना रहवै,

10 क्यूँके मै तेरे गैल सूँ, अर कोए तेरे पै चढ़ाई करके तेरा नुकसान कोनी करैगा, क्यूँके इस नगर म्ह मेरे घणे माणस सै।”

11 ज्यांतै पौलुस उन म्ह परमेसवर का वचन सिखान्दे होए डेढ़ साल ताहीं रहया।

12 जिव गल्लियो अखाया परदेस का राज्यपाल था, तो यहूदी माणस एक्का करके पौलुस पै चढ़ आये, अर उस ताहीं न्याय गद्दी के स्याम्ही ल्याके कहण लागगे,

13 “यो माणसां नै समझावै सै, के परमेसवर की आराधना इस ढाळ तै करो, जो नियम-कायदे के उल्ट सै।”

14 जिव पौलुस बोल्लण पैए था, तो गल्लियो नै यहूदियाँ ताहीं कह्या, “हे यहूदियों, जै या किमे अन्याय या दुष्टता की बात होन्दी, तो सही था के मै थारी सुणदा।

15 पर जै या बहस शब्दां, अर नाम्मां, अर थारे उरै के नियम-कायदे के बारे म्ह सै, तो थमे जाणो, क्यूँके मै इन बाततां का न्यायाधीश कोनी बणाण चाहन्दा।”

16 अर उसने उन ताहीं न्याय गद्दी के स्याम्ही तै लिकाड़ दिया।

17 जद सारे माणसां नै आराधनालय के सरदार सोस्थिनेस ताहीं पकड़के न्याय गद्दी के स्याम्ही मारया। पर गल्लियो नै इन बाततां की भी किमे चिन्ता कोनी करी।

??????????

18 पौलुस घणे दिन ताहीं कुरिन्थुस नगर रहया। फेर बिश्वासी भाईयाँ तै बिदा होके किश्रिया बन्दरगाह म्ह ज्यांतै सिर मुण्डाया, क्यूँके उसने मन्त मान्नी थी, अर जहाज पै सीरिया परदेस नै चल्या गया अर उसके गेल्या पिरसकिल्ला अर अक्विला थे।

19 उसने इफिसुस नगर पोहचके उन ताहीं ओडै छोड्या, अर खुद आराधनालय म्ह जाके यहूदियाँ तै बहस करण लागया।

20 जिव माणसां नै उसतै बिनती करी, “म्हारै गेल्या कुछ और दिन रह।” तो उसने कोनी मान्नी,

21 पर न्यू कहके उसतै बिदा होया, “जै परमेसवर नै चाह्या तो मै थारे धोरै फेर आऊँगा।” फेर वो इफिसुस नगर तै जहाज खोल के चाल दिया,

22 अर कैसरिया नगर म्ह उतरकै (यरुशलेम नगर नै) गया अर कलीसिया ताहीं नमस्कार करकै अन्ताकिया नगर म्ह आया ।

~~~~~

23 फेर किमे दिन रहके वो ओड़े तै लिकइया, अर एक और तै गलातिया अर फरुगिया परदेसां म्ह सारे चेल्यां ताहीं स्थिर करदा हांडया ।

~~~~~

24 अपुल्लोस नामक एक यहूदी, जिसका जन्म सिकन्दरिया नगर म्ह होया था, जो ज्ञान्नी माणस था अर पवित्र ग्रन्थ ताहीं आच्छी तरियां तै जाणै था, इफिसुस नगर म्ह आया ।

25 उसनै प्रभु के राह की शिक्षा पाई थी, अर मन लाके यीशु के बारे म्ह सही-सही सुणावै अर सिखावै था, पर वो सिर्फ यहून्ना के बपतिस्मा की बात जाणै था ।

26 वो आराधनालय म्ह बिना डरे बोल्लण लागया, अर पिरसकिल्ला अर अक्विला उसकी बात सुणकै उस ताहीं अपणे उरै लेगे अर परमेसवर की राह उस ताहीं और भी सही-सही बताई ।

27 जब उसनै फैसला करया के पार उतरकै अखाया परदेस म्ह जावै तो विश्वासी भाईयां नै उस ताहीं धीरज बन्धाके चेल्यां ताहीं लिख्या के वे उसतै आच्छी ढाळ फेटे, अर उसने ओड़े पोहचके उन माणसां की घणी मदद करी जिन नै अनुग्रह के कारण विश्वास करया था ।

28 क्यूँके वो पवित्र ग्रन्थ तै सबूत दे-देके के यीशु ए मसीह सै, घणे तावळेपण तै यहूदियां ताहीं सारया के स्याम्ही निरुतर (बोलती बन्द) करदा रहया ।

19

~~~~~

1 जब अपुल्लोस कुरिन्थुस नगर म्ह था, तो पौलुस उप्पर के सारे परदेस तै होकै इफिसुस नगर म्ह आया । ओड़े कई चेल्यां ताहीं मिल्या ।

2 उनतै बोल्या, “के थमनै विश्वास करदे बखत पवित्र आत्मा पाया था?” उननै उसतै कह्या, “हमनै तो पवित्र आत्मा का जिक्र भी कोनी सुण्या ।”

3 पौलुस नै उनतै कह्या, “तो फेर थमनै किसका बपतिस्मा लिया?” वे बोल्ले, “यहून्ना का बपतिस्मा ।”

4 पौलुस बोल्या, “यहून्ना नै न्यू कह्या, के पाप करणा छोड़ दो, अर बपतिस्मा ल्यो, परमेसवर थारे पाप माफ कर देगा, अर जो मेरै पाच्छै आण आळा सै, उसपै विश्वास करियो, यानिके यीशु पै ।”

5 न्यू सुणके उननै प्रभु यीशु के नाम म्ह बपतिस्मा लिया ।

6 जब पौलुस नै उनपै हाथ धरे, तो पवित्र आत्मा उनपै उतरया, अर वे अन्य-अन्य भाषा बोल्लण अर भविष्यवाणी करण लागगे ।

7 ये सारे करीबन बारहा माणस थे ।

8 पौलुस आराधनालय म्ह जाके तीन महिन्ने ताहीं बिना डरे होकै बोल्दा रहया, अर परमेसवर के राज्य के बारे म्ह बहस करदा अर समझान्दा रहया ।

9 पर जो माणसां कठोर थे उननै उसका विश्वास कोनी करया, बल्के माणसां के स्याम्ही इस पंथ नै बुरा कहण लागगे, तो उसनै उन ताहीं छोड़ दिया अर चेल्यां ताहीं साथ लेके तुरन्तुस की पाठशाला म्ह गये, जित्त वे रोज भीड़ तै परमेसवर के बारे म्ह बहस करया करै थे ।

10 दो साल ताहीं न्यूए होन्दा रहया, उरै ताहीं के आसिया परदेस के रहणीये के यहूदी के यूनानी सारया नै प्रभु का वचन सुण लिया ।

11 परमेसवर नै पौलुस ताहीं अदभुत चमत्कार करण की सामर्थ दी ।

12 उरै ताहीं के रूमाल अर अन्गोछे, उसके गात तै छुआ के बिमारां पै गेरै थे, अर उनकी बीमारी जान्दी रहवै थी, अर भुंडी ओपरी आत्मा उन म्ह तै लिकइ जाया करै थी ।

13 पर कुछ यहूदी लोग जो झाड़ा-फूंक करदे हान्डे थे, न्यू करण लागगे के जिन म्ह भुंडी ओपरी आत्मा हो उनपै प्रभु यीशु का नाम न्यू कहकै फूँके, “जिस यीशु का प्रचार पौलुस करै सै, मै थारे ताहीं उस्से आदमी की कसम दियुं सूँ।”

14 अर स्क्कवा नाम का एक यहूदी प्रधान याजक के सात बेटे थे, जो इस्से तरियां ए करै थे।

15 पर भुंडी ओपरी आत्मा नै उन ताहीं जवाब दिया, “यीशु ताहीं मै जाणुं सूँ, अर पौलुस ताहीं भी पिच्छाणुं सूँ, पर थम कौण सो?”

16 अर उस माणस नै जिसम्ह भुंडी ओपरी आत्मा थी उनपै लपककै अर उन ताहीं बस म्ह करकै, उनपै इसा दुर्गति मचाया के वे उधाड़े अर घायल होकै उस घर तै लिकड़ भाज्जे।

17 या बात इफिसुस नगर के रहण आळे सारे यहूदी अर यूनानी भी जाणगे, अर वे सारे डरगे, अर प्रभु यीशु के नाम की बड़ाई होई।


18 जिन नै विश्वास करया था, उन म्ह तै घणखरयां नै आकै अपणे-अपणे काम्मां ताहीं मान लिया अर दिखा दिया।

19 जादू करण आळा म्ह तै घणाए नै अपणी-अपणी सारी पोथी कट्टी करकै सारया के स्याम्ही जळा दी, अर जिव उसका दाम जोड़या गया, तो पचास हजार चाँदी के सिक्के के बराबर लिकड़या।

20 इस तरियां प्रभु का वचन सामर्थी तरिकके तै फैलदा अर हावी होंदा गया।

21 जिव ये बात हो ली तो पौलुस नै आत्मा म्ह ठाण लिया के मकिदुनिया अर अखाया परदेस तै होकै यरुशलैम नगर जाऊँ, अर बोल्या, “यरुशलैम जाणके बाद मन्नै रोम ताहीं भी देखणा जरूरी सै।”

22 इस करकै अपणी सेवा करणीया म्ह तै तीमुथियुस अर इरास्तुस ताहीं मकिदुनिया परदेस भेजकै खुद किमे दिन आसिया परदेस म्ह रहग्या।



23 उस बखत उस पन्थ के बारे म्ह घणा दंगा माच्य़ा।

24 क्यूँके देमेतियुस नाम का एक सुनार अरतिमिस के चाँदी के मन्दर बणवाकै कारिगरां ताहीं घणा काम दुवाया करै था।

25 उसनै उन ताहीं अर इस्से तरियां की चिज्जां के कारिगरां ताहीं कट्टा करकै कह्या, “हे भाईयो, थमनै बेरा सै के इस काम तै हमनै कितना धन मिलै सै।

26 थम देखो अर सुणो सो के सिर्फ इफिसुस नगर म्ह ए कोनी, बल्के कई बर सारे आसिया परदेस म्ह न्यू कह-कहकै इस पौलुस नै घणे माणसां ताहीं समझाया अर भकाया भी सै, के जो हाथ की कारीगरी सै, वे ईश्वर कोनी।

27 इसतै इब सिर्फ इस्से बात का ए भय न्ही सै के म्हारै इस धन्धे की इज्जत-मान जान्दी रहवैगी, बल्के न्यू भी के महान् देवी अरतिमिस का मन्दर तुच्छ समझया जावैगा, अर जिस ताहीं सारा आसिया परदेस अर दुनिया पूज्जै सै उसका महत्व भी जान्दा रहवैगा।”

28 कारीगर न्यू सुणकै खुन्दक तै भरगे अर किल्की मार-मारकै कहण लागगे, “इफिसियाँ की अरतिमिस देवी, महान् सै!”

29 अर सारे नगर म्ह घणा दंगा माचग्या, अर माणसां नै मकिदुनियावासी गयुस अर अरिस्तर्खुस ताहीं जो पौलुस के संगी मुसाफर थे, पकड़ लिया, अर एक सेती रंगशाला म्ह भाजगे।

30 जिव पौलुस नै माणसां के धौरै भीत्तर जाणा चाह्या तो चेल्यां नै उस ताहीं जाण न्ही दिया।

31 आसिया परदेस के हाकिमां म्ह तै भी उसके कई साथियाँ नै उसके धौरै कहां भेज्या अर बिनती करी के रंगशाला म्ह जाकै जोखम ना टाईयो।

32 भीड़ म्ह तै कोए कुछ चिल्लावै था अर कोए कुछ, सारी भीड़ पूरी तरियां घबराई होई थी, अर घणखरे माणसां नै तो न्यूए कोनी बेरा था के वे क्यां खात्तर कट्टे होए सै।

33 फेर उननै सिकन्दर ताहीं, जिस ताहीं यहूदियाँ नै खडचा करया था, भीड़ म्ह आगगै बढ़ाया। सिकन्दर हाथ तै इशारा करके माणसां के स्याम्ही जवाब देणा चाहवै था।

34 पर जिब उननै बेरा लागग्या के वो यहूदी सै, तो सारे के सारे एक बोल म्ह कोए दो घंटे ताहीं चिल्लान्दे रहे, “इफिसियाँ की अरतिमिस देवी, महान् सै।”

35 फेर नगर के मन्त्री नै माणसां ताहीं शान्त करके कह्या, “हे इफिसुस नगर के माणसां, किसनै न्ही बेरा के इफिसियाँ का नगर महान् अरतिमिस देवी के मन्दर, अर ज्यूस की ओड़ तै गिरी होड़ मूर्ति का टहलुआ सै।”

36 आखर म्ह जिब के इन बातों का खण्डन ए कोनी हो सकदा, तो सही सै के थम शान्त रहो अर बिना सोच्चे-समझे किमे ना करो।

37 क्यूँके थम इन माणसां नै ल्याए सो जो ना मन्दर के लुट्टण आळे सै अर ना म्हारी देवी के बुराई करणीये सै।

38 इस करके देमेट्रियुस अर उसके मित्र-कारिगरां ताहीं किसे तै एतराज हो तो कच्चेड़ी जा सकै सै अर हाकिम भी सै, वे एक-दुसरे पै दोष लावै।

39 पर जै थम किसे और बात कै बारै म्ह किमे बुझणा चाहो सो, तो बखत पै सभा म्ह फैसला करया जावैगा।

40 आज की इस घटना के कारण म्हारै पै उपद्रव का इल्जाम लागगण का खतरा सै, क्यूँके इसकै खात्तर कोए भी टोस कारण दिखाई कोनी देदा, “हम इस भीड़ के कट्टा होण का कोए जवाब कोनी दे सकांगे।”

41 न्यू कहकै उसनै सभा ताहीं बिदा करया।

## 20

### XXXXXXXXXX, XXXXXX XX XXXXXXX XXX XXXXX

1 जिब दंगा थम ग्या तो पौलुस नै चेल्यां ताहीं बुलाके उत्साहित करया, अर उनतै बिदा होकै मकिदुनिया परदेस की ओड़ चाल दिया।

2 उस सारे परदेस म्ह तै होकै अर चेल्यां ताहीं घणा समझाके वो यूनान देश म्ह आया।

3 जिब तीन महिन्ने रहकै वो ओड़ै तै जहाज पै सीरिया परदेस की ओड़ जाण पै था, तो यहूदी अगुवें उसकी टाह म्ह लागगे, ज्यातै उसनै निश्चय करया के मकिदुनिया परदेस होकै बोहड़ जावै।

4 बिरीयावासी पुरुस का बेट्टा सोपत्रुस अर थिस्सलुनीकियों नगर म्ह तै अरिस्तर्खुस अर सिकुन्दुस, अर दिरवे नगर का गयुस, अर तीमुथियुस, अर आसिया परदेस का तुखिकुस अर त्रुफिमुस आसिया परदेस ताहीं उसके गैल हो लिये।

5 ये म्हारे मुसाफिर साथी म्हारे तै पैहले चले गये।

6 अर हम अखमीरी रोटी के त्यौहार के दिनां कै पाच्छै, फिलिप्पी तै जहाज पै चढ़के पाँच दिन म्ह त्रोआस म्ह उसके धारै पोहचे, अर सात दिन ताहीं रहे।

### XXXXXXXXXX XXX XXXXXXXXXX XXXXXXX XXXXXXX XXXXX

7 हफ्ते के पैहल्ले दिन जिब हम प्रभुभोज के खात्तर कट्टे होए, तो पौलुस जो दुसरे दिन चले जाण पै था, उनतै बात करी, आध्धी रात ताहीं बात करदा रहया।

8 जिस चौबारे पै हम कट्टे थे, उस म्ह घणे दीवे जळण लागरे थे।

9 अर यूतुखुस नाम का एक जवान खिड़की पै बेटचा होया नीद की झपकियाँ लेण लागरया था। जिब पौलुस वारी ताहीं बात करदा रहया तो यूतुखुस नीद के झोक्के म्ह तीसरी अटारी पै तै पड़ग्या, अर उसकी मौत होगी।

10 पौलुस नीच्चे गया, उसके धारै जाके उसतै लिपटग्या, अर गळे लाके कह्या, “घबराओ ना, वो जीवै सै।”

11 अर उसनै दुबारा उप्पर जाकै रोट्टी तोड़ी\* अर खाकै दिन लिकइण ताहीं उनतै बात करदा रहया, सबेरा होगया। फेर वो चल्या गया।

12 अर वे उस जवान ताहीं जिन्दा लियाए अर माणस भोत खुश होए।

\*\*\*\*\*

13 हम पाणी के जहाज पै सवार होकै अस्सुस नगर की ओड़ बढ़े, जडै हमनै पौलुस ताहीं साथ लैके आगै बढ़णा था, पर पौलुस ओड़ै पैदल राह तै पोहोचा था, क्यूँके या उसकी पैहले तै बणाई तरकीब थी।

14 अस्सुस नगर उन ताहीं मिल्या तो हमनै उस ताहीं पाणी के जहाज म्ह अपणे साथ लिया अर मितुलेने नगर म्ह जा पोहचे।

15 ओड़ै तै जहाज खोल के हम दुसरे दिन खियुस टापू के स्याम्ही पोहचे, अर आगले दिन सामुस टापू म्ह जाण लागे, पर उसके आगले एक दिन के बाद मीलेतुस बन्दरगाह म्ह आये।

16 पौलुस नै इफिसुस नगर म्ह ना उतरकै आगै बढ़ जाण का इरादा करया क्यूँके वो चाहवै था के आसिया परदेस म्ह टैहरण की बजाए जै हो सक्या तो तगाजै तै पिन्तेकुस्त के त्योहार के मौकैके पै यरुशलेम नगर म्ह पोहच जावै।

\*\*\*\*\*

17 मीलेतुस नगर तै पौलुस नै इफिसुस नगर म्ह समाचार भेजकै कलीसिया के अगुवां ताहीं बुलवाया।

18 जिब वे उसकै लोवै आये, तो उनतै कह्या “थमनै बेरा सै के पैहल्डे ए दिन तै जिब मै आसिया परदेस म्ह पोंहच्या, मै हर-बखत थारे गेल्या किस ढाळ रहया,

19 यानिके घणी दीनता तै, अर आँसू बहा-बहाकै, अर उन मुसीबतां म्ह जो यहूदियाँ की साजिस के कारण मेरै पै आण पड़ी, मै प्रभु की सेवा करदा ए रहया।

20 अर जो-जो बात थारे फायदे की थी, उन ताहीं बताण अर माणसां के स्याम्ही अर घर-घर सिखाण तै कदे न्ही झिझक्या,

21 बल्के यहूदियाँ अर यूनानियाँ के स्याम्ही गवाही देदा रहया के परमेसवर की ओड़ मन फिराणा अर म्हारै प्रभु यीशु पै विश्वास करणा चाहिये।”

22 इब देक्खो, मै पवित्तर आत्मा म्ह बन्धया होया यरुशलेम नगर नै जाऊँ सूँ, अर मन्नै न्ही बेरा के ओड़ै मेरै पै के-के बीतैगी।

23 सिर्फ यो के पवित्तर आत्मा हरेक नगर म्ह गवाही दे-देकै मेरै तै कहवै सै के बन्धन अर क्लेश तरे खात्तर त्यार सै।

24 पर मै अपणी जान नै किमे न्ही समझदा के उसतै प्यार राक्खूँ, बल्के यो के मै अपणी दौड़ ताहीं अर उस सेवा नै पूरी करूँ, जो मन्नै परमेसवर के अनुग्रह के सुसमाचार पै गवाही देण के खात्तर प्रभु यीशु तै पाई सै।

25 इब देक्खो, मन्नै बेरा सै के थम सारे जिन म्ह मै परमेसवर के राज्य का प्रचार करया सै, मेरा मुँह दुबारा कोनी देक्खोगे।

26 ज्यांतै मै आज के दिन थारे तै गवाही देकै कहूँ सूँ, के मै किसे की भी मौत का कसूरवार न्ही सूँ।

27 क्यूँके मै परमेसवर की सारी इच्छा नै थारे ताहीं बताण म्ह कदे कोनी हिचकिचाया।

28 इस करके थम अपणा ध्यान राक्खो अर उस टोळ का भी, जिसका रुखाळा थारे ताहीं पवित्तर आत्मा टहराया सै, के थम परमेसवर की कलीसिया की रुखाळी करो, जिस ताहीं उसनै खुद अपणे लहू तै मोल लिया सै।

29 मन्नै बेरा सै के मेरै जाणकै बाद पाड़ण आळे भेड़िये थारे म्ह आवैगें जो टोळ नै कोनी छोड़डैगें।

30 थारे ए बिचाळै तै भी इसे-इसे माणस उटैगें, जो चेल्यां ताहीं अपणे पाच्छै, खीच लेण ताहीं टेढ़ी-मेढ़ी बात कहवैगें।

\* 20:11 20:11 रोट्टी तोड़ण-प्रभु भोज

31 इस करकै जागदे रहो, अर याद राख्खो के मन्नै तीन साल्लां ताहीं रात-दिन आँसू बहा-बहाकै हरेक ताहीं चेतावनी देणा न्ही छोडचा।

32 “अर इब मै थमनै परमेसवर अर उनके अनुग्रह के वचन की देखभाळ म्ह सौपण लागरया सं, जिस म्ह थारी बढोतरी करण अर उन सब के साथ मीरास देण की ताकत सै, जो प्रभु खात्तर न्यारे करे गये सै।

33 मन्नै किसे के चाँदी, सोन्ने या लत्ते का लोभ कोनी करया।

34 थमनै खुदे बेरा सै के इन्हे हाथ्यां नै मेरी अर मेरे साथियाँ की जरूरत पूरी करी सै।

35 मन्नै थारे ताहीं सारया किमे करकै दिखाया के इस तरियां तै मेहनत करदे होए कमजोरां ताहीं सम्भालणा अर प्रभु यीशु के वचन याद राखणा जरूरी सै, जो उसनै खुदे कह्या सै: ‘लेण तै देणा धन्य सै।’”

36 न्यू कहकै उसनै गोड्डे टेक्के अर उन सारया कै गेल्या प्रार्थना करी।

37 फेर वे सारे घणे रोये अर पौलुस कै गळे लिपटकै उस ताहीं चुम्प लाग्गे।

38 वे खासकर इस बात तै दुखी थै जो उसनै कही थी के थम मेरा मुँह दुबारा कोनी देखखोगे। इसके बाद वे पौलुस के साथ पाणी के जहाज तक गये।

## 21

ॐ नमो भगवते वासुदेवाय

1 जिव हमनै उनतै न्यारे होकै जहाज खोल्या, तो सीध्नी राही तै कोस टापू म्ह आये, अर दुसरे दिन रुदुस टापू म्ह अर ओडै तै पतरा टापू म्ह।

2 ओडै एक जहाज फीनीके परदेस नै जान्दा होया मिल्या, अर हमनै उसपै चढकै अपना सफर शुरु करया।

3 हमनै ओळै हाथ कान्ही साइप्रस टापू दिखया, तो हम उसनै छोडकै सीरिया परदेस की ओड बढते गये अर सूर नगर म्ह जा पोहचे, क्यूँके ओडै जहाज तै समान उतारया जाणा था।

4 चेल्यां नै पाकै हम ओडै सात दिन ताहीं रहे। उननै पवित्र आत्मा के सिखाए पौलुस तै कह्या के ओडै (यरुशलेम नगर म्ह) पाँ ना धरिये।

5 सात दिन के बाद जिव ओडै तै म्हारे जाण का बखत आया, तो वे पूरे परिवार कै साथ म्हारै ताहीं बिदा करण खात्तर नगर की सीमा तक आये, अर समन्दर के किनारे हमनै घुटने टेककै प्रार्थना करी,

6 फेर एक-दुसरे तै बिदा होकै, हम तो जहाज पै चढगे अर वे अपणे-अपणे घरां बोहड़गे।

7 जिव हम सूर नगर तै जहाज पै सफर करकै पतुलिमयिस नगर म्ह पोहचे, अर विश्वासी भाईयाँ नै नमस्कार करके उनकै गेल्या एक दिन रहे।

8 दुसरे दिन हम ओडै तै चालके कैसरिया नगर म्ह आये, अर फिलिप्पुस सुसमाचार प्रचारक कै घर म्ह जो उन सात आदमियाँ म्ह तै एक था, जिन ताहीं प्रेरितां नै बिधवा जनानियाँ की सेवा करण खात्तर यरुशलेम म्ह छाटचा था, हम उस्से कै घर म्ह ठहरे।

9 उसकी चार कुंवारी बेटटी थी, जो भविष्यवाणी करया करै थी।

10 जिव हम ओडै घणे दिन ताहीं रह लिये, तो अगबुस नाम का एक नबी यहूदिया परदेस म्ह आया।

11 उसनै म्हारै धोरे आकै पौलुस का कमरबन्द लिया, अर अपणे हाथ-पाँ बाँधकै कह्या, “पवित्र आत्मा न्यू कहवै सै के जिस माणस का यो कमरबन्द सै, उस ताहीं यरुशलेम नगर म्ह यहूदी इस्से तरियां तै बाँधेगें, अर गैर यहूदियाँ के हाथ्यां म्ह सौंपेगें।”

12 जिव हमनै ये बात सुणी, तो हमनै अर ओडै के माणसां नै पौलुस तै बिनती करी के यरुशलेम नगर नै ना जाइए।

13 पर पौलुस नै जवाब दिया, “थम के करो सो के रो-रोके मेरा मन तोडो सो? मै तो प्रभु यीशु के नाम कै खात्तर यरुशलेम नगर म्ह ना सिर्फ बाँधे जाण ए कै खात्तर बल्के मरण कै खात्तर भी त्यार सँ।”

- 14 जब उसने नही मानी तो हम न्यू कहकै बोल-बाल्ले रहगे, “परभु की मर्जी पूरी हो।”
- 15 कई दिनां पाच्छे हमनै तयारी करी अर यरुशलेम नगर नै चाल दिए।
- 16 कैसरिया नगर तै भी कुछ, चेल्लें म्हारै गेल्या हो लिए, अर म्हारै ताहीं टैहराण खात्तर साइप्रसवासी मनासोन के घर ले गये, वो सब तै पैहले के चेल्यां म्ह तै एक था।

### CHAPTER 21 VERSES 17-22

- 17 जब हम यरुशलेम नगर म्ह पोहचे, तो विश्वासी भाई घणी खुशी कै गेल्या हम तै मिले।
- 18 दुसरे दिन पौलुस म्हारै ताहीं लेकै याकूब कै धोरै गया, जित्त सारे कलीसिया के अगुवें कट्टे थे।
- 19 जद उसनै उन ताहीं नमस्कार करकै, जो-जो काम परमेसवर नै उसकी सेवा के जरिये गैर यहूदियां म्ह करे थे, एक-एक करके सारे बताए।
- 20 उननै न्यू सुणके परमेसवर की महिमा करी, फेर उसतै बोल्या, “हे भाई, तू देखै सै के यहूदियां म्ह तै कई हजारों नै विश्वास करया सै, अर सारे नियम-कायदे कै खात्तर मानण म्ह पक्के सै।
- 21 उननै यो सुण राख्या सै के तू गैर यहूदी माणसां के बीच म्ह रहन्दे होए यहूदियां ताहीं या शिक्षा देण लागरया सै के मूसा नबी के नियम-कायदा नै छोड़ द्यो, ना तो अपने बाळकां का खतना करो अर ना रीति-रिवाज्जां पै चाल्लों।
- 22 तो फेर के करया जावै? माणस जरूर सुणैगें के तू आया सै।
- 23 इस करके जो हम तेरे तै कह्हां सां, वो कर। म्हारा सुझाव मान उरै इसे चार माणस सै, जिन नै कसम खाई सै।”
- 24 तू उनके गैल जा, शुद्ध होण की विधि पूरी कर, अर उसके मुण्डन का खर्चा ठा, फेर सारया नै यो बेरा लाग ज्यागा के जो कुछ भी बात तेरे बारे म्ह कहा गया सै, उस म्ह कोए सच्चाई नही सै पर तू खुद भी नियम-कायदे का पालन करै सै।
- 25 पर उन गैर यहूदियां के बारे म्ह जिन नै विश्वास करया सै, हमनै यो फैसला करके लिख भेज्या सै “के वे मूर्तियां कै स्याम्ही बलि करे हाड़ मांस तै, अर लहू तै अर घेट्टी घोट्टे होयां के मांस तै अर जारी तै बचे रहवें।”
- 26 फेर पौलुस उन माणसां नै लेकै, अर दुसरे दिन उनकै गेल्या शुद्ध होकै मन्दर म्ह गया, अर ओड़ै बता दिया के शुद्ध होण कै दिन, यानिके उन म्ह तै हरेक कै खात्तर चढ़ावा चढ़ाए जाण तक के दिन कद पूरे होवैगें।

### CHAPTER 21 VERSES 23-28

- 27 जब वे सात दिन पूरे होण पे थे, तो आसिया परदेस के यहूदियां नै पौलुस ताहीं मन्दर म्ह देखकै सारे माणसां ताहीं उकसाया, अर न्यू रुक्का मारके उस ताहीं पकड़ लिया,
- 28 “हे इस्राएलियों, मदद करो, यो वोए माणस सै, जो माणसां के, अर नियम-कायदे के, अर इस जगहां के विरोध म्ह हरेक जगहां सारे माणसां नै सिखावै सै, उरै ताहीं के यूनानियां ताहीं भी मन्दर म्ह ल्याके उसनै इस पवित्र जगहां ताहीं अपवित्र करया सै।”
- 29 उननै इसतै पैहल्या इफिसुसवासी तरुफिमुस ताहीं पौलुस कै गेल्या नगर म्ह देख्या था, अर सोचवै थे के पौलुस उसनै मन्दर म्ह लियाया सै।
- 30 फेर सारे नगर म्ह दंगा माचरया, अर माणस भाजकै कट्टे होए, अर पौलुस नै पकड़कै मन्दर कै बाहरगै घसीट ल्याए, अर जिब्बे किवाड़ बन्द करे गये।
- 31 जब वे उसनै मार देणा चाहवै थे, तो पलटन के सरदार नै सन्देशा पोंहच्या के सारे यरुशलेम नगर म्ह दंगा माचरया सै।
- 32 फेर वो जिब्बे सिपाहियां अर सूबेदारां नै लेकै उनकै धोरै तळै भाज आया, अर उननै पलटन के सरदार अर सिपाहियां ताहीं देखकै पौलुस ताहीं मारणा-छेतणा छोड़ दिया।



33 फेर पलटन के सरदार नै धोरे आकै पौलुस ताहीं पकड़ लिया, अर दो साँकळां तै बाँधण का हुकम देकै बुद्धिण लाग्या, “यो कौण सै अर इसनै के करया सै?”

34 पर भीड़ म्ह तै कोए किमे अर कोए किमे चिल्लान्दा रहया। जिब रोले के कारण वो सही सच्चाई न्ही जाण सक्या, तो उस ताहीं गढ़ म्ह ले जाण का हुकम दिया।

35 जिब वो सीढ़ी पै पोंहच्या, तो इसा होया के भीड़ की दाब के मारे सिपाहियाँ नै उस ताहीं ठाके ले जाणा पड्या।

36 क्यूँके माणसां की भीड़ न्यू चिल्लान्दी होई उसकै पाच्छे पड़री थी, “उसनै खतम कर द्यो।”

37 जिब वे पौलुस नै गढ़ म्ह ले जावण आळे थे, तो उसनै पलटन के सरदार तै कह्या, “जै मन्नै इजाजत हो तो मै थारे तै किमे करूँ?” वो बोल्या, “के तू यूनानी भाषा जाणे सै?”

38 “के तू मिस्र देश का कोनी, जो इन दिनां तै पैहल्या बिद्रोही बणकै, चार हजार हथियार सुधा माणसां नै जंगळ म्ह लेग्या?”

39 पौलुस नै कह्या, “मै तो तरसुस का यहूदी माणस सूँ। मै किलिकिया परदेस के तरसुस नगर का बासिन्दा सूँ। मै तेरे तै बिनती करूँ सूँ के मन्नै माणसां तै बात करण दे।”

40 जिब उसनै हुकम दिया, तो पौलुस नै सीढ़ी पै खड़े होके माणसां ताहीं हाथ तै इशारा करया। जिब वे चुप होए तो वो इब्रानी भाषा म्ह बोल्लण लाग्या:

## 22

~~~~~

1 “हे भाईयो अर बुजुर्गो, मेरा बदले म्ह जवाब सुणो, जो मै इव थारे स्याम्ही ल्याऊँ सूँ।”

2 वे न्यू सुणके के वो हम तै इब्रानी भाषा म्ह बोल्लै सै, और भी बोल-बाल्ले हगे। फेर उसनै कह्या

3 “मै तो यहूदी माणस सूँ, जो किलिकिया के तरसुस नगर म्ह जन्मा, पर इस नगर म्ह गमलीएल के पायां के धारे बैठके पढ़ाया गया, अर पूर्वजा के नियम-कायदा नै ठीक रीति तै सिखाया गया अर परमेसवर के खात्तर इसी धुन लारया था, जिस तरियां थम सारे आज लारे सो।

4 मन्नै माणस अर लुगाई दोनुआ ताहीं जुड़-जुड़के अर जेळ म्ह गेर-गेर के, इस पंथ नै उरै ताहीं सताया के उन ताहीं मरवा भी दिया।

5 इस बात के खात्तर महायाजक अर सारे यहूदी अगुवें गवाह सै, के उनतै मै भाईयाँ के नाम पै चिट्ठियाँ लेके दमिश्क नगर नै चाल्या जाऊँ था, के जो ओड़े हों उन ताहीं भी सजा दुवाण के खात्तर बाँधके यरुशलेम नगर लाऊँ।

~~~~~

6 “जिब मै चाल्दे-चाल्दे दमिश्क नगर के लोवै पोंहच्या, तो इसा होया के दोपहर के करीबन चाणचक एक घणा चाँदणा अकास तै मेरै चौगरदे नै चमक्या।

7 अर मै धरती पै गिर गया अर यो शब्द सुण्या, हे शाऊल, हे शाऊल, तू मन्नै क्यातै सतावै सै?”

8 मन्नै जवाब दिया, “हे प्रभु, तू कौण सै?” उसनै मेरै तै कह्या, “मै यीशु नासरी सूँ,” जिस ताहीं तू सतावै सै।

9 मेरे साथियाँ नै चाँदणा तो देख्या, पर मेरै तै जो बोल्लै था उसनै समझ कोनी पाए।

10 फेर मन्नै कह्या, “हे प्रभु, मै के करूँ?” प्रभु नै मेरै तै कह्या, “उठके दमिश्क नगर म्ह जा, अर जो किमे तेरे तै करण के खात्तर ठहराया गया सै ओड़े तेरे तै सब बता दिया जावैगा।”

11 जिब उस चाँदणे के तेज के मारे मन्नै किमे कोनी दिख्या, तो मै अपणे साथियाँ का हाथ पकड़े होए दमिश्क नगर म्ह आया।

12 “फेर हनन्याह नामक नियम-कायदे के मुताबिक एक भगत माणस, जो ओड़े के रहणीये सारे यहूदियाँ म्ह सुनाम्मी था, मेरै धारे आया,”

13 अर खड़े होकै मेरै तै कह्या, “हे भाई शाऊल, फेर देखण लाग ।” उस्से बखत मेरी आँख खुलगी अर मन्नै उस ताहीं देख्या ।

14 फेर उसनै कह्या, “म्हारै बाप-दाद्या के परमेसवर नै तेरे ताहीं ज्यातै ठहराया के तू उसकी मर्जी नै जाणै, अर उस धर्मी नै देखै अर उसके मुँह की बात सुणै ।

15 क्यूँके तू उसकी ओड़ तै सारे माणसां के स्याम्ही उन बात्तां का गवाह होगा जो तन्नै देखी अर सुणी सै ।

16 इब क्यांतै वार करै सै? उठ, बपतिस्मा ले, अर उसका नाम लेके अपने पापां की माफी पा ले ।”

????? ??????? ?? ??????? ?? ???????

17 “जिब मै दुबारा यरुशलेम नगर म्ह आके मन्दर म्ह प्रार्थना करण लागरया था, तो बेसुध होग्या,

18 अर उस ताहीं देख्या के वो मेरै तै कहवै सै, ‘तावळ करके यरुशलेम नगर तै झट दे-सी लिकड़ज्या,’ क्यूँके वे मेरै बारै म्ह तेरी गवाही कोनी मान्नेगें ।”

19 मन्नै कह्या, “हे प्रभु, उननै तो खुदे बेरा सै के मै तेरे पै बिश्वास करण आळा नै जेळ म्ह गेरू अर जगहां-जगहां आराधनालय म्ह छित्वाऊँ था ।

20 जिब तेरे गवाह स्तिफनुस का लहू बहाया जाण लागरया था जद मै भी ओड़ै खडचा था अर इस बात म्ह सहमत था, अर उसके मारणीयां के लत्यां की रुखाळी करूँ था ।”

21 अर प्रभु नै मेरै तै कह्या, “चल्या जा क्यूँके मै तेरे ताहीं गैर यहूदियाँ के धोरै दूर-दूर भेज्जूंगा ।”

22 माणस इस बात तक उसकी सुणदे रहे, फेर जोर तै चिल्लाए, “इसे माणस का नाश करो, उसका जिन्दर रहणा ठीक कोनी!”

23 जिब वे चिल्लान्दे अर लत्ते बगान्दे अर अकास म्ह धूळ उड़ावै थे,

24 तो पलटन के सरदार नै कह्या, “इस ताहीं गढ़ म्ह ले जाओ, अर कोड़े मारके जाँचो, के मन्नै बेरा लाग्गौ के माणस किस कारण उसके बिरोध म्ह इस ढाळ चिल्लावै सै ।”

25 जिब उननै उस ताहीं फित्यां तै बाँधया तो पौलुस नै उस सूबेदार तै जो धोरै खडचा था, कह्या, “के यो सही सै के थम एक रोमी माणस ताहीं, अर वो भी बिना कसूरवार ठहराए होए, कोड़े मारो?”

26 सूबेदार नै न्यू सुणके पलटन के सरदार के धोरै जाके कह्या, “तू यो के करै सै? यो तो रोमी माणस सै ।”

27 फेर पलटन के सरदार नै उसके धोरै आके कह्या, “मन्नै बता, के तू रोमी सै?” उसनै कह्या, “हाँ ।”

28 न्यू सुणके पलटन के सरदार नै कह्या, “मन्नै रोमी होण का पद घणे रपिये देके मिल्या सै ।” पौलुस नै कह्या, “मै तो जन्म तै रोमी सू?”

29 फेर जो माणस उस ताहीं जाँचण पै थे, वे जिब्वे उसके धोरै तै हटगे, अर पलटन का सरदार भी न्यू जाणके के यो रोमी सै अर मन्नै उस ताहीं बाँधया सै, डरग्या ।

????? ??????? ?? ??? ?? ?????????? ??????

30 दुसरें दिन उसनै सही-सही जाणण की मर्जी तै के यहूदी उसपै क्यातै दोष लावै सै, उसके बन्धन खोल दिए, अर प्रधान याजकां अर यहूदी अगुवां की सभा ताहीं कट्टा होण का हुकम दिया, अर पौलुस नै तळै ले जाके उनके स्याम्ही खडचा कर दिया ।

## 23

1 पौलुस नै यहूदी अगुवां की सभा की ओड़ गौर तै देख्या अर कह्या, “हे भाईयो, मन्नै आज ताहीं परमेसवर के खात्तर जमा-कती सूच्चे मन तै जीवन बिताया सै ।”

2 इसपै हनन्याह महायाजक नै उन ताहीं जो उसके धोरै खड़े थे, उसके मुँह पै थप्पड़ मारण का हुकम दिया ।

3 फेर पौलुस नै उसतै कह्या, “हे चुन्ना फिरी होइ भीत, परमेसवर तेरे ताहीं मारैगा। तू नियम-कायदे के मुताबिक मेरा न्याय करण नै बेटचा सै, अर फेर के नियम-कायदे के खिलाफ मेरै ताहीं मारण का हुकम देवै सै?”

4 जो धोरै खड़े थे उननै कह्या, “के तू परमेसवर के महायाजक नै आच्छा-भुंडा बोल्लै सै?”

5 पौलुस नै कह्या, “हे भाईयो, मन्नै न्ही बेरा था के यो महायाजक सै, क्यूँके वचन म्ह लिख्या सै: ‘अपणे माणसां के प्रधान नै भुंडा ना बोलिए।’”

6 फेर पौलुस नै न्यू जाणकै के एक टोळ सदूकी अर दुसरा फरीसी लोगगां का सै, यहूदी अगुवां की सभा म्ह रुक्का मारकै कह्या, “हे भाईयो, मै फरीसी अर फरीसी लोगगां के वंश का सूं, महे होया की आस अर पुनरुत्थान कै बारै म्ह मेरा मुकद्दमा होरया सै।”

7 जब उसनै या बात कही तो फरीसियाँ अर सदूकियाँ म्ह दंगा होण लागया, अर सभा म्ह फूट पड़गी।

8 क्यूँके सदूकियाँ का विश्वास तो न्यू कहवै सै, के ना पुनरुत्थान सै, ना सुर्गदूत अर ना आत्मा सै, पर फरीसी इन सारया नै मान्नै सै।

9 फेर घणा दंगा माच्या अर कुछ शास्त्री जो फरीसियाँ के टोळ के थे, उठ लिए अर न्यू कहकै दंगा करण लागे, “हम इस माणस म्ह कोए बुराई कोनी पांदे, अर जै कोए आत्मा या सुर्गदूत उसतै बोल्यो सै तो फेर के होगया?”

10 जब घणा दंगा होया, तो पलटन के सरदार नै इस भय तै के वे पौलुस के टुकड़े-टुकड़े ना कर देवै, पलटन ताहीं हुकम दिया के उतरकै उस ताहीं उनकै बिचाळै तै हाँगे तै लिकाड़े, अर गढ़ म्ह ले जावै।

11 उससे रात प्रभु यीशु नै उसकै धोरै खड़े होकै कह्या, “हे पौलुस, धीरज राख, क्यूँके जिसी तन्नै यरुशलेम नगर म्ह मेरी गवाही देई, उसीए तन्नै रोम म्ह भी गवाही देणी होगी।”

### ????? ?? ?????? ?? ??????

12 जब दिन लिकड़या तो यहूदियाँ नै साजिस रची अर कसम खाई के जब ताहीं हम पौलुस नै मार न्ही देवा, जै हम खावां या पीवां तो म्हारै पै धिक्कार सै।

13 जिन नै आप्सस म्ह या कसम खाई थी, वे चाळीस जण्यां तै घणे थे।

14 उननै प्रधान याजकां अर यहूदी अगुवां के धोरै जाकै कह्या, “हमनै न्यू ठान लिया सै के जब ताहीं हम पौलुस नै मार न्ही देंदे, जद ताहीं जै किमे चाक्खां तो म्हारै पै धिक्कार सै।

15 इस करकै इब यहूदी अगुवां की सभा सुधा पलटन के सरदार नै समझाओ के उसनै थारे धोरै लियावै, मान ल्यो के थम उसके बारै म्ह और भी सही तै जाँच करणा चाहवो सो, अर हम उसके पोहोचण तै पैहल्याए उस ताहीं मार देण के खात्तर त्यार रहवांगे।”

16 पौलुस कै भाणजै नै सुण्या के वे उसकी टाह म्ह सै, तो गढ़ म्ह जाकै पौलुस ताहीं संदेशां दिया।

17 पौलुस नै सूबेदारां म्ह तै एक ताहीं अपणे धोरै बुलाकै कह्या, “इस जवान नै पलटन के सरदार के धोरै ले जाओ, यो उसतै किमे कहणा चाहवै सै।”

18 इस करकै उसनै उस ताहीं पलटन के सरदार के धोरै ले जाकै कह्या, “कैदी पौलुस नै मेरै ताहीं बुलाकै बिनती करी के यो जवान पलटन के सरदार तै किमे कहणा चाहवै सै, उस ताहीं उसके धोरै ले जा।”

19 पलटन के सरदार नै उसका हाथ पकड़कै अर न्यारा जाकै बुझझया, “तू मेरै तै के कहणा चाहवै सै?”

20 वो बोल्यो, “यहूदियाँ नै साजिस रची सै के तेरे तै बिनती करै के काल पौलुस नै यहूदी अगुवां की सभा म्ह ल्यावै, मान्नो वे और सही ढाळ तै उसकी जाँच करणा चाहवै सै।

21 पर उनकी मानियो मतना, क्यूँके उन म्ह तै चाळीस कै उप्पर माणस उसने मारण की टाह म्ह सै, जिन नै न्यू टान लिया सै के जिब ताहीं वे पौलुस नै मार न्ही देवै, जद ताहीं ना खावैगें अर ना पीवैगें, अर इब वे त्यार सै अर तेरे वचन की बाट देखण लागरे सै।”

22 फेर पलटन के सरदार नै जवान ताहीं यो हुकम देकै बिदा करया, “किसे तै ना कहिये के तन्नै मरै तै ये बात बताई सै।”

XXXXXXXXXXXXXXXXXXXX

23 फेर उसने दो सूबेदारां ताहीं बुलाके कह्या, “दो सौ सिपाही, सत्तर सवार, अर दो सौ भालैत, रात के नौ बजे कैसरिया नगर नै जाणके खात्तर त्यार कर करो।

24 अर पौलुस की सवारी कै खात्तर घोड़े त्यार राक्खो, के उस ताहीं फेलिक्स राज्यपाल के धोरे राज्जी-खुशी तै पोहोचा दे।”

25 उसनै इस तरियां की चिट्ठी भी लिक्खी

26 महामहिम फेलिक्स राज्यपाल ताहीं क्लौकियुस लूसियास का नमस्कार।

27 इस माणस ताहीं यहूदियाँ नै पकड़के मार देणा चाह्या, पर जिब मन्नै जाण्या के रोमी सै, तो पलटन लेकै छुड़ा ल्याया।

28 मै जाणणा चाहूँ था के वे उसपै किस कारण दोष लावै सै, ज्यांतै उस ताहीं यहूदी अगुवां की सभा म्ह ले गया।

29 फेर मन्नै जाण लिया के वे अपणे नियम-कायदे के रोळे के वरै म्ह उसपै इल्जाम लगावै सै, पर मार देण जोगगा या बाँधे जाणके जोगगा उस म्ह कोए कसूर कोनी।

30 जिब मरै ताहीं बताया गया के वे इस माणस की टाह म्ह लागरे सै तो मन्नै जिब्वे उस ताहीं तेरे धोरे भेज दिया, अर बैरियाँ ताहीं भी हुकम दिया के तेरे स्याम्ही उसपै नालिश करे।

31 आखर म्ह जिसा सिपाहियाँ नै हुकम मिल्या था, उससे तरियां ए वे पौलुस नै लेकै रातो-रात अन्तिपतिरस म्ह आये।

32 दुसरे दिन वे सवारा नै उसके गेल्या जाणके खात्तर छोड़के खुद यरुशलेम म्ह बोहड़ै।

33 उननै कैसरिया पोहचके राज्यपाल ताहीं चिट्ठी दी, अर पौलुस ताहीं भी उसके स्याम्ही खडचा करया।

34 राज्यपाल नै चिट्ठी पढके बुद्धिया, “यो किस पुरान्त का सै?”

35 अर जिब जाण लिया के किलिकिया परदेस का सै तो उसतै कह्या, “जिब तेरे बैरी भी आवैगें, तो मै तेरा मुकद्दमा करूँगा।” अर उसनै उस ताहीं हेरोदेस कै किले म्ह पहेरे म्ह राक्खण का हुकम दिया।

## 24

XXXXXXXXXXXXXXXXXXXX

1 पाँच दिन कै पाच्छे हनन्याह महायाजक कई यहूदी अगुवें अर तिरतुल्लुस नामक किसे वकील नै गेल्या लेके कैसरिया नगर आ पोहचे। उननै राज्यपाल कै स्याम्ही पौलुस कि बुराई करी।

2 जिब पौलुस बुलाया गया तो तिरतुल्लुस उसपै इल्जाम लाके कहण लागया: “हे महामहिम फेलिक्स, तेरे जरिये हम राज्जी-खुशी सां, अर तेरे इन्तजाम तै इस जात कै खात्तर घणीए बुराईयाँ सुधरदी जावै सै।

3 इस ताहीं हम हरेक जगहां अर हरेक तरियां तै धन्यवाद कै गैल मान्नां सां।

4 मै तेरा और ज्यादा बखत कोनी लेऊँ, मै तेरे तै बिनती करूँ सूँ के दया करके दो-एक बात सुण ले।”

5 “बात या सै के इस माणस ताहीं हमनै एक उत्पाती के रूप म्ह पाया सै, सारी दुनिया के यहूदिया परदेस म्ह इसनै दंगे भड़काए सै, यो नासरियाँ के पंथ का नेता सै।

6 उसने मन्दर ताहीं अशुद्ध करणा चाह्या, पर हमनै उस ताहीं पकड़ लिया। (हमनै उस ताहीं अपणे नियम-कायदे कै मुताबिक सजा दे दी होन्दी,

7 पर पलटन के सरदार लूसियास नै उस ताहीं हाँगै तै म्हारे हाथ तै खोस लिया,

8 अर बैरियाँ ताहीं तेरे स्याम्ही आण का हुकम दिया।) इन सारी बाततां नै जिनके बारे म्ह हम उसपै इल्जाम लावां सां, तू खुदे ए उसनै जाँच करके जाण लेवैगा।”

9 यहूदियाँ नै भी उसका साथ देके कह्या, ये बात इस्से ढाळ तै करी सै।

~~~~~

10 जिब राज्यपाल नै पौलुस ताहीं बोल्लण का इशारा करया, तो उसनै जवाब दिया: “मै न्यू जाणके के तू घणे साल्लां तै इस जात का न्याय करण लागरया सै, खुशी तै अपणा बदले का जवाब देऊँ सू।

11 तू आप्पे ए जाण सकै सै जिब तै मै यरुशलेम नगर के मन्दर म्ह आराधना करण नै आया, मन्नै बारहा दिनां तै बाध कोनी होए,

12 उननै मेरै ताहीं ना मन्दर म्ह, ना आराधनालयों म्ह, ना किसे नगर म्ह किसे तै बहस करदे या भीड़ लगादे पाया,

13 अर ना तो वे उन बाततां ताहीं, जिनका वे इब मेरै पै दोष लावै सै, तेरे स्याम्ही साच्चि साबित कर सकै सै।

14 पर मै तेरे स्याम्ही यो मान ल्यु सूं के जिस पन्थ नै वे बुरा पन्थ कहवै सै, उससे की रीत पै मै अपणे बाप-दाद्या के परमेसवर की सेवा करूँ सूँ, अर जो बात नियम-कायदे अर नबियाँ की किताबां म्ह लिक्खी सै, उन सारया पै विश्वास करूँ सूँ।

15 अर परमेसवर तै आस राक्खूँ सूँ जो वे खुद भी राक्खै सै, के धर्मी अर अधर्मी दोनुआ का जिन्दा उठणा होवैगा।

16 इसतै मै खुद भी कोशिश करूँ सूँ के परमेसवर की, अर माणसां की ओड़ तै मेरा मन सारी-हाण बेकसूर रहवै।”

17 “घणे साल्लां पाच्छै मै गरीबां नै दान पोहोचाण, अर भेंट चढ़ाण आया था।

18 उससे बखत इननै मेरै ताहीं मन्दर म्ह, शुद्ध होण की रीत पूरी करते देख्या, ओड़ै ना कोए भीड़ थी, अर ना ए किसे ढाळ का शोर, पर ओड़ै आसिया परदेस के कई यहूदी थे

19 जै मेरै विरोध म्ह उनके धारे कोए बात कहण की हो तो उरै तेरे स्याम्ही आके मेरै पै इल्जाम लादे।

20 या ये खुद ए बतावै के जिब मै यहूदी अगुवां की सभा कै स्याम्ही खड्या था, तो उननै मेरै म्ह कौण सा कसूर पाया?

21 इस एक बात नै छोड़ जो मन्नै उनके बिचाळै खड्या होके कही थी: ‘मेरे होया के जिन्दा उठण कै बारे म्ह आज मेरा थारे स्याम्ही मुकदमा होण लागरया सै।”

22 फेलिक्स नै, जो इस पन्थ की बात सही-सही जाणै था, उन ताहीं न्यू कहके टाळ दिया, “जिब पलटन का सरदार लूसियास आवैगा, तो थारी बात का फैसला करूँगा।”

23 उसनै सूबेदार ताहीं हुकम दिया के पौलुस ताहीं जेळ म्ह तो राख्या जावै पर उस ताहीं इतनी छूट जरूर दी जावै के उसके खास साथी आके उसकी सेवा कर सकै।

~~~~~

24 कुछ दिनां पाच्छै फेलिक्स हाकिम अपणी घरआळी दुसिल्ला ताहीं, जो यहूदी थी, गेल्या लेके आया अर पौलुस ताहीं बुलवाके उस विश्वास कै बारे म्ह जो मसीह यीशु पै सै, उसतै सुण्या।

25 जिब पौलुस धर्म, अर संयम, अर आण आळे न्याय का जिक्र करण लागरया था, तो फेलिक्स नै भयभीत होके जवाब दिया, “इब तो जा, मौक्का मिल ति ए मै तन्ने दुबारा बुलवाऊँगा।”

26 फेलिक्स ताहीं पौलुस तै कुछ रपिये मिलण की भी आस थी, ज्यांतै और भी बुला-बुलाकै उसतै बात करया करै था।

27 पर जब दो साल बीतगे तो पुरकियुस फेस्तुस, फेलिक्स की जगहां पै आया, अर फेलिक्स यहूदियाँ ताहीं राज्जी करण की मर्जी तै पौलुस ताहीं कैदी ए छोड़ गया।

## 25

**CHAPTER 25 VERSES 1-17**

1 राज्यपाल पद का काम सम्भाळण के तीन दिन बाद फेस्तुस कैसरिया नगर तै यरुशलेम नगर म्ह गया।

2 फेर प्रधान याजकां अर यहूदियाँ के खास माणसां नै उसकै स्याम्ही पौलुस की बुराई करी,

3 के वो खियास करकै पौलुस ताहीं यरुशलेम नगर भेजदे, असल म्ह उसकी तरकीब राह म्ह मौक्का देखकै पौलुस ताहीं मारण की थी।

4 फेस्तुस नै जवाब दिया, “पौलुस कैसरिया म्ह पहरे म्ह सै, अर मै आप्पे ए तावळ तै ओड़े जाऊंगा।”

5 फेर बोल्या, “थारे म्ह जो अधिकार राक्खै सै वे गैल चाल्लै, अर जै इस माणस नै किमे गलत काम करया सै तो उसपै इल्जाम लावै।”

6 उनके बिचाळै कोए आठ-दस दिन रहकै फेस्तुस कैसरिया चल्या गया, अर दुसरे दिन न्याय-गद्दी पै बैठकै पौलुस ताहीं ल्याण का हुकम दिया।

7 जब वो आया तो जो यहूदी अगुवें यरुशलेम नगर तै आये थे, उननै लोवै-धोवै खड़े होकै उसपै घणे भारया दोष लगाये, जिनका सबूत वे कोनी दे सकै थे।

8 पर पौलुस नै जवाब दिया, “मन्नै ना तो यहूदियाँ के नियम-कायदे के अर ना मन्दर के, अर ना ए कैसर के बिरुध्द कोए अपराध करया सै।”

9 फेर फेस्तुस नै यहूदी अगुवां ताहीं राज्जी करण के मकसद तै पौलुस तै कह्या, “के तू चाहवै सै के यरुशलेम नगर नै जावै, अर ओड़ै मेरै स्याम्ही तेरा यो मुकद्दमा तय करया जावै?”

10 पौलुस नै कह्या, “मै कैसर के न्याय-गद्दी के स्याम्ही खड्चा सूं, मेरै मुकद्दमे फैसला उरैए होणा चाहिये। जिसा तन्नै आच्छी ढाळ बेरा सै, यहूदियाँ का मन्नै किमे अपराध कोनी करया।

11 जै मै अपराधी सूं अर मारण के जोगगा कोए काम करया सै, तो मरण तै कोनी नाटदा, पर जिन बात्तां की ये मेरै पै इल्जाम लावै सै, जै उन म्ह तै कोए भी बात साच्ची न्ही लिकड़ी, तो कोए मेरै ताहीं उनकै हाथ्यां न्ही सौंप सकदा। मै कैसर की दुहाई द्यु सूं।”

12 फेर फेस्तुस नै मन्त्रियाँ की सभा के गेल्या बात करके जवाब दिया, “तन्नै कैसर की दुहाई दी सै, तू कैसर के ए धोरै जावेगा।”

**CHAPTER 25 VERSES 18-27**

13 कुछे दिन बीतण के पाच्छे, अगिरप्पा राजा अर बिरनीके नै कैसरिया म्ह आकै फेस्तुस तै भेंट करी।

14 उनकै घणे दिन ओड़ै रहण के पाच्छे, फेस्तुस नै पौलुस के बारे म्ह राजा ताहीं बताया “एक माणस सै, जिस ताहीं फेलिक्स कैदी छोड़ गया सै।”

15 जब मै यरुशलेम नगर म्ह था, तो प्रधान याजक अर यहूदिया परदेस के यहूदी अगुवां नै उसकी बुराई करी अर चाह्या के उसपै दण्ड का हुकम होवै।

16 पर मन्नै उन ताहीं जवाब दिया के रोमियों की या रीत कोनी के किसे माणस ताहीं सजा के खात्तर सौंप देवै, जब ताहीं मुजरिम ताहीं अपणे बैरियाँ के स्याम्ही खड़े होकै दोष का जवाब देण का मौक्का ना मिलै।

17 आखर जब वे कट्ठे होए, तो मन्नै किमे वार कोनी करी, पर दुसरे ए दिन न्याय-गद्दी पै बैठकै उस माणस ताहीं ल्याण का हुकम दिया।

18 जिव उसके बैरी खड़े होए, तो उननै इसी गलत बातों की इल्जाम कोनी लाई, जिसा मै समझूँ था।

19 पर वे अपने पंथ के अर यीशु नाम किसे माणस के बारे म्ह, जो मरग्या था अर पौलुस उस ताहीं जिन्दा बतावै था, बहस करै थे।

20 मै उलझन म्ह था के इन बातों का बेरा किस ढाळ लाऊँ? ज्यांतै मन्नै उसतै बुझ्झया, के तू यरुशलेम नगर जावैगा के ओड़ै इन बातों का फैसला होवै?

21 पर जिव पौलुस नै दुहाई देई के “उसके मुकदमे का फैसला सम्राट के उरै हो, तो मन्नै हुकम दिया के जिव तक उस ताहीं कैसर के धोरै न्ही भेज्जू, उस ताहीं हिरासत म्ह राख्या जावै।”

22 फेर अगिरप्पा नै फेस्तुस तै कह्या, “मै भी उस माणस की सुणणा चाहूँ सूँ।” उसनै कह्या, “तू काल सुण लेवैगा।”

23 आखर म्ह दुसरे दिन जिव अगिरप्पा अर बिरनीके बड़्डी धूम-धड़ाके तै आये अर पलटन के सरदारों अर नगर के खास आदमियाँ के गेल्या दरबार म्ह पोहचे। फेर फेस्तुस नै हुकम दिया के वे पौलुस ताहीं ली यावै।

24 फेस्तुस नै कह्या, “हे राजा अगिरप्पा, अर हे सारे माणसों जो उरै म्हारै गेल्या सो, थम इस माणस नै देखो सो, जिसके बारे म्ह सारे यहूदियाँ नै यरुशलेम नगर म्ह अर उरै भी रुक्के मार-मारके मेरै तै बिनती करी के इसका जिन्दा रहणा सही कोनी।

25 पर मन्नै बेरा पाट लिया के उसनै इसा किमे कोनी करया के मार दिया जा, अर जिव के उसनै आप्पे ए सम्राट की दुहाई दी, तो मन्नै उस ताहीं खन्दाण का फैसला करया।

26 मन्नै उसके बारे म्ह कोए पक्की बात कोनी पाई के अपने माल्लिक के धोरै लिखूँ। ज्यांतै मै उस ताहीं थारे स्याम्ही अर खासकर हे राजा अगिरप्पा तेरे स्याम्ही ल्याया सूँ के जाँचे पाच्छै मन्नै किमे लिखण का मौक्का मिलै।

27 क्यूँके कैदी ताहीं खन्दाणा अर जो दोष उसपै लगाये सै, उन ताहीं न्ही बताणा, मन्नै खामखाँ लागया सै।”

## 26

XXXXXXXXXX XX XXXXXXXXXXX XXXXX XX XXXXXXXXXXXXXXX

1 अगिरप्पा नै पौलुस तै कह्या, “तेरे ताहीं अपने बाबत बाल्लण की आज्ञा सै।” फेर पौलुस हाथ तै इशारा करके जवाब देण लागया,

2 “हे राजा अगिरप्पा, जितनी बातों का यहूदी अगुवें मेरै पै इल्जाम लावै सै, आज तेरे स्याम्ही उनका जवाब देण म्ह अपने ताहीं धन्य समझूँ सूँ,

3 खास करके ज्यांतै के तू सारी यहूदी प्रथा अर परेशानियाँ नै भली-भाँति जाणै सै। इस करके मै बिनती करूँ सूँ, धीरज तै मेरी सुण।”

4 “मेरा चाल-चलण शरुआत तै अपनी जात के बिचाळै अर यरुशलेम नगर म्ह जिसा था, उसका सारे यहूदियाँ नै बेरा सै।

5 जै वे गवाही देणा चाहवें, तो तू मेरै ताहीं तब तै पिच्छाणै सै जिव मै जवान था, के मै फरीसी होके अपने धर्म के सबतै खरे पन्थ के मुताबिक चाल्या।

6 अर आज मै परमेसवर के जरिये म्हारे पूर्वजाँ नै दिए गये उस वादे की आस के कारण उरै दोषी के रूप म्ह खड्या सूँ।

7 यो वोए वादा सै, जिसके पूरे होण की आस म्हारे बारहाँ कुल दिन-रात सच्चाई म्ह परमेसवर की भगति-आराधना करदे होए आये सै। हे राजा, आज मेरे पै यहूदियाँ के जरिये मुकदमा इस्से आस के कारण चलाया जाण लागरया सै।

8 जिव के परमेसवर मर होया नै जिन्दा करै सै, तो थारे उरै या बात क्यांतै विश्वास के जोगी कोनी समझी जान्दी?”

9 “मन्ने भी समझया था के यीशु नासरी के नाम के बिरोध म्ह मन्ने भोत कुछ करणा चाहिये।

10 अर मन्ने यरुशलेम नगर म्ह न्यूए करया, अर प्रधान याजकां तै हक पाके घणखरे पवित्तर माणसां ताहीं जेळ म्ह गेरया, अर जिब वे मार दिये जावै थे तो मै भी उनके बिरोध म्ह अपणी राय वु था।

11 हरेक आराधनालय म्ह मै उन ताहीं काल कर-करके यीशु की बुराई करवाऊँ था, उरै ताहीं के छो के मारे इसा बावळा होगया के दुसरे नगरां म्ह भी जाके उन ताहीं काल करूँ था।”

ⓂⓂⓂⓂ ⓂⓂⓂⓂ-ⓂⓂⓂⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂⓂ 9:1-19; 22:6-16)

12 “इस्से धुन म्ह जिब मै प्रधान याजकां तै अधिकार अर हुकम-चिट्ठी लेके दमिश्क नगर नै जाण लागरयां था,

13 तो हे राजा, राह म्ह दोफारी के बखत मन्ने अकास तै सूरज के तेज तै भी बढ़के एक चाँदणा, अपने अर अपने गेल्या चाल्लण आळा के चौगरदे नै चमकदा होइ देख्या।

14 जिब हम सारे धरती पै पड़गे, तो मन्ने इब्रानी भाषा म्ह, मेरै तै न्यू कहन्दे होए एक बोल सुण्या, “हे शाऊल, हे शाऊल, तू मन्ने क्यातै सतावै सै? पैने पै लात मारणा तेरे खात्तर ओक्खा सै। (जे तू मन्ने सतावैगा तो तू खुद नै सतावैगा) ”

15 फेर मै बोल्या, “हे प्रभु, तू कौण सै?” प्रभु नै कह्या, “ मै यीशु सूं, जिस ताहीं तू सतावै सै।

16 पर तू उठ, अपने पायां पै खड्या हो, क्यूँके मन्ने तेरे ताहीं ज्यातै दर्शन दिया सै के तन्ने उन बाततां का भी सेवक अर गवाह ठहराऊँ, जो तन्ने देखी सै, अर उनका भी जिनके खात्तर मै तन्ने दर्शन दियुँगा।

17 अर मै तन्ने तेरे माणसां तै अर गैर यहूदियाँ तै बचान्दा रहूँगा, जिनके धोरे मै इब तन्ने इस करके भेज्जू सूं

18 के तू उनकी आँख खोल्लै के वे अन्धेरे तै चाँदणे कान्ही, अर शैतान के अधिकार तै परमेसवर के कान्ही पलटै, इस करके के पापां की माफी अर उन माणसां के गेल्या जो मेरै पै बिश्वास करण तै पवित्तर करे गये सै, वसियत पावै। ”

ⓂⓂⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ

19 “इस करके हे राजा अगिरप्पा, मन्ने उस सुरगिय दर्शन की बात कोनी टाळी,

20 मन्ने सबतै पैहल्या दमिश्क नगर के, फेर यरुशलेम नगर के, अर फेर यहूदिया परदेस के बासिन्दा ताहीं, अर गैर यहूदियाँ म्ह भी यो प्रचार करदा रहया के पाप करणा छोड़के परमेसवर कान्ही बोहड़ आओ, अर अपने सुभाव के जरिये यो साबित करो के थमनै पाप करणा छोड़ दिया सै।

21 इन बाततां के कारण यहूदी मन्ने मन्दर म्ह पकड़के मार देण की कोशिश करै थे।

22 पर परमेसवर की मदद तै मै आज ताहीं बणया सूं छोटाचा-बडया सारया के स्याम्ही गवाही वूँ सूं, अर उन बाततां नै छोड़ किमे कोनी कहन्दा जो नबियाँ अर मूसा नबी नै भी कह्या के होण आळी सै,

23 के मसीह नै दुख टाणा होगया, अर वोए सब तै पैहल्या मरे होया म्ह तै जी उठके, म्हारै माणसां म्ह गैर यहूदियाँ म्ह चाँदणे का प्रचार करैगा।”

24 जिब वो इस तरियां तै जवाब देण लागरया था, तो फेस्तुस नै ऊँच्ची आवाज म्ह कह्या, “हे पौलुस, तू बावळा सै। घणे ज्ञान नै तेरे ताहीं बावळा कर दिया सै।”

25 पर पौलुस नै कह्या, “हे महामहिम फेस्तुस, मै बावळा कोनी, पर सच्चाई अर बुद्धि की बात कहूँ सूं।

26 राजा नै भी जिसके स्याम्ही मै बिना डरे बोल्लण लागरया सूं, इन बाततां का बेरा सै, अर मन्ने बिश्वास सै के इन बाततां म्ह तै कोए उसतै लुक्की कोनी, क्यूँके यो वाक्या गुप्त म्ह कोनी होया।



- 27 हे राजा अग्रिप्पा, के तू नबियाँ का विश्वास करै सै? हाँ, मन्ने बेरा सै के तू विश्वास करै सै।”
- 28 फेर अग्रिप्पा नै पौलुस तै कह्या, “तू माड़े-से समझाण तै मन्ने मसीह बनाणा चाहवै सै?”
- 29 पौलुस बोल्या, “परमेशवर तै मेरी प्रार्थना सै के, देर या सबेर तै, पर ये सारे सुणण आळे, जो आज मेरी बात सुणै सै, वे मेरै समान हो जावै।”
- 30 फेर राजा अर अधिकारी अर बिरनीके अर उनकै गेल्या बैठणीये उठ खड़े होए,
- 31 न्यायालय तै बाहर लिकाड़कै आप्स म्ह कहण लागगे, “यो माणस इसा तो किमे कोनी करदा, जो मौत की सजा या जेळ, म्ह गेरण जोगगा हो।”
- 32 अग्रिप्पा नै फेस्तुस तै कह्या, “जै यो माणस कैसर की दुहाई न्ही देंदा, तो छूट सकै था।”

## 27

XXXXXXXXXXXXXXXXXXXXXXXXXXXX

- 1 जब फेस्तुस राज्यपाल के जरिये यो पक्का होगया के हम जहाज कै जरिये इटली देश जावां, तो उननै पौलुस अर कुछ दुसरे कैदियाँ ताहीं भी यूलियुस नामक औगुस्तुस सम्राट की पलटन कै एक सूबेदार कै हाथ्यां सौंप दिया।
- 2 अद्रमुत्तियुम नगर के एक जहाज पै जो आसिया परदेस कै किनारे की जगहां पै जाण पै था, पाणी रास्ते हमनै अपणा सफर शरु करया, अर अरिस्तखुस नामक जो मकिदुनिया परदेस के थिस्सलुनीके नगर का एक बसिन्दा था।
- 3 दुसरे दिन हम सैदा नगर पोहचाये गये, अर यूलियुस नै पौलुस पै दया करकै उस ताहीं साथियाँ कै उरै जाण दिया के उनतै जरूरी चीज ले आवां।
- 4 ओड़ै तै हमनै सफर दुबारा शरु करया, हवा कै पलट होण कै कारण हम साइप्रस टापू की ओट म्ह होकै चाल्ले,
- 5 अर किलिकिया परदेस अर पंफूलिया किनारे कै लोवै कै समुन्दर म्ह होकै लूसिया के मूरा नगर म्ह उतरे।
- 6 ओड़ै सूबेदार नै सिकन्दरिया नगर का एक जहाज इटली देश जान्दा होड़ मिल्या, अर उसनै म्हारै ताहीं उस जहाज पै चढ़ा दिया।
- 7 जब हम घणे दिनां ताहीं होळे-होळे चालकै मुश्किल तै कनिदुस कस्बे कै स्याम्ही पोहचे, तो इस करकै के हवा म्हारै ताहीं आगगै बढ़ण कोनी देवै थी, हम सलमोने कै स्याम्ही तै होकै क्रैते टापू की आड़ म्ह चाल्ले,
- 8 अर उसके किनारे-किनारे मुश्किल तै चालकै “शुभलंगरबारी” नामक एक जगहां पोहचे, जित्त तै लसया नगर लोवै था।
- 9 जब घणे दिन बीत लिये अर पाणी कै सफर म्ह जोख्खम ज्यांतै होवै थी बरत के दिन इब बीत लिये थे। आखर म्ह पौलुस नै उन सारया ताहीं कहकै चेतावनी दी,
- 10 “हे सज्जनों, मन्ने इसा लाग्गै सै के इस सफर म्ह मुश्किल अर घणा नुकसान, ना सिर्फ माळ अर जहाज की बल्के म्हारी जान का भी, होणआळा सै।”
- 11 पर सूबेदार नै पौलुस की बाततां तै कप्तान अर जहाज कै माल्लिक की बाततां तै बाध मान्या।
- 12 शुभ लंगरबारी नाम का बंदरगाह जाड्डा काटण कै खात्तर सही कोनी था, ज्यांतै घणाए का विचार होया के ओड़ै तै आगगै बढ़ जावां जै किसे तरियां तै हो सकै तो फीनिक्स पोहचकै जाड्डा काटै। यो तो क्रैते टापू का एक बंदरगाह सै जो दक्षिण-पश्चिम अर उत्तर-पश्चिम कान्ही खुलै सै।
- XXXXXXXXXXXXXXXXXXXXXXXXXXXX
- 13 जब दक्षिणी हवा होळे-होळे चाल्लण लागगी, तो न्यू सोच्या के उनकी तरकीब पूरी करण खात्तर बढ़िया बखत था, लंगर उठाया अर किनारे धोरै होन्दे होए क्रैते टापू कै किनारे जाण लागगे।
- 14 पर माड़ी वार म्ह धरती कै कान्ही तै बड्डी ए आंधी उठी, जो “यूरकुलिन” कुह्वावै सै।

15 जब आँधी जहाज पै लागगी तो जहाज उसके स्याम्ही टैहर कोनी सक्या, इस करके हमने जहाज ताहीं हवा के बाहाव छोड़ दिया, अर इस्से तरियां बहन्दे होए चाल्ले गये।

16 फेर कौदा नामक एक छोट्टे-से टापू की आड़ म्ह बहन्दे-बहन्दे हम मुशिकल तै डोंगी नै बस म्ह कर सके।

17 फेर जहाज के मल्लाहां नै उस ताहीं ठाकै सही उपाय करके जहाज ताहीं तळै तै रस्यां तै कसकै बाँध्या, अर सुरतिस खाड़ी के चोरबालू पै फँस जाणके डर तै उनने लंगर ताहीं थोड़े नीच्चे उतारके जहाज ताहीं हवा के बाहाव के गैल-गैल बहण के खात्तर छोड़ दिया।

18 जब हमने आँधी तै घणे हिचकोले अर धक्के खाए, तो दुसरे दिन वे जहाज का माळ बगाण लागे,

19 अर तीसरे दिन उनने अपणे हाथ्यां तै जहाज का साज-सामान भी बगा दिया।

20 जब घणे दिन ताहीं ना सूरज, ना तारे दिक्खे अर बड्डी आँधी चाल्दी रही, तो आखर म्ह म्हारै बचण की सारी उम्मीद जान्दी रही।

21 जब वे घणे दिन ताहीं भूखे रह लिये, तो पौलुस नै उनके बिचाळै खड़े होके कह्या, “हे भाईयो, चाहिये था के थम मेरी बात मानके क्रेते टापू तै आगू ए ना बढ़ते तो या मुसीबत न्ही आन्दी अर ना यो नुकसान ठान्दे।

22 पर इव मै थमने समझाऊँ सूँ के धीरज राक्खो, क्यूँके थारे म्ह तै किसे की जान का नुकसान कोनी होवैगा, पर सिर्फ जहाज का।

23 क्यूँके परमेसवर जिसका मै सूँ, अर जिसकी भगति करूँ सूँ, उसके सुगंदूत नै आखरी रात मेरे धरै आके कह्या,

24 हे पौलुस, डरै मतना! तन्नै कैसर के स्याम्ही खड्या होणा जरूरी सै। परमेसवर नै सारया ताहीं जो तेरे गेल्या सफर करै सै, जीवन दान दिया सै।

25 ज्यांतै, हे भले माणसों, सबर करो, क्यूँके मै परमेसवर का विश्वास करूँ सूँ, के जिसा मेरै तै कह्या गया सै, उसाए होगा।

26 पर म्हारै ताहीं किसे टापू पै जा टिकणा होगा।”

### ~~~~~

27 जब चौदहवीं रात आई, अर हम अदिरया समुन्दर म्ह भटकदे होए हाँ डरे थे, तो आध्धी रात के लोवै मल्लाहां नै अंदाजे तै जाणया के हम किसे देश के लोवै पोहच रहे सां।

28 पाणी की गहराई नाप्पण पै उनने एक सौ बीस फुट डून्घा पाया, अर थोड़ा आगू बढ़के दुबारा थाह लेई तो नब्बै फुट पाया।

29 फेर पथरीली जगहां तै टकराण के डर तै उनने जहाज की पिछली ओड़ चार लंगर गेरे, अर सबेरै होण की चाह करदे रहे।

30 पर जब मल्लाह जहाज पै तै भाजणा चाहवै थे, अर गलही तै लंगर गेरण के बहाणै डोंगी समुन्दर म्ह उतार दी,

31 तो पौलुस नै सूबेदार अर सिपाहियाँ तै कह्या, “जै ये जहाज पै न्ही रहे, तो थम भी कोनी बच सकदे।”

32 फेर सिपाहियाँ नै जोड़े काटके डोंगी गेर दी।

33 जब सबेरै होण पै था, फेर पौलुस नै न्यू कहके, सारया ताहीं खाणा खाण के खात्तर बिनती करी, “आज चौदहा दिन होगे सै के थम चिन्ता करते-करते भूखे रहे, अर किमे न्ही खाया।

34 ज्यांतै थारे तै समझाऊँ सूँ के किमे खा ल्यो, जिसतै थारा बचाव होवै, क्यूँके थारे म्ह तै किसे का सिर का एक बाल भी कोनी गिरैगा।”

35 न्यू कहके उसने रोट्टी लेके सारया के स्याम्ही परमेसवर का धन्यवाद करया अर तोड़के खाण लागया।

36 इस बात तै वे सारे उत्साहित होके खाणा खुवाण लागे।

37 हम सारे मिलके जहाज पै दो सौ छिहत्तर जणे थे।

38 जिब वे खाणा खाके छिक्क लिये, तो गेहूँ ताहीं समुन्दर म्ह बगाके जहाज हल्का करण लागगे।

39 जिब दिन लिकइया तो उननै उस देश ताहीं कोनी पिच्छाणा, पर एक खाड़ी देक्खी जिसका किनारा चौरस था, अर विचार करया के जै हो सके तो इस्से पै जहाज नै टिकावै।

40 फेर उननै लंगरा ताहीं खोल के समुन्दर म्ह छोड़ दिया अर उस्से बखत पाल के रस्से ढील्ले कर दिये, अर हवा के स्याम्ही आगला पाल चढाके किनारे के कान्ही चाल्ले।

41 पर दो समुन्दर के संगम की जगहां पड़के उननै जहाज ताहीं टिकाया, अर आगला भाग तो टिक गया, पर पिछली ओड़ लहरा तै टूटण लागगी।

42 फेर सिपाहियाँ का यो विचार होया के कैदियाँ ताहीं मार देवैं, इसा ना हो के कोए तैर के लिकइ भाज्जै।

43 पर सूबेदार नै पौलुस ताहीं बचाण की मर्जी तै उन ताहीं इस विचार तै रोक्का अर न्यू कह्या, के जो तैर सके सै, पैहल्य्या छल्लांग मारके किनारे पै लिकइ जावै।

44 अर बाकी कोए फट्टा पै, अर कोए जहाज की दुसरी चीज के सहारै लिकइ जावै। इस तरियां तै सारे धरती पै बच लिकडे।

## 28

?????? ???? ???? ???? ???? ?

1 जिब हम बच लिकडे, तो बेरा लागया के यो माल्टा टापू कुह्वावै सै।

2 ओडे के बासिन्दयां नै म्हारै पै अनोक्खी दया करी, क्यूँके मिह बरसण के कारण ठण्ड थी, ज्यांतै आग सुलगाके हम सारया ताहीं ठहराया।

3 जिब पौलुस नै लाकड़ियाँ का भरोटा कट्टा करके आग पै धरया, तो एक साँप आँच पाके लिकइया अर उसके हाथ तै लिपट गया।

4 जिब उन बासिन्दयां नै साँप ताहीं उसके हाथ तै लिपटे होइ देख्या, तो आप्पस म्ह कह्या, “साच्चए यो माणस खून्नी सै के फेर भी समुन्दर तै बच गया, तोभी न्याय नै जिन्दा कोनी रहण दिया।”

5 फेर उसनै साँप ताहीं आग म्ह झटक दिया, अर उस ताहीं किमे नुकसान कोनी होया।

6 पर वे लोग बाट देखै थे के वो सूज जावैगा या चाणचक पड़के मर जावैगा, पर जिब वे घणी वार ताहीं देखदे रहे अर देख्या के उसका किमे भी कोनी बिगइया, तो अपना विचार बदलके कह्या, “यो तो कोए देवता सै।”

7 उस जगहां के लोवै-धोवै उस टापू के प्रधान पुबलियुस की धरती थी। उसनै म्हारै ताहीं अपना घरां ले जाके तीन दिन मित्तर की ढाळ सेवा-पाणी करी।

8 पुबलियुस का बाप बुखार अर बवासीर तै बीमार पड्या था। आखर म्ह पौलुस नै उसके धौरै कमरे म्ह जाके प्रार्थना करी अर उसपै हाथ धरके उस ताहीं ठीक करया।

9 जिब इसा होया तो उस टापू के बाकी बीमार पौलुस के धौरै आये अर वे चंगे करे गये।

10 उननै म्हारा घणा आदर-मान करया, अर जिब हम चाल्लण लागगे तो जो किमे म्हारै खात्तर जरूरी था, उननै जहाज पै धर दिया।

?????? ???? ???? ???? ???? ?

11 तीन महिन्ने के पाच्छे हमनै सिकन्दरिया जावण आळे जहाज पै सफर शरू करया, यो जहाज ठण्ड के कारण इस टापू म्ह ठेहरा होया था, इस जहाज के आगले भाग पै एक जोड़ी देवत्यां का एक निशान था। (दियुसकूरी गद्दी होई थी)

12 सुरकूसा नगर म्ह लंगर गेर के हम तीन दिन टिके रहे।

13 ओडे तै आगवै बढ़के हम रेगियुम नगर म्ह आये, अर एक दिन के पाच्छे दक्षिणी हवा चाल्ली, फेर हम दुसरे दिन पुतियुली नगर म्ह आये।

14 ओड़ै हमनै विश्वासी भाई मिले, उनकै कहणे तै हम उनकै उरै सात दिन ताहीं रहे, अर इस तरियां तै हम रोम देश कान्ही चाल्ले ।

15 कुछ विश्वासी भाई रोम देश तै म्हारी खबर सुणकै अप्पियुस कै चौक अर तीन-सराए ताहीं म्हारै तै फेटण नै लिंकड़ आये, जिन नै देखकै पौलुस नै परमेसवर का धन्यवाद करया अर बड़ा उत्साहित होया ।

16 जिव हम रोम नगर म्ह पोहचे, तो पौलुस ताहीं एक सिपाही कै गेल्या जो उसकी रुखाळी करै था, एक्ले रहण का हुकम मिलगया ।

ॐ ॐ ॐ ॐ ॐ ॐ

17 तीन दिन के पाच्छे, उसनै यहूदियाँ कै खास माणसां ताहीं बुलाया, अर जिव वे कट्टे होए तो उनतै कह्या, “हे भाईयो, मन्नै अपणे माणसां के या बाप-दादा कै वीवारां कै विरोध म्ह किमे भी कोनी करया, तोभी कैदी बणाके यरुशलेम नगर तै रोमी सरकार कै हाथ्यां सौंप्या गया ।

18 उननै मेरै ताहीं जाँचकै छोड़ देणा चाह्या, क्यूँके मेरै म्ह मौत के जोगगा कोए कसूर कोनी था ।

19 पर जिव यहूदी अगुवें इसके विरोध म्ह बोल्लण लागगे, तो मन्नै कैसर की दुहाई देणी पड़ी यो न्ही के मन्नै अपणे माणसां पै कोए दोष लाणा था ।

20 ज्यातै मन्नै थारे ताहीं बुलाया सै के थारे तै मिलू अर बतळाऊँ, क्यूँके इस्राएल की आस कै खात्तर वो मसीह इस बेल तै जकड़े होए सै ।”

21 उननै उसतै कह्या, “ना हमनै तेरै बारे म्ह यहूदिया परदेस तै चिट्ठी पाई, अर ना विश्वासी भाईयाँ म्ह तै किसे नै आके तेरै बारे म्ह किमे बताया अर ना बुरा कह्या ।

22 पर तेरा विचार के सै? वोए हम तेरै तै सुणणा चाहवां सां, क्यूँके हमनै बेरा सै के हरेक जगहां इस पंथ कै विरोध म्ह माणस बात करै सै ।”

23 फेर जो यहूदी पौलुस के गैल थे, उननै उसके खात्तर एक दिन ठहराया, अर घणे माणस उसके उरै कट्टे होए, अर वो परमेसवर के राज्य की गवाही देंदा होया, अर मूसा नबी के नियम-कायदे अर नबियाँ की किताबां तै यीशु कै बारे म्ह समझा-समझाके सबेरै तै साँझ ताहीं वर्णन करदा रहया ।

24 फेर कुछां नै उन बाततां ताहीं मान लिया, अर कुछां नै विश्वास कोनी करया ।

25 जिव वे आप्स म्ह एक पंथ कोनी होए, तो पौलुस की इस बात कै कहण पै चाल्ले गये “पवित्र आत्मा नै यशायाह नबी कै जरिये थारे बाप-दादा तै सही ए कह्या था,”

26 “जाके इन माणसां तै कह,  
के सुणदे तो रहोगे, पर ना समझोगे,  
देखदे तो रहोगे, पर ना बुझ्दोगे!

27 क्यूँके इन माणसां का मन मोट्टा  
अर उनके कान भारया हो गये सै,  
अर उननै अपणी आँख मूंद ली सै,  
इसा ना हो के वे कदे आँखां तै देखै  
अर कान्ना तै सुणै अर मन तै समझै  
अर पलटै, अर मै उन ताहीं ठीक करै ।”

28 “इस करके थम जाणो सो के परमेसवर कै इस उद्धार की कथा गैर यहूदियाँ कै धोरै भेज्जी गयी सै, अर वे स्वीकार करैगे ।”

29 जिव उसनै न्यू कह्या तो यहूदी आप्स म्ह घणे बहस करण लागगे अर ओड़ै तै चले गये ।

30 वो पूरे दो साल अपणे किराए कै घर म्ह रहया,

31 अर जो उसके धोरै आवै थे, उन सारया तै मिलदा रहया अर बिना रोक-टोक घणा निडर होकै परमेसवर के राज्य का प्रचार करदा अर प्रभु यीशु मसीह की बात सिखान्दा रहया ।

## रोम नगर के माणसां ताहीं पौलुस की चिट्ठी



रोम नगर के माणसां ताहीं पौलुस की चिट्ठी लिखण का मकसद था रोम म्ह कलीसिया की यात्रा के खात्तर राह तैयार करणा, जिसकी योजना पौलुस नै बणाई थी। उसकी योजना थी के थोड़े बखत ताहीं वो ओड़ै के विश्वासियाँ के बीच काम करै, फेर उनकी मदद तै स्पेन देश ताहीं जावै। इस किताब म्ह म्हारे ताहीं पौलुस के सन्देश का सारा विवरण मिल्या सै। रोम की कलीसिया के माणसां ताहीं नमस्कार अर उनके खात्तर अपणी प्रार्थनाओं के बारे म्ह बताण बाद, पौलुस इस चिट्ठी की खास बात का जिक्र कर सै, क्यूँके इस सुसमाचार म्ह परमेसवर की धार्मिकता विश्वास तै, अर विश्वास खात्तर जाहिर होवै सै, (1:17)। पौलुस आगुँ इस खास बात नै खुलकै समझावै सै। सारी माणस जात, यहूदी अर गैर यहूदी दोनुआ नै, परमेसवर के गैल मेलजोल करण की जरूरत सै, क्यूँके सारे समान रूप तै पाप के बस म्ह सै। यीशु मसीह म्ह विश्वास के जरिये माणसां का परमेसवर के गैल मेलजोल होवै सै। फेर पौलुस मसीह के गैल नए जीवन का जिक्र करै सै, जो परमेसवर के गैल इस नए सम्बन्ध होण के कारण होवै सै। विश्वासी का परमेसवर के गैल जो मेळ-मिलाप होवै सै, अर परमेसवर का आत्मा पाप अर मृत्यु के अधिकार तै उननै आजाद कर देवै सै। पाठ 5-8 म्ह पौलुस विश्वासी के जीवन म्ह, परमेसवर के नियम-कायदा का मकसद, अर परमेसवर के आत्मा की शक्ति पै भी जिक्र करै सै। फेर प्रेरित इस सवाल तै जूझै सै, के सारी मानव जाति के खात्तर परमेसवर की योजना म्ह यहूदी अर गैर यहूदी किस तरियां आ सकै सै। वो इस नतिज्जे पै पोहंचै सै, के यहूदी माणसां के जरिये यीशु का ठुकराया जाणा भी परमेसवर की उस योजना का एक भाग सै, जो पूरी मानव जाति नै यीशु मसीह म्ह परमेसवर के अनुग्रह म्ह ल्याण खात्तर बणाई गयी सै, अर उसका विश्वास सै के यहूदी लोग सदा यीशु तै मुकरते न्ही रहवेंगे। आखिर म्ह पौलुस लिखै सै, के मसीह जीवन किस तरियां जीणा चाहिए, खासकर दुसरयां के गैल प्यार राखणा। वो इन बाततां नै जिसा के परमेसवर की सेवा, राज्य अर एक दुसरा के खात्तर विश्वासियाँ का फर्ज, अर अन्तरात्मा के सवालां के रूप म्ह लेवै सै। वो चिट्ठी का समापन निजी सन्देशां अर परमेसवर की बड़ाई के गैल करै सै।

### रूप-रेखा

भूमिका अर खास बात 1:1-17

माणस नै उद्धार की जरूरत 1:18-3:20

उद्धार परमेसवर का रास्ता सै 3:21-4:25

मसीह म्ह नया जीवन 5:1-8:39

परमेसवर की योजना म्ह इस्राएल 9:1-11:36

मसीह चाल-चलण 12:1-15:13

समापन अर व्यक्तिगत अभिवादन 15:14-16:27



1 या चिट्ठी पौलुस की ओड़ तै सै, जो यीशु मसीह का दास सै अर परमेसवर के जरिये प्रेरित होण के खात्तर चुण्या गया अर उसका सुसमाचार सुणाण खात्तर न्यारा करया गया सै।

2 यीशु के इस दुनिया म्ह आण तै भोत पैहले परमेसवर नै वादा करया था, के वो नबियाँ के जरिये इस सुसमाचार ताहीं जाहिर करै, जिननै इसके बारे म्ह पवित्र ग्रन्थ म्ह लिख्या सै।

3 यो सुसमाचार परमेसवर के बेटे के बारे म्ह सै, जो म्हारा प्रभु यीशु मसीह सै। वो शारीरिक तौर पै तो राजा दाऊद की पीढ़ी तै पैदा होया,

4 पर पवित्र आत्मा की शक्ति तै मरे होया म्ह तै जिन्दा होण के कारण परमेसवर का बेटा कुह्या।

5 मसीह के जरिये हमने अनुग्रह अर प्रेरिताई परमेश्वर तै मिली, ताके उसके नाम के कारण गैर यहूदी माणस मसीह म्ह विश्वास करके उसकी मानै,

6 थम गैर यहूदी विश्वासी जो रोम नगर म्ह सों, उन माणसां म्ह शामिल सों, जिन ताहीं परमेश्वर नै यीशु मसीह के माणस होण खात्तर बुलाया सै।

7 या चिट्ठी रोम नगर के उन सारे माणसां के नाम सै, जो परमेश्वर के प्यारे सै, अर उसके पवित्र जन होण के खात्तर बुलाए गये सै। मै प्रार्थना करूँ सूँ, के म्हारै पिता परमेश्वर अर प्रभु यीशु मसीह की ओड़ तै थारे ताहीं अनुग्रह अर शान्ति मिलदी रहवै।

### ?????? ?? ?????????

8 सब तै पैहल्या मै थम सारया के खात्तर यीशु मसीह के जरिये अपणे परमेश्वर का धन्यवाद करूँ सूँ, क्यूँके यीशु मसीह म्ह थारे विश्वास का जिक्र साब्ती दुनिया म्ह होरया सै।

9 परमेश्वर, जिसकी सेवा मै पूरे मन तै करूँ सूँ, अर उसके बेटटे के सुसमाचार के बारे म्ह माणसां ताहीं बताऊँ सूँ, वोए मेरा गवाह सै, के मै अपनी प्रार्थना म्ह थमने किस तरियां सारी हाण याद करूँ सूँ।

10 अर बिनती करूँ सूँ, के जै हो सक्या तो परमेश्वर की इच्छा के मुताबिक मै थारे तै मिलण भी आऊँ।

11 क्यूँके मै थारे तै मिलण की लालसा करूँ सूँ, ताके मै थमने कोए आत्मिक आशीष दियुँ जिसतै थम विश्वास म्ह मजबूत हो जाओ।

12 मेरे कहण का मतलब यो सै, के जब मै थारे तै मिलु, तो मै थारे ताहीं अर थम मन्ने उत्साहित कर सकी, थम मेरे विश्वास ने जाणके मजबूत हो जाओ, अर मै थारे विश्वास ने जाणके मजबूत हो जाऊँ।

13 हे विश्वासी भाईयो, मै चाहूँ सूँ के थम इस बात नै जाणो, के मन्ने कई बार थारे धरै आण की योजना बणाई, के मै थारे बीच म्ह उसीए आत्मिक बढ़ोतरी देख सकूँ, जिसी मन्ने बाक्की गैर यहूदियाँ म्ह देखी सै, पर इब तक मेरे आण म्ह रुकावट ए होन्दी रही सै।

14 मै उन संस्कारी माणसां का जो यूनानी भाषा अर सभ्यता नै जाणै सै, अर जो माणस उनकी भाषा अर सभ्यता नै न्ही जाणते, अर अकलमंद अर बेअक्ल माणसां ताहीं वचन सुणाण का मन म्ह बोझ राखूँ सूँ।

15 इस करके म्ह मै थमने भी जो रोम नगर म्ह रहो सो, सुसमाचार सुणाण खात्तर जमा उत्सुक सूँ।

### ?????????? ?? ?????????

16 क्यूँके मै मसीह के सुसमाचार के बारे म्ह कोनी सरमान्दा, परमेश्वर अपनी शक्ति के जरिये सब नै बचावै सै जो सुसमाचार पै विश्वास करै सै, पैहल्या यहूदियाँ ताहीं अर फेर गैर यहूदी ताहीं।

17 क्यूँके सुसमाचार हमने बतावै सै, के परमेश्वर अपनी नजर म्ह हमने किस तरियां धर्मी बणावै सै। जो शुरु तै लेके अंत तक मसीह पै विश्वास करण तै हो सै, जिसा पवित्र ग्रन्थ म्ह लिख्या भी सै, के परमेश्वर अपनी नजर म्ह धर्मी जन बणावै सै, वो विश्वास तै जिन्दा रहवैगा।

### ???? ?? ?? ??

18 परमेश्वर का छो तो उन माणसां की सारी अभगति अर अधर्म के काम्मां के कारण जो माणस करै सै, सुगं तै जाहिर हो सै, वो अपणे सब अधर्म के काम्मां तै माणस ताहीं, परमेश्वर की सच्चाई के बारे म्ह जाणण तै रोक्के सै।

19 वे परमेश्वर के बारे म्ह इस करके सही अर आसान्नी तै जाण सकै सै, क्यूँके परमेश्वर नै उन ताहीं इन बातों के बारे म्ह बताया सै।

20 सच यो सै के दुनिया की शुरुआत तै ए परमेसवर के अनदेकखे गुण, उसकी अनन्त सामर्थ्य अर उनका परमेसवरत्व, दुनिया म्ह सै, अर दिक्खै भी सै, इस करके माणस कै धोरै कोए बहाना कोनी, के वो परमेसवर नै न्ही जाणता।

21 परमेसवर का ज्ञान होण पै, भी उननै ना तो उस ताहीं परमेसवर होण कै लायक सम्मान दिया, अर ना ए उसका धन्यवाद करया। इसके उल्ट वो उसके बारे म्ह बेकार की बात सोचण लागगे, अर जिसा उन ताहीं सोचणा चाहिए था उसा न्ही सोच्या, पर बुरा ए सोच्या।

22 वे अपणे-आप ताहीं अकलमंद मानकै बेअक्ले बणगे,

23 अर अविनाशी परमेसवर की महिमा न्ही करी, बल्के नाशवान माणस, अर पंछियाँ, रेंगण आळे अर चार पैरां आळे जानवरां की मूर्ति की आराधना करण लागगे।

24 इस करके परमेसवर नै उन ताहीं उनकै मन की बुरी इच्छा कै मुताबिक गलत काम करण खात्तर छोड़ दिया ताके वे आपस म्ह अपणे शरीरां तै गन्दे काम करै।

25 क्यूँके उननै परमेसवर के बारे म्ह सच्ची बाततां ताहीं जाणण की बजाये झूठ पै विश्वास करया, अर सृष्टि की चिज्जां की आराधना अर सेवा करी, ना के उस सृजनहार परमेसवर की जो सदा खात्तर महिमा के लायक सै! आमीन।

26 ज्यांतै परमेसवर नै उन ताहीं उनकी नीच कामनाओं कै बस म्ह छोड़ दिया, जिस कारण उनकी लुगाईयाँ नै भी प्राकृतिक संभोग की जगहां अप्राकृतिक संभोग अपना लिया।

27 उससे तरियां ए लुगाईयाँ के गेल्या प्राकृतिक संभोग नै छोड़कै माणस दुसरे माणस कै खात्तर आपस म्ह कामुकता म्ह जळण लागगे, अर माणस का माणस कै गेल्या बेशर्मी के काम करणा उनके उप्पर दण्ड लेकै आये।

28 अर जिब उननै परमेसवर ताहीं जाणणा बेवकूफी लागया, तो परमेसवर नै भी उन ताहीं उनकै निकम्मे मन के बस म्ह छोड़ दिया, ताके वे बुरे काम करै।

29 ज्यांतै वे सारे ढाळ के अधर्म, दुष्टता, लालच, अर बैर-भाव तै भरगे, अर जळण, हत्या, झगड़े, छळ, ईष्यां तै भरगे, अर चुगलखोर,

30 बदनाम करण आळे, परमेसवर तै नफरत करण आळे, बुराई करण आळे, दुसरयां की बेजती करण आळे, डिंगमार, घमण्डी, भुंडी-भुंडी बाततां कै बणाण आळे, माँ-बाप का हुकम ना मानण आळे,

31 बेअक्ले, विश्वासघाती, प्यार अर दया की कमी अर निर्दयी होगये।

32 वे तो परमेसवर की या धार्मिक विधि नै जाणे सै, के इसे-इसे काम करण आळे मौत के दण्ड कै जोगे सै, फेरभी ना सिर्फ आप ए इसे काम करे सै, बल्के इसे काम करण आळा तै राज्जी भी होवे सै।

## 2

### ?????? ? ?

1 इस करके हे मेरे विश्वासी भाईयो, थम जो कोए भी क्यूँ ना हो, थारे धोरै इस बात का कोए जवाब कोनी, के थम जो दुसरयां पै दोष लगाओ सों, तो उस बात के कारण खुद अपणे-आप पै दण्ड लेके आओ सों, क्यूँके जिस बात के बारे म्ह थम उसनै दोषी बणाओ हो, थम खुद भी वोए काम करो सों।

2 हमनै यो बेरा सै, के परमेसवर उसका न्याय धार्मिकता कै साथ जरूर करैगा, जो इसे बुरे काम करै सै।

3 जिब के थम जो इसे-इसे काम करणीया पै दोष लगाओ सों, अर खुद वैए काम करो सों, के न्यू समझों सों के थम परमेसवर के दण्ड तै बच जाओगे?

4 के थम परमेसवर की भलाई, सहनशीलता, अर धीरज रूपी धन ताहीं तुच्छ जाणो सों? के थम न्ही समझते के परमेसवर की भलाई ए थारे ताहीं पाप छोड़णा सिखावे सै?

5 पर थम हठिल्ले सों, अर पाप करणा न्ही छोड़दे, अर ना ए अपणे-आपनै बदलना चाहन्दे। इस करकै जिस दिन परमेसवर अपना छो दिखावैगा, उस दिन धार्मिकता के साथ उसका न्याय जाहिर होवैगा, अर वो थारे ताहीं भारी दण्ड देवैगा।

6 परमेसवर हरेक नै उसके काम के मुताबिक फळ देवैगा।

7 जो माणस भले काम करते रहवै सै, अर परमेसवर की महिमा, आदर अर अनन्त जीवन की खोज म्ह लागगे रहवै सै, परमेसवर उन सारया ताहीं अनन्त जीवन देवैगा।

8 पर जो मतलबी सै अर सच नै कोनी मान्दे, बल्के अधर्म नै मान्दें सै, उनपै परमेसवर का छो अर प्रकोप पड़ैगा।

9 क्लेश अर संकट हरेक माणस पै आवैगा। परमेसवर सबतै पैहल्या यहूदियाँ का अर बाद म्ह उन माणसां का न्याय करैगा जो गैर यहूदी सै।

10 पर महिमा, आदर अर शान्ति हरेक नै मिलैगी, जो भले काम करै सै, पैहल्या यहूदी ताहीं फेर उन माणसां ताहीं जो गैर यहूदी सै।

11 क्यूँके परमेसवर किसे का पक्षपात कोनी करदा।

12 वे सारे गैर यहूदी माणस जिननै परमेसवर के नियम-कायदे जो मूसा नबी ताहीं मिले थे, उन ताहीं जाणे बिना जिसनै पाप करया सै, वे नियम-कायदा नै बिना जाणे नाश भी होवेंगे, पर जिन नै नियम-कायदे नै जाणकै भी पाप करया सै, उनका न्याय भी नियम-कायदे के मुताबिक करया जावैगा।

13 क्यूँके परमेसवर की निगाह म्ह नियम-कायदे के सुणण आळे धर्मी माणस कोनी, पर नियम-कायदे पै चाल्लण आळा नै धर्मी बणावैगा।

14 फेर जिव गैर यहूदी लोग जिनके धारै मूसा नबी के नियम-कायदे कोनी, कुदरती तौर पैए नियम-कायदे की बातों पे चाल्लै सै, तो नियम-कायदे उनके धारै ना होण पै भी, उन ताहीं बेरा सै, के उननै के करणा सै, अर के न्ही करणा।

15 वे नियम-कायदे की बात अपणे-अपणे दिलां म्ह लिखी होई दिखावै सै अर उनकी अन्तरात्मा भी इसकी गवाही देवें सै, के ये बात सच सै, क्यूँके उनके विचार उनपै दोष लगावै सै, या फेर यो बतावै सै के वो ठीक करै सै।

16 यो सब उस दिन स्पष्ट हो जावैगा, जिव परमेसवर मेरै जरिये सुणाये गये सुसमाचार के मुताबिक, माणसां की लुक्ही होई बातों का न्याय, यीशु मसीह के जरिये करैगा।

### \*\*\*\*\*

17 थम खुद नै यहूदी कुह्वावै सों, अर मूसा नबी के नियम-कायदे पै भरोस्सा राक्खों सों, परमेसवर थारे पै दया करै सै, इस कारण थम घमण्ड करण लागरे सों।

18 अर थमनै परमेसवर की मर्जी का बेरा सै, थम आच्छी-आच्छी बातों नै तो चाहो सों, क्यूँके थारे ताहीं ये बात मूसा नबी के नियम-कायदे म्ह तै सिखाई गई सै।

19 अर थमनै इस बात का पूरा भरोस्सा सै, के थम आंध्याँ नै राह दिखाण आळे अर अन्धकार म्ह भटके होए माणसां खातर परमेसवर का चाँदणा सों।

20 अर बेअक्लानै नै सिखाण आळे अर बाळकां के उपदेशक सों। थमनै बेरा सै के परमेसवर के नियम-कायदे थमनै पूरी तरियाँ तै ज्ञान अर सच्चाई देवै सै।

21 इस करकै थम जो दुसरयां नै शिक्षा देओ सों, तो अपणे-आपनै शिक्षा क्यूँ न्ही देन्दे? थम उपदेश देओ सों, के “चोरी ना करियो,” के थम खुद चोरी कोनी करते!

22 थम जो कहवै सों, के “जारी ना करियो,” के खुद जारी कोनी करते? थम जो मूर्तियाँ तै नफरत करो सों, के खुद ए मन्दरां नै कोनी लूटते?

23 थम जो नियम-कायदे नै जाणण का घमण्ड करो सों, के नियम-कायदे नै ना मानकै परमेसवर का अनादर कोनी करते?

24 थम यहूदियाँ के कारण गैर यहूदियाँ म्ह परमेसवर के बारे म्ह बुरा भला कह्या जावै सै, जिसा पवित्र ग्रन्थ म्ह लिख्या भी सै।”



25 मैं थमनै कुछ बताऊँ सूँ, थारा खतना करया जाणा जिब्बे फायदेमन्द सै, जिब थम नियम-कायदा नै मान्नो, जै थम इसा न्ही करते तो थम उन माणसां की ढाळ सों जिनका खतना न्ही होया।

26 जै बिना खतना करे होए माणस नियम-कायदे की विधियाँ नै मान्नै, तो परमेसवर उन ताहीं अपणे माणस क्यूँ न्ही कहवैगा।

27 बिना खतना होए माणस जो परमेसवर के हुकरमां नै मान्नै सै, वे थारी बुराई करैगें जिनकै धौरै परमेसवर के नियम-कायदे सै जिन ताहीं थम मानते न्ही।

28 असली यहूदी वो कोनी जो सिर्फ यहूदी माँ-बाप तै पैदा होया सै, अर ना ए वो असली खतना सै, जो दिखाण खात्तर देह म्ह करया गया सै।

29 यहूदी वो सै, जो अपणे मन म्ह यहूदी सै, अर खतना वो सै, जो पवित्तर आत्मा के जरिये मन का करया जावै सै, ना के वो जो नियम-कायदा के मुताबिक करया जावै सै, इस ढाळ के माणसां की तारीफ माणसां की ओड़ तै न्ही, पर परमेसवर की ओड़ तै करी जावै सै।

### 3

1 कोए कह सकै सै, के भला यहूदी होण का के फायदा, या खतना करण का के फायदा?

2 यहूदी होण के भोत फायदे सै, क्यूँके परमेसवर के वचन यहूदियाँ ताहीं ए सौंपे गये सै।

3 अगर कुछ यहूदी माणस विश्वासघाती लिक्डै भी तो उसतै के फर्क पड़े सै? परमेसवर अपणे वादे पूरा करण म्ह विश्वास जोगगा सै, तो इसका यो मतलब कोनी के परमेसवर भी विश्वासघाती सै।

4 न्ही! बिल्कुल न्ही! बल्के परमेसवर सच्चा सै, अर दुनिया का हरेक माणस झूट्टा टैहरै, जिसा पवित्तर ग्रन्थ म्ह परमेसवर के बारे म्ह लिख्या सै, "जिसतै तू अपणी बात्तां म्ह धर्मी साबित हो अर न्याय करदे बखत तू जीत पावै।"

5 इस करके जै म्हारे बुरे काम परमेसवर की धार्मिकता साबित कर देवै सै, तो हम के कह्वाँ? के न्यू कह्वाँ के परमेसवर जो छो करै सै, तो के वो अन्यायी सै? (यो तो मै दुनियावी नजरिये तै कहूँ सूँ)।

6 न्ही! बिल्कुल न्ही! जै परमेसवर यहूदी माणसां का न्याय सही तरिकेँ तै न्ही कर सकता, तो वो दुनिया के माणसां का भी न्याय सही तरिकेँ तै न्ही कर सकता?

7 के कोए कह सकै सै, जै मेरा झूठ परमेसवर की सच्चाई नै दिखावै अर उसकी महिमा नै बढ़ावै, तो परमेसवर किस तरियां मन्नै परख के पापी साबित कर सकै सै?

8 कई माणस यो कह के मेरे पै दोष लगावै सै, के "आओ, हम बुरे काम करा के इसतै ए कुछ भलाई हो जा।" जो मेरे बिरुध्द इसी बात कहवै सै वो दण्ड के लायक सै।



9 तो फेर हम के कह सका सां? के हम यहूदी गैर यहूदियाँ तै आच्छे सां? कदे भी न्ही! क्यूँके हम यहूदी अर गैर यहूदी दोनुवां पै यो दोष ला चुके सां के वे सारे के सारे पाप की शक्ति के बस म्ह सै।

10 जिसा के पवित्तर ग्रन्थ म्ह लिख्या सै: "कोए भी माणस परमेसवर की नजर म्ह धर्मी कोनी, एक भी कोनी।

11 कोए भी माणस समझदार कोनी, कोए परमेसवर का टोह्ण आळा कोनी।

12 सारे माणस परमेसवर की राह तै भटक गये सै, सबके सब परमेसवर की नजर म्ह निकम्मे बणगे सै, कोए भी भलाई करण आळा कोनी, एक भी कोनी।

13 उनका मुँह खुली होई कबूर की ढाळ सै, जिस म्ह तै बदबू आवै सै। क्यूँके अपणे मुँह तै वे भुंडा बोल्लै सै, अर वे जो भी बोल बोल्लै सै वो साँप के जहर की तरियां जहरीले सै।

14 उनका बोल श्राप अर कड़वाहट तै भरया सै।

15 वो लहू बहाण खात्तर फुर्तिले सै,

16 वे जित्त भी किते जावै सै ओड़ै नाश अर क्लेश लेके जावै सै,

17 वे न्ही जानते के माणसां के गैल खुशी अर शान्ति तै किस तरियां जीणा सै ।

18 उन म्ह परमेसवर का डर सै ए कोनी ।”

19 हमनै बेरा सै के मूसा नबी के नियम-कायदे जो कुछ कहवै सै, उन्हे तै कहवै सै, जो नियम-कायदे के अधीन सै, ताके कोए भी माणस भान्ना न्ही बणा सकै, अर दुनिया के सारे माणस परमेसवर के स्याम्ही दोषी ठैहराये जावै ।

20 क्यूँके मूसा नबी के नियम-कायदे के पुगान तै कोए माणस उसके स्याम्ही धर्मी कोनी बणैगा, क्यूँके नियम-कायदा के जरिये हमनै बेरा लागै सै के हम पापी सां ।

### XXXXXXXX XX XXXXXX XXXXXXXXXXXX

21 पर इब नियम-कायदा नै मान्ने बिना धार्मिकता जो परमेसवर तै मिलै सै, अर जिसके बारे म्ह मूसा नबी के नियम-कायदा अर नबियाँ की किताब्यां म्ह भोत पैहले लिख्या सै, के परमेसवर हमनै धर्मी किस तरियां बणावै सै ।

22 मतलब यो के हम प्रभु यीशु मसीह पै विश्वास करण तै धर्मी बणा सां, जो यीशु मसीह पै विश्वास करण तै सब माणसां खात्तर सै । क्यूँके परमेसवर की नजर म्ह सब माणस एक समान सै ।

23 क्यूँके सारया नै पाप करया सै, अर सब परमेसवर की महिमा तै दूर होगे सै,

24 परमेसवर नै म्हारे पै अनुग्रह करया, के उसनै यीशु मसीह के जरिये म्हारे ताहीं म्हारे पापां के दण्ड तै छुड़ा लिया, अर म्हारे ताहीं बिना कुछ करे धर्मी बणाया ।

25-26 परमेसवर नै यीशु मसीह ताहीं म्हारे पाप की कीमत चुकाण खात्तर इस दुनिया म्ह भेज्जा, यीशु मसीह नै म्हारे खात्तर अपणा लहू बहा के अपणी जान दे दी । ताके हम उसपै विश्वास करण के जरिये परमेसवर के धारे आ सकां, अर उसनै इसा यो दिखाण खात्तर करया, के वो पैहले जमाने म्ह भी पापी माणसां गैल सबर तै रहण म्ह अर उनके पाप माफ करण म्ह धर्मी था, बल्के इब भी उसकी धार्मिकता जाहिर हो जावै, जिसतै वे खुद धर्मी बणै अर जो प्रभु यीशु म्ह विश्वास राखै सै, वो परमेसवर की नजर म्ह भी धर्मी बण जावै ।

27 तो के हम किसे बात पै घमण्ड कर सकां सां? उसके खात्तर कोए जगहां न्ही । के नियम-कायदा के जरिये या उननै मानण के जरिये सां? न्ही! पर यीशु मसीह पै विश्वास करण तै घमण्ड करां सां ।

28 इस करके हम इस नतीजै पै पोहचे सा, के परमेसवर म्हारे ताहीं यीशु मसीह पै विश्वास करण के जरिये धर्मी बणावै सै, ना के मूसा नबी के नियम-कायदा ताहीं मानण तै ।

29 परमेसवर सिर्फ यहूदियाँ ए का परमेसवर कोनी, पर वो गैर यहूदियाँ का भी परमेसवर सै ।

30 क्यूँके एक ए परमेसवर सै, जो खतना आळा नै यीशु मसीह पै विश्वास करण तै अर बिन-खतना आळा ताहीं भी, विश्वास के जरिये धर्मी बणावै सै ।

31 तो के म्हारा विश्वास नियम-कायदे नै बेकार बतावै सै? न्ही! बिल्कुल न्ही! बल्के इसके उल्ट जिब हम विश्वास करा सां तो हम समझ जावां सां, के परमेसवर नै म्हारे ताहीं नियम-कायदा क्यूँ दिये ।

## 4

### XXXXXXXX XX XXXXXX

1 तो हम यहूदी हाण के नाते म्हारे पूर्वज अब्राहम के बारे म्ह के कहवा ।

2 जै अब्राहम आच्छे काम्मां तै धर्मी बणाया जान्दा, तो वो इसका घमण्ड कर सकै था, पर वो परमेसवर के स्याम्ही आच्छे काम्मां के जरिये घमण्ड न्ही कर सकदा ।

3 पवित्र ग्रन्थ के कहवै सै? न्यू के “अब्राहम नै परमेसवर के वादे पै विश्वास करया, अर परमेसवर नै उसके विश्वास के कारण उस ताहीं धर्मी बणा दिया ।”

4 जो मेहनत करै सै उसकी मजदूरी नै ईनाम न्ही कहन्दे, बल्के वो तो उसका हक सै ।

5 पर माणस काम्मां के जरिये धर्मी कोनी बणता, पर भगतिहीन माणस जो परमेसवर पै विश्वास करै सै उसके विश्वास के कारण वो धर्मी बणै सै ।

6 जिसने परमेसवर बिना काम्मां के धर्मी बनावै सै, पवित्र ग्रन्थ म्ह राजा दाऊद भी धन्य उस ताहीं कहवै सै।

7 “धन्य सै, वे जिनके अधर्म माफ होए, अर पाप भूला दिये गये।

8 धन्य सै वो माणस जिसके पापां का हिसाब परमेसवर न्ही राखदा।”

9 के या आशीष जिन माणसां का खतना हो लिया, उनकै ए खात्तर सै, या जिनका खतना न्ही होया उन खात्तर भी सै? हम न्यु कहुं सां, “अब्राहम नै परमेसवर पै विश्वास करया, अर परमेसवर नै उसके विश्वास के कारण उस ताहीं धर्मी बना दिया।”

10 तो यो कद होया? खतने की हालत म्ह या बिना खतने की हालत म्ह? खतने की हालत म्ह कोनी पर बिना खतने की हालत म्ह।

11 जब अब्राहम का खतना न्ही होया था, जब भी परमेसवर नै उस ताहीं स्वीकार करया, अर उस ताहीं धर्मी बनाया, खतने का निशान अब्राहम ताहीं अपनाण की छाप सै, इस करके अब्राहम उन माणसां का आत्मिक पूर्वज सै, जो विश्वास करै सै पर जिनका खतना न्ही होया, वो विश्वास के जरिये धर्मी बणे।

12 अर वो उन खतना करे होए माणसां का आत्मिक पूर्वज सै, जो ना सिर्फ खतना करे होए सै, पर उनका विश्वास उसाए हो जिसा उनके पूर्वज अब्राहम का तब था, जब उसका खतना न्ही होया था।

?????? ?? ?????? ?????????? ?? ??????

13 परमेसवर नै अब्राहम ताहीं अर उसके वंश ताहीं पूरी दुनिया देण का वादा करया, यो इस करके कोनी होया के अब्राहम नै नियम-कायदा ताहीं मान्या, क्यूंके उसने परमेसवर पै विश्वास करया, इस बजह तै उसने उस ताहीं धर्मी बना दिया।

14 अब्राहम अर उसके वंश ताहीं यो वादा इस खात्तर दिया गया, क्यूंके उनने नियम-कायदा ताहीं मान्या, तो विश्वास बेकार अर वादा झूठटा लिकड़या।

15 परमेसवर का छो नियम-कायदा नै ना मानण आळा पै पड़े सै, अर जित्त नियम-कायदे कोनी ओड़े उसका उल्लंघन भी कोनी।

16 इस बजह तै वादा परमेसवर पै विश्वास करण तै मिलै सै, जो अनुग्रह के मुताबिक से, यो वादा अब्राहम के सारे वंशा ताहीं मिल्या सै, ना कै सिर्फ उन ताहीं जो माणस मूसा नबी के नियम-कायदा नै मान्ने सै, पर उन माणसां कै खात्तर भी जो अब्राहम की ढाळ परमेसवर पै विश्वास करै सै, क्यूंके अब्राहम ए म्हारे सारया का पूर्वज सै।

17 जिसा पवित्र ग्रन्थ म्ह लिख्या सै, “मन्ने तेरे ताहीं घणीए जात्तां का पूर्वज बनाया सै” परमेसवर की नजर म्ह अब्राहम म्हारा पूर्वज सै। उनने उस परमेसवर पै विश्वास करया, जो मरे होया नै जिन्दा करै सै, अर जो बात सै ए न्ही उनका नाम इसा लेवै सै के मान्ने वे सै।

18-19 परमेसवर नै अब्राहम तै कहुं, तेरे भोत-से वंश होवैंगे। पर अब्राहम नै सोच्या के बुढ़ापे म्ह, मेरे किस तरियां ऊलाद पैदा होगी? क्यूंके वो तकरीबन सौ साल का हो लिया था, अर सारा भी बूढ़ी होण के कारण बच्चे पैदा कोनी कर सकै थी। इन सारी बाततां तै साफ जाहिर था, के उसके भोत-से वंशज न्ही हो सकदे, तोभी अब्राहम का विश्वास कमजोर न्ही होया, वो परमेसवर के वादे पै विश्वास करदा रह्या, अर उसने आस न्ही तोड़ी।

20 अर ना ए अविश्वासी होकै परमेसवर कै वादा पै शक करया, पर विश्वास म्ह पक्का होकै उसकी महिमा करी।

21 अर पक्के तौर पै जाणया के जिस बात का परमेसवर नै वादा करया सै, वो उसने पूरा करण म्ह भी सामर्थी सै।

22 अर परमेसवर नै उसके विश्वास के कारण उस ताहीं धर्मी बना दिया।

23 अर पवित्र ग्रन्थ के इस वचन नै, “विश्वास के कारण उस ताहीं धर्मी बना दिया।” ना सिर्फ यो वचन अब्राहम के खात्तर लिख्या गया,

24 बल्के म्हारै खात्तर भी जिनकै खात्तर लिख्या गया, जो विश्वास के जरिये धर्मी बण जावैगा, यानिके के म्हारै खात्तर, जो उसपै विश्वास करा सां, जिसनै म्हारै प्रभु यीशु ताहीं मरे होया म्ह तै जिन्दा करया ।

25 यीशु मसीह म्हारै अपराध्धा कै खात्तर पकड़वाया अर मारा भी गया, अर म्हारै ताहीं धर्मी बणाण कै खात्तर परमेसवर नै उस ताहीं जिन्दा कर दिया ।

## 5

\*\*\*\*\*

1 इस करके जिब हम मसीह पै विश्वास करण तै धर्मी बणा दिए गये सां, तो परमेसवर तै म्हारा मेळ-मिलाप अपणे प्रभु यीशु मसीह कै जरिये हो लिया ।

2 विश्वास कै जरिये मसीह नै म्हारी पोहच पिता के उस अनुग्रह तक कर दी सै । उस अनुग्रह म्ह हम बणे होए सां, अर परमेसवर की महिमा की आस म्ह खुश सां ।

3 सिर्फ योए न्ही, बल्के हम मुसीबतां म्ह भी खुश रहवां, न्यू जाणकै के मुसीबतां तै धीरज,

4 धीरज तै खरयां लिकड़णा, अर खरे लिकड़ण तै आस होवे सै ।

5 अर आस तै निराशा न्ही होन्दी, क्यूँके पवित्त्र आत्मा जो परमेसवर नै म्हारै ताहीं दिया सै, उसकै जरिये परमेसवर का प्यार म्हारै मन म्ह भरया गया सै ।

6 क्यूँके जिब हम कमजोर थे, तो मसीह परमेसवर के बताये गये सही बखत पै बुरे माणसां के खात्तर मरया ।

7 किसे धर्मी माणस कै खात्तर कोए जान देवै यो तो मुश्किल सै, पर शायद कोए भले माणस खात्तर जान देण खात्तर तैयार हो सके सै ।

8 पर परमेसवर म्हारै पै अपणे प्यार की भलाई इस तरियां तै साबित करै सै, के जिब हम पापी ए थे, जिब्वे मसीह यीशु म्हारै खात्तर मरया ।

9 जिब के इब यीशु कै लहू बहाण के कारण परमेसवर नै म्हारै ताहीं अपनी नजर म्ह धर्मी बणाया सै, तो उसकै जरिये परमेसवर कै छोटै तै क्यातै न्ही बचांगें?

10 क्यूँके जिब हम परमेसवर के बैरी थे, तो उसके बेटे की मौत कै जरिये म्हारा मेळ-मिलाप परमेसवर कै गेल्या होया, अर सब तै आच्छी बात या सै, के मेळ-मिलाप हो जाण के कारण उसके बेटे यीशु मसीह के जरिये दिए गये जीवन के कारण म्हारा उद्धार पक्का सै ।

11 इब तो म्हारै प्रभु यीशु मसीह कै जरिये, परमेसवर म्ह म्हारा मेळ-मिलाप होग्या सै, इस खात्तर हम उस म्ह खुश सां ।

\*\*\*\*\*

12 परमेसवर नै एक माणस आदम बणाया, जिसके कारण दुनिया म्ह पाप आया, अर उस पाप के करण मौत आई, अर इस तरियां तै मौत सारे माणसां म्ह फैलगी, क्यूँके आदम के वंश होण के कारण सब पापी बणगे ।

13 मूसा नबी के नियम-कायदा कै दिए जाण तै पैहले भी, दुनिया म्ह माणस पाप करै थे, पर वो पाप गिण्या कोनी जावै था, क्यूँके ओडै नियम-कायदे कोनी थे, जिन ताहीं तोड्या जा सके ।

14 तोभी आदम तै लेकै मूसा नबी तक सब नै मौत आई । जिस तरियां आदम नै परमेसवर के हुकम ताहीं तोड्या उसकी तरियां हमनै उसके हुकम ताहीं न्ही तोड़ा, अर आदम यीशु मसीह का नमूना था जो आण आळा था ।

15 पर आदम के अपराध अर परमेसवर के अनुग्रह के वरदान के बीच म्ह एक भोत बड़ा अन्तर सै, क्यूँके जब एक माणस आदम, कै अपराध करण के कारण, भोत-से माणसां की मौत होई, पर दुसरे माणस यीशु मसीह के जरिये, परमेसवर का अनुग्रह भोत-से माणसां पै होया सै ।

16 तो परमेसवर के वरदान का नतिज्जा आदम के पाप तै भोत अलग सै । उसका पाप दण्ड लेकै आवै सै, पर परमेसवर का वरदान म्हारै ताहीं धर्मी बणावे सै, भलाए हम कई पापां के दोषी क्यूँ ना हो ।

17 क्यूँके एक माणस के अपराध के कारण सब नै मौत आई। पर इसतै ज्यादा परमेसवर का अनुग्रह अर धार्मिकता का वरदान सै, जो उस ताहीं पावै सै, वो पाप अर मौत पै यीशु मसीह के जरिये जयवन्त होवै सै, अर वे उसके गैल अनन्त जीवन म्ह राज करैगें।

18 जिस तरियां आदम का अपराध, सारे माणसां के खात्तर दण्ड लेके आया, ठीक उससे तरियां ए मसीह यीशु के धार्मिकता के काम करण तै, सारे माणसां नै जिन्दगी मिली, अर वे परमेसवर की नजर म्ह धर्मी बणै।

19 क्यूँके जिसा एक माणस के हुकम ना मानण तै भोत-से माणस पापी बणे, उससे तरियां ए एक माणस के हुकम मानण तै भोत-से माणस धर्मी बणैगें।

20 मूसा के नियम-कायदे म्हारे ताहीं इस खात्तर दिए गये, ताके माणस देख सकै के वे कितने पापी सै पर जब माणस पाप पै पाप करै सै, तो ओड़ै परमेसवर का अनुग्रह उसतै भी घणा होया करै।

21 सारे माणसां नै पाप पै पाप करया, अर वे मरगे, पर म्हारै प्रभु यीशु मसीह के जरिये परमेसवर का अनुग्रह हमनै धर्मी बणावै सै, अर म्हारे ताहीं अनन्त जीवन देवै सै।

## 6

???? ?? ??????? ??? ??? ????? ??? ???????

1 कोए कह सकै सै? के परमेसवर अपणे अनुग्रह तै म्हारे पाप माफ करै सै, पर इसा मत सोच्चों के पाप करदे रहवां ताके अनुग्रह घणा हो।

2 न्ही! बिल्कुल न्ही! हम जब पाप के खात्तर मरगये तो हमनै आगै तै दुबारा पाप न्ही करणा चाहिए।

3 हम जाणा सां, के हम सारे जिननै मसीह यीशु के नाम म्ह बपतिस्मा लिया सै, यो इसा सै, के जिसा हम मसीह के गैल मर जाणा।

4 इस करके जब हम बपतिस्मा लेवां सां, तो हम उसके साथ मर जावां सां, अर उसके साथ गाड्डे जावां सां, ताके जिस तरियां मसीह पिता परमेसवर की महिमा के जरिये मरे होया म्ह तै जिन्दा करया गया, उससे तरियां ए हमनै भी नया जीवन जीणा चाहिए।

5 क्यूँके जै हम उसकी मौत की समानता म्ह बपतिस्म के जरिये उसके गेल्या एक हो जावां सां, तो पक्के तौर पै उसके जिन्दा उठण की समानता म्ह भी एक हो जावांगें।

6 इस्से तरियां म्हारा पुराणा पापी सुभाव यीशु मसीह के गेल्या क़रूस पै चढ़ाया गया, ताके जो पापी सुभाव म्हारी देह म्ह सै वो नाश हो जावै, अर हम आगै दुबारा पाप की गुलामी म्ह न्ही रहवां।

7 क्यूँके जब हम मसीह के गैल मरा सां, तो हम पाप की शक्ति तै आजाद हो जावां सां।

8 इस करके जै हम मसीह के गेल्या मरगे, तो म्हारा विश्वास यो सै के उसके गेल्या जीवांगें भी।

9 क्यूँके न्यू बेरा सै, के मसीह मरे होया म्ह तै जिन्दा उठके दुबारा फेर न्ही मरैगा, उसपै फेर मौत का राज न्ही होवैगा।

10 क्यूँके मसीह पाप के खात्तर एक ए बार मर गया, पर इब जो जिन्दा सै, तो परमेसवर की महिमा करण के खात्तर जिन्दा सै।

11 इस्से तरियां थम भी अपणे-आप ताहीं पाप के खात्तर तो मरया होड़, पर परमेसवर की महिमा करण खात्तर मसीह यीशु म्ह जिन्दा समझो।

12 इस करके पाप की लालसा थारी नाश होण आळी देह म्ह राज न्ही करै, के थम उसकी लालसाओं के कब्जे म्ह ना रहो।

13 अपणे देह के अंगा ताहीं अधर्म के काम्मां खात्तर इस्तमाल ना करो, पर अपणे-आप ताहीं मरे होया म्ह तै जिन्दा जाणके अपणी जिन्दगी परमेसवर ताहीं दे दो, अर अपणे देह के अंगा ताहीं धार्मिक काम्मां खात्तर परमेसवर नै सौंप दो।

14 फेर थारे पै पाप का राज कोनी होवैगा, क्यूँके थम नियम-कायदे के अधीन म्ह न्ही, बल्के परमेसवर के अनुग्रह के अधीन म्ह जीण लागरे सां।

### ?????????? ?? ???

15 तो इसका मतलब के सै? के हम नियम-कायदे का अधीन म्ह न्ही, बल्के परमेसवर के अनुग्रह के अधीन सां, इस करके के हम पाप कर सका सां? न्ही! बिलकुल न्ही!

16 थम जाणो सां के जिव थम खुद नै किसे का गुलाम होण खात्तर देओ सां, तो थम वोए करो सां, जो थारा माल्लिक कहवै सै। थम पाप के गुलाम भी बण सकों सां, जो मौत लेकै आवै सै, या फेर थम परमेसवर के हुकम नै मानकै धार्मिकता का जीवन जी सको सां।

17 थम पाप के गुलाम थे, पर इब थमनै वे सारी शिक्षा मान्नी सै, जो थारे ताहीं मिली थी, इस करके मै परमेसवर का धन्यवाद करूँ सूं।

18 इब पाप की शक्ति तै छुटाये जाकै परमेसवर के दास बणो ताके थम धर्म के काम करो।

19 मै थारे ताहीं आसान तरिके लखूँ सूं, ताके आम आदमी भी आसान्नी तै समझ सकै, के जिव थम अपणी पिच्छली जिन्दगी की गुलाम थे, अर थम हरेक ढाळ के अशुद्ध अर भुन्डे काम करो थे। तो इब थम अपणी देह नै धार्मिक जीवन के दास बणा ल्यो, ताके थम पवित्र जीवन जी सको।

20 जिव थम पाप के गुलाम थे, तो थम धार्मिकता के काम न्ही कर पाओ थे।

21 थम बुरा काम करो थे, अर इब उन बुरे काम्मां के कारण शर्मिन्दा सां, तो थमनै के मिल्या? इन सारी बात्तां का नतिज्जा मौत सै।

22 पर इब पाप तै आजाद होकै अर परमेसवर के दास बणकै इब थम वो काम करो सां, जिसतै थम पवित्र बणो सां, अर उसका नतिज्जा अनन्त जीवन सै।

23 क्यूँके पाप का नतिज्जां तो मौत सै, पर परमेसवर का वरदान म्हारै प्रभु मसीह यीशु म्ह अनन्त जीवन सै।

## 7

### ?????????? ????? ?? ???????

1 हे विश्वासी भाईयो, थमनै बेरा सै, (मै नियम-कायदे के जाणण आळा तै कहूँ सूं) के जिव ताहीं माणस जिन्दा रहवै सै, तब तक उसनै नियम-कायदे मानने पड़ैगें।

2 उदाहरण के तौर पै एक ब्याता लुगाई नै मरते दम तक नियम-कायदे के मुताबिक अपणे धणी के साथ रहणा चाहिये, पर जै धणी मर जा, तो वा धणी के नियम-कायदे तै आजाद हो जा सै।

3 ज्यांतै जै धणी के जिन्दे जी वा किसे दुसरे माणस की हो जावै, तो जार कुह्वावैगी, पर जै धणी मर ज्या, तो वा उस नियम-कायदे तै आजाद हो जा सै, उरै ताहीं के जै किसे दुसरे माणस की हो जावै तोभी जार कोनी टेहरैगी।

4 उससे तरियां ए हे मेरे विश्वासी भाईयो, जिव थम मसीह के साथ मरगे, तो थम नियम-कायदा खात्तर मरगे, इब थम मसीह के हो, जो मरे होया म्ह तै जिन्दा उठ्या, ताके हम परमेसवर के खात्तर धार्मिक जीवन जी सका।

5 क्यूँके जिव हम अपणे देह की इच्छा के मुताबिक जिवां सां, तो पाप की लालसा म्हारै अंगा म्ह काम करै सै, अर नियम-कायदे ए उन लालसा नै उजागर करके मौत नै लेकै आवै सै।

6 हम नियम-कायदा खात्तर मरगे जिसकै बन्धन म्ह हम पैहले थे। इब हम पवित्र आत्मा की मानकै, नये सिरे तै परमेसवर की सेवा कर सकां सां।

### ????-?????? ?? ???

7 तो हम के कह्वां? के मूसा नबी के नियम-कायदे पाप सै? न्ही! बिलकुल न्ही! बल्के नियम-कायदा ए सै, जो मेरे ताहीं बतावै सै, के पाप के सै! जै नियम-कायदे न्ही कहन्दे, के लालच मतना करै तो मै लालच नै जाण ए न्ही पान्दा।

8 पर पाप नै मौक्का पाकै, हुकम के जरिये मेरै म्ह सारी तरियां का लालच पैदा करया, क्यूँके बिना नियम-कायदे पाप मुर्दा सै।

9 एक बख्त था जिब मै मूसा नबी के नियम-कायदे बिना जीऊँ था, पर जिब मन्नै मूसा नबी के नियम-कायदा ताहीं जाणया, तो मेरे म्ह पाप करण की इच्छा होण लागगी, अर मै मरे होया जिसा होगया ।

10 अर वो हुकम जिसतै मन्नै जिन्दगी मिलणी थी वो मेरी आत्मिक मौत का कारण बणया ।

11 क्यूँके पाप नै मौक्का पाकै हुकम कै जरिये मेरै ताहीं भकाया, अर उस्से कै जरिये मेरी आत्मिक मौत भी हो गई ।

12 ज्यांतै हम यो नतिज्जा लिकाड़ा सां, के नियम-कायदे पवित्तर सै, अर हुकम पवित्तर, धर्मी अर खरया सै ।

13 तो के मूसा नबी के नियम-कायदे जो खरे थे, मेरै खात्तर मौत लेकै आये? न्ही! विलकुल न्ही! यो पाप ए था जिसनै इसा करया । पर नियम-कायदे जो खरे थे, मेरै खात्तर मौत लेकै आये, ताके पाप की असलियत जाहिर हो जा, अर हुकम दिखावै सै के पाप घणाए बुरा सै ।



14 क्यूँके हमनै बेरा सै, के मूसा नबी के नियम-कायदे तो आत्मिक सै, पर मै शारीरिक सूं, अर पाप का गुलाम सूं ।

15 अर जो मै करूं सूं, उस ताहीं कोनी जाणदा, क्यूँके जो मै चाहूं सूं, वो न्ही करया करदा, पर जिसतै मन्नै घृणा आवै सै वोए करै सूं ।

16 जै जो मै न्ही चाहन्दा वोए बुरे काम करूं सूं, तो मै मान ल्यूं सूं, के मूसा नबी के नियम-कायदे खरे सै ।

17 तो इसी हालत म्ह जो मेरे म्ह बुरे काम करै सै, वो मै न्ही, बल्के पाप सै, जो मेरै म्ह बस्या होया सै ।

18 क्यूँके मन्नै बेरा सै के मेरै म्ह यानिके मेरे पापी सुभाव म्ह कोए आच्छी चीज वास कोनी कर दी । मेरा जी तो भले काम करण की इच्छा तो करै सै, पर भले काम मेरै तै बणदे कोनी ।

19 क्यूँके जिस आच्छे काम करण नै मेरा जी करै सै, वो तो कोनी करदा, पर जो बुरे काम करणा न्ही चाहन्दा, वोए करूं सूं ।

20 इस करकै जै मै वोए करूं सूं जो न्ही चाहन्दा, तो उसका करण आळा मै कोनी रहया, पर पाप सै जो मेरै भित्तर म्ह बस रहया सै ।

21 इस तरियां तै मन्नै सच का बेरा पटै सै, के जिब मै भलाई करण की इच्छा करूं सूं, तो बुराई ए करूं सूं ।

22 क्यूँके मै भीतरी माणस-पण तै तो परमेसवर के नियम-कायदे तै घणा खुश रहूं सूं ।

23 पर मेरे भित्तर एक नियम-कायदा की शक्ति काम करण लागरी सै, जो मेरी पापी अन्तरात्मा तै युध्द करै सै । या नियम-कायदा की शक्ति मेरी अन्तरात्मा नै पाप का गुलाम बणावै सै जो इब भी मेरी देह म्ह सै ।

24 मै किसा निरभागा माणस सूं! मन्नै इस पापी सुभाव तै जो मौत लेकै आवै सै, कौण छुड़ावैगा?

25 म्हारै प्रभु यीशु मसीह कै जरिये परमेसवर का धन्यवाद होवै । ज्यांतै मै अपनी समझ तै तो परमेसवर के नियम-कायदे नै मानना चाहूं सूं, पर पापी सुभाव के कारण मै पाप का गुलाम सूं ।

## 8



1 इस करके इब जो मसीह यीशु पे बिश्वास करै सै, उनपै दण्ड का हुकम कोनी ।

2 क्यूँके पवित्तर आत्मा थमनै वा जिन्दगी देवैगा, जो मसीह यीशु की ओड़ तै आवै सै, अर वो थारे ताहीं पाप अर मौत तै आजाद करै सै ।

3 क्यूँके जो काम मूसा नबी के नियम-कायदे पापी सुभाव के कारण देह म्ह न्ही कर सके, उस ताहीं परमेसवर नै करया, यानिके अपणे ए बेटटे ताहीं इन्सान के रूप म्ह पापबलि होण के खात्तर भेज दिया, परमेसवर नै पाप की शक्ति ताहीं अपणे बेटटे की देह के बलिदान के जरिये तोड़ दिया।

4 ज्याँतै के मूसा नबी के नियम-कायदे की विधि म्हारै म्ह पूरी करी जावै, जो पापी सुभाव के मुताबिक न्ही, बल्के पवित्र आत्मा के मुताबिक चाल्लै सै,

5 क्यूँके जो अपणे पापी सुभाव के कारण चाल्लै सै, वो बुरी चिज्जां के बारे म्ह सोचै सै, पर जो-जो पवित्र आत्मा के जरिये चाल्लै सै, वो उन चिज्जां के बारे म्ह सोचै सै, जो पवित्र आत्मा ताहीं खुश करै सै।

6 जै थम अपणी पापमय लालसा के मुताबिक चाल्लोंगे तो मरोगे, पर पवित्र आत्मा के कहे मुताबिक चाल्लोंगे तो जिन्दगी अर शान्ति पाओगे।

7 क्यूँके पापमय लालसा के मुताबिक चालणा तो परमेसवर तै बैर राखणा सै, क्यूँके ना तो वो परमेसवर के नियम-कायदे के अधीन सै अर ना कदे हो सके सै।

8 अर जो पापमय लालसा के मुताबिक चाल्लै सै, वे परमेसवर नै खुश न्ही कर सकदे।

9 पर जिब के परमेसवर का पवित्र आत्मा थारे म्ह बसै सै, तो थम पापमय लालसा के मुताबिक न्ही पर पवित्र आत्मा के कहे मुताबिक चाल्लों। जै किसे म्ह मसीह का आत्मा कोनी चाल्दा तो वो परमेसवर का माणस कोनी।

10 जै मसीह थारे म्ह वास करै सै, तो पाप के कारण देह मरी होई सै, पर धार्मिकता के कारण थारी आत्मा जिन्दा सै।

11 जै परमेसवर का आत्मा जिसनै मसीह यीशु ताहीं मरे होया म्ह तै जिन्दा करया, थारे म्ह बस्या होया सै, तो जिसनै मसीह ताहीं मरे होया म्ह तै जिन्दा करया, वो थारी नाश होण आळी देह नै भी अपणे पवित्र आत्मा के जरिये जिन्दा करैगा, जो थारे म्ह बस्या होया सै।

12 इस करकै हे विश्वासी भाईयो, हम पापी सुभाव के कर्जदार कोनी के हम इसकै मुताबिक बरताव करां।

13 क्यूँके जै थम पापी सुभाव के मुताबिक जीओगे, तो मरोगे जै पवित्र आत्मा तै पापमय लालसा के काम्मां नै मारोगे तो जिन्दे रहोगे।

14 ज्याँतै के जितने माणस परमेसवर के आत्मा के चलाए चाल्लै सै, वैए परमेसवर की ऊलाद सै।

15 क्यूँके थारे ताहीं गुलामी की आत्मा कोनी दी गई, के थम डरो, पर पवित्र आत्मा हमनै परमेसवर की ऊलाद बणावै सै, जिसतै हम हे अब्बा, हे पिता कहकै बोल्लां सां।

16 पवित्र आत्मा आप ए म्हारी आत्मा के गेल्या गवाही देवै सै, के हम परमेसवर की ऊलाद सां,

17 अर जै ऊलाद सां तो वारिस भी, बल्के परमेसवर के वारिस अर मसीह के संगी वारिस सां, अगर हम मसीह के ढाळ दुख टावांगे, तो हम उसकी महिमा म्ह भी शामिल हो पावांगे।

### २२ २२२ २२२ २२२ २२२२२२ २२२ २२२२२

18 मननै पक्का यकिन सै, के इस बखत के दुख अर क्लेश उस महिमा के स्याम्ही, उस महिमा के समान जो प्रभु म्हारै ताहीं देवैगा, किमे भी कोनी सै।

19 क्यूँके सृष्टि की सारी चिज्जें घणी उम्मीद भरी निगांह तै परमेसवर की ऊलाद की बाट देखण लागरी सै।

20 परमेसवर की बणाई गई हर एक चीज नै अपणे मकसद ताहीं खो दिया सै, यो इस करकै न्ही के सृष्टि खुद चाहवै थी, पर परमेसवर नै इसा करया, पर फेर भी आस सै।

21 सृष्टि भी खुद उस दिन की बाट देखै सै, जिब वो मौत अर विनाश की गुलामी तै छुटकारा पाकै, परमेसवर की महिमा म्ह उसकी ऊलाद के साथ शामिल होवैगे।

22 क्यूँके हमने बेरा से के सारी सृष्टि इब ताहीं मिलकै कराहती अर ददां म्ह पड़ी, उस जनानी की तरियां से, जिसा बच्चा होण तै पैहले ददां म्ह तड़फै सै।



23 अर सिर्फ परमेसवर की बणाई सृष्टि ए न्ही, पर हम भी जिस म्ह होण आळी महिमा के पैहले तै स्वाद चखण के रूप म्ह पवित्तर आत्मा का वास सै, हम खुद भी अपणे-आप म्ह कराहवा सां। यो जिखे होगा जिब हम देह तै आजाद होवांगे, अर परमेसवर हमनै अपनी ऊलाद बणाण के खात्तर अपणावै।

24 आण आळी महिमा की आस के जरिये ए धारा उद्धार होया सै, जै धम उन चिज्जां की आस राक्खों सां जो धारे धोरै पैहले तै सै, तो धारी आस धरणा बेकार सै, कोए भी उस चीज की आस कोनी राखदा, जो उसके धोरै पैहले तै सै।

25 हम उन चिज्जां की आस करां सां, जो म्हारे धोरै इब ताहीं सै कोनी, तो हम धीरज तै बाट देक्खां सां, जिब तक वो चीज हमनै मिल ना जावै।


26 प्रार्थना करण खात्तर म्हारे धोरै बुद्धि कोनी, पर पवित्तर आत्मा म्हारी मदद करै सै, क्यूँके हमनै न्ही बेरा के किन बातों के खात्तर प्रार्थना करणी चाहिये, पर पवित्तर आत्मा आप्णे इसी आह भर-भरकै, जो बयान तै बाहरणै सै, म्हारै खात्तर बिनती करै सै।

27 परमेसवर जो मनां का जाँचण आळा सै उसनै बेरा सै, के पवित्तर आत्मा का मकसद के सै? क्यूँके वो पवित्तर माणसां के खात्तर परमेसवर की मर्जी के मुताबिक बिनती करै सै।

28 हमनै बेरा सै के जो माणस परमेसवर तै प्यार राक्खै सै, उनके खात्तर सारी बात मिलकै भलाई ए नै पैदा करै सै, यानिके उनके खात्तर जो उसकी मर्जी के मुताबिक चुणे होए सै।

29 क्यूँके जिन ताहीं परमेसवर नै पैहल्या तै चुण्या होया सै, उन ताहीं उसके बेटटे यीशु मसीह जिसे बणण खात्तर ठहराया भी सै, ताके वो घणे भाईयाँ म्ह पैहल्ला यानी जेट्टा बणै।

30 फेर जिन माणसां ताहीं उसनै पैहल्या तै ठहराया, उन ताहीं चुण्या भी, अर जिन ताहीं चुण्या, उन ताहीं धर्मी भी बणाया सै, अर जिन ताहीं धर्मी बणाया, उन ताहीं अपनी महिमा म्ह भागीदारी भी बणाया सै।



31 तो इन बातों तै हम यो नतिज्जां लिकाड़ा सां, जै परमेसवर म्हारी कान्ही सै, हमनै कौण हरा सकै सै?

32 परमेसवर वो सै जिसनै अपणे खुद के बेटटे ताहीं भी म्हारे खात्तर बलिदान करण म्ह कोए संकोच कोनी करया, तो जो उसनै म्हारे तै वादा करया सै, वो सारा कुछ म्हारे ताहीं क्यूँ न्ही देवैगा?

33 कोए भी हमनै परमेसवर के स्याम्ही दोषी न्ही ठहरा सकता? परमेसवर ए सै जो म्हारे ताहीं धर्मी बणावै सै।


34 कोए भी हमनै दोषी न्ही ठहरा सकता? क्यूँके यीशु मसीह ए सै, जो मरया बल्के मुदाँ म्ह तै जिन्दा भी उठया, अर परमेसवर के सोळी ओड़ सै, अर म्हारै खात्तर बिनती भी करै सै।

35 कौण हमनै मसीह के प्यार तै न्यारा करैगा? के क्लेश, संकट, उपद्रव, अकाळ, नंगाई, जोखम, या तलवार?

36 जिसा पवित्तर ग्रन्थ म्ह लिख्या सै, “तेरे खात्तर लोग हमनै रोज मारण की धमकी देवै सै, हम मरण आळी भेड़ों की तरियां समझे गये सां।”

37 पर इन सारी बातों म्ह हम उसके जरिये जिसनै म्हारै तै प्यार करया सै, जयवन्त तै भी बाध सै।

38-39 क्यूँके मै जाणुं सूं, के कोए भी चीज मसीह नै म्हारे तै प्यार करण तै न्ही रोक सकदी। इसतै कोए फर्क न्ही पड़ता के चाहे हम जिवां या मरा, सुगंदत, प्रधानताएँ, शक्तियाँ जो सुगं म्ह सै इन म्ह तै कोए भी हमनै मसीह के प्यार तै अलग न्ही कर सकदी, अर इब जो होण लागरया सै, जो भविष्य म्ह होण आळा सै, गहराई, ऊँचाई हमनै परमेसवर के प्यार तै, जो म्हारे प्रभु यीशु मसीह म्ह सै अलग न्ही कर सकदी।



1-3 जै कोए भी चीज हमनै परमेसवर के प्यार तै अलग न्ही कर सकदी, तो क्यूँ इस्राएली, मेरे यहूदी भाई परमेसवर तै दूर सै? मेरा मन उन खात्तर भोत दुखी सै, जै उन माणसां के छुटकारे खात्तर मेरे उप्पर चाहे दोष भी लगाये जावै या मसीह तै अलग करया जावै, तोभी मै इसकै खात्तर तैयार सूं, अर मै मसीह नै गवाह मानते होए सच बोल्लू सूं, पवित्तर आत्मा अर मेरी अन्तरात्मा भी या गवाही देवै सै के मै झूठ कोनी बोल्दा।

4 वे इस्राएल देश के माणस सै, अर वे परमेसवर के गोद लिये होइ माणस सै, अर महिमा, करार, नियम-कायदे अर परमेसवर की आराधना करण का हक अर वादे उन्हे के सै।

5 अब्राहम, इसहाक, याकूब ये सारे पूर्वज भी उन्हे के सै, अर मसीह भी देह कै भाव तै उन्हे म्ह तै इस्राएली सै। जो सारया के उप्पर परम परमेसवर सै, युगानयुग धन्य हो। आमीन।

6 पर इसा कोनी के परमेसवर अपने वादे तै मुकर गया, ज्यांतै के जो इस्राएल के वंशज सै, वे सारे सच्चे इस्राएली कोनी।

7 अर ना अब्राहम का वंश होण कै कारण सारे उसकी सच्ची ऊलाद होगी, पर पवित्तर ग्रन्थ म्ह लिख्या सै, “इसहाक के वंश म्ह जन्म लेण तै ए सारे उसकी सच्ची ऊलाद न्ही हो जान्दी।”

8 यानिके जो दुनियावी तौर पै शारीरिक रूप तै जन्मे होए परमेसवर की ऊलाद कोनी, पर वायदे की ऊलाद सै।

9 क्यूँके वादे का वचन यो सै: “आगले साल मै इस्से बखत दुबारा आऊँगा, अर तब सारा कै एक बेटा पैदा होवैगा।”

10 अर सिर्फ योए न्ही, पर जब रिबका कै गर्भ म्ह एक ए आदमी यानिके म्हारै पूर्वज इसहाक तै जुड़वां बाळक पैदा होए।

11-12 इब तै पैहले के वो पैदा होते अर कुछ बुरा या भला काम जाणते, परमेसवर नै रिबका तै कह दिया था के “जेटटा बेटा छोटछे का गुलाम होवैगा,” परमेसवर नै यो दिक्खाण कै खात्तर कह्या था, वो अपने मन की इच्छा तै खुद चुनाव करै सै, ना के उनके भले या बुरे काम्मां तै।

13 जिसा पवित्तर ग्रन्थ म्ह लिख्या सै, “मन्ने एसाव तै बढ़कै याकूब ताहीं घणा प्यार करया।”

14 ज्यांतै हम के कह्णां? के परमेसवर की अपणी इच्छा तै चुनाव करणा अन्याय सै? न्ही! बिलकुल न्ही!

15 क्यूँके परमेसवर मूसा नबी तै कहवै सै, “मै जिस किसे पै दया करणा चाहूँ, उसपै दया करूँगा, अर जिस किसे पै तरस खाणा चाहूँ उससे पै तरस खाऊँगा।”

16 इस करके परमेसवर उस ताहीं चुणै सै, जिसके उप्पर वो दया दिखाणा चाहवै सै, उसका चुनाव इस बात पै आधारित कोनी, के लोग के चाहवै सै, अर वे के करण की कोशिश करै सै।

17 क्यूँके पवित्तर ग्रन्थ म्ह परमेसवर नै फिरौन (मिस्र के राजा) तै कह्या, “मन्ने तेरे ताहीं ज्या ए तै राजा बनाया सै, के तेरे म्ह अपणी सामर्थ दिखाऊँ, अर मेरै नाम का प्रचार सारी धरती पै होवै।”

18 इस करके वो जिसपै चाहवै सै उसपै दया करै सै, अर जिस ताहीं चाहवै सै उस ताहीं हठील्ला बना देवै सै।



19 तब घणखरे माणस मेरै तै कहवैगें, “जै इसा सै, तो परमेसवर किस तरियां कह सकै सै, के हम गलत सां? क्यूँके परमेसवर जो करणा चाहवै सै उसने करण तै कौण रोक सकै सै?”

20 हे भले माणस, भला तू कौण सै जो परमेसवर तै वाद-विवाद करै? के बणाई होई चीज बणाण आळे तै कह सकै सै, “तन्ने मेरै ताहीं इसा क्यांतै बणाया सै?”

21 के कुम्हार ताहीं माट्टी पै हक कोनी के एक ए लोंदे म्ह तै एक बासण आदर कै खात्तर, अर दुसरे ताहीं अनादर कै खात्तर बणावै?

22-23 परमेसवर अपना छोटे अर अपणी सामर्थ उनके विरुद्ध दिखाणा चाहवै सै, जो नाश ए होण लायक सै, पर वो धीरज धरे सै क्यूँके वो दिखाणा चाहवै सै के वो कितना महान् सै, वो उन माणसां पै दया करै सै, जिन ताहीं उसने अपणी महिमा म्ह साँझा करण खात्तर चुण्या सै।

24 यानिके म्हारै पै जिन ताहीं उसने ना सिर्फ यहूदी माणसां म्ह तै, बल्के गैर यहूदियाँ म्ह तै भी चुण्या।

25 जिसा के वो होशे नबी की किताब म्ह भी गैर यहूदियाँ के बारे म्ह कहवै सै, “जो मेरी पूजा कोनी थी, उन ताहीं मै अपणी पूजा कहूँगा, अर जिनतै मै प्यार न्ही करूँ था, उन ताहीं प्यार करूँगा।

26 अर जिस जगहां पै परमेसवर नै इसा कह्या था, के थम मेरी पूजा कोनी सो, उस्से जगहां पै परमेसवर उन ताहीं अपणी ऊलाद कहवैगा।”

27 अर यशायाह नबी इस्राएल के माणसां के बारे म्ह रुका मारके कहवै सै, “चाहे इस्राएल की ऊलादां की गिणती समुन्दर के बालू के बराबर हो, तोभी उन म्ह तै थोड़े ए बचैँगे।

28 क्यूँके परमेसवर धरती पै तावळा-ए आवैगा, अर एक बार म्ह ए सबका न्याय करैगा।”

29 जिसा यशायाह नबी नै पैहल्या भी कह्या था, “जै सेनाओं का प्रभु म्हारै खात्तर कुछ वंश न्ही छोड़दा, तो म्हारी हालत सदोम अर अमोरा नगर के जिसी हो जान्दी, जिस ताहीं परमेसवर नै पूरी तरियां तै नाश कर दिया।”

### ?????? ?? ????????

30 ज्याँते हम के कह्ना? गैर यहूदियाँ नै अपणे-आप ताहीं धर्मी बणाण की कोशिश न्ही करी, पर परमेसवर नै मसीह यीशु पै विश्वास करण के कारण उन ताहीं धर्मी बणा दिया।

31 जो इस्राएली मूसा नबी के नियम-कायदा नै मानके धर्मी बणाणा चाहवै थे वे धर्मी न्ही बण पाये।

32 यो किस तरियां हो सके सै? इस करके के वे विश्वास तै न्ही, पर मान्ने आच्छे काम्मां तै धर्मी बणाणा चाहवै थे। उननै उस ठोक्कर के पत्थर पै ठोक्कर खाई,

33 जिसा पवित्र ग्रन्थ यीशु मसीह के बारे कहवै सै, “देक्खो, मै यरुशलेम नगर म्ह एक ठेस लाग्गण का पत्थर, अर ठोक्कर खाण की चट्टान राखूँ सूँ, अर जो कोए उसपै विश्वास करैगा वो शर्मिन्दा कोनी होवैगा।”

## 10

1 हे विश्वासी भाईयो, मेरे मन की इच्छा अर मेरे यहूदी माणसां खात्तर, परमेसवर तै मेरी याए प्रार्थना सै के वे बचाए जावै।

2 क्यूँके मै उनकी गवाही बूँ सूँ, के उन ताहीं परमेसवर के खात्तर उत्साह रहवै सै, पर सही समझके गेल्या न्ही।

3 क्यूँके वा धार्मिकता जो परमेसवर की ओड़ तै आवै सै, उस ताहीं वे समझण म्ह नाकामयाब रहे अर अपणे तरिके तै धर्मी बणाण की कोशिश करी, वे परमेसवर की धार्मिकता के अधीन न्ही होए।

4 क्यूँके मसीह नै पैहले तै ए उस मकसद ताहीं पूरा कर लिया सै। जिस खात्तर नियम-कायदे दिए गये थे, उसका नतिज्जां यो होया के जो यीशु मसीह पै विश्वास करै सै वो धर्मी बणाए जावैगे।

### ?????? ????? ?? ???????

5 क्यूँके मूसा नबी नै नियम-कायदा तै धर्मी बणाण के बारे म्ह पवित्र ग्रन्थ म्ह यो लिख्या सै, के जो माणस उननै मान्ने सै, वो इस्से कारण तै जिन्दा रहवैगा।

6 पर विश्वास के जरिये धर्मी बणाये जाण के बारे म्ह पवित्र ग्रन्थ या कहवै सै, के “तू अपणे मन म्ह न्यूँ ना कहिये, के मसीह ताहीं नीचवै ल्याण खात्तर सुर्ग पै कौण चढ़ैगा?”

7 या “अधोलोक म्ह कौण उतरैगा?” (यानिके मसीह ताहीं मरे होया म्ह तै जिन्दा उप्पर लाण के खात्तर!)

8 पर के कहवै सै, योए के “परमेसवर का वचन तेरे धोरै सै, ताके तू उसनै अपणे मुँह तै अंगीकार कर सकै अर अपणे मन म्ह राख सकै,” यो वोए बिश्वास का वचन सै, जो हम प्रचार करा सां।

9 जै तू माणसां के स्याम्ही यीशु नै प्रभु मान ले, अर अपणे मन तै बिश्वास करै के परमेसवर नै उस ताहीं मरे होया म्ह तै जिन्दा करया, तो परमेसवर तन्नै बचावैगा।

10 क्यूँके हम अपणे मन तै बिश्वास करां सां, तो हम परमेसवर के जरिये धर्मी बणाए जावै सै, अर हम मुँह तै अंगीकार करां सां, के हम मसीह पै बिश्वास करां सां, तो इस करके हम बच जावांगे।

11 क्यूँके यशायाह नै पवित्र ग्रन्थ म्ह मसीह के बारे म्ह यो लिख्या सै, “जो कोए उसपै बिश्वास करैगा वो शर्मिन्दा कोनी होवैगा।”

12 यहूदियाँ अर यूनानियाँ म्ह किमे फर्क कोनी, ज्यांतै के परमेसवर सारया का प्रभु सै, जो उसका नाम लेवै सै उस ताहीं वो बचावै सै।

13 क्यूँके पवित्र ग्रन्थ म्ह लिख्या सै के “जो कोए प्रभु का नाम लेवैगा, वो बचाया जावैगा।”

14 पर जिन माणसां नै मसीह पै बिश्वास न्ही करया, तो वे उसनै मदद खात्तर किस तरियां पुकारेंगे? अर जिसके बारे म्ह सुण्या न्ही उसपै किस तरियां बिश्वास करेंगे? अर वे किस तरियां सुणेंगे जिब तक कोए प्रचारक ना जावै।

15 जै प्रचारक भेज्जे ना जावै, तो किस तरियां प्रचार करै? जिसा पवित्र ग्रन्थ म्ह लिख्या सै, “जो आच्छी बाततां का सुसमाचार लेके आवै सै, उनके पाँव कितने सुहावने सै।”

16 पर सारया नै उस सुसमाचार पै बिश्वास कोनी करया जिसा यशायाह नबी कहवै सै, “हे प्रभु, किस्से नै भी म्हारै सन्देश पै बिश्वास न्ही करया?”

17 पर मसीह के बारे म्ह वचन सुणण तै बिश्वास होवै सै।

18 पर मै पूच्छु सूं, के यहूदियाँ नै, मसीह के बारे म्ह न्ही सुण्या? सुण्या तो जरूर सै, क्यूँके पवित्र ग्रन्थ म्ह लिख्या सै, “उनके बोल साबती धरती पै, अर उनके वचन दुनिया के कुणे ताहीं पोंहोचगे सै।”

19 फेर मै पूच्छु सूं, के इस्राएली लोग मसीह के बारे म्ह सन्देश ताहीं समझै सै? पैहल्या तो प्रभु नै मूसा नबी के जरिये यो कह्या, “मै उन गैर यहूदियाँ के जरिये थारे मन म्ह जळण पैदा करुंगा, मै थमनै यहूदियाँ के जरिये मूर्ख समझण आळे माणसां तै गुस्सा दिलाऊंगा।”

20 फेर जो बात प्रभु नै कही वा बात यशायाह नबी बड़ी हिम्मत करके कहवै सै, “जो मन्नै न्ही टोहवै थे, उननै मेरै ताहीं पा लिया, अर जो मन्नै बुझ्झै भी कोनी थे, उनपै मै जाहिर होया।”

21 पर इस्राएल देश के माणसां के बारे म्ह, परमेसवर यशायाह नबी के जरिये न्यू भी कहवै सै, “मै सारा दिन अपणे हाथ, एक हुकम ना मानण आळी अर विवाद करण आळी प्रजा के कान्ही पसारे रहया।”

## 11

\*\*\*\*\*

1 ज्यांतै मै पूच्छु सूं, के परमेसवर नै अपणी प्रजा ताहीं छोड़ दिया? न्ही! बिलकुल न्ही! मै भी तो इस्राएली सूं, मै अब्राहम की पीढ़ी अर बिन्यामीन के गोत्र म्ह तै सूं।

2 परमेसवर नै अपणी उस प्रजा ताहीं कोनी छोड्या, जिस ताहीं उसनै पैहल्याए तै चुण्या सै। के थमनै न्ही बेरा के पवित्र ग्रन्थ एलिय्याह नबी के बारे म्ह के कहवै सै, वो इस्राएल के माणसां के बिरोध म्ह परमेसवर तै शिकायत करै सै।

3 “हे प्रभु, उननै तेरे नबियाँ ताहीं मार दिया, अर तेरी वेदियाँ\* ताहीं नाश कर दिया सै, अर मै ए एकला बचा सूं, जो तेरे पै बिश्वास करूं सूं अर जिन्दा सूं, अर वे मेरी जान भी लेणा चाहवै सै।”

\* 11:3 11:3 वेदी-परमेसवर ताहीं भेट चढ़ाण खात्तर एक जगहा

4 तब परमेसवर नै एलिय्याह नबी तै कह्या, “मन्नै अपणे खात्तर सात हजार माणसां ताहीं राख राख्या सै, जिन नै बाल देवता की मूर्ति की आराधना करण खात्तर गोड्डे कोनी टेक्के सै।”

5 ठीक इस्से तरियां तै इस बखत भी, परमेसवर के अनुग्रह तै अलग करे होए कुछ यहूदी माणस बचरे सै, जिन ताहीं उसने अपणे खात्तर चुण्या सै।

6 जै उन ताहीं परमेसवर नै अपणे अनुग्रह तै चुण्या सै, तो यो आच्छे काम्मां तै न्ही होया, न्ही तो अनुग्रह फेर अनुग्रह न्ही रहया।

7 फेर इसका नतिज्जा के लिकइया? हालाकि इस्राएली माणस जो परमेसवर की नजर म्ह धर्मी बणणा चाहवै थे, पर वो बण न्ही पाए, पर परमेसवर नै जिन ताहीं चुण्या वे उसकै गैल धर्मी बण ग्ये, अर बचे होइ माणस हठीले करे गये अर उननै उसकी सुणण तै इन्कार कर दिया।

8 जिसा पवित्र ग्रन्थ म्ह यशायाह नबी नै लिख्या सै, “परमेसवर नै उन ताहीं आज कै दिन तक सुस्त दिमाग दे राख्या सै, अर इसी आँख दी जो ना देखवै, अर इसे कान दिये जो ना सुणै।”

9 अर राजा दाऊद कहवै सै, “के जिसा एक पंछी खाणा खाण खात्तर जाळ म्ह फँस जावै सै अर जानवर खड्डे म्ह गिर जावै सै, उसी तरियां ये माणस भी परमेसवर की ओइ तै दण्ड पावेंगें।

10 उनकी आँख आँधी हो जावै ताके वो देख न्ही पावै, अर वे सारी हाण मुसीबतां म्ह फसे रहवै।”

11 तो मै पूच्छू सू, के यहूदी लोग ठोक्कर खाण के कारण सदा के खात्तर नाश होगे? न्ही! बिलकुल न्ही! पर उनके अविश्वास के कारण गैर यहूदियाँ ताहीं उद्धार मिल्या, ताके इस्राएल के माणसां कै जळण होवै।

12 ज्यांतै जै उनका अविश्वास दुनिया की गैर यहूदियाँ कै खात्तर भलाई का कारण बणै, तो इस्राएल के माणसां का परमेसवर के धरै बोहड़ के आणा और भी आच्छा क्युँ न्ही होगा।

~~~~~

13 मै थम दुसरी जात्ता तै ये बात कहूँ सू। जिव के मै गैर यहूदियाँ कै खात्तर प्रेरित सू, तो मै अपनी सेवा की बड़ाई करूँ सू,

14 ताके किसे तरियां तै मै अपणे कुणवे आळे माणसां म्ह जळण पैदा करवा कै उन म्ह तै एक-आधै का उद्धार कराऊँ।

15 क्युँके जिव इस्राएली माणसां का छोड़ दिया जाणा, गैर यहूदियाँ का परमेसवर कै साथ मेळ-मिलाप का कारण होया। तो उनका मसीह ताहीं अपणायया जाणा, इसा होगा, जिसा किसे माणस का मुदाँ म्ह तै जिन्दा जाणा।

16 मै थमनै एक उदाहरण देऊँ सू, यो यहूदी माणसां का रिवाज सै, जिव हम चून गुधा सां, तो उस म्ह तै पैहले रोट्टी का एक पेड़ा परमेसवर कै खात्तर लिकाड़ा सां, तो पूरा गुन्द्या होया चून भी परमेसवर कै खात्तर सै, उस्से तरियां जिस तरियां जड़ परमेसवर की सै, तो डाळी भी उस्से की सै।

17 इस्राएल के माणस जैतून की डाळी की तरियां सै अर पिता अब्राहम, इसहाक अर याकूब पेड़ की जड़ की तरियां सै, पर जै कुछ डाळी तोड़ दी गई, अर तू जंगळी जैतून होके उन म्ह कलम करया गया, अर यहूदी माणसां ताहीं मिलण आळी आशीष का फायदा थारे ताहीं भी होया, जिसा जैतून के पेड़ की डाळी पेड़ की जड़ तै रस हासिल करै सै।

18 तो थम यो घमण्ड ना करियो, के थम उन कटी होई डाळियाँ तै बढ़िया सों, यो याद राखों के थम जड़ नै कोनी पर, जड़ थमने सम्भाळै सै।

19 फेर थम बोल सकों सों के “परमेसवर पेड़ तै टुट्टी होए डाळियाँ की तरियां थमनै छोड़ देगा।” ताके गैर यहूदियाँ ताहीं अपणाले, जो के उन डाळियाँ की तरियां सै जो कलम करके लगाई गई सै।

20 यो सच सै के वे तो अविश्वास के कारण तोड़ी गई, पर तू बिश्वास तै बणया रहवै सै ज्यांतै घमण्डी ना होवै, पर भय मान,

21 क्युँके जिव परमेसवर नै खुद की डाळियाँ पै दया न्ही करी तो वो थारे पै भी दया न्ही करैगा।

22 ज्यांतै परमेसवर की दया अर कठोरता नै देख! जो अबिश्वासी माणसां खात्तर कठोरता अर थारे खात्तर दया सै, जै थम असलियत म्ह उसकी दया की हद म्ह न्ही बण रहवांगे, तो थारे ताहीं भी काट के अलग कर दिया जावैगा।

23 यहूदी लोग भी जै विश्वास करणा शरु करदे, तो दुबारा तै लगा दिए जावैंगे, क्यूँके परमेसवर उन ताहीं फेर छांग सकै सै।

24 एक जंगळी डाळी खात्तर एक आच्छे पेड़ का हिस्सा बणणा कुदरती न्ही सै, अर जो यहूदी कोनी जंगळी जैतून के पेड़ की डाळी की तरियां सै, जो के एक आच्छे जैतून के पेड़ म्ह लगाई गई सै, पर यहूदी एक डाळी की तरियां सै जो आच्छे पेड़ तै उगै सै, पक्के तौर पै वे अपने पेड़ म्ह शामिल हो सकै सै।

?????? ??????? ?? ???????

25 हे विश्वासी भाईयो, मै न्ही चाहन्दा के थम इस भेद तै अनजाण रहों, इसा ना हो के थम अपने-आप पै घमण्ड करण लागों, जिब तक गैर यहूदी परमेसवर के धरै ना आवै सै, तब तक इस्राएल के कुछ माणस सख्त बणे रहवैंगे।

26 अर इसके बाद सारे इस्राएल के माणस उद्धार पावैंगे। जिसा पवित्तर ग्रन्थ म्ह लिख्या सै, "छुटाण आळा यरुशलैम तै आवैगा, अर अभगति नै याकूब के वंश तै दूर करैगा।

27 अर उनके गेल्या मेरा यो करार होगा, जिब मै उनके पापां नै माफ कर दियूंगा।"

28 यहूदी लोग परमेसवर के दुश्मन बणगे थे, क्यूँके वे उस सुसमाचार पै विश्वास करणा न्ही चाहन्दे, यो थारे खात्तर फायदेमन्द होया, पर परमेसवर उनतै प्यार करै सै, क्यूँके उसनै अपने खात्तर उन ताहीं चुण्या सै, योए वो वादा सै जो उसनै म्हारे पूर्वजां तै करया था।

29 क्यूँके परमेसवर अपने वरदानां तै, अर बुलाहट तै कदे भी पाच्छे कोनी हटदा।

30 एक बखत था जिब थम गैर यहूदियां नै परमेसवर ताहीं ठुकरा दिया था, पर इब इस्राएल के माणसां नै परमेसवर ताहीं ठुकरा दिया, इस कारण थारे पै दया दिखाई गई।

31 थारे पै दया दिखाण के कारण उनपै भी दया दिखाई जावैगी।

32 क्यूँके सारे माणसां नै परमेसवर के हुकम का उलंघण करया सै, योए कारण सै के परमेसवर उनके गैल कैदियां की ढाळ बरताव करै सै, वो इस करके इसा करै सै के सब माणसां पै दया हो सकै।

???????? ?? ??-?? ???

33 ओह! किसा अपार सै परमेसवर की बुद्धि अर ज्ञान का भण्डार! कितने महान् सै उसके फैसले! अर किसा रहस्यमयी सै उसके काम करण का तरिककां!

34 "भला कौण जाण सकै सै परमेसवर के मन नै? या कौण उसका सलाहकार होया सै?

35 या किसनै परमेसवर ताहीं कुछ दिया सै, जिसका बदला उस ताहीं दिया जावै?" इसा कोए कोनी।

36 क्यूँके सब कुछ उस्से कै कान्ही तै आवै सै, अर उस्से नै सब कुछ बणाया सै अर सब कुछ उस्से का सै। उसकी महिमा युगानुयुग होन्दी रहवै आमीन।

12

???????? ?? ???? ?? ???? ?

1 ज्यांतै हे विश्वासी भाईयो, मै थारे तै परमेसवर की दया याद दुवाकै विनती करूँ सुं, के अपनी जिन्दगी ताहीं जिन्दा, पवित्तर अर परमेसवर ताहीं भान्दा होया बलिदान करके चढाओ। योए परमेसवर की सेवा करण का सही तरिककां सै।

2 इस दुनिया के माणसां बरगे ना बणो, पर परमेसवर थारी सोच नै बदले, अर थारा चाल-चलण भी बदलता जावे, जिसतै थम परमेसवर की भली, अर आच्छी लागण आळी, अर सिध्द इच्छा अनुभव तै बेरा पाड़ सकी।

3 क्यूँके मै उस अनुग्रह के कारण जो मेरै ताहीं मिल्या सै, थारे म्ह तै हरेक तै कहूँ सूँ, के जिसा समझणा चाहिये, उसतै बढकै कोए भी अपणे-आपनै ना समझै। पर इसकी बजाए सदबुध्दी राखकै, जिसा परमेसवर नै जितना बिश्वास थारे ताहीं दिया सै उसकै मुताबिक अपणे-आपनै समझो।

4 क्यूँके जिसा म्हारी एक देह म्ह घण-ए अंग सै, अर सारे अंगा का एके काम कोनी।

5 इस्से तरियां हम जो मसीह म्ह बिश्वास करा सां, हम उसके देह के कुछ अंग बणगे सां, अर हम दुसरे तै जुड़े होए सां।

6 जब के उस अनुग्रह के मुताबिक जो परमेसवर नै म्हारै ताहीं दिया सै, हमनै न्यारे-न्यारे वरदान मिले सै। तो जिस ताहीं परमेसवर नै भविष्यवाणी का दान दिया सै, वो उन ए बातों नै बोल्लै जो उसनै बिश्वास दिलाते हो के ये परमेसवर की ओड़ तै सै।

7 जै दुसरयां की सेवा करण का दान मिल्या हो, तो सेवा म्ह लाग्या रहवै, जै कोए सिखाण आळा हो, तो सिखाण म्ह लाग्या रहवै।

8 जो उत्साहित करण आळा हो, वो उत्साहित करण म्ह लाग्या रहवै, दान देण आळा हो उदारता तै देवै, जो अगुवाई करै, वो जोश तै करै, जो दया करै, वो खुशी तै करै।

9 प्यार करण का दिखावा ना करो, बुराई तै नफरत करो, भलाई म्ह उत्सुक रहो।

10 एक-दुसरे तै इस तरियां प्यार करो, जणु एक ए परिवार के हो, आप्स म्ह एक-दुसरे का बढ-चढकै आदर करो।

11 कड़ी मेहनत करो अर आलसी ना बणो, आत्मिक जोश तै भरे रहो। प्रभु की सेवा पूरे मन तै करदे रहो।

12 आस म्ह खुश रहो, कठेश म्ह धीरज धरो, प्रार्थना म्ह सारी हाण लागगे रहो।

13 पवित्तर माणसां ताहीं जो किमे जरूरी हो, उस म्ह उनकी मदद करो, अर अजनबी* माणसां की सदा सेवा-पाणी म्ह लागगे रहो।

14 अपणे सताण आळा ताहीं आशीष द्यो, आशीष दो श्राप ना द्यो।

15 आनन्द करण आळा कै गेल्या आनन्द करो, अर रोण आळा कै गेल्या रोओ।

16 जिस तरियां थम अपणी परवाह करो सां, उससे तरियां दुसरयां की परवाह करो, खुद पै घमण्ड ना करो, पर दीन-दुखियां के गेल्या संगति राखो, अपणी नजर म्ह अकलमंद ना होवो।

17 बुराई के बदले किसे तै बुराई ना करो, जो बात सारे माणसां के लोवे आच्छी सै, उनकी फिक्र करया करो।

18 जित्त ताहीं हो सकै, थम पूरे मन तै सारे माणसां के गेल्या मेळ-मिलाप राखो।

19 हे प्यारे बिश्वासी भाईयो, बदला ना लियो, पर परमेसवर ताहीं बदला लेण का मौक्का द्यो, क्यूँके पवित्तर ग्रन्थ म्ह लिख्या सै, “बदला लेणा मेरा काम सै, परभु कहवै सै मै ए बदला ल्यूँगा।”

20 पर वचन यो भी कहवै “जै तेरा बैरी भूक्खा हो तो उस ताहीं खाणा खुवा, जै तिसाया हो तो उस ताहीं पाणी पिला, क्यूँके तेरे इसा करण तै वो खुद शर्मिन्दा हो जावैगा।”

21 बुराई तै ना जीत हासिल करो, पर भलाई तै बुराई नै जीत ल्यो।

13

PERE RE PERE PERE PERE

1 हरक माणस शासन करण आळे अधिकारियां के अधीन रहवै, क्यूँके सारे अधिकार परमेसवर की ओड़ तै आवै सै, अर जो अधिकार सै, वे परमेसवर नै बणाये सै।

2 ज्यांतै जो कोए भी माणस उन माणसां का पालन करण तै इन्कार करै सै, जिनके धारे शासन करण की शक्ति सै, तो वो परमेसवर की विधि का बिरोध करै सै, अर बिरोध करण आळे दण्ड पावेंगे।

3 क्यूँके हाकिम आच्छे काम के न्ही, पर भुन्डे काम के खात्तर डर का कारण सै। जै तू हाकिम तै बिना डरे रहणा चाहवै सै, तो आच्छा काम कर, ताके उसकी ओड़ तै तेरी बड़ाई हो।

* 12:13 12:13 अजनबी माणस जो मसीह की सेवकाई के खात्तर जगहां-जगहां घूमते हो

4 क्यूँके वो तेरी भलाई के खातर परमेसवर का सेवक सै। परन्तु जै तू बुराई करै, तो डर, क्यूँके उसनै दण्ड देण का हक सै, अर वो परमेसवर का सेवक सै ताके उसके छो के मुताबिक भुन्डे काम करण आळे ताहीं सजा देवै।

5 ज्याँतै थम उनके अधीन रहों ना सिर्फ उसके दण्ड तै बचण खातर बल्के साफ अन्तरात्मा राक्खण खातर भी।

6 ज्याँतै चुंगी भी द्यो क्यूँके शासन करण आळे परमेसवर के सेवक सै अर सारी हाण उस फर्ज नै पूरा करण म्ह लाग्गे रहवै सै।

7 ज्याँतै हरेक का हक चुकाया करो, जिस ताहीं चुंगी देणी चाहिये, उस ताहीं चुंगी देओ, कर देण आळे ताहीं कर* देओ, जिसतै डरणा चाहिये, उसतै डरो, जिसका आदर-मान करणा चाहिये, उसका आदर-मान करो।

एक-दुसरे तै प्यार करै सै, उस्से नै परमेसवर के नियम-कायदा ताहीं पूरा करया सै।

8 एक ए चीज सै जिसके थमनै कजदार होणा चाहिए, वो सै धारा आप्स म्ह प्यार, क्यूँके जो एक-दुसरे तै प्यार करै सै, उस्से नै परमेसवर के नियम-कायदा ताहीं पूरा करया सै।

9 क्यूँके, मूसा नबी के नियम-कायदा म्ह भोत-से हुकम सै, “जारी ना करणा, खून ना करणा, चोरी ना करणा, लालच ना करणा,” अर इन्नै छोड़ और कोए भी हुकम हो, तो सारया का निचोड़ इस एक हुकम म्ह पाया जावै सै, “अपणे पड़ोसी तै अपणे जिसा प्यार करो।”

10 प्यार पड़ोसी की कुछ बुराई कोनी करदा, जो प्यार करै सै, वो परमेसवर के नियम-कायदा नै पूरा करै सै।

11 आप्स म्ह हरेक नै एक-दुसरे तै प्यार करते रहणा चाहिए, क्यूँके वो बखत आवै सै, के जिब परमेसवर हमनै इस बुरी दुनिया तै छुड़ावैगा, जिब हमनै पैहली बार मसीह म्ह विश्वास करया था, तब तै इब वो बखत धौरै आ लिया सै, तो धारे ताहीं नीद तै जागणा चाहिए अर सावधान रहणा चाहिए।

12 दुनिया म्ह रहण का म्हारा बखत लगभग एक रात की ढाळ सै, जो खतम होण आळी सै, अर मसीह के बोहड़ण आळा बखत भोत लवै सै, ज्याँतै हमनै अन्धकार के काम्मां नै छोड़के, चाँदणे की ढाळ आच्छे काम करणे चाहिए, जो बुराई का विरोध करण म्ह म्हारे हथियार बणै सकै।

13 आओ! हम खुद नै सही तरिकके तै चलाणा शुरु करा, जो उन माणसां की तरियां सै जो चाँदणे म्ह रहवै सै, पर अँधरे म्ह रहण आळे माणसां की ढाळ ना बणो जो भोग-विलास, दारूबाजी, जारी, लुचपण, रोळे अर जळण करण जिसा काम करै सै।

14 बल्के प्रभु यीशु मसीह ताहीं कवच बणा के पैहर ल्यो, अर देह की पापी अभिलाषायां नै पूरा करण का उपाय ना करो।

14

जो माणस विश्वास म्ह कमजोर सै, उस ताहीं अपणी संगति म्ह ले ल्यो, पर उस ताहीं के करणा चाहिए के न्ही करणा चाहिए इस बारे म्ह बहस ना करो।

1 जो माणस विश्वास म्ह कमजोर सै, उस ताहीं अपणी संगति म्ह ले ल्यो, पर उस ताहीं के करणा चाहिए के न्ही करणा चाहिए इस बारे म्ह बहस ना करो।

2 एक नै विश्वास सै, के सारा कुछ खाणा सही सै, पर जो विश्वास म्ह कमजोर सै वो साग-पात ए खावै सै।

3 अर माँस-मच्छी खाण आळे साग-पात खाण आळे ताहीं तुच्छ ना जाणै, अर ना साग-पात खाण आळा, माँस-मच्छी खाण आळे पै दोष लावै, क्यूँके परमेसवर नै दोनुआ ताहीं अपणाया सै।

4 तू कौण सै जो दुसरे के नौकर पै दोष लावै सै? पर उसकी कामयाबी या नाकामयाबी उसके माल्लिक के ए हाथ्यां म्ह सै, बल्के वो कामयाब ए कर दिया जावैगा, क्यूँके प्रभु उस ताहीं कामयाब कर सकै सै।

* 13:7 13:7 कर-हरेक ढाळ का टैक्स

5 इस तरियों कई माणस तो एक दिन नै दुसरे तै बाध मान्ने सै, अर कई माणस सारे दिनां नै एक जिसा जाणै सै, इस तरियां तै हरेक अपणे ए मन म्ह, इस बात नै पक्का कर लेवै जो वो सोचै सै वोए सही सै।

6 जो कोए किसे दिन नै बाध मान्ने सै, वो प्रभु नै आदर मान देण खात्तर मान्ने सै। जो कोए माँस-मच्छी खावै सै, वो प्रभु नै आदर मान देण खात्तर खावै सै, क्यूँके वो परमेसवर का धन्यवाद करै सै, अर जो साग-पात खावै सै, क्यूँके वो प्रभु नै आदर मान देण खात्तर खावै अर परमेसवर का धन्यवाद करै सै।

7 क्यूँके हम सारे प्रभु के सां। म्हारै म्ह तै ना तो कोए अपणे खात्तर जिन्दा सै, अर ना कोए अपणे खात्तर मरै सै, पर परमेसवर ताहीं खुश करण खात्तर करै सै।

8 जै हम जिवां सां, तो प्रभु कै खात्तर जिवां सां, अर जै मरा सां, तो प्रभु कै खात्तर ए मरा सां, हम जिवां या मरा, हम प्रभु ए के सां।

9 क्यूँके मसीह यीशु इस्से खात्तर मरा अर मुदां म्ह तै जिन्दा भी हो गया के वो मरे होया अर जिन्दयां का, दोनुआं का प्रभु होवै।

10 तू अपणे विश्वासी भाई पै क्यातै दोष लावै सै? या फेर क्यातै अपणे विश्वासी भाई नै तुच्छ जाणै सै? परमेसवर हम सारा का न्याय करैगा।

11 क्यूँके पवित्र ग्रन्थ म्ह लिख्या सै, “प्रभु कहवै सै, मेरे जीवन की कसम, के हरेक घुटना मेरै स्याम्ही टिकैगा, अर हरेक कोए अपणी जुवान तै मन्ने परमेसवर मान लेवैगा।”

12 ज्यातै म्हारै म्ह तै हरेक नै अपणे-अपणे काम का लेक्खा परमेसवर ताहीं देणा पड़ैगा।

~~~~~

13 इस खात्तर आगे तै हम एक-दुसरे पै दोष न्ही लावांगे, पर थम या ठान ल्यो के कोए अपणे विश्वासी भाई कै स्याम्ही पाप करण की बजह ना बणै।

14 मन्ने बेरा सै अर प्रभु यीशु म्ह मन्ने पक्का यकिन होया सै, के कोए खाण-पीण की चीज अपणे-आप तै अशुद्ध कोनी, पर जो उस ताहीं अशुद्ध समझै सै, उसकै खात्तर अशुद्ध सै।

15 जै तेरा विश्वासी भाई तेरे खाणे कै कारण दुखी होवै सै, तो फेर तू मसीह की प्यार की रीत पै न्ही चाल्दा, जिसकै खात्तर मसीह मरा, तेरे खाणे की बजह तै तेरा विश्वासी भाई मसीह तै पाच्छै ना हटै।

16 इस करके जै तू अपणी नजर म्ह बढ़िया काम करै सै, पर दुसरा उसनै बुरा मान्ने सै तो उसनै ना करै।

17 क्यूँके परमेसवर का राज्य खाणा-पीणा कोनी, पर धार्मिकता अर मेळ-मिलाप म्ह ए खुशी सै, जो पवित्र आत्मा तै मिलै सै।

18 जो कोए इस तरियां तै मसीह की सेवा करै सै, इसतै परमेसवर खुश होवै सै, अर माणसां म्ह भी उसकी तारीफ होवै सै।

19 ज्यातै हम उन काम्मां म्ह लागे रह्वां जिनतै मेळ-मिलाप अर शान्ति होवै, अर एक-दुसरे का विश्वास मजबूत होवै।

20 खाणे कै खात्तर परमेसवर का काम ना बिगाड़ै। सारी ढाळ का खाणा शुद्ध सै, पर उस माणस के खात्तर पाप करण की बजह ना बणो, जिस ताहीं उसकै खाणे तै ठेस लागै सै।

21 भला तो यो सै के तू ना माँस-मच्छी खा अर ना अंगूर का रस पी, ना और किमे इसा करै जिसतै तेरे विश्वासी भाई के विश्वास नै ठेस लागै।

22 जै तू विश्वास करै के तू सही करै सै, तो इन बाततां नै अपणे ए अर परमेसवर के बीच म्ह राख। धन्य सै वो जो उस बात म्ह, जिस ताहीं वो सही समझै सै, अपणे-आपनै कसूरवार न्ही समझदे।

23 पर इब थारे मन म्ह शक सै, के खाणा सै अर के न्ही खाणा अर फेर भी खा ल्यो सो, तो पाप करो सों। क्यूँके थम अपणे बिश्वास के मुताबिक न्ही करते अर जै थम इसा काम करो सों, जिसपै थमनै बिश्वास सै, वो काम गलत सै, तो वो पाप सै।

## 15

~~~~~

1 हो सके सै के हम जो बिश्वास म्ह मजबूत सां, हम जाणा सां के इन बाततां तै कोए फर्क न्ही पड़ता, हम इस खात्तर यो काम न्ही करते के हम अपणे-आपनै खुश कर सका, हमनै उन माणसां का डर अर शंका का भी ध्यान करणा सै, के जो यो सोचवै सै के हम गलत सां।

2 म्हारै म्ह तै हरेक नै अपणे बिश्वासी भाई के साथ भले काम करणे चाहिए, जो उसनै खुश करै अर उस ताहीं बिश्वास म्ह मजबूत बणाए राखवै।

3 क्यूँके मसीह नै अपणे-आप ताहीं खुश कोनी करया, पर जिसा पवित्र ग्रन्थ म्ह लिख्या सै, "तेरी बुराई करण आळा नै मेरी बुराई करी सै।"

4 जितनी बात पैहल्या तै पवित्र ग्रन्थ म्ह लिक्खी गई, वे म्हारी ए सिखाण कै खात्तर लिक्खी गई सै, ताके हम धीरज अर उत्साह जो म्हारे ताहीं पवित्र ग्रन्थ देवै सै, उसके जरिये हमनै आस मिलै।

5 मै प्रार्थना करूँ सूँ के धीरज अर उत्साह का दात्ता परमेसवर, थमनै यीशु मसीह की तरियां जीवन बिताण अर एक-दुसरयां के साथ शान्ति तै रहण म्ह मदद करै।

6 ताके थम सब कट्टे होके म्हारै परमेसवर प्रभु यीशु मसीह के पिता की महिमा करो।

~~~~~

7 इस करके एक-दुसरे नै अपनाओ जिसा मसीह नै थारे ताहीं अपनाया सै, यो इस खात्तर करो के माणस परमेसवर की जै-जै कार करै।

8 ज्यांते मै कहूँ सूँ के जो वादे म्हारे पूर्वजां ताहीं दिए गये थे, उन वादा नै मजबूत करण खात्तर मसीह, परमेसवर की सच्चाई साबित करण खात्तर मसीह, यहूदी माणसां का सेवक बण्या।

9 अर गैर यहूदी भी परमेसवर की दया के कारण उसकी महिमा करै, जिसा पवित्र ग्रन्थ म्ह लिख्या सै, "ज्यांते मै गैर यहूदी माणसां म्ह तेरा धन्यवाद करूँगा, अर तेरे नाम के भजन गाऊँगा।"

10 फेर कहुँ सै, "हे गैर यहूदी माणसां, परमेसवर की पूजा कै गैल आनन्द करो।"

11 अर फेर पवित्र ग्रन्थ कहवै सै, "हे गैर यहूदी माणसां, प्रभु की जय-जयकार करो, अर हे राज्य-राज्य के सारे माणसां, उसकी बड़ाई करो।"

12 अर यशायाह नबी पवित्र ग्रन्थ म्ह कहवै सै, "यिश्शै\* के वंश तै एक बेट्टा पैदा होगा, अर सारी जात्तां पै राज करैगा, वो गैर यहूदी माणसां नै बचावैगा।"

13 मै प्रार्थना करूँ सूँ, के परमेसवर जो आस का दात्ता सै, थारे ताहीं बिश्वास करण म्ह सारी तरियां के आनन्द अर शान्ति तै भरपूर करै, के पवित्र आत्मा की सामर्थ तै थारी आस बधती जावै।

~~~~~

14 हे मेरे बिश्वासी भाईयो, मै अपणे-आप थारे बारे म्ह पक्का जाणु सूँ, के थम भी आप ए भलाई तै भरे होए सों, अर थमनै बेरा होणा चाहिए के थमनै के करणा चाहिए, अर एक-दुसरे नै सीखा भी सको सों।

15 तोभी मन्ने कई बाततां के बारे म्ह थारे ताहीं जो हिम्मत करके लिख्या। यो उस अनुग्रह के कारण होया जो परमेसवर नै मेरै ताहीं दिया सै,

* 15:12 यिश्शै-राजा दारूद का पिता था

16 के मै गैर यहूदियाँ के खात्तर मसीह यीशु का सेवक होकै परमेसवर के सुसमाचार की सेवा याजक के ढाळ करे, ताके गैर यहूदियाँ ताहीं परमेसवर खात्तर भेट के रूप म्ह दे सकूँ, जिसके साथ वो खुश होवै सै, जिन ताहीं पवित्र आत्मा नै पवित्र माणस बना दिया ।

17 ज्याँतै मै यीशु मसीह के कारण ए परमेसवर की सेवा पै गर्व कर सकूँ सूँ ।

18 क्यूँके मै हिम्मत के गैल सिर्फ उन बातों बाँरे म्ह जिक्र करणा चाहूँ सूँ, जो मसीह नै मेरे ताहीं करण के काबिल बनाया, ताके जो मन्ने कहाँ अर करया सै उसके जरिये गैर यहूदी माणस परमेसवर का हुकम मान्ने ।

19 पवित्र आत्मा के जरिये दी गई शक्ति तै मै अदभुत चिन्ह-चमत्कार करूँ सूँ, इस कारण जित्त भी मै यरुशलेम नगर तै लेके चौगरदेके इल्लुरिकुम परदेस तक गया, ओडै मन्ने सारया ताहीं यीशु मसीह का सुसमाचार सुणाया ।

20 पर मेरे मन की इच्छा या सै के जित्त-जित्त मसीह यीशु का नाम न्ही लिया गया, ओडै सुसमाचार सुणाऊँ, अर उस मकान बनाण आळे मिस्त्री की ढाळ ना होऊँ जो दुसरे की नीम पै घर बनावै सै ।

21 पर जिसा पवित्र ग्रन्थ म्ह लिख्या सै मै उस ताहीं पूरा करणा चाहूँ सूँ, “जिनके धारे यीशु मसीह का सुसमाचार न्ही पोंहच्या, वै देखेंगे, अर जिन नै न्ही सुणा वैए समझेंगे ।”

22 ज्याँतै मै थारे धारे आण तै बार-बार रुक्या रहया ।

23 पर इब यरुशलेम नगर अर इल्लुरिकुम परदेस म्ह मन्ने माणसां ताहीं परमेसवर का वचन सुणा दिया सै, जिननै यीशु मसीह के बारे म्ह सुण्या ए न्ही था, अर इब मै थारे तै आके मिलूँगा, जिसकी लालसा मन्ने घणे साल्लां तै थी ।

24 ज्याँतै जब मे स्पेन देश म्ह जाऊँगा, तो थारे धारे होंदा होया जाऊँगा, क्यूँके मन्ने उम्मीद सै के उस सफर म्ह थारे तै भेट होवेगी, अर जब थारी संगति तै मेरा जी खुश हो जावे, तो थम मेरी स्पेन देश जाण म्ह मदद कर दिओ ।

25 पर इब तो मै यरुशलेम नगर म्ह जाऊँ सूँ ताके ओडै परमेसवर के पवित्र माणसां नै दान दे सकूँ ।

26 क्यूँके मकिदुनिया अर अखाया परदेस के माणसां नै यो आच्छा लाग्या के यरुशलेम नगर के गरीब माणसां के खात्तर कुछ दान कट्टा करै ।

27 उननै आच्छा तो लाग्या, पर वे यरुशलेमवासियों के कर्जदार भी सै, क्यूँके यहूदियाँ नै गैर यहूदियाँ के साथ परमेसवर की आत्मिक बातों का साँझा करया सै, यो सही सै गैर यहूदियों की दुनियावी चिज्जां नै यहूदियाँ के गैल साँझा करै ।

28 ज्याँतै मै यरुशलेम नगर म्ह जाण लागरया सूँ, ताके वो दान दे सकूँ, जो मन्ने कट्टा करया सै, उसके बाद थारे तै रोम देश म्ह मिलके स्पेन देश म्ह जाऊँगा ।

29 अर मन्ने बेरा सै के जब मै थारे धारे आऊँगा, तो मै मसीह की आशीष नै थारे साथ साँझा करूँगा ।

30 हे विश्वासी भाईयो, म्हारै प्रभु यीशु मसीह म्ह विश्वास के कारण अर जो पवित्र आत्मा नै म्हारे ताहीं जो प्यार दिया सै मै थारे तै बिनती करूँ सूँ, के मेरे खात्तर अर मेरे साथ मन तै परमेसवर तै प्रार्थना करो

31 ताके मै यहूदिया परदेस के अविश्वासियों तै बचा रहूँ, अर जो दान मै यरुशलेम नगर म्ह लेके जाण लागरया सूँ, वो परमेसवर के पवित्र माणसां खात्तर खुशी का कारण बणै ।

32 अर मै परमेसवर की मर्जी तै थारे धारे आनन्द के गैल आके थारे गेल्या आराम पाऊँ ।

33 मै प्रार्थना करूँ सूँ, शान्ति का दात्ता परमेसवर थारे सारया के गेल्या रहवे । आमीन ।

16



1 मैं थारे तै फिबे के खात्तर जो म्हारी विश्वासी भाण अर किखिरया नगर की कलीसिया की सेविका सै, मै चाहूँ सूँ के थम उसका आदर करो।

2 थम यो जाणकै उसका इसा स्वागत करो जिंसा थम परमेसवर के पवित्र माणसां का करो सों, अर जिस किसे बात म्ह उस ताहीं थारी जरूरत होवै, उसकी मदद करो, क्यूँके वा भी घणखरयां की बल्के मेरी भी उपकार करण आळी रही सै।

3 पिरसकिल्ला विश्वासी भाण अर उसके धणी अक्विला नै जो मसीह यीशु म्ह मेरै गैल काम करणीये सै, उन ताहीं मेरा नमस्कार।

4 उननै मेरै प्राण कै खात्तर अपना ए जीवन जोखम म्ह गेर दिया था, अर सिर्फ मै ए न्ही, बल्के गैर यहूदियाँ की सारी कलीसिया भी उनका धन्यवाद करै सै।

5 अर उस कलीसिया नै भी नमस्कार जो उनकै घर म्ह कट्टा होवै सै। मेरे प्यारे भाई इपैनितुस नै, जिसनै आसिया म्ह सब तै पैहले मसीह पै विश्वास करया, उस ताहीं भी मेरा नमस्कार।

6 विश्वासी भाण मरियम ताहीं, जिसनै थारे खात्तर घणी मेहनत करी, नमस्कार।

7 विश्वासी भाई अन्दरुनीकुस अर उसकी भाण यूनियास नै जो मेरे यहूदी साथी सै, जो मेरै गेल्या कैद होए थे अर परेरितां म्ह बड़ा नाम्मी सै, अर मेरै तै पैहल्या मसीह म्ह आए थे, नमस्कार।

8 विश्वासी भाई अम्पलियातुस नै, जो प्रभु मसीह म्ह मेरा प्यारा सै, नमस्कार।

9 विश्वासी भाई उरवानुस नै, जो मसीह म्ह म्हारा गैल काम करणीया सै, अर मेरे प्यारे विश्वासी भाई इस्तखुस नै नमस्कार।

10 विश्वासी भाई अपिल्लेस नै जो मसीह म्ह खरयां लिकड़या, नमस्कार। विश्वासी भाई अरिस्तुबुलुस कै कुणवे नै नमस्कार।

11 मेरै विश्वासी साथी हेरोदियोन नै नमस्कार। विश्वासी भाई नरकीस्वुस का कुणवे के जो माणस परमेसवर पै विश्वास करै सै, उन ताहीं नमस्कार।

12 त्रुफेना अर त्रुफोसा विश्वासी भाणां नै जो प्रभु म्ह मेहनत करै सै, नमस्कार। प्यारी विश्वासी भाण पिरसिस नै, जिसनै प्रभु म्ह घणी मेहनत करी, नमस्कार।

13 विश्वासी भाई रूफुस नै जो प्रभु नै अपना होण खात्तर चुण्या सै, अर उसकी माँ नै, जो मेरी भी माँ के समान सै, दोनुआ नै, नमस्कार।

14 विश्वासी भाई अंसुकिरतुस, फिलगोन, हिर्मैस, पत्रुवास, हर्मास अर उनकै साथ के सारे विश्वासी भाईयाँ नै, नमस्कार।

15 विश्वासी भाई फिलुलुगुस, यूलिया अर नेर्युस अर उसकी बेब्बे, अर विश्वासी भाई उलुम्पास अर उनकै साथ के सारे पवित्र माणसां नै नमस्कार।

16 आप्स म्ह एक-दुसरे ताहीं गळे मिलकै प्यार तै नमस्कार करो। थारे ताहीं मसीह की सारी कलीसियाओं की ओड़ तै नमस्कार।



17 इब हे विश्वासी भाईयो, मै थारे तै बिनती करूँ सूँ, के जो माणस उस सच्ची शिक्षा कै उल्ट जो थमनै मिली सै, अर उन माणसां नै जो फूट गेरण अर टेस लागगण का कारण बणै सै, उननै ताड़ लिया करो अर उनतै दूर रहो।

18 क्यूँके इसे माणस म्हारे प्रभु मसीह के न्ही, पर अपनी ए इच्छा पूरी करै सै, अर चिकणी-चुपड़ी बात्तां तै सीधे-सादे माणसां नै भका देवै सै।

19 थारा, परमेसवर के हुकम मानण का जिक्र सारे माणसां म्ह फैल गया सै, ज्यांतै म्ह थारे वारै म्ह आनन्द करूँ सूँ, पर मै न्यू चाहूँ सूँ के थम भलाई कै खात्तर अकलमंद, पर बुराई कै खात्तर भोळे बणे रहो।

20 शान्ति का परमेश्वर शैतान की शक्तियाँ नै खतम करके, थारे अधीन कर देवैगा। म्हारै प्रभु यीशु मसीह का अनुग्रह थारे पै होंदा रहवै।

21 मेरे गैल काम करणीया विश्वासी भाई तीमुथियुस का, अर मेरे कुण्वे आळे भाई लूकियुस, यासोन अर सोसिपत्रुस का थारे ताहीं नमस्कार।

22 मै तिरतियुस जो पौलुस की चिट्ठी लिखण म्ह मदद करण लागरया सूं, मेरा प्रभु म्ह थारे ताहीं नमस्कार।

23 विश्वासी भाई गयुस भी थारे ताहीं नमस्कार करै सै मै इब उसके घर म्ह रहण लागरया सूं, जित्त कलीसिया कट्ठी हो सै। विश्वासी भाई इरास्तुस जो नगर का भण्डारी सै, अर भाई क्वारतुस का भी थारे ताहीं नमस्कार।

24 मै प्रार्थना करूँ सूं के म्हारै प्रभु मसीह का अनुग्रह थारे पै होंदा रहवै।

~~~~~

25 इब जो मन्ने थारे ताहीं सुसमाचार सुणाया सै, यानिके यीशु मसीह कै संदेश कै प्रचार कै मुताबिक जो थमनै विश्वास म्ह मजबूत कर सकै सै, उस भेद कै प्रकाशन कै मुताबिक जो पुराणे बखत तै लुहक्या रहया।

26 पर इब जाहिर होकै, सनातन परमेश्वर कै हुकम तै, अर नबियाँ की किताबां कै जरिये गैर यहूदियाँ ताहीं बताया गया सै, ताके वे भी विश्वास करके हुकम मानण आळे हो जावै,

27 यीशु मसीह कै जरिये उस एकमात्र बुद्धिमान परमेश्वर की युगानुयुग महिमा होन्दी रहवै।  
आमीन।

## कुरिन्थिस नगर के माणसां ताहीं प्रेरित पौलुस की पैहली चिट्ठी



पौलुस नै कुरिन्थुस नगर म्ह कलीसिया बणाई थी। उस म्ह मसीह जीवन अर विश्वास तै जुड़ी भोत सी समस्या पैदा होगी थी। उन समस्याओं के समाधान के खात्तर कुरिन्थियों के नाम पौलुस प्रेरित की पैहली चिट्ठी लिखी गयी सै। उस बखत कुरिन्थुस यूनान का एक अंतराष्ट्रीय नगर था। जो रोमी साम्राज्य के अखाया प्रान्त की राजधानी था। वो अपने भोत सारे व्यापार, शानों-शोकत, संस्कृति अर कई तरियां के धर्मा खात्तर मशहुर था। पर वो अपनी हद तै ज्यादा बुराई के कारण बदनाम था। प्रेरित की घणी चिन्ता की बात कलीसिया म्ह बटवारा, बुराई, नाजायज रिश्ते, अर अंतरआत्मा तै जुड़े सवाल, कलीसिया का प्रबन्ध, पवित्र आत्मा के दान अर दुबारा जी उठणा था। पौलुस अपने गहरे आत्मिक ज्ञान तै यो बतावै सै, के सुसमाचार के जरिये इन सवालां का समाधान किस तरियां हो सकै सै। पाठ 13 म्ह पौलुस बतावै सै के परमेश्वर के माणसां नै मिले वरदानां म्ह तै सब तै बढ़िया वरदान प्रेम सै। यो इस किताब का सब तै खास पाठ सै।

### रूप-रेखा

भूमिका 1:1-9

कलीसिया म्ह दलबन्दी 1:10-4:21

नैतिकता अर पारिवारिक जीवन 5:1-7:40

मसीह अर मूर्तिपूजा 8:1-11:1

कलीसिया के माणसां का जीवन अर आराधना 11:2-14:40

मसीह यीशु अर विश्वासियां का पुनरुत्थान 15:1-58

यहूदिया परदेस के विश्वासियां खात्तर दान 16:1-4

व्यक्तिगत बात अर समापन 16:5-24



1 या चिट्ठी पौलुस की ओड़ तै सै, जो परमेश्वर की इच्छा तै प्रभु यीशु मसीह का प्रेरित होण के खात्तर बुलाया गया अर विश्वासी भाई सोस्थिनेस भी मेरे गैल सै।

2 मै या चिट्ठी परमेश्वर की उस कलीसिया के माणसां ताहीं लिखूँ सँ, जो कुरिन्थुस नगर म्ह सै, अर जिन ताहीं परमेश्वर नै मसीह यीशु म्ह अपने खात्तर अलग तै छोट के राखे सै, अर उसनै म्हारे ताहीं अपने पवित्र माणस होण के खात्तर बुलाया सै, अर उन सारया के नाम भी जो हरेक जगहां म्हारे अर अपने प्रभु यीशु मसीह की सेवकाई करै सै।

3 हम प्रार्थना करां सां, के म्हारै पिता परमेश्वर अर प्रभु यीशु मसीह की ओड़ तै धमने अनुग्रह अर शान्ति मिल्दी रहवै।



4 मै थारे बारे म्ह अपने परमेश्वर का सारी हाण धन्यवाद करूँ सँ, क्यूँके मसीह यीशु म्ह परमेश्वर का अनुग्रह जो थारे पै होया सै, उसके कारण उसनै थारे ताहीं भोत सी आशीष दी सै।

5 थम मसीह यीशु म्ह सारी \*ढाळ तै सम्पन्न करे गये सां, उसनै थारे ताहीं हरेक ढाळ के आत्मिक वरदान दिए सै, ताके थम दुसरयां नै वचन का ज्ञान अर सुसमाचार सुणा सकी।

6 जो खास काबलियत थारे ताहीं मिली सै, वा साबित करै सै, के मसीह यीशु के बारे जो सन्देश सै, वो सच्चा सै।

7 इस कारण जिब थम म्हारै प्रभु यीशु मसीह के बोहड़ण की बात देखण लागरे सां, तो पवित्र आत्मा नै थारे ताहीं हरेक ढाळ के आत्मिक वरदान दिये सै।

\* 1:5 1:5 सम्पन्न-धनी, माळदार

8 परमेसवर थमनै आखिर ताहीं बिश्वास म्ह मजबूत करैगा, ताके थम म्हारै परभु यीशु मसीह के बोहड़ण के दिन म्ह बेकसूर ठहरो।

9 परमेसवर इसाए करैगा, क्यूँके जो वो कहवै सै, उसनै वो करण म्ह बिश्वास लायक सै, अर उसनै थारे ताहीं अपणे बेट्टे, अर म्हारै परभु यीशु मसीह की संगति म्ह बुलाया सै।

**XXXXXXXXXX**

10 हे बिश्वासी भाईयो, जो परभु यीशु मसीह नै मेरे ताहीं हक दिया सै, उसके कारण मै थारे तै बिनती करूँ सूँ, के थम सारे एक-दुसरे तै सहमत रहो, थम एकता बणाए राख्खों ताके थारे म्ह फूट ना होवै, अर थम एक मत हो के आप्स म्ह मिले रहो।

11 क्यूँके हे मेरे बिश्वासी भाईयो, खलोए के कुण्वे के माणसां नै मेरै ताहीं थारे बारै म्ह बताया सै, के थारे म्ह झगड़ें होवै सै।

12 मेरे कहण का मतलब यो सै के, थारे म्ह तै कोए अपणे-आपनै पौलुस का, कोए अपुल्लोस का, कोए कैफा का, कोए मसीह का चेल्ला कहवै सै।

13 जो थम करो सों वो ठीक कोनी, के मसीह बट गया? के मै पौलुस थारे खात्तर क्रूस पै चढ़ाया गया? के थमनै मेरे नाम तै बपतिस्मा मिल्या?

14 मै परमेसवर का धन्यवाद करूँ सूँ, बिश्वासी भाई किरस्पुस अर गयुस नै छोड़, मन्नै थारे म्ह तै किसे ताहीं भी बपतिस्मा कोनी दिया।

15 कदे इसा ना हो के कोए थारे म्ह तै कहवै के थमनै मेरै नाम पै बपतिस्मा मिल्या सै।

16 अर हाँ, मन्नै स्तिफनास के कुण्वे ताहीं भी बपतिस्मा दिया, इन्ने छोड़ मै न्ही जाण्दा के मन्नै और किसे ताहीं भी बपतिस्मा दिया।

17 क्यूँके मसीह नै मेरै ताहीं बपतिस्मा देण ताहीं न्ही, बल्के सुसमाचार सुणाण ताहीं भेज्या सै, अर मन्नै माणसां ताहीं सुसमाचार चतुर विचार के मुताबिक कोनी सुणाया, इसा ना हो के मसीह के क्रूस पै मरण की कथा बेकार ठहरै।

**XXXXXXXXXX**

18 क्यूँके क्रूस पै मसीह यीशु के मरण की कथा, नाश होण आळे माणसां के खात्तर बेकूफी सै, पर हम उद्धार पाण आळा के खात्तर परमेसवर की सामर्थ सै।

19 क्यूँके पवित्र ग्रन्थ म्ह परमेसवर नै कहा सै, के “जो अपणे-आपनै ज्ञानवान समझ सै, मै उननै दिखा दिखुंगा के असलियत म्ह उनका ज्ञान बेकूफी तै भरया सै, अर वे बेकूफ सै।”

20 कित्त रहया ज्ञान्नी? कित्त रहया शास्त्री? कित्त रहया इस दुनिया का विवाद करण आळा? के परमेसवर नै दुनिया के ज्ञान ताहीं बेकूफी न्ही ठहराया?

21 क्यूँके परमेसवर नै यो आच्छा लागया के दुनिया के माणस अपणे ज्ञान के मुताबिक परमेसवर ताहीं न्ही जाण सकै, तो उसनै म्हारे जरिये सुसमाचार के प्रचार ताहीं इस्तमाल करया, ताके उन माणसां नै बचा सके जिनने उसपे बिश्वास करया सै, पर कुछ लोग्गां नै इस ताहीं बेकूफी समझा।

22 यहूदी लोग ए इस ताहीं बेकूफी समझै सै, क्यूँके वे सुगं तै चिन्ह-चमत्कार की बातों नै ए सच मान्नै सै, अर यूनानी लोग ज्ञान की टोह म्ह रहवै सै।

23 पर हम तो उस क्रूस पै चढ़ाए होड़ मसीह का प्रचार करा सां, जो यहूदी लोग्गां के खात्तर टोक्करां का कारण अर गैर यहूदियाँ के खात्तर बेकूफी सै।

24 पर जिन ताहीं परमेसवर नै बुलाया सै, के यहूदी लोग, के यूनानी लोग, योए मसीह यीशु परमेसवर का सामर्थ अर परमेसवर का ज्ञान सै।

25 क्यूँके जो परमेसवर की बेकूफी लाग्गै सै, वो माणसां के ज्ञान तै ज्ञानवान सै, अर जो परमेसवर की कमजोरी लाग्गै सै, वो माणसां की ताकत तै घणी ताकतवर सै।

† 1:23 1:23 यहूदी लोग्गां के खात्तर टोक्करा यहूदी लोग सोचै थे के मसीहा सदा खात्तर जिवैगा, इस खात्तर वे बिश्वास कोनी करे थे के यीशु ए मसीह सै

26 हे विश्वासी भाईयो, याद करो के थम किसे थे जिब परमेसवर नै थारे ताहीं बुलाया था, ना तो दुनिया के मुताबिक घणे ज्ञानवान, अर ना घणे सामर्थी, अर ना घणे आच्छे खानदान आळे थे।

27 बल्के परमेसवर नै दुनिया के बेकुफां ताहीं छाँट लिया सै के ज्ञानवानां ताहीं शर्मिन्दा करै, अर परमेसवर नै दुनिया के कमजोरां ताहीं छाँट लिया सै के टाड्यां नै शर्मिन्दा करै।

28 अर परमेसवर नै उन माणसां ताहीं चुण्या, जो दुनिया की निगांह म्ह नीच अर तुच्छ सै। इनके जरिये परमेसवर नै, जो घणे खास समझे जावै सै, उन ताहीं बेकार ठैहरा दिया।

29 परमेसवर नै यो इस करके करया, ताके कोए प्राणी उसके स्याम्ही घमण्ड न्ही करण पावै।

30 परमेसवर के जरिये करे गये काम के नतिज्जे तै थम मसीह यीशु म्ह सो, जो परमेसवर की ओड़ तै म्हारै खात्तर ज्ञान, धार्मिकता, पवित्रता, अर छुटकारा बणगे।

31 ताके जिसा पवित्र ग्रन्थ म्ह लिख्या सै, उस्से तरियां ए होवै, “जो घमण्ड करै वो प्रभु नै जो करया उसपै घमण्ड करै।”

## 2

\*\*\*\*\*

1 हे विश्वासी भाईयो, मै थारे धारे बात्तां की चतुराई अर ना ए उत्तम ज्ञान का प्रदर्शन करण आया, बल्के मै थारे धारे परमेसवर का सन्देश सुणाण आया था।

2 क्यूँके मन्ने यो ठान लिया था, के मै मसीह यीशु अर उसकी क्रूस की मृत्यु के अलावा, किसे और चीज के बारे म्ह थारे तै ना सुणु।

3 मै कमजोरी अर डरके गेल्या, घणा थरथराता\* होया थारे गेल्या रहया।

4 अर मेरी शिक्षा, अर प्रचार म्ह ज्ञान की लुभाण आळी बात कोनी, पर पवित्र आत्मा नै सामर्थी रूप तै जाहिर करया सै, के जो सन्देश मन्ने थारे ताहीं सुणाया सै, वो सच्चा सै।

5 ज्यांतै के थारा विश्वास माणसां के ज्ञान पै न्ही, पर परमेसवर की सामर्थ के आसरे हो।

\*\*\*\*\*

6 फेर भी मै, जो विश्वास म्ह मजबूत सै उन ताहीं, ज्ञान भरया सन्देश सुणाऊँ सूँ, पर यो इस दुनिया का अर इस दुनिया के नाश होण आळे हाकिमां का ज्ञान कोनी।

7 पर जो ज्ञान हम सुणावां सां, वो परमेसवर का ज्ञान सै, जो छिप्या होया था, कोए भी उस ताहीं इब ताहीं न्ही समझ पाया था, परमेसवर नै दुनिया बणाण तै पैहले ए यो फैसला कर लिया था, के उसका ज्ञान म्हारै खात्तर महिमा लेके आवैगा।

8 परमेसवर की योजना ताहीं इस दुनिया के हाकिमां म्ह तै कोए न्ही जाण पाया, क्यूँके जै वे जाणदे तो तेजोमय प्रभु ताहीं क्रूस पै कोनी चढ़ान्दे।

9 जिसा पवित्र ग्रन्थ म्ह लिख्या सै, “जो कदे आँखां तै देख्या कोनी गया, अर कान तै सुण्या कोन्या गया, अर जो बात माणसां के चित्त म्ह कोनी चढ़ी, वे सारी बात परमेसवर नै उन खात्तर तैयार करी जो उसतै प्यार करै सै।”

10 पर परमेसवर नै उन बात्तां ताहीं अपणे पवित्र आत्मा के जरिये म्हारै पै जाहिर करया, क्यूँके पवित्र आत्मा सारी बात, बल्के परमेसवर की गहरी बात्तां नै भी जाँचवै सै।

11 माणसां म्ह तै कौण किसे माणस की बात्तां नै जाणै सै, सिर्फ माणस की आत्मा जो उस म्ह सै? उस्से तरियां ए परमेसवर की बात्तां नै भी कोए न्ही जाण्दा, सिर्फ परमेसवर की आत्मा।

12 पर परमेसवर नै म्हारे ताहीं अपना आत्मा दिया सै, अर हम इसा न्ही सोचते जो दुनिया के लोग सोचवै सै, इस करके हम उन आशीषां नै पिच्छाण सका सां जो परमेसवर नै म्हारे ताहीं मुफ्त म्ह दी सै।

13 अर हम ये बात थारे ताहीं बतावां सां, हम माणसां के ज्ञान की सिखाई होड़ बात्तां नै न्ही, पर पवित्र आत्मा की सिखाई होड़ बात्तां नै आत्मिक माणसां ताहीं सिखावा सां।

\* 2:3 2:3 थरथराता काम्बदा होया



14 पर शारीरिक माणस परमेसवर के आत्मा की बात अपणान्दा कोनी, क्यूँके वे उसकी निगांह म्ह बकूफी की बात सै, अर ना वो उन ताहीं जाण सकै सै क्यूँके उनकी जाँच आत्मिक तरियां तै होवै सै ।

15 आत्मिक माणस सारा किमे जाँचै सै, पर वो दुसरयां के जरिये जाँचया न्ही जान्दा ।

16 यो सच सै, क्यूँके पवित्र ग्रन्थ म्ह लिख्या सै, के कोए भी न्ही जाणता के प्रभु के मन म्ह के सै? पर हम विश्वासी माणस जाणा सां के मसीह के मन म्ह के सै ।

### 3

#### ???????? ???? ??????? ?? ?????????

1 हे विश्वासी भाईयो, जिब मै थारे साथ था तो थारे ताहीं आत्मिक बात न्ही सीखा पाया, जिस तरियां मे आत्मिक माणसां नै सिखाऊँ सू, पर मन्ने थारे ते दुनियावी माणसां की तरियां बात करी, क्यूँके थम मसीह म्ह इब भी बाळक के समान सां ।

2 मन्ने थारे ताहीं परमेसवर के सुसमाचार की शुरुआती शिक्षा ए सिखाई, जिस तरियां कोए इन्सान छोट्टे बाळक नै दूध पियावै सै, अर मन्ने थारे ताहीं वचन की गहरी बात न्ही सिखाई जो की रोटी की तरियां सै, क्यूँके थम इब्बे उस ताहीं अपणा न्ही सकदे ।

3 क्यूँके इब ताहीं थम दुनियावी माणसां के पापी सुभाव के मुताबिक जीवन जिओ सां । ज्यातै के इब भी थारे म्ह जळण अर झगडे सै, तो के थम दुनियावी माणसां की तरियां कोनी? थम उन माणसां की तरियां सां जो परमेसवर के कोनी ।

4 क्यूँके जिब एक माणस कहवै सै, "मै पौलुस का चेल्ला सू," अर दुसरा कहवै सै, "मै अपुल्लोस का चेल्ला सू," तो के थम दुनियावी माणस की तरियां कोनी?

5 अपुल्लोस कौण सै? अर पौलुस कौण सै? सिर्फ सेवक, जिनके जरिये थमनै मसीह म्ह विश्वास करया । हम सब नै वोए काम करया जो म्हारे ताहीं प्रभु नै दिया ।

6 यो उस पौधे की ढाळ सै, जो मन्ने लगाया, अपुल्लोस नै सींचा, अर परमेसवर नै बढ़ाया ।

7 ज्यातै ना तो लाणआळा किमे सै अर ना सींचण आळा, पर परमेसवर ए सारा किमे सै जो बढ़ाण आळा सै ।

8 पौधा लगाण आळा अर उस ताहीं सींचण आळा दोनुआ का एक्के मकसद सै, पर हरेक माणस अपणी ए मेहनत के मुताबिक अपणी ए मजदूरी पावेगा ।

9 क्यूँके हम परमेसवर के गैल काम करणीये सां, अर थम परमेसवर की खेत्ती अर उस घर की ढाळ सां जिस ताहीं परमेसवर बणाण लाग रह्या सै ।

10 परमेसवर नै जो वरदान मेरे ताहीं दिए सै, तो मन्ने एक अकलमंद चिणाई आळे मिस्त्री की तरियां घर की नीम धरी, अर दुसरा उसपै रद्दा\* धरै सै । पर हरेक माणस चौक्कस रहवै के वो उसपै किसा रद्दा धरै सै ।

11 क्यूँके जो नीम धरी सै, वा यीशु मसीह सै, कोए दुसरी नीम कोनी धर सकदा ।

12 जै सेवक परमेसवर की सच्ची शिक्षा सिखावै सै, जो परमेसवर नै उस ताहीं दी सै, तो वो उस राज मिस्त्री की ढाळ सै, जो उस नीम पै आच्छे समान तै, जुकर सोन्ना, चाँदी, बेसकिमती पत्थर के जरिये, नीम पै घर बणावै सै, अर जै वो झूट्टी शिक्षा नै सिखावै सै, तो वो उसकी ढाळ सै, जो लाकड़ी, घास-फूस तै नीम पै घर बणावै सै ।

13 तो हरेक माणस अपणे काम नै देखैगा के उसनै किसा काम करया सै, क्यूँके यीशु मसीह जाहिर कर देवैगा जिब वो बोहड़ के आवैगा, यो उस दिन की तरियां होगा जिब वो समान आग म्ह डाला जावैगा तो वो देखैगा के किसनै किसा काम करया सै, फेर वो फैसला करैगा के किसनै आच्छा अर किसनै बुरा काम करया सै ।

14 जिस किसे का बणाया गया घर उस नीम पै डटया रहवैगा, तो वोए उसकी मजदूरी पावेगा ।

\* 3:10 3:10 रद्दा ईंट का पाळा

15 जै मसीह तय करै के जो काम करया सै वो सही कोनी तो मसीह उस काम करण आळे नै मजदूरी न्ही देवैगा, पर वो अनन्त जिन्दगी नै न्ही खोवैगा जो परमेसवर नै उस ताहीं दी सै।

16 के थमनै न्ही बेरा के थम परमेसवर के मन्दर सो, अर परमेसवर की आत्मा थारे म्ह वास करै सै?

17 जै कोए परमेसवर के मन्दर नै नाश करैगा, तो परमेसवर उसनै नाश करैगा, क्यूँके परमेसवर का मन्दर पवित्र सै, अर वो थम सो।

18 थोक्खे म्ह ना रहों, जै थारे म्ह तै कोए यो सोच बेठूठै के वो दुनियावी बातों के मुताबिक अकलमंद सै, तो ठीक तो यो होगा के वो खुद नै बेकूफ बणाले ताके अकलमंद बण जावै।

19 क्यूँके इस दुनिया का ज्ञान परमेसवर की नजर म्ह बेकूफी सै, जिसा पवित्र ग्रन्थ म्ह लिख्या सै, “वो ज्ञानियाँ ताहीं उनकी शयाणपत म्ह फँसा देवै सै।”

20 अर यो भी लिख्या सै, के “प्रभु ज्ञानियाँ के विचारों नै जाणै सै, के वो बेकार सै।”

21 ज्यांतै माणसां पै कोए घमण्ड ना करै, क्यूँके सारा किमे थारा सै।

22 के पौलुस, के अपुल्लोस, के कैफा, के दुनिया, के जीवन, के मरण, के वर्तमान, के भविष्य, सारा किमे थारा सै,

23 अर थम मसीह के सो, अर मसीह परमेसवर का सै।

## 4

### परमेश्वर के सेवक

1 माणस हमने मसीह के सेवक अर परमेसवर के भेदां के भण्डारी समझै, जो माणसां नै परमेसवर का भेद समझावै सै।

2 फेर उरै भण्डारी म्ह या बात देखी जावै सै, के वो विश्वास के जोगगा हो।

3 पर मेरी निगाह म्ह या घणी छोट्टी बात सै, के थम या माणसां का कोए न्यायाधीश मन्ने परखे, बल्के मै खुद अपण-आप ताहीं कोनी परखदा।

4 क्यूँके मेरा मन मेरै ताहीं किसे बात म्ह कसूरवार कोनी ठहरान्दा, इस म्ह मै बेकसूर कोनी ठहरदा, पर मेरा परखण आळा प्रभु सै।

5 ज्यांतै जिव ताहीं प्रभु का आणा ना हो, कोए किसे नै परखे ना, वो माणसां के विचारों नै साफ-साफ जाहिर कर देगा, अर वो माणसां के मनां के मकसद नै दिखावैगा, फेर परमेसवर की ओड़ तै हरेक की बड़ाई होवैगी।

6 हे विश्वासी भाईयो, मन्ने अपणा अर अपुल्लोस का जिक्र उदाहरण के तौर पै करया सै, यो बताण खात्तर के मै थारे ताहीं के कहणा चाहूँ सूँ, जै थम उसपै ध्यान करो, जो पवित्र ग्रन्थ म्ह लिख्या सै, अर उसतै आगै ना बढ़ो, इसा ना हो के थम एक माणस का पक्ष ल्यो, अर दुसरे का अपमान करो।

7 थारे ताहीं कौण कहवै सै, के थम दुसरयां तै उत्तम हो? हर काबलियत थमनै परमेसवर की ओड़ तै मिली सै, अर सब कुछ परमेसवर के जरिये दिया गया सै, तो थमनै घमण्ड करण का कोए हक कोनी?

8 थम सोच्चो सों के थारे थोरै पवित्र आत्मा के सारे वरदान सै, जो माणसां ताहीं दिए जावै सै, थम यो सोच्चों सों के म्हारे बिना सहयोग के थम राजा बणगे सो, अर थम साहूकार भी बण लिए सो, पर आच्छा तो यो होंदा के थम असलियत म्ह ए राजा बणे होन्दे, अर हम भी थारे गेल्या राज करदे।

9 परमेसवर नै हम प्रेरितां ताहीं सारया तै आखरी जगहां पै राख्या सै। हम उन माणसां की तरियां सां, जिनकी मौत का हुकम हो लिया सै, क्यूँके हम सुगंदूतां अर दुनिया के माणसां के खात्तर एक तमाशा बणे सां।

10 माणस हमने बेकूफ समझै सै, क्यूँके हम मसीह का प्रचार करया सां। थम या सोच्चों सों के थम अकलमंद सों, क्यूँके मसीह के गैल थारा रिश्ता सै। भोत सारे माणस या सोच्चै सै के प्रेरित

होण का म्हारे धोरै अधिकार कोनी, पर थम घमण्ड तै कहो सों, के थारे धोरै परमेसवर की शक्ति सै। माणस म्हारा न्ही थारा आदर करै सै।

11 हम आज तक भूकखे-प्यास्से मार खावां सां, अर पाट्टे-पुराणे लत्यां म्ह रहवां सां, अर ना ए म्हारे घर-बार सै।

12 अर अपणे ए हाथ्यां तै काम करकै मेहनत करा सां। माणस म्हारे ताहीं बुरा कहवै सै, हम आशीष देवां सां, वे सतावै सै, हम सहण करा सां।

13 वे बदनाम करै सै, हम प्यार तै बोल्ता सां। आज भी दुनिया के माणस म्हारा आदर कोनी करते, क्यूँके वे न्यू समझै सै के हम बेकार के माणस सां।



14 मै थमने शर्मिन्दा करण कै खात्तर ये बात कोनी लिखदा, मेरा मकसद यो सै के मै थमने सुधार क्यूँके थम मेरे उन प्यारे बाळकां की ढाळ सों, जिनते मै प्यार करूँ सूँ।

15 जै मसीह म्ह थारे सिखाण आळे दस हजार भी होन्दे, तोभी थारे पिता घणे कोनी, क्यूँके मसीह यीशु म्ह थारे ताहीं सुसमाचार सुणाण के कारण मै थारा पिता बणगया।

16 मै थारे तै बिनती करूँ सूँ के मेरे जिसा जीवन जिओ।

17 इस करकै मन्ने तीमुथियुस ताहीं जो प्रभु म्ह मेरा प्यारा अर विश्वास कै जोगगा बेट्टा सै, थारे धोरै भेज्या सै। वो थमने मसीह यीशु म्ह मेरा चाल-चलण याद करवावेगा, जिस तरियां के हरेक जगहां मै हरेक कलीसिया म्ह उपदेश देऊँ सूँ।

18 थारे म्ह तै घणखरे तो यो सोचवै सै, के मै थमने दुबारा मिलण कोनी आऊँगा, इस करकै वे घमण्डी होंगे सै।

19 पर प्रभु नै चाह्या तो मै थारे धोरै तावळा-ए आऊँगा, अर देखूँगा के ये घमण्डी माणस सिर्फ बणावटी बात करै सै, या इनके धोरै परमेसवर की सामर्थ सै।

20 क्यूँके परमेसवर का राज्य बात्तां म्ह न्ही पर परमेसवर की सामर्थ के साथ जीण म्ह सै।

21 थम के चाहो सों, जो मै थारे गैल करूँ? जै थम अपना बुरा सुभाव न्ही छोड़ोगे तो मै सखताई तै थारे गैल पेश आऊँ, अर जै बुरा सुभाव छोड़ दोगे तो मै प्यार अर नरमाई तै थारे धोरै आऊँगा।

## 5



1 कई माणसां नै थारे बारे म्ह बताया सै, के कलीसिया म्ह कई माणस सै जो जारी करै सै, बल्के इसी जारी जो अबिश्वासी माणसां म्ह भी कोनी होन्दी, के एक माणस अपनी सौतेल्ली माँ गैल गलत सम्बन्ध राखवै सै।

2 कलीसिया के माणसां नै इस बात तै दुखी अर उदास होणा चाहिए, जिननै इसा काम करया सै, उननै कलीसिया तै काढ देणा चाहिए, पर थम तो इसी बात्तां पै घमण्ड करो सों।

3 भलाए मै थारे तै दूर था, पर इसा मान्नो, जणु मै आत्मा म्ह थारे धोरै था, अर इसा पाप करण आळे माणस के बारे म्ह मेरा योए हुकम सै।

4 थमनै यो करणा चाहिए, के जब थम बिश्वासी भाई कट्टे होओ सों, तो यो याद राखकों के यीशु मसीह का अधिकार थारे धोरै सै, अर इसा मान्नो जणु मै आत्मा म्ह थारे साथ सूँ। जब परमेसवर का सामर्थ थारे साथ हो,

5 तब वो माणस जो पाप करण लागरया सै, उस ताहीं कलीसिया तै लिकाड़ द्यो, अर उस ताहीं शैतान के हाथ म्ह सौंप द्यो। ताके वो अपणे पापां खात्तर माफी माँग ले, अर वो आदमी माफी माँग ले सै, तो वो उस दिन बच जावेगा, जिस दिन प्रभु यीशु मसीह बोहड़के आवेगा।

6 थारा घमण्ड करणा आच्छा कोनी, के थमनै न्ही बेरा के माड़ा-सा खमीर पूरे गुन्दे होए आटे ताहीं खमीर बणा देवै सै। उससे तरियां जै एक माणस पाप करदा रहवै तो उस ताहीं देखके और माणस भी पाप करणा शरु कर देंगे।

7 जिस तरियां यहूदी माणस फसह का त्यौहार मनाण तै पैहले, अपणे घर तै खमीर काढ देवै सै, उस्से तरियां थम उस जार माणस नै अपणे टोळ म्ह तै लिकाड़ द्यो, तो थम वो विश्वासियाँ का टोळ बण जाओगे, जिन म्ह कोए भी जाण-बुझ के पाप करण आळा न्ही होगा, अर परमेसवर थारे मन नै भित्तर तै साफ करैगा, जै थम मसीह पै विश्वास करोंगे, क्यूँके मसीह म्हारे खात्तर मरया ताके हमनै पापां तै आजाद करदे, वो उस भेड़ की ढाळ सै, जिस ताहीं यहूदी लोग फसह के त्यौहार पै बलिदान करै सै।

8 तो आओ, हम फसह का त्यौहार मनावां, ना तो पुराणे खमीर तै, ना बुराई अर दुष्टता कै खमीर तै, बल्के खराई अर सच्चाई की अखमीरी रोटी तै। जिसका मतलब यो सै, के जिस तरियां थम विश्वासी बणण तै पैहले जिओ थे, उस तरियां जीणा छोड़के मसीह कै पाच्छै, चालणा शरु कर द्यो, ताके थारे मनां म्ह कोए बुराई ना रह पावै।

9 मन्नै अपनी पैहले की चिट्ठी म्ह यो लिख्या था, के जारी करणीया की संगति ना करियो।

10 मेरा मतलब यो कोनी, के थम जमाए इस दुनिया के जारी, लालची, अन्धेर या मूर्तिपूजा करण आळे माणसां तै कोए सम्बन्ध ना राखियों, क्यूँके इस तरियां के माणसां तै बचण खात्तर तो थमनै दुनिया ए छोड़णी पड़ेगी।

11 पर मेरा कहणा यो सै के जै कोए भाई विश्वासी कुह्णकै, जार, लालची, मूर्तिपूजा करणीये, गाळी देण आळा, दारूबाज, या अन्धेर करणीया हो, तो उसकी संगति मतना करियो, बल्के इसे माणस कै गेल्या खाणा भी ना खाईयों।

12 अबिश्वासी माणसां का न्याय भला मै क्यूँ करूँ? मन्नै दुसरयां तै के काम? पर या जिम्मेदारी थारी सै के थम उनकी बारीकी तै जाँच करो, जो कलीसिया म्ह सै।

13 जिसा के पवित्र ग्रन्थ कहवै सै, के अबिश्वासी माणसां का न्याय परमेसवर करै सै। ज्यांतै उस बुरे काम करणीये ताहीं अपणे बिचाळै तै लिकाड़ द्यो।

## 6

### ?????????? ??? ?????????????

1 जै थारे म्ह किसे का दुसरे विश्वासी गैल झगड़ा हो जावै, तो अपना फैसला परमेसवर के पवित्र माणसां कै धरै ले जाओ, ना के उस न्यायाधीश कै धरै जो के अबिश्वासी सै।

2 के थमनै बेरा कोनी के दुनिया का न्याय पवित्र माणस करैगें? ज्यांतै जिब थमनै दुनिया के माणसां का न्याय करणा सै, तो के थम छोट्या तै छोट्टे झगड्या का भी फैसला करण जोगे कोनी?

3 के थमनै न्ही बेरा के हम सुगंदूतां का न्याय करागें? तो उसकी बराबरी म्ह ये दुनियावी झगडे के सै?

4 जै थारे बीच दुनियावी झगडे सै, तो फैसला करण खात्तर उननै ए बिठाओगे, जो कलीसिया म्ह किमे कोनी समझे जावै सै?

5 मै थमनै शर्मिन्दा करण कै खात्तर न्यू कहूँ सूँ। के साच्चए थारे म्ह एक भी अकलमंद न्ही मिलदा, जो अपणे विश्वासी भाईयाँ के बीच होए झगडे नै सुलझा सके?

6 पर याडै तो एक विश्वासी भाई दुसरे विश्वासी भाई नै कचेहूड़ी म्ह घसीटै सै, अर वो भी अबिश्वासी माणसां कै स्याम्ही।

7 पर सच म्ह ए थारे म्ह मुकदमे चाल्लण लागरे सै, तो थम मसीह के माणस कोनी, इसकी बजाए थम खुद ए अन्याय अर अपना नुकसान क्यांतै न्ही सहन्दे?

8 पर थम तो खुदे अन्याय करो सों, अर नुकसान पोहोचाओ सो, अर वो भी दुसरे विश्वासी भाईयाँ ताहीं।

9 के थमनै न्ही बेरा के जुल्मी माणस परमेसवर के राज्य के वारिस न्ही होवैगें? धोक्सा ना खाओ, बेश्या कै धारै जाणीए, मूर्ति पूजणीये, बिगान्नी लुगाई कै धारै जाणीए, लुच्चे, माणसां कै गेल्या कुकर्म करणीये,

10 चोर, लालची, दारूबाज, गाळी देणीये अर अन्धेर करणीये परमेसवर कै राज्य के वारिस न्ही होवैगें।

11 अर थारे म्ह तै कई इसेए थे, पर प्रभु यीशु मसीह कै नाम तै अर म्हारै परमेसवर के आत्मा तै थारे पाप धोए गये, अर पवित्र अर धर्मी बणे।

?????????? ?? ??????? ?? ???????

12 थम कह सको सों, के मै कुछ भी करण खात्तर आजाद सूं, पर मै कहूँ सूं, के सारी चीज मेरे फायदे की कोनी, जिब के मै सब कुछ कर सकूँ सूं, पर मै किसे चीज का गुलाम कोनी।

13 थम कह सको सों, के “खाणा पेट कै खात्तर, अर पेट खाणे कै खात्तर सै,” यो सच सै, पर परमेसवर पेट अर खाणे नै दोनुआ ताहीं नाश करैगा। उस्से तरियां देह जारी कै खात्तर कोनी, बल्के प्रभु की महिमा खात्तर सै, अर प्रभु देह का रुखाळिया सै।

14 इस्से तरियां म्हारी देह भी महत्वपूर्ण सै, क्यूँके जिस तरियां परमेसवर नै अपनी सामर्थ तै प्रभु यीशु ताहीं जिन्दा करया, अर वो म्हारै ताहीं भी जिन्दा करैगा।

15 के थमनै बेरा सै के थारी देह मसीह का अंग सै? तो के मै मसीह के अंग लेकै उन ताहीं बेश्या के संग जोड़ दूँ? कदे भी न्ही।

16 के थमनै न्ही बेरा के जो कोए बेश्या तै संगति करै सै, वो उसके गेल्या एक तन हो जावै सै, क्यूँके पवित्र ग्रन्थ म्ह लिख्या सै, “वे दोनु एक तन होवैगें।”

17 अर जो प्रभु की संगति म्ह रहवै सै, उसकी अर परमेसवर की आत्मा एक हो जावै सै।

18 जारी तै बचे रहो। और दुसरा कोए पाप म्हारे देह पै असर कोनी गरै जितना के जारी, पर जारी करणीया अपनी ए देह के खिलाफ पाप करै सै।

19 के थमनै न्ही बेरा के थारी देह पवित्र आत्मा का मन्दर सै, जो थारे म्ह बस्या होया सै, अर थारे ताहीं परमेसवर की ओड़ तै मिल्या सै, अर थम परमेसवर के सो।

20 क्यूँके थम दाम देकै मोल लिये गये सो, ज्यातै अपनी देह कै जरिये परमेसवर की महिमा करो।

## 7

?????? ?? ?????????????? ?????

1 उन बात्तां के बारे म्ह जो थमनै मेरे ताहीं चिट्ठी म्ह पूच्छी थी, के यो ठीक सै, के माणस ब्याह ना करै।

2 क्यूँके भोत सारे माणस जारी करै सै, इस करके हरेक माणस जारी तै बचण खात्तर ब्याह करले, अर धणी-वीर\* एक-दुसरे के प्रति वफादार हो।

3 पति अपनी पत्नी की शारीरिक इच्छा पूरी करै, अर उस्से तरियां ए पत्नी भी अपने पति की शारीरिक इच्छा पूरी करै।

4 पत्नी का अपनी देह पै हक कोन्या पर उसके पति का हक सै, उस्से तरियां ए पति नै भी अपनी देह पै हक कोनी, पर पत्नी का सै।

5 थम एक-दुसरे तै न्यारे ना रहो, पर सिर्फ कुछ बखत खात्तर आप्स म्ह सलाह करके प्रार्थना कै खात्तर बखत लिकाड़ो, अर फेर एक साथ रहो, इसा ना हो के थारे असंयम कै कारण शैतान थमनै इम्तिहान म्ह फँसा ले।

6 पर मेरा यो सुझाव सै, ना के आज्ञा।

\* 7:2 धणी-वीर पति-पत्नी

7 मेरा तो यो सुझाव है, के जिसा मैं अकेल्ला सूं, उस्से तरियां ए सारे माणस भी अकेल्ले रहै। हरेक माणस ताहीं परमेसवर की ओड़ तै एक तरियां का उपहार मिला है, किसे ताहीं ब्याह का, अर किसे ताहीं एकला रहण का।

8 अविवाहितां अर बिधवायां के बारे म्हे मेरी या सलाह है, के उनके खात्तर एकला रहणा ठीक है, जिसा मैं सूं।

9 पर जै वे खुद पै काबू ना राख सकै, तो ब्याह करै, क्यूँके ब्याह करणा वासना म्हे जळण तै भला है।

10 जिनका ब्याह होगया है, उन ताहीं मैं न्ही, बल्के प्रभु यीशु हुकम देवै है, के पत्नी अपणे पति तै तलाक ना देवै

11 जै तलाक हो भी जावै, तो पत्नी बिना दुसरा ब्याह करे रहवै, या पत्नी अपणे पति तै दुबारा मेल कर लेवै, अर पति अपणी पत्नी नै तलाक ना दे।

12 दुसरयां तै, प्रभु यीशु मसीह न्ही पर मैं ए कहूँ सूं, जै किसे भाई की पत्नी बिश्वास ना राखदी हो अर उसके गेल्या रहण म्हे राज्जी हो, तो वो उस ताहीं तलाक ना देवै।

13 जिस बिबान्नी का धणी बिश्वास ना राखदा हो, अर उसके गेल्या रहण म्हे राज्जी हो, तो वा धणी नै तलाक ना देवै।

14 बिश्वासी पत्नी होण के कारण अबिश्वासी पति ताहीं भी परमेसवर अपणे ए लोग मान्ने है, क्यूँके उसकी पत्नी बिश्वासी है, इस्से तरियां जै बिश्वासी पति हो तो उसके कारण अबिश्वासी पत्नी ताहीं भी परमेसवर अपणे ए लोग मान्ने है, क्यूँके उसका पति बिश्वासी है, जै यो सच न्ही होन्दा तो थारा अबिश्वासी पति या पत्नी परमेसवर के न्ही कुहान्दे, अर थारे बाळ-बच्चे भी परमेसवर के न्ही कुहान्दे, पर इब वे परमेसवर के कुह्वावै है।

15 पर जो माणस बिश्वास कोनी राखदा, अर जै वो तलाक देणा चाहवै, तो उस ताहीं तलाक देण वो, इसी दशा म्हे बिश्वासी भाई या भाण ब्याह के बन्धन तै आजाद हो जावै है। क्यूँके परमेसवर नै म्हारे ताहीं मेळ-मिलाप के खात्तर बुलाया है।

16 क्यूँके हे बिबान्नी, तू के जाणै से के तू अपणे धणी का उद्धार करा लेवैगी? अर हे भले माणस, तू के जाणै से के तू अपणी पत्नी का उद्धार करा लेवैगा?

~~~~~

17 परमेसवर नै जिस ताहीं जिस दशा म्हे राख्या है, अर जिस रूप म्हे मसीह पै बिश्वास करण खात्तर बुलाया है, वो उस्से म्हे बणया रहवै। मैं सारी कलीसियां ताहीं योए सुझाव देऊँ सूं।

18 जो यहूदी माणस परमेसवर पै बिश्वास करै है, उस ताहीं खतने के निशान नै हटाण की जरूरत कोनी, अर जो गैर यहूदी माणस परमेसवर पै बिश्वास करै है, उस ताहीं खतना करवाण की जरूरत कोनी।

19 इस बात तै कोए फर्क न्ही पड़ता के किसे माणस का खतना होया है या कोनी होया, पर सब तै जरूरी बात या है, के वो परमेसवर के हुकमां नै मान्ने।

20 हरेक माणस मसीह बणण तै पैहले जिस हालत म्हे बुलाया गया हो, उस्से हालत म्हे रहवै।

21 जै तू गुलाम की हालत म्हे बुलाया गया है, तो फिक्र ना करै, पर जै तू आजाद हो सकै, तो तू आजाद होण की कोशिश कर।

22 क्यूँके जो दास की हालत म्हे मसीह पै बिश्वास करण खात्तर बुलाया गया है, वो मसीह का आजाद करणा होया है। उस्से तरियां ए जो आजादी की हालत म्हे बुलाया गया है, वो मसीह का दास है।

23 परमेसवर नै थम दाम देकै मोल लिये हो, इस करके थम माणसां के दास न्ही, पर परमेसवर के दास बणो।

24 मैं दुबारा तै कहूँ सूं, हे बिश्वासी भाईयो, मसीह पै बिश्वास करण तै पैहले थम जिस हालत म्हे बुलाये गये थे, विवाहित या अविवाहित उस्से हालत म्हे परमेसवर के गेल्या रहों।



25 अविवाहितां कै बारै म्ह प्रभु का कोए हुकम मन्नै कोनी मिल्या, पर प्रभु नै दया करके मेरे ताहीं बुद्धि दी सै, जिसपै भरोस्सा करया जा सके सै, अर मै थमनै सलाह देऊँ सूं।

26 मेरी समझ म्ह यो ठीक सै के आजकाल के क्लेश कै कारण, जै माणस कुवारा सै, तो वो कुवारा ए रहवै।

27 जै तेरी पत्नी सै, तो उसनै तलाक देण की कोशिश ना करै, अर जै तेरे पत्नी कोन्या, तो अपणे खात्तर उसनै टोहवै ना।

28 पर जै तू ब्याह भी करै, तो पाप कोनी, अर जै कोए कुंवारी छोरी ब्याह करै सै, तो यो कोए पाप कोनी। हालाकि शादीशुदा माणस इस दुनिया म्ह भोत सी परेशानियाँ का सामना करैगें, अर मै चाहूँ सूं के थम इन परेशानियाँ म्ह ना पड़ो।

29 हे बिश्वासी भाईयो, मेरा मतलब यो सै के मसीह के आण का बखत थोड़ा ए बाक्की रह गया सै, इस करके आज तै या चिन्ता ना करो के थारी पत्नी सै या न्ही, पर परमेसवर की सेवा म्ह लागगे रहो।

30 रोण आळे, आनन्द करण आळे, अर चिज्जां नै मोल लेण आळे इन चिज्जां के बारें म्ह घणा ना सोचवै, क्यूँके इन सारी बाततां की फिकर थमनै परमेसवर की सेवा तै भटका देवैगी।

31 जो भी इस दुनिया म्ह सै, उननै अपणे खात्तर ज्यादा कीमती ना समझों, क्यूँके दुनिया की सारी चीज नाश हो जावैगी।

32 मेरी इच्छा या सै के थम संसारिक जिन्दगी की अभिलाषा तै मुक्त रहों। कुंवारे माणस प्रभु की सेवा करण की फिकर म्ह रहवै सै के प्रभु ताहीं किस तरियां खुश करै।

33 पर ब्याहता माणस दुनिया की चिज्जां की फिकर म्ह रहवै सै, के अपणी पत्नी नै किस तरियां तै खुश करै।

34 कुंवारी अर ब्याहता बिरबान्नी म्ह भी फर्क सै, कुंवारी बिरबान्नी प्रभु की सेवा की फिकर म्ह रहवै सै, अर वा देह अर आत्मा म्ह पवित्तर रहण की कोशिश कर दी रहवै सै, पर ब्याहता बिरबान्नी दो बाततां की फिकर म्ह रहवै सै, के अपणे पति नै किस तरियां खुश राखवूँ, अर परमेसवर नै किस तरियां खुश राखवूँ।

35 मै या बात थारी ए भलाई खात्तर कहूँ सूं, ना के थमनै फसाण के मारे, बल्के ज्यातै के जिसा शोभा देवै सै, उसाए करया जावै, के थम एक चित्त होके प्रभु की सेवा म्ह लागगे रहो।

36 जै किसे पिता नै यो लागगै के मै अपणी कुंवारी बेट्टी के ब्याह म्ह देर करके उसके गैल अन्याय करूँ सूं, क्यूँके उसकी उमर ढलण लागरी सै, तो वो वोए करै जो उसनै ठीक लागगै सै, वो उसनै ब्याह करण दे, यो कोए पाप कोनी।

37 पर जिस पिता नै मन म्ह यो ठान लिया सै, के वो अपणी छोरी का ब्याह कोनी करै, तो उस ताहीं कोए उसका ब्याह करण खात्तर मजबूर ना करै, यो उसका हक सै जो वो चाहवै वोए करै, अर वो अपणी छोरी नै कुवारी ए राख सके सै।

38 ज्यातै जो अपणी कुवारी छोरी का ब्याह कर देवै सै, तो वो सही करै सै, अर जो ब्याह न्ही करदा, वो और भी सही करै सै।

39 बिरबान्नी जिब ताहीं धणी कै गैल बंधी रहवै सै, जिब ताहीं के उसका धणी जिन्दा सै, पर जै उसका धणी मर जावै तो जिसतै चाहवै वा ब्याह कर सके सै, पर वो परमेसवर पै बिश्वास करण आळा हो।

40 पर जै वा दुबारा ब्याह ना करै, तो मेरै विचार म्ह और भी ज्यादा सुखी सै, अर मै समझूँ सूं, के परमेसवर का आत्मा मेरी अगुवाई करै सै।

8

XXXXXXXXXX XXXXXX XXXXXXX XXX XXXX

1 धारी चिट्ठियाँ म्हे मूर्तियाँ के आगुँ चढ़ाई होइ चिज्जाँ के खाण के बारे म्हे थमनै पूछ्ठा था। हम सारया नै इस बात के बारे म्हे कुछ ज्ञान सै। ज्ञान म्हारे म्हे घमण्ड पैदा करै सै, पर प्यार तै बढ़ोतरी होवै सै, अर प्यार म्हारे ताहीं दुसरयाँ की मदद करणा सिखावै सै।

2 जै कोए समझै सै के वो सब कुछ जाणै सै, तो वो इब ताहीं यो कोनी जाणता के किस तरियाँ जाणणा चाहिये।

3 पर जै कोए परमेसवर तै प्यार करै सै, तो परमेसवर भी उस ताहीं जाणै सै।

4 मूर्तियाँ के स्याम्ही बलि करी होई चिज्जाँ के खाण के बारे म्हे हम जाणा साँ, के दुनिया म्हे कोए भी मूर्ति सच्चा परमेसवर कोनी, क्यूँके एकेए सच्चा परमेसवर सै।

5-6 फेर भी धरती अर अकास पै भोत सै, जिन ताहीं लोग ईश्वर अर देवता कहवै सै, पर म्हारे खात्तर तो एकेए परमेसवर सै। यानिके पिता जिसकी ओइ तै सारी चीज सै, अर हम उस्से के खात्तर साँ। एकेए प्रभु सै, यानिके यीशु मसीह जिसके जरिये सारी चीज बणाई गई, अर हम भी उस्से के जरिये जिन्दे साँ।

7 पर म्हारे कुछ बिश्वासी भाईयाँ नै इब ताहीं बेरा कोनी के मूर्तियाँ म्हे कोए शक्ति कोनी। क्यूँके वे पैहले मूर्तियाँ की पूजा करै थे, जिव वे मूर्तियाँ ताहीं दी गई बलि म्हे तै खावै सै, तो गलती तै इब भी मूर्तियाँ की पूजा करण म्हे शामिल सै, अर गलती तै सोचवै सै के उननै पाप कर दिया जिव वे मूर्ति के स्याम्ही चढ़ाई चीज खा लेवै सै।

8 खाणा हमनै परमेसवर के लोवै कोनी पोहोचान्दा। खाण तै इन्कार करण तै परमेसवर म्हारे तै खुश न्ही होन्दा, अर ना ए खाणा म्हारे ताहीं परमेसवर की निगाह म्हे आच्छा बणादा।

9 पर सावधान! इसा ना होवै के धारी या आजादी कदे बिश्वास म्हे कमजोर लोग्गाँ खात्तर टोक्कर का कारण हो जावै।

10 थम जाणो सों के मूर्त असली देवता कोनी, अर थम मूर्तां के मन्दर म्हे खाओ सों, पर जो बिश्वास म्हे कमजोर आदमी थारे ताहीं ओइ खान्दे देखवै सै तो वो उत्साहित होवैगा, ताके मूर्ति के स्याम्ही बलि करया गया माँस वो खावै, जिव के उस ताहीं बेरा सै के यो पाप सै, जै वो इसा काम करै सै।

11 इस तरियाँ तै तेरे ज्ञान के कारण वो बिश्वास म्हे कमजोर भाई जिसके खात्तर मसीह मरया, मसीह म्हे बिश्वास करणा छोड़ देवैगा।

12 इस तरियाँ तै बिश्वासी भाईयाँ के खिलाफ अपराध करण तै अर उनकी कमजोर अन्तरात्मा ताहीं चोट पोहोचान तै, थम मसीह के खिलाफ अपराध करो सो।

13 इस कारण जै मूर्तियाँ ताहीं दिया गया खाणा खाण तै दुसरे बिश्वासियाँ खात्तर बिश्वास छोड़ण का कारण बणै सै, तो मै उस तरियाँ का खाणा कदे न्ही खाऊँगा ताके दुसरे बिश्वासी भाई बिश्वास करणा ना छोड़ दे।

9

XXXXXXXXXX XXXXXX XXXXXXX XXX XXXX

1 जो मै चाहूँ सूँ, वो सब कुछ करण खात्तर मै आजाद सूँ, मै प्रेरित सूँ। मन्नै म्हारे प्रभु यीशु ताहीं देख्या सै, थम प्रभु म्हे मेरी मेहनत का ईनाम सों।

2 जै दुसरे माणस या न्ही मानते के मै प्रभु यीशु का प्रेरित सूँ, तो भाईयो थमनै बिश्वास करणा होगा, क्यूँके मै वो सूँ, जो थारे धौरे सुसमाचार लेके आया। थारा प्रभु यीशु मसीह म्हे बिश्वास यो बतावै सै के मै प्रेरित सूँ।

3 जो माणस मेरे प्रेरित होण पै शक करै सै, उनके खात्तर योए मेरा जवाब सै।

4 बरनबास अर मेरे खात्तर, प्रेरित होण के कारण म्हारे ताहीं यो हक सै, के हम अपने काम के खात्तर थारे तै आर्थिक मदद ले सका सां।

5 के हमने यो हक कोनी, के किस मसीह भाण के गेल्या ब्याह करके उस ताहीं अपने गैल सफर म्ह लेके जावां, जिसा दुसरे प्रेरित अर प्रभु का भाई याकूब, यहूदा अर पतरस करै सै।

6 मेरै अर बरनबास के धारे भी यो हक सै, के हम और प्रेरितां के स्याम्ही आर्थिक मदद हासिल करां अर म्हारे ताहीं जीण खात्तर कोए काम करण की जरूरत कोनी।

7 कौण सा फौज्जी अपने खर्च तै जंग लडै सै? कौण अंगूर का बाग लगाके उसका फळ न्ही खान्दा? कौण भेड्डां की रुखाळी करके उनका दूध कोनी पीन्दा?

8-9 मै इन बाततां नै सिर्फ माणस होण के नाते कोनी कहन्दा। मूसा नबी के नियम-कायदे भी योए कहवै सै, क्यूँके मूसा नबी के नियम-कायदे म्ह लिख्या सै, “नाज लिकाइते बखत चाल्दे होए बळ्ठ का मुँह ना बाँधियो।” के परमेसवर बळ्ठां की ए फिकर करै सै?

10 यो खास करके म्हारे खात्तर कह्या गया सै, हाँ, म्हारे खात्तर ए लिख्या गया सै, क्यूँके यो जरूरी सै, के खेत बाहण आळा अर खलिहाण म्ह, भूसी तै नाज अलग करण आळा फसल का कुछ हिस्सा पाण खात्तर तो आस राखवै ए गा।

11 हमनै परमेसवर के सुसमाचार का प्रचार थारे बीच म्ह करया। उस माणस की ढळ जो पौधे लगावै सै, हमनै थारे भित्तर परमेसवर के सन्देश ताहीं लगाया सै। इस करके यो म्हारा हक सै, के म्हारी आर्थिक जरूरतां के खात्तर हम थारी मदद हासिल करां।

12 थमनै दुसरे माणसां की भी आर्थिक मदद करी, जिननै थारे ताहीं सुसमाचार सुणाया था, बरनबास अर मै उनतै भी ज्यादा आर्थिक मदद पाण का हक राख्वां सां, हालाकि, म्हारे म्ह तै किसे नै भी जोर कोनी दिया के थम उन चिज्जां नै द्यो जिनकी हमनै जरूरत सै। बल्के हम सब कुछ सहण खात्तर तैयार सां, ताके हम किसे ताहीं भी मसीह के बारे म्ह सुसमाचार पै बिश्वास करण म्ह अडचन पैदा ना करा।

13 के थमने न्ही बरा के जो मन्दर म्ह काम करण आळे सै, वे मन्दर म्ह तै खाणा खावै सै? पर जो वेदी* पै बलि चढ़ावै सै वे बलिदानां का हिस्सा लेवै सै?

14 इससे तरियां तै प्रभु नै भी ठहराया के जो माणस सुसमाचार सुणावै सै, उनकी जिन्दगी का गुजारा उन माणसां तै होणा चाहिए जो सुसमाचार सुणै सै।

15 पर मन्ने इन म्ह तै किसे भी अधिकार का इस्तमाल कोनी करया, अर ना ए मै इस मकसद तै लिखूँ सूँ, के मेरै खात्तर इसा कुछ करया जावै। बजाये इसके, के कोए मन्ने, मेरी इस बात के गर्व तै अलग करै। इसतै आच्छा मै मर जाणा समझूँगाँ।

16 जै मै सुसमाचार सुणाऊँ, तो इस म्ह मन्ने गर्व करण का कोए हक कोनी। या तो मेरै ताहीं सौप्री गई जिम्मेदारी सै। जै मै सुसमाचार न्ही सुणाऊँ, तो मेरै पै धिक्कार सै!

17 जै मै यो काम करूँ सूँ, जो मन्ने अपनी मर्जी तै चुण्या सै, तो मेरे ताहीं एक ईनाम मिलेगा, अर जै या मेरी अपनी मर्जी कोनी, पर एक जिम्मेदारी सै, जो मेरे ताहीं परमेसवर की ओड़ तै मिली सै, तो मै किसे भी ईनाम की उम्मीद न्ही कर सकता।

18 तो मेरी कौण सी मजदूरी सै? या मेरी खुशी सै, के बिना भुगतान के मै सुसमाचार का प्रचार करण लागरया सूँ, मेरै धारै खर्चा मांगण का भी हक सै।

19 इसका मतलब यो कोनी के मै माणसां का कहणा मान्नु, भलाए वे लोग मेरी आर्थिक मदद करै सै, पर मै इसके खात्तर मजबूर कोनी, फेर भी मै हरेक किसे का दास बणग्या सूँ, ताके उन ताहीं मसीह के धारे ल्या सकूँ।

20 जिब मै यहूदी नियम-कायदा नै मानण आळा था, तो मै भी उन नियम-कायदा के अधीन था, मै यहूदी माणसां के खात्तर यहूदी बणया, ताके यहूदी माणसां नै परमेसवर के धारे ले आऊँ। भलाए

* 9:13 9:13 वेदी-परमेसवर ताहीं भेट चढ़ाण खात्तर एक जगहा

मेरे ताहीं नियम-कायदे मानण की जरूरत कोनी, फेर भी मन्ने इसा करया, ताके मै उन ताहीं मसीह के धौरे ल्या सकूँ जो नियम-कायदा के अधीन सै।

21 इस्से तरियां जिब मै गैर यहूदी माणसां के गैल काम करूँ सूँ, तो मै एक गैर यहूदी की तरियां रहूँ सूँ, जो यहूदी नियम-कायदा नै कोनी मानते, ताके मै उन ताहीं मसीह खात्तर जीत सकूँ। पर मन्ने बेरा था के मै परमेसवर के नियम-कायदा के बिना न्ही रहूँ था, क्यूँके मै मसीह के नियम-कायदा के अधीन सूँ।

22 जिब मै उन माणसां के गैल सूँ जिनका विश्वास कमजोर सै, तो मै उनकी तरियां बरताव करूँ सूँ, ताके मेरी कोशिश के जरिये कुछ माणसां का उद्धार हो जावै।

23 मै यो सब कुछ सुसमाचार के खात्तर करूँ सूँ ताके उन आशीषां का हिस्सेदार बण सकूँ जिनका वादा सुसमाचार म्ह करया गया सै।

~~~~~

24 के थमने न्ही बेरा के दौड़ म्ह तो भाज्जे सारे ए सै, पर ईनाम एक ए ले जावै सै? इस्से तरियां, हम सब नै वो करणा चाहिए जो हम परमेसवर ताहीं खुश करण के खात्तर कर सका सां ताके हम उस ईनाम नै पा सका जो परमेसवर आण आळे बखत म्ह देवैगा।

25 हरेक खिलाड़ी जो प्रतियोगिता म्ह भाग लेवै सै, कटोर संयम का पालन करै सै। वे तो एक (नाशवान) नाश होण आळे मुकुट नै पाण के मकसद तै यो सब करै सै, पर हम यो सब कुछ (अविनाशी) नाश ना होण आळे मुकुट नै पाण खात्तर करां सां।

26 इस करके जिसा दौड़ण आळा अपने मकसद के गैल दौड़े सै, अर जिस तरियां मुक्केबाज अपने मुक्कयां नै अपने अधीन राक्खै सै, उस्से तरियां मै भी अपनी मसीह जिन्दगी नै एक मकसद के गैल जीण लागरया सूँ।

27 मै अपनी देह नै मसीह के अधीन राक्खूँ सूँ, ताके मै अपनी बुरी इच्छा नै पूरी ना करूँ, मै जो दुसरे माणसां खात्तर सुसमाचार का प्रचार करण लाग रह्या सूँ, अर मै खुद ईनाम के खात्तर अयोग्य करार हो जाऊँ।

## 10

~~~~~

1 हे बिशवासी भाईयो, मै न्ही चाहन्दा के थम इस बात तै अनजाण रहो के म्हारे सारे पूर्वजां के गैल जंगल-बियावान म्ह के होया। परमेसवर नै उन सारया की एक बाढ़ळ के जरिये अगुवाई करी, जो उनके आगै-आगै चाल्लै था, अर उन ताहीं लाल समुन्दर के बिचाळे तै इस तरियां तै पार लेग्या, जिस तरियां सुखी धरती पै ले जाया गया हो।

2 मूसा नबी के पाच्छे, चाल्लण के कारण, उन सारया नै बाढ़ळ म्ह अर समुन्दर म्ह बपतिस्मा ले लिया था।

3 उन सारया नै वो खाणा खाया जो परमेसवर नै सुगं तै दिया था।

4 उनने वो पाणी पिया जो पत्थर की चट्टान तै लिकड्या था, पत्थर की चट्टान की तुलना हम मसीह के गैल कर सका सां, जो उनके गैल चाल्लै था, अर उन ताहीं जीवन देवै था।

5 पर परमेसवर उन म्ह तै घणखरयां तै राज्जी कोन्या होया, ज्यातै वे जंगल-बियावान म्ह ढेर होगये।

6 ये बात म्हारै ताहीं चेतावनी के रूप म्ह दी सै, ताके हम बुरे काम्मां की लालसा ना करां।

7 अर ना थम मूर्ति पूजणीये बणो, जिस तरियां के उन म्ह तै कितने बणगे थे, जिसा पवित्र ग्रन्थ म्ह लिख्या सै, “लोग एक दावत म्ह खाण-पीण नै बेदटे, अर फेर भोगविलास के काम करण खात्तर उटगे।”

8 अर ना हम जारी करा, जिसा उन म्ह तै कितन्यां नै करी, अर एक दिन म्ह तेईस हजार मरगये।

9 अर ना हम प्रभु नै परखां, जिसा उन म्ह कितन्यां नै करया, अर साँपां के जरिये मरगे।

10 अर ना थम कुडकुड़ाओ, जिस तरियां तै उन म्ह कितने कुडकुड़ाए, अर नाश करण आळे सुर्गदत्तां के जरिये मारे गये।

11 पर ये सारी बात, जो उनचै आण पड़ी, चेतावनी की तरियां थी, वे म्हारी चेतावनी के खात्तर जो दुनिया के आखरी बखत म्ह रहवै सै, लिक्खी गई सै।

12 इस करकै जै कोए इसा माणस सै जो कहन्दा हो, के परमेसवर पै उसका भरोस्सा अटूट सै, तो उसनै सावधान रहणा चाहिए, के वो चाणचक किसे इम्तिहान म्ह ना पड़ जावै अर वो पाप ना कर वेट्टै।

13 पाप करण की इच्छा पक्की हम सब के धोरै आवै सै। पर परमेसवर साच्चा अर विश्वास लायक सै, वो थमने सामर्थ तै बाहर इम्तिहान म्ह कोनी गरेगा, जो माणस के सहण तै बाहरणे सै, बल्के वो थमनै शक्ति देवैगा के थम पाप ना करो।

~~XXXXXXXXXX XX XXXXXXXX XXXXXXXX~~

14 इस कारण, हे मेरे प्यारे दोस्तों, मूर्तिपूजा तै बचे रहो।

15 मै अकलमंद जाणकै थारे तै कहूँ सूँ, जो मै कहूँ सूँ, उसके बारे म्ह सोच्चों के वो सही सै या गलत।

16 जब हम उसके कटोरे म्ह तै (अंगूर का रस) पीवां सां, जिस ताहीं हम प्रभु भोज म्ह इस्तमाल करां सां, जिसके खात्तर हम परमेसवर का धन्यवाद करा सां, हम असलियत म्ह मसीह के लहू म्ह साझी होण लागरे सां, अर जब हम रोट्टी तोड़ा सां अर इस ताहीं खावां सां, तो हम असलियत म्ह मसीह के देह म्ह साझा करण लागरे सां।

17 जब के सिर्फ एकैए रोट्टी सै, जो मसीह सै, भलाए हम घणे सां, फेर भी हम एक देह बण जावां सां, क्यूँके हम सब एक रोट्टी म्ह तै ए खावां सां।

18 इस्राएल के माणसां के बारे म्ह सोच्चों, जब वे सारे माणस खावै सै, जो परमेसवर ताहीं चढ़ाया जावै सै, उसतै वे परमेसवर की आराधना म्ह शामिल हो जावै सै, इस्से तरियां जो वो खाणा खावै सै, जो मूर्ति के आगू चढ़ाया जावै सै, तो वो भी मूर्ति की आराधना म्ह शामिल होवै सै,

19 मेरे कहण का मतलब के सै? यो सै के मूर्ति असलियत म्ह देवता सै, जिनके खात्तर बलिदान करे जावै सै अर के इस बलिदान की कोए अहमियत सै?

20 न्ही, बल्के जो माणस मूर्तियाँ नै बलिदान करै सै, वे परमेसवर के खात्तर न्ही पर ओपरी आत्मायाँ के खात्तर बलिदान करै सै, अर मै न्ही चाहन्दा के थम ओपरी आत्मायाँ के गैल-साइझी होवो।

21 यो थारे खात्तर ठीक कोनी के, थम वो खाओ अर पीओ सां, जो ओपरी आत्मायाँ ताहीं चढ़ाया जावै सै, अर वो भी खाओ अर पीओ सां, जो हमनै प्रभु की मौत की याद दुवावै सै।

22 जै हम इसा करां सां, तो हम परमेसवर नै घणा गुस्सा दुवावां सां, अर हम परमेसवर तै घणे ताकतवर कोनी।

~~XXXX XXXX XXXXXXXX XX XXXX XX XXXXXX~~

23 हम सब कुछ करण खात्तर आजाद सां, हम कहवां सां, हाँ, पर सब कुछ म्हारे खात्तर आच्छा कोनी, हम सब कुछ करण खात्तर आजाद सां, पर सब कुछ म्हारे विश्वास नै कोनी बढ़ाते।

24 कोए अपनी ए भलाई नै न्ही, बल्के औरां की भलाई के बारे म्ह सोच्चों।

25 हालाकि जब थम कस्साइयाँ धोरै माँस लेण खात्तर बजारां म्ह जाओ सां, तो उनतै या ना पूच्छो, के यो मूर्तियाँ के आगू चढ़ाया गया सै या न्ही, अर इसतै थारी अन्तरात्मा भी दुखी न्ही होगी।

26 थम इस करके खा सको सां क्यूँके पवित्र ग्रन्थ कहवै सै, “क्यूँके धरती अर धरती पै जो कुछ भी सै सब कुछ प्रभु का सै।”

27 जै अविश्वासियाँ म्ह तै कोए थमनै न्योदा देवै, अर थम खाण खात्तर जाणा चाहो, तो जो किमे थारे स्याम्ही धरया जावै वोए खा ल्यो, अर थमनै यो न्ही पूच्छणा चाहिए, के यो चढ़ावा सै या न्ही, ताके चढ़ावा हो तो थम खुद नै दोषी महसूस कोनी करोगे।

28 पर जै कोए थारे तै कहवै, “यो खाणा तो मूर्ति ताहीं बलि करया गया था,” तो इस ताहीं अपनी अन्तरात्मा के कारण न्ही, बल्के थमनै बताण आळे माणस की अन्तरात्मा के कारण इसनै ना खाओ।

29 मै थारी अन्तरात्मा के बारे म्ह न्ही, पर उस बताण आळे माणस की अन्तरात्मा बारे म्ह कहूँ सूं। जै थम खाण की आजादी पै जोर देओ सों, अर दुसरे माणस नै लागगै सै के यो पाप सै, तो उसका के फायदा सै? कुछ भी तो कोनी।

30 जै मै मूर्तियाँ के आगै चढ़ाई होए चीज ताहीं धन्यवाद करके खाणे म्ह शामिल होऊँ सूं, तो उसके खात्तर मेरे पै दोष क्यूँ लगाया जावै सै, जिसके खाणे खात्तर मनै परमेसवर के प्रति धन्यवाद जाहिर करया?

31 सारी बाततां का निचोड़ यो सै के थम चाहे खाओ, चाहे पीओ, चाहे जो किमे करो, सारा किमे परमेसवर की महिमा के खात्तर करो।

32-33 मै जो कुछ भी करूँ सूं, हरेक ताहीं खुश करण की कोशिश करूँ सूं, अपने-आप का भला कोनी सोचदा, बल्के सबके भले के खात्तर सोचुँ सूं, ताके वो बचाए जा सकै। उस्से तरियां थम भी इस्से तरियां जिओ, ताके यहूदी, गैर यहूदी अर परमेसवर की कलीसिया के माणसां के खात्तर उद्धार पाण म्ह रुकावट ना बणो।

11

1 जिस तरियां मै मसीह के जिसी चाल चाल्लुँ सूं, थम भी मेरी सी चाल चाल्लों।

XXXXXXXXXX XXX XXX XXXX

2 हे विश्वासी भाईयो, मै थारी तारीफ करूँ सूं। क्यूँके थम मेरे ताहीं हर बखत याद करो सों, अर जितनी शिक्षा मनै थारे ताहीं दी सै, उनका सावधानी तै पालन करते रहों।

3 पर एक बात सै जो मै चाहूँ सूं के थम उसनै जाण ल्यो, वा या सै के हरेक माणस का सिर मसीह सै, अर बिरबान्नी का सिर उसका धणी सै, अर मसीह का सिर परमेसवर सै।

4 जब थम कलीसिया म्ह कटटे होओ सों, तो जो माणस सिर ढके होए प्रार्थना या भविष्यवाणी करै सै, वो मसीह का अपमान करै सै।

5 पर जो बिरबान्नी उघाड़े सिर प्रार्थना या भविष्यवाणी करै सै, इसका मतलब सै के वा अपने धणी का अपमान करै सै, क्यूँके वा गन्जी होण के बरोब्बर सै।

6 जै बिरबान्नी ओढ़णी ना ओढ़े तो बाळ भी कटवा लेवै, जै बिरबान्नी के खात्तर बाळ कटवाणा या गन्जी होणा बड़े शर्म की बात सै, तो ओढ़णी ओढ़े।

7 हाँ, एक माणस नै सिर ढक्कण की जरूरत कोनी, क्यूँके परमेसवर नै उस ताहीं खुद के समान बणा दिया सै, अर उस ताहीं अपने जिसा सुभाव अर महिमा दी सै, पर बिरबान्नी मर्द की शोभा सै।

8 क्यूँके पैहला माणस बिरबान्नी तै न्ही होया, पर पैहली बिरबान्नी हव्वा, माणस तै होई।

9 परमेसवर नै पैहले माणस ताहीं बिरबान्नी की मदद करण खात्तर न्ही बणाया था, बल्के उसनै बिरबान्नी ताहीं बणाया ताके माणस की मदद करै।

10 अर इस बजह तै सुर्गदूतां की मौजूदगी के कारण बिरबान्नी खात्तर जरूरी सै, के अधिकार के रूप म्ह उसनै अपने सिर पै कुछ ओढ़णा चाहिए।

11 फेर भी प्रभु म्ह ना तो बिरबान्नी माणस तै, अर ना माणस बिना बिरबान्नी तै आजाद सै।

12 भलाए परमेसवर नै पैहले इन्सान तै पैहली जनानी बणाई, अर या जनानी ए सै जो इन्सान नै जन्म देवै सै, पर सारी चीज परमेसवर तै सै।

13 थम आप ए विचार करो, के कलीसिया म्ह बिरबान्नी नै उघाड़े सिर परमेसवर तै प्रार्थना करणा शोभा देवै सै?

14 के सुभाव के तौर पै भी थमनै न्ही बेरा के जै माणस लाम्बे बाळ राक्खै, तो उसके खात्तर अपमान सै।

15 पर जै लुगाई लाम्बे बाळ राक्खै तो उसकै खात्तर शोभा सै, क्यूँके बाळ उसकी ओढ़णी के खात्तर दिए गये सै।

16 पर जै कोए मेरे तै सहमत कोनी, तो म्हारे धोरे अर परमेसवर की कलीसिया के धोरे आराधना करण का इसके अलावा कोए और रिवाज कोनी।

?????-???? ?? ????? ???

17 इब जो बात मै थारे ताहीं बताऊँ सूँ, उसकै खात्तर मै थारी बड़ाई कोनी करदा, ज्यातै के थारे कट्टे होण तै भलाई न्ही, पर नुकसान होवै सै।

18 क्यूँके मेरे सुणण म्ह आया सै, के जिब थम कलीसिया म्ह आराधना के खात्तर कट्टे होवो सों, तो थारे म्ह फूट होवै सै, अर मै मान्नु सूँ के यो सच सै।

19 पर यकीनन थारे बीच बटवारा होणा चाहिए, ताके जिनकै धोरे परमेसवर की मंजूरी सै, उन ताहीं पिच्छाणा जावै।

20 आखर म्ह थम जो एक जगहां म्ह कट्टे होवो सों, म्हारे प्रभु यीशु मसीह की मौत नै याद करण के खात्तर होओ सों, यो प्रभु-भोज खाण के खात्तर न्ही।

21 क्यूँके खाण के बखत एक-दुसरे तै पैहल्या अपना खाणा खा लेवै सै, इस ढाळ कोए तो भूक्खा रहवै सै अर कोए मतवाला हो जावै सै।

22 के खाण-पीण के खात्तर थारे घर कोनी? या थम परमेसवर की कलीसिया का तिरस्कार अर गरीबां नै शर्मिन्दा करण पे तुलें होए सों? इब मै थारे तै के कहूँ? के इस बात म्ह थारी बड़ाई करूँ? ना! बिलकुल न्ही।

23 मन्नै थारे ताहीं जितनी शिक्षा दी सै वोए शिक्षा सै, जो मन्नै परमेसवर की ओड़ तै मिली थी, के प्रभु यीशु जिस रात पकड़ाया गया, रोट्टी लेई,

24 अर परमेसवर का धन्यवाद करके उसनै तोड़ी अर कहा, “या मेरी देह सै, जो थारे खात्तर सै: मेरी यादगारी खात्तर न्यूए करया करो।”

25 इसे तरियां उसनै खाणे के बाद अंगूर के रस का कटोरा भी लिया अर कहा, “यो कटोरा मेरे लहू म्ह नया करार सै: जिब कदे पीओ, तो मेरी यादगारी के खात्तर न्यूए करया करो।”

26 क्यूँके जिब कदे थम या रोट्टी खाओ अर इस कटोरे म्ह तै पीओ सो, तो प्रभु की मौत नै जिब ताहीं वो न्ही आवै, प्रचार करदे रहो।

27 ज्यातै जो कोए इस तरिके तै प्रभु की रोट्टी खावै या उसके कटोरे म्ह तै पीवै, जिसतै मसीह का आनदर हो, तो वो प्रभु की देह अर लहू के बिरुध पाप करे सै।

28 ज्यातै माणस अपने-आप ताहीं जाँच लेवै अर इस्से तरियां तै इस रोट्टी म्ह तै खावै, अर इस कटोरे म्ह तै पीवै।

29 क्यूँके जो खाँदे-पिँदे बखत प्रभु की देह* के साथ अपने रिश्ते नै न्ही पिच्छाणता, वो इस खाणे अर पीणे तै अपने उप्पर दण्ड ल्यावै सै।

30 अर दण्ड की शरुआत थारे बीच हो ली सै, इस्से कारण थारे म्ह तै घणखरे कमजोर अर बीमार सै, अर घणखरे मर भी गये।

31 जै हम अपने-आपनै जाँचदे तो दण्ड न्ही पादे।

32 पर प्रभु म्हारे ताहीं दण्ड देके म्हारी ताड़ना करे सै, ज्यातै के हम न्याय के दिन दुसरे माणसां के साथ दंडित ना करे जावां।

33 इस करके, हे बिशवासी भाईयो, जिब थम प्रभु भोज खाण खात्तर कट्टे होओ सो, तो एक-दुसरे के खात्तर ठहरे रहो, ताके थम मिलके प्रभु भोज खा सको।

* 11:29 11:29 प्रभु की देह कलीसिया नै बोल्ले सै

34 जै कोए भूक्खा हो तो अपने घर म्ह खा लेवै, ताके जिब थम एक साथ आओगे, तो थम सही तरियां तै बरताव करोगे, अर परमेसवर थारा न्याय कोनी करैगा। दुसरी बाततां नै मै जिब्बे सुलझाऊंगा जिब आऊंगा।

12

?????? ?????

1 हे विश्वासी भाईयो, इब पवित्र आत्मा के जरिये दी गई उन खुबियां तै तालुकात राखती उन बाततां के बारे म्ह मै न्ही चाहन्दा के थम अनजाण रहो।

2 थम जाणो सो, के प्रभु म्ह विश्वास करण तै पैहले थम किसे थे, कोए थमनै राह दिखावै था ताके थम मूर्तियाँ की पूजा कर सको जो बोल न्ही सकदी।

3 ज्यातै मै थमनै बताणा चाहूँ सूँ, के जो कोए परमेसवर की आत्मा की अगुवाई तै बोल्लै सै, वो न्ही कहन्दा के यीशु श्रापित सै, अर ना कोए पवित्र आत्मा कै बिना कह सकै सै के यीशु प्रभु सै।

4 आत्मिक वरदान तो कई ढाळ के सै, पर या पवित्र आत्मा ए सै जो इन सबका भण्डार सै।

5 अर काम भी कई ढाळ के सै, जो हम परमेसवर खात्तर करा सां, पर हम सब एकैए परमेसवर की सेवा करा सां।

6 परमेसवर म्हारी जिन्दगी म्ह कई ढाळ के तरिककां तै काम करै सै, पर यो वोए परमेसवर सै, जो हमनै उसके काम करण की काबलियत देवै सै।

7 एक इसी काबलियत सै जो म्हारे म्ह तै हरेक ताहीं दी जावै सै, जो पवित्र आत्मा की मौजूदगी नै दिखावै सै ताके हम अपने संगी विश्वासियाँ की मदद कर सका।

8 परमेसवर की आत्मा एक माणस ताहीं बुद्धि तै भरा सन्देश बोल्लण की काबलियत देवै सै, अर वाए आत्मा किसे दुसरे माणस नै ज्ञान तै भरा सन्देश बोल्लण की काबलियत देवै सै।

9 वो एक माणस ताहीं मसीह म्ह मजबुत्ती तै विश्वास करण की काबलियत देवै सै, अर दुसरे माणस ताहीं आत्मा, बीमार लोगगां नै ठीक करण की काबलियत देवै सै।

10 किसे ताहीं सामर्थ के काम करण की ताकत, अर किसे ताहीं भविष्यवाणी की, अर किसे ताहीं आत्मायाँ की परख, अर किसे ताहीं घणी ढाळ की भाषा, अर किसे ताहीं भाषायां का मतलब बताणा की काबलियत दी।

11 पर ये परमेसवर की आत्मा सै, जो सारी काबलियत का भण्डार सै, अर वो हर किसे नै बाट देवै सै, जिसा वो चाहवै सै।

??? ? ? ? ? ?

12 जिस तरियां देह के भोत सारे अंग होवै सै, पर भोत सारे अंग मिलकै एक देह नै बणावै सै, उस्से ढाळ मसीह देह सै, अर सब विश्वासी उसके देह के अंग सै।

13 क्यूँके हम सब यहूदी, यूनानी, गुलाम अर आजाद, एकए देह की तरियां सां, अर परमेसवर हम सब नै पवित्र आत्मा का बपतिस्मा देवै सै, अर हम सारया नै एकै तरियां का पवित्र आत्मा पाया सै।

14 देह म्ह एकै अंग न्ही, पर भोत-से सै।

15 जै पैर कहवै के मै हाथ कोनी, इस करकै देह का अंग कोनी, तो के उसके इसा कहण तै वो देह का अंग कोनी?

16 अर जै कान कहवै, के मै आँख कोनी, इस करकै देह का अंग कोनी, तो के वो इस कारण देह का अंग कोनी?

17 जै साब्वी देह आँख होन्दी तो सुणणा कित्त तै होंदा? जै साब्वी देह कान ए होंदी तो सूँघणा कित्त तै होंदा?

18 पर सचमुच परमेसवर नै देह के सारे अंगा ताहीं अपनी मर्जी कै मुताबिक एक-एक करकै देह म्ह सही जगहां पै राख्या सै।

19 जै सारे अंग एकै अंग होन्दे, तो देह कित्त तै होंदी?

20 बल्के अंग तो भतेरे सै, पर देह एके सै ।

21 आँख हाथ तै कोनी कह सकदी, “मन्नै तेरी जरूरत कोनी,” अर ना सिर पैर तै कह सकै सै, के “मन्नै तेरी जरूरत कोनी ।”

22 पर देह के कुछ अंग जो दुसरे अंगा तै कमजोर लाग्गै सै, भोत-ए जरूरी सै ।

23-24 अर देह के जिन अंगा नै हम कम आदर देवां सां, वे सै जिन ताहीं हम बड़ी सावधानी तै ढका सां, इस करके उन अंगा की हम सावधानी तै हिफाजत करा सां, जिन ताहीं देख्या न्ही जा सकता, जिब के आदर के लायक अंगा नै इस खास देखभाळ की जरूरत कोनी । इस करके परमेसवर नै देह ताहीं एक साथ राख्या सै, ताके उन अंगां ताहीं खास आदर अर देखभाळ दी जावै, जिनका महत्व कम सै ।

25 ताके देह म्ह फूट ना पड़े पर देह के सारे हिस्से दुसरे अंगा की देखभाळ करै ।

26 जै देह का कोए अंग दुख पावै सै, तो उसके गैल देह के सारे अंग दुख पावै सै, अर जै एक अंग की बड़ाई होवै सै, तो उसके गेल्या सारे अंग आनन्द मनावै सै ।

27 इस्से ढाळ थम सारे मिलकै मसीह की देह सो, अर थारे म्ह तै हरेक उसके देह के कुछ हिस्सां के रूप म्ह उसके अंग सां

28 मसीह की इस देह म्ह जो के कलीसिया सै, परमेसवर नै म्हारे ताहीं न्यारे-न्यारे ढाळ के काम करण कै खात्तर दिया, सब तै पैहल्ल्या प्रेरितां, फेर नबी, तीसरे शिक्षक, फेर सामर्थ के काम करण आळे, फेर चंगाई देण आळे, भलाई करण आळे, अर अगुवें, अर अन्य भाषा बोल्लण की काबलियत दी ।

29 के सारे प्रेरित सै? न्ही! के सारे नबी सै? न्ही! के सारे उपदेशक सै? न्ही! के सारे सामर्थ के काम करण आळे सै? न्ही!

30 के सारया नै चंगा करण का वरदान मिल्या सै? न्ही! के सारे अन्य भाषा बोल्लै सै? न्ही!

31 के सारे अन्य भाषा का मतलब बताणीये सै? न्ही! थम सबतै उपयोगी वरदानां की धुन म्ह रहो, पर मै थमनै सारया तै बढ़िया राह बताऊँ सू ।

13

????-???? ? ? ? ? ? ? ? ? ? ?

1 जै मै माणसां अर सुगंदूत्तां की बोल्ली बोल्लूँ अर दुसरयां तै प्यार ना करूँ, तो मै ठनठनादा होया पीत्तळ, अर झंझनाती होई झाँझ सू ।

2 अर जै मै भविष्यवाणी कर सकूँ, अर सारे भेद अर सारी ढाळ के ज्ञान ताहीं समझूँ, अर मन्नै उरै ताहीं इतणा विश्वास हो के मै पहाड़ां ताहीं हटा दियुँ, पर दुसरयां तै प्यार ना करूँ, तो मै कुछ भी कोनी ।

3 जै अपना सारा धन कंगालां नै खुवा दियुँ, या अपना देह जळण कै खात्तर दे दियुँ, अर दुसरयां तै प्यार ना करूँ, तो मन्नै किमे भी फायदा कोनी ।

4 जो लोग दुसरयां तै प्यार करै सै, वे पूरे धीरज अर दयालु तरिककें तै काम करै सै, वे नफरत न्ही करते, अर वे खुद की बड़ाई न्ही करते ।

5 वे दुसरयां का अनादर कोनी करते, वे स्वार्थी कोनी अर ना ए तावळे नाराज होवै सै, पर आसान्नी तै उन माणसां ताहीं माफ करदे सै जो उनके खिलाफ बुग बरताव करै सै ।

6 जिब लोग बुरे काम करै सै तो वे खुश कोनी होन्दे, पर जिब लोग सही काम करै सै तो वे खुश होवै सै ।

7 प्यार सारी बाततां नै सह लेवै सै, अर हमेशा म्हारे हरेक हालात्तां म्ह विश्वास करण म्ह, परमेसवर पै भरोस्सा राक्खण म्ह, अर दुख अर मुसीबतां नै धीरज तै सहण करण म्ह म्हारी मदद करै सै ।

8 प्यार सदा तक रहण आळा सै । जड़ै ताहीं भविष्यवाणीयां का सवाल सै, वे थोड़े ए बखत खात्तर सै, भाषाएँ बिना शब्द की हो जावैगी अर ज्ञान मिट जावैगा ।

9 क्यूँके म्हारा ज्ञान अर म्हारी भविष्यवाणी का वरदान अधूरा सै ।

10 पर जब हम सिद्धता तक पोहच जावांगे तो, वो सब, जो अधूरा सै, मिट जावेगा।

11 जब मै बाळक था, तो मै बाळकां की ढाळ बोल्लू था, बाळकां जिंसी मेरी सोच थी, बाळकां जिंसी समझ थी, पर जब श्याणा हो गया तो बाळकां के जिंसी बात छोड़ दी।

12 इब जो हम परमेसवर के बारे में जाणा सां, वो सब शीशे में धुंधला दिखाई देण की ढाळ सै, पर बाद में हम उस ताहीं आम्ही-स्याम्ही देखवांगें, इब्वे हम सब कुछ न्ही जाणते, पर बाद में हम सब किमे जाण जावांगे जिस तरियां परमेसवर म्हारे ताहीं जाणै सै।

13 ये तीन्नु चीज सदा खात्तर सै, विश्वास, आस, अर प्यार पर इन में सारया तै बड़ड़ा प्यार सै।

14

XXXXXXXXXX OF XXXX-XXXX XXXX

1 एक-दूसरे तै प्यार करण की कोशिश करो, अर आत्मिक वरदानां की भी धुन में रहो, खास करके वो के भविष्यवाणी करो।

2 क्यूंके जो अन्य भाषा में बात करै सै वो माणसां तै न्ही पर परमेसवर तै बात करै सै, ज्यांतै के उसकी बात को ए न्ही समझदा, क्यूंके वो भेद की बात पवित्र आत्मा की शक्ति तै बोल्लै सै।

3 पर जो भविष्यवाणी करै सै, वो विश्वासियां नै मजबूत करण की, उत्साहित करण की, अर शान्ति की बात कहवै सै।

4 जो अन्य भाषा में बात करै सै, वो अपना ए विश्वास मजबूत करै सै, पर जो भविष्यवाणी करै सै, वो कलीसिया के विश्वासियां के विश्वास नै मजबूत करै सै।

5 मै चाहूँ सू के थारे में तै हरेक नै अन्य भाषायां में बात करण की काबलियत मिलै, पर इसकी बजाए आच्छा तो यो सै के थमनै भविष्यवाणी की काबलियत मिलै, क्यूंके जो भविष्यवाणी करै सै, वो उस अन्य भाषा बोल्लण आळा तै, जो उसका मतलब खोल कै बताए बिना अन्य भाषा में बात करै सै, उसतै आच्छा सै, क्यूंके उसका मतलब खोल कै बताये जाण पए कलीसिया के विश्वासियां के विश्वास की बढ़ोतरी हो सकै सै।

6 ज्यांतै, हे विश्वासी भाईयो, जै मै थारे तै अन्य भाषा में बात करूँ, तो उसतै थमनै के फायदा होगा, जै इस में थारे खात्तर को ए प्रकाशन, ज्ञान, भविष्यवाणी या शिक्षा की बात ना हो, तो मै इस में थारा के भला करूँगा?

7 इस्से ढाळ बेजान चीज में तै भी आवाज लिकड़ै सै, चाहे बाँसुरी हो या संगीत के साज, जै उनतै लिकड़ै सुरां में फर्क ना हो तो यो किस तरियां बेरा लागगैगा के यो कौण सा साज बजाया जाण लाग रह्या सै।

8 अर जै तुरही का शब्द साफ ना हो, तो कौण लड़ाई के खात्तर तयारी करैगा?

9 इस्से तरियां जै थम अन्य भाषा में बोल्लों सों, अर थारे शब्दां नै को ए समझ न्ही पावै, के थम के बोल्लण लागरे सों? तो यो तो हवा तै बात करण जिंसा होगा।

10 भलाए दुनिया में कितनी ए ढाळ की भाषा क्यूं ना हों, पर हरेक भाषा का मतलब सै।

11 पर जै मै किसे भाषा का मतलब ना समझूँ, तो बोल्लण आळे की निगाह में परदेशी ठहरूँगा, अर बोल्लण आळा भी मेरी निगाह में परदेशी ठहरैगा।

12 ज्यांतै थम भी जब आत्मिक वरदानां की खोज में हो, तो इसे वरदानां की लालसा राखवो, जिसतै कलीसिया के विश्वासी माणसां का विश्वास भी मजबूत हो सके।

13 इस कारण जो अन्य भाषा बोल्लै, वो प्रार्थना करै के उसका खोल के मतलब भी बता सकै।

14 ज्यांतै जै मै अन्य भाषा में प्रार्थना करूँ, तो मेरी आत्मा प्रार्थना करै सै, पर मेरी बुद्धि काम न्ही देदी।

15 इस बजह तै मै आत्मा तै भी प्रार्थना करूँगा, अर बुद्धि तै भी प्रार्थना करूँगा, मै आत्मा तै भी गाऊँगा, अर बुद्धि तै भी गाऊँगा।

16 मान ल्यो के कई आम आदमी थारे गैल परमेसवर की आराधना म्ह शामिल होवै सै, अर जिब थम अपनी आत्मा के साथ परमेसवर की आराधना करण लागरे सों, अर जो थम बोल्लो सों वो उननै समझ कोनी आन्दा, तो परमेसवर का धन्यवाद करण के बाद, उननै किस तरियां बेरा लाग्गैगा के कद "आमीन" कहणा सै, जो थम कहण लागरे सों?

17 परमेसवर का धन्यवाद करणा थारे खात्तर अदभुत हो सकै सै, पर यो दुसरयां ताहीं उनके विश्वास म्ह मजबूत न्ही बणा सकदा।

18 मै अपने परमेसवर का धन्यवाद करूँ सूँ, के मै थम सारया तै घणा अन्य भाषायां म्ह बोल्लू सूँ।

19 पर कलीसिया म्ह अन्य भाषा म्ह दस हजार बात कहण तै यो मन्ने और भी सही लाग्गै सै, के दुसरयां नै सिखाण के खात्तर मै बुद्धि तै पाँच ए बात कह सकू।

20 हे विश्वासी भाईयो, इन बाततां नै समझण म्ह बाळक ना बणो, बुराई करण म्ह तो बाळक बणे रहो, पर इस तरियां के मामलां नै समझण म्ह श्याणे बणो।

21 पवित्र ग्रन्थ म्ह लिख्या सै, के प्रभु कहवै सै, "के मै अजनबियाँ के जरिये बात करूँगा, जो अन्य भाषा बोल्लैगें, तोभी वे मेरी न्ही सुणैगें।"

22 ज्यातै अन्य भाषा विश्वासियाँ के खात्तर न्ही, पर अविश्वासियाँ के खात्तर निशान्नी सै, जो ये भाषा न्ही समझते, पर भविष्यवाणी अविश्वासियाँ के खात्तर न्ही, पर विश्वासियाँ के खात्तर निशान्नी सै।

23 इस करके जै कलीसिया एक जगहाँ कट्ठी हो, अर सारे के सारे अन्य भाषा बोल्लै, जो ये भाषा न्ही समझते, या अविश्वासी माणस भीत्तर आ जावै, तो के वे थमनै बावळे न्ही कहवैगें?

24 पर जै सारे भविष्यवाणी करण लाग्गे, अर कोए अविश्वासी माणस या जो भविष्यवाणी नै न्ही समझते हो, भीत्तर आ जावै, तो उननै अपने पापां का अहसास होगा अर जो थम बोल्लण लागरे सों उसकी बजह तै अपने-आप ताहीं कसूरवार महसूस करैगें।

25 अर परमेसवर का संदेश उन ताहीं उसकी बुराई या उसकी गुप्त सोच का अहसास करां देवैगा। वो महसूस करैगा के वो पापी सै, अर वो पाप करणा छोड़ देगा अर वो झुकके प्रभु की आराधना करैगा, अर मान लेवैगा के सच म्ह ए परमेसवर थारे विचाळै सै।

?????? ??? ???????

26 हे विश्वासी भाईयो, सुणो के ये बात किस तरियां होणी चाहिये? जिब थम आराधना खात्तर कट्ठे होवो सों, तो थारे म्ह तै कोए तो भजन गावै सै, कोए उपदेश देवै सै, कोए प्रभु के जरिये दिए गये प्रकाशन सै, कोए अन्य भाषा म्ह बात करै सै, कोए उसका मतलब बतावै सै। इन सारी बाततां का मकसद योए सै, के कलीसिया विश्वास म्ह मजबूत हो सकै।

27 जै अन्य भाषा म्ह बात करै तो ज्यादा तै ज्यादा दो या तीन माणस बारी-बारी तै बोल्लै, अर एक माणस उन बाततां का खोल के मतलब भी बतावै।

28 पर जै खोल के मतलब बताणीया ना हो, तो अन्य भाषा बोल्लण आळा कलीसिया म्ह शान्त रहवै, अर अपने मन म्ह परमेसवर तै बात करै।

29 नबियाँ म्ह तै दो या तीन बोल्लै, अर बाकी माणस उनकै वचन नै परखै।

30 जै उस बखत ओड़ै कोए बेटचा हो जिस ताहीं ईश्वरीय प्रकाशन मिलै, तो पैहले आळा माणस चुप हो जावै अर दुसरे माणस नै बोल्लण दे।

31 थम सारे एक-एक करके भविष्यवाणी कर सको हो, ताके सारे सीखै अर सारे उत्साहित भी हो जावै।

32 अर नबियाँ की आत्मा नबियाँ के बस म्ह सै, उसकै भितर इतनी काबलियत सै, के वो अपनी इच्छा के मुताबिक बोल सकै सै, अर चुप भी रह सकै सै।

33 क्यूँके परमेसवर गड़बड़ी का न्ही, पर शान्ति का परमेसवर सै।

यो वो नियम सै जिसका पालन परमेसवर के माणसां के सारी कलीसियाओं म्ह करया जाणा चाहिए।

34 बिरबान्नी कलीसिया की सभा म्ह चुपचाप रहवै, क्यूँके उन ताहीं बात करण का हुकम कोनी, पर अधीन रहण का हुकम सै, जिसा नियम-कायदे म्ह लिख्या भी सै।

35 जै वे किमे सिखणा चाहवै, तो घर म्ह अपणे-अपणे धणी तै बुझै, क्यूँके बिरबान्नी का कलीसिया म्ह घणा बोलणा शर्म की बात सै।

36 इसा क्यूँ सै के थारे म्ह तै कुछ पैहले उप्पर लिखे होए नियमां का पालन न्ही करणा चाहन्दे? के थमनै लागै सै, के थम परमेसवर का वचन देण आळे पैहले आदमी सों?

37 जै कोए माणस खुद नै नबी या आत्मिक माणस समझै, तो न्यू जाण ले के जो बात मै थमनै लिखूँ सूं, वे प्रभु के हुकम सै।

38 जै कोए माणस इन बातों पै विश्वास न्ही करदा, तो थम भी उसकी बातों पै विश्वास ना करो, जो वो बोल्लण लागरया सै।

39 इस करके हे विश्वासी भाईयो, भविष्यवाणी करण की धुन म्ह रहो, अर अन्य भाषा बोल्लण तै मना ना करो।

40 कलीसिया म्ह जो कुछ भी करो सों, आच्छी तरियां अर सही ढंग तै करया जावै।

15

???? ? ? ????????????

1 हे विश्वासी भाईयो, इब मै थमनै वोए सुसमाचार याद दिवाऊँ सूं, जो पैहल्या सुणया जा चुक्या सै, जिस सुसमाचार का थमनै विश्वास भी करया था, अर थम उस विश्वास म्ह बणे भी रहो।

2 जै थम सुसमाचार म्ह विश्वास करणा जारी राख्खों सों, जो मन्ने थारे ताहीं सुणया था तो परमेसवर थमनै सुसमाचार के जरिये बचावैगा, जै थम उस सुसमाचार पै विश्वास करणा छोड़ द्यो, तो थारा मसीह पै विश्वास करणा बेकार सै।

3 इससे कारण मन्ने थारे ताहीं सब तै खास सन्देश बताया सै, जो मेरे ताहीं प्रभु यीशु तै मिल्या सै, वो सन्देश यो सै, के पवित्र ग्रन्थ के वचन के मुताबिक यीशु मसीह म्हारे पापां के खात्तर मारया गया,

4 गाड्या गया, अर पवित्र ग्रन्थ के मुताबिक तीसरे दिन जिन्दा भी होगया,

5 अर उसके बाद वो पतरस ताहीं अर फेर बारहां चेल्यां नै दिख्या।

6 फेर वो पाँच सौ तै ज्यादा चेल्यां नै एक साथ दिख्या, जिन म्ह तै घणखरे तो इब ताहीं जिन्दे सै पर कई मर लिये सै।

7 इसके बाद वो याकूब नै अर फेर सारे प्रेरितां नै भी दिख्या।

8 सब तै आखर म्ह मन्ने भी दिख्या, मेरे ताहीं प्रभु नै अदभुत तरिके तै प्रेरित बनाया।

9 क्यूँके मै प्रेरितां म्ह सारया तै कम महत्वपूर्ण सूं, बल्के प्रेरित बणण के जोगगा भी कोनी था, क्यूँके मन्ने परमेसवर की कलीसिया के विश्वासियां ताहीं सताया था।

10 पर मै जो कुछ भी सूं, परमेसवर के अनुग्रह तै प्रेरित सूं। उसका अनुग्रह जो मेरै पै होया, वो बेकार न्ही होया, पर मन्ने उन और प्रेरितां तै बाध मेहनत भी करी, तोभी या मेरी ओड़ तै न्ही होई, पर परमेसवर का अनुग्रह तै होई जो मेरै पै था।

11 ज्यातै चाहे मै हूँ, चाहे दुसरे प्रेरित हों, हम सब नै मसीह के बारे म्ह एक जिसा प्रचार करा, अर इससे पै थमनै विश्वास भी करया।

???? ? ? ????????????

12 मै थारे तै एक बात पूच्छु सूं, जिब तै हम सारया नै यो प्रचार करया सै, के परमेसवर नै मसीह ताहीं मुर्दा म्ह तै जिन्दा करया, तो थारे म्ह तै कई क्यूँ न्ही मानते के विश्वासी भी मरके जिवेंगे?

13 जै मेरे होया का जी उठणा सै ए कोनी, तो मसीह भी मेरे होया म्ह तै जिन्दा कोनी होया,

14 अर जै मसीह मेरे होया म्ह तै न्ही जी उठ्या, तो म्हारा प्रचार करणा बेकार सै अर थारा विश्वास करणा भी बेकार सै।

15 इसतै भी बढ़के यो सै के हम परमेसवर के झूट्टे गवाह साबित होण लागरे सां, क्यूँके हमनै उनके बारे म्हा या गवाही दी सै के उननै मसीह ताहीं मरे होया म्हा तै जिन्दा करया सै, पर जै मरे होए वास्तव म्हा जिन्दे न्ही करे गये होन्दे तो परमेसवर नै मसीह ताहीं भी जिन्दा न्ही करया ।

16 अर जै मरे होए माणस जिन्दा न्ही होन्दे, तो मसीह भी मरे होया म्हा तै जिन्दा कोनी होया ।

17 अर जै मसीह मरया होया म्हा तै जिन्दा कोनी होया, तो थारा बिश्वास करणा बेकार सै, अर थम इब ताहीं अपणे पापां म्हा जीण लागरे सो ।

18 बल्के जो मसीह पै बिश्वास करण आळे मर लिये सै, वे भी नाश होए ।

19 जै हम सिर्फ इस्से जीवन म्हा मसीह तै आस राक्खां सां, ना के आण आळी दुनिया के खात्तर, तो हम सारे माणसां तै घणे अभागे सां ।

20 पर सच म्हा-ए परमेसवर नै मसीह ताहीं मुर्दयां म्हा तै जिन्दा करया सै, अर वो पैहला माणस सै, जो मरे होया म्हा तै जिन्दा करया गया ।

21 क्यूँके जिब एक माणस आदम के जरिये दुनिया म्हा मौत आई, तो दुसरा माणस मसीह के जरिये मरे होया का दोबारा जिन्दा हो जाणा भी होया ।

22 अर जिस तरियां आदम के पाप के जरिये सारे माणस मरे सै, उस्से तरियां ए मसीह नै जो करया, उसके जरिये सारे माणस मरे होया म्हा तै जिन्दा भी करे जावेंगे ।

23 पर हरेक माणस इस तरियां जिन्दा होवैगा, परमेसवर नै पैहल्या मसीह ताहीं मरे होया म्हा तै जिन्दा करया, फेर मसीह के आण पै परमेसवर उन लोग्गां नै भी जिन्दा करैगा जो मसीह के सै ।

24 इसके बाद दुनिया का अन्त होगा । उस बखत मसीह सारी प्रधानता, अर सारा हक अर सामर्थ का अन्त करके राज्य नै परमेसवर पिता के हाथ म्हा सौंप देवैगा ।

25 क्यूँके जिब तक परमेसवर अपणे बैरियां नै पूरी तरियां तै हरा ना देवै, तब तक मसीह का राज्य करणा जरूरी सै ।

26 सायरा तै आखरी बैरी जो नाश करया जावैगा, वो मौत सै ।

27 पवित्र ग्रन्थ म्हा भजनकार नै लिख्या सै, के परमेसवर सब कुछ मसीह के अधीन कर देवैगा, तो यो तय सै, के परमेसवर शामिल कोनी, क्यूँके वोए सै जिसनै मसीह ताहीं अधिकार दिया सै ।

28 जिब सब कुछ मसीह के अधीन हो जावैगा यानी बेट्टे के अधीन, तो बेट्टा आप भी परमेसवर के अधीन हो जावैगा, जिसनै उस ताहीं यो अधिकार दिया था । परमेसवर ए प्रभु सै, जो सब कुछ अर हर किसे म्हा काम करे सै ।

29 जै मरे होया का पुनरुत्थान कोनी, तो उस परम्परा का के मतलब सै, जिस म्हा माणस मरे होया की जगहां पै बपतिस्मा लेण लागरे सै? जै परमेसवर मरे होए माणस ताहीं जिन्दा न्ही करदा, तो माणस इस परम्परा नै क्यूँ मानण लागरे सै?

30 म्हारे खात्तर जै मुर्दा का जी उठणा सै, तो खुद ताहीं खतरां म्हा गेरणा बेकूफी सै ।

31 हे बिश्वासी भाईयो, मै हर दिन मौत का सामना करूँ सूँ, यो भी सच सै, के प्रभु यीशु मसीह म्हा मनै थारे पै गर्व सै ।

32 मै इफिसुस नगर म्हा बड़ी तै बड़ी मुसीबतां म्हा तै गुजरा सूँ, जो जंगली-जानवरों की तरियां मेरा बिरोध करे सै, तो मनै के फायदा होया? जै मुर्दे जिन्दे न्ही करे जावेंगे, तो हम कह सका सां, के “आओ, खावां-पीवां, क्यूँके काल तो मरणा ए सै ।”

33 धोक्खा ना खाओ, “भुंडी संगति आच्छे चाल-चलण नै बिगाड देवै सै ।”

34 अपणे सोचण के तरिकके नै ठीक कर ल्यो, अर पाप करणा छोड़ दो, क्यूँके कुछ इसे सै जो परमेसवर नै न्ही जानदे । मै थमनै शर्मिन्दा करण के खात्तर न्यू कहुँ सूँ ।



35 उदाहरण के तौर पे जै कोए न्यू कहवैगा, “के परमेसवर मुर्दां नै किस तरियां तै जिवावै सै, अर उनकी देह किसी होवै सै?”

36 हे निरे बेअक्लो! जिब तू बीज नै माट्टी म्ह बोवै सै, तो वो अंकुरित कोनी होवै सै, अर जिब वो अंकुरित होवै सै तो वो बीज कोनी रहन्दा।

37 जै तू गेहूँ या कोए दुसरा बीज बोवै सै, तो तू शरु म्ह ए पौधा न्ही लगान्दा, बल्के बीज नै ए लगवै सै, जो बाद म्ह पौधा बणै सै।

38 परमेसवर जिसा चाहवै उसा आकार पौधे नै देवै सै, हरेक ढाळ के बीज का उगण का अपणा अलग ए तरिककां होवै सै।

39 दुनिया के सब प्राणियाँ की देह एक जिसी कोनी होन्दी, माणसां की देह न्यारी सै, डांगरां की न्यारी सै, पंछियाँ की देह न्यारी सै, मच्छियाँ की देह न्यारी सै।

40 अर जिस तरियां धरती पै अलग-अलग तरियां की देह सै, उस्से तरियां अकास म्ह भी सूरज, चाँद अर तारे सै। अकास म्ह चिज्जां की एक अलग तरियां की खूबसूरती हो सै, अर धरती पै, की चिज्जां की खूबसूरती अलग ढाळ की हो सै।

41 सूरज का तेज न्यारा सै, चाँद का तेज न्यारा सै, अर तारा के टोळ का तेज न्यारा सै, (क्यूँके एक तारे तै दुसरे तारे के तेज म्ह फर्क सै)।

42 तो यो मरे होए माणसां का जी उठणा भी इसाए होगा। देह जिस ताहीं वे दफणावै सै वो गळ जा सै, पर जिब यो फेर तै जी उठै सै, तो या एक इसी देह होगी जो गळै कोनी।

43 जिब म्हारी देह दफणाई जावै सै, तो वा बदसूरत अर कमजोर हो सै, पर जिब दुबारतै जीवन मिलै सै, तो वा सुधरी अर मजबूत हो सै।

44 जिस तरियां म्हारी देह माँस अर लहू तै बणी सै, इस्से तरियां इसी देह भी सै जिस ताहीं जीवन परमेसवर के आत्मा के जरिये मिलै सै, अर जो म्हारी देह माँस अर लहू तै बणी सै, उस देह म्ह बदल जावैगा, जिस ताहीं जीवन परमेसवर की आत्मा तै मिलै सै।

45 पवित्तर ग्रन्थ म्ह भी लिख्या सै, के “पैहल्ला माणस, यानिके आदम जिन्दा प्राणी बण्या” अर आखरी आदम जो मसीह सै, वोए सै जो हमनै अनन्त जीवन देवै सै।

46 माँस अर लहू तै बणी देह पैहल्या वजूद* म्ह आई, फेर उस देह ताहीं परमेसवर की आत्मा के जरिये जीवन मिलै सै।

47 पैहल्ला माणस धरती तै, यानिके माट्टी तै बण्या होया था, दुसरा माणस जो मसीह था सुर्गा तै आया।

48 धरती पै रहण आळे लोग, धरती के पैहले माणस आदम की ढाळ माट्टी तै बणे सै, पर सुर्गा म्ह रहण आळे लोग, सुर्गा के माणस मसीह यीशु की तरियां सै।

49 हम सबका रूप आदम की ढाळ सै, जो माट्टी तै बण्या सै, उस्से तरियां एक दिन हमनै मसीह का रूप भी मिलैगा, जो सुर्गीय सै।

50 हे बिश्वासी भाईयो, मै चाहूँ सूँ के थम जाण ल्यो, के म्हारी देह जो लहू अर माँस तै बणी सै, इस देह के साथ हम परमेसवर के सुर्गीय राज्य म्ह न्ही रह सकदे। हम सुर्गा म्ह उस देह के साथ न्ही रह सकदे जो नाश हो जावै सै, क्यूँके ओडै कोए मौत कोनी।

51 देक्वो, मै थारे तै एक भेद की बात बताऊँ सूँ, म्हारे म्ह तै कुछ बिश्वासी मरै कोनी, पर उनकी देह बदल जावैगी।

52 अर यो पलभर म्ह, पलक झपकदे ए जिब आखरी तुरही फूक्की जावैगी तो मुर्दे सदा रहण खात्तर जिन्दा हो जावेंगे, अर जो जिन्दा सै उनकी देह सुर्गीय देह म्ह बदल जावैगी।

53 क्यूँके यो जरूरी सै, ताके म्हारी या नाशवान देह अविनाशी देह म्ह बदल जावै, अर या मरणहार देह कदे ना मरण आळी देह म्ह बदल जावै।

54 जिब इसा होवै सै, तो जो परमेसवर नै पवित्तर ग्रन्थ म्ह लिख्या सै, वो पूरा हो जावैगा, “मौत पूरी तरियां तै हार जावैगी अर वजूद म्ह कोनी रहवैगी।

* 15:46 15:46 वजूद अस्तित्व

- 55 हे मौत, तेरी जीत कित्त रही? हे मौत, तेरा डंक कित्त रहया?"
- 56 पाप वो डंक सै जो मौत नै लेकै आवै सै, अर नियम-कायदे पाप नै शक्ति देवै सै।
- 57 पर परमेसवर का धन्यवाद हो, जो म्हारै प्रभु यीशु मसीह कै जरिये हमनै पाप अर मौत पै जयवन्त करै सै।
- 58 ज्यातै हे मेरे प्यारे भाईयो, मजबूत अर पक्के रहो, अर प्रभु कै काम म्ह सारी हाण बढ़ते जाओ, क्यूँके थम जाणो सो के थारी मेहनत प्रभु म्ह बेकार न्ही सै।

16

?????????? ?? ??????? ???

- 1 इब यरुशलेम नगर म्ह परमेसवर के पवित्र माणसां के खात्तर कट्टे करे गये उस चन्दे के बारे म्ह, जिसा हुकम मन्नै गलातिया परदेस की सारी कलीसियां ताहीं दिया, उसाए थम भी करो।
- 2 हफ्तै के पैहलडे दिन थारे म्ह तै हरेक, अपणी आमदणी कै मुताबिक कुछ धन अपणे धारे अलग धरो, ताके मेरे आण पै थमनै चन्दा कट्टा करणा न्ही पड़े।
- 3 अर जिव मै ओड़े होऊंगा, तो उन माणसां ताहीं दान लेण खात्तर यरुशलेम भेजूंगा जिन ताहीं थमनै भरोस्सेमंद समझा सै, मै उन विश्वासियां के हाथ एक चिट्ठी भी भेजूंगा ताके ओड़े के विश्वासी भी उन ताहीं जाण सके।
- 4 जे मेरा भी जाणा जरूरी होया, तो वे मेरे गेल्या जावेंगे।

?????? ?? ??????? ?? ???????????

- 5 पर मन्नै पैहले मकिदुनिया परदेस जाणा सै, फेर मै मकिदुनिया परदेस तै होके थारे धारे आऊंगा।
- 6 पर हो सकै सै, के थारे धारे ए लम्बे बखत ताहीं टैहर जाऊँ, अर पूरा जाड्डा थारे धारे रहूँ, फेर जिस सफर पै मन्नै जाणा हो उसपै थम मन्नै भेज दियो।
- 7 जे या परमेसवर की इच्छा सै, तो मै थारे धारे बाद म्ह, घणे दिनां खात्तर आऊंगा, बजाए इसके के इब मै थोड़े दिनां खात्तर, थारे धारे आऊँ।
- 8 पर मै पिन्तेकुस्त त्यौहार तक इफिसुस नगर म्ह रहूंगा,
- 9 क्यूँके याड़े भोत सारे लोग सै, जो परमेसवर के वचन के बारे म्ह सुणाणा चाहवै सै, अर मेरा याड़े रहणा जरूरी सै, हालाकि याड़े मसीह के भोत बिरोधी सै।
- 10 जिव तीमुथियुस कुरिन्थुस नगर म्ह आ जावै सै, तो उसकै गैल सम्मानपूर्वक बरताव करियो, क्यूँके वो मेरी तरियां प्रभु का काम करै सै।
- 11 ज्यातै कोए उसनै तुच्छ न्ही जाणै, पर जो सफर खात्तर जरूरी चीज सै उसनै दे दिओ, ताके वो मेरे धारे आ जावै, क्यूँके मै उसकी बाट देखवूँ सूँ, के वो विश्वासी भाईयां कै गैल आवै।
- 12 विश्वासी भाई अपुल्लोस तै मन्नै घणी विनती करी सै, ताके वो थारे धारे और दुसरे विश्वासी भाईयां कै गेल्या आ जावै, पर वो इस सफर कै खात्तर तैयार कोनी, पर जिव सही बखत होगा तो वो थारे धारे आ जावैगा।

????? ????? ?? ???????????

- 13 चौक्कस रहो, विश्वास म्ह डट रहो, निडर बणे रहों, विश्वास म्ह मजबूत बणो।
- 14 जो किमे करो सो प्यार तै करो।
- 15 हे विश्वासी भाईयो, थम स्तिफनास कै कुणवे नै जाणो सो के वे अखाया परदेस के पैहले विश्वासी सै, अर पवित्र माणसां की सेवा कै खात्तर त्यार रहवें सै।
- 16 ज्यातै मै थारे तै विनती करूँ सूँ, के इस्यां कै अधीन रहो, बल्के हरेक के जो इस काम म्ह कड़ी मेहनती करै सै, अर जो सच्ची भगति के साथ सेवा करै सै।
- 17 मै स्तिफनास अर फूरतूनातुस अर अखइकुस के आण तै राज्जी सूँ, क्यूँके वो मेरी मदद करण लागरे सै, जो थम न्ही कर पाए।
- 18 उननै मेरी अर थारी आत्मा ताहीं चैन दिया सै, इस करके इसे माणसां का आदर करो।

19 आसिया की कलीसियाओं की ओड़ तै थारे ताहीं नमस्कार, अक्विला अर उसकी घरआळी, प्रिसकिल्ला का अर उनकै घर की कलीसिया का भी, थारे ताहीं प्रभु म्ह दिल तै नमस्कार ।

20 सारे बिश्वासी भाईयाँ का थारे ताहीं नमस्कार । आप्स म्ह एक-दुसरे ताहीं गळे मिलकै प्यार तै नमस्कार करो ।

21 मुझ पौलुस का थारे ताहीं अपणे हाथ तै यो नमस्कार लिखूँ सूँ ।

22 जै कोए प्रभु तै प्यार न्ही राक्खै तो वो श्रापित होवै । हे म्हारे प्रभु आ!

23 प्रभु यीशु का अनुग्रह थारे पै होन्दा रहवै ।

24 मै उन सारया तै प्यार करूँ सूँ, जिनका मसीह यीशु के साथ रिश्ता सै । आमीन ।

कुरिन्थिस नगर के माणसां ताहीं प्रेरित पौलुस की दुसरी चिट्ठी



कुरिन्थिस नगर के नाम पौलुस प्रेरित की दुसरी चिट्ठी पौलुस अर कुरिन्थुस की कलीसिया के बीच विगड़ते सम्बन्धां के बखत लिखी गयी थी। कलीसिया के माणसां नै पौलुस के विरुद्ध गम्भीर दोष लगाये थे, पर वो मेळ-मिलाप की अपणी गहरी लालसा नै दिखावै सै। इस चिट्ठी के पैहले भाग म्ह पौलुस कुरिन्थुस नगर की कलीसिया के गैल अपणे सम्बन्धां पै विचार करै सै, अर उननै समझावै सै, के उसनै क्यूँ कलीसिया म्ह अपमान अर विरोध करण जिसा कटोर बरताव करया, अर फेर अपणी खुशी नै जाहिर करै सै, के उसकी कटोरता का नतिज्जा पछतावा अर मेळ-मिलाप होया। इब वो कलीसिया तै, यहूदिया के गरीब विश्वासियाँ खात्तर खुल्ले दिल तै दान देण की बिनती करै सै। आखरी पाठां म्ह पौलुस कुरिन्थुस नगर के कई माणसां के खिलाफ अपणी प्रेरिताई का समर्थन करै सै, जिननै खुद अपणे-आप ताहीं साच्चा प्रेरित होण का दर्जा दे दिया था, जिव कै वे पौलुस पै झूठा प्रेरित होण का दोष लगाया करदे।

रूप-रेखा

जानकारी 1:1-11

पौलुस अर कुरिन्थुस नगर की कलीसिया 1:12-7:16

यहूदिया के विश्वासियाँ खात्तर दान 8:1-9:15


पौलुस के जरिये प्रेरित के तौर पै अपणे हक का समर्थन 10:1-13:10

समापन 13:11-14



1 या चिट्ठी पौलुस अर म्हारे विश्वासी भाई तीमुथियुस की ओड़ तै सै, मै पौलुस परमेसवर की इच्छा तै मसीह यीशु का प्रेरित सुं, उस कलीसिया के नाम जो कुरिन्थुस नगर म्ह सै; अर साव्ते अखाया परदेस के सारे पवित्र माणसां के नाम।

2 हम प्रार्थना करा सां, के पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिल्दी रहवै।



3 म्हारे प्रभु यीशु मसीह के पिता अर परमेसवर का धन्यवाद होवै, जो दया का पिता, अर जो हमेशा तसल्ली देवै सै।

4 परमेसवर म्हारे सारे दुखां म्ह तसल्ली देवै सै, ताके हम उस तसल्ली के कारण जो परमेसवर म्हारे ताहीं देवै सै, उन ताहीं भी तसल्ली दे सका, जो इस तरियां के दुखां म्ह हो।

5 क्यूँके जिस तरियां मसीह म्ह हमनै घणे दुख होवै सै, उस्से तरियां ए मसीह के जरिये हमनै घणी तसल्ली भी होवै सै।

6 जे हम दुख पावां सां, तो या थारी तसल्ली अर उद्धार के खात्तर, क्यूँके परमेसवर म्हारे ताहीं तसल्ली देवै सै, तो वो थमनै भी तसल्ली देगा ताके थम धीरज के गेल्या उन दुखां ताहीं सह लेओ सो, जिन नै हम भी सहवां सां।

7 अर म्हारी आस थारे बाँरे म्ह पक्की सै, क्यूँके हमनै बेरा सै, के थम जिस तरियां तै म्हारे दुखां म्ह साइझी सों, उस्से तरियां तै थम म्हारी तसल्ली म्ह भी साइझी सों।

8 हे विश्वासी भाईयो, हम चाहवां सां, के थम म्हारे उन दुखां नै जाणो, जो आसिया परदेस म्ह म्हारे पै पड्या, हम इसे भारया बोझ तै दबगे थे, वो बोझ म्हारे सहण तै बाहर था, उँरे ताहीं के हमनै जिन्दा रहण की आस छोड़ दी थी।

9 बल्के हमनै अपणे मन म्ह समझ लिया था, के म्हारे ताहीं मार दिया जावैगा, अर हम अपणे-आप पै भरोस्ता ना राक्खां, बल्के परमेसवर पै भरोस्ता राक्खां, जो मरे होया नै जिन्दा करै सै।

10 उससे नै म्हारै ताहीं इसी बड़डी मुसीबत तै बचाया, अर बचावैगा, अर उसपै हमनै भरोस्सा सै, अर वो आगै भी म्हारे ताहीं बचान्दा रहवैगा।

11 जिस तरियां थम प्रार्थना के जरिये म्हारी मदद करो सों, उन आशीषां के खात्तर जो भोत सारे माणसां की प्रार्थना की बजह तै हमनै मिली सै, उसके कारण भोत-से माणस म्हारी ओड़ तै परमेसवर का धन्यवाद करै सै।

कुरिन्यायों 2:4-2:14

12 क्यूँके म्हारी अन्तरात्मा शुद्ध होण के कारण हम घमण्ड करा सां, अर दुनिया म्ह अर खास करके थारे विच्चाळे, म्हारा चाल-चलण जो परमेसवर की ओड़ तै सै, वो पवित्तरता अर सच्चाई सुधा था, ना के दुनियावी ज्ञान तै, पर परमेसवर के अनुग्रह के साथ था।

13-14 क्यूँके मन्नै अपणी चिट्ठियाँ म्ह हमेशा साफ-साफ लिख्या सै, ताके जिब थम उन चिट्ठियाँ नै पढ़ों तो आसान्नी तै समझ सकों, पर इब भी थम उन ताहीं ठीक तै न्ही समझ पाते, मन्नै आस सै के एक दिन जिब प्रभु यीशु बोहड़ के आवैगा, तो थम इन ताहीं पूरी तरियां समझ ल्योगे। तब हम थारे गर्व का कारण बणागे, अर थम भी म्हारै खात्तर गर्व का कारण बणोगे।

15 मन्नै भरोस्सा सै, के थम मेरी बातों नै पूरी तरियां तै समझगे सों, इस करके मै पैहल्या थारे धोरै आणा चाहूँ था, ताके मेरे दुबारा आण तै थमनै दुगणी आशीष मिलै।

16 मेरी योजना था थी, के मै थारे धोरै तै होके मकिदुनिया परदेस म्ह जाऊँ, अर दुबारा मकिदुनिया परदेस तै थारे धोरै आऊँ; अर मै उम्मीद करूँ सू, के थम मन्नै यहूदिया परदेस के सफर खात्तर जरूरत की चीज देके मेरी मदद करोगे।

17 थम मेरे तै पूछ सकों सों, के मन्नै अपणी योजना क्यूँ बदली। थम के सोच्चों सों, के मन्नै या योजना लापरवाही तै बणाई, या फेर मै दुनिया के माणसां की तरियां सू? जिनके जुबान पै तो हाँ हो सै, अर मन म्ह ना हो सै।

18 जिसा परमेसवर विश्वास जोगगा सै, उससे तरियां म्हारी बात भी विश्वास जोगगी सै।

19 क्यूँके परमेसवर का बेटा यीशु मसीह जिसका म्हारै जरिये यानिके म्हारे अर सिलवानुस अर तीमूथियुस के जरिये थारे बिचाळे प्रचार होया, उस मसीह यीशु म्ह “हाँ” अर “ना” दोन्नु न्ही हो सकदे। पर उस म्ह “हाँ” ए “हाँ” होई।

20 क्यूँके परमेसवर के सारे वादे मसीह यीशु म्ह पूरे होए सै। ज्यांतै हम आमीन बोल्ला सां यानी “हाँ”, ताके म्हारै जरिये परमेसवर की महिमा होवै।

21-22 परमेसवर ए सै, जो हमनै थारे गेल्या मसीह म्ह मजबूत करै सै, परमेसवर नै म्हारे पै अपणी मोहर लगाके बयान्ने के रूप म्ह अपणा पवित्तर आत्मा म्हारे मन म्ह बसाके म्हारे ताहीं चुण्या सै।

23 परमेसवर मेरी इस सच्चाई का गवाह सै के मै दुबारा कुरिन्यायुस नगर म्ह ज्यांतै कोनी आया, के मै थमनै दुख देणा कोनी चाहूँ था।

24 इसका मतलब यो कोनी के हम विश्वास के बारे म्ह थारे पै हक जताणा चाहवां सां; पर थारे आनन्द म्ह साइङ्की सां, क्यूँके थम विश्वास ए तै डटे रहो सो।

2

1 मन्नै अपणे मन म्ह न्यू ठान लिया था, के दुबारा थारे धोरै ओड़ै आके थमनै दुख ना देऊँ।

2 क्यूँके जै मै थमनै उदास करूँ, तो थारे अलावा मन्नै आनन्द देण आळा कोए कोनी रह्या, सिर्फ थमे सों, जिस ताहीं मन्नै उदास करया।

3 अर मन्नै याए बात थारे तै ज्यांतै लिक्खी के कदे इसा ना हो के मेरै आण पै, जिनतै मन्नै आनन्द मिलणा चाहिये, मै उनतै उदास होऊँ; क्यूँके थम सारया पै मन्नै इस बात का भरोस्सा सै, के जो मेरा आनन्द सै, वोए थम सारया का भी सै।

4 बड़े कळेश अर दुखी मन तै मन्नै घणेए आँसू बहा-बहाके थारे ताहीं चिट्ठी लिखी, ज्यांतै न्ही के थम उदास होवो पर ज्यांतै के थम उस घणे प्यार नै जाण ल्यो, जो मन्नै थारे तै सै।


~~~~~

5 अर जै किसे नै उदास करया सै, तो मेरे ताहीं ए न्ही बल्के थोड़ा-थोड़ा थारे सारया ताहीं उदास करया सै, अर मै उसकी गलतियाँ के बारे म्ह इसतै ज्यादा कुछ और न्ही कहणा चाहन्दा ।

6 इसे माणस के खात्तर या सजा जो सारे विश्वासी भाईयाँ नै उस ताहीं देई सै, वा भतेरी सै ।

7 ज्यांतै इसतै भला यो सै, के उसका अपराध माफ करो अर उस ताहीं उत्साहित करो, इसा ना हो के वो माणस घणी उदासी म्ह डूब जावे ।

8 इस कारण मै थारे तै बिनती करूँ सूँ के उस ताहीं अपने प्यार का सबूत द्यो ।

9 क्यूँके मन्नै यो ज्यांतै भी लिख्या था के थमनै परख ल्यूँ, के थम मेरी सारी बाततां नै मानण नै त्यार सो के न्ही ।

10 जिस ताहीं थम किसे बाबत माफ करो सो, उस ताहीं मै भी माफ करूँ सूँ, क्यूँके जिस बात के बारे मन्नै उस ताहीं माफ करया सै, जै वो सच म्ह माफी लायक था, तो मन्नै मसीह ताहीं हाजिर जाणके उस ताहीं थारे खात्तर माफ करया सै ।

11 ताके शैतान का म्हारै पै दाँव ना चाल्लै । क्यूँके हम उसके बुरे इरादां तै अनजाण कोनी ।

~~~~~

12 जब मै मसीह का सुसमाचार सुणाण नै त्रोआस नगर म्ह आया, अर प्रभु नै मेरे ताहीं वचन सुणाण खात्तर एक राह खोल दिया ।

13 अपने विश्वासी भाई तीतुस ताहीं ओड़ै ना पाके, मेरै मन नै चैन कोनी मिल्या, ज्यांतै विश्वासी भाईयाँ तै बिदा होके मै मकिदुनिया परदेस म्ह बोहड़ गया ।

~~~~~

14 पर परमेसवर का धन्यवाद हो, जो मसीह के साथ म्हारी संगति होण के कारण हमनै जीत के उत्सव म्ह लिये फ़िरै सै, इब परमेसवर म्हारे ताहीं खसबूदार इत्र की ढाळ मसीह का ज्ञान फैलाण खात्तर हरेक जगहां इस्तमाल करै सै ।

15 हम परमेसवर के खात्तर मसीह के जरिये, जळाई गई उस धूप की खस्वू की ढाळ सां, जो उद्धार पाण आळे अर नाश होण आळे दोनुआ के खात्तर सै, यो परमेसवर का सुसमाचार सै, अर सारे माणसां धोरै फैल्लण लागरया सै ।

16 कितन्याँ के खात्तर तो मरण के कारण मौत की गन्ध, अर कितन्याँ के खात्तर जिन्दगी के कारण जिन्दगी की खस्वू सां । कोए भी माणस इस काम नै न्ही कर सकता ।

17 हम उन बरगे कोनी जो परमेसवर के वचन नै पईसा खात्तर प्रचार करै सै; पर यो जाण सां के परमेसवर नै म्हारे ताहीं भेज्या सै अर मन की सच्चाई तै हम उसका वचन आज्ञाकारिता अर मसीह अधिकार तै सुणावां सां, यो जाणके के परमेसवर म्हारे ताहीं देखै सै ।

### 3

~~~~~

1 के हम दुबारा अपनी बड़ाई करण लागगे? या हमनै और माणसां की ढाळ सिफारिश की चिट्ठियाँ थारे धोरै ल्याण की या थारे तै लेण की जरूरत सै?

2 थम म्हारे खात्तर एक चिट्ठी की ढाळ सां, जो म्हारे खात्तर सिफारिश करै सै, अर म्हारे दिला पै लिक्खी होई सै, उस ताहीं सारे माणस पढ़ सके, अर म्हारे भले काम्मां नै पिच्छाण सके ।

3 यो तो साफ दिक्खै सै के थम मसीह की चिट्ठी के समान सां, जो मसीह की ओड़ तै सै, जो म्हारी सेवकाई का फळ सै, अर जो स्याही तै पत्थर की पटियाँ पै न्ही, पर जिन्दे परमेसवर की आत्मा तै दिल की माँस रूपी पटियाँ पै लिक्खी सै ।

4 हम इस करके कहवां सां, के हम मसीह के जरिये परमेसवर पै भरोस्सा करा सां ।

5 हम यो न्ही कहन्दे के म्हारी कुछ करण की काबलियत खुद तै सै, पर वो काबलियत परमेसवर की ओड़ तै सै ।

6 जिसनै म्हारै ताहीं नये करार के सेवक होण के लायक भी बणाया, मूसा के नियम-कायदा के सेवक न्ही, बल्के पवित्र आत्मा के सेवक सां; क्यूँके मूसा के नियम-कायदे ना मानण तै मौत आवै सै, पर पवित्र आत्मा जिन्दगी देवै सै।

7-8 मूसा नबी के नियम-कायदे जो पत्थर की पट्टियाँ पै लिखे गये थे, तब परमेसवर की महिमा ओड़ै जाहिर होई थी, उस कारण भोत बखत ताहीं इस्राएल के माणस मूसा नबी का चेहरा भी कोनी देखण पाए थे, क्यूँके उसका चेहरा तेजोमय था, उसके चेहरे का तेज ज्यादा बखत ताहीं कोनी रह सका, इस करके मूसा नबी ताहीं जो नियम-कायदे दिए गये थे, वे मौत नै लेके आवै थे। तो पवित्र आत्मा का काम जो नये करार के मुताबिक सै, वो और भी तेजोमय होवैगा।

9 क्यूँके जिब माणसां नै कसूरवार बणाण आळा पुराणा करार तेजोमय था, तो जो माणसां नै धर्मी बणाण आळा नया करार सै और भी तेजोमय होवैगा।

10 अर जो तेज पुराणे करार तै आवै था, उसका तेज जो इब नये करार तै आवै सै, उसके आगूँ कुछ भी कोनी।

11 क्यूँके जो तेज मूसा नबी के नियम-कायदा म्ह था, जिब वो जो घटदा जावै था, तोभी वो तेजोमय था, तो उस नये करार का तेज जो स्थिर सै, वो और भी तेजोमय होवैगा।

12 ज्यातै इसी आस राखके हम हिम्मत के गेल्या बोल्लां सां।

13 हम मूसा नबी की ढाळ न्ही, जिसनै अपणे मुँह पै पड़दा गेरया था। ताके इस्राएली माणस उस घटणआळे तेज के अन्त नै ना देख पावै।

14 पर इस्राएल के माणसां की अकल खराब होगी, क्यूँके आज ताहीं पुराणा नियम पढ़ते बखत उनके दिलां पै वोए पड़दा पड्या रहवै सै, पर वो पड़दा मसीह पै बिश्वास करण तै ए उठ जावै सै।

15 आज ताहीं जिब कदे भी मूसा नबी की किताब पढ़ी जावै सै, तो उन ताहीं पूरी तरियां समझ म्ह कोनी आन्दी।

16 पर जिब कदे वो यीशु मसीह पै बिश्वास करैंगे, तो वो पड़दा उठ जावैगा।

17 प्रभु तो आत्मा सै: अर जित्त किते परमेसवर का आत्मा सै, ओड़ै नियम-कायदे तै आजादी सै।

18 हम परमेसवर की महिमा इस तरियां देख्वां सां, जिस तरियां शीशे म्ह अपना मुँह, उस मुँह के आगूँ पड़दा कोनी, परमेसवर आत्मा सै। अर वो हमनै अपणे तेजस्वी स्वरूप म्ह थोड़ा-थोड़ा करके बदलता जावां सै।

4



1 ज्यातै जिब म्हारै पै इसी दया होई के हमनै या परमेसवर के वचन प्रचार करण की सेवा मिली, तो हम हिम्मत न्ही हारते।

2 हमनै शर्मनाक अर गुप्त काम्मां ताहीं छोड़ दिया, अर ना चतुराई करते, अर ना परमेसवर के वचन नै तोड़-मरोड़ के पेश करा सां। पर परमेसवर के वचन की सच्चाई नै माणसां के स्याम्ही जाहिर करां सां, ताके हरेक माणस परमेसवर के स्याम्ही या गवाही दे सकै सै, के यो सच सै।

3 पर जै म्हारै सुसमाचार नै कोए समझ न्ही पावै, तो यो नाश होण आळा ए के खात्तर गुप्त सै।

4 इस दुनिया के ईश्वर शैतान नै उन अबिश्वासियाँ की अकल ताहीं, आँधी कर दिया सै, ताके उस चाँदणे नै जो मसीह के तेजोमय सुसमाचार तै आवै सै, उस ताहीं देख ना सकै। जो दिखावै सै के परमेसवर किसा सै।

5 क्यूँके हम खुद नै न्ही, पर मसीह यीशु नै प्रचार करा सां, के मसीह यीशु ए प्रभु सै। अर अपणे वारै म्ह न्यु कहवां सां, के हम यीशु के कारण थारे सेवक सां।

6 ज्यातै के परमेसवर नै कह्या, “अन्धकार म्ह तै चाँदणा चमकै,” अर परमेसवर म्हारै दिलां म्ह चाँदणा की तरियां समझ दे, ताके हम परमेसवर की महिमा नै समझ सका, जो यीशु मसीह म्ह सै।

7 हम माट्टी के बासणा की तरियां सां, जिस म्ह धन भरया सै, या घनी सामर्थ म्हारी न्ही, बल्के परमेसवर की सै।

8 हम चीगादे तै क्लेश तो भोग्गां सां, पर संकट म्ह न्ही पड़दे, म्हारै धोरै उपाय तो कोनी, पर निराश न्ही होन्दे।

9 सताए तो जावां सां, पर छोड़डे न्ही जान्दे; गिराए तो जावां सां, पर नाश न्ही होन्दे।

10 हम हर बखत मौत के खतरे म्ह रहवां सां, जिस तरियां यीशु म्हारे खात्तर मरया गया, ताके हम दुसरे माणसां नै म्हारे उन काम्मां के जरिये दिखा सका के यीशु म्हारे म्ह बसै सै।

11 क्यूँके हम जिन्दे जी सारी हाण यीशु के कारण मौत खतरे म्ह रहवां सां, ताके मसीह यीशु का जीवन म्हारी मरण आळी देह म्ह जाहिर होवै।

12 इस करके हम मौत के खतरे म्ह रहवां सां, इसका नतिज्जा यो होगा के थमनै अनन्त जीवन मिलेगा।

13 पर हम तो प्रचार करते रहवांगे क्यूँके म्हारा विश्वास उस भजनकार की ढाळ सै, जिसनै भजन संहिता म्ह कह्या, “मै परमेसवर पे विश्वास करूँ सूँ,” इस खात्तर बोल्लू सूँ।

14 इस करके हमनै बेरा सै के जिसनै प्रभु यीशु ताहीं मुर्दा म्ह तै जिन्दा करया, वोए परमेसवर हमनै भी यीशु म्ह जिन्दा करेगा, अर धारे गेल्या हमनै भी अपणी मौजूदगी म्ह ले जावैगा।

15 क्यूँके सारे दुख हमनै सहे, ताके भोत सारे लोग जाण सकै के परमेसवर कितना करुणामय सै, अर परमेसवर की महिमा के खात्तर ज्यादा तै ज्यादा लोग उसका धन्यवाद करे।

16 ज्यांतै हम हिम्मत न्ही हारते; हालाके म्हारी देह नाश होन्दी जावै सै, तोभी म्हारी अन्तरात्मा हर रोज नई होन्दी जावै सै।

17 क्यूँके म्हारी मौजूदा परेशानियाँ भोत छोट्टी सै, अर वो लम्बे बखत ताहीं कोनी रहवैगी। क्यूँके ये अनन्त महिमा का कारण बणैगी, जो म्हारे सोचण तै भी बड़ी सै।

18 अर हम तो देखी होई चिज्जां ताहीं न्ही पर अनदेखी चिज्जां नै देखदे रहवां सां; क्यूँके देखी होई चीज माड़े-से दिन की सै, पर अनदेखी चीज सारी हाण बणी रहवै सै।

5

परमेश्वर के पल्लव

1 क्यूँके हमनै बेरा सै के पल्लव का शारीरिक देह सरीखा घर जो हमनै मिल्या सै, जो नाश करया जावैगा, तो हमनै परमेसवर के कान्ही तै सुर्ग पै एक इसा घर मिलेगा, जो हाथ्यां तै बणया होया न्ही, पर सारी हाण खात्तर टिकाऊ सै।

2 इस देह म्ह तो हम कराहवा अर बड़डी लालसा राक्खां सां, ताके अपने सुर्गीय देह नै पैहर ल्या

3 क्यूँके सुर्गीय देह पैहरण तै हम उधाड़े न्ही पाए जावैगे।

4 अर हम शारीरिक देह सरीखे घर म्ह रहन्दे होए बोझ तै दबे रोन्दे-पिटते रहवां सां, क्यूँके हम इसनै छोड़णा न्ही चाहन्दे, पर हम चाहवां सां के परमेसवर हमनै सुर्गीय देह देवै, ताके शारीरिक देह नाश होण के बाद हमनै अनन्त राज्य म्ह सुर्गीय देह मिल जावै।

5 जिसनै म्हारै ताहीं जिस सुर्गीय देह के खात्तर त्यार करया सै, वो परमेसवर सै, जिसनै म्हारै ताहीं ब्याने म्ह पवित्तर आत्मा भी दिया सै।

6 आखर म्ह हम सारी हाण होसला राक्खां सां, अर या जाणां सां के जिब ताहीं हम देह म्ह रहवां सां, तब तक प्रभु के सुर्ग तै न्यारे सां, जो सुर्ग म्ह सै।

7 हम प्रभु यीशु पे विश्वास करण तै जिवां सां, ना के उस ताहीं देखण तै।

8 ज्यांतै हम होसला राक्खां सां, अर हम मरण के बाद, देह तै न्यारे होके प्रभु के गेल्या रहणा हम और भी घणा बढ़िया समझां सां।

9 इस कारण म्हारै मन की इच्छा या सै, चाहे हम सुर्ग म्ह परमेसवर के गैल रहवां, या धरती पै रहवां, पर हम उसनै भान्दे रहवां।

10 क्यूँके जरूरी सै के हम सब मसीह कै न्याय आसन कै स्याम्ही खड़े होवां, ताके हरेक माणस अपणे-अपणे आच्छे-भुन्डे काम्मां का बदला पावै, जो उसने शारीरिक देह कै जरिये करे सै।

~~~~~

11 ज्यांतै प्रभु का भय मानके हम माणसां ताहीं न्यू समझावां सां, के वे इस सच्चाई पै विश्वास करै, अर परमेसवर जाणै सै के हम कौण सां, अर मै उम्मीद करूँ सूँ, के थम भी अपणी अन्तरात्मा म्ह हमनै आच्छी तरियां जाण ल्यो।

12 हम फेर भी अपणी बड़ाई थारे स्याम्ही कोनी करदे, बल्के हम अपणे बाँरे म्ह थारे ताहीं गर्व करण का मौक्का देवां सां, के थम उननै जवाब दे सको, जो अपणे मन की बजाये बाहरी रूप पै घमण्ड करै सै।

13 जै कोए कहवै के हम पागल सां, तो परमेसवर कै खात्तर, अर जै श्रयाणे सा तो थारे खात्तर सां।

14 क्यूँके मसीह का प्यार हमनै मजबूर कर देवै सै। ज्यांतै के हम न्यू समझां सां, के जब एक माणस सारया कै खात्तर मरया तो सारे माणस मरगे।

15 अर मसीह इस कारण सारे माणसां खात्तर मरया ताके जो जिन्दे सै, वे आगै तै अपणे खात्तर न्ही जीवै, पर मसीह कै खात्तर जीवै, जो उनकै खात्तर मरया अर दुबारा जिन्दा होगया।

~~~~~

16 इस करके इब हमने माणसां ताहीं दुनियावी नजरिये तै देखना छोड़ दिया सै। हालाके एक बखत था, जब हमने मसीह ताहीं भी दुनियावी नजरिये तै देख्या था, पर इब न्ही, क्यूँके इब हम उस ताहीं जाणगे सां।

17 जै कोए मसीह म्ह विश्वास करै सै, तो वो नयी जिन्दगी पा लेवै सै। पुराणा सुभाव चल्या जावै सै, अर नया सुभाव आ जावै सै।

18 ये सारी बात परमेसवर की ओड़ तै सै, जिसनै मसीह कै जरिये अपणे गेल्या म्हारा मेळ-मिलाप कर लिया सै, अर मेळ-मिलाप की सेवकाई का काम म्हारै ताहीं सौंप दिया सै।

19 यानिके परमेसवर नै मसीह म्ह होके अपणे गेल्या दुनिया का मेळ-मिलाप कर लिया, अर माणसां के पापां का दोष उनपै न्ही लाया, अर याए बात मेळ-मिलाप का सन्देश सै, जो परमेसवर नै म्हारै ताहीं सौंप दिया सै।

20 ज्यांतै, हम मसीह के राजदूत सां। परमेसवर म्हारै जरिये माणसां तै बिनती करण लाग रहया सै। हम मसीह की ओड़ तै थारे तै बिनती करा सां, के परमेसवर के गेल्या मेळ-मिलाप कर ल्यो।

21 मसीह जो पाप तै अनजाण था, उस्से ताहीं परमेसवर नै म्हारै खात्तर पापी ठहराया, ताके हम परमेसवर की नजर म्ह धर्मी बण जावां, क्यूँके यीशु मसीह नै म्हारै पापां का दण्ड अपणे उप्पर ले लिया।

6

1 हम जो परमेसवर कै गैल काम करणीये सां, या बिनती करां सां, के उसका अनुग्रह जो थारे पै होया, उसनै बेकार ना जाण द्यो।

2 क्यूँके पवित्र ग्रन्थ म्ह परमेसवर नै कह्या सै, “सही बखत पै मन्नै तेरी सुण ली, अर उद्धार कै दिन मन्नै तेरी मदद करी।” सुणो, इब्बे वो सही बखत सै; अर आज ए वो उद्धार का दिन सै।

3 हम परमेसवर कै गैल काम करणीया के कारण, हम किसे बात म्ह ठोक्कर खाण का कोए भी मौक्का कोनी देन्दे, ताके म्हारी सेवा पै कोए दोष ना आवै।

4 इस करके हम सारे हालातां म्ह खुद ताहीं परमेसवर के सच्चे सेवक के समान पेश करां सां, जिसा धीरज तै दुख सहण म्ह, गरीबी म्ह, हर बखत संकट सहण म्ह,

5 अर कोड़े खाण म्ह, कैद होण म्ह, रोळे-रब्दियां म्ह, मेहनत म्ह, जागदे रहण म्ह, ब्रत करण म्ह,

6 पवित्रता म्ह, ज्ञान म्ह, धीरज म्ह, करुणा तै, पवित्र आत्मा तै,

7 सच्चे प्यार म्ह, सच के वचन म्ह, परमेसवर की सामर्थ्य म्ह, हम धार्मिकता के हथियारां नै सोळे हाथ तै लड़ण खात्तर अर ओळे नै बचाव खात्तर इस्तमाल करां सां।

8 जब माणस हमनै आच्छे या बुरे माणस कहवै, जब वे म्हारी बड़ाई करै या अर बेजती करै, तो हम भकाण आळे जिसे लाग्गा सां, तोभी सच्चे सां।

9 कई माणस हमनै अनजाणा कै बरगे समझै सै, तोभी हम मशहुर सां, मरे होए बरगे दिक्कां सां पर देखो जिन्दे सां, मार खाण आळा कै बरगे सां पर जी तै कोनी मारे जान्दे।

10 म्हारा पै भी दुख का बखत आवै सै, पर हम सारी हाण आनन्दित रहवां सां, हम खुद तो कंगालां की तरियां सां, पर घणखरयां नै आत्मिक रूप तै साहूकार बना देवां सां, हम इसे सा जिस ढाळ म्हारै धोरै किमे कोनी, तोभी सारा किमे सै, येए सारी बात हमनै परमेसवर का सच्चा सेवक बणण म्ह मदद करै सै।

11 हे कुरिन्थियों नगर के विश्वासियों, हमनै खुलकै थारे तै बात करी सै, हम पूरे मन तै थारे तै प्यार करां सां।

12 म्हारै मन म्ह थारे खात्तर प्यार कम न्ही होन्दा, पर थारा प्यार म्हारे खात्तर कम होग्या।

13 पर मै अपने बाळक जाणकै थारे तै कहूँ सूँ, के थम भी उसके बदले पूरे मन तै म्हारे तै प्यार करो।

14 अविश्वासीयाँ के गैल साझीदार ना बणो, क्यूँके धार्मिकता अर अधर्म का मेलजोल कोनी। या चाँदणे अर अन्धकार की संगति कोनी होन्दी।

15 अर मसीह का शैतान के गैल कोए रिश्ता कोनी होन्दा, या विश्वासी के गेल्या अविश्वासी का कोए नात्ता कोनी।

16 अर परमेसवर के मन्दर म्ह मूर्तियाँ का काम कोनी। क्यूँके हम तो जिन्दे परमेसवर के मन्दर सां, जिसा परमेसवर नै पवित्र ग्रन्थ म्ह कह्या, “मै अपने माणसां के गैल रहूँगा, अर उन म्ह हान्ड्या-फिरया करूँगा, अर मै उनका परमेसवर होऊँगा, अर वे मेरे माणस होवेंगे।”

17 ज्यातै प्रभु अपने वचनां के जरिये कहवै सै, “उन माणसां के बिचाळै तै लिक्ड़ो जो परमेसवर ताहीं न्ही मानते, अर न्यारे रहो, अर अशुद्ध चिज्जां तै कोए रिश्ता ना राक्खों, तो मै थमनै अपनाऊँगा।

18 अर मै थारा पिता होऊँगा, अर थम मेरे बेटे अर बेटियाँ होओगे। यो सर्वशक्तिमान प्रभु का वचन सै।”

7

1 हे प्यारे विश्वासी भाईयो, जब हमनै वो वादा मिल्या सै, ताके हम परमेसवर की ऊलाद कुह्वावां, तो आओ, हम अपनी देह अर आत्मा नै गंदा करण आळे सारे बुरे काम छोड़ द्या, अर परमेसवर का भय मानते होए पूरी रीति तै अपने-आपने पवित्र करण की कोशिश करां।

2 थम म्हारे तै पूरे मन तै प्यार करो। हमनै ना किसे पै जुल्म करया, ना किसे गैल अन्याय करया, अर ना किसे ताहीं ठग्या सै।

3 मै थमनै कसूरदार ठहराण के खात्तर न्यू न्ही कहन्दा। क्यूँके मै पैहल्याए तै कह चुक्या सूँ, के हम थारे ताहीं पूरे मन तै प्यार करां सां, अर हम थारे गेल्या जीण-मरण के खात्तर भी त्यार सां।

4 मै थारे तै घणे विश्वास के गेल्या बोल्लण लागरया सूँ, मन्नै थारे पै घणा गर्व सै, मै बड़ा उत्साहित सूँ। अपने सारे क्लेश म्ह, मै आनन्द तै घणा भरपूर रहूँ सूँ।

5 त्रोआस नगर तै जब हम मकिदूनिया परदेस म्ह आये, फेर भी म्हारी देह नै चैन कोनी मिल्या, पर हम चौगरदे तै क्लेश पावां थे, बाहरणै लड़ाई-झगड़े थे, म्हारे मन म्ह डरावणी बात थी।

6 तोभी दुखियाँ ताहीं तसल्ली देणआळे परमेसवर नै तीतुस के आण तै म्हारे ताहीं उत्साहित करया।

7 ना सिर्फ उसके आण तै, पर उस उत्साह के जरिये भी, जो तीतुस नै थारे म्ह पाया, उसनै थारी लालसा, थारे दुख, अर मेरै खात्तर थारी धुन की खबर म्हारै ताहीं सुणायी, जिसतै मन्नै और भी खुशी होई।

8 मै पसताऊ कोनी, के मन्नै थारे ताहीं चिट्ठी लिखी, हालाकि मन्नै अपणी चिट्ठी तै थारे ताहीं दुखी करया, मै पैहल्या तो पछताया, जिब मन्नै देख्या के थम मेरी चिट्ठी तै थोड़े बखत खात्तर तो उदास होए सां।

9 पर इब मै खुश सूं, ज्यातै न्ही के मन्नै थारे ताहीं दुख पोंहचाया, बल्के ज्यातै के थमनै उस दुख के कारण पाप करणा छोड़ दिया, क्यूँके थम दुखी थे, जिसा परमेसवर चाहवै था, के म्हारी ओड़ तै थमनै किसे बात का नुकसान ना पोहोचै।

10 क्यूँके परमेसवर की ओड़ तै मिलण आळा दुख, पापां नै छोड़ण का कारण बणै सै, जिसका नतिज्जा छुटकारा सै, उस तरियां के दुख का पछतावा कोनी होन्दा। पर दुनिया तै मिलण आळा दुख अनन्त मौत का कारण बणै सै।

11 इस करके सुणो, परमेसवर की ओड़ तै मिलण आळे दुख तै थम कितने गुणवाण बण गये, थारे म्ह कितना उत्साह, जबाबदारी, रिस, भय, लालसा, धुन अर बदला लेण का विचार छोड़णा, थमनै सारी तरियां तै न्यू साबित कर दिया सै, के थमनै इन सारी बाततां म्ह कोए कमी कोनी छोड़डी।

12 फेर मन्नै पैहले जो थारे धोरै वो चिट्ठी लिखी थी, वा ना तो उसके कारण लिखी, जिसनै नाइंसाफी करी, अर ना उसके कारण जिसके साथ नाइंसाफी करी गई, पर ज्यातै के थारा जोश जो म्हारै खात्तर सै, वो परमेसवर के स्याम्ही थारे पै जाहिर हो जावै।


13 ज्यातै हमनै तसल्ली मिली, म्हारी तसल्ली तो तीतुस की खुशी के कारण सै, म्हारे ताहीं और भी घणी खुशी होई क्यूँके उसका मन थारे कारण और भी ज्यादा खुशमिसाज होगया सै।

14 क्यूँके जै मन्नै उसके स्याम्ही थारे बारै म्ह कुछु गर्व दिखाया, तो मै शर्मिन्दा कोनी होया, पर जिसा हमनै थारे तै सारी बात सच-सच कह दी थी, उस्से तरियां ए म्हारा गर्व दिखाणा तीतुस के स्याम्ही भी सच्चा लिकड़या।

15 जिब तीतुस ताहीं थम सारया के आज्ञाकारी होण की बात याद आवै सै, अर किस ढाळ थम डरदे अर काम्बदे होए उसतै मिले, तो उसका प्यार थारे खात्तर और भी बधता जावै सै।

16 मन्नै घणी खुशी हो सै, क्यूँके मन्नै हरेक बात म्ह थारे पै पूरा भरोस्सा सै।

8



1 इब हे विश्वासी भाईयो, हम थमनै परमेसवर के उस अनुग्रह की खबर देवां सां, जो मकिदुनिया परदेस की कलीसिया के विश्वासियाँ पै होया सै।

2 उनकी परख बड़ी मुसीबतां म्ह होवै सै, अर घणी गरीब होण पै भी खुशी अर खुल्ले दिल तै दुसरे विश्वासियाँ की मदद करी।

3 उनके बारै म्ह मेरी या गवाही सै, के उननै जितना दे सकै थे दिया, बल्के उसतै भी ज्यादा बढ़कै दिया।

4 उननै भोत ज्यादा विनती करी के यो दान उन विश्वासी भाईयाँ म्ह बाटचा जावै जो यरुशलेम नगर म्ह सै।

5 उननै म्हारी सोच तै भी बढ़कै करया, उननै पैहल्या काम यो करया, के उननै अपणे-आप ताहीं परमेसवर के खात्तर अर फेर म्हारे खात्तर अपणे-आप ताहीं भी दे दिया, जिसा के परमेसवर चाहवै था के वो इसा करै।

6 ज्यातै हमनै तीतुस तै विनती करी, के जिस तरियां उसनै पैहल्या इस दान देण के काम की शरुआत करी थी, उस्से तरियां ए वो इस सराहनीय काम ताहीं थारे बिचाळे पूरा भी करै ले।

7 ज्यांतै जिंसा थम हरेक बात म्ह यानिके विश्वास, वचन पूरवार करण म्ह, ज्ञान अर सारी ढाळ की कोशिश म्ह, अर उस प्यार म्ह जो म्हारै तै करो सो, बढ़दे जाओ सो, उस्से तरियाँ ए गरीब विश्वासियाँ खात्तर दान देण म्ह भी बढ़ते जाओ ।

8 मै थमनै कोए हुकम कोनी देंदा, मै सिर्फ बाकियाँ के उत्साह तै थारे प्यार की सच्चाई नै परखण लागरया सू ।

9 थम म्हारै पूरभु यीशु मसीह के अनुग्रह नै जाणो सो, के वो धनी होकै भी थारे खात्तर कंगाल बण गया, ताके उसकै कंगाल हो जाण तै थम धनी हो जाओ ।

10 पिच्छली साल थमनै दान दिया बल्के दान देण की इच्छा म्ह आगुँ भी थे, इस बारे म्ह मै थमनै एक सलाह देणा चाहूँ सू, के दान देण का सब तै बढ़िया तरिकका के सै?

11 जो काम थमनै शुरु करया सै, उस ताहीं पूरा भी करो । इस काम के खतम होण तक, इसे तरियाँ उत्साहित बणे रहों, जिस तरियाँ उसकी योजना तैयार करते बखत थे । इस काम नै अपनी पूजी अर काबलियत कै मुताबिक पूरा भी करो, जो इस बखत थारे धोरै सै ।

12 जै किसे की दान देण की इच्छा हो, तो जो कुछ उसकै धोरै सै, उस्से कै मुताबिक उसका दान लिया जावैगा, ना के उसकै मुताबिक जो उसकै धोरै कोनी ।

13 म्हारा मतलब यो कोनी के दुसरयाँ की भलाई करण तै थम खुद दुख सहो, म्हारा मकसद सिर्फ सब कै साथ एक जिंसा बरताव करो ।

14 इस बखत तो थारी बढ़ोतरी उनकी जरूरत पूरी करण कै खात्तर भोत सै, कदे यो भी हो सकै सै, के थमनै खुद नै जरूरत पड़े अर वे अपनी बढ़ोतरी म्ह तै थारी मदद करै फेर दोन्नु पक्ष बरोबर हो जावेंगे ।

15 जिंसा के पवित्र ग्रंथ म्ह लिख्या सै, “जिसनै घणा कट्टा करया उसनै कुछ भी घणा न्ही पाया । अर जिसनै घाट कट्टा करया उसनै कुछ कमी कोनी होई ।”

????? ?? ???? ??? ??? ???? ?

16 परमेसवर का धन्यवाद होवै, जिसनै थारे खात्तर वाए चिंता तीतुस कै मन म्ह दे दी ।

17 जिब हमनै उस ताहीं थारे धोरै आण खात्तर विनती करी, तो उसनै म्हारी विनती मान ली, अर घणा उत्साहित होके वो अपनी मर्जी तै थारे धोरै चल्या गया ।

18 हमनै उसकै गेल्या उस विश्वासी भाई ताहीं भी भेज्या सै, जिसका नाम सुसमाचार फैलाण के बारे म्ह सारी कलीसिया म्ह फैल्या होया सै ।

19 अर इतणाए न्ही, पर वो कलीसिया के माणसां कै जरिये ठहराया भी गया, ताके इस दान कै काम कै खात्तर म्हारै गेल्या जावै । हम दान देण की या सेवा यरुशलेम के विश्वासियाँ ताहीं ज्यांतै करा सां के पूरभु की महिमा अर सेवा करण म्ह म्हारै मन की तयारी जाहिर हो जावै ।

20 हम इस बात म्ह चौकस रहवां सां के खुल्ले दिल तै दान देण की सेवा के इस काम कै बारे म्ह जो हम करा सां, कोए म्हारै पै दोष ना लाण पावै ।

21 क्यूँके जो बात सिर्फ पूरभु ए के स्याम्ही न्ही, पर माणसां कै स्याम्ही भी भली सै हम उननै आच्छी तरियाँ तै करां सां ।

22 हमनै उसकै गेल्या अपने एक और विश्वासी भाई ताहीं भी भेज्या सै, जिस ताहीं हमनै बार-बार परख कै घणी बातों म्ह हौसलै आळा पाया सै; पर इब थारे पै उसनै घणा भरोस्सा सै, इस कारण वो और भी घणा हौसलै आळा सै ।

23 जै कोए तीतुस के बारे म्ह बुझे, तो वो मेरा मित्र अर थारे खात्तर मेरै गैल काम करणीया सै, अर जै कोए म्हारै विश्वासी भाईयाँ कै बारे म्ह बुझे, तो वे कलीसियाओं के भेज्जे होए अर मसीह नै महिमा देण आळे सै ।

24 इस करके कलीसियाओं के विश्वासियाँ स्याम्ही अपने प्यार नै जाहिर करण के जरिये साबित करो, के म्हारा थारे बारे म्ह गर्व करणा साच्चा सै ।

9

1 मन्ने इब उन पवित्र माणसां नै जो यरुशलेम म्ह रहवै सै, उन ताहीं दान देण की सेवकाई के बारे म्ह लिखण की जरूरत कोनी।

2 क्यूँके मदद करण की थारी मन की लालसा नै मै पैहले तै ए जाणु सूं, जिसके कारण मै थारे बारे म्ह मकिदुनिया कलीसिया के विश्वासी भाईयाँ के स्याम्ही गर्व करूँ सूं, के थम अखाया* परदेस के माणस एक साल पैहल्या तै दान देण खात्तर त्यार थे, अर थारे जोश नै घणखरे मकिदुनिया परदेस के विश्वासियाँ ताहीं भी दान देण खात्तर उत्साहित करया सै।

3 पर मै थारे धारे तीतुस अर दो विश्वासी भाईयाँ नै भेज्जू सूं, के हमनै जो गर्व थारे बारे म्ह दिखाया, वो इस बात म्ह बेकार ना ठहरै; पर जिसा मन्ने कहाँ उसाए थम यरुशलेम के विश्वासी भाईयाँ नै दान देण खात्तर त्यार रहो।

4 इसा ना हो के जिब मकिदुनिया के कुछ विश्वासी भाई मेरै गेल्या आवै अर वो थमनै दान देण खात्तर त्यार न्ही पावै, तो हो सके सै, के हम थारे पै भरोस्से करण के कारण शर्मिन्दा होवां, पर थम म्हारे तै भी ज्यादा शर्मिन्दा होओगे।

5 ज्यांतै मन्ने विश्वासी भाईयाँ तै या विनती करणा जरूरी समझया के वे पैहल्या तै थारे धारे जावै, अर जो दान देण का वादा थमने करया था, उसका इन्तजाम कर ल्यो, जो थमनै कंजूसी तै न्ही पर खुल्ले दिल तै देण खात्तर कहाँ।

6 पर बात या सै, जो थोड़ा-सा बोवै सै, वो थोड़ा-सा काट्टैगा भी, अर जो घणा बोवै सै, वो घणा काट्टैगा।

7 हरेक माणस जिसा मन म्ह सोचवै उसाए दान करै, ना कुढ़-कुढ़ के अर मन म्ह दाब तै, क्यूँके परमेसवर राज्जी होके देण आळे तै प्यार करै सै।

8 परमेसवर इस योग्य सै, के वो थारे ताहीं भोत-ए घणा अनुग्रह दे, ताके सब कुछ थमने हर बात म्ह हर बखत पर्याप्त मात्रा म्ह मिलता रहवै, अर हरेक भले काम के खात्तर थारे धारे भोत घणा होवै।

9 जिसा पवित्र ग्रन्थ म्ह लिख्या सै, “परमेसवर जरूरतमंदां नै खुल्ले दिल तै देवै सै, उसकी धार्मिकता सारी हाण बणी रहवै सै।”

10 परमेसवर ए सै जो किसानां नै बीज अर खाण खात्तर रोट्टी देवै सै। इस तरियां परमेसवर हमेशा थारे खात्तर धन देवैगा, ताके थम उन माणसां की मदद कर सकों जिन ताहीं धन की जरूरत सै।

11 थम हरेक तरियां तै आशीष पाओ, ताके थम खुल्ले दिल तै दे सकों, अर जिब थारा दान गरीब माणसां म्ह बाटचा जावै तो वे सारे परमेसवर का धन्यवाद करै।

12 क्यूँके इस दान की सेवकाई तै ना सिर्फ पवित्र माणसां की जरूरत पूरी होवै सै, पर भोत-से लोग भी दिल तै परमेसवर का धन्यवाद करै सै।


13 क्यूँके इस दान की सेवकाई नै सबूत मानके, वे परमेसवर की महिमा करैंगे, क्यूँके थमनै मसीह के सुसमाचार के हुकम नै मानके उस ताहीं अपणायया सै, अर गरीब विश्वासियाँ की मदद खुल्ले दिल तै करी सै।

14 अर वे थारे खात्तर परमेसवर तै प्रार्थना करै सै। वे थारे तै प्यार करै सै, क्यूँके वे जाणै सै, के परमेसवर नै थारे पै बड़ा अनुग्रह करया सै।

15 परमेसवर का उसके उस दान के खात्तर धन्यवाद हो। जिस ताहीं हम ब्यान न्ही कर सकदे।

* 9:2 9:2 यूनान

10



1 मैं पौलुस, थारे ताहीं मसीह की दयालुता अर नम्रता के साथ बिनती करूँ सूँ, हालाके मन्ने अहसास सै के थमनै इसा लागै सै, के आम्नै-साम्नै बात करण म्ह डरपोक सूँ, अर सिर्फ चिट्ठी लिखके शिक्षा देण म्ह ए साहसी सूँ।

2 मैं थारे तै या बिनती करूँ सूँ, के जब मैं थारे धोरै आऊँ तो मन्ने उन माणसां तै कड़ाई तै बात ना करणी पड़े, जो ये सोचवै सै के हम दुनियावी तौर तरिकां के मुताबिक चाल्लण आळे सां।

3 हालाके हम इस दुनिया म्ह रहवां सां, पर हम इस दुनिया के बाकी माणसां की ढाळ लड़दे-झगड़ते कोनी।

4 हम इन्सानी विचारां अर झूट्टी बहसबाजी नै नाश करण खात्तर दुनियावी हथियारां का न्ही पर परमेसवर के ताकतवर हथियारां का इस्तमाल करां सां।

5 हम इन्सानी बहस-बाजी की बजह तै आण आळी हरेक रुकावट नै दूर कर देवां सां, जो माणसां नै परमेसवर तै दूर राखवै सै, हम उनकी बिद्रोही भावना नै कैद करके मसीह का आज्ञाकारी बणा देवां सां,

6 अर जब वे पूरी रीति तै मसीह के हुकम नै मानण आळे बण जावै सै, तो हम मसीह यीशु के हुकम नै ना मानण आळा ताहीं दण्ड देवां सां।

7 थम बाहरी दिखावट पै ध्यान देओ सां। जै किसे माणस नै खुद पै यो भरोसा हो के वो मसीह यीशु का सै, तो वो यो भी जाण ले के जिसा वो मसीह यीशु का सै, उस्से तरियां हम भी मसीह यीशु के सां।

8 क्यूँके जै मैं उस हक के बारे म्ह और भी गर्व करूँ, जो प्रभु नै थारे विश्वास ताहीं घटाण खात्तर न्ही पर थारे विश्वास नै बढ़ाण खात्तर म्हारै ताहीं दिया सै, तो मैं शर्मिन्दा न्ही होऊँगा।

9 मैं अपनी चिट्ठियाँ के जरिये थमनै डराण की कोशिश न्ही करदा।

10 क्यूँके थारे म्ह तै कई माणस कहवै सै, “की मेरी सारी चिट्ठी तो भोत कठोर अर असरदार सै; पर जब मैं आम्नै-साम्नै मिलु सूँ, तो मैं कमजोर अर बोल्लण म्ह बेकार लागू सूँ।”

11 जो इसा कहवै सै, वो न्यू समझ लेवै के जिसा पीठ पाच्छै, चिट्ठियाँ म्ह म्हारे सन्देश सै, उस्से तरियां ए थारे स्याम्ही म्हारे काम भी होवैगें।

12 क्यूँके म्हारै म्ह या हिम्मत कोनी के हम अपने-आपनै उन म्ह गिणया अर मिलावां, जो अपनी बड़ाई खुद करै सै, अर अपने-आप ताहीं आपस म्ह नाप-तौलके एक-दुसरे तै बरोबरी करके बेकूफ ठहरावै सै।

13 हम तो उस काम की हद तै बाहरणै घमण्ड कदे भी न्ही करागें, जो काम परमेसवर नै म्हारे ताहीं दिया सै, पर उस्से हद तक जो परमेसवर नै म्हारै खात्तर ठहरा दी सै, अर उस म्ह थम भी आगे सो, अर उन कामां की हद म्ह ए घमण्ड करागें।

14 जब हम पैहली बार थारे धोरै पोहचे तो हम घमण्ड करण म्ह उस हद नै न्ही लांघे जित परमेसवर नै म्हारे ताहीं काम करण खात्तर ठहराया था। उसनै म्हारे ताहीं थारे इलाके म्ह काम करण खात्तर ठहराया था, अर हम थारे ताहीं मसीह का सुसमाचार सुणाण आळे पैहले माणस सां।

15 अर हम हद तै बाहरणै दुसरयां की मेहनत पै घमण्ड न्ही करदे; पर हमने आस सै के ज्यो-ज्यो धारा विश्वास बधता जावैगा त्यों-त्यों हम अपनी हद के मुताबिक थारे कारण और भी माणसां ताहीं मसीह का सुसमाचार सुणा पावांगें।

16 ताके हम थारी इलाके की हद तै परै दूर-दूर जगहां म्ह भी माणसां ताहीं सुसमाचार सुणावां, अर न्यू न्ही के हम दुसरयां की हद के भीत्तर बणे बणाए कामां पै घमण्ड करा।

17 पर जिसा के पवित्र ग्रन्थ म्ह लिख्या सै,

जै कोए घमण्ड करै, तो वो प्रभु पै घमण्ड करै।

18 क्यूँके जो अपनी बड़ाई करै सै वो न्ही, पर जिसकी बड़ाई प्रभु करै सै, वोए प्रभु की निगांह म्ह सही कुह्वावै सै।

11

~~~~~

1 थम उन माणसां की सह ल्यो सां जो अपनी खुद की बड़ाई करते रहवै सै, इस करके मै सोचू सूँ, के थम मेरी भी सह ल्योगे जै मै थोडा सां बेकुफां के जिसा बरताव करूँ, हाँ, मेरी सह भी ल्यो सां।

2 क्यूँके मै थारे तै प्यार करूँ सूँ, अर थारा ख्याल भी राक्खूँ सूँ, जिसा परमेसवर राक्खै सै। थम एक पवित्र कुवारी के समान सां, जिसकी सगाई मन्नै सिर्फ मसीह यीशु तै करण की, अर उस्से ताहीं साँपण का वादा करया सै।

3 पर मै डरूँ सूँ के जिस तरियां तै साँप नै अपनी श्याणपत तै पैहली बिरबान्नी हव्वा ताहीं भकाया, उस्से तरियां ए थारे मन उस सीधाई अर पवित्रता तै जो मसीह के साथ चालण तै आवै सै, उसतै कदे बहक न्ही जाओ।

4 जै कोए थारे धारै आके किसे दुसरे यीशु का प्रचार करै, जिसका प्रचार हमनै न्ही करया; या कोए और आत्मा थमनै मिलै, जो पैहल्या ना मिला था; या और कोए सुसमाचार सुणावै, जिस ताहीं थमनै पैहल्या न्ही मान्या था, तो थम इसनै खुशी तै स्वीकार कर लेते।

5 मै तो समझूँ सूँ के मै किसे बात म्ह बड़े तै बड़े प्रेरितां तै घाट न्ही सूँ।

6 जै मै बोल्लण मै अनाड़ी सूँ, तोभी मन्नै सुसमाचार अर मसीह का ज्ञान सै। मन्नै थारे ताहीं जो भी ज्ञान सिखाया सै, वो ज्ञान मन्नै थारे ताहीं साबित करके दिखाया सै।

7 इस करके मन्नै थारे खात्तर परमेसवर के सुसमाचार का प्रचार मुफ्त म्ह करया, के थारे ताहीं ऊँचा करण के मकसद तै मेरा खुद ताहीं नरम बणा लेणा मेरा अपराध था?

8 मन्नै दुसरी कलीसिया तै दान कट्टा करया, ताके मै हर कीमत पै थारी मदद कर सकूँ, थम इस ताहीं चोरी करणा ना कहों।

9 अर जब मै थारे गेल्या था, अर मेरे ताहीं पईसा की कमी होई, तो मन्नै किसे पै बोझ न्ही गेरया, क्यूँके विश्वासी भाईयां नै मकिदुनिया परदेस तै आके मेरी जरूरत नै पूरा करया, अर मन्नै हरेक बात म्ह अपणे-आप ताहीं थारे पै बोझ बणण तै रोक्का, अर रोक्के रहूँगा।

10 जै मसीह की सच्चाई मेरे म्ह सै, तो अखाया परदेस म्ह कोए मन्नै इस घमण्ड तै न्ही रोकैगा।

11 मन्नै थारे तै पईसा न्ही लिया, क्यूँके इस खात्तर न्ही, के मै थारे तै प्यार कोनी करदा? परमेसवर नै न्यू बेरा सै, के मै थारे तै प्यार करूँ सूँ।

12 मै थारे तै आर्थिक मदद कोनी ल्यु, ताके मै उन माणसां नै घमण्ड करण तै रोक सकूँ, जो या कहवै सै के हम भी परमेसवर की सेवा करां सां, जिसी थम करो सां।

13 क्यूँके इसे माणस झूटटे प्रेरित, अर छूळ तै काम करण आळे सै, अर मसीह के प्रेरित होण का झूट्टा दावा करै सै।

14 या किमे अचम्भे की बात कोनी क्यूँके शैतान खुद भी ज्योतिर्मय सुगंदूत का रूप धारण करै सै।

15 इस करके जै उसकै सेवक भी धर्म के सेवकां का सा रूप धरै, तो कोए बड़्डी बात कोनी, पर उनका अन्त उनकै काम्मां के मुताबिक होवैगा।

~~~~~

16 मै फेर करूँ सूँ के, कोए मन्नै बेकूफ ना समझे, न्ही तो बेकूफ ए सोचके मेरी सह ल्यो, ताके माडा-सा मै भी घमण्ड कर सकूँ।

17 बेधड़क कहे होडी मेरी बात प्रभु की ओड़ तै कोनी, ये तो एक बेकूफ की घमण्ड म्ह कहे होडी बात सै।

18 जब के घणखरे माणस तो अपणे दुनियावी जीवन पै घमण्ड करै सै, तो मै भी घमण्ड करूँगा।

- 19 थम तो श्याणे होकै खुशी तै बेकूफ की सह लेओ सों।
- 20 क्यूँके जिब थमनै कोए गुलाम बणा लेवै सै, या जो भी थारे धोरे सै सब ले लेवै सै, या फँसा लेवै सै, या अपणे-आपनै बड़ड़ा बणावै सै, या थारे मुँह पै थप्पड़ मारै सै, तो थम सह लेओ सो।
- 21 के थम न्यू सोच्चों सों, के मन्नै शर्मिन्दा होणा पड़ैगा क्यूँके मन्नै यो काम कोनी करया। पर जिस किसे बात म्ह कोए हिम्मत करै सै, मै बेकूफी तै कहूँ सू, तो मै भी हिम्मत करूँ सू।
- 22 के वे इब्रानी सै? मै भी इब्रानी सू। के वे इस्राएली सै? मै भी इस्राएली सू। के वे अब्राहम के वंशज सै? मै भी अब्राहम का वंशज सू।
- 23 के वैए मसीह के सेवक सै-मै बेकूफ कै तरियां कहूँ सू-मै उनतै बाध सू। मन्नै उनतै घणी मेहनत करी सै, उनतै घणा बार-बार कैदी बणया सू, अनगणित बार पिटचा गया सू, कई बार मेरी जान संकट म्ह पड़ी।
- 24 पाँच बर मन्नै यहूदी अगुवां के हाथ तै उन्तालीस कोड़े खाए।
- 25 तीन बर मन्नै बैत खाई; एक बर मेरै पै पत्थर बरसाए गये; तीन बर जहाज, जिसपै मै चढ़या था, टूट गए; एक दिन अर एक रात मन्नै समुन्दर म्ह काटचा।
- 26 बार-बार मन्नै सफर करणा पडचा। कदे नदियाँ के, कदे डाकुआं के, कदे अपणे देशवासियाँ के, कदे नगरां के, जात आळा तै, कदे गैर यहूदियाँ तै, कदे जंगळां के कदे समुन्दरां के, कदे झूठे विश्वासी भाईयाँ के बिचाळै जोख्मां म्ह रहया।
- 27 मन्नै कई रात जाग के, भूक्खा-तिसाया रहकै, जाइडे म्ह; उघाड़ा रह के, करड़ी मेहनत करी अर भोत सी मुसीबत सहण करी सै।
- 28 इन सारी मुसीबतां के अलावा रोज मेरे पै सारी कलीसियां की भलाई अर फिक्र का बोझ बणया रहवै सै।
- 29 जिब कोए कलीसियां म्ह कमजोर हो सै, तो मै अपणे-आपनै कमजोर महसूस करूँ सू, मै दुखी हो जाऊँ सू, जिब कोए किसे तै पाप करवावै सै।
- 30 जै घमण्ड करणा जरूरी सै, तो मै अपनी कमजोरी की बातों पै घमण्ड करूँगा।
- 31 परमेसवर, जो यीशु का पिता सै, वो सदा धन्य सै, वो जाणै सै के मै झूठ न्ही बोल्दा।
- 32 जिब मै दमिश्क नगर म्ह था, तो अरितास राजा के राज्यपाल नै मेरे ताहीं कैदी बणाण के मकसद तै नगर म्ह पैहरा बिठा दिया था।
- 33 अर मै टोकरे म्ह बैठकै खिड़की म्ह तै होकै भीत पै तै तारया गया, अर उसके हाथ तै बच लिंकड़ा।

12

????? ?? ?????? ?????? ?? ??????

- 1 ऊतो घमण्ड करणा मेरे खात्तर ठीक कोनी तोभी करणा पड़े सै; ज्यातै मै प्रभु के दिए होए दर्शनां अर प्रकाशनां का जिक्र करूँगा।
- 2 मै मसीह म्ह एक माणस* नै जाणु सू; जिसनै चौदहा साल हो लिए, मै न्ही जाणदा के वो माणस देह म्ह था, या फेर आत्मा म्ह था, सिर्फ परमेसवर ए जाणै सै, इसा माणस सबतै ऊँच्चे सुगं म्ह ठा लिया गया।
- 3 मै उस्से बात नै दोहराऊ सू, मै न्ही जाणदा, के इसा होया था या फेर यो एक दर्शन था, परमेसवर ए जाणै सै।
- 4 के वो सुर्गलोक पै ठा लिया गया, अर ओड़ै उसनै इसी अदभुत बात सुणी, जिनका जिक्र करणा किसे भी माणस के बस का कोनी, वे बात दुसरे माणसां ताहीं बताणा मना सै।

* 12:2 12:2 यो माणस पौलुस ए था जो अपनी बड़ाई न्ही करणा चाहवै था

5 इसे माणस पै तो मै घमण्ड करूँगा, पर अपने पै अपनी कमजोरियाँ नै छोड़, अपने बारे में घमण्ड नही करूँगा।

6 क्यूँके जै मै घमण्ड करना चाहूँ भी तो बेकूफ नही बणुगाँ, क्यूँके सच बोलूँगा; मै अपनी बड़ाई नही करना चाहन्दा, इसा ना होवै के जिसा कोए मन्नै देखै सै या मन्नै सुणै सै, मन्नै उसतै बाध समझै।

7 मेरे ताहीं परमेसवर नै जो अदभुत बात दिखाई सै, उन ताहीं देखके मै घमण्ड न्ह ना जाऊँ, इस करके मेरी देह न्ह काण्डा चुभाया, यानिके शैतान का एक दूत मेरे घुस्से मारे ताके मै फूल नही जाऊँ।

8 इसके बारे में न्ह मन्नै प्रभु तै तीन बर बिनती करी के मेरे तै यो दूर हो जावे।

9 पर उसने मेरे तै कहा, “मेरा अनुग्रह तेरे खात्तर भोत सै, क्यूँके मेरी सामर्थ कमजोरी न्ह सिध्द होवै सै।” ज्यांतै मै घना राज्जी होके अपनी कमजोरी पै घमण्ड करूँगा के मसीह की सामर्थ मेरे पै छाया कर दी रहवै।

10 इस कारण मै मसीह के खात्तर कमजोरियाँ न्ह, अर बुराईयाँ न्ह, गरीबी न्ह, अर रोठयाँ न्ह, अर संकटाँ न्ह राज्जी सूं, क्यूँके जिव मै कमजोर होऊँ सूं, तभी मै मसीह की शक्ति न्ह मजबूत होऊँ सूं।

~~~~~

11 मै बेकूफ तो बणया, पर थमने ए मन्नै न्यू करण के खात्तर मजबूर करया। थमने तो मेरी बड़ाई करणी चाहिये थी, क्यूँके ऊतो मै किमे भी कोनी, तोभी उन बड्या तै बडे प्रेरिताँ तै किसे बात न्ह घाट कोनी सूं।

12 सच्चे प्रेरित के लक्खण भी थारे बिचाळै सारे ढाळ के धीरज सुधा निशान्नां, अर अनोक्खे काम्मां, अर सामर्थ के काम्मां तै दिखाए गये।

13 थम कौण-सी बात न्ह दुसरी कलीसियाँ तै घाट थे, सिर्फ इस न्ह के मन्नै थारे पै आर्थिक बोझ कोनी गेरया। मेरा यो अपराध माफ करो।

14 देखो, मै तीसरी बर थारे थारे आण नै त्यार सूं, अर मै थारे तै कोए मदद नही ल्यूँगा, क्यूँके मै थारी सम्पत्ति नही बल्के थमने ए चाहूँ सूं। क्यूँके बाळकाँ नै माँ-बाप के खात्तर धन कट्टा नही करना चाहिये, पर माँ-बाप नै बाळकाँ के खात्तर धन कट्टा करना चाहिये।

15 थारी आत्मा के भले खात्तर मै पक्का अपना सब कुछ खर्च करण खात्तर तैयार सूं, बल्के आप भी खर्च हो जाऊँगा। मै थारे तै प्यार करूँ सूं, पर थम मेरे तै भोत कम प्यार करो सों।

16 कुछ भी हो, मै थारे पै बोझ कोनी बणया। फेर भी कोए नै कोए मेरे पै यो दोष जरूर लगा सकै सै, के मन्नै श्याणपत तै थारे ताहीं धोक्खा देके फँसा लिया।

17 मन्नै ना ए तो तीतुस अर ना ए किसे और के जरिये अपने खात्तर थारे तै पईसे लिये।

18 मन्नै तीतुस ताहीं समझाके उसके गेल्या उस भाई ताहीं भेज्या। के तीतुस नै छळ करके थारे तै किमे लिया? के म्हारा सुभाव एक ए तरियाँ तै प्रेरित का नही था? के हम उनकी ए लीकाँ पै नही चाल्ले?

19 थम इब भी योए समझरे सों, के हम थारे स्याम्ही बदले न्ह जवाब देण लागरे सां। हम तो परमेसवर नै हाजर जाणके मसीह न्ह बोल्लां सां, हे प्यारे विश्वासी भाईयो, हम ये सारी बात थमने विश्वास न्ह मजबूत करण खात्तर कहां सां।

20 क्यूँके मन्नै इस बात का डर सै, कदे इसा ना हो के मै आके जिसा चाहूँ सूं, उसाए थमने पाऊँ; अर मन्नै भी जिसा नही चाहो सो उसाए पाओ; मन्नै इस बात का डर सै के ओड़ै झगड़ा, जळण, छो, उदासी, विरोध, चुगली, घमण्ड अर बखेडे ना हों;

21 कदे इसा ना हो के जिव मै दुबारा आऊँ, तो मेरा परमेसवर मेरे ताहीं अपमानित करै। अर मन्नै घणखरयाँ खात्तर फेर दुखी होणा पड़े, जिन नै पैहल्या पाप करया था। अर मुन्डे काम अर जारी अर लुचपण के कारण पाप करना नही छोड्या।

13



1-2 पवित्र ग्रन्थ म्ह लिख्या सै, के दो या तीन गवाहां कै मुँह तै हरेक बात सच साबित हो जावै सै। जिव मै दुसरी बार थारे तै मिलण आया था, तो मन्ने उन माणसां ताहीं चेतावनी देई, जो पैहल्या तै पाप करण लागरे थे। इब मन्ने दुसरी बार चिट्ठी लिख के थारे ताहीं अर दुसरे बाकी माणसां तै भी चेतावनी देके कह्या के वे पाप ना करै। इब मै तीसरी बार थारे धारे आण आळा सू, अर जै इब भी उन माणसां नै पाप करणा न्ही छोड्या सै, तो कोए भी उननै परमेसवर के दण्ड तै बचा न्ही पावैगा।

3 मन्ने थारे तै कह्या सै, के उन ताहीं दण्ड मिलेगा पर फेर थम सबूत चाहां सों, के ये बात मै मसीह के जरिये बोल्लू सू। अर जिव मसीह थारे ताहीं सुधारैगा तो थारे खात्तर कमजोर न्ही पर थारे बीच म्ह सामर्थी होगा।

4 वो कमजोर होते होए क्कूस पै चढाया तो गया, तोभी परमेसवर की सामर्थ तै जिन्दा होया। हम भी तो मसीह के समान कमजोर सां, पर थारे खात्तर परमेसवर की सामर्थ तै हम उसकै साथ जीवांगें।

5 अपणे-आप ताहीं परखो, के विश्वास म्ह सच्चे सां के न्ही। जै थम अपणे-आपनै सच्चा पाओ, तो थम इस बात नै जाण ल्योगे, के यीशु मसीह थारे म्ह वास करै सै। अर जै मसीह थारे म्ह वास न्ही करदा तो थम अपणे परखे जाण म्ह हारगे सों।

6 पर मेरी आस सै के थम या जाण ल्यो, के थम अपणे परखे जाण म्ह न्ही हारे।

7 भलाए थारे म्ह तै कईयाँ नै यो लागै सै के हम सच्चे प्ररित कोनी। फेर भी हम अपणे परमेसवर तै या प्रार्थना करा सां के थम कोए बुराई ना करो, बल्के भलाई करो।

8 जै हम सच्चाई के विरोध म्ह हम कुछ भी न्ही कर सकदे। हम सच के पक्षधर ए रह सकां सै।

9 जिव हम कमजोर सां अर थम ठाड्डे सों, तो हम राज्जी होवां सां, अर या प्रार्थना भी करा सां, के थम विश्वास म्ह सिध्द हो जाओ।

10 इस करके मै थारे तै दूर रहके ये सारी बात लिखूँ सू, के ओडै आण पै, मन्ने प्रभु के जरिये दिए गये हक तै मन्ने थारे ताहीं दण्ड देणा ना पडै, क्यूँके मै इस हक ताहीं थारे विश्वास ताहीं मजबूत करण खात्तर इस्तमाल करणा चाहूँ सू, ना के थारे विश्वास नै कमजोर करण खात्तर।

11 हे विश्वासी भाईयो, आखर म्ह मै थारे तै कहणा चाहूँ सू, के आनन्दित रहों, सिध्द बणदे जाओ, अर एक-दुसरे नै उत्साहित करो, एक ए मन रहों, मिल-जुल के रहों। अर प्यार अर शान्ति का देण आळा परमेसवर थारे गेल्या होवैगा।

12 आपस म्ह एक-दुसरे तै गळे मिलके प्यार तै नमस्कार करो।

13 सारे पवित्र माणस थारे ताहीं नमस्कार कहवै सै।

14 प्रभु यीशु मसीह का अनुग्रह अर परमेसवर का प्यार अर पवित्र आत्मा का साइझापण थारे सारया के गैल हांदा रहवै।

गलातिया परदेस ताहीं पौलुस की चिट्ठी



जिब यीशु के सुसमाचार का प्रचार अर गैर यहूदी माणसां के बीच म्ह होण लाग्या, तो यो सवाल उठचा के एक साच्चा बिश्वासी होण खात्तर एक माणस नै मूसा के नियम-कायदा का पालन करणा जरूरी सै या न्ही। पौलुस यो विचार पेश कर सै, के यो जरूरी कोनी। वो कहवै सै के सच म्ह मसीह जीवन का एकमात्र टोस आधार बिश्वास सै। उसकै जरिये सारे माणसां का परमेसवर के साथ रिश्ता सुधरै सै। पर एशिया माइनर म्ह एक रोमी देश के गलातिया परदेस की कलीसियाओं के माणसां नै पौलुस का बिरोध अर दावा करया, के परमेसवर के साथ सही रिश्ता कायम करण खात्तर एक माणस का मूसा के नियम-कायदा का पालन करणा भी जरूरी सै। गलातियों के नाम पौलुस प्रेरित की चिट्ठी इस खात्तर लिखी गई थी, ताके वे माणस जो गलत शिक्षा तै बहक गये थे, उननै सच्चे बिश्वास अर बरताव म्ह उल्टा ल्या जावै। पौलुस इस चिट्ठी की शुरुआत यीशु मसीह का एक प्रेरित होण के, अपने दावे के साथ करै सै। वो इस बात पै जोर देवै सै, के एक प्रेरित होण खात्तर उसका बुलावा परमेसवर की ओड़ तै सै, ना के किसे माणस की ओड़ तै, अर उसका मकसद खासकर गैर-यहूदियों म्ह सुसमाचार प्रचार करणा सै। फेर वो यो विचार देवै सै के सिर्फ बिश्वास के जरिये माणसां का परमेसवर गैल रिश्ता सुधर सकै सै। आखरी पाठां म्ह पौलुस यो दिखवै सै, के मसीह पै बिश्वास करण तै जो प्रेम पैदा होवै सै, वोए मसीह माणसां का चाल-चलण सै।

रूप-रेखा


भूमिका 1:1-10

प्रेरित के रूप म्ह पौलुस का हक 1:11-2:21

परमेसवर के अनुग्रह का सुसमाचार 3:1-4:31

मसीह आजादी अर जिम्मेदारी 5:1-6:10

समापन 6:11-18



1 या चिट्ठी मुझ पौलुस की ओड़ तै सै, मै प्रेरित होण के खात्तर बुलाया गया सूं। मेरा प्रेरित होणा किसे माणस या माणसां की ओड़ तै न्ही बल्के यीशु मसीह के जरिये होया सै, जिस ताहीं पिता परमेसवर नै मरे होए म्ह तै जिवाया।

2 या चिट्ठी गलातिया परदेस की कलीसियाओं के खात्तर, उन सारे बिश्वासी भाईयाँ की ओड़ तै सै, जो मेरै गेल्या सै।

3 मै प्रार्थना करूँ सूं, के परमेसवर पिता अर म्हारे प्रभु यीशु मसीह की ओड़ तै थमने अनुग्रह अर शान्ति मिल्दी रहवै।

4 म्हारे परमेसवर अर पिता की मर्जी के मुताबिक मसीह यीशु नै अपने-आप ताहीं म्हारे पापां के कारण बलिदान कर दिया तांके हम आज की दुनिया के माणसां के बुरे असर तै बचे रहवां।

5 परमेसवर का गुणगान अर बड़ाई युगायुग हौदी रहवै। आमीन।



6 मन्ने अचम्भा होवै सै के परमेसवर नै थारे ताहीं मसीह के अनुग्रह तै बुलाया उसतै थम इतनी तावळे भटक के अलग ए तरियां के सुसमाचार पै बिश्वास करण लागगे।

7 सच्चा सुसमाचार एक सै, जो के मसीह का सै, पर बात या सै, के कुछ लोग इसे सै जो मसीह के सुसमाचार नै बदलना चाहवै सै, अर थमने भरमाणा चाहवै सै।

8 पर जै म्हारे म्ह तै, या सुगं तै उतरया होया कोए सुगंदूत भी उस सुसमाचार नै छोड़ जो हमने थारे ताहीं सुणाया सै, कोए अलग सुसमाचार थारे ताहीं सुणावै, तो परमेसवर उस ताहीं श्राप देगा।

9 जिसा हमनै पैहल्या कह्या सै, उसाए मै इब फेर कहुँ सूँ के उस सुसमाचार नै छोड़ जिस ताहीं थमनै मान्या सै, जै कोए अलग सुसमाचार सुणावै सै, तो श्रापित हो ।

10 मै माणसां नै खुश करण की कोशिश न्ही करदा, पर परमेसवर नै खुश करण की कोशिश करूँ सूँ, जै मै इब लग माणसां नै खुश करदा रहन्दा तो मसीह का दास न्ही होंदा ।

????? ??? ?????? ??????? ??????

11 हे विश्वासी भाईयो, मै थमने बता द्यु सूँ, के जो सुसमाचार मन्ने सुणाया सै, वो माणस के जरिये बणाया गया कोन्या ।

12 क्यूँके वो मन्ने मेरे पूर्वजां, की ओड़ तै न्ही पोंहच्या, अर ना माणसां के जरिये सिखाया गया, पर यीशु मसीह नै सुसमाचार समझण म्ह मेरी मदद करी ।

13 थमनै सुणा होगा के यहूदी पंथ म्ह जो मेरा चाल-चलण था वो किसा था, मै परमेसवर की कलीसिया के विश्वासियां ताहीं घणा काल अर उन ताहीं नाश करण की कोशिश करया करूँ था ।

14 अर मै यहूदी मत म्ह अपने पूर्वजां की शिक्षा का अध्यन करण अर उन ताहीं मानण म्ह अपने हम उम्र के यहूदियां म्ह भोत उत्सुक था ।

15-16 पर परमेसवर की जिब इच्छा होई के वो मेरे पै अपने बेटे नै जाहिर करै के मै गैर यहूदियाँ म्ह उसका सुसमाचार सुणाऊँ, उसनै मेरे ताहीं मेरी माँ की कोख म्ह ए चुण लिया, अर अपने अनुग्रह तै मेरे ताहीं बुला लिया था । तो मन्ने किसे की राय कोनी ली,

17 अर ना यरुशलेम म्ह उनके धोरे गया जो मेरे तै पैहल्या प्रेरित चुणे गये थे, पर जिब्वे अरब देश म्ह चल्या गया अर फेर ओड़ै तै दमिश्क नगर म्ह बोहड़ गया ।

18 फेर तीन साल के पाच्छे मै पतरस* जो प्रेरित सै उसतै मिलण खात्तर यरुशलेम गया, अर उसकै धोरे पन्द्रह दिन तैई रह्या ।

19 पर मै प्रभु यीशु मसीह के भाई याकूब नै छोड़ और किसे प्रेरित तै न्ही मिल्या ।

20 परमेसवर मेरा गवाह सै के मन्ने थारे ताहीं जो लिख्या सै उस म्ह कुछ भी झूठ कोनी ।

21 उन प्रेरितां के मिलण के बाद मै सीरिया अर किलिकिया के परदेसां म्ह आया ।

22 पर यहूदिया परदेस की कलीसियां के विश्वासी भाईयाँ नै जो मसीह म्ह विश्वास करै थे, उननै मेरा मुँह कदे न्ही देख्या था,

23 पर न्यूए सुण्या करै थे के एक बखत था जो हमनै सताण आळा था, इब वोए उस विश्वास का सुसमाचार सुणावै सै जिसनै पैहल्या नाश करै था ।

24 अर वे मेरे बारै म्ह परमेसवर की बड़ाई लगातार करै थे ।

2

?? ?????????? ?? ?????? ?????? ?? ?????????

1 चौदहा साल के पाच्छे, मै बरनबास के गेल्या फेर यरुशलेम नगर म्ह गया, अर तीतुस नै भी गेल्या लेग्या ।

2 मै इस खात्तर ओड़ै गया क्यूँके परमेसवर नै मेरे ताहीं ओड़ै जाण खात्तर कह्या था, अर जिब मै ओड़ै था तो मै कलीसिया के अगुवां तै एकान्त म्ह मिला, अर उस सुसमाचार के बारें म्ह उन ताहीं बताया, जो मै गैर यहूदियाँ म्ह प्रचार करूँ सूँ, ताके इसा ना हो के जो मन्ने पैहले अर जो इब भी करण लागरया सूँ, उसका कोए नतिज्जा ना लिकड़ै ।

3 पर तीतुस जो मेरा संगी साथी सै अर जो यूनानी सै, उसका कदे खतना कोनी होया पर कलीसिया के अगुवां नै जो यरुशलेम म्ह सै उस ताहीं अपणालिया, अर उननै उस ताहीं खतना करण खात्तर मजबूर कोनी करया ।

* 1:18 1:18 पतरस का दुसरा नाम केफा भी था

4 तो या बात एक समस्या बणगी, उन झूठे भाईयाँ* के कारण होया जो चोरी तै घुस आये थे, के उस आजादी का जो मसीह यीशु म्ह हमनै मिली सै, भेद लैके हमनै यहूदी नियम-कायदा के दुबारा तै दास बणा दे।

5 उनके साथ एक पल भी हमनै सहमत होणा न्ही चाह्या, ताके धम सुसमाचार की सच्चाई के मुताबिक जिन्दगी जिओ।

6 उन कलीसिया के अगुवां ताहीं जो यरुशलेम नगर म्ह थे, उननै मेरे ताहीं मजबूर कोनी करया, के मै अपने सन्देश नै बदलु, जो मै धमनै सिखाऊँ सूँ। इसतै कोए फर्क कोनी पड़ता, के वो अगुवें मेरे खात्तर के सै, क्यूँके परमेसवर बाहरी रूप नै देखके न्याय न्ही करदा।

7 पर इसके उल्ट जिब उन अगुवां नै देख्या के परमेसवर नै पतरस ताहीं हक दे राख्या सै, वो के यहूदी माणसां ताहीं सुसमाचार सुणावै, उस्से तरियां गैर यहूदियाँ के खात्तर मेरै ताहीं भी सुसमाचार सुणाणा सौप्या गया।

8 (क्यूँके जिसनै पतरस तै यहूदी माणसां म्ह परेरिताई का काम बड़े असरदार ढंग तै करवाया, उस्से नै मेरै तै भी गैर यहूदियाँ म्ह असरदार काम करवाया),

9 जो लोग कलीसिया के खम्भे समझे जावै थे, यानी याकूब, पतरस, अर यूहन्ना, उननै अनुग्रह का वो वरदान पिच्छाणा जो मेरे ताहीं मिला सै। उननै मेरै ताहीं अर बरनबास ताहीं अपना साथी समझके म्हारे ताहीं खास सहभागी बणा लिया। वे इस बात खात्तर सहमत होंगे के हम गैर यहूदियाँ के धोरै जावै, अर वे यहूदियाँ के धोरै जावै।

10 उननै म्हारे तै सिर्फ याए बिनती करी के हम यरुशलेम के गरीब विश्वासी भाईयाँ की मदद करां, अर इस्से काम नै करण की मे खुद भी कोशिश करूँ था।

11 एक दिन जिब पतरस अन्ताकिया नगर म्ह आया, तो मन्नै विश्वासी भाईयाँ के स्याम्ही उस ताहीं फटकारा, क्यूँके जो वो काम करै था वो गलत था।

12 वो पैहले गैर यहूदियाँ के गैल खाया-पिया करै था, जिब कुछ विश्वासी जो याकूब नै यरुशलेम नगर म्ह भेज्जे थे, तो उसनै अपने-आप ताहीं गैर यहूदियाँ तै अलग कर लिया, अर उनकै गैल खाणा-पीणा छोड़ दिया अर उसनै यहूदी माणसां के डरके मारे इसा करया, क्यूँके वे चाहवै थे, के गैर यहूदियाँ का भी खतना हो।

13 पतरस के गेल्या बाकी बचे यहूदी माणस भी उसके कपट म्ह शामिल होंगे, अर उन म्ह बरनबास भी शामिल था।

14 पर जिब मन्नै देख्या के उनका सुभाव सुसमाचार की सच्चाई के मुताबिक कोनी, तो मन्नै सारे विश्वासी भाईयाँ के स्याम्ही पतरस तै कह्या, “जिब तू यहूदी होके गैर यहूदियाँ की तरियां चाल्लै सै अर यहूदी माणसां की तरियां कोनी चाल्दा, तो तू गैर यहूदियाँ नै यहूदी माणसां की तरियां चालण खात्तर क्यूँ कहवै सै।”

15 हम तो जन्म तै यहूदी सां, अर पापी गैर यहूदियाँ म्ह तै कोन्या।

16 हम यहूदी विश्वासी यो जाणा सां, के माणस मूसा नबी के नियम-कायदा तै न्ही, पर यीशु मसीह पै विश्वास करण के जरिये परमेसवर की नजर म्ह धर्मी बणै सै, इस खात्तर हमनै खुद भी प्रभु यीशु मसीह पै विश्वास करया, ताके हम नियम-कायदा तै न्ही, पर यीशु मसीह पै विश्वास करण तै परमेसवर की नजर म्ह धर्मी बणा, क्यूँके के मूसा नबी के नियम-कायदा तै कोए माणस धर्मी न्ही बणैगा।

* 2:4 2:4 झूठे भाईयाँ-ये वो यहूदी मसीह थे जो यो विश्वास करै थे, के मसीह के हुकमां साथ-साथ हमनै मूसा नबी के नियम-कायदा ताहीं मानण तै उद्धार होया

17 हम जो मसीह के जरिये परमेश्वर की नजर में धर्मी बणना चाहते हैं, बल्के इसके के हम मूसा नबी के नियम-कायदा नै मानण के जरिये, तो कुछ यहूदी हमनै पापी समझै सै (क्यूँके इब हम यहूदी नियम-कायदा नै कोनी मानते) तो के इसका मतलब यीशु मसीह नै म्हारे तै पाप करवाया, न्ही बिलकुल न्ही!


18 पर मै सचमुच में पाप करूँ सँ जै मै उन काम्मां नै करूँ सँ, जिन ताहीं मन्ने छोड़ दिया था जिसा के माणस परमेश्वर की नजर में धर्मी बणना चाहवै, मूसा नबी के नियम-कायदा के मानण के जरिये।

19 मै जाणूँ सँ, के मूसा नबी के नियम-कायदा के मानण तै मै धर्मी न्ही बण सकता, तो मै सोचूँ सँ, के मै नियम-कायदा के खात्तर मर जाऊँ ताके परमेश्वर के खात्तर मै सदा जिन्दा रहूँ।

20 यो इसा सै, के मान्ना जिसा मै मसीह के गैल क्रूस पै मारया गया, अर इब मै जिन्दा न्ही रह्या, पर मसीह मेरै में जीवै सै, अर इब जो मै जीण लागरया सँ, तो सिर्फ परमेश्वर के बेट्टे पै विश्वास करण के जरिये जिसनै मेरै तै इतणा प्यार करया के मेरै खात्तर अपनी जान दे दी।

21 मै परमेश्वर के अनुग्रह नै बेकार न्ही बतान्दा, क्यूँके जै नियम-कायदे धार्मिकता का कारण होन्दे तो मसीह का जान देणा बेकार हो जान्दा।

3



1 हे बिना अकल के गलातिवासियो! किसनै थारे ताहीं बहका दिया सै? मन्ने थारे ताहीं समझाया सै के यीशु मसीह के क्रूस पै जान देण के जरिये उसनै के हासिल करया!

2 मेरे ताहीं एक बात बताओ के थमनै पवित्र आत्मा, मूसा नबी के नियम-कायदा के मानण तै पाया था या विश्वास की खबर तै जो हमनै थारे ताहीं सुणाई थी?

3 के थम इसे बेअकल के सों के थमनै नई जिन्दगी पवित्र आत्मा के जरिये शरु करी पर इब थम अपनी जिन्दगी का अन्त अपनी ताकत तै करणा चाहो सोँ?

4 जब थम विश्वासी बणे तो थमनै भोत दुख ठाया, मै उम्मीद करूँ सँ के थमनै बेकार में ए वो दुख न्ही ठाया।

5 परमेश्वर थमनै पवित्र आत्मा भरपूरी तै देवै सै, अर जो थारे में सामर्थ के काम करै सै, के वो मूसा नबी के नियम-कायदा के मानण तै या मसीह के सुसमाचार पै विश्वास करण तै इसा करै सै?

6 अब्राहम के बारे में पवित्र ग्रन्थ या कहवै सै, “अब्राहम नै तो परमेश्वर पै विश्वास करया अर उसकी बजह तै परमेश्वर नै उस ताहीं धर्मी बणा दिया।”

7 तो यो जाण ल्यो के जो अब्राहम की तरियां विश्वास करण आळे सै, वे ए अब्राहम के वंशज कुह्वावैगें।

8 अर परमेश्वर नै पवित्र ग्रन्थ में पैहल्या तै ए यो कह्या, के वो गैर यहूदियाँ नै विश्वास के जरिये धर्मी बणावैगा, परमेश्वर नै भोत पैहले तै ए अब्राहम ताहीं यो सुसमाचार सुणा दिया था, के “तेरे में तै सारी जात आशीष पावैगी।”

9 जितने मसीह पै विश्वास करण आळे सै, वे अपने विश्वास के कारण वो ए आशीष पावैगें जो अब्राहम नै पाई थी।

10 इस करके जितने माणस मूसा नबी के नियम-कायदा नै मानके परमेश्वर की नजर में धर्मी बणण की सोचवै सै, वे सारे परमेश्वर की ओड़ तै श्रापित सै, क्यूँके पवित्र ग्रन्थ में लिख्या सै, “वो श्रापित सै, क्यूँके को ए भी माणस हर पल नियम-कायदा की किताब में लिखी होई सारी बातों नै निभा न्ही सकदा।”

11 पर या बात साफ़ है, के मूसा नबी के नियम-कायदा के मानण के जरिये परमेसवर की नजर म्ह कोए भी धर्मी न्ही बणदा, क्यूँके पवित्र ग्रन्थ कहवै है, के “जो मसीह पै विश्वास करैगा, परमेसवर उसनै ए धर्मी बणावैगा।”

12 पर मूसा नबी के नियम-कायदा नै मानकै जीणा अर परमेसवर पै विश्वास करके जीणा एक जिसा कोनी, जिसा पवित्र ग्रन्थ म्ह लिख्या है पर “जो इन सारी बाततां नै मानैगा, वो उनके कारण जिन्दा रहैगा।”

13 हम सारे परमेसवर के श्राप के लायक थे, क्यूँके हम उसके नियम-कायदा नै पूरी तरियां न्ही मानते, तोभी मसीह म्हारे ताहीं उस श्राप तै छुड़ावै है, जो नियम-कायदा के जरिये आवै है। जब मसीह क़रूस पै मारया गया, तो उसनै अपणे उपपर वो श्राप ले लिया, जिसा के पवित्र ग्रन्थ म्ह लिख्या है, के “श्रापित है वो जो क़रूस पै लटकाया जावै है।”

14 मसीह नै यो इस करके करया, ताके जिसका वादा परमेसवर नै अब्राहम तै करया था, वो आशीष मसीह यीशु पै विश्वास करण तै गैर यहूदियाँ तक पोहच सकै, अर हम मसीह म्ह विश्वास के जरिये उस पवित्र आत्मा नै पा लेवां, जिसका देण का वादा उसनै म्हारे तै करया है।

???? ??

15 हे विश्वासी भाईयो, मै रोज की जिन्दगी का उदाहरण देकै थमनै समझाऊँ सूँ, जब दो आदमी कोए करार करै है अर उस ताहीं पक्का करै है, तो ना कोए उसनै घटा सकै है अर ना उस म्ह किमे बढ़ा सकै है।

16 इस तरियां परमेसवर नै वादा अब्राहम अर उसके वंश तै करया था। पवित्र ग्रन्थ न्यू कोनी कहवै, के तेरी “वंशां नै,” जिसका मतलब भोत सारे माणस, पर यो एक माणस के बारे म्ह कहवै है “तेरे वंश नै” अर वो मसीह है।

17 मेरे कहण का मतलब यो है, के परमेसवर नै अब्राहम के गैल करार करण के चार सौ तीस साल के बाद मूसा नबी के नियम-कायदे दिए, जो उस करार नै ना तो तोड़ पाए, अर ना उसके वादे नै टाळ पाए।

18 परमेसवर माणसां नै इस बजह तै आशीष कोनी देवै, के वे मूसा नबी के नियम-कायदा नै मान्ने, बल्के वो इस करके देवै है, क्यूँके इसका देण का परमेसवर नै वादा करया था, अर अब्राहम ताहीं भी ये आशीष इस करके मिली थी।

19 जब फेर नियम-कायदे क्यूँ दिये गये? नियम-कायदे इस खात्तर दिए गये ताके लोग जाण सकै के पाप के है। मूसा नबी के नियम-कायदे तब तक रहणे थे, जब तक अब्राहम की पीढ़ी म्ह तै जिसका परमेसवर नै वादा करया था के वो आ ना जावै। मूसा नबी ताहीं नियम-कायदे सुगंदूतां के जरिये दिए गये थे अर मूसा नबी लोगां के बीच एक बिचौलिया बणया।

20 परमेसवर नै अब्राहम तै वादा करया था इस करके बिचौलिया की जरूरत कोनी थी।

???? ??

21 तो के मूसा नबी के नियम-कायदे परमेसवर के वादे के बिरोध म्ह है? न्ही बिल्कुल न्ही! क्यूँके जै इसे नियम-कायदे है, जो परमेसवर की नजर म्ह हमनै धर्मी बणावै, तो सदा का जीवन मूसा नबी के नियम-कायदा के मानण तै हम पा सकां सां।

22 पर पवित्र ग्रन्थ हमनै बतावै है के हम सब पापी सां, ताके परमेसवर उन माणसां नै जो यीशु मसीह पै विश्वास करै है वो दे सकै जिसका उसनै उसका वादा करया है।

23 पर इसतै पैहल्या के लोग प्रभु यीशु मसीह पै विश्वास करै हम यहूदी कैद म्ह थे, नियम-कायदे म्हारी रुखाळी करै थे। हम कैद म्ह जब ताहीं रहे जब के मसीह कौण है अर हम उस म्ह विश्वास करते रहवां।

24 नियम-कायदे म्हारे ताहीं इस खात्तर दिए गये, ताके मसीह के आण तक वो म्हारी अगुवाई कर सके अर म्हारे ताहीं सम्भाळ सके, ताके हम मसीह पै बिश्वास करण के जरिये परमेसवर की नजर म्ह धर्मी बणा।

25 जिव हमने मसीह यीशु पै भरोस्सा करया सै तो नियम-कायदा की अगुवाई अर मदद की जरूरत कोनी।

26 थम सारे मसीह यीशु पै बिश्वास करण के कारण परमेसवर की ऊलाद सों।

27 अर थारे म्ह तै जितना नै मसीह के नाम म्ह बपतिस्मा लिया सै, उननै नई जिन्दगी पा ली सै।

28 इब मसीह म्ह यहूदी अर गैर यहूदी म्ह कोए फर्क न्ही रह्या, अर ना नौक्कर ना आजाद म्ह, ना लोग अर लुगाई म्ह कोए फर्क रह्या, क्यूँके थम सारे मसीह यीशु म्ह एक सों।

29 अर जै थम मसीह के सों तो अब्राहम के वंश अर वादे के मुताबिक वारिस भी सों।

4

1 मै थमनै एक उदाहरण देकै समझाऊँ सूँ, के बेट्टा पिता की सम्पत्ति का वारिस होगा, जिव ताहीं वो बाळक सै, वो एक दास की तरियाँ सै, इब ताहीं उसका सम्पत्ति पै कोए हक कोनी पर आण आळे बखत म्ह वो पिता की सम्पत्ति का माल्लिक होवैगा।

2 पर जिव ताहीं बेट्टे की सही उमर न्ही हो अर सारी सम्पत्ति का माल्लिक ना बण जावै सै, वो रुखवाळियाँ अर भण्डारियाँ कै बस म्ह रहवै सै।

3 उस्से तरियाँ जिव हम मसीह नै न्ही जाणा थे, तो दुनिया की रीति-रिवाजाँ अर नियम-कायदा के गुलाम थे।

4 पर जिव सही बखत आया तो परमेसवर नै अपणा बेट्टा इस दुनिया म्ह भेज्या, अर एक बीरबानी नै उस ताहीं जन्म दिया, वो यहूदी माणसाँ म्ह पैदा होया अर उसनै मूसा के नियम-कायदा ताहीं मान्या।

5 ताके हमनै छुड़ा ले जो हम मूसा नबी के नियम-कायदा के अधीन साँ, अर हमनै उसकी ऊलाद होण का हक मिल्या।

6 इब थम उसकी ऊलाद सों, इस करके परमेसवर नै अपणे बेट्टे की आत्मा नै म्हारे दिलाँ म्ह भेज्या सै, जो आत्मा परमेसवर ताहीं “हे अब्बा, हे पिता” कहकै नै बुलावै सै।

7 इस करके तू इब नौक्कर कोनी, पर उसकी ऊलाद सै, अर परमेसवर वो सारी चीज थमनै देवैगा जिसनै उसका वादा थारे ताहीं देण का करया सै।

8 जिव थम परमेसवर नै न्ही जाणो थे तो उस बखत थम उसके गुलाम थे, जो असलियत म्ह परमेसवर सै ए कोनी।

9 इब थारा रिश्ता परमेसवर कै गैल सै, उसनै म्हारे ताहीं अपणा बेट्टा होण खात्तर बुलाया सै, तो उन कमजोर अर निकम्मी पुराणी शिक्षाओं के गुलाम बणण खात्तर क्यूँ उसकी ओड़ जाओ सों, के थम दुबारा उनके गुलाम होणा चाह्को सों?

10 थम गैर यहूदी बिश्वासी लोग दिन, महिन्ना, सही बखत अर साल्लाँ नै मान्को सों, जो मूसा नबी के नियम-कायदा के मुताबिक सै।

11 मै थारे वारै म्ह डरूँ सूँ, जो थम करो सों, कदे इसा ना हो के जो मेहनत मन्नै थारे खात्तर करी सै वा बेकार हो जावै।

12 हे बिश्वासी भाईयो, मै थारे तै बिनती करूँ सूँ, के अपणे-आपनै मूसा नबी के नियम-कायदा तै आजाद करो, क्यूँके मै भी मूसा नबी के नियम-कायदा तै आजाद होग्या सूँ, जिस तरियाँ थम गैर यहूदी होण तै नियम-कायदा तै आजाद हो, थमनै मेरे साथ बुरा बरताव न्ही करया।

13 थमनै याद होगा के मन्नै पैहलम पहल देह की बीमारी के कारण थारे ताहीं सुसमाचार सुणाया।

14 मेरी बीमारी थारे खात्तर मुसीबत थी, फेर भी थमनै ना तो मेरे तै नफरत करी, अर ना ए मेरे ताहीं तुच्छ जाणया, पर परमेसवर के सुगंदूत बल्के खुद मसीह यीशु के समान मैरे ताहीं अपणया

15 थम खुश थे, पर इब थारी खुशी कित्त गई? मै थारा गवाह सूं के थम मेरे खात्तर सब कुछ कुरवान कर सको थे, बल्के अपणी आँख भी लिकाइके मन्नै दे देन्दे ।

16 तो के थारे तै सच बोलण के कारण मै थारा बैरी बणगया सूं?

17 वे थमनै अपणे पक्ष म्ह करणा तो चाहवै सै, पर भले मकसद तै न्ही, बल्के उनका मतलब तो थारे ताहीं मेरे तै न्यारा पाइना सै ताके थम उनके ए चेल्लें बण जाओ ।

18 सदा ए आच्छे मकसद के खात्तर उत्साही होणा आच्छा सै अर सिर्फ उस्से बखत न्ही, जिव मै थारे गेल्या रहूँ सूं ।

19 हे मेरे बाळकों, जिस तरियां एक औरत बच्चा होण कै बखत जो दर्द सहवै सै उस्से तरियां मै भी थारे खात्तर दर्द सहूँ सूँ मै जिव ताहीं दर्द म्ह रहूँगा जिव ताहीं थम मसीह म्ह सिध्द ना हो जाओ ।

20 जी तो इसा करै सै, के इस बखत मै थारे थारे होन्दा अर प्यार तै थारे ताहीं समझान्दा, क्यूँके मेरी समझ म्ह कोनी आन्दा के मै थमनै के कहूँ ।

21 थम जो मूसा नबी के नियम-कायदा के अधीन होणा चाहवै सों, मेरी बातों पै ध्यान द्यो, मै बताऊँ सूं के मूसा नबी के नियम-कायदा की किताब म्ह के लिख्या सै?

22 पवित्तर ग्रन्थ म्ह यो लिख्या सै, के अब्राहम कै दो छोरे होए, उसका एक छोरा हाजिरा नाम की नौकराणी तै पैदा होया अर दुसरा सारा तै पैदा होया जो उसकी ब्याहता* थी ।

23 पर जो नौकराणी तै पैदा होया था वो एक साधारण बच्चा था जो शरीर की इच्छा तै पैदा होया, अर जो उसकी ब्याहता बीरबानी तै पैदा होया, वो परमेसवर के वादे कै मुताबिक पैदा होया जो उसनै अब्राहम तै करया था ।

24 इन बातों तै हमनै या सीख मिलै सै, ये बीरबानी मान्नो दो करार सै । करार जो परमेसवर नै सीनै पहाइ पै इस्राएली माणसां तै जो करया था वो हाजिरा की तरियां सै ।

25 अर हाजिरा मान्नो अरब देश का सीनै पहाइ सै, अर वो आज के यरुशलेम नगर की तरियां सै जइँ के माणस मूसा के नियम-कायदा के समान सै ।

26 पर सुर्गाय यरुशलेम अब्राहम की बिरबान्नी सारा के समान सै, अर उसके बाळक गुलाम कोनी, यो यरुशलेम विश्वासियाँ कै खात्तर माँ की तरियां सै ।

27 जिसा यशायाह नै पवित्तर ग्रन्थ म्ह लिख्या सै, "हे बाँझ बिरबान्नी, तू जो बाळक पैदा न्ही कर सकदी, आनन्दित हो, तू जो प्रसव-पीड़ा तै अनजाण सै, ऊँची आवाज म्ह जयजयकार कर, क्यूँके छोड्डी होई की ऊलाद सुहागण की ऊलाद तै भी घणी सै ।"

28 हे विश्वासी भाईयो, थम इसहाक की तरियां हो क्यूँके थारा जन्म परमेसवर के वादे कै मुताबिक होया सै जो उसनै अब्राहम तै करया सै ।

29 अर जिसा उस बखत शरीर की इच्छा के मुताबिक जन्मा होया बेट्टा परमेसवर की आत्मा के शक्ति के मुताबिक जन्मे होए बेट्टे नै सतावै था, उस्से तरियां हम भी उन माणसां तै सताये जावां सां, जो यो चाहवै सै के परमेसवर की नजर म्ह धर्मी बणण खात्तर मूसा नबी के नियम-कायदा नै मानना जरूरी सै ।

30 पर पवित्तर ग्रन्थ कहवै सै, के "नौकराणी अर उसकै बेट्टे नै लिकाइ दे, क्यूँके वो ब्याहता बिरबान्नी के बेट्टे कै गैल कदे भी पिता की सम्पत्ति का वारिस न्ही होगा ।"

31 इस ककै हे विश्वासी भाईयो, हम नौकराणी की ऊलाद कोनी जो के मूसा नबी के नियम-कायदे सै, बल्के ब्याहता बिरबान्नी की ऊलाद सां जो के विश्वास सै ।

* 4:22 4:22 ब्याहता-जिसके गैल ब्याह होया हो

5

~~~~~

1 मसीह ने म्हारि ताहीं मूसा नबी के नियम-कायदा तै आजाद कर दिया सै, इस करके अपणी आजादी बणा के राक्खो, अर मूसा के नियम-कायदा नै मानण खात्तर कोए थमनै गुलाम ना बणावै ।

2 सुणो! मै, पौलुस, थारे तै कहूँ सूँ के जै खतना करावोगे, तो मसीह तै थमनै किमे फायदा न्ही होगा ।

3 फेर भी मै एक खतना करण आळे नै बता द्यु सूँ, के उसनै सारे नियम-कायदे मानने पड़ेंगें ।

4 थम जो नियम-कायदा कै जरिये धर्मी बणणा चाह्को सों, तो फेर थमनै यीशु मसीह तै रिशता तोड़ लिया सै, अर थमनै अपने-आप ताहीं उस दया तै अलग कर लिया सै जिसके जरिये परमेसवर थमनै बचा सकै सै ।

5 मै यो इस खात्तर कहूँ सूँ, क्यूँके हमनै पवित्र आत्मा की ओड़ तै पूरा भरोस्सा सै, के परमेसवर यीशु मसीह पै बिश्वास करण के कारण हमनै धर्मी बणावैगा ।

6 जै थम यीशु मसीह नै मानण आळे सों, तो उसतै कोए फकं कोनी पड़ता के थारा खतना होया सै के न्ही होया, पर जरूरी यो सै, के हम मसीह पै बिश्वास करां, अर परमेसवर अर माणसां प्रति प्यार राक्खा ।

7 थम मसीह पै बिश्वास करण म्ह बढण लागरे थे, पर इब थमनै सच्चाई मानण तै कोए रोक न्ही ले ।

8 इसी सीख परमेसवर की ओड़ तै न्ही आन्दी जो थमनै अपणी ऊलाद होण खात्तर बुलावै सै ।

9 सीख जो सच्ची न्ही सै वो इस कहावत की तरियां सै, थोड़ा-सा खमीर सारे गूँधे होए चून नै खमीर बणा दे सै ।

10 पर मै परमेसवर पै भरोस्सा राक्खूँ सूँ, के वो थमनै झूट्टी अर भ्रमाण आळी सीख तै बचाये राक्खैगा, पर जो थमनै भ्रमा दे सै चाहे वो कोए भी क्यूँ ना हो परमेसवर तै दण्ड पावैगा ।

11 हे बिश्वासी भाईयो, थम जाणो सों के मै यो प्रचार करूँ सूँ, के खतना करवाणा जरूरी कोनी, इस करके यहूदी माणस मेरे ताहीं सारी हाण सतावै सै, जै मै क्रूस नै छोड़के खतना का प्रचार करूँ तो उसतै यहूदी माणस मेरे ताहीं कोनी सतावैगें ।

12 भला हाँदा जो थमनै डामाडोल करै सै, वे अपने-आपने नपुंसक बणा लेवै ।

13 हे बिश्वासी भाईयो, थम आजाद होण कै खात्तर परमेसवर के जरिये बुलाए गये सों, इस खात्तर थमनै मूसा नबी के नियम-कायदा ताहीं मानण की जरूरत कोनी, पर इसा ना होवै के थम इसनै बुरी लालसा पूरी करण का जरिया बणा ल्यो, पर हरेक कै गैल प्यार करो अर सेवा करो ।

14 क्यूँके सारे नियम-कायदे इस एक बात म्ह पूरे हो ज्या सै, “तू अपने पड़ोसी तै अपने जिसा प्यार कर ।”

15 पर जै थम एक-दुसरे नै जानवरां की ढाळ पाइ खाओ सों, तो चौकस रहो, के थम एक-दुसरे नै नाश ना कर दियो ।

~~~~~

16 पर मै कहूँ सूँ, पवित्र आत्मा नै थारे जीवन म्ह अगुवाई करण द्यो, ताके थम अपणी बुरी आदत्तां नै (लालसा) नै पूरी ना कर सकों ।

17 देह की बुरी लालसा पवित्र आत्मा के विरोध म्ह, अर पवित्र आत्मा देह की बुरी लालसा के विरोध म्ह लड़दी रहवै सै । इस कारण जो भले काम थम करणा चाह्को सों वो न्ही कर पान्दे ।

18 जै थम आत्मा की अगुवाई म्ह चाल्लों सों, तो थम मूसा के नियम-कायदा के अधीन न्ही सों ।

19 देह के काम तो दिक्खे सै, यानी के जारी, भुन्डे काम, लुचपण,

20 मूर्तिपूजा, टोणा, बैर, गुस्सा, विरोध, फूट विधर्म,

21 डाह, मतवालापण, रासलीला अर इनके जिसे और काम सै, इनके बारे म्ह मै थारे तै पैहल्या कह द्यु सूँ जिसा पैहल्या कहा था, के इसे-इसे काम करणीये परमेसवर के राज्य के वारिस न्ही हांगे ।

- 22 पर आत्मा का फल प्यार, आनन्द, शांति, धीरज, करुणा, भलाई, विश्वास,
 23 नम्रता, अर संयम सै, इसे-इसे काम्मां के बिरोध म्ह कोए भी नियम-कायदे कोनी ।
 24 अर जो मसीह यीशु म्ह सै उननै देह की बुरी लालसाओं* ताहीं क़रूस पै चढ़ा दिया सै ।
 25 क्यूँके पवित्र आत्मा नै म्हारे ताहीं नई जिन्दगी दी सै, इस खात्तर पवित्र आत्मा नै जिन्दगी के हरेक क्षेत्तर म्ह अगुवाई करण द्यो ।
 26 हम घमण्डी होकै ना एक-दुसरे नै छेड़ा, अर ना एक-दुसरे तै जळण करा ।

6

????? ? ? ? ? ? ? ?

- 1 हे विश्वासी भाईयो, जै कोए माणस किसे पाप या कसूर म्ह पकडचा भी जावै, तो थम जो पवित्र आत्मा के चलाए चाल्लों सों, उसनै नरमाई के गेल्या धर्म की राह पै उल्टा ल्यावण म्ह उसकी मदद करो, अर अपणा भी ध्यान राक्खों के थम भी इसे इम्तिहान म्ह ना पड़ जाओ ।
 2 म्हारे म्ह तै जै कोए भी मुसीबत म्ह हो, तो हमनै एक-दुसरे की मदद करणी चाहिए, अर इस तरियां हम मसीह के नियम-कायदा नै मान्ना सां ।
 3 क्यूँके जै कोए अपणे-आपनै नै बड़ा समझै सै, तो अपणे-आपनै धोक्खा देण लाग रहया सै ।
 4 हरेक माणस अपणे काम्मां नै परख ले, उसके काम आच्छे सै तो वो अपणे-आपनै पै घमण्ड कर सके सै, अर उसनै अपणे काम की बराबरी किसे दुसरे के काम गैल न्ही करणी चाहिए ।
 5 म्हारे म्ह तै हरेक माणस अपणे सुभाव के खात्तर जिम्मेदार सै ।
 6 यो जरूरी सै के जो माणस परमेसवर के वचनां नै सिखावै सै, तो उसकी संसारिक चिज्जां की जरूरत सीखण आळे तै पूरी हो होणी चाहिए ।
 7 अपणे-आप ताहीं धोक्खा ना द्यो, कोए माणस यो ना सोच्वे के वो परमेसवर नै धोक्खा दे सके सै ।
 8 क्यूँके जो माणस इसे काम करै सै उसका बुरा सुभाव उसके खात्तर मौत लेके आवै सै, पर जो माणस परमेसवर की इच्छा पूरी करै सै, तो उसका आत्मा उसनै अनन्त जीवन देवै सै ।
 9 हम भले काम करण का होसला ना छोड़डा, क्यूँके जै हम हिम्मत ना छोड़डा तो परमेसवर के बखत पै कटनी काटैगें ।
 10 इस करके जइँ ताहीं मौक्का मिलै हम सारा के गेल्या भलाई करा, खास करके विश्वासी भाईयाँ के गैल ।

???? ? ? ? ? ? ? ? ? ? ? ? ? ? ? ? ? ? ?

- 11 मन्ने बड़े-बड़े अक्षरां म्ह थार तैई अपणे हाथ तै लिख्या सै ।
 12 इस कारण के यहूदी लोग थमनै अपणावै, अर वे थारा खतना करवाण के खात्तर मजबूर करै सै, ताके लोग उन ताहीं इस बात का प्रचार करण खात्तर सतावै ना, के परमेसवर माणसां ताहीं जिब्बे बचावैगा जिब वे विश्वास करैगें के मसीह क़रूस पै मरा ।
 13 क्यूँके खतना करण आळे खुद तो मूसा नबी के नियम-कायदा पै न्ही चाल्दे, वो थारा इस खात्तर खतना करणा चाहवै सै ताके और यहूदियाँ कै स्याम्ही घमण्ड कर सकै, के थारा खतना उनकी बजह तै होया सै ।।
 14 खुद कै खात्तर, मै, किसे बात पै घमण्ड कोनी करणा चाहूँ, पर यीशु मसीह के क़रूस पै जान देण कै कारण, मै घमण्ड करणा चाहूँ सँ, अर जो उसनै करया उस बजह तै दुनियावी चिज्जां का मेरे उप्पर कोए हक कोनी रह्या, अर इब मेरी दुनियावी चिज्जां म्ह कोए दिलचस्पी कोनी ।
 15 क्यूँके ना खतना अर ना बिना खतना कुछ सै, जो जरूरी बण चुके सै, जो जरूरी सै वो यो सै के परमेसवर हमनै पवित्र आत्मा के जरिये नया इन्सान बणा दे ।

* 5:24 5:24 बुरी लालसाओं शरीर की बुरी आवत

16 परमेश्वर अपनी शान्ति और आशीष उन सारया नै देवैगा, जो उसके हुकम नै मान्ने सै। वे परमेश्वर के माणस सै।

17 आगै तै मन्ने कोए दुख ना दे, क्यूँके जो मेरे देह पै जख्मा के दाग सै वो ये दिखावे सै के मै यीशु का दास सूं।

18 हे विश्वासी भाईयो, म्हारे प्रभु यीशु मसीह का अनुग्रह थारी आत्मा के गेल्या रहवै। आमीन।

इफिसुस नगर के माणसां ताहीं प्रेरित पौलुस की चिट्ठी

???????

इफिसुस नगर के माणसां ताहीं प्रेरित पौलुस की चिट्ठी परमेसवर की योजना जुड़ी सै, के जो कुछ सुगं म्ह सै अर जो कुछ धरती पै सै, सारा सब कुछ वो मसीह म्ह कटठा करां (1:10)। इफिसियों के पैहले भाग म्ह लेखक एकता के बारे म्ह बात करै सै, उस राह के बारे म्ह बतावै सै, जिसके जरिये परमेसवर पिता नै अपणे माणसां का चुनाव करया, कै किस तरियां बेटे यीशु मसीह के जरिये उन ताहीं अपणे पाप तै माफी मिल्ली अर वे छुड़ाए गये सै, अर किस तरियां पवित्र आत्मा के जरिये परमेसवर का महान वादे नै पूरा करण का भरोस्सा दिया गया सै। दुसरा भाग म्ह वो पाठकां ताहीं इसी जिन्दगी जीण की बिनती करै सै, के मसीह म्ह उनकी एकता उनके सामूहिक जीवन की सच्चाई वण जावै।

मसीह तै जुड़े परमेसवर के माणसां म्ह एकता नै दिखाण खात्तर कई मिसाल काम म्ह लाई गई सै, कलीसिया एक देह की तरियां सै, जिसका सिर मसीह सै, या फेर यो एक मकान के तरियां सै, जिस म्ह कुण के सिरे का पत्थर मसीह सै, यो एक पत्नी की तरियां सै जिसका धणी मसीह सै। हर एक बात इस म्ह मसीह के प्रेम, बलिदान, माफी, अनुग्रह अर सिद्धता की रोशनी म्ह देख्या गया सै।

रूप-रेखा

जानकारी 1:1,2

मसीह अर कलीसिया 1:3-3:21

मसीह म्ह नया जीवन 4:1-6:20

समापन 6:21-24

1 या चिट्ठी पौलुस की ओड़ तै सै, जो परमेसवर की इच्छा तै यीशु मसीह का प्रेरित सै, मै या चिट्ठी उन पवित्र अर मसीह यीशु म्ह बिश्वासी माणसां के नाम लिखूं सूं, जो इफिसुस नगर म्ह रहवै सै।

2 मै प्रार्थना करूं सूं, के म्हारे पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिल्दी रहवै।

???????

3 म्हारे परमेसवर अर प्रभु यीशु मसीह के पिता का धन्यवाद हो के उसनै म्हारे ताहीं मसीह म्ह आत्मिक रूप तै हरेक तरियां तै, उन आशीषां के जरिये आशिषित करया जो सुगं तै आवै सै।

4 परमेसवर नै धरती अर अकास बणाण तै पैहले ए उसनै मसीह म्ह म्हारे ताहीं चुण लिया, ताके हम इसकी निगांह म्ह पवित्र अर बेकसूर होवां।

5 अर प्यार म्ह उसनै अपणी भले मकसद मुताबिक म्हारे ताहीं अपणे खात्तर पैहले तै ठहराया के यीशु मसीह के जरिये हम उसकी गोद ली होई ऊलाद हो।

6 तो आओ हम परमेसवर के अदभुत अनुग्रह की महिमा करा, अर यो इस खात्तर होया सै क्यूंके म्हारा रिश्ता उसके बेटे के गैल सै, जिसतै वो प्यार करै सै।

7 यीशु मसीह के लहू बहाए जाण के कारण हम छुड़ाए गये, जिसका मतलब यो सै के म्हारे सारे पाप माफ होए। परमेसवर के भोत अनुग्रह के मुताबिक मसीह म्ह उसके लहू के जरिये छुटकारा यानी पापां तै माफी मिलै सै।

8 परमेसवर नै सारी बुद्धि अर ज्ञान तै म्हारे पै भोत-ए घणी दया करी।

9 परमेसवर नै अपणी इच्छा का भेद म्हारे पै भले मकसद के मुताबिक जाहिर करया, जिस ताहीं उसनै खुद मसीह म्ह स्थापित करया।

10 अर परमेसवर की योजना कै मुताबिक, तय करे गए बखत पै, जो किमे सुर्ग अर धरती पै सै, वो सारा किमे मसीह के हाथ म्ह सौपैगा।

11 परमेसवर नै मसीह म्ह हम यहूदी माणसां ताहीं भी अपने माणस होण खात्तर छूट लिया सै, क्यूँके शरू तै ए उसकी या योजना थी, उसनै यो सब कुछ अपनी इच्छा अर योजना के मुताबिक करया।

12 यो उसनै इस खात्तर करया जिसतै के हम यहूदियाँ ताहीं जो पैहले माणस सै, जो मसीह पै आस राखै सै, अर उसकी महिमा की बड़ाई के कारण बणा।

13 अर योए थारे गैल भी होया के थमनै सच्चाई का वचन सुण्या, अर वो सुसमाचार यो सै, के थमनै वो किस तरियां बचा सकै सै, जिब थम मसीह पै बिश्वास करो सों तो परमेसवर थमनै वादे के मुताबिक पवित्तर आत्मा देवै सै, यो दिखाण खात्तर के थम परमेसवर के माणस सों।

14 क्यूँके परमेसवर नै म्हारे ताहीं पवित्तर आत्मा दिया सै, तो हम यो जाणा सां के परमेसवर म्हारे ताहीं और भी आच्छी चीज देवैगा, जिसका उसनै वादा करया सै, अर यो उस बखत होगा जिब परमेसवर अपने माणसां नै पूरी तरियां तै छुड़ावैगा, उसके अदभुत अनुग्रह की बड़ाई होवै।



15-16 इस कारण, जिब तै मन्ने भी पूरभु यीशु मसीह म्ह थारे बिश्वास अर पवित्तर माणसां के प्रति थारे प्यार के बारे म्ह सुण्या, तो मै परमेसवर का सदा धन्यवाद करूँ सूँ, अर अपनी प्रार्थना म्ह थमनै हमेशा याद राखूँ सूँ।

17 मै प्रार्थना करूँ सूँ, के महिमामय परमेसवर जो के म्हारे पूरभु यीशु मसीह का पिता सै, वो थारे ताहीं आत्मिक समझ अर ज्ञान देवै, ताके थम परमेसवर नै पूरी तरियां जाण सकों।

18 मै या भी प्रार्थना करूँ सूँ, के वो सच्चाई जाणण म्ह थारी मदद करै के थम जाण सकों के परमेसवर के जरिये बुलाये जाण की आस के सै, अर थम जाण सकों के इतनी बड़ी अर महान् आशीष अपने पवित्तर माणसां खात्तर राख राखी सै।

19 मै चाहूँ सूँ के थम उसनै जाण सको, के उस महान् परमेसवर नै यीशु मसीह पै बिश्वास करण आळे खात्तर जो शक्ति राख राखी सै, या वाए बड़ी शक्ति सै।

20 जिसनै मसीह ताहीं मरे होया म्ह तै जिवाया अर सुर्ग म्ह अपनी सोळी ओड़ बैठाया।

21 सारी ढाळ की प्रधानता, हक, सामर्थ, प्रभुता के उप्पर राज करैगा जो इस लोक म्ह सै, अर आण आळे लोक म्ह भी राज करैगा।

22 परमेसवर नै सारा किमे उसके पायां तळै कर दिया, अर उसनै कलीसिया की भलाई खात्तर सब किमे उसके हाथ्यां म्ह सौप दिया।

23 कलीसिया मसीह की देह सै, अर उसतै भरपूर सै, वो अपनी मौजूदगी तै हरेक चीज अर हरेक जगहां नै भरै सै।

2



1 पुराणे बखत म्ह थारे धरै नई जिन्दगी कोनी थी, थम अपने बुरे कामां अर पापां के कारण मरे होए माणसां के समान थे।

2 थम उस बखत दुनिया की रीति-रिवाज के मुताबिक, बुरी आत्मायाँ के सरदार जो अकास म्ह सै, उसके मुताबिक चाल्लों थे, जो इब भी उनके मनां म्ह काम करै सै, जो परमेसवर का हुकम न्ही मानते।

3 इन म्ह हम भी सारे के सारे पैहले अपनी देह की लालसाओं म्ह दिन बितावा थे, अर देह अर मन की मर्जियाँ नै पूरी करा थे, अर और माणसां की ढाळ सुभाव तै ए छो की ऊलाद थे।

4 पर परमेसवर नै जो दया का धनी सै, अपने उस घणे प्यार के कारण जिसतै उसनै म्हारै तै प्यार करया।

5-6 अपने पुराणे जीवन म्ह पापां के कारण हम मरे होए थे तो परमेसवर नै जिस तरियां यीशु मसीह ताहीं जिन्दा करया, हमनै भी आत्मिक रूप तै जिन्दा करैगा, अर सुर्गीय जगहां म्ह मसीह कै गेल्या बिठावैगा, अर परमेसवर के अनुग्रह तै ए धारा उद्धार होया सै।

7 परमेसवर नै यो इस खात्तर करया के अपनी दया तै जो मसीह यीशु म्ह म्हारै पै सै, आण आळे दिनां म्ह दिखा सकै, के उसका अनुग्रह कितना बड़ा सै, हम जो मसीह म्ह सां, उसनै म्हारे पै भी अनुग्रह दिखाया।

8 जब थमनै परमेसवर पै विश्वास करया तो उसनै अपने अनुग्रह के जरिये धारा उद्धार करया सै, धारा उद्धार थारी ओड़ तै न्ही, बल्के परमेसवर ओड़ तै दान सै।

9 यो इस करकै न्ही होया के थमनै कोए भला काम करया सै, अर थम उसपै घमण्ड करो।

10 क्यूँके हम उसके बणाए होए सां, अर मसीह यीशु म्ह उन भले काम्मां के खात्तर रचे गये जिन ताहीं परमेसवर नै पैहले तै म्हारे करण कै खात्तर तैयार करया।



11 इस कारण थम याद राख्खों के थम जन्म तै गैर यहूदी सां, अर यहूदी लोग धारा मजाक उड़ावै सै, के धारा खतना कोनी होया, पर उनका खतना होया सै, इस खात्तर वे परमेसवर के लोग सै। पर उननै खतना अपनी देह का करवाया सै मन का कोनी करवाया।

12 थम उस बखत मसीह ताहीं कोनी जाणो थे, अर थम परमेसवर के चुणे होए इस्राएली माणस कोनी थे, अर वादे के करार के भी साइद्धी कोनी थे, जो उसनै अपने माणसां तै बाँधी थी, अर बिना आस अर दुनिया म्ह बिना ईश्वर के थे।

13 पर पैहले जो थम, परमेसवर तै दूर थे, परमेसवर नै थारे ताहीं मसीह यीशु के लहू बहाण के जरिये धौरै बुला लिये सां।

14 मसीह नै हम यहूदी अर थम गैर यहूदी माणसां म्ह शान्ति बणाई सै, पुराणे बखत म्ह यो लाग्गै था के यहूदी अर गैर यहूदी माणसां म्ह एक दीवार सै, वो एक-दुसरे तै नफरत करै थे, पर मसीह नै वा दीवार ढा दी सै, अर दोन्नु दला* ताहीं एक कर दिया सै।

15 उसनै अपनी मौत के जरिये मूसा के नियम-कायदा ताहीं रद्द कर दिया, ताके वो यहूदी अर गैर यहूदी माणसां म्ह शान्ति लेकै आवै, अर इसके जरिये वो अपने-आप म्ह यहूदी अर गैर यहूदी की जगहां एक नई जात बणा दे।

16 उसनै कूरूस पै अपनी जाण देकै यहूदी-अर गैर यहूदी माणसां म्ह बैर का नाश करके एक देह बणाके परमेसवर तै मिला दिया।

17 मसीह नै आके थम गैर यहूदी जो उसतै दूर थे, अर थम यहूदी माणस जो परमेसवर कै लोवे थे, दोनुआ ताहीं मेळ-मिलाप का सुसमाचार सुणाया।

18 क्यूँके मसीह म्ह ए हम सब उस एक पवित्तर आत्मा कै जरिये ए पिता के धौरै पोहच सका सां।

19 इस करके थम गैर यहूदी इब विदेशी अर मुसाफिर कोनी रहे, पर पवित्तर माणसां के साथी देशी अर परमेसवर के कुणवे के होंगे सां।

20 थम उस घर की तरियां सां जिसकी नीम प्रेरित अर नबी सै, अर जिसकै कोणे का पत्थर मसीह यीशु आप सै।

21 मसीह ए सै जिसनै घर ताहीं टिकाकै राख्या सै, अर उसतै प्रभु के खात्तर एक पवित्तर मन्दर बणादा जावै सै।

22 क्यूँके थम मसीह म्ह सां, इस खात्तर थम गैर यहूदी विश्वासी परमेसवर के माणसां गैल एक होंगे, ताके थम वो घर बणदे जाओ जिस म्ह परमेसवर रहवै सै।

* 2:14 2:14 दलां टोळ, समूह

3

~~~~~

1 इस कारण मैं पौलुस थारे खात्तर केद म्ह सूँ, क्यूँके मैं थम गैर यहूदी माणसां नै सुसमाचार सुणाकै मसीह यीशु की सेवा करूँ सूँ।

2 पक्का थमनै सुण्या होगा के परमेसवर नै अपणे अनुग्रह तै थारे ताहीं सुसमाचार की खबर सुणाण की जिम्मेदारी मेरे ताहीं दी सै।

3 परमेसवर की गुप्त योजना घणे लम्बे बखत तै छुपी होई थी, पर परमेसवर नै इस ताहीं मेरे उप्पर जाहिर करया, मैं इस चिट्ठी के जरिये परमेसवर के उस गुप्त भेद नै थारे ताहीं समझाणा चाहूँ सूँ।

4 जिव थम मेरी चिट्ठी नै पढ़ोगे तो थम जाण पाओगे, के मैं मसीह के उस भेद के बारे म्ह कितनी आच्छी तरियां जाणूँ सूँ।

5 पुराणे बखत म्ह परमेसवर नै इस भेद ताहीं माणसां के उप्पर जाहिर कोनी करया, पर इब उसनै उस भेद ताहीं पवित्र आत्मा के जरिये, अपणे पवित्र प्रेरितां अर नबियाँ पै जाहिर करया।

6 अर वो भेद यो सै के मसीह यीशु म्ह सुसमाचार के जरिये गैर यहूदी वाए विरासत हासिल करै, जो यहूदी माणसां के धारे सै, अर एकैए देह के अंग अर परमेसवर के वादे के साइझी सै।

7 परमेसवर के अनुग्रह अर बड़ी सामर्थ के जरिये मेरे ताहीं सुसमाचार सुणाण का काम मिला सै।

8 मेरै पै जो सारे पवित्र माणसां म्ह तै, छोटटे तै भी छोटटा सूँ, यो अनुग्रह होया के मैं गैर यहूदियाँ नै मसीह का सुसमाचार सुणाऊँ, अर लोग्गां नै परमेसवर की योजना ताहीं समझण म्ह मदद करूँ।

9 अर हरेक माणसां ताहीं समझा सकूँ के उसनै उस योजना ताहीं जो उसनै पैहले तै सोच्यी थी, किस तरियां पूरी करी, या योजना पैहले तै जाहिर कोनी होई थी क्यूँके परमेसवर जो सारी चिज्जां नै रचणियाँ सै, उस ताहीं छिपाए राख्या।

10 ताके इब कलीसिया के जरिये, परमेसवर का बेसुमार ज्ञान आसमान के उन प्रधानां अर अधिकारियां पै जाहिर करया जावै।

11 परमेसवर नै दुनिया बणाण तै पैहले या योजना बणाई थी, जिस ताहीं उसनै म्हारे प्रभु यीशु मसीह के जरिये पूरा करया।

12 क्यूँके म्हारा मसीह पै बिश्वास सै, अर उसके कारण परमेसवर की मौजूदगी म्ह हिम्मत अर भरोस्से के गेल्या परमेसवर के लोवै आ सका सां।

13 इस करके मैं बिनती करूँ सूँ के जो क्लेश थारे खात्तर मन्नै होवै सै, उनके कारण हिम्मत ना छोड़ो, क्यूँके हम पिता परमेसवर के धारै जा सका सां।

~~~~~

14 मैं इस्से कारण उस पिता परमेसवर के आगूँ घुटने टेक के प्रार्थना करूँ सूँ।

15 वोएँ सै जो सुर्ग अर धरती पै, हरेक वंश का पिता सै।

16 मैं प्रार्थना करूँ सूँ, के परमेसवर अपनी महिमा के असीमित धन के मुताबिक थारे पै अनुग्रह करै, ताके थम उसकी पवित्र आत्मा तै अपणे भीतरी माणसपण म्ह सामर्थ पाके शक्तिशाली होन्दे जाओ।

17-18 अर बिश्वास के जरिये मसीह म्हारे मन म्ह बसै, ताके थम प्यार म्ह मजबूत होके बणे रहों, अर सारे पवित्र माणसां के गेल्या आच्छी ढाळ समझण की ताकत पाओ, के उसके प्यार की चौड़ाई, लम्बाई, अर ऊँचाई, अर गहराई कितनी सै।

19 मैं प्रार्थना करूँ सूँ, के थम मसीह के उस प्यार नै जाण सको जो ज्ञान तै परै सै, ताके थारा सुभाव परमेसवर के सुभाव जिया हो जावै।

20 परमेसवर ताकतवर सै, अर वो म्हारी बिनती अर समझ तै भी घणा काम कर सकै सै, उस सामर्थ्य के मुताबिक जो म्हारे म्ह काम करै सै।

21 कलीसिया म्ह अर मसीह यीशु म्ह उसकी बड़ाई पीढ़ी तै पीढ़ी तैई युगानुयुग होंदी रहै। आमीन।

4

???? ? ? ? ? ? ? ? ? ? ?

1 मैं प्रभु की सेवा करण के कारण कैद म्ह सू, अर थारे तै बिनती करूं सू, के जिस बुलाहट तै परमेसवर नै थारे ताहीं बुलाया सै, उस्से तरियां जीवन बिताओ।

2 यानी सारी दीनता अर नम्रता गैल, धीरज धरकै प्यार तै एक-दुसरे नै सह ल्यो।

3 इसा करण की भरपूर कोशिश करो, के थम रळ-मिलकै रह सकों, क्यूँके परमेसवर की आत्मा के जरिये थम एक ए होण खात्तर बुलाए गये सों।

4 हम सारे विश्वासी, देह के अंगां की ढाळ सां, अर सारया नै एकैए पवित्र आत्मा पाई सै, उस्से ढाळ जिब परमेसवर नै थारे ताहीं अपणे माणस होण खात्तर बुलाया था, तो थारे ताहीं एक उम्मीद दी गई थी।

5 सिर्फं एकै प्रभु सै, एकै विश्वास सै, हम सारया नै यीशु के नाम म्ह बपतिस्मा पाया सै,

6 सिर्फं एकै परमेसवर सै जो सारे माणसां का पिता सै, जो सब कै उप्पर राज करै सै, अर हम सब कै जरिये काम करै सै, अर हम सारया के म्ह रहवै सै।

7 पर मसीह नै हम सारया ताहीं उसके काम करण खात्तर न्यारे-न्यारे ढाळ की खास काबलियत देई सै।

8 इस करकै पवित्र-ग्रन्थ मसीह के बारे म्ह कहवै सै, “वो ऊँचे पै चढ़ा अर कैदियां नै बाँधले गया, अर माणसां ताहीं आत्मिक दान दिए।”

9 उसके ऊँचे पै चढ़ण का, के मतलब हो सकै सै, सिवाए इसके के वो अधोलोक म्ह भी उतर गया।

10 अर जो उतर गया, यो वोए सै, जो सुर्ग म्ह सारे तै ऊँचे पद पै पोहच गया, जिसतै के उसका राज सारे ब्रह्माण्ड म्ह फैल जावै।

11-12 यो मसीह सै जो म्हारे ताहीं वरदान देवै सै, उसनै कईयाँ तै प्रेरित, अर कईयाँ तै नबी, कईयाँ तै सुसमाचार सुणाण आळे, कईयाँ तै सेवक अर शिक्षक नियुक्त करया, इनकी जिम्मेदारी या सै के ये और दुसरे माणसां नै सीखा के परमेसवर का काम करवा सकै, अर कलीसिया जो मसीह की देह सै उस ताहीं मजबूत कर सकै।

13 यो तब तक होन्दा रहवैगा जिब तक के हम अपणे विश्वास, अर परमेसवर के बेट्टे के बारे म्ह अपनी समझ म्ह एक ना हो जावां, फेर हम सिध्द बणागे जिस तरियां मसीह सिध्द सै, अर हम पूरी तरियां तै उसके जिसे बण जावांगे।

14 मसीह म्ह बढ़ण अर सिध्द होण कै कारण, हम बाळकां के जिसा बरताव ना करां, हम उस किस्ती की ढाळ ना बणा, जिसनै झाल* आगौ-पाच्छै, अर हवा आस्सै-पास्सै उछाळै सै। इसका मतलब यो सै, के चलाक, अर ठग माणस अपनी झूट्टी शिक्षा कै जरिये हमनै धोक्खा न्ही देण पावै।

15 बल्के सच नै प्यार तै बोल्लों, अर सारी बाततां म्ह मसीह यीशु की तरियां सिध्द बणो, जो के म्हारा सिर सै।

16 हम सारे जो मसीह म्ह विश्वास करां सां, हम उसकी देह के अंग की तरियां सां, जिस तरियां एक माणस की देह, जोड़ा के जरिये एक साथ जुड़ी हो सै अर जिब देह का हर हिस्सा आच्छी तरियां काम करै सै, तो देह का विकास होके मजबूत बणै सै, इस्से तरियां म्हारे म्ह तै जै कोए मसीह का काम करै सै, जो मसीह नै म्हारे ताहीं दिया सै, तो हम भी मजबूत अर सिध्द होवां सां, अर हम एक-दुसरे तै ज्यादा प्यार करां सां।

* 4:14 4:14 झाल लहरे

????? ???? ???? ???? ???? ?

17 इस करके परमेश्वर नै जो अधिकार मेरे ताहीं दिया सै, उसकी बजह तै मै न्यू कहुँ सूँ, के जिसा अविश्वासी माणस अपणे मन की बेकार की रीति-रिवाजां म्ह अपणा जीवन जीवै सै, थम आज तै इसा जीवन ना जिओ।

18 क्यूँके वे समझ न्ही पाण लागरे, के उस अज्ञानता कै कारण, अर उनके मन की कठोरता कै कारण, जो उन म्ह सै, वे परमेश्वर के उस जीवन तै न्यारे करे गए सै जो परमेश्वर देवै सै।

19 वे बुरे काम की बजह तै अपणी गलती महसूस न्ही करते अर उननै अपणे-आप ताहीं बुरे काम्मां खात्तर सौप दिया सै, वे सारी ढाळ के भुन्डे काम लगातार करते जावै सै।

20 पर थमनै मसीह की शिक्षायां म्ह इसे काम करणे न्ही सीखे।

21 बल्के जो थमनै यीशु मसीह के बारे म्ह सुण्या अर जो थारे शिक्षकां नै सिखाया, वोए उसकी ओड़ तै सच्चा सन्देस सै।

22 अर थारे शिक्षकां नै थारे बुरे काम अर बुरा सुभाव छोड़णा सिखाया सै, थारी बुरी लालसायां नै थारा जीवन नाश कर दिया।

23 थम पवित्तर आत्मा नै थारे सुभाव अर सोचचण के तरिकके नै बदलण द्यो।

24 परमेश्वर नै थारे ताहीं एक नया सुभाव दिया सै, जो के उसके अपणे सुभाव की तरियां सै, इस करके इस नये सुभाव के मुताबिक बरताव करो। असलियत म्ह धर्मी अर पवित्तर बणो।

25 इस कारण झूठ बोलणा छोड़के हरेक अपणे पड़ोसी तै सच बोल्लै, क्यूँके हम आप्स म्ह हम एक ही देह के अंग सां।

26 जै थारे ताहीं गुस्सा आ भी जावै तो उस गुस्से म्ह पाप ना करियो, अर सूरज ढळण तै पैहल्या थारा गुस्सा भी न्ही रहणा चाहिए।

27 अर अपणे-आप ताहीं शैतान नै परखण का मौक्का ना द्यो।

28 चोरी करण आळा फेर चोरी ना करै, बल्के मेहनत करके अपणी कमाई के जरिये दुसरे माणसां की भी मदद कर सकै, जो जरूरत मन्द हो।

29 कोए भी गलत बात थारे मुँह तै ना लिकडै, पर जरूरत कै मुताबिक वोए लिकडै जो दुसरयां के विश्वास की बढ़ोतरी कै खात्तर हो, ताके वा बात जो थारे मुँह तै लिकडै सै वा सुणण आळा नै उत्साहित कर सकै।

30 परमेश्वर के पवित्तर आत्मा नै दुखी ना करो, जो उसनै थारे ताहीं दिया सै, जो पक्का छुटकारै के दिन थमनै बचा सकै सै।

31 इस करके सारी ढाळ की कड़वाहट, प्रकोप, गुस्सा, झगड़ा, अर बुराई, सारे बैरभाव नै अपणी जिन्दगी तै लिकाड द्यो।

32 एक-दुसरे पै दयालु अर करुणामय हो, अर जिसा परमेश्वर नै मसीह म्ह थारे कसूर माफ करे, उससे तरियां थम भी एक-दुसरे के कसूर माफ करो।

5

???????? ? ???? ???? ?

1 थम परमेश्वर के बाळक सां, जिनतै वो प्यार करै सै, इस करके उसकी ढाळ बणण की कोशिश करो।

2 दुसरयां तै प्यार करण आळी जिन्दगी जिओ, जिस तरियां मसीह जिया, जिसनै थारे तै प्यार करया अर म्हारे पापां नै मिटाण खात्तर अपणे-आप ताहीं कुरबान कर दिया, अर परमेश्वर उसकी कुरबान्नी तै खुश था, क्यूँके वा कुरबान्नी परमेश्वर के खात्तर खसबूदार भेट के समान थी।

3 जिसा पवित्तर माणसां के लायक सै, उसाए थारे म्ह जारी अर किसे ढाळ के अशुद्ध काम या लोभ का जिक्र तैई ना हो,

4 अर ना बेशर्मी, ना मूर्खता की बातचीत, ना मजाक की, क्यूँके ये बात शोभा न्ही देंदी, बल्के थारे मुँह तै परमेश्वर का ए धन्यवाद सुण्या जावै।

5 क्यूँके थम यो आच्छी तरियां तै जाणो सों, के कोए भी जार, दुराचारी, या लोभी माणस जो मूर्तिपूजकां के समान सै, ये मसीह अर परमेसवर के राज्य के भागी न्ही हो सकदे।

6 कोए थमनै धोक्खा ना देवै के परमेसवर पाप करण आळे माणसां नै दण्ड कोनी देवै, क्यूँके परमेसवर का छो हुकम ना मानण आळे पै भडकै सै।

7 इस करकै थम उनके पापी काम्मां म्ह उनके साझीदार ना होओं।

8 क्यूँके थम तो पैहल्या उन माणसां की ढाळ थे जो अन्धकार म्ह थे, पर इब थम परमेसवर के लोग बणगे सों, इस करकै थम इब चाँदणे म्ह सों, तो इब थमनै उन माणसां की ढाळ जीणा चाहिए जो चाँदणे म्ह सै।

9 क्यूँके जै माणस चाँदणे म्ह सै तो उसका सुभाव आच्छा अर धर्मी सै, अर उसपै विश्वास करया जा सकै सै।

10 अर यो परखो के पूरभु नै के आच्छा लागै सै।

11 थम उनके बुरे काम्मां म्ह उनके साझीदार ना होओं, बल्के लोग्गां नै बताओ के ये काम बुरे सै।

12 क्यूँके उनकै गुप्त काम्मां का जिक्र भी शर्म की बात सै।

13 जिव बुरे लोग थारा आच्छा सुभाव देखै सै तो उनका बुरा सुभाव जाहिर हो जावै सै, उसकी बजह तै वो अपणा बुरा सुभाव छोड़ दे सै, अर थारे जिसे आच्छे बण जावै सै।

14 इस कारण एक कहावत सै के “हे सोण आळे जाग! अर मुदाँ म्ह तै जी उठ! ताके मसीह थारे पै अपणा चान्दणा चमकावै।”

15 इस करके ध्यान तै देखों, के किसा जीवन जीण लागरे सों। बेअक्ला की तरियां न्ही पर अकलमंद की तरियां जिओ।

16 भौक्कै नै घणा कीमती समझों, क्यूँके दिन बुरे सै।

17 इस कारण बेअकल ना होओं, पर ध्यान तै समझो के पूरभु की मर्जी के सै।

18 मदिरा पी के मतवाले ना बणो, क्यूँके इसतै लुचपण होवै सै, पर पवित्तर आत्मा तै भरदे जाओ।

19 जिव थम पवित्तर आत्मा के कहे म्ह चाल्लोंगे तो ये काम करोगे, जिव थम कट्टे होओगे तो आप्स म्ह परमेसवर के भजन, उसकी जै-जै कार अर आत्मिक गीत गाया करोगे, अर अपणे-अपणे मन म्ह पूरभु के आगै गान्दे अर कीर्तन करदे रहो।

20 अर सदा सारी बाततां कै खात्तर म्हारे पूरभु यीशु मसीह कै नाम तै परमेसवर पिता का धन्यवाद करते रहो।

21 मसीह कै प्रति श्रद्धा-भक्ति राक्खण के कारण एक-दुसरे कै अधीन रहो।

पति अर पत्नी

22 हे पत्नियों, अपणे-अपणे पति कै इस ढाळ अधीन रहो जिस ढाळ पूरभु के अधीन रहो सों।

23 क्यूँके पति तो पत्नी का सिर सै, जिस ढाळ मसीह कलीसिया का सिर सै, अर कलीसिया मसीह की देह सै अर उद्धारकर्ता भी सै।

24 पर जिस ढाळ कलीसिया मसीह कै अधीन सै, उससे तरियां पत्नियाँ भी हर बात म्ह अपणे-अपणे पति कै अधीन रहै।

25 हे पतियों, अपणी-अपणी पत्नियाँ तै प्यार राक्खो, जिसा मसीह नै भी कलीसिया तै प्यार करके उसकै खात्तर अपणी जान दे दी।

26 ताके वो कलीसिया (विश्वासी लोग्गां) ताहीं वचन तै नाहण के जरिये पापां तै शुद्ध करै, अर पवित्तर बणावै।

27 वो अपणी कलीसिया खात्तर मरया ताके वो अपणे माणसां नै सिध्द बणाकै अपणी हजुरी म्ह ल्या सकै, जिस म्ह ना कलंक, ना झुरी, ना कोए और इसी चीज हो बल्के पवित्तर अर बेकसूर हो।

28 इस तरियां सही सै के पति अपणी-अपणी पत्नी तै अपणी देह के समान प्यार राक्खै। जो अपणी पत्नी तै प्यार करै सै। वो अपणे-आप तै प्यार करै सै।

29 क्यूँके किसे नै कदे अपणे देह तै बैर न्ही करया बल्के वो उसका पालन-पोषण करै सै, जिसा मसीह भी कलीसिया कै गैल करै सै।

30 इस करकै के हम मसीह की देह के अंग के समान सां।

31 जिसा के पवित्रग्रन्थ म्ह लिख्या सै, “इस कारण माणस अपणे माँ बाप नै छोड़कै अपणी पत्नी तै मिल्या रह्यैगा, अर वे दोनु एक देह होंगे।”

32 यो भेद तो बड़ड़ा सै, पर मै याड़ै मसीह अर कलीसिया कै बारै म्ह कहूँ सूं।

33 पर थारे म्ह तै हरेक अपणी पत्नी तै अपणे समान प्यार करै, अर पत्नी भी अपणे पति का डर मान्नै।

6

~~~~~

1-3 पवित्र ग्रन्थ कहवै सै, के “अपणे माँ बाप का आदर कर, तो तेरा भला होगा अर इस धरती पै तेरी उम्र भी लम्बी होवैगी।” अर यो परमेसवर की ओड़ तै दिया गया पैहला हुकम सै, जिसके गैल वादा भी सै। हे बाळकां आळो, यो थारे खात्तर सही सै, के थम जो परमेसवर पै विश्वास करो सों, तो अपणे माँ-बाप का कहणा मान्नो।

4 हे बाळकां आळो, अपणे बाळकां नै गुस्सा ना दुवाओ, पर शिक्षा अर चेतावनी देंदे होए उनका पालन-पोषण करो।

~~~~~

5 हे नौकरों, जो माणस इस दुनिया म्ह थारे माल्लिक सै, उनका हुकम डरदे अर कापते होए मान्नो, जिस मन तै थम मसीह का हुकम मान्नो सों।

6 माणसां नै खुश करण आळा कै समान दिखावटी सेवा ना करो, पर थम मसीह के दास सों, इस करकै थम पूरे मन तै वो काम करो जो परमेसवर चाहवै सै।

7 अर उस सेवा नै माणसां की न्ही, पर प्रभु की सेवा जाणकै सच्चे मन तै करो।

8 क्यूँके थम जाणो सों के जो कोए जिसा आच्छा काम करैगा, चाहे दास हो चाहे आजाद माणस, प्रभु तै उसका फळ पावैगा।

9 हे मालिकों, थम भी धमकी देणा छोड़कै नौकरां गैल उसाए व्यवहार करो, क्यूँके थम जाणो सों के उनका अर थारा दोनुआ का माल्लिक सुर्ग म्ह सै, अर वो किसे का पक्षपात न्ही करदा।

~~~~~

10 इस करकै मै कहूँ सूं के थम प्रभु म्ह आत्मिक रूप तै शक्तिशाली बणो।

11 परमेसवर के सारे हथियार बाँध ल्यो ताके थम शैतान की चालां कै स्याम्ही खड़े रह सको।

12 क्यूँके म्हारा यो आत्मिक युध्द माणसां तै कोनी, पर प्रधानां, अधिकारियां, अर इस संसार के अन्धकार के हाकिमां अर दुष्टता की आत्मिक सेनाओं तै सै, जो अकास म्ह सै।

13 इस करकै परमेसवर के सारे हथियार बाँध ल्यो ताके जिब बुरे दिन आवै तो उनका सामना कर सको, अर सब कुछ करण म्ह मजबुत्ती तै डटे रह सको।

14 इस करकै परमेसवर की सच्चाई के मुताबिक जिओ, यो इस तरियां सै, जिसा एक सिपाही का बेल्ट तै अपणी कमर कसणा, अर धार्मिकता की झिलम पैहर ल्यो जो थारे आच्छे सुभाव नै दिखावै सै, जो थमनै शैतान के हमले तै बचावैगा।

15 जिस तरियां एक सिपाही युध्द लड़ण कै खात्तर पैरां म्ह जूते पैहरै सै, उस्से तरियां थम भी परमेसवर के साथ शान्ति के सुसमाचार के जरिये, शैतान तै लड़ण खात्तर त्यार हो जाओ।

16 अर इन बातों के होन्दे होए जिस तरियां सिपाही, ढाल तै अपणे-आपनै दुश्मन के तीरां तै बचावै सै, उस्से तरियां मसीह म्ह पक्का विश्वास करो ताके थम शैतान के हमलां तै खुद नै बचा सको।

17 जिस तरियां सिपाही युध्द म्ह अपणे सिर नै बचाण खात्तर टोप पैहरै सै, उस्से तरियां परमेसवर की ओड़ तै मिल्या उद्धार भी म्हारा टोप सै, जो थमनै शैतान के हमलां तै बचावैगा, अर जिस तरियां सिपाही युध्द म्ह तलवार तै अपणे-आपनै बचावै सै, अर थम भी आत्मा की तलवार, जो परमेसवर का वचन सै, ले ल्यो, अर शैतान तै खुद नै बचा ल्यो।

18 हरेक बखत अर हरेक ढाळ तै पवित्र आत्मा की अगुवाई म्ह प्रार्थना अर बिनती करते रहों, इस करके जागते रहों अर सारे पवित्र माणसां खात्तर लगातार बिनती करते रहों।

19 अर थम मेरै खात्तर भी प्रार्थना करो, ताके मेरे बोल्लण के बखत इसे शब्द दिये जावै के मै हिम्मत के गैल सुसमाचार का भेद बता सकूँ।

20 इस्से खात्तर मै बेल्लां तै जकड़ा होया राजदूत के समान सेवा करण लाग रहया सूं, प्रार्थना करो के जिस तरियां मन्नै बोलणा चाहिए, उस्से ढाळ वेधड़क होके सुसमाचार का प्रचार कर सकूँ।

**\*\*\*\*\***

21 तुखिकुस जो प्रभु म्ह मेरा प्यारा भाई अर बिश्वास लायक सेवक सै, वो थारे ताहीं मेरे सारे हालात अर सारी बातों के बारे में बता देवैगा।

22 उस ताहीं मन्नै थारे थारे इस्से खात्तर भेज्या सै के थम म्हारी दशा नै जाणो, अर वो थारे मनां नै होसला दे।

23 परमेसवर पिता अर प्रभु यीशु मसीह की ओड़ तै बिश्वासी भाईयाँ नै शान्ति अर बिश्वास गैल प्यार मिलै।

24 उन सारा पै अनुग्रह होदा रहवै, जो म्हारै प्रभु यीशु मसीह तै कदे ना खतम होण आळा प्यार करै सै।



## फिलिप्पी नगर के माणसां ताहीं प्रेरित पौलुस की चिट्ठी



फिलिप्पी नगर के माणसां ताहीं प्रेरित पौलुस की चिट्ठी यूरोप की धरती पे बणाई पैहली कलीसिया ताहीं लिखी गई थी, जिसकी शुरुआत पौलुस नै करी थी। या रोमी प्रान्त के मकिडोनिया परदेस म्ह थी। या चिट्ठी उस बखत लिखी गई थी, जिव प्रेरित पौलुस जेठ म्ह था, अर जिव वो दुसरे मसीह कार्यकर्ताओं के जरिये अपणे विरोध के कारण परेशान अर फिलिप्पी की कलीसिया म्ह घणी गलत शिक्षा तै दुखी था। फेर भी या चिट्ठी एक खुशी अर तसल्ली नै दिखावै सै, के सिर्फ यीशु मसीह म्ह पौलुस के गहरे बिश्वास के जरिये समझया जा सकै सै।

इस चिट्ठी का जिब्बे लिखण का कारण यो था, फिलिप्पियों के बिश्वासियाँ ताहीं धन्यवाद देणा, उस दान खात्तर जो उननै पौलुस की जरूरत के बखत पै उस ताहीं भेज्जा था। वो इस मौकै का इस्तमाल उन ताहीं भरोस्सा देण खात्तर करै सै, के वे उसकी अर साथ-साथ खुद अपणी सारी मुसीबतां के बाद भी हिम्मत अर भरोस्सा राक्खै सै। वो उनतै बिनती करै सै, के वे स्वार्थी लालसा अर घमण्ड के बदले यीशु के दीन सुभाव नै अपणावै। वो उननै याद करावै सै, के मसीह म्ह उनका जीवन परमेसवर के अनुग्रह का एक दान सै, जो उननै बिश्वास के जरिये पाया सै, ना के यहूदी नियम-कायदा ताहीं पुगाण के जरिये। वो उस आनन्द अर शान्ति के बारे म्ह लिखै सै, जो परमेसवर उन माणसां ताहीं देवै सै, जो मसीह कै गेल्या एकता का जीवन जीवै सै। मसीह बिश्वास अर जीवन म्ह आनन्द, निश्चय, एकता अर मजबुती पै जोर देणा इस चिट्ठी की खासियत सै। या चिट्ठी फिलिप्पी नगर की कलीसिया के प्रति पौलुस के गहरे प्रेम नै दिखावै सै।

### रूप-रेखा

जानकारी 1:1-11

पौलुस की निजी हालात 1:12-23

मसीह म्ह जीवन 1:27-2:18

तीमुथियुस अर इपफुरुदीतुस कै खात्तर योजना 2:19-30

दुश्मनां अर खतरां के खिलाफ चेतावनी 3:1-4:9

पौलुस अर उसके फिलिप्पी नगर के मित्तर 4:10-20

समापन 4:21-23

1 या चिट्ठी पौलुस अर तीमुथियुस की ओड़ तै सै, जो यीशु मसीह के दास सै, मै पौलुस कलीसिया के सारे पवित्र माणसां, अगुवां, अर सेवकां के नाम जो प्रभु यीशु मसीह म्ह होकै फिलिप्पी नगर म्ह रहवै सै।

2 हम प्रार्थना करां सां के म्हारै पिता परमेसवर अर प्रभु यीशु मसीह की ओड़ तै थारे ताहीं अनुग्रह अर शान्ति मिल्दी रहवै।



3 मै जिव-जिव धमनै याद करूँ सूँ, तब-तब अपणे परमेसवर का धन्यवाद करूँ सूँ,

4 अर खुशी के गैल अपणी हरैक प्रार्थना म्ह थारे सारया खात्तर हमेशा परमेसवर तै मदद की बिनती करूँ सूँ।

5 इस करके के पैहले दिन तै जिव धमनै सुसमाचार पै बिश्वास करया, तब तै आज तक धम यीशु मसीह कै प्यार के बारे म्ह सुसमाचार फैलाण म्ह म्हारै साथ रह्यो सों।

6 मन्नै इस बात का भरोस्सा सै, के परमेसवर जिसनै थारे म्ह आच्छा काम शुरु करया सै, वो ए उसनै जिव यीशु मसीह बोहड़ के आवेगा तब तक पूरा करेगा।

7 सही से ताके मै थारे सारया खात्तर इसाए विचार करूँ। क्यूँके थारे खात्तर मेरै मन म्ह खास जगहां सै, इब मै कैद म्ह सूँ, अर सुसमाचार की सच्चाई नै साबित अर बचाव करण म्ह लागरया सूँ, तो थम सब मेरै गैल परमेसवर के अनुग्रह म्ह साझीदार सों।

8 इस म्ह परमेसवर मेरा गवाह सै, के मै मसीह यीशु की तरियां लगाव करके, थारे सारया की मिलण की लालसा करूँ सूँ।

9 मै या प्रार्थना करूँ सूँ, के थारा प्यार वास्तविक ज्ञान अर अन्तरात्मा म्ह और भी बढ़ता जावै।

10 ताके थम आच्छी तै आच्छी बात नै चुण सकों, अर मसीह के बोहड़ण तक हरेक बुराई तै बचे रहों, अर टोक्कर ना खाओ।

11 अर उस धार्मिकता के काम नै जो यीशु मसीह के जरिये होवै सै, भरपूर होन्दे जाओ जिसतै परमेसवर की महिमा अर बड़ाई होंदी रहवै।

**\*\*\*\*\***

12 हे विश्वासी भाईयो, मै चाहूँ सूँ के थम यो जाण ल्यो, के जो मेरै पै बित्या सै, उसतै भोत सारे माणसां नै सुसमाचार पै विश्वास करया सै।

13 उरै ताहीं के महाराजा के राजभवन की सारी पलटन अर बाकी सारे माणस यो जाणगे सै, के मै कैद म्ह सूँ, क्यूँके मै मसीह का दास सूँ।

14 अर प्रभु म्ह जो विश्वासी भाई सै, उन म्ह तै घणखरे मेरै कैद होण के कारण, साहस के गैल परमेसवर का वचन बिना डरे सुणावै सै।

15 कुछ लोग तो जळण अर झगड़े के कारण मसीह के सुसमाचार के बारे म्ह सुणावै सै, अर कई माणस भली इच्छा तै, ताके मेरे वचन फैलाण म्ह मदद कर सकै।

16 भली इच्छा तै प्रचार करण आळे प्यार तै प्रचार करै सै, क्यूँके वो जाणै सै, के मै सुसमाचार के बचाव के खात्तर जेळ म्ह बन्द सूँ।

17 कई माणस तो जळण अर विरोध के कारण मसीह का प्रचार करै सै, यो सोचके के मेरी कैद म्ह मेरै खात्तर और क्लेश पैदा कर सकै।

18 तो के होया? सिर्फ यो के हर ढाळ तै, बुरी इच्छा तै चाहे सच्चाई तै, मसीह के वचन का प्रचार हरेक जगहां करया जाण लागरया सै, अर मै इसतै आनन्दित सूँ अर आनन्दित रहूँगा भी।

**\*\*\*\*\***

19 क्यूँके मै जाणू सूँ, के थारी बिनती के जरिये, अर पवित्र आत्मा जो यीशु मसीह की ओड़ तै आया सै, इसका प्रतिफल जो मेरे विश्वास म्ह बणे रहण अर कैद तै लिक्ड़ण का कारण होगा।

20 मै तो याए मन तै लालसा अर आस राखूँ सूँ, के मै किसे बात म्ह शर्मिन्दा ना होऊँ, पर साहस के साथ परमेसवर का वचन सुणा सकूँ, जिसा पैहले मन्नै सुण्या था, चाहे मै जिन्दा रहूँ या मरू, मसीह की बड़ाई मेरी देह के जरिये होन्दी रहवै।

21 क्यूँके मेरै खात्तर जिन्दा रहणा मसीह सै, अर मर जाणा और भी आच्छा सै, क्यूँके मै मसीह के धोरे चला जाऊँगा।

22 पर जै देह तै जिन्दा रहणा ए परमेसवर के काम के खात्तर फायदेमन्द सै, तो मै न्ही जाणदा के किसनै चुणु।

23 क्यूँके मै उळझन म्ह सूँ, के मै के करूँ, जी तो करै सै, के मै दुनिया छोड़के मसीह के धोरे चला जाऊँ, क्यूँके यो घणाए आच्छा सै,

24 पर देह म्ह रहणा थारे कारण और भी जरूरी सै, ताके मै थारी मदद कर सकूँ।

25 इस करके के मन्नै इसका भरोस्सा सै। मै जाणू सूँ के मै जिन्दा रहूँगा, बल्के सारा के गेल्या रहूँगा, जिसतै थमनै विश्वास म्ह मजबूत कर सकूँ, अर उस म्ह आनन्दित रहों।

26 जिव मै थारे धोरे बोहड़ के आऊँगा तो यीशु मसीह जो मेरे जरिये काम करण लागरया सै, उसपै थम गर्व कर सकों सों।

27 सिर्फ इतना करो, के धारा चाल चलण मसीह के सुसमाचार के लायक हो जावै। चाहे मै आके धमनै देखूँ, चाहे ना भी आऊँ, तोभी धारे बोरें म्ह योए सुणु, के धारा एक ए मकसद हो, अर एक मन होके विश्वास तै जो सुसमाचार तै आवै सै, उसके खात्तर मेहनत करते रहौं।

28 अर किसे बात म्ह बिरोधियाँ तै भय ना खाओ। उनकै खात्तर विनाश का, अर धारे खात्तर उद्धार का साफ सबूत सै, अर यो परमेसवर की ओड़ तै सै।

29 क्यूँके मसीह के कारण धारे पै या अनुग्रह होया के ना केवल उसपै विश्वास करो पर उसके खात्तर दुख भी टाओ,

30 अर धमनै उसीए मेहनत परमेसवर के खात्तर करणी सै, जिसी धमनै मेरै ताहीं पैहले फिलीपी नगर म्ह करते देख्या सै, अर इब भी सुणो सों के मै उसाए करूँ सूं।

## 2



1 धम यीशु मसीह के कारण उत्साहित हो, अर जो उसका प्यार धारे खात्तर सै, वो धमनै शान्ति देवै सै, क्यूँके पवित्र आत्मा के गैल धारी संगति सै, अर मसीह की करुणा अर दया धारे पै सै।

2 तो मेरा यो आनन्द पूरा करो के एक मन रहौं, अर एके प्यार, एके चित्त, अर एके मनसा राखौं।

3 मतलबीपण या झूटठी बड़ाई के खात्तर कुछ ना करो, पर दीनता तै एक-दुसरे नै अपणे तै घणा आदर मान द्यो।

4 हरेक अपणे ए हित की न्ही, बल्के दुसरयां के हित की भी चिंता करै।

5 जिसा मसीह यीशु का सुभाव था उसाए तेरा भी सुभाव हो।

6 यीशु, परमेसवर के समान होके भी होके भी परमेसवर के बराबर होण नै अपणे बस म्ह राखण की चीज ना समझा।

7 बल्के अपना सारा सुर्गीय हक छोड़ दिया, अर दास का रूप धारण करते होए माणस की समानता म्ह होगया।

8 अर माणस के रूप म्ह जाहिर होके अपणे-आपनै दीन करया, अर परमेसवर का आज्ञाकारी रहया अर याडै तक के अपराधियाँ की तरियां मौत, हाँ करूस की मौत भी सह ली।

9 इस कारण परमेसवर नै उस ताहीं ऊँची उपाधि दी, अर उसनै वो नाम दिया जो सारे नाम्नां म्ह ऊँचा सै,

10 के जो सुगं म्ह अर धरती पै धरती के नीचवै सै, वे सारी यीशु के नाम की बड़ाई करै,

11 अर परमेसवर पिता की महिमा के खात्तर हरेक इन्सान मान ले के यीशु मसीह ए प्रभु सै।



12 इस करके हे मेरै प्यारे विश्वासी भाईयो, जिस ढाळ थम सदा तै हुकम मानते आये सों, उसाए इब भी ना सिर्फ मेरै गैल रहंदे होए, पर खास करके इब मेरै दूर रहण पै, भी परमेसवर तै डरदे अर कापते होए अपणे उद्धार के काम नै पूरा करो।

13 क्यूँके परमेसवर धारे म्ह काम करण लागरया सै, अर वोए धमनै अपणी इच्छा अर सामर्थ देवै सै, वो काम करो जो उसनै पसन्द सै।

14 सारे काम बिना कुड़कड़ाए अर बिना विवाद के करया करो,

15 ताके धम परमेसवर की ऊलाद की तरियां इस दुनिया के बुरे अर मतलबी माणसां के बीच म्ह पवित्र अर बेदाग जीवन जी सकों। दुनिया के माणसां के बीच म्ह धम जीवन का वचन लिये होए, आसमान के तारां के समान चमकों।

16 जिव मसीह बोहड़ै तो मन्ने गर्व करण का कारण हो, ताके मेरी कोशिश अर मेरी मेहनत करणा बेकार ना होवै।

17 जब मन्ने थारे ताहीं वचन सुणाया, तो थमनै यीशु मसीह पै विश्वास करया, अर अपना जीवन भी सेवा खात्तर प्रभु ताहीं बलिदान दिया। इस करके मै प्रभु खात्तर मर भी जाऊँ, तोभी थारे साथ सुख अर आनन्दित सूँ।

18 उस्से तरियां थम भी आनन्दित होओ, अर मेरै गैल आनन्द करो।

?????????? ?? ???????????????

19 मन्ने प्रभु यीशु मसीह म्ह आस सै, के मै तीमुथियुस नै थारे धौरै तावळा-ए भेजूगाँ, ताके थारे हाल नै जाणके, मै उत्साहित होऊँ।

20 क्यूँके मेरै धौरै तीमुथियुस के जिसा सुभाव आळा माणस और कोए न्ही सै जो शुद्ध मन तै थारी चिंता करे।

21 क्यूँके सारे अपने स्वार्थ की खोज म्ह रहवै सै, परमेसवर के काम्मां खात्तर न्ही।

22 पर थम जाणो सों, के तीमुथियुस तो विश्वास लायक अर आच्छे सुभाव का सै, जिसा बेट्टा पिता के गेल्या रहवै सै, उसाए उसनै सुसमाचार के फैलाण म्ह मेरै गैल मेहनत करी।

23 इस करके मन्ने आस सै, के ज्यो ही मन्ने बेरा लागगैगा के मेरा के हाल होगा, त्यों ही मै उसनै तावळी सी भेज देऊँगाँ।

24 अर मन्ने प्रभु म्ह भरोस्सा सै, के मै आप भी तावळा आऊँगा।

25 मन्ने इफरुदीतुस नै थारे धौरै भेजणा जरूरी समझा, जो मेरा भाई अर सहकर्मी साथी योध्दा, अर जरूरतां म्ह मेरी मदद करण आळा थारी ओड़ तै भेज्जा गया दूत सै।

26 क्यूँके उसका मन थारे सारया म्ह लागया रह्या था, अर वो बेचैन रहवै था क्यूँके थमनै उसकी बीमारी का हाल सुण्या था।

27 पक्का वो बीमार तो होगया था, उरै ताहीं वो मरण पै था, पर परमेसवर नै उस ताहीं मरण न्ही दिया, अर सिर्फ उस्से पै न्ही पर मेरै पै भी दया करी, ताके मन्ने दुख पै दुख ना हो।

28 इस करके मन्ने उस ताहीं भेजण का और भी जल्न करया, के तू उसतै फेर मिलकै आनन्दित हो जा, अर मेरी भी चिन्ता घट जावै।

29 इस करके तू प्रभु म्ह उसतै घणे आनन्द के गैल मिलये, अर इसा का आदर करया करिये।

30 क्यूँके वो मसीह के काम खात्तर अपनी जान जोखिम म्ह गेर के मौत के धौरै आ गया था। ताके वो मेरी मदद कर सकै जिस काम नै थम कर न्ही पाये, क्यूँके थम दूर थे।

### 3

????? ???????????

1 इस करके हे मेरै विश्वासी भाईयो, प्रभु म्ह आनन्दित रहों। वेए बात थारे ताहीं बारबार लिखण म्ह मन्ने तो कोए दिक्कत कोनी होन्दी, पर ये बात थमनै इस्से झूट्टे शिक्षाकां तै बचाके राखेगी।

2 उन बुरे माणसां तै चौक्कस रहों जो कुत्याँ के समान सै, अर जो कहवै सै, के उद्धार पाण खात्तर खतना करणा जरूरी सै।

3 हम्मे परमेसवर के सच्चे लोग सां, जो पवित्र आत्मा की अगुवाई म्ह आराधना करा सां, अर मसीह यीशु पै घमण्ड करा सां, पर अपने उन काम्मां के जरिये न्ही जो हम शरीर तै करा सां।

4 पर मै तो शारीरिक काम्मां पै घमण्ड राख सकू सूँ। जै किसे और का शारीरिक काम्मां पै घमण्ड राखण का विचार हो, तो मै उसतै भी बढ़के राख सकू सूँ।

5 परमेसवर के हुकम के मुताबिक जन्म के आठवे दिन मेरा खतना होया, मै जन्म तै इस्राएली अर विन्यामीन के गोत्र का सूँ, मेरे माँ-बाप इब्रानी थे, इस करके मै भी इब्रानी सूँ, अर (मूसा नबी के) नियम-कायदा नै मानण के कारण मै फरीसी भी था।

6 उत्साह के बारे म्ह जै कहो तो कलीसिया का सतावण आळा, अर सारे यहूदी नियम-कायदा नै मानण आळा था, इस करके लोग मन्ने धर्मी मान्ने थे।

7 पर जिन बातों ने मैं लाभ की समझू था, उन ताहीं मन्ने मसीह यीशु के कारण नुकसान समझ लिया सै।

8 बल्के अपने प्रभु मसीह यीशु ने अच्छी तरियां जाणण के महत्व के आगै, मैं बाक्की की सारी बातों ने बेकार समझू सूं। जिसके कारण मन्ने उन सारी चिज्जां ताहीं छोड़ दिया सै, अर उननै कूड़ा समझू सूं। ताके मैं मसीह ने अच्छी तरियां जाण सकू।

9 अर मैं उसका कहलाऊँ, इब मेरी अपनी धार्मिकता वा कोनी जो नियम-कायदा के पुगान तै आवै सै, बल्के मेरी धार्मिकता वा सै जो सिर्फ परमेसवर की ओड़ तै मसीह पै मेरे विश्वास करण के कारण आवै सै।

10 मैं चाहूँ सूं, के मसीह ने जाण ल्यु। अर मैं उसके पुनरुत्थान के सामर्थ्य नै अनुभव करूँ, अर उसके गैल दुखां म्ह साझीदार हो के मसीह की मृत्यु की समानता नै पा सकू।

11 ताके मैं भी मरे होए माणसां म्ह तै जी उठण आळा म्ह शामिल हो जाऊँ।



12 इसका यो मतलब कोनी के मन्ने यो सारा काम करया सै, या मैं सिध्द हो लिया सूं, मैं आगै बढ़ण की कोशिश करते जाण लागरया सूं, ताके मन्ने वो मिल जावै, जिसके खात्तर मसीह यीशु ने मेरे ताहीं चुण्या सै।

13 हे मेरे विश्वासी भाईयो, मेरे विचार तै मैं इस ताहीं इब तक पा न्ही सका सूं, पर हाँ, मैं यो जरूर करण लागरया सूं, क्यूँके जो बात हो ली सै, मैं उननै भूलके जो आगै होण आळा सै उसके खात्तर मेहनत करण लागरया सूं।

14 मैं निशान्ने की ओड़ भाज्या चाल्या ज्या सूं ताके वो ईनाम पाऊँ, अर वो ईनाम यो सै के परमेसवर मन्ने सुगं म्ह बुलाण लागरया सै क्यूँके मसीह यीशु मेरे खात्तर मरया।

15 म्हारै म्ह तै जितने आत्मिक रूप तै सिध्द सै, जो इसा विचार राक्खै सै, अर जै किसे बात म्ह धारा ए विचार न्ही हो, तो परमेसवर उस ताहीं भी धारे पै जाहिर कर देगा।

16 इस करके हमनै सच के मुताबिक चालणा सै, जो परमेसवर नै म्हारे पै जाहिर करया।

17 हे मेरे विश्वासी भाईयो, धारा सुभाव मेरे जिसा हो, अर उन माणसां ताहीं पिच्छाणो, जिनका सुभाव मेरे जिसा सै, अर उनकी तरियां जिन्दगी जिओ।


18 क्यूँके घणेए इसी चाल चाल्लै सै, जिनका जिक्र मन्ने धारे ताहीं बार-बार करया सै, अर इब भी रो-रोके कहूँ सूं के उनका सुभाव यो दिखावै सै, के वे मसीह के क्रूस पै मरण के सन्देस का विरोध करै सै।

19 उनका अंत विनाश सै, वो अपनी शारीरिक इच्छा नै ए पूरी करणा चाहवै सै, अर वे अपनी शर्म के काम जो वे करै सै, उनपै घमण्ड करै सै, अर दुनियावी चिज्जां के बारे म्ह सोचते रहवै सै।

20 पर म्हारा देश सुगं म्ह सै, अर हम एक उद्धारकर्ता प्रभु यीशु मसीह के ओड़े तै आण की बेसबरी तै बाट देखण लाग रहे सां।

21 वो अपनी शक्ति के असर के मुताबिक जिसके जरिये वो सारी चिज्जां नै अपने बस म्ह कर सकै सै, म्हारी दीन-हीन देह का रूप बदलके, अपनी देह के अनुकूल बना देगा।

## 4



1 हे मेरे विश्वासी भाईयो, मैं धारे ताहीं भोत प्यार करूँ सूं, मन्ने धारे तै मिलण की बड़ी इच्छा सै। थम मेरा आनन्द अर मुकुट हो, मजबुत्ती तै विश्वास करो, अर प्रभु के हुकम नै मानते रहो।

2 मैं यूओदिया नै भी समझाऊँ सूं, अर सुन्तुखे नै भी, के थम आप्स म्ह एक-दुसरे तै बहस मत करो।

3 हे मेरे सच्चे सहकर्मी, मैं तेरे तै भी बिनती करूँ सूँ के तू उन बिरबानियों की लड़ाई बन्द करवाण म्ह मदद कर, क्यूँके उननै मेरै गैल सुसमाचार फैलाण म्ह, क्लेमंस अर मेरै और सहकर्मीयाँ गैल मेहनत करी, जिनके नाम जीवन की किताब म्ह लिखे होए सै।

4 प्रभु म्ह सदा आनन्दित रहों, मैं फेर कहुँ सूँ, आनन्दित रहों।

5 थारी कोमलता सारे माणसां पै जाहिर हो। प्रभु का आणा लोवै सै,

6 किसे भी बात की चिंता ना करो, पर हर हालात म्ह थारे निवेदन, प्रार्थना, बिनती अर धन्यवाद के गैल परमेसवर के आगवै पेश करै जावै।

7 फेर परमेसवर की शान्ति, जो माणस की समझ तै परै सै, थारे मन अर विचारां नै मसीह यीशु म्ह सुरक्षित राखेगी।

8 इस करके हे विश्वासी भाईयो, जो बात सच सै, जो बात आदरणीय, जो धर्मी सै, पवित्र सुहावनी अर जो-जो बात बड़ाई लायक सै, यानी जो भी सदगुण अर प्रशंसा की बात सै उनपै ए मन लगाया करो।

9 जो बात थमनै मेरै तै सुणी, मेरे म्ह देखी, सीखी, अर पाई सै, उननै मान्या करो, फेर शान्ति का परमेसवर थारे गैल रह्येगा।

~~~~~

10 मैं प्रभु मैं घणा आनन्दित सूँ के जब इतने दिनां के पाच्छे थारी चिंता मेरै बारे म्ह फेर जागगी सै, पक्का थारे शरुआत म्ह भी इसका विचार था, पर थमनै मौक्का न्ही मिला।

11 क्यूँके मेरे धोरै वो कोनी जो मन्नै चाहिए, पर मन्नै यो सिख्या सै के मैं जिन हालातां म्ह मैं सूँ, उस्से म्ह सवर करूँ।

12 मन्नै कंगाली अर भरपूरी म्ह रहणा सीख लिया सै, हरेक हालातां अर हरेक बात म्ह मन्नै तृप्त अर भूक्खा रहणा, बढ़णा अर घटणा सीख लिया सै।

13 मसीह मन्नै सामर्थ देवै सै उस म्ह मैं सब कुछ कर सकूँ सूँ।

14 तोभी थमनै भला करया के मेरै क्लेश म्ह मेरे साझीदार होए।

15 हे फिलिप्पी नगर के माणसां, थम आप भी जाणो सों के सुसमाचार के शरुआत म्ह, जब मैं मकिदुनिया परदेस तै विदा होया, जब थारे अलावा किसे कलीसिया के विश्वासी नै लेण देण के बारे म्ह मेरी मदद न्ही करी।

16 इसे ढाळ थिस्सलुनीके नगर म्ह मेरी जरूरत नै पूरा करण म्ह थमनै दो बार रपिये भेजके मेरी मदद करी।

17 मैं यो न्ही लिखता, के मैं दान चाहूँ सूँ पर मैं चाहूँ सूँ के थारे दान के बदले थमनै आशीष मिलै।

18 मेरै धोरै सब कुछ सै, बल्के भोत घणाए सै, जो चीज थमनै इपफरुदीतुस के हाथ तै भेजी थी उननै पाके मैं तृप्त होगया सूँ, थारे दान तो मनमोहक सुगन्धित भेट की तरियां सै, अर उस बलिदान की तरियां सै, जो याजक परमेसवर नै चढ़ावै सै, अर वे उसनै भावै सै।

19 म्हारा पिता परमेसवर, अपणे अपार धन के मुताबिक जो महिमा समेत मसीह यीशु म्ह थारी हरेक जरूरत नै पूरी करेगा।

20 म्हारै परमेसवर अर पिता की बड़ाई युगानुयुग होंदी रहवै। आमीन।


~~~~~

21 यीशु मसीह म्ह सभी पवित्र माणसां नै, मेरी ओड़ तै नमस्कार कहो। जो विश्वासी भाई मेरे गैल सै वे थारे ताहीं नमस्कार कहवै सै।

22 सारे पवित्र माणस, जो मेरे साथ सै, अर खास करके वे माणस जो कैसर के घराने तै विश्वासी बणे सै, थारे ताहीं नमस्कार कहवै सै।

23 म्हारै यीशु मसीह का अनुग्रह थारी आत्मा के गैल रहवै।

## कुलुस्से नगर के माणसां ताहीं प्रेरित पौलुस की चिट्ठी



कुलुस्से नगर के माणसां ताहीं पौलुस प्रेरित की चिट्ठी एशिया माइनर के कुलुस्से नगर की कलीसिया ताहीं लिखी गई थी, जो इफिसुस नगर के पूरब दिशा म्ह था। इस कलीसिया ताहीं पौलुस नै कोनी बणाया, पर या उस जगहां म्ह थी जिसकी जिम्मेदारी पौलुस अपने कान्धयां पै महसूस करै था, जिसा के हम पौलुस तै रोमी राज्य के एक परदेस, अखाया की राजधानी इफिसुस नगर सै, मसीह सेवकां ताहीं भेजदे होए पावां सां। पौलुस ताहीं यो बेरा लाग्या था के कुलुस्से नगर की कलीसिया म्ह कुछ गलत शिक्षा देणीये थे, जो इस बात पै जोर देवै थे के परमेसवर ताहीं जाणण अर पूरी तरियां मुक्ति पाण खात्तर एक आदमी ताहीं कुछ खास “आत्मिक प्रधानां अर अधिकारियां” की भगति करणी जरूरी था। इसके साथ-साथ ये शिक्षा देणीये कहवै थे के माणस ताहीं कुछ खास धर्म-विधियाँ जिस तरियां खतना करवाणा, खाणा, अर कई दुसरी बात्तां तै जुड़े कठोर नियमां का पालन करणा जरूरी सै। पौलुस इन सारी शिक्षा का विरोध करण खात्तर सच्चे मसीह सन्देश के साथ या चिट्ठी लिखै सै। उसके जवाब म्ह मर्म यो सै, के यीशु मसीह पूरी तरियां मुक्ति देण म्ह सामर्थी सै, अर दुसरा विश्वास अर रीति-रिवाज सच म्ह माणस नै उसतै दूर कर देवै सै। मसीह के जरिये परमेसवर नै इस सृष्टि की रचना करी, अर इब उसके जरिये ए वो अपने धौरै उल्टा ल्यावै सै। सिर्फ मसीह म्ह ए दुनिया ताहीं उद्धार की आशा सै। पौलुस जिव विश्वासियाँ के जीवन खात्तर इस बड़ी शिक्षा का मतलब बतावै सै। तो या ध्यान देण आळी बात सै, के तुखिकुस, जो पौलुस की या चिट्ठी कुलुस्से नगर लेग्या था, के साथ म्ह उनेसिमस भी था यो गुलाम जिसके पक्ष म्ह पौलुस नै फिलेमोन की चिट्ठी लिखी थी।

### रूप-रेखा

जानकारी 1:1-8

मसीह का सुभाव अर काम 1:9-2:19

मसीह म्ह नया जीवन 2:20-4:6

समापन 4:7-18



1 या चिट्ठी पौलुस अर म्हारे विश्वासी भाई तीमुथियुस की ओड़ तै सै, जो परमेसवर की इच्छा तै मसीह यीशु का प्रेरित सै।

2 मसीह म्ह उन पवित्तर अर विश्वासी भाईयाँ के नाम जो कुलुस्से नगर म्ह रहवै सै: म्हारा पिता परमेसवर थारे ताहीं अनुग्रह अर शान्ति देंदा रहवै।



3 जिव हम थारे खात्तर बिनती करां सां, तो हम अपने प्रभु यीशु मसीह के पिता, यानी परमेसवर का धन्यवाद करा सां।

4 क्यूँके हमने सुण्या सै के यीशु मसीह पै थारा विश्वास सै, अर सारे पवित्तर माणसां तै थम प्यार करो सां।

5 जो विश्वास अर प्यार इन विश्वासी भाईयाँ के धौरै सै, वो उस आस की बजह तै ए सै, जो थारे खात्तर सुगं म्ह धरी सै, जिसका वर्णन थमनै पैहले तै सुण राख्या सै। जिव माणस थारे धौरै आए अर यीशु मसीह का सुसमाचार थारे ताहीं सुणाया, जो के परमेसवर का वचन सै।

6 जो थारे धौरै पोहचा सै, अर जिसा दुनिया म्ह यो नतिज्जा ल्याण लागरया सै अर दुनिया म्ह हरेक जगहां फैलण लागरया सै, उस्से तरियां जिस दिन तै थमनै उस ताहीं सुण्या अर या सच्चाई आच्छी तरियां समझी के परमेसवर मुफ्त म्ह उन माणसां का पाप माफ करे सै जो यीशु पै विश्वास करे सै। थारे म्ह भी इसाए करे सै।

7 उससे की शिक्षा थमनै म्हारे गैल काम करणीये प्यारे इपफूरास तै पाई, जो म्हारे खात्तर मसीह का बिश्वास लायक दास सै।

8 उससे नै म्हारे ताहीं पवित्र आत्मा के प्यार के बारे म्ह बताया सै, जो परमेसवर नै म्हारे ताहीं दिया सै।

9 इस करके जिस दिन तै हमनै यो सुण्या सै, हम भी थारे खात्तर सदा प्रार्थना करां सां। के थम परमेसवर का आत्मा थारे ताहीं आत्मिक ज्ञान अर समझ देवै, ताके थम उसकी इच्छा नै समझ सको।

10 थारा बरताव इसा होणा चाहिए जिसा परमेसवर के माणसां का हो सै, ताके थम परमेसवर नै हरेक काम म्ह खुश कर सको, ताके थम सारी हाण भले काम करते रहों अर थम परमेसवर की पिच्छाण म्ह बढ़ते जाओ।

11 उसकी महिमा की शक्ति कै मुताबिक सारी ढाळ की सामर्थ तै शक्तिशाली होन्दे जाओ, ताके थम खुशी अर धीरज कै गैल दुखां नै सह सको।

12 अर पिता परमेसवर का धन्यवाद करते रहो, जिसनै थारे ताहीं इस लायक बणाया के थम उसके राज्य म्ह साझीदार हो सको, जो उसनै अपणे माणसां खात्तर सुर्ग म्ह तैयार करया सै।

13 उससे नै म्हारे ताहीं शैतान की सामर्थ तै छुड़कै अपणे प्यारे बेटे के राज्य म्ह दाखल करया,

14 जिसतै अपणे बेटे की कुरबान्नी के जरिये म्हारे ताहीं छुटकारा दिया, यानी पापां की माफी।

~~~~~

15 परमेसवर नै कोए न्ही देख सकता, पर जब उसका बेटा यीशु मसीह इन्सान की देह धारण करके इस धरती पै आया तो हम उसनै जाण पाए के परमेसवर किसा सै, वो बिलकुल उसके समान सै।

16 क्यूँके मसीह नै परमेसवर के साथ मिलके सारी चिज्जां की सृष्टि करी, सुर्ग की हो या धरती की, देखी या अनदेखी, के सिंहासन, के प्रभुताएँ, के प्रधानताएँ, के हक, सारी चीज उससे कै जरिये अर उससे खात्तर बणाई गई।

17 सारी चिज्जां के बणण तै पैहला मसीह था, अर सारी चीज उससे म्ह मिलके काम करै सै।

18 मसीह की देह कलीसिया नै चलावै सै, जिस तरियां सिर पूरे देह नै चलावै सै, यानी मसीह कलीसिया का सिर सै, वोए शरुआत सै, अर मरे होया म्ह तै जी उठण आळा म्ह जेट्टा सै, ताके सारी बात्तां म्ह वोए प्रधान बणे।

19 क्यूँके पिता परमेसवर की खुशी इस्से म्ह सै के मसीह म्ह परमेसवर की सारी भरपूरी रहवै।

20 अर उसके क्रूस पै बहे होए लहू कै जरिये मेळ-मिलाप करके, परमेसवर नै अपणे बेटे ताहीं भेज्जा, जिसनै अपणा लहू बहाया अर अपणी जाण दे दी। परमेसवर नै यो इस खात्तर करया ताके उसका अर सारी चिज्जां तै दुबारा मेळ हो सकै। इस तरियां तै उसनै अपणे बीच अर सारी चीज जो सुर्ग म्ह सै या अर सारी चीज जो धरती पै सै शान्ति की स्थापना करी।

21 थम जो पैहले पराये थे अर बुरे काम्मां के कारण मन तै बैरी थे।

22 परमेसवर नै इब अपणे बेटे ताहीं इन्सान बणाके भेज्जा ताके वो क्रूस पै मारया ज्या, जिसकी बजह तै थारा भी मेळ करवाया ताके थमनै अपणे आगवै पवित्र अर बिना कलंक अर बेकसूर बणाके खड्या करै।

23 जे थम मसीह म्ह बिश्वास करो सों, अर थारा बिश्वास उस घर की तरियां हो जो मजबूत नीम पै खड्या सै, अर उस सुसमाचार की आस नै ना छोड़ो, जिस ताहीं थमने सुण्या सै, जिसका प्रचार दुनिया के माणसां म्ह करया गया सै, उसका मै, पीलुस, वचन का सुणण आळा बणया।

~~~~~

24 मै उन दुखां के कारण आनन्दित सूं, जो थारे खात्तर ठाऊँ सूं अर मसीह के क्लेश की कमी उसकी देह के खात्तर, यानी कलीसिया के खात्तर, अपणे गात म्ह पूरी करूं सूं,



25 इससे कलीसिया के खात्तर मै थारे खात्तर परमेसवर के जरिये सौपी गई सेवा के मुताबिक दास चुण्या गया के मै परमेसवर के आदेश नै पूरी तरियां प्रचार करै।

26 यानी उस राज नै जो बखत अर पीढ़ियाँ तै गुप्त रह्या, पर इब उसके उन पवित्तर माणसां पै दिख्या सै।

27 परमेसवर चाहवै सै के मसीह के धन अर महिमा नै गैर यहूदियाँ के माणस जाणै सै, अर वो राज यो सै के मसीह थारे म्ह रहवै सै, यो थमनै परमेसवर की महिमा नै साँझा करण की आस देवै सै।

28 इस खात्तर हम दुसरयां नै मसीह के बारे म्ह बतावां सां, अर हरेक आदमी नै चेतावनी देवा सां अर परमेसवर के दिए गए ज्ञान तै हरेक आदमी नै सिखावा सां, हरेक आदमी नै मसीह म्ह सिध्द करकै परमेसवर के स्याम्ही पेश करणा चाहवां सां।

29 इससे ताहीं पूरा करण खात्तर मै भोत मेहनत अर कष्ट सहू सूं। उस सामर्थ के जरिये जो मसीह देवै सै अर जो मेरे म्ह काम करण लागरया सै।

## 2

1 मै चाहूँ सूं के थम जाण ल्यो के थारे अर उनके खात्तर जो लौदीकिया नगर म्ह सै अर उन सारया खात्तर जिनतै मै न्ही मिला, मै उनके खात्तर किसी मेहनत करूँ सूं।

2 मै इस खात्तर मेहनत करूँ सूं ताके मै उनके विश्वास नै मजबूत कर सकूँ। थारा एक-दुसरे के खात्तर प्यार थारे ताहीं आपस म्ह बाँधके राक्खे, मै चाहूँ सूं के उननै पूरा भरोस्सा हो क्यूँके उन ताहीं परमेसवर की गुप्त योजना की पूरी समझ सै, जो के मसीह सै ए।

3 परमेसवर ए सै जो बुद्धि अर ज्ञान की समझ देवै सै जो छिपे होए खजाने की ढाळ सै।

4 यो मै इस करकै कहूँ सूं के कोए आदमी थमनै झूठ्टी शिक्षा तै ना भरमावै।

5 हालाकि मै थारे तै दूर सूं, तोभी मै थारे बारे म्ह सोचता रहूँ सूं, अर जिसा थमनै जीणा चाहिए उसा जीवन अर थारे मजबूत विश्वास नै देखके जो मसीह म्ह सै, मै राज्जी होऊँ सूं।

### \*\*\*\*\*

6 इस करके जिस तरियां थमनै मसीह यीशु ताहीं प्रभु करके मान लिया सै, उससे तरियां उस ताहीं मानते रहो।

7 थारा मसीह पै विश्वास उस जमीन म्ह लगाये गये पेड़ की तरियां हो, जिसकी जड़ गहरी अर मजबूत हो सै। विश्वास म्ह मजबूत होन्दे जाओ, जिसा के थारे ताहीं सिखाया गया सै, अर सदा परमेसवर का धन्यवाद करते रहो।

8 इस कारण हम मानवीय शिक्षा का पालन न्ही करणा चाहन्दे, ताके कोए थमनै उस बेकार ज्ञान अर धोक्खे के जरिये अपणे बस म्ह ना करले, जो माणसां के रिवाज अर दुनियावी शिक्षा के मुताबिक तो सै, पर मसीह के मुताबिक कोनी।

9 थारे ताहीं ये लोग धोक्खा ना देण पावै, जिव के मसीह नै मानव रूप धारण करया पर वो पूरी तरियां तै परमेसवर था।

10 अर हरेक शक्ति अर प्रधानता पै उसका अधिकार सै। जै थम मसीह के कहलाओ हो, तो थमनै किसे चीज की कमी कोनी।

11 जिव थम मसीह म्ह विश्वास करो सां, तो थारा माणसां के जरिये खतना कोनी करया जान्दा, पर मसीह के जरिये करया जावै सै, जो के खुद ताहीं पापमय सुभाव तै दूर करणा सै।

12 जिव थारा बपतिस्मा होया (यो थारा पापमय सुभाव दिखावै सै) तो थम मसीह की तरियां गाड़े गये, अर जिसा मसीह जिवाया गया, अर उससे तरियां थम भी जिन्दा करे गए (नये सुभाव तै)। यो इस खात्तर होया क्यूँके थम विश्वास करो सां, के परमेसवर नै मसीह ताहीं अपणी शक्ति तै मुदाँ म्ह तै जिवाया।

13 थम जो अपणे कसूर अर अपणे पापमय सुभाव तै आजाद न्ही थे, परमेसवर नै थारे ताहीं भी मसीह के गैल जिवाया, अर म्हारे सारे कसूर माफ कर दिए।

14 अर इसा लागू सै जिसा परमेसवर नै म्हारे पापां का वो लेख मिटा दिया, जो म्हारे खिलाफ इल्जाम नै बतावै थे। जब मसीह ताहीं करूस पै कील्लां तै जकड़ा गया तो उसनै उस लेख ताहीं पूरी तरियां हटा दिया।

15 अर उसनै प्रधान्ता अर अधिकारां ताहीं हरा कै उनका खुल्लमखुल्ला तमाशा बणाया अर करूस के जरिये उनपै जयजयकार की आवाज सुणाई।

16 इस करकै थमनै कोए धोक्खा ना देवै, अर ना कोए थमनै खाण-पीण या त्यौहार, नये चाँद अर आराम कै दिन के बारें म्ह परखै।

17 क्यूँके ये सारी आण आळी बातों की छाया सै, पर मूल चीज मसीह की सै।

18 कोए आदमी झूटठी विनम्रता अर सुगंदूतां की पूजा करा कै थारे ताहीं दौड़ के ईनाम तै राख ना दे। इसा आदमी देखी होड़ बातों म्ह लाग्या रहवै सै अर अपनी शरीरिक समझ पै बेकार फुल्लै सै,

19 उसनै विश्वास अर मसीह का सच्चा सन्देस सिखाणा छोड़ दिया सै, जो के देह म्ह सिर की तरियां सै। जिस तरियां एक सिर देह नै निर्देश देवै सै, उससे तरियां मसीह अपणे लोग्गां ताहीं निर्देश देवै के वे एक साथ अर एक जुट रहवै जिस तरियां देह के जोड़ अर नस देह नै पकड़ै सै, अर यो बड़ै सै, जिस तरियां परमेसवर उन ताहीं बढ़ाणा चाहवै सै।

~~~~~

20 जब के थम मसीह के गैल दुनिया की पुराणी शिक्षा की ओड़ तै मरगे सों, तो फेर क्यूँ उनकी तरियां जो दुनिया के सै जीवन बिताओ सों? थम इसी विधियां के बस म्ह क्यूँ रहों सों,

21 के ना तो "इसनै छुईये," ना "उस ताहीं खाकै देखिये," अर ना उसके हाथ लगाईये?

22 ये सारी चीज काम म्ह लादे-लादे नाश हो जावैगी, क्यूँके ये माणस के हुकम अर शिक्षा कै मुताबिक सै।

23 ये तीन नियम बुध्दमानी का राह दिखावै सै, जो ये सै, खुद ताहीं परमेसवर के प्रति समर्पित करणा, झूटठी विनम्रता अर अपनी देह के गैल कठोरता तै बरताव करणा। पर माणस इन विधियां नै मान्ने सै, तोभी पापमय सुभाव नै न्ही छोड़ पान्दा।

3

1 यो इसा सै, के मान्ने जणु परमेसवर नै थारे ताहीं मुर्दा म्ह तै जिवा दिया हो, जिस तरियां उसने मसीह ताहीं मुर्दा म्ह तै जिवाया, तो सुर्गीय चिज्जां की खोज म्ह रहों, जड़ै मसीह परमेसवर के साथ महिमामय जगहां म्ह बैठ्या होया सै।

2 धरती पै की न्ही पर सुर्गीय चिज्जां पै ध्यान लगाओ,

3 क्यूँके यो इसा सै थम तो मर गये जब मसीह मारा गया अर थारा जीवन मसीह कै गैल परमेसवर म्ह छिप्या होया सै।

4 जब मसीह जो म्हारा जीवन सै, बोहड़ के आवैगा, तो थम भी उसके गैल दिखोगे अर उसकी महिमा म्ह शामिल होओगे।

~~~~~

5 इस करकै अपणे उन बुरे काम्मां नै छोड़ दो जो थारे पापमय सुभाव का कारण बनै सै, जो धरती पै सै, यानी जारी, अशुद्धता, दुष्कामना, बुरी लालसा अर लालची ना बणो यो मूर्तिपूजा कै बराबर सै।

6 क्यूँके माणस ये बुरे काम करै सै, इस कारण परमेसवर उन ताहीं बड़डा दण्ड देवैगा।

7 अर थम भी, जब इन बुराईयां म्ह जीवन बिताओ थे, तो इन बुरी लालसा के मुताबिक जिओ भी थे।

8 पर इब थम भी इन सारया नै, यानी छो रोष, बैरभाव, बुराई अर मुँह तै गाळी बकणा ये सारी बात छोड़ द्यो ।

9 एक-दुसरे तै झूठ ना बोल्लो, क्यूँके थमनै बुरा सुभाव अर बुरे काम छोड़ दिये सै ।

10 अर इब थमनै नये सुभाव ताहीं धारण कर लिया सै, यो नया सुभाव ज्यादा तै ज्यादा म्हारे रचण आळे के मुताबिक बणण लागरया सै, ताके हम उसनै आच्छी तरियां जाण पावां ।

11 इस नई जिन्दगी म्ह कोए फर्क कोनी पड़ता चाहे यूनानी हो या यहूदी हो, खतना हो या खतनारहित हो, जंगळी हो या असभ्य हो, दास हो या आजाद हो, पर मसीह ए सै, जो सब तै खास सै अर वो हम सब म्ह बसै सै ।

12 क्यूँके परमेसवर नै थारे ताहीं पवित्तर माणस बणण खात्तर चुण्या सै, अर वो थारे ताहीं प्यार करै सै, इस करके बड़ी करुणा, भलाई, दीनता, नम्रता, अर सहनशीलता नै धारण करो ।

13 अर जै किसे नै किसे पै दोष लगाण का कोए कारण हो, तो एक-दुसरे की सह ल्यो अर एक-दुसरे के कसूर माफ करो, जिस तरियां प्रभु नै थारे कसूर माफ करे, उससे तरियां थम भी करो ।

14 इन सारा तै बढ़के थम जो काम कर सकों सों, वो यो सै, के थम एक-दुसरे तै प्यार करो, प्यार ही सै जो म्हारे ताहीं एक-दुसरे के गैल एकता म्ह जोड़े राखै सै ।

15 जो शान्ति मसीह देवै सै, वा थारे दिलां पै राज करैगी, क्यूँके थम सारे एक देह के अंग सों, इस करके थारे ताहीं एक-दुसरे के साथ शान्ति तै रहण कै खात्तर बुलाया गया सै, अर थम सदा उसका धन्यवाद करदे रहों ।

16 हर बखत मसीह के वचन के उप्पर ध्यान करते रहवों ताके थारा सोचणा अर काम करणा उसके मुताबिक हो, अर सिध्द ज्ञानसुधा एक-दुसरे नै सिखाओ अर समझाओ, अर अपणे-अपणे मन म्ह धन्यवाद के गैल परमेसवर के खात्तर भज्जण अर जै-जै कार अर आत्मिक गीत गाओ ।

17 वचन म्ह या काम म्ह जो किमे भी करो, सारा प्रभु यीशु मसीह के नाम तै करो, अर उसके जरिये परमेसवर पिता का धन्यवाद करो ।

### ~~~~~

18 हे पत्नियों, जिसा प्रभु म्ह सही सै, उसाए अपणे-अपणे धणी कै अधीन रहो ।

19 हे पतियों, अपणी-अपणी घरआळी तै प्यार राखो, अर उनके गैल नरमाई तै पेश आओ ।

20 हे बाळकों, सारी बात्तां म्ह अपणे-अपणे माँ बाप के हुकम नै मान्नो, क्यूँके प्रभु इसतै खुश होवै सै ।

21 हे बाळकां आळो, अपणे बाळकां नै तंग ना करो, इसा ना होके वे परेशान हो जावै ।

22 हे सेवको, जो इस दुनिया म्ह थारे माल्लिक सै, सारी बात्तां म्ह उनके हुकम का पालन करो, माणसां नै राज्जी करण आळा के समान दिखाण के खात्तर न्ही, पर मन की सीधाई अर परमेसवर के डर तै ।

23 जो किमे थम करो सों, पूरे मन तै करो, यो समझके के माणसां के खात्तर न्ही पर प्रभु के खात्तर करो सों,

24 याद राखों परमेसवर थमनै ईनाम देवैगा, या फेर वो थमनै आशीष म्ह साझीदार करैगा जो उसनै अपणे माणसां के खात्तर राखी सै, क्यूँके थम मसीह यीशु की सेवा करो सों ।

25 जो बुरा काम करै सै, परमेसवर हरेक ताहीं उसकी बुराई का उसनै दण्ड देवैगा, क्यूँके परमेसवर किसे कै गैल पक्षपात कोनी करदा ।

## 4

1 हे मालिकों, अपणे-अपणे नौकरां के गैल न्याय अर एक सा बरताव करो, या समझके के सुर्ग म्ह थारा भी एक माल्लिक सै ।

### ~~~~~

2 प्रार्थना म्ह लागगे रहो, अर जिब प्रार्थना करो तो सावधान रहियो अर परमेसवर का धन्यवाद हमेशा करते रहो।

3 अर उसकै गैल ए गैल म्हारे खात्तर भी प्रार्थना करते रहो के परमेसवर म्हारै खात्तर वचन सुणाण का इसा द्वार खोल दे, के हम मसीह के उस भेद का वर्णन कर सकां जिसकै कारण मै कैद म्ह सूं,

4 प्रार्थना करो के मै स्पष्ट रूप तै अर खुल्ले तौर पै मसीह के भेद नै बता पाऊँ।

5 अविश्वासी के गैल जिब बात करो तो उस मौकै का सही इस्तमाल करो।

6 धारा बोलणा सदा अनुग्रह समेत सलोना हो ताके थमनै हरेक माणस ताहीं बढ़िया ढाळ तै जवाब देणा आ जावै।

**PPPP**

7 प्यारे विश्वासी भाईयो अर विश्वास लायक दास तुखिकुस, जो प्रभु म्ह मेरै गैल दास सै, वो थमनै सारी बात बता देगा।

8 उस ताहीं मन्ने इस खात्तर थारे धोरै भेज्जा, ताके थमनै म्हारे हाल का बेरा पाट जावै अर वो थमनै उत्साहित करेगा।

9 उसके गैल मन्ने उनेसिमस ताहीं भी भेज्जा सै, जो विश्वास लायक अर प्रिय विश्वासी भाई सै, अर वो भी थारे ए नगर का सै, ये थमनै याड़े की सारी बात बता देगे।

10 मेरै गैल कैदी अरिस्तर्खुस अर मरकुस की ओड़ तै थमनै नमस्कार, मरकुस जो बरनबास का चचेरा भाई सै, जिसके बारे म्ह थमनै चिट्ठी मिली सै, के जै वो थारे धारे आवे, तो उसतै आच्छी ढाळ बरताव करियो।

11 अर यीशु जो यूस्तुस कुह्वावै सै, थारे ताहीं नमस्कार कहवै सै। यहूदी विश्वासियाँ म्ह तै सिर्फ ये तीन माणस सै, जो परमेसवर के राज्य के खात्तर मेरै गैल काम करणीये अर मेरे उत्साहित होण का कारण सै।

12 इपफ्रास, जो थारे नगर का सै, अर मसीह यीशु का दास सै, थारे तै नमस्कार कहवै सै। वो सदा थारे खात्तर मन लगाके प्रार्थना करै सै, अर परमेसवर तै सदा बिनती करै सै, के परमेसवर थमनै मजबूत अर सिध्द बणावै, अर थमनै पूरा भरोस्सा हो के थम परमेसवर की इच्छा का पालन करो सों।

13 मै उसका गवाह सूं, के वो थारे खात्तर अर लौदीकिया अर हियरपुलिस नगर के माणसां कै खात्तर बड़ी मेहनत करदा रहवै सै।

14 म्हारे प्रिय वैद लूका अर देमास का थारे ताहीं नमस्कार।

15 लौदीकिया नगर के विश्वासी भाईयाँ नै, अर नुमफास अर उनकै घर की कलीसिया नै नमस्कार कहिये।

16 जिब या चिट्ठी थम पढ़ ल्यो तो इसा करियो के लौदीकिया की कलीसिया म्ह भी या पढ़ी जावै, अर वा चिट्ठी जो लौदीकिया तै आवै उननै थम भी पढ़ईयो।

17 अर अरखिप्पुस तै कहिये के जो सेवा प्रभु म्ह तेरे ताहीं सौप्यी गयी सै, पक्का इरादा करो के उस सेवकाई नै पूरा कर सको।

18 मै (पौलुस) अपणे हाथ्यां तै थमनै नमस्कार लिखूँ सूं। याद राखियो के मै कैद म्ह सूं, अर मेरे खात्तर प्रार्थना करो। परमेसवर का अनुग्रह थारे पै हाँदा रहवै। आमीन।

## थिस्सलुनीकियों नगर के माणसां ताहीं प्रेरित पौलुस की पैहली चिट्ठी

????????

रोमी राज म्ह घणेए परदेस थे, उन म्ह तै मकिदुनिया परदेस एक था अर थिस्सलुनीके नगर उसकी राजधानी था। फिलिप्पी शहर तै आण के बाद पौलुस नै याडै एक कलीसिया बणाई थी। याडै भी, तावळी ए उन यहूदिया गैल बिरोध शरु होगया, जो गैर-यहूदियों म्ह पौलुस के मसीह सन्देस की कामयाबी तै जळै थे, जो के गैर यहूदी, यहूदी धर्म म्ह दिलचस्पी राक्खै थे। आखर म्ह पौलुस नै थिस्सलुनीके नगर छोड़णा पडचा, अर वो बिरीया नगर चला गया। बाद म्ह, जिब वो कुरिन्थुस नगर पोहचा, तो पौलुस नै अपने साथी तीमुथियुस के जरिये व्यक्तिगत रूप तै थिस्सलुनीके नगर की कलीसिया कै मौजूदा हाल के बार म्ह समाचार मिल्या। यो समाचार मिल्या पाचळै, थिस्सलुनीकियों नगर के नाम पौलुस प्रेरित की पैहली चिट्ठी विश्वासियाँ म्ह हिम्मत बढ़ाण अर तसल्ली देण के खात्तर लिखी गई। वो उनके विश्वास अर प्रेम के बारे म्ह सन्देस कै खात्तर आभार प्रगट करै सै। वो उननै अपने जीवन की याद दुवावै सै, जो उसनै उनके साथ रहन्दे होए बिताया था। जिब वो मसीह के दुबारा आण तै जुड़े सवालां का जवाब देवै सै, जो उस कलीसिया म्ह उठरे थे। सवाल यो था, कै एक विश्वासी, जो मसीह के दुबारा आण तै पैहल्याए मर जावै सै, उस जीवन का भागी होवैगा ताके जो उसके आण तै मिलण आळा सै? मसीह का दुसरा आगमन कद होवैगा? पौलुस इस मौकै पै उननै यो बतावै सै, कै उस हालत म्ह जिब कै थम मसीह के दुसरे आगमन की आशा म्ह बाट देखण लागरे सों, चुपचाप अपने काम म्ह लागगे रहो।

रूप-रेखा

जानकारी 1:1

धन्यवाद अर बड़ाई 1:2-3:13

मसीह चाल-चलण तै जुड़े उपदेश 4:1-12

मसीह के दुसरा आगमन कै बारे म्ह शिक्षा 4:13-5:11

आखरी उपदेश 5:12-22

समापन 5:23-28

????????

1 या चिट्ठी पौलुस अर सिलवानुस अर तीमुथियुस की ओड़ तै थिस्सलुनीकियों नगर की कलीसिया के उन विश्वासियाँ के नाम लिखी सै, जो परमेसवर पिता अर प्रभु यीशु मसीह म्ह सै। परमेसवर का अनुग्रह अर शान्ति थारे ताहीं मिल्दी रहवै।

?????????????????? ?? ???????

2 हम अपनी प्रार्थनायां म्ह थारे ताहीं याद करदे अर सारी हाण थम सारया कै बारे म्ह परमेसवर का धन्यवाद करा सां।

3 अर अपने परमेसवर अर पिता कै स्याम्ही जो काम विश्वास तै करे, अर विश्वासियाँ खात्तर इतने प्यार तै मेहनत करी, अर प्रभु यीशु मसीह के वोहड़ण की आस के कारण बड़ी धीरजता तै दुखां नै सहन्दे होए, सारी हाण थमनै याद करा सां।

4 हे विश्वासी भाईयो, अर परमेसवर के प्यारे माणसों हम जाणा सां, के परमेसवर नै थारे ताहीं अपने माणस होण खात्तर छाटचा सै।

5 क्यूँके म्हारा सुसमाचार जो यीशु मसीह के बारे म्ह था, थारे थारे ना सिर्फ बात्तां तै ए न्ही बल्के पवित्र आत्मा की सामर्थ अर बड़े पक्के सबूत कै गैल पोहच्या सै; जिसा थमनै बेरा सै, के थारे कल्याण खात्तर थारे म्ह म्हारा बरताव किसा था।

6 थारे उप्पर बडे क्लेश थे, पर थमनै पवित्र आत्मा के जरिये दिए गये आनन्द के गेल्या सुसमाचार ताहीं मान लिया, थमनै म्हारी अर प्रभु यीशु की तरियां बरताव कराया।

7 उरै ताहीं के मकिदुनिया परदेस अर अखाया परदेस के सारे विश्वासियाँ के खात्तर थम बढ़िया मिसाल बणै।

8 क्यूँके थारे उरै तै ना सिर्फ मकिदुनिया परदेस अर अखाया परदेस म्ह प्रभु का वचन सुणाया गया, पर थारे विश्वास की जो परमेसवर पै सै, हरेक जगहां जित भी हम गये, तो हमनै माणसां तै थारे विश्वास के बारे म्ह सुण्या, इस करके हमने माणसां ताहीं थारे बारे म्ह बताण की जरूरत ए कोनी।

9 क्यूँके वे आप ए म्हारै बारे म्ह बतावै सै, के जिव हम थारे धोरै आये, तो थमनै म्हारा स्वागत किस ढाळ कराया; अर थम किस ढाळ मूर्तियाँ तै दूर होके, परमेसवर की ओड़ मुड़ गये, ताके जिन्दे अर सच्चे परमेसवर की सेवा करो।

10 अर परमेसवर के बेटे यीशु की सुर्ग तै बोहड़ के आण की बाट देखे होए, जिस ताहीं परमेसवर नै मरे होयां म्ह तै जिन्दा करया, जो म्हारै ताहीं आण आळे न्याय तै बचावै सै।

## 2

1 हे विश्वासी भाईयो, थमनै आप्पे बेरा सै, के म्हारा थारे धोरै आणा कितना फायदेमन्द था,

2 बल्के थमनै खुद नै ए बेरा सै, के पैहल्या हमनै फिलिप्पी नगर म्ह दुख ठाया, के म्हारा नगर के माणसां नै सख्त विरोध करया, अर परमेसवर नै म्हारै तै इसी हिम्मत देई, के हम परमेसवर का सुसमाचार घणे विरोध होण के बावजूद भी थमनै सुणावां।

3 क्यूँके म्हारा उपदेश ना भ्रम तै सै, अर ना गलत इरादे तै, अर ना छुछ के गैल सै;

4 पर परमेसवर नै म्हारै ताहीं लायक समझके सुसमाचार सौंप्या, इस करके हम माणसां नै न्ही, पर जो म्हारै मनां नै जांच्चण आळे परमेसवर ताहीं राज्जी करण खात्तर उपदेश देवा सां।

5 थमनै बेरा सै, परमेसवर गवाह सै, के हमनै कदे चापलूसी की बात कोनी करी, अर ना ए लोभ के खात्तर हमनै कोए इसा काम करया, अर ना कुछ थारे तै छुपाया।

6 तोभी हम माणसां तै आदर कोनी चाहवां थे, अर ना थारे तै, ना और किसे तै, हालाकि हम मसीह के प्रेरित होण के कारण थारी मदद पाणा म्हारा हक था।

7 पर जिस तरियां माँ अपने बाळकां का पालन-पोषण करै सै, उस्से तरियां ए हमनै भी थारे बिचाळे रहके नरमाई दिखाई सै;

8 एक माँ की तरियां ए हम थारी चाहना करदे होए, ना सिर्फ परमेसवर का सुसमाचार, पर अपना-अपना प्राण भी थारे ताहीं देण नै त्यार थे, क्यूँके के हम थारे तै भोत प्यारे करां सां।

9 हे विश्वासी भाईयो, म्हारी कड़ी मेहनत नै याद राखो, हमनै ज्यातै दिन-रात काम-धन्धा करदे होए, परमेसवर का सुसमाचार प्रचार करया, के थारे म्ह तै किसे पै बोझ ना बण जावां।

10 थम अर परमेसवर भी इस बात के गवाह सां, के सारे विश्वासी भाईयाँ के गैल म्हारा सुभाव कितना सच्चा, धर्मी अर बेकसूर था।

11 थमनै बेरा सै के जिसा पिता अपने बाळकां के गेल्या बरताव करै सै, उस्से तरियां ए हम भी थारे म्ह तै हरेक ताहीं उपदेश देन्दे, अर शान्ति देन्दे, अर समझावां थे

12 के थम इसा जीवन जिओ, जिसा परमेसवर चाहवै सै, जो थमनै अपने राज्य अर महिमा म्ह बुलावै सै।

13 ज्यातै हम भी परमेसवर का धन्यवाद सारी हाण करा सां के जिव म्हारै जरिये परमेसवर के सुसमाचार का वचन थमनै सुण्या, तो थमनै उस ताहीं माणसां का न्ही पर परमेसवर का वचन समझके अपनाया; अर सच म्ह यो परमेसवर का वचन सै भी, अर यो सुसमाचार थारे म्ह काम करण लागरया सै, जो यीशु पै थम विश्वास करो सो।

14 ज्यांतै थम, हे विश्वासी भाईयो, परमेसवर की उस कलीसियाओं के स्याम्ही दुख सहण लागगे जो यहूदिया परदेस म्ह सै, अर मसीह यीशु पै विश्वास राक्खै सै, क्यूँके थमने भी अपणे माणसां तै उसाए दुख पाया, जिसा उननै अपणे यहूदी माणसां तै पाया था।

15 जिन नै प्रभु यीशु ताहीं अर नबियां ताहीं मार दिया। अर म्हारै ताहीं भी सताया, अर परमेसवर उनतै राज्जी कोनी, अर वे सारे माणसां का विरोध करै सै।

16 अर वे दुसरी जात्तां म्ह उनकै उद्धार कै खात्तर बात करण तै हमनै रोक्के सै, अर वे पाप पै पाप करते जावै सै, जिव ताहीं के परमेसवर उननै दण्ड ना दे दे; अर इब परमेसवर उननै बड़ा भरी दण्ड देण आळा सै।

?????? ?? ???? ?? ???????

17 हे विश्वासी भाईयो, जिव हम थोड़े बखत खात्तर थारे धोरै न्ही थे, पर हम सदा थारे बोरें म्ह ए सोच्चा थे, तो हमनै और भी बड़ी लालसा तै थारे ताहीं मिलण की अर देखण की कोशिश करी।

18 ज्यांतै हमने (थानिके मुझ पौलुस नै) एक वर न्ही बल्के दो या तीन वार आण की कोशिश करी, पर शैतान हमनै रोक्के रहया।

19 भला! म्हारी आस, खुशी या बड़ाई का ताज कौण सै? वो थमे होओगे जिव यीशु बोहड़ के आवैगें?

20 म्हारी बड़ाई अर खुशी थमे सो।

### 3

?????????? ?? ??????? ???? ?

1 आखिर जिव हम थारे तै दूर ना रह पाए, तो मै पौलुस अर सीलास नै यो तय करया के एथेंस नगर म्ह एकले रह जावां।

2 अर हमने तीमुथियुस ताहीं जो मसीह के सुसमाचार म्ह म्हारा भाई, अर परमेसवर का सेवक सै, इस करके भेज्या, के वो थारे ताहीं मसीह के विश्वास म्ह मजबूत अर उत्साहित करै।

3 ताके कोए इन क्लेशां के कारण डगमगा न्ही जावै; क्यूँके थम जाणो सो, के म्हारे ताहीं परमेसवर नै इसे तरियां सताये जाण खात्तर छाटचा सै।

4 क्यूँके पैहल्या भी, जिव हम थारे साथ थे, तो थारे तै कह्या करा थे, के म्हारे ताहीं सताया जावैगा, अर इसाए होया सै, अर थम जाणो भी सो।

5 इस कारण जिव मेरै तै और न्ही रहया गया, तो थारे विश्वास का हाल जाणण कै खात्तर मन्नै तीमुथियुस ताहीं भेज्या, मन्नै डर था, के परखण आळे शैतान नै थारे ताहीं परख्या ना हो, अर म्हारी मेहनत बेकार ना होगी हो।

?????????? ??????? ??????? ???????

6 पर इब्बे तीमुथियुस नै जो थारे धोरै तै म्हारे उरै आके थारे विश्वास अर प्यार का सुसमाचार सुणाया अर इस बात ताहीं भी सुणाया, के थम सारी हाण प्यार कै गेल्या म्हारै ताहीं याद करो सो, अर म्हारै देखण की चाहना राक्खो सो, जिसा हम भी थमनै देखण की।

7 हे विश्वासी भाईयो, हम अपणी सारे दुख अर क्लेश म्ह उत्साहित सां, क्यूँके हमनै थारे विश्वास के बारे म्ह सुण्या के थम इब भी यीशु मसीह के विश्वास म्ह मजबूत सां।

8 क्यूँके इब जै थम प्रभु म्ह मजबूत हो तो हम जिन्दे सां।

9 अर थारे बारे म्ह जो खुशी हमनै मिली से, उसकी बजह तै हम परमेसवर का धन्यवाद किस तरियां तै करा?

10 हम दिन-रात घणीए प्रार्थना करदे रहवां सां, के थमनै दुबारा देक्खां, अर थारे मसीह पै मजबूती तै विश्वास करण म्ह मदद करा।

11 हम प्रार्थना करां सां, के म्हारा परमेसवर अर पिता आप ए अर म्हारा प्रभु यीशु, थारे ताहीं पोहचने म्ह म्हारी मदद करै।

12 हम प्रार्थना करां, के जिसा हम थारे तै प्यार करां सां; उस्से तरियां ए थारा प्यार भी आप्सस म्ह, अर सारे माणसां के गेल्या बधै, अर परमेसवर थारे प्यार म्ह बढोतरी करवा जावै।

13 हम प्रार्थना करां सां, के वो थारे मनां नै इसा मजबूत करै, के जब म्हारा प्रभु यीशु अपने सारे पवित्र लोगां के गैल बोहड़ के आवै, तो वे म्हारे परमेसवर अर पिता के स्याम्ही पवित्रता म्ह बेकसूर ठहरै।

## 4

### 0000 00 0000000 00 000000 000

1 हे विश्वासी भाईयो, हम थारे तै बिनती करा सां, अर थारे तै प्रभु यीशु म्ह समझावां सां, के इसे जिओ के, परमेसवर ताहीं हम राज्जी करणा आळे वण सकां, जिसा हमनै थारे तै सिखाया सै, थम इस्से तरियां जीण लागरे थे, अर थमनै उत्साहित करां सां के और भी ज्यादा इसा करते रहां।

2 क्यूँके थमनै बेरा सै के हमनै प्रभु यीशु के हक तै थारे ताहीं कौण-कौण से आदेश\* दिये सै।

3 परमेसवर की मर्जी या सै के थम पवित्र बणो: अर जारी ना करो,

4 थारे म्ह तै हेरेक माणस अपनी देह नै काबू करणा जाणे क्यूँके थारी देह पवित्र अर सम्मान जोगगी रहवै।

5 यो काम अभिलाषा तै न्ही, ना उन जात्तां के तरियां, जो परमेसवर नै न्ही जाणदी,

6 ताके इस बात म्ह कोए अपने विश्वासी भाई के विरुध्द पाप ना करै, अर ना इसा मौक्का देखै के वो पाप करै, क्यूँके प्रभु यीशु उसनै दण्ड देवैगा, जो इसे काम करै सै; जिसा के हमनै पैहल्याए थारे तै कह्या अर चिताया भी था।

7 क्यूँके परमेसवर नै म्हारै ताहीं अपवित्र जीवन जीण खात्तर न्ही, पर पवित्र जीवन जीण खात्तर बुलाया सै।

8 इस करके जो इन हुकमां नै न्ही मानता, वो माणस नै न्ही, पर परमेसवर नै तुच्छ जाणे सै, जो अपना पवित्र आत्मा थारे ताहीं देवै सै।

9 पर विश्वासी भाई-चारे के प्यार के बारे म्ह यो जरूरी न्ही, के मै थारे धोरे कुछ लिक्खूँ, क्यूँके आप्सस म्ह प्यार राखणा थमनै आप ए परमेसवर तै सिख्या सै;

10 थमनै पैहले ए अपने विश्वासी भाईयां के प्यार ताहीं दिखाया सै, जो हर जगहां सारे मकिदुनिया परदेस म्ह सै। पर हे विश्वासी भाईयो, हम थारे तै बिनती करां सां, के थम और भी बढते जाओ।

11 अर जिसी हमनै थारे ताहीं हुकम दिया सै, के शान्ति तै जीवन जिओ अर दुसरे माणसां की बात्तां म्ह दखल ना दो, अर अपने-अपने हाथ्यां तै कमाण की कोशिश करो।

12 ताके अविश्वासी माणस देखै, के थारा रोज का जीवन किसा सै, अर थारे बरताव नै देखैके थारा आदर करै, अर अपनी जरूरत के खात्तर थम किसे के मोहताज ना रहो।

### 0000 00 00000000

13 हे विश्वासी भाईयो, हम न्ही चाहन्दे के थम उनके बारे म्ह जो मर लिये सै, अनजाण रहो; इसा ना हो के थम दुसरयां की तरियां दुख करो जिन नै आस कोनी, के वो मरके जिन्दा होवैगा।

14 क्यूँके जै हम बिश्वास करा सां के यीशु मरया अर जिन्दा भी उठ्या, तो उस्से तरियां ए परमेसवर उननै भी जो यीशु पै बिश्वास करते होए मरे सै, उन ताहीं भी वापिस ले आवैगा।

15 क्यूँके हम प्रभु यीशु के वचन के मुताबिक थारे तै न्यू कहुं सां के हम जो जिन्दे सां अर प्रभु के दुबारा आण ताहीं बचे रहवांगे, तो पक्के उनतै पैहले प्रभु तै न्ही मिलैगे जो मौत की नींद सो ग्ये सै।

16 क्यूँके प्रभु यीशु आप ए सुर्ग तै उतरैगा; अर लोग उस बखत उसकी ललकार सुणैगें, अर प्रधान दूत का बोल नै भी सुणैगें, अर सुर्गदूतां जरिये परमेसवर की तुरही फूँकी जावैगी; अर जो विश्वासी लोग मसीह म्ह मरे सै, वे पैहल्या जी उठैगें।

\* 4:2 आदेश-निर्देश



17 फेर हम जो जिन्दे अर बचे होड़े सां, उनकै गेल्या बादळां पै ठा लिए जावांगें, ताके आसमान म्ह प्रभु यीशु तै मिला; अर इस तरियां तै हम हमेशा कै खात्तर प्रभु कै गेल्या रहवांगें ।

18 इस तरियां इन बात्तां तै एक-दुसरे ताहीं तसल्ली दिया करो ।

## 5

### ???????? ?? ?????? ?????? ?????

1 पर हे विश्वासी भाईयो, इसकी कोए जरूरत कोनी, के हम यीशु के दोबारा आण के बखत अर काल्लां के बारे म्ह थारे धोरै कुछ लिखां ।

2 क्यूँक थम जाणो सां, के परमेसवर के आण का दिन, उस चोर की तरियां होगा, जो रात नै चोरी करण आवे सै, अर थमनै बेरा भी कोनी लाग्गैगा के चोर कद आवैगा ।

3 जिव माणस कहन्दे होंगे, “राज्जी-खुशी सां, अर किमे डर कोनी,” तो उनपै चाणचक विनाश आण पडैगा, जिस ढाळ गर्भवती बच्चा जनन के दुख तै बच न्ही सकदी, उस्से तरियां वो भी बच न्ही पावेंगे ।

4 पर हे विश्वासी भाईयो, थम तो अन्धकार के काम्मां तै अनजाण न्ही सो, के प्रभु के आण का दिन थारे पै चोर की ढाळ आ पडै ।

5 क्यूँक थम सारे चाँदण की ऊलाद अर दिन की ऊलाद सो; हम ना रात के सां, ना अन्धकार के सां ।

6 ज्यातै हम अविश्वासी माणसां की तरियां सोन्दे ना रहवां, पर जागदे अर चौकन्ने रहवां ।

7 क्यूँक जो सोवें सै, वे रात ए नै सोवें सै, अर जो मतवाले होवै सै वे रात ए नै मतवाले होवै सै ।

8 पर हम जो दिन के सां, विश्वास अर प्यार की झिलम पैहर कै अर उद्धार की आस का टोप पैहर कै होशियार रहवां ।

9 क्यूँके परमेसवर नै म्हारै ताहीं छो के खात्तर न्ही, पर ज्यातै ठहराया सै, के हम अपणे प्रभु यीशु मसीह के जरिये उद्धार पावां ।

10 वो म्हारै खात्तर इस कारण मरया, के हम चाहे जिन्दा हों, चाहे मर लिये हों, सारे मिलकै उस्से कै गेल्या जिवां ।

11 इस कारण एक-दुसरे ताहीं तसल्ली द्यो अर एक-दुसरे ताहीं विश्वास म्ह मजबूत करो, जिसा के थम करो भी सो ।

### ???????? ?????? ??????

12 हे विश्वासी भाईयो, हम थारे तै विनती करा सां, के जो थारे म्ह मेहनत करै सै, अर प्रभु म्ह थारे अगुवें सै, अर थमनै शिक्षा देवें सै, उनका आदर करो ।

13 अर उनकै काम्मां के कारण प्यार कै गेल्या उन ताहीं घणाए आदर के जोग्गा समझो । आप्सस म्ह मेळ-मिलाप तै रहो ।

14 हे विश्वासी भाईयो, हम थारे तै विनती करां सां के जो आलसी सै, उन ताहीं समझाओ, डरपोका ताहीं हिम्मत द्यो, कमजोरां ताहीं सम्भाळो, सारया की ओड़ सहनशीलता दिखाओ ।

15 सावधान रहां! कोए किसे तै बुराई कै बदले बुराई ना करै; पर सारी हाण भलाई करण खात्तर त्यार रहवै, आप्सस म्ह एक-दुसरे खात्तर अच्छे काम करो, अर दुसरयां खात्तर भी ।

16 सारी हाण राज्जी रहो ।

17 लगातार प्रार्थना म्ह लाग्गे रहो ।

18 हरेक हालात म्ह धन्यवाद करो; क्यूँके थारे खात्तर मसीह यीशु म्ह परमेसवर की याए मर्जी सै ।

19 पवित्र आत्मा ताहीं माणसां के जीवन म्ह काम करण तै ना रोक्को ।

20 परमेसवर के जरिये जो भविष्यवाणीयां माणसां ताहीं बताई गई सै उननै तुच्छ ना जाणो ।

21 इन सारी बात्तां ताहीं परखो; जो आच्छी सै उसनै थाम्बे राक्खो ।

22 सारी ढाळ की बुराई तै बचे रहो ।



- 23 शान्ति देण आळा परमेसवर आप ए थमने पूरी तरियां तै पवित्र करै; अर थारी आत्मा अर प्राण अर देह म्हारै प्रभु यीशु मसीह के बोहड़ण ताहीं पूरे-पूरे अर बेकसूर सुरक्षित रहवें ।
- 24 थारा बुलाण आळा साच्चा सै, अर वो इसाए करैगा ।
- 25 हे विश्वासी भाईयो, म्हारै खात्तर प्रार्थना करो ।
- 26 आप्स म्ह एक-दुसरे ताहीं गळे मिलके मसीह के प्यार म्ह नमस्कार करो ।
- 27 मे थारे ताहीं प्रभु की हुकम देऊँ सू के या चिट्ठी सारे विश्वासी भाईयाँ नै पढ़कै सुणाई जावै ।
- 28 म्हारे प्रभु यीशु मसीह का अनुग्रह थारे पै होंदा रहवै ।

## थिस्सलुनीकियों नगर के माणसां ताहीं प्रेरित पौलुस की दुसरी चिट्ठी

~~~~~

मसीह का दुबारा आण तै जुड़ी उळझन के कारण थिस्सलुनीकियों की कलीसिया म्ह गड़बड़ी के हालात बणे होए थे। थिस्सलुनीकियों के नाम पौलुस प्रेरित की दुसरी चिट्ठी इस विश्वास पै के प्रभु के आण का दिन पैहल्या आ लिया सै। विचार करण खात्तर लिखी गई सै। पौलुस यो बतान्दे होए इस विचार नै सुधारे सै, के मसीह के आण तै पैहल्या दुष्टता अर बुराई अपनी हद पार कर जावैगी। यो रहस्यमय राजा के अधीन म्ह होगा जिसनै “पाप का माणस मतलब नाश का बेटा” कहा गया सै, जो मसीह का बिरोध करैगा। प्रेरित याड़े इस जरूरत पै जोर देवै सै, के सारे दुखां अर कष्टां का होन्दे होए भी उसके पाठकां नै अपने विश्वास म्ह मजबूती तै बणे रहणा चाहिए, अपनी कमाई खात्तर काम करदे रहणा चाहिए, जिस तरियां पौलुस अर उसके साथी करै थे, अर भलाई करण म्ह लागगे रहणा चाहिए।

रूपरेखा

जानकारी 1:1,2

बड़ाई अर तारीफ 1:3-12

मसीह के दुबारा आण तै जुड़ी शिक्षा 2:1-17

मसीह चाल-चलण तै जुड़े उपदेश 3:1-15

समापन 3:16-18

~~~~~

1 या चिट्ठी हम पौलुस, सिलवानुस अर तीमुथियुस की ओड़ तै थिस्सलुनीकियों नगर की कलीसिया के विश्वासियाँ ताहीं लिखां सां, जो म्हारै पिता परमेसवर अर प्रभु यीशु मसीह के सै।

2 म्हारै पिता परमेसवर अर प्रभु यीशु मसीह की ओड़ तै थमनै अनुग्रह अर शान्ति मिलदी रहवै।

~~~~~

3 हे विश्वासी भाईयो, थारे बारै म्ह हमनै हरेक बखत परमेसवर का धन्यवाद करणा चाहिये, अर यो सही भी सै ज्यातै के थारा विश्वास यीशु मसीह म्ह घणा बढ़दा जावै सै, अर थारा एक-दुसरे के खात्तर आपस म्ह प्यार घणाए बढ़ता जावै।

4 इस करके हम परमेसवर की कलीसिया के विश्वासियाँ के बारै म्ह गर्व करा सां, के जितने थम इम्तिहान अर मुसीबतां तै गुजरो सों, थम उननै धीरज तै सहण लागरे सों, अर थम फेर भी यीशु मसीह पै विश्वास राख्वां सों।

5 अर परमेसवर इन दुखां का इस्तमाल अपने न्याय ताहीं दिखाण अर थारे ताहीं अपने राज्य के लायक बणाण खात्तर करैगा, जिस खात्तर थम दुख भी ठाओ सों।

6 क्यूँके परमेसवर हमेशा सही न्याय करै सै, ताके जो थमनै दुख देवै सै, उननै बदले म्ह वो दुख देवै।

7 अर थमनै वो इस दुख तै राहत देवैगा, जो थम इब उठाण लागरे सों, अर म्हारे ताहीं भी राहत दे, यो उस बखत होगा जिव प्रभु यीशु अपने सामर्थी सुगंद्तां के गैल, धक्कती होई आग म्ह सुगं तै आवैगा।

8 अर जो परमेसवर नै न्ही पिच्छाणदे, अर जो म्हारे प्रभु यीशु के बारे म्ह सुसमाचार ताहीं न्ही मानते उनतै वो बदला लेवैगा।

9 वे परमेसवर तै हमेशा खात्तर अलग हो जावेंगे अर उसकी महिमामय शक्ति म्ह शामिल न्ही हो पावेंगे अर वे अनन्त विनाश का दण्ड पावेंगे।

10 यो उस दिन होवैगा, ज़िब प्रभु यीशु मसीह बोहड़के आवैगा, ताके वो उन माणसां तै महिमा पावै जो उसके कहलावै सै, उन माणसां तै सम्मानित करया जावैगा जो उसपै विश्वास करै सै, अर उस दिन थम भी उनकी तारीफ करण आळा म्ह तै एक होओगे, क्यूँके थमनै उसपै विश्वास करा, जो हमनै थारे ताहीं बताया ।

11 ज्यांतै हम सारी हाण थारे बारै म्ह प्रार्थना भी करा सां, के म्हारा परमेसवर थारे ताहीं इसा करण म्ह काबिल बणावैगा, जिसके खात्तर उसनै म्हारे ताहीं बुलाया सै, अर वो थारी हरेक भली इच्छा नै सामर्थी रूप तै पूरा करै, अर हर उस काम नै पूरा करा जो थम विश्वास तै करो सों ।

12 इस तरियां म्हारे प्रभु यीशु मसीह का नाम थारे जरिये महिमा पावैगा, यो सब कुछ म्हारे परमेसवर अर प्रभु यीशु मसीह के अनुग्रह तै होवैगा ।

2

~~~~~

1 हे विश्वासी भाईयो, इब हम अपणे प्रभु यीशु मसीह के बोहड़ण, अर ज़िब हम कट्टे होके उसतै मिलगें तो उस दिन के बारे म्ह थारे ताहीं बताणा चाहूँ सँ ।

2 थम किसे भविष्यवाणी या किसे उपदेश या किसे चिट्ठी नै म्हारी ओड़ तै लिखी होई मानके चाणचक बोखळा ना जाइयो, अर ना ए अपणे-आप म्ह घबराईयो के परमेसवर का दिन पैहले ए आ लिया सै ।

3 किसे ढाळ तै भी किसे कै धोक्खे म्ह ना आइयो, क्यूँके प्रभु यीशु के आण तै पैहले इसा बखत आवैगा, ज़िब भोत सारे लोग परमेसवर के बिरोधी हो जावेंगे, अर वो अधर्मी माणस यानिके विनाश का बेट्टा दिखाई देवैगा, जिस ताहीं परमेसवर सदा खात्तर खतम कर देवैगा ।

4 वो अधर्मी माणस परमेसवर अर उन दुसरी चिज्जां का बिरोध करैगा । जिनकी लोग भगति करै, वो दावा करैगा के वो उनतै भी घणा बड़ा सै, उरै ताहीं के वो परमेसवर के मन्दर म्ह बैठके अपणे-आप ताहीं ईश्वर बतावैगा ।

5 के थमने याद कोनी के ज़िब मै थारे धोरै था, तो थारे तै ये बात कह्या करूँ था?

6 वो जो अधर्मी माणस इब ताहीं दिख्या न्ही सै, क्यूँके इसा कुछ तो सै जिसनै उस ताहीं रोक राख्या सै, पक्का थम जाणो सों, के वो के सै । इस करके ज़िब परमेसवर का बखत आवैगा तो वो अधर्मी माणस दिख जावैगा ।

7 अर उस अधर्मी माणस की शक्ति पैहले तै गुप्त रूप तै इस दुनिया म्ह काम करण लागरी सै, पर वो सै जो उस शक्ति नै रोक्कण लागरया सै, अर ज़िब ताहीं वो दूर ना हो जावै तब तक वो इस ताहीं रोकणा जारी राखवैगा ।

8 फेर वो अधर्मी माणस दिख जावैगा, पर बाद म्ह ज़िब प्रभु यीशु आवैगा तो वो अपणे मुँह की फूँक तै अधर्मी माणस ताहीं मार देवैगा, अर अपणे आगमन के तेज तै भस्म करैगा ।

9 वो अधर्मी माणस शैतान की शक्ति गैल आवैगा, वो सारे ढाळ के झूट्टे चमत्कार, अर अचम्भे के काम करैगा, जो हमनै यो सोच्चण कै खात्तर मजबूर करैगा के योए परमेसवर सै जो इननै करण लागरया सै ।

10 वो सारी ढाळ के बुरे तरिकके अपणावैगा उन माणसां खात्तर जो अनन्त विनाश के राह की ओड़ जावै सै, क्यूँके उनने सच्चाई पै विश्वास कोनी करया जिसतै उनका उद्धार हों सके सै ।

11 इस्से कारण परमेसवर उन माणसां म्ह एक भटकाण आळी शक्ति नै भेज्जै सै, जो उन ताहीं सच्चाई तै दूर ले जावैगी, ताके वे झूठ पै विश्वास करै ।

12 परमेसवर उन सब का न्याय करैगा जिननै सच्चे सन्देश (यीशु मसीह के बारे म्ह) विश्वास कोनी करया, अर जिननै अधर्म के काम्मां तै प्यार करया ।

~~~~~

13 हे विश्वासी भाईयो, उरै थारे खात्तर परमेसवर के स्याम्ही म्हारा हमेशा धन्यवाद देणा सही सै, थम प्रभु के प्यारे सों, क्यूँके परमेसवर नै थारे ताहीं दुनिया की शरुआत तै ए उद्धार के खात्तर चुण लिया सै। ताके वो थमनै पवित्र आत्मा के काम के जरिये पवित्र बणावै, अर यीशु मसीह के सच्चे सुसमाचार पै विश्वास करण के जरिये थमनै बचाले।

14 म्हारे सुसमाचार के जरिये उसनै थारे ताहीं बचाण खात्तर बुलाया सै, ताके थम उसकी महिमा म्ह हिस्सा ले सको, जो परमेसवर नै म्हारे प्रभु यीशु मसीह ताहीं दी सै।

15 ज्यांतै हे विश्वासी भाईयो, मजबूत रहो, अर जो-जो शिक्षा थमनै चाहे वचन या चिट्ठी के जरिये म्हारै जरिये सीक्खी सै, उननै थाम्बे राक्खो।

16 हम प्रार्थना करां सां के खुद म्हारा प्रभु यीशु मसीह, अर म्हारा पिता परमेसवर, जिसनै म्हारै तै प्यार करया अर अनुग्रह तै अनन्त शान्ति अर घणी बढ़िया उम्मीद देई सै,

17 थारे मनां म्ह शान्ति दे अर थमनै हरेक आच्छे काम अर वचन म्ह मजबूत करै।

3

1 इस करके, हे विश्वासी भाईयो, म्हारे खात्तर प्रार्थना करया करो के प्रभु के बारे म्ह सन्देश भोत तावळा दुसरी जगहां म्ह भी सुणाया जा सके, अर लोग उसपै विश्वास करैगें जिसा थम विश्वास करो सों।

2 या भी प्रार्थना करया करो के परमेसवर हमनै बैरी अर बुरे माणसां के जरिये दिए जाण आळे नुकसान तै भी बचावै, क्यूँके भोत-से लोग सुसमाचार पै विश्वास कोनी करते।

3 पर प्रभु भरोस्सेमंद सै, वो थमनै अन्दरूनी रूप तै मजबूत करैगा अर उसकी रक्षा करैगा, ताके बुराई, शैतान थमनै नुकसान ना पंहुचा सकै।

4 हमनै प्रभु म्ह थारे उपर भरोस्सा सै हमनै जो कुछ थारे ताहीं करण खात्तर कह्या सै थम उसाए करण लागरे सों अर करते भी रहोगे।

5 हम प्रार्थना करा सां के प्रभु यीशु थमनै यो समझण के काबिल बणावै के परमेसवर थमनै कितना प्यार करै सै, अर धीरज राखणा सिखावै जिसा मसीह राक्खै सै।

6 हे विश्वासी भाईयो, प्रभु यीशु मसीह नै जो हक म्हारे ताहीं दिया सै, उसके कारण हम थमनै हुक्म देवां सां, के थम हरेक इसे विश्वासी भाई तै न्यारे रहो जो कोए काम न्ही करदा, अर जो शिक्षा उसनै म्हारै तै पाई उसके मुताबिक न्ही करदा।

7 क्यूँके थम सारे अपणे-आपनै आच्छी तरियां जाणो सों, के थमनै उस्से तरियां जीणा चाहिए जिस तरियां हम जिवां सां, क्यूँके जिब हम थारे बिचाळे रहण लागरे थे, तो हम आलसी कोनी थे।

8 अर किसे की रोट्टी मुफ्त म्ह कोनी खाई, मेहनत अर कष्ट तै दिन-रात काम-धन्धा करा थे, ताके हम अपनी जरूरतां खात्तर थारे भरोस्से ना रह्हां।

9 हालाकि थारे तै आर्थिक मदद पाण का म्हारा हक बणै सै, फेर भी हम कड़ी मेहनत करा सां, पर ज्यांतै के अपणे-आप ताहीं थारे खात्तर आच्छा नमूना बणावां ताके थम भी म्हारै जिसा जीवन जिओ।

10 क्यूँके जिब हम थारे धोरै थे, तब भी योए कह्या करा थे, के जै कोए काम करणा ना चाहवै* तो उसका खाण का भी हक कोनी।

11 हम सुणां सां के कुछ माणस थारे बिचाळे सुस्त सै अर वे कोए काम न्ही करदे, पर दुसरयां के काम म्ह रुकावट करै सै, अर उन ताहीं भी काम करण तै रोक्कै सै।

12 प्रभु यीशु मसीह नै म्हारे ताहीं हक दिया सै, अर हम थमनै भी समझावां सां, के चुपचाप काम करके अपनी ए कमाई तै रोट्टी खाया कर।

* 3:10 3:10 जै कोए काम करणा ना चाहवै जो कोए आलसी सै

13 पर हे विश्वासी भाईयो, थम खुद वो काम करण तै पाच्छै ना हटियो, जो सही अर भले सै।

14 जै कोए म्हारी इस चिट्ठी म्ह दी गई हिदायत† नै कोनी मान्ने तो सब जाण ल्यो के वो कौण सै, अर उसकी संगति ना करो, जिसतै वो शर्मिन्दा होवै।

15 तोभी उस ताहीं दुश्मन मतना समझो, पर विश्वासी भाई जाणकै समझाओ।

??????????

16 मै प्रार्थना करूँ सूँ, के प्रभु जो शान्ति का चोवा सै आप ए थारे ताहीं सारी हाण अर हरेक तरियां तै शान्ति देवै। प्रभु थम सारया के साथ रहवै।

17 मै, पौलुस, अपने हाथ तै नमस्कार लिक्खूँ सूँ। इस्से तरियां तै मै अपनी सारी चिट्ठियाँ के अन्त म्ह न्यूए लिक्खूँ सूँ, ताके थम जाण ल्यो के ये मेरी ओड़ तै सै।

18 मै प्रार्थना करूँ सूँ, के म्हारे प्रभु यीशु मसीह का अनुग्रह थम सारया पै होंदा रहवै।

तीमुथियुस के नाम प्रेरित पौलुस की पैहली चिट्ठी



तीमुथियुस एक जवान बिश्वासी था, जो एशिया माइनर का रहणीया था, उसकी माँ यहूदी अर पिता यूनानी था। वो पौलुस के प्रचार के काम म्ह उसका साथी अर मददगार बणगया था। तीमुथियुस के नाम पौलुस की पैहली चिट्ठी तीन खास बातों पै विचार करण खात्तर लिखी गई सै। सब तै पैहल्या, या चिट्ठी कलीसिया म्ह झूट्टी शिक्षा के खिलाफ एक चेतावनी सै। या शिक्षा, जो के यहूदी अर गैर यहूदी विचारों की मिलावट थी, इस सोच पै आधारित थी के भौतिक संसार ए बुरा सै। अर एक आदमी खास गुप्त ज्ञान अर थोड़े-से रीति-रिवाज, जिस तरियां कुछ खाण की चीज न्ही खाणा अर ब्याह न्ही करणा भोत सी बातों के मानण तै ए मुक्ति मिल सकै सै। इस चिट्ठी म्ह कलीसिया के प्रबन्ध अर आराधना तै जुड़े सुझाव भी सै, साथ म्ह चाल-चलण का भी जिक्र सै जो कलीसिया के अगुवां अर सहायकों खात्तर जरूरी सै। आखर म्ह, तीमुथियुस तै या सलाह दी सै के वो किस तरियां यीशु मसीह का एक आच्छा सेवक बण सकै सै, अर कई ओर भी बिश्वासी झुण्डों के खात्तर उसकी के-के जिम्मेदारी सै।

रूप-रेखा

जानकारी 1:1,2

कलीसिया अर इसके अगुवां तै जुड़ी सलाह 1:3-3:16

तीमुथियुस ताहीं उसके काम तै जुड़ी सलाह 4:1-6:21



1 या चिट्ठी पौलुस की ओड़ तै सै, जो यीशु मसीह का प्रेरित सै, अर परमेसवर जो म्हारा उद्धारकर्ता सै, अर यीशु मसीह जो म्हारी आस सै, उसनै मेरे ताहीं प्रेरित होण खात्तर बुलाया सै।

2 मै या चिट्ठी तीमुथियुस नै लिखूं सूं, मसीह पै बिश्वास करण के नाते तू मेरे आत्मिक बेट्टे की तरियां सै, मै प्रार्थना करूं सूं, के पिता परमेसवर, अर म्हारै प्रभु मसीह यीशु की ओड़ तै तन्नै अनुग्रह, दया अर शान्ति मिलदी रहवै।



3-4 जिसा के तू तीमुथियुस जाणै सै, इफिसुस नगर म्ह कई माणस सै जो झूट्टी शिक्षा देवै सै, वे माणसां ताहीं लगातार झूट्टी कहाणियां अर पूर्वजां की लम्बी वंशावलियां नै सिखावै सै, जिसा के मन्नै मकिदुनिया जान्दे बखत तेरे तै कह्या था, के इफिसुस नगर म्ह रहकै उन ताहीं कह के इसी शिक्षा ना देवे, जब वे इसी शिक्षा देवे सै, तो माणसां म्ह विवाद पैदा होवै सै, इसका नतिज्जा यो सै के ये शिक्षक परमेसवर का काम न्ही करते जो परमेसवर नै उन ताहीं दिया सै, यो तो सिर्फ मसीह पैए बिश्वास करण के जरिये करया जा सकै सै।

5 योए म्हारे हुकम का मकसद सै, के थम सच्चे मन, शुद्ध अन्तरात्मा अर सच्चे बिश्वास तै एक-दुसरे के गेल्या बिना कपट के प्यार करो।

6 झूट्टे शिक्षकां नै इन सारी चिज्जां ताहीं छोड़ दिया सै, अर सिर्फ बेकार की चिज्जां पै बातचीत करै सै।

7 अर वकील तो बणणा चाहवै सै, पर जो बात कहवै अर जिन ताहीं मजबूती तै बोल्लै सै, उन ताहीं समझदे भी कोनी।

8 हम जाणा सां के मूसा के नियम-कायदा नै जै सही तरिके तै सिखावै तो वो भला सै।

9 हम यो जाणा सां, के मूसा नबी के नियम-कायदे धर्मी माणस के खात्तर कोनी, पर उन माणसां खात्तर सै जो परमेसवर के नियम-कायदा नै अणदेखा करै सै, अर उन ताहीं मानते कोनी, अर उन माणसां खात्तर जो परमेसवर की आराधना कोनी करते, अर जो सारी हाण पाप करते रहवै सै, जो

माणस दुष्ट सै, अर परमेसवर का आदर कोनी करते, अर जो अपणे माँ-बाप नै, अर दुसरयां नै मार देवै सै।

10 जारी करणीये, माणसां गैल कुकर्म करणीये, माणस नै बेचण आळे, झूठ बोल्लण आळे, झूट्टी कसम खाण आळे, अर इनके अलावा खरे उपदेश के सारे बिरोधियाँ के खात्तर बणाई गई सै।

11 या सही शिक्षा उस सुसमाचार पै आधारित सै, जो के धन्य परमेसवर की महिमा के बारे म्ह सै, जिसकी मेरै ताहीं प्रचार करण की जिम्मेदारी दी गई सै।

?????? ? ? ? ? ? ? ? ? ? ? ? ? ? ? ? ?

12 मै अपणे प्रभु मसीह यीशु का जिसनै मेरै ताहीं सामर्थ दी सै, धन्यवाद करूँ सूँ, के उसनै मेरै ताहीं विश्वास जोगगा समझके अपणी सेवा के खात्तर चुण्या।

13 विश्वास करण तै पैहले, मै बुराई करण आळा, सताण आळा, अर अन्धेर करण आळा था, तोभी मेरै पै दया होई, क्यूँके यीशु मसीह पै विश्वास करण तै पैहले मन्ने अविश्वास अर बिना सोच्चे-समझे ये काम करे थे।

14 अर परमेसवर का अनुग्रह मेरे पै भोत-ए घणा होया, उसनै मेरे ताहीं विश्वास अर प्यार दिया, क्यूँके मै मसीह यीशु म्ह सूँ।

15 या बात साच्ची अर हरेक तरियां तै मानण जोगगी सै, के मसीह यीशु पापियाँ का उद्धार करण खात्तर दुनिया म्ह आया, जिन म्ह सारया तै बड़ड़ा पापी मै सूँ।

16 परमेसवर नै अपणी दया मेरे पै दिखाई, उसनै यो इस कारण करया ताके मुझ माणस के जरिये, जिसनै दुसरे माणसां तै ज्यादा बुरे काम करे सै, मसीह यीशु दिखा सकै सै, के वो मेरे खात्तर कितना धीरज राक्खे सै, या उन माणसां खात्तर एक मिसाल सै जो बाद म्ह उसपै विश्वास करैगें, अर वे अनन्त जीवन पावैगें।

17 इब राजा जो सदा खात्तर जिन्दा सै, उस अविनाशी, अनदेकखे, एकमात्र परमेसवर का आदर अर उसकी महिमा युगानुयुग होंदी रहवै। आमीन।

18 हे बेटे तीमथियुस, मै यो हुकम सौंपू सूँ, जो उन भविष्यवाणीयाँ के मुताबिक सै, जो पैहल्या तेरे बारे म्ह करी गई थी, उनके मुताबिक एक सिपाही की तरियां आच्छी लड़ाई नै लड़ता रह।

19 थम मसीह पै लगातार विश्वास करते रहो, ताके थारी अन्तरात्मा साफ रहवै, कई माणसां नै अपणी साफ अन्तरात्मा ताहीं त्याग दिया सै, अर उनकी मसीह पै विश्वास करण की काबलियत भी खतम होगी सै, अर इब वे विश्वास भी कोनी करते।

20 उन म्ह हुमिनयुस अर सिकन्दर भी शामिल सै, जिन ताहीं मन्ने शैतान की बुरी शक्तियाँ के हाथ सौंप दिया सै, ताके वे परमेसवर की बुराई करणा छोड़ दे।

2

?????? ? ? ? ? ? ? ? ? ? ? ? ? ? ? ? ?

1 इब मै सारया तै पैहल्या यो आग्रह करूँ सूँ, के बिनती, प्रार्थना, निवेदन, अर धन्यवाद सारे माणसां के खात्तर करे जावै।

2 राजयां अर सारे ऊँच्चे ओद्य आळा के खात्तर ज्यातै ताके वो हमनै आराम अर चैन के गेल्या सारी भगति अर गम्भीरता तै जीवन बिताण देवै।

3 इसी प्रार्थना सही सै अर म्हारै परमेसवर उद्धारकर्ता नै आच्छी लागवै सै।

4 वो चाहवै सै के हरेक इन्सान सच्चाई के ज्ञान नै समझ ले अर वे बच जावै।

5 क्यूँके परमेसवर एक सै, अर परमेसवर अर माणसां के बीच म्ह भी एक ए बिचोल्ला सै, जो मसीह यीशु सै, जो मानव रूप धारण करके आया।

6 मसीह नै अपणे-आप ताहीं बलिदान कर दिया, ताके लोगगां नै पाप अर मौत की शक्ति तै आजाद करे। मसीह की मौत के जरिये, परमेसवर नै यो सबूत दिया के सही बखत पै सब लोग बच जावै।

7 इस कारण तै परमेसवर नै मेरे ताहीं सुसमाचार का प्रचारक अर प्रेरित चुण्या सै, उसनै मेरे ताहीं गैर यहूदियाँ ताहीं विश्वास अर सच्चाई का सन्देश सुणाण आळा बणाया सै, मै झूठ न्ही बोल्दा, सच कहूँ सू।

8 ज्यातै मै चाहूँ सू, के हरेक जगहां सभाओं म्ह माणस जो पवित्र जिन्दगी जीवै सै, वे हाथ्यां नै ठाकै बिना छो अर विवाद के परमेसवर तै प्रार्थना करै।

9 इस्से तरियां मै चाहूँ सू के मसीह बिरबानियाँ नै भी सही तरियां के लते पैहरणे चाहिए, जो के सादे हो, ना के भड़कीले। ना के खूबसूरती तै बाळ गूँथणा, ना सोन्ने, मोतियाँ अर घणे महंगे लत्यां तै अपने-आपनै सवारणा।

10 पर इसक बजाए वो लोग्गां की भलाई करै, जो उननै खूबसूरत बणावै सै, क्यूँके परमेसवर की भगति करण आळी बिरबानियाँ कै खात्तर योए सही सै।

11 जिब कोए, विश्वासियाँ ताहीं सिखाण लागरया हो तो, बिरबानियाँ नै चुपचाप रहकै पूरी शान्ति तै सिखाणा चाहिये।

12 मै बिरबानियाँ ताहीं मर्दां नै सिखाण या उसपै हावी होण की इजाजत कोनी देंदा, जिब थम आराधना म्ह मिलो हो, तो बिरबानियाँ नै चुप रहणा चाहिए।

13 मै इस करके कहूँ सू, क्यूँके पैहल्या आदम, उसकै पाच्छे हव्वा बणाई गई।

14 आदम साँप के जरिये भकाया न्ही गया, पर बिरबान्नी भकाई म्ह आकै कसूरवार होई।

15 तोभी बिरबान्नी बाळक पैदा करण कै जरिये उद्धार पावैगीं, जै वा मसीह पै विश्वास करै, दुसरे तै प्यार, अर पवित्र अर सही बरताव करै।

3

XXXXXXXXXX

1 या बात सच्ची सै, के जो कलीसिया का अगुवां बणणा चाहवै सै, तो वो भले काम की चाह करै सै।

2 यो जरूरी सै के अगुवां नै बेकसूर, अर एक ए बिरबान्नी का धणी, संयमी, सुशील, सभ्य, मेहमान का आदर-सत्कार करणीया, अर सिखाण म्ह सही होणा चाहिए।

3 दारूबाज या मारपीट करण आळा ना हो, बल्के नरम हो, अर ना रोळा करण आळा, अर ना धन का लोभी हो।

4 अपने घर का सही इन्तजाम करण आळा हो, अर उसनै अपने बाळ-बच्चां ताहीं हरेक काम म्ह आदरपूर्वक उनका कहणा मानना सिखाणा चाहिए।

5 जिब कोए अपने घर का ए इन्तजाम करणा ना जाण्दा हो, तो परमेसवर की कलीसिया की रुखाळी किस ढाळ करैगा?

6 वो नया विश्वासी ना हो, इसा ना हो के घमण्ड करके शैतान की तरियां सजा भुगतै।

7 अर कलीसिया के बाहर के माणसां म्ह भी वो सम्मान लायक हो, ताके वो बदनामी अर शैतान कै फंदे म्ह ना फँस जावै।

XXXXXXXXXX

8 उस्से तरियां ए कलीसिया के सेवकां नै भी गम्भीर होणा चाहिये, दोगली बात करण आळा, दारूबाज अर नीच कमाई का लोभी ना हो।

9 उनकै धोरे साफ अन्तरात्मा हो, क्यूँके वे मानते रहवैगे, के परमेसवर नै जो शिक्षाएँ जाहिर करी वे सच सै।

10 अर ये इन सारी बाततां म्ह पैहले परखे जावै, फेर जै बेकसूर लिंकडै तो सेवक का काम करै।

11 इस्से तरियां तै बिरबानियाँ नै भी गम्भीर होणा चाहिये, दोष लाण आळी ना हों, पर सचेत अर सारी बाततां म्ह विश्वास जोगी हों।

12 कलीसिया का सेवक एक ए बिरबान्नी का धणी हों अर बाळ-बच्यां अर अपणे घरां का आच्छा इन्तजाम करणा जाणदे हों ।

13 क्यूँके जो कलीसिया के सेवक का काम आच्छी ढाळ तै कर सकै सै, वो माणसां म्ह सम्मान लायक होगा, पर मसीह यीशु म्ह अपणे विश्वास के बारें म्ह वो बड़ी दिलेरी तै बोल्लण आळा हो ।

~~~~~

14 मे तेरे धारे तावळा आण की आस करते होए भी, ये बात तेरे तै ज्यातै लिक्खूं सू,

15 ताके जै मेरे ओड़ै आण म्ह देर हो भी जावै, तो मै चाहूं सू, थम इस बात नै जाण ल्यो, के परमेसवर का परिवार जो के एक कलीसिया सै, उस म्ह हमने एक-दुसरे तै किसा बरताव करणा चाहिए । जिन्दे परमेसवर की कलीसिया के माणस सच्चाई की शिक्षा की नीम अर खम्बे की तरियां सै ।

16 हम दावे के साथ कह सका सां, के परमेसवर नै जो शिक्षाएँ जाहिर करी सै, वो पूरी तरियां तै सच सै, यानी, वो जो देह म्ह जाहिर होया, वो पवित्तर आत्मा के जरिये परमेसवर का बेदटा साबित होया, अर उस ताहीं सुगद्दत्तां नै देख्या, दुनिया के माणसां नै उसपै विश्वास करया, दुसरी जात्तां म्ह उसका प्रचार होया, अर महिमा म्ह उप्पर टाया गया ।

## 4

~~~~~

1 पर पवित्तर आत्मा साफ तौर पै कहवै सै, के अन्त के दिनां म्ह कुछ लोग मसीह शिक्षा ताहीं मानना छोड़ देवैगें, वो ओपरी आत्मायाँ ताहीं अपना लेवैगें जो उन ताहीं भटका देवैगी, अर वो उस झूट्टी शिक्षा पे मन लगावैगें जो ओपरी आत्मा की ओड़ तै सै ।

2 वे पाखण्डी झूट्टे लोग सै जो झूट्टी शिक्षा सिखावै सै, उनकी अन्तरात्मा, जो सही या गलत के बीच का फैसला करै सै, वा मर चुकी सै, जिस तरियां के एक गरम लोहे नै अन्तरात्मा ताहीं जळा दिया हो ।

3-4 ये झूट्टे लोग सिखावै सै, के ब्याह करणा अर कई चीज जो खाण-पीण की सै, वे गलत सै, पर परमेसवर नै इन खाण-पीण की चिज्जां ताहीं विश्वासियाँ खात्तर बणाया सै, जो सच्ची शिक्षा नै जाणै सै के परमेसवर की बणाई हरेक चीज आच्छी सै, कोए भी चीज नकारन की कोनी, जै उस ताहीं धन्यवाद देके खावै ।

5 क्यूँके परमेसवर के वचन अर प्रार्थना के जरिये सब कबूल हो जावै सै ।

~~~~~

6 जै तू लगातार विश्वासी भाई-भाणा नै याद दुआन्दा रहवै, के जो मननै निर्देश दिए सै, अर तू जो विश्वास अर आच्छे शिक्षा के सन्देश के जरिये मजबूत बणाया गया सै, जिसका तन्नै पालन करया सै, तो तू यीशु मसीह का एक आच्छा सेवक सै ।

7 सांसारिक अर मनघडन्त कहानियाँ तै दूर रहों, अर थम अपणे-आपनै ईश्वरीय जीवन जीण खात्तर अनुशासित कर ल्यो ।

8 क्यूँके देह की कसरत तै माड़ा सा फायदा होवै सै, पर भगति सारी बातां के खात्तर फैयदेमन्द सै, क्यूँके यो इस धरती पै जिन्दा रहन्दे होए अर मरण के बाद भी एक ईनाम का वादा सै ।

9 या बात सच्ची अर हरेक ढाळ तै मानण जोगगी सै ।

10 क्यूँके हम मेहनत अर कोशिश इस्से खात्तर करा सां के म्हारी आस उस जिन्दे परमेसवर पै सै, जो सारे माणसां अर खास करके अपणे विश्वासियाँ का उद्धार करणीया सै ।

11 विश्वासियाँ नै ये बात करणा अर उननै मानना सीखा ।

12 छोट्टी उमर के कारण कोए तन्नै तुच्छ ना समझे पर वचन, अर चाल-चलण, अर प्यार, अर विश्वास, अर पवित्तरता म्ह विश्वासियाँ के खात्तर बढ़िया नमूना बण जा ।

13 जिव ताहीं मै न्ही जाऊँ, जिव तक बखत लिकाड़कै पवित्तर ग्रन्थ विश्वासियाँ ताहीं पढ़कै सुणा, अर उन ताहीं उत्साहित अर वचन सिखाण म्ह लग्या रह।

14 उस आत्मिक वरदान कै बारे म्ह, जो तेरे म्ह सै, अर भविष्यवाणी कै जरिये कलीसिया के अगुवाँ के हाथ धरदे बखत तन्नै मिल्या था, निश्चिन्त मतना रह।

15 इन बाततां नै सोचदा रह अर इन्नै म्ह अपना ध्यान लाये रह, ताके तेरी बढ़ोतरी सारया पै दिख जावै।

16 यो ध्यान राक्खों के थम किस तरियाँ जिन्दगी जिओ सों, अर के सिखाओ सों। इन बाततां पै स्थिर रह, क्यूँके इसा करदा रहवैगा तो तू अपने अर अपने सुणण आळा कै खात्तर भी उद्धार का कारण होगा।

## 5

### XXXXXXXXXX XX XXXXX XXXXXXXXXXXXX

1 किसे बूढ़े ताहीं छो म्ह ना धमका, पर उस ताहीं अपना बाप जाणकै समझा दे, अर जवानां नै अपना भाई जाणकै समझा दे।

2 बूढ़ी विरवानियाँ नै माँ जाणकै, अर जवान विरवानियाँ नै पूरी पवित्तरता तै भाण मानकै समझा दे।

3 उन विधवा विरवानियाँ का, जिनकी देखभाळ करणीया कोए कोनी उनका आदर कर।

4 जै किसे विधवा के बाळक या नात्ती-पोत्ते हों, तो वे सब तै पैहल्या अपने ए कुणवे कै प्रति अपने फर्ज नै पूरा करकै परमेसवर का भगत बणणा सीखै, अर अपने माँ-बाप के उपकारां का फळ दे, क्यूँके यो परमेसवर नै भावै सै।

5 जो सच म्ह ए विधवा सै, अर उसका मदद करण आळा कोए न्ही, वा परमेसवर पै आस राक्खै सै, अर दिन-रात विनती अर प्रार्थना म्ह लागगी रहवै सै।

6 पर जो विधवा भोगविलास म्ह पड़गी, वा जिन्दे जी मरगी सै।

7 इन बाततां का भी हुकम दिया कर ताके कोए उनपै दोष ना लगा सकै।

8 पर जै कोए अपने रिश्तेदारां की अर खास करकै अपने कुणवे की फिक्र ना करै, तो वो विश्वास तै मुकर गया सै अर अविश्वासी तै भी बुरा बण गया सै।

9 उससे विधवा का नाम लिख्या जावै जो साठ साल तै उप्पर की हो, अर जो एके धणी की विश्वास लायक रही हों।

10 अर भले काम म्ह आच्छी नाम्मी रही हो, जिसनै बाळकां का पालन-पोषण, मेहमानां की सेवा, परमेसवर के माणसां की सेवा, दुखियाँ की मदद करी हो, अर हरेक भले काम म्ह मन लगाया हो।

11 पर जवान विधवा विरवानियाँ के नाम ना लिखिए, क्यूँके जिव उनकी शारीरिक अभिलाषा मसीह की सेवा करण तै बढ़कै हो जावै सै, तो वा ब्याह करणा चाहवें सै।

12 दुवारै ब्याह करकै, वे खुद कसूरवार बणैगी, क्यूँके उननै अपने पैहल्ले वादे ताहीं जो के ब्याह ना करण का था, उस ताहीं तोड़ दिया सै।

13 इसकै गेल्या ए गेल्या वे घर-घर हाँड कै आलसी होणा सिक्खें सै, अर सिर्फ आलसी न्ही पर बकबक कर दी रहै सै, अर दुसरयां के काम म्ह भी दखल देती रहवै सै, अर चुगली कर दी रहवै सै।

14 ज्यांतै मै न्यू चाहूँ सुं के जवान विधवां ब्याह करै, अर बाळक जामै अर घर-वार सम्भाळै, अर किसे विरोधी नै बदनाम करण का मौक्का ना देवै।

15 मै इस करके कहूँ सुं, के उन म्ह तै कईयाँ नै प्रभु का कहणा मानना छोड़ दिया सै, अर शैतान के पाच्छे चालणा शरु कर दिया सै।

16 जै किसे विश्वासी परिवार म्ह कोए विधवां हों, तो वैए उनकी मदद करै के कलीसिया पै बोझ ना हो, ताके कलीसिया उनकी मदद कर सकै जो साच्चए विधवां सै।

17 कोए भी कलीसिया का अगुवां जो अपणा काम आच्छी तरियां करै सै उस ताहीं बड़ा सम्मान अर पर्याप्त वेतन पाण के लायक मान्या जाणा चाहिए, खासकर जो लोग परमेसवर के सन्देश नै पढ़ाण अर प्रचार करण म्ह कड़ी मेहनत करै सै।

18 क्यूँके पवित्र ग्रन्थ म्ह लिख्या सै, “नाज लिकाड़ण आळे बळध का मुँह ना बाँधिये,” क्यूँके “मजदूर अपनी मजदूरी का हकदार सै।”

19 किसे भी कलीसिया के अगुवै के विरुध्द दो या तीन गवाह के बिना कोए भी उसनै दोषी ना मान्नो।

20 पाप करण आळा नै सारया कै स्याम्ही समझा दे, ताके बाक्की के विश्वासी भी डरै।

21 परमेसवर, अर मसीह यीशु अर छोट्टे होइ सुगंदूत्तां नै मौजूद जाणकै मै तन्नै हुकम देऊँ सूँ, के बिना भेदभाव के तू इन हुकमां नै पूरा कर, अर सब के गैल एक जिसा बरताव कर।

22 किसे ताहीं जल्दबाजी म्ह अगुवां ना बणाईये, अर जै तू इसा करै सै, तो उसका जिम्मेदार भी तू खुद होवैगा, तू यो तय करकै मै कोए पाप न्ही करूँगा।

23 आण आळे बखत म्ह सिर्फ पाणी ए का पीण आळा ना रह, पर अपने पेट के अर अपने बार-बार बीमार होण के कारण माड़ा-माड़ा अंगूर का रस भी काम म्ह ल्याया कर।

24 मै कहूँ सूँ, के किसे ताहीं जल्दबाजी म्ह अगुवां ना बणाईये, क्यूँके कई लोग सब कै स्याम्ही पाप करै सै, इसते पैहले के उनका न्याय हो, विश्वासियाँ कै स्याम्ही वे पापी बण चुके सै, दुसरे माणसां के पाप दिखाई न्ही देन्दे, पर पाच्छे नजर आवै सै।

25 उससे तरियां तै जिन माणस आच्छे काम करै सै तो दुसरे माणस उसके काम्मां नै देखै सै, अर जै इब न्ही दिखदे तो बाद म्ह वे दिख जावै सै।

## 6

1 जितने विश्वासी गुलाम सै, वे अपने-अपने मालिक का आदर करै, ताके दुसरे लोग परमेसवर की अर म्हारी शिक्षा की बुराई ना करै।

2 जिनके मालिक विश्वासी सै, वे अपने मालिकों का अपमान ना करै, यो जाणकै के इब तो वे उनके विश्वासी भाई सै, बल्के वे उनकी सेवा और भी ज्यादा मन तै करै, क्यूँके वे जो सेवा तै फायदा टाण लागरे सै, अर उननै वे मसीह म्ह अपने भाईयाँ की तरियां प्यार करै, इन बातों का उपदेश देंदा रह, अर उन ताहीं मानण खात्तर भी उत्साहित करदा रह।

*\*\*\*\*\**

3 जै कोए झूट्टी शिक्षा देवै सै अर खरी शिक्षा नै न्ही मानता, यानिके म्हारे प्रभु यीशु मसीह की शिक्षा अर हुकम नै जिसतै परमेसवर नै महिमा मिलै सै।

4 तो वो घमण्डी सै, अर किमे न्ही जाणदा, बल्के इसा माणस फालतू के मुद्दे अर शब्दों के बारे म्ह बहस करणा चाहवै सै, जिसतै जळण, अर झगड़े, अर बुराई की बात, भुन्डे-भुन्डे शक,

5 अर उन माणसां म्ह बेकार रगड़े-झगड़े पैदा होवै सै, जिनकी अकल खराब हो जा सै, अर वे सच तै दूर हो गये सै, जो समझे सै, के परमेसवर की सेवा करणा कमाई का साधन सै।

6 पर यो म्हारे खात्तर भला सै, के हम वो करा जिसतै परमेसवर खुश होवै सै, अर उससे म्ह सबर करा जो वो म्हारे ताहीं देवै सै।

7 क्यूँके ना हम दुनिया म्ह किमे ल्याए सां, अर ना किमे लेकै जा सकां सां।

8 जै म्हारे धारे खाण अर पैहरण नै हो, तो इन्नै म्ह सबर करणा चाहिये।

9 पर जो साहूकर होणा चाहवै सै, वे हर तरियां के पाप करण के जरिये धोक्खे म्ह पड़े सै, वे एक जानवर की तरियां जाळ म्ह फँस जावै सै, वे उन चिज्जां नै करणा चाहवै सै जो उनके खात्तर बेकूफी अर खतरनाक सै अर येए इच्छा उनके नाश का कारण बण जावै सै।

10 क्यूँके रपियाँ का लोभ सारे ढाळ की बुराई की जड़ सै, जिसनै पाण की कोशिश करदे होए घणखरयाँ नै मसीह की शिक्षा पै विश्वास करणा बन्द कर दिया सै, क्यूँके वे भोत पईसा चाहवै थे, अर उननै अपणे-आप ताहीं कई ढाळ के दुखाँ तै छलनी कर लिया सै ।

~~~~~

11 पर हे तीमथियुस, परमेसवर के जन, तू इन बातताँ तै भाज, अर धर्म, विश्वास, प्यार, धीरज, अर नम्रता कै पाच्छै चाल ।

12 एक आच्छे सिपाही की तरियाँ जो हार न्ही मानता, परमेसवर पै विश्वास करणा अर उसका कहणा मानना ना छोड़ै अर उस अनन्त जीवन नै पा ले, जिसकै खात्तर तू बुलाया गया सै, अर भोत सारे माणसाँ के स्याम्ही तन्नै मान लिया सै, के तू मसीह पै विश्वास करै सै ।

13 मै तेरे ताहीं परमेसवर नै, जो सब नै जीवन दे सै, अर मसीह यीशु नै गवाह मानकै जिसनै पुन्तियुस पिलातुस के स्याम्ही अपणे बारे म्ह बड़ी हिम्मत तै सच बोल्या, यो निर्देश देऊँ सूँ,

14 के जो परमेसवर नै तेरे ताहीं हुकम दिये सै, उन सब ताहीं दिल तै मान, ताके कोए भी तन्नै प्रभु यीशु मसीह के बोहड़ण तक गलत काम म्ह दोषी ना बता सकै ।

15 परमेसवर जो एकमात्र राजा सै, वोए महिमा कै लायक सै, जो राजयाँ का राजा, अर प्रभुओ का प्रभु सै, वो मसीह ताहीं सही बखत पै जाहिर करैगा ।

16 वोए सै जो सदा खात्तर जिन्दा सै, अर वो उस चमकदार रोशनी म्ह रहवै सै, जिसकै धोरै कोए न्ही आ सकदा, अर ना उस ताहीं किसे माणस नै देख्या अर ना कदे देख सकै सै । उसकी प्रतिष्ठा अर राज्य युगानुयुग रहवैगा । आमीन ।

17 इस दुनिया के साहूकाराँ नै आज्ञा दे, के वे घमण्डी ना हों अर अपणे धन पै भरोस्सा ना राक्खै, जो के थोड़े दिन का सै, पर परमेसवर पै भरोस्सा राक्खै, जो उदारता तै सब कुछ देवै सै, जो हमनै चाहिए, ताके हम उसका आनन्द उठा सका ।

18 वे भलाई करै, अर भले काम्माँ म्ह धनी बणै, अर उदार अर मदद करण म्ह त्यार हों ।

19 जै वे इसा करै सै, तो इसा लागै सै, के वे सुर्ग म्ह अपणी सम्पत्ति जमा करण लागरे सै, जो असलियत म्ह खू न्ही सकदी, अर उस ताहीं सच्चा जीवन भी दिया जावैगा, जिसका मतलब सै सदा का जीवन ।

20 हे तीमथियुस, वो सब कुछ करण म्ह सावधान रह, जो परमेसवर नै तेरे ताहीं दिया सै, अर अभगति, बेकूपी भरी बात, अर उस झूटठी शिक्षा तै जो सच्ची शिक्षा के बिरोध म्ह सै, जिन ताहीं वे ज्ञान की बात कहवै सै, उनतै दूर रह ।

21 कई माणसाँ नै इस झूटटे ज्ञान ताहीं अपणालिया सै, अर कहवै सै, के हमनै ज्ञान सै, इसा करण तै वे सच्ची शिक्षा तै दूर हागे सै, मै प्रार्थना करूँ सूँ, के परमेसवर का अनुग्रह उनपै भी अर थारे पै भी होन्दा रहवै ।

तीमुथियुस के नाम प्रेरित पौलुस की दुसरी चिट्ठी

????????

तीमुथियुस के नाम पौलुस प्रेरित की दुसरी चिट्ठी, पौलुस के एक जवान साथी अर मदद करणीये के रूप म्ह काम करणीया तीमुथियुस ताहीं पौलुस की व्यक्तिगत सलाह सै। इसकी खास बात सै धीरता। तीमुथियुस ताहीं सलाह अर होसला देवै सै, के सताव अर बिरोध होण के बाद भी वो बिश्वास योग्यता के साथ यीशु मसीह की गवाही देन्दा रहवै, सुसमाचार अर पुराणे-नियम की सच्ची शिक्षा पै मजबूत बणया रहवै, अर शिक्षक अर प्रचारक के रूप म्ह अपने फर्ज का पालन करदा रहवै। तीमुथियुस ताहीं खास तौर पै “बेवकूफी अर बेकार की बातचीत” म्ह उलझन तै पैदा खतरा के बारे म्ह चेतावनी देई गई सै। इसतै किमे फायदा कोनी होन्दा, पर यो सुणण आळा खात्तर नाश का कारण हो जावै सै। इन सब म्ह, तीमुथियुस नै खुद लेखकां ताहीं अपने जीवन अर मकसद, उसके बिश्वास, सहनशक्ति, प्रेम, धीरज, अर सताव के बखत दुख-के उदाहरण ताहीं याद दिलाया गया सै।

रूप-रेखा

जानकारी 1:1,2

बड़ाई अर उपदेश 1: 3-2:13

सलाह अर चेतावनी 4: 6-18

समापन 4:19-22

????????

1 या चिट्ठी मुझ पौलुस की ओड़ तै सै, परमेसवर नै मेरे ताहीं मसीह यीशु का प्रेरित होण खात्तर चुणया सै, ताके मै यो सन्देश प्रचार कर सकू, के परमेसवर नै अनन्त जीवन देण का वादा करया सै, जो यीशु मसीह पै बिश्वास करण तै मिलै सै।

2 मै तीमुथियुस ताहीं या चिट्ठी लिखूँ सूं, जिसतै मै प्यार करूँ सूं, अर मै प्रार्थना करूँ सूं, के पिता परमेसवर अर म्हारै प्रभु मसीह यीशु की ओड़ तै तन्ने अनुग्रह, दया अर शान्ति मिलदी रहवै।

???????? ?? ???????

3 मै परमेसवर का धन्यवाद करूँ सूं, जिसकी आराधना मै साफ अन्तरात्मा तै उस्से ढाळ करूँ सूं, जिस तरियां मेरे पूर्वज करै थे, मै अपनी प्रार्थनायां म्ह तन्ने दिन रात याद करूँ सूं।

4 मन्ने याद सै के जिव मन्ने थारे ताहीं छोड़के जाणा पड्या था, तो थम मेरे खात्तर किस तरियां रोए थे। मै दिन-रात तेरे तै मिलण की लालसा राखूँ सूं, ताके आनन्द तै भर जाऊँ।

5 मन्ने तेरी माँ यूनिके का खरा बिश्वास भी याद सै, अर तेरी नानी लोइस का भी इसाए बिश्वास था, अर मन्ने पक्का बिश्वास सै के थारा भी बिश्वास उसाए होगा सै।

6 इस्से कारण मै तन्ने याद दुवाऊँ सूं के तू परमेसवर के उस वरदान नै जो मेरै हाथ धरण के जरिये तन्ने मिल्या सै प्रज्वलित करदे।

7 क्यूँके परमेसवर नै म्हारै ताहीं डरपोक न्ही बणाया, बल्के उसका आत्मा म्हारे मन मजबूत बणावै सै, जो म्हारे ताहीं दुसरयां तै प्यार करण म्ह मदद करै सै, अर म्हारे ताहीं अपने-आप पै काबू राखणा सिखावै सै।

8 इस कारण म्हारै प्रभु यीशु मसीह के बारे म्ह लोगगां ताहीं बताण म्ह शर्मिन्दा मत होओ, अर शर्मिन्दा होणा भी न्ही चाहिए, क्यूँके मै उसकी सेवा करण के कारण जेळ म्ह सूं, इसके बजाये थमने उस शक्ति का इस्तमाल करणा चाहिए जो परमेसवर थमने देवै सै, अर सुसमाचार के खात्तर मेरे गेल्या दुख नै सह ल्यो।

9 परमेसवर नै म्हारा उद्धार करया सै, अर म्हारे ताहीं पवित्र जीवन जीण खात्तर बुलाया सै। उसनै म्हारै ताहीं इस कारण कोनी चुण्या के हमनै आच्छे काम करे सै, बल्के अपणी अनुग्रह अर इच्छा के मुताबिक चुण्या सै। उसनै यीशु मसीह ताहीं भेजके म्हारे उपर अनुग्रह दिखाण की योजना दुनिया बणाण तै पैहले ए बणा ली थी।

10 पर इब म्हारै उद्धारकर्ता मसीह यीशु जाहिर होए, अर अपणी करुणा दिखाई, जिसनै मौत की शक्ति ताहीं हरा दिया अर म्हारे ताहीं सुसमाचार के जरिये दिखाया के अनन्त जीवन का एक ए रास्ता सै।

11 जिसके खात्तर परमेसवर नै मेरे ताहीं प्रचारक, प्रेरित, अर उपदेशक भी बणाया।

12 इस कारण मै जेठ म्ह इन दुखां नै भी सहूँ सूँ, पर सरमान्दा कोनी, क्यूँके मै मसीह नै जाणु सूँ, जिसपै मन्नै विश्वास करया सै, अर मन्नै पक्का विश्वास सै के मसीह मेरी उस धरोहर की रक्षा जिब तक कर्दा रहवैगा जिब तक के वो आ ना ले, क्यूँके वो भरोस्समंद सै।

13 जो खरी बात तन्नै मेरे तै सुणी सै, उन ताहीं उस विश्वास अर प्यार के गैल, जो मसीह यीशु म्ह सै, अपना बढ़िया नमूना बणाके राख।

14 अर उस धरोहर की रक्षा करो जो पवित्र आत्मा के जरिये थारे ताहीं सौप्या गया सै, जो म्हारै भित्तर रहवै सै।

15 तन्नै बेरा सै के आसिया परदेस के भोत-से विश्वासी भाईयाँ नै मेरे ताहीं छोड़ दिया सै, जिन म्ह फूगिलुस अर हिरमुगिनेस भी शामिल सै।

16 उनैसिफुरुस के कुणवे पै प्रभु दया करै, क्यूँके वो कई बार मेरे धोरै आया अर उसनै मेरे ताहीं उत्साहित करया अर जेठ म्ह भी मेरे तै मिलण खात्तर आण म्ह शर्मिन्दगी महसूस कोनी करी।

17 पर जिब वो रोम नगर म्ह आया, तो उसनै मेरे ताहीं हरेक जगहां दूढचा, अर दूढ के मेरे तै मिल्या।

18 (प्रभु करै के उस दिन उसपै प्रभु की दया हो)। जिब मै इफिसुस नगर म्ह था, तो उसनै वो सब कुछ मेरे खात्तर करया जिसनै थम भी जाणो सों।

2

???? ???? ?? ?????????? ?????

1 ज्याते हे मेरे बेटे तीमूथियुस, तू उस अनुग्रह म्ह जो मसीह यीशु म्ह सै, मजबूत हो जा।

2 थमनै मेरे ताहीं कई माणसां के स्याम्ही मसीह की शिक्षा के बारे म्ह सन्देस सिखान्दे देख्या होगा। इस करके मै चाहूँ सूँ, के थम उन दुसरे विश्वासियाँ ताहीं भी वोए सन्देस सिखाओ जिन माणसां पै थम भरोस्सा करो सों, जो दुसरयां नै भी वोए सन्देस सीखा सकै।

3 इस्से तरियां एक सैनिक धीरज तै लड़ाई के मैदान म्ह सारे दुख सहवै सै, थमनै भी सारे दुख सहण करणे पडैगें, जिसा हम मसीह यीशु खात्तर सहवां सां।

4 जिब कोए सैनिक लड़ाई पै जावै सै, तो उसका काम अपणे-आपनै दुनियादारी के काम्मां म्ह फसाणा कोनी बल्के उसका काम अपणे भर्ती करण आळे नै खुश करणा सै।

5 जै दौड़ म्ह दौड़ण आळा सही तरीके तै न्ही दौड़ता तो वो ईनाम न्ही पा सकदा।

6 जो किसान मेहनत करै सै, फसल के पैहले हिस्से पै हक उसका सै।

7 या सोच्चों के ये उदाहरण हमनै के सिखाणा चाहवै सै, परमेसवर इन सारी बाततां नै समझण म्ह थारी मदद करै।

8 यीशु मसीह नै याद राख, जो दाऊद की पीढ़ी तै पैदा होया अर जिस ताहीं परमेसवर नै मरे होया म्ह तै जिन्दा करया, अर वोए सुसमाचार सै जिसका हम प्रचार करों सां।

9 क्यूँके मै सुसमाचार सुणाऊँ सूँ, जिसके खात्तर मै भुन्डे काम करणीये की ढाळ दुख ठाऊँ सूँ, उरै ताहीं के कैद भी सूँ, पर कोए भी चीज परमेसवर का सुसमाचार प्रचार करण तै लोग्गां नै रोक न्ही सकदी।

10 इस कारण मै छोट्ट होए माणसां के खात्तर सब कुछ सहूँ सूँ, ताके वे भी यीशु मसीह पै विश्वास करके बच सकै अर अनन्त महिमा नै हासिल कर पावैं ।

11 या बात साच्ची सै, के जै हम मसीह के गेल्या मरगे सां, तो उसकै गेल्या जीवांगें भी ।

12 जै हम उसकै खात्तर दुख सहन्दे रहवांगें, तो उसकै गेल्या राज भी करांगें, जै हम इन्कार करां, के हम उसनै न्ही जानते, तो वो भी कह देवैगा, के वो भी हमनै न्ही जानता ।

13 जै हम विश्वासघाती भी हों, तोभी वो भरोसेमन्द बणा रहवै सै, क्यूँके वो हमेशा अपने सुभाव के मुताबिक काम कर करै सै ।



14 विश्वासियाँ नै ये बात समझा दे, अर प्रभु की मौजूदगी म्ह समझा दे, के शब्दां पै बहस-बाजी ना करया करै, जिसतै कुछ फायदा कोनी होन्दा, क्यूँके यो उन माणसां के उस विश्वास नै नुकसान पुहचा सकै सै जो उननै सुणै सै ।

15 अपने-आपनै परमेसवर का अपनाण जोगगा अर इसा काम करण आळा बणाण की कोशिश कर, जो शर्मिन्दा न्ही होण पावै, अर जो सच के वचन नै सही ढाळ तै समझा सकै ।

16 पर दुनियावी अर बेकार की बाततां तै दूर रह, क्यूँके जो लोग दुनियावी अर बेकार की बाततां म्ह शामिल होवै सै, वे परमेसवर तै और घणे दूर हो जावै सै ।

17 उनकी बातें सड़े घांव की ढाळ फैलदी जावैगी, जो दुसरयां के विश्वास नै कमजोर कर देंगी जो उन बाततां नै सुणै सै, अर हुमिनयुस अर फिलेतुस उनकी तरियां ए सै ।

18 उननै सच्चाई पै विश्वास करणा बन्द कर दिया सै, वे कहवै सै के परमेसवर नै पैहले ए मरे होए विश्वासियाँ ताहीं अनन्त जीवन के खात्तर जिन्दा करया था, इस करके वे कुछ विश्वासियाँ ताहीं कहवै सै, के मसीह पै विश्वास ना करो ।

19 परमेसवर के लोग इसी नीम की ढाळ सै जो हालदी कोनी, अर उस नीम पै या छाप लागरी सै: “प्रभु अपने माणसां ताहीं पिच्छाणै सै,” अर “जो कोए प्रभु का नाम लेवै सै, उसने बुराई करणा छोड़ देणा चाहिए ।”

20 एक बड़े घर म्ह ना सिर्फ सोन्ने-चाँदी ए के, पर काठ अर माट्टी के बासण भी होवै सै, कुछ खास मौकै, अर कुछ रोज के खात्तर इस्तमाल करे जावै सै ।

21 इस्से तरियां जै कोए विश्वासी अपने-आपनै नै इन बुरी चिज्जां तै दूर कर लेवैगा, तो वो माल्लिक के उस उपयोगी बासण की तरियां होवैगा, जो खास मौकका पै इस्तमाल करया जावै सै, वो पवित्र बण जावैगा, अर वो माल्लिक के जरिये हरेक भले काम के खात्तर इस्तमाल करया जावैगा ।

22 जवान्नी की अभिलाषाओं तै दूर भाज्जो, अर उनकी संगति म्ह रहों जो धार्मिकता, विश्वास, प्यार, अर शान्ति का सुभाव राखे सै, जो साफ मन तै परमेसवर नै पुकारै सै ।


23 पर बेकूपी अर अज्ञानता के बहस तै दूर रह, क्यूँके तन्नै बेरा सै के इनतै झगड़े पैदा होवै सै ।

24 प्रभु के दास नै झगड़ालू न्ही होणा चाहिये, पर वो सब के गेल्या नरम अर शिक्षा म्ह निपुण अर सहनशील हों ।

25 वो बिरोधियाँ नै नम्रता तै समझावै, के बेरा परमेसवर उननै इसा मन देवै के वे पाप करणा छोड़ दे ताके वे भी सच नै पिच्छाणै ।

26 अर ये लोग अच्छी तरियां फेर तै सोचचण अर शैतान के धोक्खे तै बचण के लायक हो जावैंगे, अर यो धोक्खा एक फंदे के तरियां सै । शैतान नै उन ताहीं इस खात्तर पकडचा सै, ताके जो वो चाहवै सै वो उनतै करवा सकै ।

3



1 मै इब के कहूँ सूँ, उन बाततां पै ध्यान दे अन्त के दिनां म्ह कष्ट का बखत भी आवैगा ।

2 क्यूँके माणस स्वार्थी, लोभ्मी, डिंगमार, अभिमानी, बुराई करण आळे, माँ-बाप का हुकम टाळण आळे, अहसान-फरमोस, अपवित्तर,

3 निर्दयी, माफ ना करण आळे, दोष लाण आळे, असंयमी, कठोर, भले के बैरी,

4 बिश्वासघाती, द्वीट, घमण्डी, अर परमेसवर के न्ही बल्के सुखविलास ए के चाहण आळे होंगे।

5 वे भगति का भेष तो धरेंगे, पर वे उस शक्ति नै अपनावै कोनी, जो उननै ईश्वरीय बना सकै सै, इसा तै परै रहियो।

6 इन्हे म्ह तै वे माणस सै जो घरां म्ह दवे पाँ बड़ जावै सै, अर उन लुगाईयाँ ताहीं बस म्ह कर लेवै सै, जो पापां तै दबी अर हरेक ढाळ की अभिलाषायां कै बस म्ह हो सै।

7 अर वे हमेशा नई बात सिखदी तो रहवै सै, पर सच की पिच्छाण तक कदे न्ही पोहोचदी।

8 जिस तरियां यत्रेस अर यम्ब्रेस* नै मूसा नबी का बिरोध करया था, उस्से तरियां ए ये भी सच का बिरोध करै सै, ये इसे माणस सै, जिनकी बुद्धि भ्रष्ट होगी सै अर वे बिश्वास कै बारै म्ह निकम्मे सै।

9 उनकी कामयाबी थोड़े बखत की थी, क्यूँके जिस तरियां माणसां नै मान लिया के यत्रेस अर यम्ब्रेस बेकूफ थे, अर हर कोए यो स्वीकार कर लेगा के वे बेकूफ सै।

????????? ?????? ??? ?????????

10-11 पर तन्नै उपदेश, चाल-चलण, मनसा, बिश्वास, सहनशीलता, प्यार, धीरज, अर सताए जाण, अर दुख ठाण म्ह मेरा साथ दिया, अर इसे दुखां म्ह भी जो अन्ताकिया नगर अर इकुनियुम अर लुम्त्रा नगरां म्ह मेरै पै आण पड़े थे, अर दुसरे दुखां म्ह भी जो मन्ने ठाए सै, पर प्रभु नै मेरै ताहीं उन सारया तै छुटा लिया।

12 पर जितने मसीह यीशु म्ह भगति कै गेल्या जीवन बिताणा चाहवै सै वे सारे सताए जावेंगे।

13 पर द्रुष्ट अर भकाण आळे बिगड़े चले जावेंगे, वे दुसरयां नै धोक्खा देवेंगे, अर खुद दुसरयां तै धोक्खा खावेंगे।

14 थमनै बिश्वास करते रहणा चाहिए जो हमनै थारे ताहीं सिखाया सै, क्यूँके थम हमनै जाणो सों, अर म्हारे पै भरोस्सा कर सको सों जिननै थारे ताहीं ये बातें सिखाई सै।

15 जिव थम छोटे बाळक थे, जिव तै ए थमनै अपणे पवित्तर ग्रन्थां म्ह सिख्या सै, जो थारे ताहीं या समझण म्ह मदद करै के जिव थम मसीह यीशु म्ह बिश्वास करो सों तो परमेसवर थमनै बचावै सै।

16 साबता पवित्तर ग्रन्थ परमेसवर की प्रेरणा तै रच्या गया, अर म्हारे ताहीं सिखाण खात्तर उपयोगी सै, के सच के सै, अर म्हारे ताहीं यो महसूस करण खात्तर के म्हारी जिन्दगी म्ह के गलत सै। यो म्हारी गलतियाँ नै सुधारै, जिव हम गलत होवां सां, अर वोए करणा सिखावै सै जो सही सै।

17 ताके परमेसवर का जन हरेक भले काम करण खात्तर तयार अर सिध्द बण जावै।

4

1 जिव मसीह यीशु राजा के रूप म्ह शासन करण खात्तर आवैगा, तो वो उन जिन्दे अर मरे होए माणसां का न्याय करैगा जो मर चुके सै, तो गवाह के रूप म्ह परमेसवर अर मसीह कै साथ, मै ईमानदारी कै साथ थारे तै आग्रह करूँ सूँ।

2 के तू परमेसवर के वचन का प्रचार कर, परमेसवर के वचन ताहीं सुणाण खात्तर सदा तैयार रह, चाहे लोग इस ताहीं सुणाणा चाहवै या ना चाहवै, ताके थम माणसां नै दिखा सको, के जो उननै करया सै, वो गलत करया सै, अर उनके पापां खात्तर उन ताहीं डाट सको, पर थम माणसां नै उत्साहित भी करो जिव थम उननै बड़े धीरज तै सिखाओ सों।

* 3:8 3:8 यत्रेस अर यम्ब्रेस इनके बारें म्ह निर्गमन की किताब पढ़े

3 क्यूँके इसा बखत आवैगा जिब माणस खरयां उपदेश न्ही सह सकैगें, पर अपनी ए इच्छा पूरी करैगें अर वे अपने खात्तर कई उपदेशक कट्टे करैगें जो उपदेश वे सुणणा चाहवै सै उन ताहीं वे बतावैगें।

4 अर वे सच्चाई नै अणदेखा कर देवैगें, अर झूठ्ठी कथा-कहाँनियाँ पै मन लगावैगें।

5 धमनै हरेक बखत अपने-आप पै काबू राखणा चाहिए, दुख ठा, सुसमाचार प्रचार का काम कर, अर परमेसवर के जरिये दी गई सेवा नै पूरी कर।

6 जै वे मन्नै मार भी देवैगें, तो मेरी जिन्दगी परमेसवर ताहीं चढ़ाई गई एक भेट की तरियां होगी। इस दुनिया ताहीं छोड़ण का इब मेरा बखत आ लिया सै।

7 मन्नै मसीह की सेवा करण खात्तर कड़ी मेहनत करी सै, मन्नै अपनी दौड़ पूरी कर ली सै, मन्नै आखरी तक उसपै विश्वास करया।

8 आण आळे बखत म्ह प्रभु मेरै ताहीं मुकुट देवैगा, जो के धार्मिकता का मुकुट सै, वो जो सच्चा न्याय करै सै, अर मन्नै वो ईनाम देवैगा जिब बोहड़ के आवैगा बल्के मेरे ताहीं ए न्ही उन सब ताहीं भी देवैगा, जो उसके दुबारा आण की बाट बड़ी आस तै देखण लागरे सै।

XXXXXXXXXX XXXXX

9 मेरै धारे तावळा आण की कोशिश कर।

10 क्यूँके देमास नै इस दुनिया की चिज्जां तै प्यार करया सै, अर मेरै ताहीं छोड़ दिया सै, अर वो थिक्सलुनीके नगर म्ह चल्या गया सै। क्रेसकेस, गलातिया नगर की ओड़ चल्या गया अर तीतुस दलमतिया परदेस कान्ही चल्या गया सै।

11 सिर्फ लूका मेरै गैल सै। मरकुस नै लेकै चल्या आ, क्यूँके वो मेरे काम करण म्ह मेरी मदद करैगा।

12 तुखिकुस ताहीं मन्नै इफिसुस नगर म्ह भेज्या सै।

13 जो चोल्ला, मै, त्रोआस नगर म्ह करपुस के घर छोड़ आया सूं, जिब तू आवै तो उस ताहीं अर उस किताब ताहीं भी लेंदे आईये, खास करके चर्मपत्रों* नै।

14 सिकन्दर ठठेरे नै मेरा बड़ा नुकसान करया सै, प्रभु उस ताहीं उसके काम्मां के मुताबिक बदला देवैगा।

15 नू भी उसतै चौकन्ना रह, क्यूँके उसनै म्हारी शिक्षायां का घणाए बिरोध करया सै।

16 पैहली बार मै खुद नै बचाण खात्तर अदालत गया, कोए भी मेरे गैल न्ही था, पर सब नै मेरे ताहीं छोड़ दिया, परमेसवर इस बात का दण्ड उननै ना देवै, मै प्रार्थना करूँ सूं, मेरे ताहीं छोड़ण के कारण उन ताहीं परमेसवर माफ करदे।

17 पर मेरे गैल मेरा प्रभु मददगार रहया, मेरे जरिये सन्देश की घोषणा पूरी तरियां सम्पन्न हो जावै अर उरै जितने भी गैर यहूदी लोग मौजूद सै, ये बात सुण ले, के उसनै मेरे ताहीं मौत के मुँह म्ह तै छुड़ाया।

18 अर प्रभु मन्नै हरेक भुन्डे काम तै छुड़ावैगा, अर वो अपने सुर्गीय राज्य म्ह सही-सलामत ले जावैगा। उस्से की महिमा युगानुयुग होन्दी रहवै। आमीन।

XXXXXXXXXX XXXXX

19 पिरसकिल्ला अर उसका धणी अक्विला अर उनेसिफुरुस के कुणबे नै मेरी ओड़ तै नमस्कार।


20 इरास्तुस कुरिन्थुस नगर म्ह रह गया, अर त्रुफिमुस ताहीं मन्नै मीलेतुस नगर म्ह बीमार छोड़्या सै।

21 जाड्डे तै पैहल्या चले आण की कोशिश कर। यूबलुस, अर पूदेंस, अर लीनुस अर क्लौदीया, अर सारे विश्वासी भाईयां की ओड़ तै तन्नै नमस्कार।

22 मै प्रार्थना करूँ सूं, के प्रभु तेरी आत्मा के गैल रहवै। धारे पै अनुग्रह होंदा रहवै।

* 4:13 4:13 चर्मपत्रों चमड़े की बणी चिट्ठियां सै

तीतुस के नाम प्रेरित पौलुस की चिट्ठी



तीतुस एक गैर यहूदी विश्वासी था, जो पौलुस के प्रचार के काम में उसका साथी अर मददगार बण गया था। तीतुस के नाम पौलुस प्रेरित की चिट्ठी करते में रहणीये पौलुस के इस जवान साथी के सम्बन्ध में है, जिसने ओडै कलीसिया के काम की जाँच करण खात्तर छोड़ गया था। या चिट्ठी तीन भोत खास बातों नै दिखावै सै। पैहल्या, तीतुस नै यो याद करावै सै के कलीसिया के अगुवां का चाल-चलण किस तरियां का होणा चाहिए, खासकर भोत-से करेती माणसां के बुरे चाल-चलण नै देखदे होए उनतै यो सब कह्या गया सै। दुसरा, तीतुस नै या सलाह देवै सै, के कलीसिया में हाजिर कई झुण्डां नै किस तरियां की शिक्षा दी जावै, मतलब बूढ़े माणस, बूढ़ी बिरबानियाँ नै (जो जवान बिरबानियाँ नै शिक्षा दे), जवान्ना नै, अर दास। तीसरा, लेखक तीतुस नै मसीह चाल-चलण के बारे में सलाह देवै सै, खास करके शांतिपूर्ण अर मित्र बणण के खात्तर, अर नफरत, वाद-विवाद अर कलीसिया में दलबन्दी तै बचण खात्तर।

रूप-रेखा

जानकारी 1:1-4

कलीसिया के अगुवे 1:5-16

उपदेश अर चेतावनी 3:1-11

समापन 3:12-15



1 या चिट्ठी मुझ पौलुस की ओड़ तै सै, जो परमेसवर का दास अर यीशु मसीह का प्रेरित सै, मै इस करके भेज्या गया सूं ताके उन माणसां के विश्वास नै स्थापित कर सकूं जिन ताहीं परमेसवर नै चुण्या सै, अर उन ताहीं सीखा सकूं के वो उस सच्चाई नै जान सकें, जो उन ताहीं दिखा सकें के पवित्र जिन्दगी किस तरियां जीणी सै।

2 वे हमेशा के खात्तर परमेसवर के साथ रहण की आस करै सै, क्यूँके परमेसवर, जो कदे झूठ न्ही बोल्दा, उसने दुनिया बणाण तै पैहले वादा करया था के उसके लोग हमेशा खात्तर जिन्दा रहवेंगे।

3 अर ठीक बखत पै परमेसवर नै यो सुसमाचार म्हारे पै जाहिर करया, अर हमने यो सुसमाचार सारया ताहीं सुणाया। परमेसवर जो म्हारा उद्धारकर्ता सै, उसने मेरे ताहीं या जिम्मेदारी दी सै, अर अपना काम करण खात्तर मेरे ताहीं उसने हुकम दिया सै।

4 मै या चिट्ठी तीतुस नै लिखूं सूं, मसीह पै विश्वास करण के नाते तू मेरे आत्मिक बेटे की तरियां सै, मै प्रार्थना करूं सूं, के पिता परमेसवर, अर म्हारै उद्धारकर्ता प्रभु मसीह यीशु की ओड़ तै तन्ने अनुग्रह, दया अर शान्ति मिलदी रहवै।



5 मै इस करके तन्ने करते टापू में छोड़ आया था, ताके तू ओड़ै उस काम नै खतम कर सकै जो अधूरा रह गया था, अर मेरे हुकम के मुताबिक उस टापू के हरेक नगर में कलीसिया के अगुवां नै तैयार कर सकै, जिंसा मन्ने कह्या सै।

6 अगुवां बेकसूर अर एके पत्नी का पति हो, जिनके बाळक विश्वासी हो, अर उन में लुचपण अर निरंकुशता का दोष ना हो।

7 क्यूँके अगुवां, नै परमेसवर का भण्डारी होण के कारण बेकसूर होणा चाहिए, ना जिद्दी, ना गुसेल, ना पियक्कड़, ना मारपीट करण आळा, ना नीच कमाई का लोभी हो,

8 पर मेहमान का आदर करण आळा, भलाई का चाहू आळा, अपने-अपने में रहण आळा, न्यायकारी, पवित्र अर अपने मन नै काबू राखण आळा हो।

9 वो यीशु मसीह के सन्देश के बारे में मजबूती तै बिश्वास करदा हो, जो हमनै थारे ताहीं सिखाया सै, अर वो दुसरयां ताहीं उत्साहित कर सकै, ताके वे सही शिक्षा का पालन कर सकै, अर उन ताहीं भी समझा सकै जो सही शिक्षा का बिरोध करै सै।

10 क्यूँके भोत-से माणस सही शिक्षा के विरुद्ध खड़े होवेंगे, जो बेकार की बात सिखावै सै अर जो दुसरयां ताहीं धोक्खा देवै सै, उन म्ह तै कुछ लोग यहूदी सै जो बिश्वासी बणगे सै।

11 इन माणसां ताहीं सिखाण का मौक्का न्ही देणा चाहिए, क्यूँके वे इसी शिक्षा देवै सै जो उन ताहीं देणी न्ही चाहिए, अर ये पूरे घराने का बिश्वास खतम कर देवै सै, अर वे यो इस खात्तर करै सै ताके उन ताहीं परईसे मिल सकै।

12 उन म्ह तै एक जण्यै नै, जो उनका नबी सै, कह्या सै, “करेते नगर का माणस जिस ताहीं वे नबी मान्ने सै उसनै करेती के माणस के बारे में कह्या, के ये सदा झूठ बोल्लै सै, ये जंगली-जानवरों की तरियां बरताव करै सै, ये आलसी होवै सै अर ये भोत पेट्टू सै।”

13 या बात करेती माणसां के बारे में सच सै, इस करके उननै सखताई तै चैतावनी दिया कर, के वे यीशु मसीह की सच्ची शिक्षा पै बिश्वास करै।

14 अर यहूदिया की कथा कहानियाँ अर माणसां के हुकम पै मन ना लगावै, जो सच तै भटक जावै सै।

15 वे माणस जिनके मन म्ह कोए पाप कोनी, उनके खात्तर सारी चीज शुद्ध सै, पर उन माणसां खात्तर जो बुरे सै, अर जो मसीह यीशु पै बिश्वास कोनी करते, उन खात्तर कोए भी चीज शुद्ध कोनी, वे हर बखत बुरे काम करै सै, क्यूँके उनका मन पूरी तरियां अशुद्ध हो लिया सै।

16 ये झूठे शिक्षक कहवै सै, के हम परमेसवर नै जाणा सां, पर उनके काम दिक्खै सै, के वो परमेसवर ताहीं न्ही जानते क्यूँके वे घृणित अर हुकम ना मानण आळे सै, अर किसे आच्छे काम के लायक कोन्या।

2



1 पर तीतुस तरे खात्तर योए सही सै के तू बिश्वासियाँ ताहीं वोए सीखा जो सच्ची शिक्षा के मुताबिक हो।

2 यानी के बूढ़े माणस शान्त गम्भीर अर संयमी हो, अर उनका बिश्वास, प्यार अर धीरज पक्का हो।

3 इस ढाळ बूढ़ी बिरबानियाँ का बरताव इसा हो के परमेसवर नै महिमा मिलै, वे लाच्छण लगाण आळी अर पियक्कड़ न्ही हो, पर आच्छी बात सिखाण आळी हो।

4 जवान बिरबानियाँ नै तीतुस तै न्ही बल्के बूढ़ी बिरबानियाँ तै निर्देश पाणा चाहिए, ताके वो उन ताहीं सीखा सकै किस तरियां अपने धणी अर बाळकां तै प्यार करै।

5 अर वे मन पै काबू राक्खण आळी, पतिव्रता, घर का कामकाज सम्भाळण आळी, भली अर अपने-अपने धणी के प्रति बिश्वास लायक हो, ताके कोए परमेसवर के वचन की बुराई ना कर सकै।

6 इसे तरियां जवान माणसां नै भी समझाया कर, के वे खराई तै चाल्लण आळे हो।

7 हरेक काम म्ह तू अपने आच्छे बरताव तै दुसरयां खात्तर एक मिसाल बण जा, जिव तू बिश्वासियाँ ताहीं परमेसवर के बारे में सिखावै सै, तो उन ताहीं आच्छे मकसद तै सीखा, अर इसा सीखा ताके लोग तेरा आदर कर सकै।

8 तेरी शिक्षाओं म्ह हमेशा सच्चाई हो, जिसकी आलोचना ना हो सकै, जिसतै बिरोधी नै म्हारै म्ह कोए दोष लगाण का मौक्का ना मिलै अर वो खुद पै शर्मिन्दा हो जावै।

9 नौकरां नै समझा के अपने-अपने माल्लिक के कह्ये म्ह रहवै, अर सारी बाततां म्ह उसनै राज्जी राक्खै, अर उल्ट के जवाब ना दे।

10 चोरी चलाकी ना करो, अर हमेशा यो दिक्खै के वो विश्वास लायक सै, अर थारे आच्छे सुभाव नै देखकै, वे भी म्हारे उद्धारकर्ता परमेसवर की शिक्षा ताहीं सुणणा चाहवैगें।

11 परमेसवर नै अपना अनुग्रह इस बात म्ह जाहिर करया के उसनै मसीह यीशु ताहीं म्हारा उद्धारकर्ता बणाकै भेज दिया, ताके हरेक माणस बचाए जा सकै।

12 अपनी दया के कारण परमेसवर म्हारे ताहीं सिखावै सै, के हम उन तरिककां तै बरताव करणा बन्द कर द्या, जो उस ताहीं खुश न्ही कर सकदे, अर इसी लालसा ना राक्खा जिसी अविश्वासी लोग राक्खै सै, पर बुध्दिमानी अर धार्मिकता तै बरताव करां, अर इसा बरताव करा जो परमेसवर नै पसन्द हो, जिव तक हम दुनिया म्ह रहवां।

13 हम इस तरिकके तै बरताव करा, जिसा के हम उस अदभुत दिन की बाट देखदे हो, जिसकी हम आस राक्खां सां, यो वो दिन सै जिव यीशु मसीह जो म्हारा परमेसवर अर उद्धारकर्ता सै बड़ी महिमा म्ह इस दुनिया म्ह बोहड़ के आवेगा।

14 इस मसीह यीशु नै अपने-आप ताहीं म्हारे पापां खात्तर बलिदान कर दिया, ताके हम सारे पापां तै आजाद हो जावां, अर म्हारे ताहीं शुद्ध करया ताके हम उसके अपने खास माणस बण जावां, जो भले काम करण की बड़ी इच्छा राक्खै सै।

15 पूरे अधिकार के गैल इन सारी बाततां की शिक्षा देते होए लोगगां नै समझा अर उत्साहित करदा रह, अर कोए तन्नै तुच्छ न्ही जाणण पावै।

3

२२२२ २२२-२२२

1 विश्वासियां नै याद दुआ के हाकिमां अर अधिकारियां का आदर कर, अर उनका हुकम मान्नै, अर दुसरयां का भला करदे रहो।

2 किसे नै बदनाम ना करै, अर ना झगड़ालू बणै, पर दुसरे माणसां के खात्तर दया दिखाण आळे बणो, अर सारे माणसां के गैल बड़ी नरमाई के गैल रहवै।

3 क्यूँके हम भी पैहल्या बेअकल, परमेसवर का हुकम ना मानण आळे, भ्रम म्ह पड़े होए अर न्यारी-न्यारी ढाळ की बुरी अभिलाषा अर सुखभोगण की गुलामी म्ह, अर बैरभाव अर माणसां के प्रति जळण करण म्ह जीवन बिताण लागरे थे, हम घृणा के लायक माणस थे, अर हर कोए म्हारे तै घृणा करै था, अर हम भी उनतै घृणा करा थे।

4 पर फेरभी परमेसवर जो म्हारा उद्धारकर्ता सै उसनै अपनी दया अर प्यार हम माणसां पै दिखाया।

5 उसनै म्हारे ताहीं पापां के दण्ड तै बचाया, अर यो धार्मिक काम्मां के जरिये न्ही होया जो हमनै खुद करे, पर उसनै म्हारे पै दया करी। उसनै म्हारे ताहीं पवित्र आत्मा देण के जरिये बचाया, जो म्हारे पापां नै माफ करै सै, अर हमनै नई जिन्दगी अर नया सुभाव देवै सै।

6 परमेसवर नै मुफ्त म्ह पवित्र आत्मा दिया ताके वो म्हारे म्ह सामर्थी रूप तै काम करै क्यूँके मसीह यीशु म्हारे पापां खात्तर मरया अर म्हारा उद्धारकर्ता बण गया।

7 ताके हम अनन्त जीवन की आस राक्ख सका, जिसका परमेसवर नै अपने माणसां ताहीं देण का वादा करया सै, अर हमनै उसपै पूरा भरोस्सा सै, क्यूँके वो अपनी करुणा के मुताबिक म्हारे ताहीं धर्मी बणावै सै।

8 या बात सच सै, अर मै चाहूँ सूँ, के तू इन बाततां के बारे म्ह मजबूती तै बोल्लै इस करके के जिननै परमेसवर पै विश्वास करया सै, वे भले काम करण खात्तर हमेशा ध्यान लगावैगें। ये बात भली अर माणसां के फायदे की सै।

9 पर बेवकूफी के विवादों, पीढियाँ, विरोध अर झगड़ा तै जो मूसा नबी के नियम-कायदा के बारे म्ह हो, इनतै बचा रह, क्यूँके वे फायदेमन्द कोनी बल्के बेकार सै।

10 तू उन माणसां नै एक दो बार समझा जो कलीसिया म्ह फूट गेरे सै, अर उन ताहीं इसा करण तै मना कर, उसके बाद उनपै और बखत बरबाद ना करै।

11 तन्नै पक्का बेरा सै, के इस ढाळ का माणस भटक गया सै, अर अपणे काम्मां के जरिये दोषी टहराया जावैगा।

?????????? ??????? ? ? ???????

12 जब मे तेरे धोरे अरतिमास या तुखिकुस ने भेज्जूं तो मेरे धोरे निकुपुलिस नगर आण की कोशिश करिये, क्यूँके मन्नै ओड़ै जाइडा लिकाइण का मन बनाया सै।

13 जेनास वकील अर अपुल्लोस जै सफर खात्तर आगै जावै, तो जो मदद थम उनकी कर सको तो वा जरूर करियो।

14 इतणाए न्ही बल्के तू विश्वासियाँ नै यो सीखा, के वो अपना ध्यान कड़ी मेहनत करण म्हा लगावै, ताके उन माणसां खात्तर जिनके धोरे सै कोनी उनकी जरूरत पूरी हो सकै, अर वे एक अच्छे मकसद के साथ जिन्दगी जी सकै।

15 मेरे सारे साथियाँ की ओड़ तै तेरे ताहीं नमस्कार। जो विश्वास के कारण म्हारै तै प्यार करै सै, उननै भी नमस्कार। थारे सारया पै परमेसवर का अनुग्रह होंदा रहवै।

फिलेमोन के नाम प्रेरित पौलुस की चिट्ठी



फिलेमोन एक खास विश्वासी था, जो इसा लाग्गै सै के वो कुलुस्से की कलीसिया का सदस्य था, अर उनेसिमुस नाम का एक गुलाम का मालिक था। यो गुलाम अपने मालिक के धोरे तै भाग गया था, अर फेर किसे तरियां पौलुस ताहीं मिल्या, जो उस बखत जेठ म्ह था। पौलुस के जरिये, उनेसिमुस एक विश्वासी बन गया। फिलेमोन के नाम पौलुस प्रेरित की चिट्ठी फिलेमोन सै यो बिनती कर सै, के वो अपने दास तै दुबारा मेळ-जोळ करले, अर उसने पौलुस फेर तै उसके धोरे भेज्जै सै, अर उस ताहीं माफ करे गए एक दास के रूप म्ह ए न्ही पर एक विश्वासी भाई के रूप म्ह उसका स्वागत करै।

रूप-रेखा

जानकारी 1-3 फिलेमोन की बड़ाई 4-7

उनेसिमुस के खात्तर बिनती 8-22

समापन 23-35



1 या चिट्ठी मुझ पौलुस, की ओड़ तै सै, जो मसीह यीशु का कैदी सै। हे फिलेमोन, मेरी अर विश्वासी भाई तीमुथियुस की ओड़ तै तन्ने नमस्कार। तू म्हारा प्यारा मित्र अर मसीह के काम करण म्ह म्हारा साइद्दीदार सै।

2 मै भाण अफिया, अर अरखिप्सुस ताहीं जो परमेसवर की सेवा एक सिपाही की तरियां करण लागर्या सै, अर उस कलीसिया नै भी लिखूं सू, जो फिलेमोन के घर म्ह कट्ठी हो सै।


3 मै प्रार्थना करूं सू, के म्हारे पिता परमेसवर अर प्रभु यीशु मसीह की ओड़ तै थमनै अनुग्रह अर शान्ति मिलती रहवै।

4 मै जब भी थारे खात्तर प्रार्थना करूं सू, तो मै सारी हाण थारे खात्तर परमेसवर का धन्यवाद करूं सू।

5 मै प्रभु यीशु मसीह पै थारे विश्वास अर परमेसवर के पवित्र माणसां के प्रति प्यार के बारे म्ह सुणदा रहूं सू।

6 मै प्रार्थना करूं सू, के जो विश्वासियाँ गैल थारी साझेदारी सै, उन भली चिज्जां के जाणण के जरिये जो परमेसवर नै म्हारे ताहीं दी सै, वा और घणी बढ़ती जावै। अर या म्हारे मसीह की महिमा खात्तर हो।

7 क्यूँके हे विश्वासी भाईयो, मै भोत खुश सू, अर मेरे प्रति थारे प्यार तै मै घणा उत्साहित सू, अर इस कारण पवित्र माणसां नै घणी खुशी मिली सै।



8-9 जो हक मेरे ताहीं मसीह नै दिया सै, उसकी बजह तै मै थमनै हुकम दे सकूं सू, के थमनै के करण की जरूरत सै, पर मै इसा कोनी करूं, मै पौलुस, बुजुर्ग माणस होण के नाते अर मसीह यीशु का कैदी होण के कारण थारे तै प्यार तै बिनती करूं सू।

10 मेरी बिनती या सै के उनेसिमुस जो मेरे बाळक की तरियां सै, वो मसीह म्ह मेरा आत्मिक बेटा जिब बण्या जिब मै कैद म्ह था, थम उसपै दया करियो।

11 वो तो पैहला तेरे किमे काम का ना था, पर इब तेरे अर मेरे दोनुआ के खात्तर बड़े काम का सै।

12 उससे नै यानी जो मेरे दिल का टुकड़ा सै, मै तेरे धोरे भेज्जू सू।

13 उसनै मै अपने ए धोरे राखणा चाहूं था, ताके वो तेरी जगहां मेरी मदद कर सकै, जिब के मै मसीह का सुसमाचार सुणाण के खात्तर कैद म्ह सू।

14 पर मन्ने तेरी इच्छा बगैर कुछ भी नही करणा चाह्या। मै चाहूँ था के तू मेरी मदद मजबूरी म्ह नही पर खुद की इच्छा तै खुशी तै करै।

15 हो सकै सै के परमेसवर नै उनेसिमुस ताहीं, तेरे तै इस करके थोड़े बखत खात्तर दूर जाण का मौक्का दिया, ताके वो मसीह पै बिश्वास कर सकै, अर उसकी बजह तै तू सदा खात्तर उसनै पा लेवै।

16 पर इब वो तेरा दास ए कोनी बल्के दास तै भी बढकै, यानी बिश्वासी भाई सै। मै उसतै भोत प्यार करूँ सूँ, पर इब तू मेरे तै भी ज्यादा उसतै प्यार कर, दास की तरियां नही, पर बिश्वासी भाई की तरियां।

17 इस करके जै तू मन्ने अपणा साझीदार समझे सै, तो उनेसिमुस जिब थारे धोरै बोहड़ के आवैगा, तो उसनै प्यार तै अपणा लियो, जिस तरियां थम मन्ने अपणाओ सो।

18 जै उसनै तेरा कुछ भी नुकसान करया सै, या उसपै तेरा कुछ कर्ज सै, तो आकै दे दियुँगा।

19 मै पौलुस अपण हाथ तै लिखूँ सूँ, के उसका कर्जा मै आप दे दियुँगा, तू खुद जाणै सै, जै मै तेरी मदद नही करदा, तो तन्नै नई जिन्दगी नही मिलती, इस करके तू जिन्दगी भर मेरा कर्जदार सै।

20 हे मेरे प्यारे भाई, मेरे खात्तर योए कर क्यूँके हम बिश्वासी भाई सां, अर तेरे इसा करण तै मै मसीह म्ह उत्साहित हो जाऊँगा।

21 मै तेरे पै भरोस्सा करके तेरे तै लिखूँ सूँ, अर या जाणु सूँ के जो कुछ मै कहूँ सूँ, तू उसतै घणा बढकै करैगा।

22 अर या भी कै मेरे खात्तर रुकण की जगहां तैयार राक्खै। मन्ने उम्मीद सै, के परमेसवर थारी प्रार्थनायां का जवाब देवैगा, अर मै थारे धोरै आकै थमनै देख पाऊँगा।

~~~~~

23 इपफ्रास, जो मेरे गैल जेळ म्ह कैद सै, क्यूँके वो यीशु मसीह की सेवा करै सै थारे ताहीं नमस्कार कहवै सै।

24 अर मरकुस, अरिस्तर्खुस, देमास अर लूका जो मेरे गैल परमेसवर का काम करणीये सै, इनका भी तेरे ताहीं नमस्कार।

25 मै प्रार्थना करूँ सूँ, के म्हारे प्रभु यीशु मसीह का अनुग्रह थारे साथ होंदा रहवै। आमीन।

इब्रानियों के नाम चिट्ठी



इब्रानियों के नाम चिट्ठी विश्वासियों के एक झुण्ड ताहीं लिखी गई सै, जो बढ़ते होए विरोध के कारण, अपने मसीह विश्वास नै छोड़ण के खतरे म्ह थे। लेखक उननै अपने विश्वास म्ह बणे रहण के खात्तर हिम्मत बढ़ावै सै, खास तौर पै यो दिखान्दे होए के यीशु मसीह ही परमेसवर का सच्चा अर आखरी प्रकाशन सै। इसा करते बखत वो तीन सच्चाईयाँ पै जोर देवै सै: (1) यीशु ए परमेसवर का सच्चा बेट्टा सै, उसनै दुख ठा-ठाकै पिता की सच्ची आज्ञाकारिता सीक्खी। परमेसवर के बेट्टे के रूप म्ह यीशु पुराणा-नियम के नबियों, सुर्गदूतां, अर खुद मूसा तै भी बढ़कै सै। (2) यीशु परमेसवर के जरिये अंत काल का महायाजक बणाया गया सै, पुराणे-नियम के महायाजक के रूप म्ह सच्चा मुक्ति देणिया सै, यहूदी धर्म की धर्म-विधियाँ अर पशु बलि के जरिये जिनका मात्र पैहले तै ए जिक्र मिलै सै। इसराएली इतिहास के कुछ नाम्मी माणसां के विश्वास के उदाहरणा नै पेश करदे होए (पाठ 11), लेखक अपने पाठकां तै विश्वास म्ह बणे रहण की बिनती करै सै, और 12 वे पाठ म्ह वो अपने पाठकां तै बिनती कर सै, के अन्त ताहीं विश्वास म्ह बणे रहो अर अपनी आँख यीशु पै लगाई राक्खो, अर जो दुख और सताव उनपै आवै सै उसनै धीरज तै सह ल्यो। या चिट्ठी कुछ सलाह अर चेतावनी के साथ खतम हो सै।

रूप-रेखा

जानकारी : मसीह, परमेसवर का पूर्ण प्रकाशन 1:1-3

मसीह, सुर्गदूतां तै भी श्रेष्ठ सै 1:2-18

मसीह, मूसा अर यहोशू तै श्रेष्ठ सै 3:1-4:13


मसीह के याजक के पद की श्रेष्ठता 4:14-7:28

मसीह के करार की श्रेष्ठता 8:1-9:28

मसीह की कुरबान्नी की श्रेष्ठता 10:1-39

विश्वास की श्रेष्ठता 11:1-12:29

आखरी उपदेश अर समापन 13:1-25



1 पैहल्ले युग म्ह परमेसवर नै म्हारे पूर्वजां तै भोत बार अर अलग-अलग ढाळ तै नबियाँ के जरिये बात करी।

2 पर इन आखरी के दिनां म्ह म्हारै तै, अपने बेट्टे के जरिये बात करी। परमेसवर नै सारी सृष्टि की रचना अपने बेट्टे के जरिये करी अर उसनै उस ताहीं सारी चिज्जां का वारिस बणाया।

3 बेट्टा ए परमेसवर की महिमा का चाँदणा सै अर उस म्ह हम देख्वां सां, के वो किसा सै, अर सारी चिज्जां नै अपने शक्तिशाली हुकम तै सम्भाळै सै। वो माणसां के पापां की माफी का कारण बणया, अर ऊँच्ची जगहां पै महिमामय के सोळी ओड़ जा बेटथा,

4 इसा कारण तै सुर्गदूतां तै उतनाए बढ़िया ठैहराया, जितना उसनै बड़े ओदे का उसका पद सुर्गदूतां तै ऊँच्चा ठैहराया।



5 क्यूँके परमेसवर नै कदे किस सुर्गदूत तै न्ही कह्या, के “तू मेरा बेट्टा सै, आज मै घोषणा करूँ सूँ के, तू मेरा बेट्टा सै” अर सुर्गदूतां म्ह तै उसनै कद किस तै कह्या, के “मै उसका पिता होऊँगा, अर वो मेरा बेट्टा होवैगा?”

6 अर जिब परमेसवर नै अपने जेट्टे बेट्टे ताहीं इस दुनिया म्ह भेज्या, तो कहवै सै, “परमेसवर के सारे सुर्गदूत उस ताहीं मोध्धे मुँह पड़के प्रणाम करे।”

7 अर सुर्गदूतां के बारै म्ह न्यू कहवै सै, “वो अपणे सुर्गदूतां ताहीं हवा, अर अपणे सेवकां नै भड़कदी होई आग बणावै सै।”

8 पर बेट्टे के बारै म्ह कहवै सै, “हे परमेसवर, उसका राज युगायुग रहवैगा, तेरे राज्य का राजदण्ड न्याय का राजदण्ड सै।

9 तन्ने धर्म तै प्यार अर अधर्म तै बैर राख्या, इस कारण परमेसवर, तेरे परमेसवर नै, तेरे साथियाँ तै बढ़कै हर्षरूपी तेल तै तेरा अभिषेक करया।”

10 अर यो के, “हे प्रभु, शरुआत म्ह तन्ने धरती अर जो कुछ अकास म्ह सै उन ताहीं बणाया, अर सुर्ग तेरे हाथ्यां की कारीगरी सै।

11 वे तो नाश हो जावैगे, पर तू सदा खात्तर जिन्दा रहवैगा, अर वे सारे लत्ते की ढाळ पुराणे हो जावैगे,

12 अर तू उन ताहीं चादर की तरियां लपेटैगा, अर वे लत्ते की ढाळ बदल जावैगे पर तू कदे न्ही बदलैगा, अर तू सदा खात्तर जिन्दा रहवैगा।”

13 अर सुर्गदूतां म्ह तै उसनै किसतै कद कह्या, “तू मेरै सोळी ओड़ बैठ, यानी के तू हक की जगहां पै बैठ। जिव ताहीं के मै तेरे बैरियाँ नै पूरी तरियां तै हरा ना वूँ?”

14 के वे सारे परमेसवर की सेवा-पाणी करण आळी आत्मा कोनी, जो उद्धार पाण आळा के खात्तर मदद करण नै भेजी जावै सै?

2

1 इस करकै म्हारे ताहीं जो कुछ सिखाया गया था उसका पालन करण खात्तर हमनै और सावधान रहणा चाहिए। तब हम सच्चाई तै दूर न्ही जावांगे।

2 क्यूँके जो वचन सुर्गदूतां के जरिये कह्या गया था। जिव वो सच साबित होया अर हरेक अपराध अर हुकम ना मानण का परमेसवर नै उन ताहीं दण्ड दिया।

3 तो हम माणस इसे महान् उद्धार नै अणदेखा करके किस तरियां बच सकां सां? इस महान् उद्धार की पैहली बार प्रभु यीशु नै घोषणा करी थी, अर जिन चेल्यां नै उस ताहीं सुणया, तो चेल्यां नै म्हारे ताहीं साबित करके दिखा दिया के यो सच सै।

4 अर गेल्या ए परमेसवर भी अपणी मर्जी के मुताबिक चमत्कार, अर अनोक्खे काम्मां, अर कई ढाळ के सामर्थ के काम्मां, अर पवित्तर आत्मा के वरदानां के बांडण के जरिये इन बात्तां नै सच साबित करदा रहया।

5 उसनै उस आण आळी दुनिया ताहीं जिसका जिक्र हम करण लागरे सां, सुर्गदूतां के अधीन न्ही करया, पर अपणे बेट्टे के अधीन कर दिया।

6 पवित्तर ग्रन्थ म्ह किते, किसे नै परमेसवर तै यो कह्या सै, के “माणस के सै के तू उसकी सुधि लेवै सै? या माणस का बेट्टा के सै, के तू उसकी फिक्र करै सै?

7 तन्ने उस ताहीं सुर्गदूतां तै थोड़ा ए कम महत्वपूर्ण बणाया, तन्ने उस ताहीं राजा की तरियां महिमा अर सम्मान दिया, अर सब किमे उसके अधीन कर दी।

8 तन्ने उस ताहीं सारी चिज्जां पै हक दिया।” इसा लागै सै के परमेसवर नै सारा कुछ उसके अधीन कर दिया सै, उरै ताहीं के कुछ भी न्ही बचा जो उसके अधीन ना हो, पर हम देख सका सां, के सारी चिज्जें उसके अधीन म्ह न्ही।

9 पर हम यो देख्वां सां, के यीशु ताहीं कुछ बखत खात्तर सुर्गदूतां तै कम करया गया था, ताके परमेसवर के अनुग्रह तै वो हरेक किसे खात्तर मर सके, क्यूँके उसनै दुख टाया अर मर गया, इस करके परमेसवर नै उस ताहीं महिमा अर सम्मान दिया।

10 परमेश्वर नै जो कुछ भी बणाया सै, वो सारा अपणे खात्तर सै, अर उस ताहीं योए आच्छा लाग्या के जिब वो भोत सारे माणसां ताहीं अपणी महिमा म्ह साँझा करै, तो यीशु मसीह जो उनका उद्धारकर्ता सै, उसके दुख ठाण के जरिये उन ताहीं सिध्द बणा लेवैगा।

11 क्यूँके जो माणसां नै उनके पाप तै साफ करै सै, अर जिन माणसां के पाप साफ होण लागरे सै, दोन्नु एक ए पिता परमेश्वर की ऊलाद सै, इस्से कारण वो उननै भाई-भाण कहण तै कोनी सरमान्दा।

12 अर वो (मसीह) परमेश्वर तै कहवै सै, “मै अपणे भाईयाँ ताहीं बताऊँगा के तन्नै मेरे खात्तर कितने भले काम करे सै, अर जिब आराधना करण खात्तर मण्डली म्ह कट्टे होंगे तो मै तेरी महिमा करूँगा।”

13 अर वो दुबारा कहवै सै, के मै उन माणसां के साथ सूँ, “जो परमेश्वर नै मेरे ताहीं दिए सै।”

14 ज्याँतै जिब के परमेश्वर के बच्चे सै, जो के माँस अर लहू तै बणे सै, अर उसका बेट्टा (यीशु मसीह) भी इन्सान बणया, इस करके वो एक इन्सान के रूप म्ह ए मर सकै था, अर सिर्फ मरण तै ए वो शैतान की शक्ति नै तोड़ सकै था, जिसके धारे मौत की शक्ति थी।

15 अर इस तरियां यीशु नै उन सारे माणसां ताहीं मुक्त कर दिया जो हर बखत गुलाम्मां की तरियां जीवै थे, अर वे मरण तै डरे थे।

16 क्यूँके मसीह यीशु तो सुर्गदूतां ताहीं न्ही बल्के अब्राहम की पीढ़ी नै सम्भाळै सै।

17 इस कारण उस ताहीं चाहिये था, के वो हर बात्तां म्ह विश्वासी भाईयाँ की तरियां बणै, ताके वो परमेश्वर का महायाजक बण सकै, जो दयालु अर विश्वास जोगगा सै, अर वो माणसां के पापां की माफी खात्तर खुद नै बलिदान कर सकै।

18 क्यूँके यीशु का इम्तिहान हो लिया अर उसनै खुद दुख ठाया सै, इस करके वो इम्तिहान म्ह पड़े होए माणसां की मदद कर सकै सै।

3

३:१-३:११

1 ज्याँतै हे विश्वासी भाईयो, थम जो परमेश्वर के कुह्वाओ साँ, सुर्ग म्ह साइझी होण खात्तर बुलाये गये साँ, यीशु पै ध्यान द्योँ, जो म्हारे खात्तर परमेश्वर की ओड़ तै भेज्जा गया प्रेरित अर महायाजक सै, जिसपै हम विश्वास करा साँ।

2 यीशु परमेश्वर के प्रति वफादार था, जिस ताहीं उसनै नियुक्त करया था, जिसा मूसा नबी नै भी वफादारी तै पूरा काम करया जो भी परमेश्वर नै उस ताहीं करण खात्तर कहा था।

3-4 जिसा के घर बणाण आळे माणस नै घर तै बढ़के सम्मान मिलै सै। इस्से तरियां यीशु मूसा नबी तै घना सम्मान जोगगा सै। क्यूँके हरेक घर का कोए ना कोए बणाण आळा होवै सै, पर जिसनै सारा किमे बणाया वो परमेश्वर सै।

5 मूसा नबी तो परमेश्वर के घर के माणसां खात्तर सेवक की तरियां विश्वास जोगगा रहया। के जो मूसा नबी नै करया था, वो दिखावै सै के परमेश्वर आण आळा बखत म्ह के करण आळा सै।

6 पर परमेश्वर के कुण्वे म्ह मसीह, तो एक बेट्टे के रूप म्ह विश्वास लायक सै, अर उस आस म्ह विश्वास नै बणाए राक्खै सै, तो हमे उसका कुणवा साँ।

7 जिसा परमेश्वर अपणे पवित्र आत्मा के जरिये कहवै सै, “जै आज थम परमेश्वर की आवाज सुणो,

8 “तो अपणे मन ताहीं कठोर ना करो, जिसा के छो दुवाण के बखत अर इम्तिहान के दिन जंगळ म्ह धारे पूर्वजां नै करया था।

9 धारे पूर्वजां नै चाळीस साल तक मेरे महान काम देक्खण के बाद भी चुनौती देन्दे होए मेरे ताहीं परख्खा था।

10 इस कारण मै उस बखत के माणसां तै गुस्सा रहया, अर कहा, ‘उननै मेरे पाच्छै चालणा न्ही चाह्या, अर इसा करण तै इन्कार कर दिया जो मन्नै उन ताहीं करण का आदेश दिया था।’

11 फेर मन्नै छो म्हा आकै कसम खाकै कह्या, के 'उस आराम की जगहां म्हा थम बड़ण न्ही पाओगे, जित्त मै उननै आराम देऊंगा।'

12 हे विश्वासी भाईयो, चौक्कस रहो के थारे म्हा इसा बुरा अर अविश्वासी मन ना हो, जिसतै थम जिन्दे परमेसवर तै दूर हो जाओ।

13 जिव भी थम पवित्तर ग्रन्थ नै यो कहते सुणो, "आज का दिन" तो एक-दुसरे नै उत्साहित करते रहो, इसा ना हो पाप थारे ताहीं थोक्खा देवै, अर थम परमेसवर कै खिलाफ जिद्दी हो जाओ।

14 क्यूँके जै हम अन्त तक मजबुत्ती के साथ अपने शरुआती विश्वास नै थाम्मे राक्खां सां, तो हम मसीह के साइद्दीदार बण जावां सां।

15 जिसा पवित्तर ग्रन्थ कहवै सै, "जै आज थम परमेसवर का शब्द सुणो, तो अपने मनां नै कटोर ना करो, जिसा के छो दुवाण के बखत थारे पूर्वजां नै करया था।"

16 कौण थे वे माणस जिननै परमेसवर की आवाज सुणकै भी उस ताहीं छो दुवाया? ये वे माणस थे जिन ताहीं मूसा नबी मिस्र देश तै बाहर लेकै गया था।

17 चाळीस साल तक परमेसवर ताहीं इन माणसां नै गुस्सा दुवाया, ये इस्राएल के माणस थे, जिननै मरुस्थल म्हा पाप करया अर वे मरगे, अर उनकी लाश जंगळ म्हा पड़ी रहीं?

18 अर जिव परमेसवर नै कसम खाई के "वे उस आराम की जगहां म्हा कदे न्ही बड़ पावेंगे, जित्त मै उननै आराम देऊंगा।" वो वास्तव म्हा उन माणसां के बारे म्हा बात करै था जिननै उसका विरोध करया था।

19 इस बात तै हमनै यो बेरा लागया सै, के वे अपने अविश्वास कै कारण बड़ न्ही सके।

4

XXXXXXXX XX XXXXXXXX XX XXXX XX XXXXX

1 इस करके परमेसवर नै म्हारे ताहीं वादा करया सै, के हम आराम की जगहां पै जावेंगे, क्यूँके आराम की जगहां म्हा बड़ण का वादा इब भी सै, तो हमनै भोत सावधान रहणा चाहिए, इसा ना हो के थारे म्हा तै कोए माणस आराम की जगहां जाण म्हा नाकामयाब हो जा, जिस ताहीं देण का वादा परमेसवर नै म्हारे ताहीं करया सै।

2 जिस तरियां हमनै यीशु मसीह के बारे म्हा सुसमाचार सुण्या, अर उन इस्राएल के माणसां नै भी जिन नै आराम की जगहां म्हा बड़ण के बारे म्हा सुसमाचार सुण्या पर उननै उस सुसमाचार पै विश्वास न्ही करया, इस कारण उनकै खात्तर संदेश बेकार ठैहरया।

3 पर म्हारे ताहीं जो परमेसवर नै कह्या सै, हम उसपै भरोस्सा करां सां, अर हम आराम की जगहां म्हा बड़ांगे। जिसा औरां खात्तर परमेसवर नै कह्या सै, "मन्नै अपने छो म्हा कसम खाई के वे मेरी आराम की जगहां म्हा बड़ण न्ही पावेंगे।" फेर भी उसके काम दुनिया के बणाण तै पैहल्याए पूरे हो लिए थे।

4 क्यूँके सातमै दिन के बारे म्हा परमेसवर नै पवित्तर ग्रन्थ म्हा न्यू कह्या सै, "परमेसवर नै सातमै दिन अपने सारे काम्मां ताहीं निपटा कै विश्राम करया।"

5 हमनै यो भी पढ़या के उसनै वाद म्हा कह्या, के "वे मेरै आराम की जगहां म्हा बड़ण न्ही पावेंगे।"

6 इस्राएल के वे माणस जिन ताहीं सुसमाचार सुणाया गया था, वो आराम की जगहां म्हा बड़ण म्हा नाकामयाब रहे, क्यूँके उननै परमेसवर के हुकम ताहीं कोनी मान्या था, पर उस आराम की जगहां म्हा जाण का इब भी मौक्का सै।

7 ज्यांतै उसनै आराम की जगहां म्हा बड़ण का एक और मौक्का तय करया, अर वो मौक्का आज सै। म्हारे पूर्वजां के बिद्रोह के कई साल्लां बाद, दाऊद के मुँह तै यो कह्या था, "जै आज थम उसकी आवाज सुणो, तो उस ताहीं सुणके इन्कार ना करो।"

8 हम यो भी जाणा सां के परमेसवर नै जो आराम की जगहां का वादा करया सै, वो कनान देश कोनी, जिसपै यहोशू नै म्हारे पूर्वजां की अगुवाई करी थी, जै यो कनान देश होन्दा, तो परमेसवर नै वाद म्हा यो न्ही कह्या होगा, के एक और मौक्का सै।

9 यो भी हो सके सै, के परमेसवर के माणसां नै इस तरियां के तरिकके तै आराम करणा पड़ै, जिस तरियां तै परमेसवर नै दुनिया बणाण के सातवे दिन आराम करया था।

10 क्यूँके जो उसके आराम की जगहां म्ह बड़या सै, उसनै भी परमेसवर की ढाळ अपने काम पूरे करके विश्राम करया सै।

11 इस करके हम उस आराम की जगहां म्ह बड़ण की कोशिश बड़ी मेहनत के साथ करा, ताके कोए भी उन माणसां की तरियां ना बणे जिननै परमेसवर के हुकम ताहीं मानण तै इन्कार कर दिया, फेर हम उसकी आराम की जगहां म्ह बड़ण पावांगे।

12 क्यूँके परमेसवर का वचन जिन्दा, अर प्रभावशाली सै, अर वो एक दोधारी तलवार तै भी घणा पैना सै। वो प्राण अर आत्मा ताहीं, अर गाँठ-गाँठ अर गुद्दे-गुद्दे ताहीं न्यारा करके आरम-पार पाइ दे सै अर मन की भावनायां अर विचारां ताहीं परख ले सै।

13 जिस ताहीं लेखा देणा सै, उसकी नजर तै कोए भी प्राणी छुप्या कोनी। सारी चीज उसके स्याम्ही साफ अर खुली होइ सै।



14 ज्यांते जिब म्हारा इसा बड़्हा महायाजक सै, जो सुर्ग म्ह चल्या गया सै, यानिके परमेसवर का बेट्टा यीशु, तो आओ, हम विश्वास म्ह पक्के बणे रहवां जो हमनै सारे माणसां के आगवै स्वीकार करया सै।

15 क्यूँके म्हारा यो महायाजक जो यीशु मसीह सै, म्हारी हरेक कमजोरियां नै जाणे सै, बल्के वो सारी बातं म्ह म्हारे तरियां परख्या तो गया, फेर भी निष्पाप लिंकइया।

16 इस करके आओ, हम परमेसवर के स्याम्ही बिना डर के जावां जो करुणा तै भरा होया सै, फेर परमेसवर म्हारे पै दया करेगा, अर जिब हमनै मदद की जरूरत होगी तो वो म्हारी मदद करेगा।

5

1 परमेसवर इस्राएल के माणसां म्ह तै एक महायाजक ताहीं चुणै सै, अर वो महायाजक ताहीं नियुक्त करै सै, ताके वो उसकी सेवा भेट चढ़ाके, अर माणसां के पापां की माफी के खातर बलि चढ़ाके कर सके।

2 वो बेअक्ले अर भूले भटक्यां के गेल्या नर्मी तै बरताव कर सके सै, ज्यांते वो आप भी कमजोरी तै घिरया सै।

3 उसके खातर एक महायाजक के रूप म्ह अपने अर माणसां के पापां नै दूर करण खातर बलि चढ़ाणा जरूरी सै।

4 कोए भी इन्सान अपने-आपनै तै महायाजक होण का पद न्ही ले सकता। एक माणस सिर्फ महायाजक जिब्बे बण सके सै, जिब परमेसवर उस ताहीं याजक होण के खातर बुलावै सै, जिस तरियां हारुन ताहीं परमेसवर नै पैहला महायाजक होण खातर बुलाया था।

5 उससे तरियां ए मसीह नै भी खुद ताहीं महायाजक बणाके खुद का सम्मान करण का फैसला कोनी करया, परमेसवर नै उस ताहीं यो सम्मान दिया जिब उसनै कहा, के “तू मेरा बेट्टा सै, आज मन्नै ए तेरे ताहीं पैदा करया सै।”

6 एक और जगहां परमेसवर उस ताहीं दुबारा कहवै सै, “तू मलिकिसिदक* की रीत पै सारी हाण खातर याजक सै।”

7 जिब यीशु इस दुनिया म्ह रहवै था, तो ठाड़ू शब्दां तै रुक्का मार-मारके अर आँसू बहा-बहाके परमेसवर तै प्रार्थनाएँ अर बिनती करी, जो उस ताहीं मौत तै बचा सके था, अर आदरपूर्ण समर्पण के कारण परमेसवर नै उसकी सुण ली।

8 परमेसवर का बेट्टा होण पै भी मसीह यीशु नै दुख ठा-ठाके भी उसका हुकम मानना सिख्या।

* 5:6 5:6 मलिकिसिदक अब्राहम के बखत का एक याजक अर सम्राट था। उत्पत्ति 14:17-24

9 फेर सिध्द हो जाणकै बाद वो खुद उन सब खात्तर, जो उसके हुकमां नै मानणीयां कै खात्तर अनन्त काल के उद्धार का कारण बणग्या।

10 अर उस ताहीं परमेसवर की ओड़ तै मलिकिसिदक की रीत पै महायाजक का पद मिल्या।

XXXXXXXXXX

11 इसके बारे म्ह हमने घणीए बात कहणी से, पर उनके बारे म्ह खुलकै जिक्र करणा मुश्किल सै, क्यूँके थम परमेसवर के वचन के बारे म्ह जाणण खात्तर आलसी होगे सों।

12 बखत कै विचार तै तो थमनै शिक्षा देण आळा बण जाणा चाहिए था, पर थमनै तो इब भी इसे माणस की जरूरत सै, जो थारे ताहीं नये सिरे तै परमेसवर की शिक्षा की शरूआती बात ए सिखावै, थम तो इब्बे भी उन छोटे बाळक की ढाळ सों, जिन ताहीं दूध चाहिए, पर भारी खाणा न्ही।

13 याद राक्खों जो माणस इब भी वचन की शरूआती शिक्षा नै सीखण लागरे सै, वे न्ही जाणदे, के परमेसवर धर्मी बणण के बारे म्ह के कहवै सै, वो दूध पीन्दे बाळक की तरियां सै।

14 पर जिस माणस की तुलना श्याणे माणस तै करी जा सै, जो ठीक तै खाण चबा-चबा कै खा सकै सै, वो यो माणस सै जिसका विश्वास पक्का सै अर जो खरी शिक्षा नै समझ सकै सै, उसने आच्छे अर बुरे की पिच्छाण करणा सीखा लिया सै।

6

1 इस करके जिव म्हारे ताहीं मसीह के बारे म्ह शरू म्ह सिखाया गया था, तो आओ हम उन ताहीं छोड़ के खरी शिक्षा पै चर्चा करण खात्तर आगे बढ़दे जावां। शरूआती शिक्षा जिसा पाप तै भरे काम तै जो मौत नै लेके आवै सै, परमेसवर पै विश्वास करण नै नीम की तरियां ना धरो,

2 अर बपतिस्मा अर हाथ धरण, अर मरे होया के जिन्दा उठण, अर आखरी न्याय की शिक्षा रूपी नीम दुवारा ना बणावां।

3 जै परमेसवर नै चाह्या तो मै थमनै खरी शिक्षा दिऊंगा।

4 क्यूँके जो माणस अपणे विश्वास नै खो दे सै, तो उन ताहीं फेर तै पश्चाताप करण कै खात्तर उलटा न्ही ल्याया जा सकता। एक बार उननै परमेसवर की सच्चाई नै जाणा अर सुगं तै वरदान्नां ताहीं पाया, अर बाकियाँ की तरियां पवित्तर आत्मा भी पाया।

5 अर उननै अनुभव करया था के परमेसवर का वचन आच्छा सै, अर वे परमेसवर की आण आळी शक्ति का अनुभव कर चुके थे।

6 उननै फेर तै उल्टा ल्याण का कोए तरिकका कोन्या, क्यूँके वे परमेसवर के बेटे ताहीं अपणे खात्तर दुवारा कूरुस पै चढ़ावै सै, अर सबके स्याम्ही उसपै कलंक लगावे सै।

7 जिन माणसां नै आच्छी शिक्षा मिले सै, वे उस जमीन की तरियां सै, जित्त बारिस होन्दी ए रहवै सै, जै जमीन बढ़िया सै, तो या किसान खात्तर बढ़िया फसल देवे सै, अर उसपै परमेसवर की आशीष होवै सै।

8 पर दुसरे माणस उस जमीन की तरियां सै जो काण्डे अर खरपतवार उगावै सै तो या बेकार सै। उस ताहीं परमेसवर के जरिये श्राप दिये जाण का खतरा सै, अर वो आग तै नाश हो जावैगा।

9 हे प्यारे भाईयो, भलाए हम इस ढाळ की बात करण लागरे सां, पर हम असलियत म्ह विश्वास न्ही करते के यो थारे खात्तर लागू होवै सै। हमनै विश्वास सै के थम बढ़िया चिज्जां खात्तर बणाये गये सों, जो उद्धार कै साथ आवै सै।

10 जिसा के थमनै आच्छे काम करे सै, अर इब थम परमेसवर के नाम म्ह विश्वासी भाईयाँ कै खात्तर प्यार तै, सेवा के काम करण लागरे सों, इसकी बजह तै परमेसवर थारे ताहीं भुल्लैगा न्ही, क्यूँके वो धर्मी सै।

11-12 आलसी ना बणो। पर कड़ी मेहनत करण आळा की तरियां थमनै इन परेमपूर्वक काम्मां ताहीं जारी राखणा चाहिए, ताके परमेसवर के वादे पाण खात्तर थारी आस पक्की हो।

XXXXXXXXXX

13 ज़िब परमेसवर नै अब्राहम तै करार करया, तो तब खुद परमेसवर तै बड्डा कोए और न्ही था, जिसकी कसम ली जा सकै, इस करकै अपनी खुद की कसम लेन्दे होए परमेसवर नै अब्राहम तै कह्या,

14 “मै सचमुच तेरे ताहीं घणा आशीष दियुँगा, अर तेरे वंशां नै अनगिणत बणा दिऊँगा।”

15 अब्राहम नै भोत धीरज धरण कै बाद वादा का ईनाम मिल्या।

16 माणस तो अपने तै किसे बडे का नाम लेकै कसम खाया करै सै, अर उन म्ह कसम के जरिये बात का फैसला होवै सै, अर सारा विवाद खतम हो जावै सै।

17 योए कारण था, के परमेसवर नै भी कसम खाई थी। इस बात तै वो उन माणसां नै साफ तरियां तै दिखाणा चाहवै था, के वो जो भी वादा करै सै, उस ताहीं वो पूरा करै सै।

18 तो उरै दो बात सै उसका वादा अर उसकी कसम जो कदे बदल न्ही सकदे अर जिनकै बारै म्ह परमेसवर कदे झूठ कोनी बोल सकता। इस करकै हम जो परमेसवर के धौरै बचण आये सां अर जो आस उसनै म्हारे ताहीं दी सै उस ताहीं थाम्मे होए घणे उत्साहित सां।

19 जिस तरियां किस्ती ताहीं लंगर तै बाँधया जावै सै, जो किस्ती नै पकड़कै राखवै सै, इस्से तरियां तै आस म्हारी जिन्दगी नै मजबूत अर टिकाए राखवै सै, अर म्हारी आस यीशु सै, वो परमेसवर के धौरै सुर्ग म्ह पवित्र मन्दर म्ह परदे के पाच्छै पोहचा सै।

20 जित्त यीशु नै मलिकिसिदक* की रीत पै सारे हाण के बखत का महायाजक बणकै, म्हारै खात्तर अगुवां के रूप म्ह दाखल होया सै।

7

XXXXXXXXXX

1-3 यो मलिकिसिदक शालेम नगर का राजा अर परमप्रधान परमेसवर का याजक था, उनके नाम का मतलब “राजा” सै जो नियम के साथ न्याय करै सै, शालेम के राजा का मतलब सै “शान्ति का राजा।” पवित्र ग्रन्थ म्ह उसके माँ-बाप, उसके पूर्वज, या उसकी मौत या जन्म के बारे म्ह, कुछ भी न्ही लिख्या गया सै। वो हमेशा खात्तर एक याजक सै। इस करकै वो परमेसवर के बेटे की तरियां सै। ज़िब अब्राहम ने चार राजां की हत्या कर दी थी, तो मलिकिसिदक नै उसते मुलाकात करी, अर उस ताहीं आशीवाद दिया। अब्राहम नै युध्द म्ह जीत हासिल करी, अर सारी चिज्जां का दसमां हिस्सा भी दिया।

4 इब इसपै ध्यान करो के वो किसा महान् था जिस ताहीं पूर्वज अब्राहम नै दुश्मनां की लूट के बढ़िया तै बढ़िया माळ का दसमां हिस्सा दिया।

5 मूसा नबी के नियम-कायदे बतावै सै के लेवी के वंशज जो याजक का पद पावै सै, उननै इस्राएल के माणसां तै दसमां हिस्सा लेणा चाहिए, यानिके उसके खुद के माणस तै, पर वे याजक अर दुसरे बिश्वासी भाईयां की तरियां सै, क्यूँके वे सब अब्राहम के वंश के सै।

6 पर इसनै, जो लेवी-वंशी भी न्ही था, अब्राहम तै दसमां हिस्सा लिया, फेर भी अब्राहम वो था जिसकै धौरै परमेसवर का वादा था, फेर भी मलिकिसिदक नै उस ताहीं आशीवाद दिया।

7 इस म्ह कोए शक कोनी के जो आशीवाद देवै सै, वो उस माणस तै बड्डा हो सै जिस ताहीं आशीवाद देवै सै।

8 उरै तो याजक दसमां हिस्सा लेवै सै, भलाए वो सिर्फ एक माणस सै, जो जीवै सै अर फेर मर जावै सै, पर मलिकिसिदक, जिसने अब्राहम तै दसमां हिस्सा लिया, वो इब भी जिन्दा सै, जिसा के पवित्र ग्रन्थ कहवै सै।

9 के ज़िब अब्राहम नै मलिकिसिदक ताहीं दसमां हिस्सा दिया, ज़िब ताहीं लेवी माणसां का जन्म अब्राहम के वंश म्ह न्ही होया था। पर इब भी उसके वंश होणे के कारण, यो इस तरियां सै के लेवी नै खुद ही अब्राहम के जरिये मलिकिसिदक ताहीं दसमां हिस्सा दिया।

* 6:20 6:20 मलिकिसिदक अब्राहम के बखत का एक याजक अर सम्राट था। उत्पत्ति 14:17-24

10 क्योंकि जिस बख्त मलिकिसिदक उसके पिता तै मिल्या, उस बख्त वो अपने पिता की देह म्ह था।

11 माणसां ताहीं जिन याजकां के आधार पै नियम-कायदे दिए गये थे, जो हारुन के परिवार का अर लेवी के गोत्र का था, पर ये याजक सिध्द न्ही बण सके। इस करके यो जरूरी था, के एक और याजक आवै, जो हारुन जिसा न्ही, पर मलिकिसिदक जिसा हो।

12 क्योंकि इब एक्के तरियां का याजक कोनी, तो नियम-कायदे का भी बदलना जरूरी सै।

13 क्योंकि हम मसीह के बारे म्ह ये बात करण लागरे सां, जो एक अलग गोत्र तै थे। उस जनजाति म्ह तै किसे नै भी वेदी* पै एक याजक के रूप म्ह सेवा न्ही करी,

14 सब जाणै सै, के म्हारा प्रभु यीशु यहूदा के गोत्र म्ह तै पैदा होया सै, मूसा नबी नै यहूदा के किसी भी वंशज के बारे म्ह न्ही बताया, जो यहूदा के याजक बणगे अर यहूदा का कोए वंशज कदे याजक न्ही बणा।

15 इब हम और भी आच्छी तरियां तै समझा सां, जिन मलिकिसिदक कै तरियां एक और याजक पैदा होण आळा था, जो के यीशु मसीह सै।

16 यीशु का याजक बणणा, नियम-कायदा नै पुगण पै, या लेवी के वंश म्ह तै पैदा होण पै आधारित कोनी। पर वो अपने अविनाशी जीवन की शक्ति के कारण याजक बणग्या।

17 क्योंकि उसके बारे म्ह पवित्र ग्रन्थ कहवे सै, “तू मलिकिसिदक की रीत पै युगानुयुग याजक सै।”

18 इस करके, पैहल्डी आज्ञा कमजोर अर बेअसर होण के कारण बदलगी।

19 (ज्यातै के नियम-कायदे नै किसे बात ताहीं सिध्द कोन्या करया), अर उसकी जगहां पै एक बेहतर उम्मीद सै, जो के यीशु मसीह सै, जिसके जरिये हम परमेसवर के लोवै जा सकां सां।

20 जिन यीशु मसीह ताहीं परमेसवर नै याजक बणा दिया तो परमेसवर नै कसम खाई।

21 क्योंकि लेवी के वंश तो बिना कसम याजक बणाए गये, पर यीशु मसीह बिना कसम के परमेसवर की ओड़ तै नियुक्त करया गया, जिसनै उसके बारे म्ह कहा, “प्रभु नै कसम खाई, अर उसतै फेर ना पछतावैगा के तू युगानुयुग याजक सै।”

22 इस करके यीशु नै म्हारे ताहीं परमेसवर के गैल सब तै आच्छे करार का वादा करै सै।

23 यीशु के याजक होण का एक और फायदा सै, पैहले तो घणी बड्डी गिणती म्ह याजक बणदे आये, क्योंकि हरेक याजक की मौत के साथ उसकी सेवा खतम हो जावै थी।

24 यीशु युगानुयुग जिन्दा रहवै सै, इस कारण उसके याजक का पद कोए न्ही ले सकता।

25 इस्से खात्तर जो यीशु के जरिये परमेसवर के धोरै आवै सै, वो उनका पूरा-पूरा उद्धार कर सकै सै, क्योंकि वो उनके खात्तर बिनती करण ताहीं सारी हाण जिन्दा सै।

26 इसाए महायाजक म्हारी जरूरतां नै पूरा कर सकै सै, जो पवित्र, अर बेकसूर, शुद्ध, अर पापमुक्त हो, अर सुर्ग तै भी जिस ताहीं ऊँचा करया होया हो।

27 जो महायाजक हारुन के वंश तै सै, उसनै जरूरत कोनी के हरेक दिन पैहल्या अपने पापां के खात्तर बलिदान चढ़ावै, क्योंकि यीशु नै अपने-आप ताहीं बलिदान चढ़ाके उसनै एक ए वर म्ह पूरा कर दिया।

28 क्योंकि नियम-कायदे तो कमजोर माणसां ताहीं महायाजक नियुक्त करै सै, पर कसम जो नियम-कायदा के बाद आवै सै, उस बेदटे नै नियुक्त करै सै जो युगानुयुग के खात्तर सिध्द महायाजक सै।

8

* 7:13 7:13 वेदी-परमेसवर ताहीं भेट चढ़ाण खात्तर एक जगहां

1 इब जो बात हम कहण लागरे सां उन म्ह तै सारया तै बड्डी बात या सै म्हारे धोरे इस तरियां का महायाजक सै, जो सुर्ग पै महामहीम के सिंहासन कै सोळी ओड़ सै,

2 म्हारा महायाजक सब तै घणी पवित्र जगहां अर उस सच्चे तम्बू (सुर्ग म्ह) काम करै सै, जो के माणसां के जरिये न्ही, परमेसवर के जरिये बणाया गया सै।

3 क्यूँके हरेक महायाजक पापां की माफी कै खात्तर बलिदान अर भेंट चढ़ावै सै, इस कारण जरूरी सै के म्हारे महायाजक मसीह यीशु के धोरे भी चढ़ाण खात्तर किमे हो।

4 जै वो धरती पै होंदा तो कदे भी याजक न्ही होंदा, ज्यांतै के मूसा के नियम-कायदे कै मुताबिक भेंट चढ़ाण खात्तर याजक सै।

5 वे सुर्ग म्ह की चिज्जां के नकल अर छाया की सेवा करै सै, जिसा जिब मूसा नबी तम्बू बणाण पै था, तो उस ताहीं या चेतावनी मिली, “लखा, जो नमूना तेरे ताहीं पहाड़ पै दिखाया गया था, उसके मुताबिक सारा किमे बणाण।”

6 पर जो काम यीशु ताहीं दिया गया सै, वो दुसरे याजकां तै दिए गये काम तै ज्यादा बाध सै, क्यूँके वो जिस करार का विचौलिया सै, वो पुराणे करार तै बढ़िया सै, अर बढ़िया चिज्जां की कसमां पै आधारित सै।

7 क्यूँके जै वो पैहल्डा करार बेकसूर होन्दा, तो दुसरे करार कै खात्तर मौक्का ना टोहया जान्दा।

8 पर प्रभु उनपै दोष लाके कहवै सै, “प्रभु कहवै सै, लखाओ, वे दिन आवै सै के मै इस्राएल के माणसां कै गेल्या, अर यहूदा के माणसां कै गेल्या नया करार करूंगा।

9 यो उस करार की तरियां न्ही होवैगा, जिसा मन्ने उनके पूर्वजां कै गेल्या उस बखत करया था, जिब मन्ने उनका हाथ मिस्र देश तै लिकाड़ ल्याण खात्तर पकडचा था, क्यूँके प्रभु कहवै सै, के वे मेरे करार के विश्वासी न्ही रहे, ज्यांतै मन्ने उनतै मुँह फेर लिया।

10 फेर प्रभु कहवै सै, के जो करार मै आण आळे दिनां म्ह इस्राएल के माणसां कै गेल्या करूंगा, वो यो सै के मै अपने नियमां नै उनके मनां म्ह गेरूंगा, मै उन ताहीं अपने नियमां के बारे म्ह उननै याद दुआऊंगा, अर मै उनका परमेसवर ठहरेगा अर वे मेरे माणस ठहरेंगे।

11 अर हरेक अपने यहूदी भाई ताहीं अर अपने सगे-सम्बन्धी ताहीं या शिक्षा न्ही देवैगा, के तू प्रभु ताहीं पिच्छाण, क्यूँके छोटटे माणसां तै लेके बड़े माणसां ताहीं सारे मन्ने जाण लेवैगें।

12 मै उनकी दुष्टता की ओड़ दया करूंगा, अर उनके पापां नै दुबारा याद कोनी करूंगा।”

13 परमेसवर नै इस ताहीं नया करार कद्दा, इस करके उसनै पैहल्डे करार ताहीं पुराणा ठहरा दिया, जो चीज पुराणी अर घिसी होई सै उसका मिट जाणा जरूरी सै।

9

1 इब, उस पैहल्डे करार म्ह भी सेवा के नियम थे, अर इसी पवित्र जगहां थी, जो इस दुनिया की थी।

2 यानी के एक तम्बू बणाया गया जिस म्ह दो कमरे थे, पैहले कमरे म्ह दीवट*, मेज अर मेज के उप्पर भेंट की चढ़ाई होई रोटियां थी, अर वा पवित्र जगहां कुद्दावै सै।

3 ओड़ै एक परदा था उस परदे कै पाच्छे, दुसरा कमरा था, जो परमपवित्र जगहां कुद्दावै सै।

4 उस दुसरे कमरे म्ह सोन्ने की धूपदानी, अर चौगरदेके सोन्ने तै मन्ढया होया करार का सन्दूक था, अर उस म्ह मन्ना तै भरया होया सोने का मर्तबान भी था, अर हारुन की छड़ी जिस म्ह फूल फल आ गये थे, अर करार की पत्थर की पटियां भी थी।

5 इसकै अलावा सन्दूक के उप्पर दोन्नु ओड़ तेजोमय करुब थे, जो प्रायश्चित के ढक्कण जिस ताहीं प्रायश्चित के दिन पापबलि के लहू तै छिड़क दिया जावै था। इनका एक-एक करके जिक्र करण का इब्बै बखत न्ही सै।

* 9:2 9:2 दीवट भोत-से दीवे रखण का एक बरतन

6ये चीज इस तरियां तै धरी गई थी। उस पैहलड़े कमरे म्ह परमेसवर की आराधना करण कै खात्तर याजक हरेक दिन पैहले कमरे म्ह जाया करै था।

7पर दुसरे कमरे म्ह यानी घणी पवित्र जगहां म्ह, सिर्फ महायाजक साल भर म्ह एक ए वर जावै सै, अर बलिदान के जानवर का लहू लिये जाया करै था, जिस ताहीं वो अपने खात्तर अर माणसां की भूल-चूक म्ह करया पापां खात्तर भेंट चढ़ावै सै।

8इसतै पवित्र आत्मा योए दिखावै सै, के पुराणे करार के मुताबिक दुसरा कमरा यानी घणी पवित्र जगहां जो सुर्ग म्ह सै, जित्त परमेसवर रहवै था, ओइ तक पुहचण का रास्ता बन्द था।

9यो तम्बू आज कै दिन का एक उदाहरण सै, जिस म्ह याजक भेंट अर बलिदान चढ़ावै सै, जिव माणस बलिदान की भेंट लेकै आवै थे, तो उनकी अन्तरात्मा समझ न्ही पावै थी, के इव उसके पाप माफ होए सै या न्ही।

10क्यूँके ये उपहार अर बलिदान सिर्फ खाण-पीण की चिज्जां, अर कई ढाळ की शुद्ध करण की शारीरिक विधियाँ, तब तक थी, जिव तक परमेसवर कोए नई विधि न्ही देता।

???? ? ? ? ? ? ? ? ? ? ?

11पर जिव मसीह म्हारा महायाजक बणकै आया, तो अपने साथ बढ़िया-बढ़िया चीज लेकै आया जो इव भी मौजूद सै, जिव वो दिख्या तो वो परमेसवर की मौजूदगी म्ह चला गया, यो तम्बू हाथ का बणाया होया कोनी यानिके इस सृष्टि का कोनी।

12जिव मसीह तम्बू म्ह चला गया तो वो सब खात्तर सब तै पवित्र जगहां म्ह दाखल होया, उसने बलिदान के रूप म्ह बकरयां अर बाछड़ियाँ का लहू न्ही लिया, बल्के उसने अपना लहू लिया, ताके हम अनन्त छुटकारा पा सकै।

13क्यूँके जै मूसा नबी के नियम-कायदा के मुताबिक जिव बकरयां अर बळ्यां का लहू अर बाछड़े की राख का अपवित्र माणसां पै छिड़के जाण की विधि के मुताबिक, अशुद्धता दूर हो जावै सै।

14तो मसीह का बेकसूर लहू जो म्हारी अन्तरात्मा नै, म्हारे पाप, जो म्हारी मौत की बजह बणै सै, उनतै शुद्ध करै सै, ताके हम जिन्दे परमेसवर की आराधना कर सका। पवित्र आत्मा की शक्ति के जरिये मसीह नै म्हारे ताहीं अपने पापां खात्तर एक सम्पूर्ण बलिदान के रूप म्ह परमेसवर ताहीं अपने-आप ताहीं दे दिया।

15इस कारण मसीह परमेसवर अर माणसां के बीच म्ह नये करार का बिचोल्ला सै, ताके जो माणस परमेसवर के जरिये बुलाये गये सै, वो सनातन आशीषें पा सकै, जिसका परमेसवर नै वादा करया सै, क्यूँके पैहलड़े करार के अधीन रहन्दे होए जितने माणसां नै पाप कराया, उन ताहीं छुड़ाण खात्तर यीशु नै अपनी जान दे दी।

16करार एक वसियत के समान हो सै। एक वसियत के नियम नै लागू करण खात्तर यो साबित करणा जरूरी होवै सै, के जिसनै वा वसियत बणाई हो, वो मर चुक्या हो।

17क्यूँके एक वसियत जिखे लागू हो सकै सै, जिव उसके बणाण आळा की मौत होगी हो। वो जिव तक लागू न्ही होन्दी जिव ताहीं उसका बणाण आळा जिन्दा हो।

18इस कारण पैहलड़ा करार का नियम जानवरां के लहू ताहीं बहाए जाण पै लागू होवै था।

19क्यूँके जिव मूसा नबी सारे माणसां नै नियम-कायदे का हरेक हुकम सुणा चुक्या तो उसने बकरयां अर बाछड़ियाँ का लहू लेकै, पाणी म्ह मिला लिया अर लाल ऊन अर जूफा (झाड़ी) की छड़ी कै गेल्या, उस नियम-कायदे की किताब अर सारे माणसां पै छिड़क दिया

20अर कह्या, “के यो लहू परमेसवर के साथ करे गये करार नै पक्का करै सै, जिसका हुकम परमेसवर नै थारे खात्तर दिया सै।”

21अर इस्से तरियां तै उसनै तम्बू अर सेवा के सारे समान पै लहू छिड़क्या, जित्त सारे माणस आराधना करण लागरे थे।

22 सच तो यो सै के नियम-कायदे के मुताबिक आमतौर पै सारी चीज लहू के जरिये शुद्ध करी जावै सै, मसीह नै जो लहू बहाया उसके बगैर पापां की माफी कोन्या।

REVEALING THE TRUTH

23 यो जरूरी सै के तम्बू अर उसकी सारी चीज, जो सुर्ग की चिज्जां का हुबहू सै, इन जानवरों का लहू सै, जो शुद्ध करया जा, पर सुर्ग की चीज नै शुद्ध करण के खात्तर बढ़िया बलिदानां की जरूरत थी।

24 क्यूँके मसीह जिस पवित्र जगहां म्ह दाखल होया, वो माणसां के हाथ की बणाई होई न्ही थी, वो असली तम्बू की सिर्फ एक नकल सै, बल्के वो सीध्या सुर्ग गया अर इब म्हारी मदद करण खात्तर परमेसवर के साथ सै।

25 वो सुर्ग म्ह इस करके दाखल होया के माणसां के पापां के कारण बारबार अपने-आपनै बलिदान करै, जिस तरियां महायजक हरेक साल दुसरे का लहू लिए पवित्र जगहां म्ह दाखल होया करै था,

26 जै इसा करण जरूरी था तो दुनिया की शुरुआत तै लेके इब तक उसनै बार-बार दुख टाणा पड़दा, पर इब युग के आखरी म्ह वो एक ए बर जाहिर होया सै, ताके अपने क्रूस पै बलिदान के जरिये पाप ताहीं दूर कर देवै।

27 अर जिस तरियां माणसां के खात्तर एक बर मरणा अर उसके पाच्छे न्याय का होणा तय सै,

28 उससे तरियां ए मसीह भी माणसां के पापां की माफी खात्तर एक बर धरती पै आया अर सूळी पै अपनी जान दे दी, अर जो माणस उसकी बोहड़ण की बाट देखै सै, उनके उद्धार के खात्तर दुसरी बर बिना पाप उटाए होए दिखैगा।

10

REVEALING THE TRUTH

1 मूसा नबी के नियम-कायदे, आण आळी असली चिज्जां की छाया सै, पर ये वो आळी असली चीज कोनी, ज्यांतै नियम-कायदा की विधि के मुताबिक बलिदानां के जरिये जो हरेक साल हर बार चढ़ाए जावै सै, बलिदान चढ़ाण आळा, कदे भी माणसां नै पूरी तरियां तै शुद्ध न्ही कर सकदा।

2 जै बलिदानां के जरिये माणस पूरी तरियां शुद्ध हो जावै, तो उनका चढ़ाणा बन्द क्यांतै न्ही हो जान्दा? बलिदान करण आळा, आराधना करण आळा अर सेवा करण आळे एक ए बर शुद्ध हो जान्दे, तो उनका बलिदान चढ़ाण पै भी उनका मन उन ताहीं क्यूँ कहवै सै, के वे पापी सै।

3 उनके जरिये चढ़ाया गया बलिदान उन ताहीं हर साल यो याद दुआवै सै, के उननै पाप करया सै।

4 क्यूँके या अनहोणी बात सै, के बळ्धां अर बकरयां का लहू माणसां के पापां नै माफ करै।

5 इससे कारण जब मसीह इस दुनिया म्ह आया तो उसनै परमेसवर तै कह्या, “बलिदान अर भेंट तन्नै कोनी चाही, पर मेरै खात्तर एक देह त्यार करी सै।

6 बलिदान के रूप म्ह चढ़ाये गये जानवरों की भेंट अर पाप के खात्तर चढ़ाये गये बलिदान तै तू खुश कोनी होया।

7 फेर मसीह नै कह्या, ‘लखा, परमेसवर मै तेरी इच्छा पूरी करण खात्तर आ गया सूं, जिसा पवित्र ग्रन्थ मेरै बारे म्ह कहवै सै।’”

8 पैहले तो मसीह कहवै सै, “बलिदान के रूप म्ह चढ़ाये गये जानवरों की भेंट अर पाप के खात्तर चढ़ाया गया बलिदान कोनी मांग्या, अर ना ए उन भेटां तै तू खुश होया।” हालाकि ये बलिदान तो नियम-कायदे के मुताबिक चढ़ाए जावै सै।

9 फेर मसीह यो भी कहवै सै, “लखा, मै तेरी इच्छा पूरी करण आ गया सूं,” इस करके पापां की माफी के पैहले तरिके ताहीं, जो नियम-कायदा के मुताबिक थे, उननै हटा के नये तरिके तै जो मेरे लहू के जरिये माफ होवै सै, उन ताहीं लागू करै।

10 परमेश्वर आएँ चाहते थे, के हम मसीह यीशु की देह के एके बार बलिदान चढ़ाएँ जाणके जरिये पवित्र करे जावाँ।

11 पहिले करार के मुताबिक हरेक याजक वेदी के स्याम्ही खड़े होके रोज सेवा करे सै, अर एक ए दाळ के बलिदान नै, जो पापां नै कदे भी दूर न्ही कर सकदे, बार-बार चढ़ावै सै।

12 पर मसीह जो म्हारा बड़ा याजक सै, उसनै माणसां के पापां के खात्तर एक ए बलिदान के रूप म्ह, परमेश्वर के स्याम्ही सदा के खात्तर अपने-आप ताहीं चढ़ा दिया, अर परमेश्वर के सोळी ओड़ महिमाय जगहां म्ह पै जा बेठ्या,

13 अर उस्से बखत तै मसीह इस बात की बाट देखण लागरया सै, के कद परमेश्वर उसके बैरियाँ नै पूरी तरियां तै हरावेगा।

14 क्यूँके क़रूस पै बलिदान के जरिये, परमेश्वर नै जिन माणसां ताहीं पवित्र करया, उन ताहीं सदा खात्तर सिध्द कर दिया सै।

15 अर पवित्र आत्मा भी हमनै यीशु के बलिदान के बारे म्ह याएँ गवाही देवै सै, के यो सच सै, अर म्हारे ताहीं यो बतावै सै के परमेश्वर नै इस बलिदान के बारे म्ह के कह्या सै।

16 “परभु कहवै सै, के जो नया करार, मै आण आळे दिनां म्ह, उनतै करूँगा, वो यो सै, के मै अपने नियम उन ताहीं याद दुआऊँ, अर नियमां नै मानण म्ह उनकी मदद करूँगा।”

17 फेर यो भी कहवै सै, “मै उनके पापां नै अर उनके अधर्म के काम्मां नै दुबारा याद कोनी करूँगा।”

18 अर जिव पापां की माफी होगयी तो पापां खात्तर बलिदान चढ़ाण की कोएँ जरूरत कोनी।

19 ज्यांतै हे विश्वासी भाईयो, यीशु के सलीब पै लहू बहाण के जरिये हम पिता के धारे बिना डरे घणी पवित्र जगहां म्ह जा सका साँ।

20-21 इस करके हे विश्वासी भाईयो, परमेश्वर के परिवार म्ह म्हारे खात्तर एक सबतै उत्तम याजक निर्धारित सै, यीशु के सलीब पै लहू बहाण के जरिये म्हारे खात्तर एक नया अर जिन्दगी देण आळा राह खोल दिया सै। जिस ताहीं उसनै उस पड़े, यानिके अपनी देह के बलिदान के जरिये म्हारे ताहीं घणी पवित्र जगहां म्ह जाण का साहस होया सै।

22 तो आओ, हम सचे मन अर पूरे विश्वास के गेल्या, अर अपनी अन्तरात्मा ताहीं पापां तै मुक्त करण खात्तर अर सच्चे मन तै, देह ताहीं शुद्ध पाणी तै धोके, परमेश्वर के लोवे जांवा।

23 अर इब हम बिना किसे शक के अपनी उस आस म्ह मजबूत रहवाँ, जिस ताहीं हमनै मान्या सै, क्यूँके जिसनै वादा करया सै, वो विश्वास जोगगा सै।

24 अर हम यो भी खास ध्यान राक्खां के हम आप्स म्ह प्यार, अर भले काम्मां म्ह उकसाण के खात्तर हम एक-दुसरे की फिकर करते रहवाँ।

25 अर हम आराधना सभायां म्ह लगातार कट्टे होण म्ह सुस्त ना हो जावाँ, जिसा के भोत-से तो सुस्त हो भी लिये सै, पर एक-दुसरे नै उत्साहित करते रहां, जिसा के थम जाणो साँ, के यीशु का आण का बखत लोवे सै।

26 क्यूँके मसीह नै जाणण के बाद जै हम जाण-बुझके पाप करदे रहवाँ, तो पापां की माफी खात्तर फेर कोएँ बलिदान बाकी न्ही बचा।

27 तो हाँ, परमेश्वर के न्याय का दिन आवैगा, अर वो अपने बिरोधियाँ नै नाश कर देवैगा, अर ये सारी बात होण आळी सै।

28 जो माणस मूसा नबी के नियम-कायदा के मुताबिक दो या तीन माणसां की गवाही पै, बिना दया के मार दिया जावै सै,

29 तो सोच ल्यो के वो माणस और भी भारया दण्ड के जोगगा ठहरैगा, जिसनै परमेश्वर के बेट्टे की कदर न्ही जाणी अर मसीह के लहू ताहीं अपवित्र जाण्या, जो उस ताहीं शुद्ध करै सै, अर उस पवित्र आत्मा का अपमान करे सै, जो हमनै अनुग्रह देवै सै।

30 क्यूँके हम उसनै जाणा सा, जिसनै कह्या सै, “बदला लेणा मेरा काम सै, मै ए बदला दियूँगा।” अर फेर यो भी कह्या के “परभु अपने माणसां का न्याय करैगा।”

31 जिन्हे परमेसवर के हाथ्यां म्ह पड़णा भयानक (डरावणी) बात सै।

32 पर उन पाच्छले दिनां नै याद करो, जिब थमनै पैहली बार मसीह पै विश्वास करया अर परमेसवर के खात्तर दुख ठाण म्ह पाच्छे न्ही हटे।

33 कदे-कदे तो माणसां नै सब के स्याम्ही थारी बुराई करी अर थारे ताहीं मारा पिटचा भी, अर थमनै उन माणसां के गैल भी दुख सहया जो इसे दुख ठावै सै।

34 क्यूँके जो लोग कैद म्ह थे, उनके दुख म्ह भी थम दुखी होए, अर अविश्वासी नै थारी सम्पत्ति ताहीं भी लूट ली, तो थम लुटण खात्तर भी तैयार होंगे, न्यू जाणके के थारे गेल्या एक और भी सारया तै बढ़िया अर सारी हाण ठहरण आळी सम्पत्ति सै।

35 ज्यातै अपणे दुख म्ह भी विश्वास म्ह बणे रहों क्यूँके उसका ईनाम बड़ड़ा सै।

36 क्यूँके थारा धीरज धरणा जरूरी सै, ताके थम परमेसवर की इच्छा नै पूरी करके वो पा सको जो परमेसवर नै थारे तै वादा करया सै।

37 "क्यूँके पवित्र ग्रन्थ म्ह लिख्या सै, घणाए थोड़ा बखत रहग्या सै, जिब के आण आळा आवैगा अर वार न्ही करैगा।

38 पर मेरे धर्मी माणस विश्वास तै जिन्दा रहवैगे, जै वो विश्वास तै पाच्छे हट जावै तो मेरा मन उसतै राज्जी कोनी होवैगा।"

39 पर हम विश्वास तै हटण आळे कोनी के नाश हो जावै पर परमेसवर पै विश्वास करण आळे सां ताके हम अनन्त मौत तै बचाएँ जावां।

11

?????? ??

1 जो माणस परमेसवर म्ह विश्वास करै सै, वो ये बात आच्छी तरियां जाणै सै, के परमेसवर वे चीज उन ताहीं जरूर देवैगा, जिसकी आस वे राक्खे सै। उननै पूरा विश्वास सै, के जो चीज उननै इब्बे न्ही देखी, वो असलियत म्ह सै।

2 म्हारे पूर्वजां नै परमेसवर म्ह इस तरियां विश्वास करया था, इस करके परमेसवर उनतै खुश थे।

3 विश्वास तै ए हम जाणा सां, के सृष्टि परमेसवर के वचन तै बणी सै। हम या भी जाणै सां, के जो चीज हम देख सका सां, वे अनदेखी चिज्जां म्ह ते बणी सै।

4 विश्वास तै ए आदम के बेटे हाबिल नै, अपणे बड़े भाई कैन तै घणा बढ़िया बलिदान परमेसवर के खात्तर चढ़ाया, अर उस बलिदान के जरिये परमेसवर नै गवाही दी, के हाबिल एक धर्मी जन सै, क्यूँके परमेसवर उसकी भेंट तै खुश था, इब हाबिल मर लिया सै, अर हमनै उसके जरिये परमेसवर पै विश्वास करणा सिख्या सै।

5 हनोक के विश्वास के जरिये परमेसवर नै उस ताहीं जिन्दा ए सुर्ग पै उठा लिया, इस बजह तै इब ताहीं किसे नै उसकी लाश न्ही मिली, सुर्ग म्ह जाण तै पैहले उसनै परमेसवर ताहीं खुश करया था, जिसा के परमेसवर का पवित्र ग्रन्थ बतावै सै।

6 माणस परमेसवर नै खुश कर सकै सै, जै वे उसपै विश्वास करै तो। क्यूँके परमेसवर के धौरे आणआळे माणस नै विश्वास करणा चाहिये के वो परमेसवर सै, अर वो पूरी सच्चाई तै अपणे टोळ आळे नै ईनाम देवै सै।

7 विश्वास ए तै नूह नै परमेसवर के जरिये बाढ़ की चेतावनी पाकै, जिस ताहीं उसनै देख्या भी कोनी था। परमेसवर का डर मानते होए, अपणे कुणवे नै बचाण के खात्तर उसनै जहाज बणाया, नूह के विश्वास के कारण उसनै उस बखत के माणसां ताहीं जिननै विश्वास न्ही करया था, उन ताहीं दोषी ठेहराया, अर वो डूबके मरगे। नूह नै परमेसवर पै विश्वास करया था, इस करके परमेसवर नै उस ताहीं धर्मी ठेहराया था।

8 जिब परमेसवर नै अब्राहम ताहीं किते जाण खात्तर बुलाया था, तो उसनै विश्वास तै ए परमेसवर के हुकम ताहीं मानके, एक इसी जगहां लिकड़ गया, जो जगहां परमेसवर अब्राहम

ताहीं उसकी जायदाद के तौर पै देण आळा था, पर वो या कोनी जाणै था के वो कित्त जावै सै, अर वो फेर भी चला गया।

9 बिश्वास ए तै जिस देश ताहीं परमेसवर नै देण का वादा करया था, ओइ अब्राहम नै एक परदेशी की तरियां रहकै अपणे बेटे इसहाक अर अपणे पोत्ते याकूब सुधा तम्बुआ म्ह बसेरा करया, जो उसके गेल्या उस्से वादे के वारिस थे।

10 क्यूँके वो उस नगर की जो सुर्ग म्ह सै, अर जिसकी नीम पक्की सै, उसकी बाट देखै था, जिसका रचण आळा अर बणाण आळा परमेसवर सै।

11 यो सिर्फ बिश्वास ए सै, जिसके जरिये अब्राहम बाप बण सका, हालाकि अब्राहम भोत बूढा था, अर उसकी पत्नी सारा भी बाळक न्ही पैदा कर सकै थी, परमेसवर वो जरूर करै सै, जो उन ताहीं वादा करया था।

12 जब अब्राहम इतणा बूढा होगया था, के मरण आळा ए था, तो अकास म्ह सुर्ग के तारां अर समुन्दर के किनारे की बाळू की तरियां उसके अनगिणत वंश पैदा होए।

13 ये सारे माणस जिननै परमेसवर पै बिश्वास करया था, वे उन चिज्जां नै पाए बिना मरगे, जिसका परमेसवर नै उन खात्तर वादा करया था। वादा करी होई चीज न्ही पाई, पर उननै अपणे मन म्ह देखकै राज्जी होए अर मान लिया के हम धरती पै परदेशी अर बाहर के सां।

14 ये उन माणसां के बारे म्ह सै, जो कहवै सै के वे इस दुनिया म्ह अजनबी सै, वे दिखावै सै के अपणे देश की टोह म्ह सै।

15 अर जिस देश तै वे लिकड़ आये थे, जै उसके बारे म्ह सोचते तो वे उल्टा जा सकै था।

16 पर वे एक घणा बढ़िया यानिके सुर्गीय देश के चाहण आळे सै, इस्से खात्तर परमेसवर उनका परमेसवर कुह्णण म्ह खुशी महसूस करै सै, क्यूँके उसनै उनकै खात्तर एक नगर तयार करया सै।

17 बिश्वास ए तै अब्राहम नै, परखे जाणकै बखत म्ह, अपणे बेटे इसहाक ताहीं बलिदान चढ़ाया, उस्से नै परमेसवर के वादा ताहीं पाया, क्यूँके वो अपणे इकलौते बेटे की बलि देण खात्तर भी तैयार होगया था।

18 अर जिसतै न्यू कह्या गया था, “इसहाक तै तेरा वंश कुह्णवैगा,” वोए अपणे एकलौते बेटे ताहीं बलिदान चढ़ाण लागया।

19 क्यूँके उसनै मान लिया, के परमेसवर सामर्थी सै के इसहाक ताहीं मरे होया म्ह तै जिन्दा कर सकै सै। यो इसाए था के उननै इसहाक ताहीं मौत के मुँह तै उल्टा पा लिया हो, उदाहरण की रीत पै वो उस ताहीं फेर मिल्या।

20 बिश्वास ए तै इसहाक नै अपणे दो बेटे याकूब अर एसाव ताहीं आण आळी वात्तां के बारे म्ह आशीर्वाद दिया।

21 बिश्वास ए तै याकूब नै मरदे बखत यूसुफ के दोन्नु बेटेचौं म्ह तै एक-एक ताहीं आशीर्वाद दिया, अर अपनी लाट्टी का सहारा लेकै प्रभु की आराधना करी।

22 बिश्वास ए तै यूसुफ नै, जब वो मरण पै था, तो आत्मबिश्वास तै कह्या, के इस्राएल के माणस मिस्र देश छोड़ देंगे, हुकम देकै जब वो मिस्र देश छोड़ के जान्दे, तो उसकी हाडियाँ ले जान्दे।

23 तब मिस्र के राजा नै यो हुकम दिया था के सारे इस्राएली छोरे पैदा होण पै मारे जावेंगे, तो बिश्वास के कारण ए तै मूसा नबी के माँ-बाप नै उस ताहीं, पैदा होए पाचछै तीन महिन्ने ताहीं ल्हकोए राख्या, क्यूँके उननै देख्या के बाळक भोत सुधरा सै, अर वे राजा के हुकम मानण तै डरे कोनी थे।

24 मिस्र देश के फिरौन की बेटटी नै मूसा ताहीं अपना लिया था, जब मूसा बड़ा होया, बिश्वास तै वो न्ही चाहवै था, के माणस उस ताहीं राजकुमारी के बेटे के रूप म्ह बुलावै।

25 ज्यांतै के उस ताहीं पाप म्ह माडे-से दिन के सुख भोग्गण तै परमेसवर के माणसां के गेल्या दुख भोग्गणा घणा बढ़िया लागया।

26 उसने मसीह के कारण बदनाम होण ताहीं मिस्र देश के भण्डार तै बड़ड़ा धन समझया, क्यूँके वो जो करण लागरया था, उस ताहीं वो जाणे था, के सुर्ग म्ह उसका ईनाम मिलेगा।

27 विश्वास ए तै राजा कै छोटै तै ना डरकै उसने मिस्र देश ताहीं छोड़ दिया, क्यूँके वो समझ गया था, के उसने इसा लागया, के मान्नों उसने परमेसवर ताहीं देख लिया हो, जो अदृश्य सै।

28 विश्वास ए तै मूसा नबी नै फसह अर लहू छिड़कण का तरीका मान्या, जिसतै के जेट्टा का विनाशक दूत इस्राएलियाँ के जेट्टे बेट्टा पै हाथ न्ही गैरे।

29 विश्वास ए तै इस्राएल के माणस लाल समुन्दर कै पार इसे उतरगे, जिस तरियां सूक्खी धरती पर तै, अर जिब मिस्र देश नै उससे तरियां ए करणा चाह्या तो समुन्दर उल्टा अपणी जगहां पै आ गया अर बाढ़ आ गयी अर सब डूब मरे।

30 क्यूँके इस्राएल के माणस परमेसवर पै विश्वास करै थे, इस करके वे यरीहो नगर की चारदीवारी के च्यारु ओड़ सात दिनां तक लगातार चालते रहे, तो चारदीवारी पड़गी।

31 विश्वास ए तै राहाब बेश्या परमेसवर का हुकम ना मानण आळा कै गेल्या नाश न्ही होई, उसने इस्राएली जासूसां का स्वागत करया जो यरीहो नगर नै छुप के देखण आये थे।

32 इब और के कहूँ? क्यूँके बखत कोनी रहया के गिदोन का, अर बाराक का अर शिमशोन का, अर यिफतह जिंसा माणसां के बाँरें म्ह, अर दाऊद अर शमूएल का, अर नबियाँ का जिक्र करूँ।

33 इसे विश्वास कै जरिये राज्य जीत्ते, धर्म के काम करे, वादा करी होई चीज पाई, शेर उन ताहीं खा न्ही सका।

34 आग की ज्वाला ताहीं शीळा करया, तलवार की धार तै बच लिकड़े, एक बार कमजोर होण पै फेर तै ठाड्डे बना दिया, वे लड़ाई म्ह वीर लिकड़े, उननै अपणे दुश्मनां की पलटन ताहीं खदेड़ दिया।

35 लुगाईयाँ नै अपणे मरे होया ताहीं दुबारा जिन्दा पाया, कितने तो मार खांदे-खांदे मरगे अर वे अपना विश्वास न्ही छोड़णा चाहवै थे, ताके वे जेळ तै रिहा करे जा सकै, ज्यातै के घणे मरण के बाद फेर तै जिन्दा हो जावै, अर वे एक बढ़िया जिन्दगी पा सकै।

36 घणखरयां नै मखौल म्ह उड़ाया गया, अर कई नै कोड़े खाणे पड़े, बल्के कई नै बेलानां तै जुड़कै, जेळ म्ह गेरया गया।

37 कईयाँ पै पत्थर बरसाए गए, औरै तै चीरे गये, कईयाँ ताहीं तलवार तै मौत के घाट उतार दिया गया, वे गरीब थे, उन ताहीं यातनाए भी दी गई, अर उनकै गैल बुरा व्यवहार करया गया, वे भेड़ों अर बकरियाँ की खाल ओढ़ कै आससै-पाससै भटकदे रहे।

38 अर जंगळां, अर पहाड़ां, अर गुफायां म्ह, अर धरती की दरारां म्ह भटकदे हाँडें। या बुरी दुनिया इन विश्वासियाँ जोगगी कोनी थी।

39 विश्वास ए कै जरिये इन सारया के बाँरे म्ह परमेसवर नै उनके तारीफ करी सै, तोभी वादा करी होई उस चीज नै वो पा न्ही सकै जो परमेसवर नै उन ताहीं वादा करया था।

40 क्यूँके परमेसवर कै धौरे सिर्फ उनकै खात्तर न्ही, बल्के म्हारै खात्तर भी एक घणी बढ़िया तरकीब सै, परमेसवर उन ताहीं सिध्द बनाणा चाहवै सै, पर सिर्फ म्हारे साथ मिलकै।

12

1 इस बजह तै जिब घणखरे माणसां के विश्वास की गवाही जो उनकी जिन्दगी म्ह सै, म्हारे बाँरे म्ह बड़े बाढ़ळ की तरियां घेरे होए सै, तो आओ, हरेक रोकणआळी चीज अर उलझाण आळे पाप ताहीं दूर करके, अर राह पै हमनै चालणा सै, धीरज तै चाल्ला।

2 अर विश्वास के कर्ता अर सिध्द करण आळे यीशु की ओड़ लखान्दे रहवां, उस आनन्द कै खात्तर जो विश्वास म्ह मिलण आळा था, शर्म की कुछ परवाह न्ही करके कूरुस का दुख सहया, अर परमेसवर कै सिंहासन के सौळी ओड़ महिमामय जगहां जा बेट्या।

3 यीशु के उदाहरण के बारे में सोचो, जिसने अपने विरोध में पापियों का इतना विरोध सह लिया ताके थम निराश होके हिम्मत ना छोड़ दो ।

4 पाप के विरुद्ध अपने संघर्ष में थमने उसते इसी मुठभेड़ नही करी के थारा लहू बह्या हो,

5 अर थम उस उपदेश ताहीं, जो थारे ताहीं बेट्टा की तरियां दिया जावै सै, भूल गये सो: “हे मेरे बेट्टे, प्रभु की ताड़ना नै हल्की बात ना जाण, अर जब वो तन्ने घुड़के तो हिम्मत ना छोड़डै ।

6 क्यूँके प्रभु जिसते प्यार करै सै, उसकी ताड़ना भी करै सै, अर जिस ताहीं बेट्टा बना लेवै सै, उसके कोड़े भी मारै सै, ताके अपने बाळकां नै सुधार सकै ।”

7 थम दुख नै पिता की ताड़ना समझके सह ल्यो, परमेसवर थारे ताहीं बेट्टा जाणके थारे गेल्या सलूक करै सै वो कौण सा बेट्टा सै, जिसकी ताड़ना पिता नही करदा?

8 जै वा ताड़ना जिसके सब भागी होवै सै, अर थारी कोनी होई, तो थम परमेसवर की ऊलाद कोनी ।

9 फेर जब के म्हारा शारीरिक पिता भी म्हारी ताड़ना करया करै था अर हमने उसका आदर-मान करया, तो यो और भी जरूरी सै के अपनी आत्मायाँ के पिता के ओड़ ते अनुशासन स्वीकार करा सां, ताके म्हारे धौरे अनन्त जीवन हो ।

10 म्हारे धन्यवादी पिता तो, अपनी समझके मुताबिक थोड़े-से बखत के खात्तर म्हारी ताड़ना करै सै, पर वो तो म्हारे फैयदे के खात्तर करै सै, के हम भी उसके समान पवित्र बण जावां ।

11 इस बखत ताड़ना दी जावै सै, उस बखत ताड़ना अच्छी कोनी लागै, बल्के वा दुख की बात दिखाई देवै सै । तोभी जो उस ताहीं सहन्दे-सहन्दे पक्के होंगे सै, बाद में उनने चैन के गेल्या धर्म का ईनाम मिलै सै ।



12 इन सारी बातों के कारण सब मजबूत बणो अर उत्साहित होओ,

13 अर अपने पायां के खात्तर सीध्नी राही बणाओ के लंगड़ा भटक ना जावै पर भला-चंगा हो जावै ।

14 सारया ते मेळ-मिलाप राखो, अर पवित्र होण खात्तर हरेक ढाळ की कोशिश म्ह रहों, जिसके बिना कोए प्रभु ताहीं कदे भी नही देखैगा ।

15 सावधान रहो, इसा ना हो के कोए परमेसवर के अनुग्रह ते दूर रह जावै या कोए कड़वी जड़ फूटके दर्द देवै, अर उसके जरिये घणखरे माणस परमेसवर के सच्चे रास्ते ते भटक जावै सै ।

16 इसा ना हो के कोए माणस जाण, या अब्राहम के पोत्ते एसाव की तरियां उस म्ह कोए बुराई ना होवै, क्यूँके वो जेट्टा बेट्टा था, उसने खास उत्तराधिकारी होण का हक था, पर उसने अपने जन्म सिध्द होण के पद का सम्मान नही करया, इस करके उसने अपने छोटटे भाई याकूब ताहीं एक बर के खाणे के बदले म्ह अपना जन्म सिध्द होण का पद बेच दिया ।

17 थमने बेरा सै के बाद म्ह जब उसने आशीष पाणी चाही तो उस ताहीं मना कर दिया गया, अर आँसू बहा-बहाके आशीष के मांगण पे भी वो पैहले जो कुछ भी करया था, उस ताहीं बदलण खात्तर कुछ भी नही कर सका ।

18 थम आग की लपटे, अन्धेरे, काळी घटा जिंसा असली पहाड़ पे नही आये सां, जिंसा के इस्राएल के माणस सीने पहाड़ पे आये थे, जब परमेसवर नै उन ताहीं अपने नियम दिए थे ।

19 थम तुरही की आवाज के धौरे कोनी सां, अर बोल्लण आळे के इसे शब्द के धौरे नही आए, जिसके सुणणआळे ते बिनती करी के इब म्हारे ते और बात ना करी जावै ।

20 उनने इसा इस करके कह्या, क्यूँके वे इस हुकम नै बर्दाश्त नही कर सकै, के परमेसवर नै उनते कह्या था, “जै कोए पशु भी पहाड़ ताहीं छुवै तो उसपे पत्थर बरसाये जावै ।”

21 अर वो दर्शन इसा डरावणा था के मूसा नबी नै भी कह्या, “मै घणा डरूँ अर काप्पू सूँ ।”

22 पर थम सिय्योन के पहाड़ पे आये सां, जित्त सुर्गीय यरुशलम से, जो जिन्दे परमेसवर का नगर सै, उसके धौरे अर लाखों सुर्गदूत खुशी उत्सव मनावै सै ।

23 थम उन परमेसवर के खास बाळकां की सभा अर कलीसिया म्ह आये सों, जिनके नाम सुर्ग म्ह लिक्खे होए सै, परमेसवर के धोरै जो सब का न्यायी सै, सुर्ग म्ह धर्मी माणसां की आत्मायाँ खात्तर जो इब सिध्द करे गये सै।

24 थम यीशु के धोरै आए सों, जो परमेसवर अर माणसां के बीच म्ह करार बणाया, अर छिड़काव का लहू जो माफी के बोरें म्ह बोल्लै सै, ना के न्याय के बोरें म्ह, जो हाबिल के लहू तै घणी बढिया बात कहवै सै।

25 सावधान रहो, परमेसवर के हुकम मान्नो, जो थारे तै बात करण लागरया सै, क्यूँके इस्राएल के माणस जिब धरती पै मूसा नबी की चेतावनी पाके बच पाए, क्यूँके उननै मूसा नबी की बात कोनी मान्नी थी, तो हम सुर्ग पै तै चेतावनी देण आळे परमेसवर तै मुँह मोड़के उसके छो तै किस तरियां बच सकांगें?

26 जिब परमेसवर सीनै पहाड़ पै तै बोल्ल्या, तो उसके शब्द नै धरती ताहीं भी हला दिया, पर इब उसनै यो वादा करा सै, “एक बर फेर मै ना सिर्फ धरती ताहीं बल्के अकास ताहीं भी हला देऊंगा।”

27 अर यो बोल “एक बर फेर” इस बात ताहीं दिखावै सै के बणाई होई चीज हलाई, अर हटा दी जावैगी, ताके जो चीज हलाई न्ही जान्दी, वे पक्की तरियां बणी रहवै।

28 हमनै जो राज्य मिला सै वो न्ही हिलाया जा सकता, इस कारण हमनै उसका धन्यवादी होणा चाहिए, जिसके जरिये हम भगति, अर भय सुधा परमेसवर की इसी आराधना कर सकां सां जिसतै वो राज्जी होवै सै,

29 क्यूँके म्हारा परमेसवर राख करण आळी आग सै।

13

???? ???? ???? ?? ?????????

1 एक-दुसरे तै भाण-भाई की तरियां प्यार करो।

2 अजनबी की भी सेवा पाणी करो, क्यूँके इसके जरिये कई माणसां नै अनजाणे म्ह सुर्गदूतां का आदर-मान करया सै।

3 केदियां का इस ढाळ बेरा लेओ के मान्नो उनके गैल थम भी कैद सो, अर जिन ताहीं पीड़ित करया जावै सै, जिसा के थम अपणी देह म्ह दर्द महसूस करो सों।

4 ब्याह सारया म्ह आदर की बात समझी जावै, अर ब्याह होण के बाद एक-दुसरे के प्रति वफादार रहों, क्यूँके परमेसवर जार, अर बिगान्नी लुगाई के धोरै जाणीयां का न्याय करेगा।

5 अपणी जिन्दगी नै धन के लालच तै मुक्त राखों, अर जो थारे धोरै सै उस्से पै सन्तोष करो, क्यूँके उसनै आप्णे ए कह्या सै, “मै तन्ने कदे भी न्ही छोड़ूंगा, अर ना कदे भी त्यागूंगा।”

6 ज्यांतै हम बिना डरे कह्वां सां, “प्रभु मेरा मददगार सै, मै न्ही डरूंगा, माणस मेरा के करै सकै सै।”

7 जो थारे अगुवें थे, अर जिन नै थारे ताहीं परमेसवर का वचन सुणाया सै, उननै याद राखो, अर गौर करो के किस तरियां जीणा अर मरणा सै, परमेसवर म्ह एके तरियां का विश्वास दिखाओ जो उननै दिखाया।

8 यीशु मसीह काल अर आज अर युगानुयुग एक सा सै, वो कदे न्ही बदलता।

9 क्यूँके यीशु मसीह कदे न्ही बदलता, इस करके थम नई अर अलग शिक्षा ना अपणाओ। क्यूँके थारे मनां खात्तर आच्छा सै, के वे अनुग्रह के जरिये मजबूत बणै, ना के उन खाण-पीण आळी चिज्जां के जरिये, उन माणसां नै कोए फायदा न्ही होन्दा जो इसे काम करै सै।

10 म्हारे धोरै एक वेदी सै जिस म्ह तै तम्बू के याजक नै खाण का कोए हक कोनी, जो तम्बू की सेवा करै सै।

11 क्यूँके पैहले करार के मुताबिक हर साल जिन जानवरों का लहू महायाजक पापबलि के खात्तर घणी पवित्तर जगहां म्ह पापां की माफी खात्तर ले जावै सै, उनकी देह छावणी के बाहरणै जळाई जावै सै।

12 इस्से के कारण, यीशु नै भी माणसां ताहीं अपणे ए लहू के जरिये पवित्तर करण के खात्तर यरुशलैम नगर के बाहरणै दुख सहया अर मारा गया।

13 आओ हम यहूदी नियम-कायदा नै छोड़कै यीशु म्ह विश्वास करां, अर उसके साथ दुख टावां।

14 क्यूँके इस दुनिया म्ह म्हारा कोए स्थाई घर कोनी, बल्के हम एक आण आळे नगर की टोह म्ह सां।

15 इस करके हम प्रभु यीशु के जरिये हम अपणे होट्टां तै परमेसवर की स्तुति करणा जारी राख्वां, वो म्हारा बलिदान सै, यानिके उन होंटा का फळ जो उसके नाम का अंगीकार करै सै, परमेसवर ताहीं सारी हाण चढ़ाया करै।

16 भलाई करणा अर उदारता दिखाणा ना भूलो, क्यूँके परमेसवर इसे बलिदानां तै राज्जी होवै सै।

17 अपणे अगुवां का हुकम मान्ना अर उनके अधीन रहो, क्यूँके वे थमनै देखण लागरे सै, ताके थम भटक ना जाओ, अर उन ताहीं अपणी सेवा के बारे म्ह परमेसवर ताहीं लेखा देणा सै, वे यो काम राज्जी होके करै, यो काम उदास्सी के साथ कोनी करणा, क्यूँके इस हालत म्ह थमनै किमे फायदा कोनी।

18 म्हारै खात्तर प्रार्थना करदे रहो, क्यूँके हमनै भरोस्सा सै के म्हारी अन्तरात्मा शुद्ध सै: हम हर बखत भले काम करणा चाहवां सां।

19 प्रार्थना करण के खात्तर मै थमनै और भी समझाऊँ सूँ के मै तावळा थारे धोरै दुबारा आ सकूँ।

20-21 अर इब शान्तिदाता परमेसवर, जिसनै म्हारै प्रभु यीशु ताहीं मुर्दा म्ह तै जिन्दा करया, वो थारे ताहीं सब कुछ दे, जो उसकी इच्छा पूरी करण खात्तर चाहिये सै, परमेसवर यीशु मसीह की शक्ति के जरिये वो सब थारे म्ह पूरा करै, जो उस ताहीं खुशी दे सकै सै, यीशु मसीह भेड़ुं का महान् रुखाळा सै, उसनै अपणे लहू के जरिये सदा के करार नै स्थापित करया सै, उस ताहीं सदा महिमा मिलती रहवै। आमीन।

22 हे विश्वासी भाईयो, मै थारे तै बिनती करूँ सूँ, के उत्साहित करण आळे इन सन्देशां ताहीं धीरज तै सह ल्यो, क्यूँके मन्नै थारे ताहीं थोड़े-से शब्दा म्ह लिख्या सै।

23 थमनै यो बेरा लागया हो के तीमुथियुस, म्हारा भाई जेळ की कैद तै छुटगया सै, अर जै वो तावळा आ ग्या तो मै उसके गेल्या थारे तै भेंट करूँगा।

24 अपणे सारे अगुवां अर सारे पवित्तर माणसां ताहीं नमस्कार कहो। इटली देश के विश्वासी थमनै नमस्कार कहवै सै।

25 थम सारया पै परमेसवर का अनुग्रह होंदा रहवै। आमीन।

याकूब की ओड़ तै चिट्ठी



याकूब की चिट्ठी दुनियादारी के बारे में ह्द ह्दियातां की एक सूची सै, जो सारे दुनिया ह्द तित्तर-बितर होके रहण आठे परमेसवर के माणसां खात्तर लिखी गई सै। लेखक मसीह बरताव अर चाल-चलण के खात्तर दुनियादारी ज्ञान अर मार्गदर्शन तै सम्बन्ध ह्दियात नै पेश करण खात्तर कई जिन्दा मिसाल का इस्तमाल करै सै। वो कई तरियां की बाततां नै मसीह नजरिये तै विचार करै सै, जिस तरियां अमीरी अर गरीबी, इम्तिहान, आच्छा चाल-चलण, पक्षपात, विश्वास, अर कर्म, जीभ के काम, अकलमन्दी, लड़ाई-झगड़ा, धमण्ड अर दीनता, दुसरयां पै दोष लगाणा, डींग मारणा, धीरज धरणा, अर प्रार्थना करणा। या चिट्ठी मसीहयत का पालन करण ह्द विश्वास के साथ कर्म करण के उप्पर जोर देवै सै।

रूप-रेखा

- जानकारी 1:1 विश्वास अर अकलमन्दी 1:2-8
- गरीबी अर धन-दौलत 1:9-11
- परख अर लोभ 1:12-18
- सुणणा अर करणा 1:19-27
- पक्षपात के खिलाफ चेतावनी 2:1-13
- विश्वास अर कर्म 2:14-26
- मसीह अर उसकी जीभ 3:1-18
- मसीह अर संसार 4:1-5:6
- कई तरियां के आदेश 5:7-20



1 में याकूब, परमेसवर अर प्रभु यीशु मसीह का दास सूं, मेरी ओड़ तै थम सारया नै मेरा नमस्कार। मै या चिट्ठी इस्राएल के उन यहूदी मसीह विश्वासियां नै लिखूं सूं, जिनके बाराह गोत्र सारी दुनिया ह्द तित्तर-बितर होके रहण लागरे सै।



- 2 हे मेरे विश्वासी भाईयो, जिव थम कई ढाळ की मुसीबतां का सामना करो सो, तो इसनै पूरे आनन्द की बात समझो,
- 3 क्यूँके थम जाणो सों, के थारे विश्वास के परखे जाण तै धीरज बढ़े सै।
- 4 हरेक बात ह्द धीरज धरणा सीखों, ताके थम आत्मिकता ह्द पूरे सिध्द हो जाओ, अर थारे ह्द किसे बात की कमी ना रहवै।
- 5 पर थारे ह्द तै जै किसे नै बुद्धि की कमी सै, तो परमेसवर तै माँगौ, जो बिना उल्हाणा दिये, सारया नै बड़ी उदारता तै देवै सै, अर उस ताहीं दी जावैगी।
- 6 पर वो बिना शंका के विश्वास तै माँगौ, अर कुछ शक ना करै, क्यूँके शक करण आळा माणस टिक्या न्ही रहन्दा जो समुन्दर की उस लैहर की तरियां सै जो हवा के चाल्लण तै उच्छुळै सै।
- 7 शक करण आळा माणस या बात बिल्कुल ना सोचवै, के उसने प्रभु तै कुछ मिलेगा,
- 8 वो माणस दोगला सै अर अपनी किसे बात ह्द टिकता कोनी।



- 9 जो विश्वासी भाई गरीब सै, उननै खुश होणा चाहिए, क्यूँके परमेसवर उनकी इज्जत करै सै,
- 10 अर धनवान अपने ऊँचे पद पै धमण्ड ना करै, क्यूँके वो घास के फूल की ढाळ सूख जावैगा।
- 11 सूरज निकडदे ए घना घाम पड़े सै, अर घास नै सुखा देवै सै, अर उसका फूल झड़ जावै सै, अर उसकी खूबसूरती जान्दी रहै सै। इस ढाळ धनवान भी अपने काम करदे-करदे माट्टी ह्द मिल ज्या जावैगा।

???? ? ? ? ?

12 धन्य सै वो माणस जो परखे जाण पै खरे उतरै सै, क्यूँके परखे जाणके बाद ए जीवन का वो मुकुट पावेंगे, जिसका वादा परमेसवर नै उन माणसां तै करया सै, जो परमेसवर तै प्यार करै सै।

13 जिव किसे की परख हो सै, तो वो या ना कहवै के परमेसवर मन्नै परखण लागरया सै, क्यूँके परमेसवर बुरी बाततां की परख म्ह कोनी पड़ता, अर ना वो किसे की परख आप करै सै।

14 पर हरेक माणस अपनी ए लालसा म्ह पड़के अर फँसके परख्या ज्या सै।

15 जिव बुरी इच्छा भोत घणी बढ ज्या सै, तो पाप नै जन्म देवै सै, अर पाप जिव भोत घणा बढ जावै सै, तो अनन्त मौत नै जन्म देवै सै।

16 हे मेरे प्यारे विश्वासी भाईयो, धोक्खे म्ह ना रहों।

17 क्यूँके हरेक आच्छा वरदान अर हरेक उत्तम दान परमेसवर की ओड़ तै ए सै, जो सिध्द सै, जिसनै आसमान की ज्योतियाँ बणाई सै, अर वो इनकी छाया की तरियां कदे बदलता कोनी।

18 उसनै अपनी ए इच्छा तै, म्हारै ताहीं सच के वचन के जरिये जन्म दिया, ताके हम उसकी बणाई होई रचना म्ह सब तै खास हो, जिस तरियां किसान खात्तर फसल का पैहला हिस्सा नाज होवै सै।

????? ? ? ? ? ?

19 हे मेरे प्यारे विश्वासी भाईयो, या बात थम जाण ल्यो, हरेक माणस सुणण के खात्तर तैयार अर बोल्लण म्ह उतावळा ना हो, अर अपने छो नै काबू म्ह करण आळा हो।

20 क्यूँके माणस जिव छो म्ह हो सै तो वो धार्मिकता के काम न्ही कर सकता, जो परमेसवर उसतै करवाणा चाहवै सै।

21 इस करके सारे मन की गंदगी अर नफरत नै दूर करके, परमेसवर के उस वचन नै नम्रता तै मान ल्यो, जो मन म्ह बोया गया सै, अर जो थारे प्राणा का उद्धार कर सकै सै।

22 पर परमेसवर के वचन पै चाल्लण आळे बणो, अर सिर्फ सुणण आळे ए न्ही, जो अपने-आपनै धोक्खा देवै सै।

23 क्यूँके जो कोए परमेसवर के वचन का सुणण आळा हो, अर उसपै चाल्लण आळा ना हो, तो वो उस माणस के समान सै, जो अपना मुँह शीशे म्ह देखै सै।

24 इस करके के वो अपने-आपनै देखके चाल्या जावै सै, पर जिब्बे भूल जावै सै, के मै किसा था।

25 पर जो माणस ध्यान तै परमेसवर के सिध्द नियम-कायदा नै पढता रहवै सै, जो हरेक माणसां नै पापां तै आजादी देवै सै, परमेसवर उसनै आशीर्वाद देवैगा, क्यूँके वो सुणके भूलता कोनी, पर उसाए करै सै।

26 जै कोए अपने-आपनै परमेसवर का भगत समझै, अर अपनी जीभ पै लगाम ना लगावै, पर अपने मन नै धोक्खा दे, तो उसकी भगति बेकार सै।

27 म्हारे पिता परमेसवर की नजर म्ह सच्ची अर शुद्ध भगति या सै, के अनाथ्यां अर विधवाया के क्लेश म्ह उसकी सुधि ले, अर अपने-आपनै दुनिया तै बेदाग राक्खै।

2

???????? ? ? ? ? ? ? ? ? ? ?

1 हे मेरे विश्वासी भाईयो, थम म्हारे महिमामय प्रभु यीशु मसीह के चेल्ले सों, इस करके थारे म्ह भेद-भाव की भावना ना हो।

2 जै एक माणस सोन्ने के छल्ले अर सुथरे लत्ते पहरे होए थारी मण्डली म्ह आवै, अर एक कंगाल भी मैल्ले कुचले लत्ते पहरे होए आवै,

3 अर थम उस सुथरे लत्ते आळे नै इज्जत देके कहो, “तू ओड़ै खास जगहां बैठ,” अर उस कंगाल तै कहो, “तू ओड़ै खडचा रहै,” या “मेरे पायां धारे बैठ।”

4 तो के थमनै भेद-भाव कोनी करया, अर बुरे विचार तै न्याय करण आळे न्ही बणो?

5 हे मेरे प्यारे विश्वासी भाईयो, सुणो । के परमेसवर नै इस दुनिया के कंगालां ताहीं न्ही छटाटा, के विश्वास म्ह धनी हो जाओ, अर उस राज्य के अधिकारी हो जाओ, जिसका वादा उसनै उनतै करया सै, जो उसतै प्यार करै सै?

6 पर थमनै उस कंगाल की बेजती करी सै । के धनी माणस ए थारे पै जुल्म न्ही करदे, अर के वे थमनै कोट-कचेहड़ी म्ह न्ही घसीट-घसीट कै ले जान्दे?

7 ये वे धनी माणस ए सै, जो प्रभु यीशु के महिमामय नाम की, जिसके थम कहवाओ सों, बेजती करै सै ।

8 तोभी जै थम पवित्र ग्रन्थ के इस वचन कै मुताबिक के “तू अपणे पड़ोसी तै अपणे समान प्यार कर” साच्ये उस राजसी नियम नै पूरा करो सों, तो आच्छा ए करो सों ।

9 पर जै थम भेद-भाव करो सों तो पाप करो सों, अर मूसा के नियम-कायदे थमनै कसूरवार बतावै सै ।

10 क्यूँके जो कोए मूसा के सारे नियम-कायदे नै पुगावै सै, पर एके बात म्ह चूक जावै, तो वो सारी बाततां म्ह कसूरवार बण लिया सै ।

11 इस करके के जिसनै यो कह्या, “तू जारी ना करिये” उस्से नै यो भी कह्या, “तू हत्या ना करिये,” इस करके जै तन्नै जारी तो कोनी करी, पर हत्या करी सै, तोभी तू नियम-कायदा का तोड़ण आळा बणग्या ।

12 इस करके थारी कथनी अर करणी उनके समान हो, जिनका न्याय उस नियम-कायदा कै मुताबिक करया जावैगा, जो म्हारे ताहीं आजादी देवै सै ।

13 क्यूँके जिसनै दया न्ही करी, उसका न्याय बिना दया के होगा: जै थम दुसरयां पै दया न्ही करते, तो न्याय के दिन परमेसवर भी थारे पै दया कोनी करैगा ।

QUESTION

14 हे मेरे विश्वासी भाईयो, जै कोए कहवै के मै प्रभु यीशु मसीह पै विश्वास करूँ सूँ, पर वो उसके मुताबिक आच्छे काम न्ही करदा हो, तो इसतै के फायदा? कै इसा विश्वास उसका उद्धार कर सकै सै?

15 जै कोए विश्वासी भाई या भाण जिनके धौरै पैहरण खात्तर भी लत्ते ना हो, अर उननै रोज खाण नै भी ना मिलता हो,

16 मान ल्यो थारे म्ह तै कोए उनतै कहवै, “ठीक-ठाक जाओ, थम गरम लत्ते पैहरो अर छिके रहों,” पर जो चीज देह खात्तर जरूरी सै, वा उनतै ना देवै, तो के फायदा?

17 उस्से तरियां विश्वास भी, जै आच्छे कर्म सुधा ना हो, तो अपणे सुभाव म्ह मरया होया सै ।

18 बल्के कोए या कह सकै सै, “तन्नै विश्वास सै, अर मै कर्म करूँ सूँ।” तू अपणा विश्वास मन्नै आच्छे कर्म बिना तो दिखा, अर मै अपणा विश्वास तन्नै अपणे कर्मा कै जरिये दिखाऊँगा ।

19 तन्नै विश्वास सै, के एके परमेसवर सै, तू आच्छा करै सै । ओपरी आत्मा भी विश्वास करै सै, अर डर तै थरथर काप्यै सै ।

20 पर हे बिना अकल के माणस, के तू यो भी न्ही जाणदा के बिना आच्छे कर्म विश्वास बेकार सै?

21 म्हारे पूर्वज अब्राहम नै अपणे बेटे इसहाक ताहीं (बलि खात्तर) वेदी* पै चढ़ाया, तो वो आच्छे कर्मा तै धर्मी ठहरया गया ।

22 थमनै देख लिया के उसके काम कै गैल विश्वास नै मिलके असर करया, अर आच्छे काम के कारण उसका विश्वास सिध्द होगया ।

23 अर पवित्र ग्रन्थ का यो वचन पूरा होया: “के अब्राहम नै परमेसवर का विश्वास करया,” अर इस खात्तर धर्मी बण गया, अर वो परमेसवर का साथी कुह्याया ।

24 इस ढाळ थमनै देख लिया, के माणस सिर्फ विश्वास तै ए न्ही, पर भले कर्मा तै भी धर्मी मान्ना जावै सै ।

* 2:21 2:21 वेदी-परमेसवर ताहीं भेट चढ़ाण खात्तर एक जगहां

25 उस्से तरियां राहाब बेश्या भी, जिब उसनै जासूसों ताहीं अपणे घर म्ह शरण दी अर दुसरे राह तै बिदा करया, तो आच्छे कर्मां तै वा धर्मी बणी।

26 जिस तरियां देह आत्मा बिना मरी होई सै, उस्से तरियां बिश्वास भी आच्छे कर्म बिना मरया होया सै।

3

ॐॐॐ ॐॐ ॐॐ ॐॐॐ ॐॐॐ

1 हे मेरे बिश्वासी भाईयो, थारे म्ह तै कलीसिया म्ह घणे उपदेशक ना बणै, क्यूँके थम जाणो सों के हम जो उपदेशक सां, म्हारा न्याय दुसरयां तै भी घणा सख्ताई तै करया जावेगा।

2 हम सब घणीए बार चूक जावां सा, पर जो कोए मुँह तै गलत बात न्ही बोलता, वोए तो सिध्द माणस सै, अर वोए सारी देह पै भी लगाम लगा सके सै।

3 जिब हम बस म्ह करण खात्तर घोडचा कै मुँह पै लगाम लगावा सां, तो हम उस घोड़े नै भी काबू कर सकां सां।

4 चाहे हवा कितनी भी तेज क्यूँ ना हो, एक छोट्टी सी पतवार तै, एक माँझी एक बड़े जहाज नै भी मोड़ सके सै।

5 उस्से तरियां जीभ भी एक छोट्टा सा अंग सै, अर वा बड़ी-बड़ी बात करण की डींग मारै सै। देख्खों, छोट्टी सी चिंगारी तै कितने बड़े वण म्ह आग लाग ज्या सै।

6 हाँ, जीभ एक आग के समान सै, या म्हारे देह का एक इसा खतरनाक हिस्सा सै, जो माणस तै अधर्म के काम करवा देवै सै, अर उसकी पूरी जिन्दगी नै बरबाद कर देवै सै, या म्हारे जीवन नै नरक की आग के समान खतम कर सके सै।

7 हरेक ढाळ के जंगली पशु, पंछी, रेंगण आळे जन्तु, अर पाणी के जीव, तो माणस के बस म्ह हो सके सै, अर बस म्ह हो भी गये।

8 पर जीभ नै कोए भी बस म्ह न्ही कर सकता, या एक इसी खतरनाक बला सै, जो कदे रूकती कोन्या, जो साँप के समान, जहर तै भरी होई सै।

9 जीभ तै ए हम पिता परमेसवर अर प्रभु की बड़ाई करा सां, अर इस्से तै जो परमेसवर के रूप म्ह बणाये गये माणसां नै श्राप देवां सां।

10 एके मुँह तै आशीष अर श्राप दोनु लिकड़े सै। हे मेरे बिश्वासी भाईयो, इसा न्ही होणा चाहिए।

11 धरती के एके चोवै* तै मिट्टा अर खारा पाणी दोनु न्ही लिकड़ सकदे।

12 हे मेरे बिश्वासी भाईयो, के अंजीर के पेड़ म्ह जैतून, या अंगूर की ढाळी म्ह अंजीर लाग सके सै? उस्से तरियां खारे चोवै तै मिट्टा पाणी न्ही लिकड़ सकता।

ॐॐॐॐॐ ॐॐॐॐ

13 जै थम समझदार अर परमेसवर की वात्तां नै समझण आळे माणस सों, तो इस बात नै नरमाई अर समझदारी तै एक आच्छा जीवन जी के, साबित करो।

14 पर जै थारे मन म्ह घणी जळण अर मतलबीपण सै, तो अपणे ज्ञान का ज्यादा दिखावा ना करो, क्यूँके इसा करण तै थम सच नै छुपाओ सों।

15 इसा ज्ञान परमेसवर की ओड़ तै न्ही, बल्के वो ज्ञान दुनियावी, शारीरिक अर शैतान की ओड़ तै सै।

16 क्यूँके जड़ै जळण अर मतलबीपण होवै सै, ओड़ै बखेड़ा अर हरेक ढाळ के बुरे काम भी होवै सै।

17 पर जो ज्ञान परमेसवर देवै सै, वो पैहला तो पवित्र होवै सै, फेर शान्तिप्रिय, सहनशील, विनम्र, खियास राक्खण आळा, भले काम अर दया तै भरया होया परोपकारी अर बिना भेद-भाव का, अर बिना कपट का होवै सै।

18 मेळ-मिलाप करण आळा, किसान की तरियां सै, जो शान्ति का बीज बोवै सै, अर धार्मिकता की फसल काटे सै।

* 3:11 3:11 चोवै सोते

4

XXXXXXXXXX

1 थारे म्ह लडाई झगड़े का कारण के सै? के थारे भित्तर उन बुरी लालसा तै न्ही, जो थारे म्ह लडै-भीडै सै?

2 थम लालसा राक्खो सों, पर थमनै मिलता कोनी, ज्यातै थम हत्या करण का भी इरादा राक्खों सों। थम जळण करो सों, अर कुछ् पान्दे कोनी, इस करकै थम लडो अर झगड़ो सों। थमनै इस करकै न्ही मिलदा क्यूँके थम परमेसवर तै माँगते कोनी।

3 हालाकि थम माँगो सों, फेर भी थमनै मिलता कोनी, क्यूँके भुंडी इच्छा तै माँगो सों, ताके अपने ऐसो-आराम म्ह उडा द्यो।

4 हे बेईमान माणसों, के थम न्ही जाणते, दुनिया की चिज्जां तै प्यार करणा, परमेसवर तै बैर करणा सै। इस करकै जो कोए संसार का साथी बणणा चाहवै सै, वो अपने-आपनै परमेसवर का बैरी बणावै सै।

5 के थम पवित्र ग्रन्थ म्ह लिखी होई इस बात नै बेकार समझों सों, जिस म्ह लिख्या सै, “जिस पवित्र आत्मा ताहीं परमेसवर नै म्हारै भित्तर बसाया सै, वो बड़ी लालसा करै सै, के हम परमेसवर तै प्यार करों।”

6 पर परमेसवर तो और भी अनुग्रह करै सै, ताके हम बुरी इच्छा तै लड सकां, इस कारण पवित्र शास्त्र म्ह यो लिख्या सै, “परमेसवर घमण्ड करण आळा का बिरोध करै सै, पर दीन माणसां पै अनुग्रह करै सै।”

7 इस करकै परमेसवर कै अधीन हो जाओ, अर शैतान का बिरोध करो, तो वो थारे धोरै तै भाग ज्यागा।

8 परमेसवर कै धोरै आओ तो वो भी थारे धोरै आवैगा। हे पापियों, अपने जीवन तै पाप दूर करो, अर हे दोगले माणसों अपने मन नै पवित्र करो।

9 अपने पापां के कारण दुखी होओ, अर शोक करो, रोओ। थारी हाँसी शोक म्ह अर थारा आनन्द उदासी म्ह बदल जावै।

10 प्रभु कै स्याम्ही नरम बणो तो वो थमनै आदर मान देवैगा।

XXXXXXXXXX

11 हे विश्वासी भाईयो, एक-दुसरे की बदनामी ना करया करो। जो अपने विश्वासी भाई की बदनामी करै सै या उसपै दोष लगावै सै, वो मूसा के नियम-कायदा का बिरोध करै सै, अर जै तू मूसा के नियम-कायदा का बिरोध करै सै, तो तू नियम-कायदा पै चाल्लण आळा कोनी, पर उसपै न्याय करण आळा बणग्या।

12 मूसा के नियम-कायदे देण आळा अर न्याय करण आळा एके सै, जो परमेसवर सै, जो बचाण अर नाश करण म्ह दोनुआ का हक राक्खै सै, पर तन्नै किसे पै इल्जाम लगाण का कोए हक कोनी।

XXXXXXXXXX

13 थम जो या कहाँ सों, “आज या तडकै हम किसे और नगर म्ह जाकै ओडै एक साल बितावागें, अर व्यापार करकै फायदा कमावागें।”

14 पर थम यो न्ही जाणदे के कल के होवैगा? सुण तो ल्यो, थारा जीवन सै एके? थम तो धुंध की तरियां सों, जो थोड़ी देर दिक्खै सै फेर खू ज्या सै।

15 इसकी बजाए थमनै या कहणा चाहिए, “जै प्रभु चाहवै तो हम जिन्दा रहवागें, अर यो काम भी करागें।”

16 पर इव थम अपने-आप पै घमण्ड करो सों, यो घमण्ड पाप सै।

17 इस करकै जो कोए भलाई करणा जाणै सै, अर कोनी करदा, उसकै खात्तर यो पाप सै।

5

XXXXXXXXXX

1 हे साहूकारों, सुण तो ल्यो, थम अपने आण आळे दुखां पै किल्की मारकै रोओ।

2 थारा धन खराब होगया अर थारे लत्ता नै कीड़े खाँगे सै।

3 थारे सोन्ने चाँदी की कोए किम्मत कोनी रही, जिस सोन्ना चाँदी ताहीं थमनै कट्टा करया सै, वाए थारी गवाही देंगे, अर थारी देह नै राख कर देगी। थमनै अन्त के युग म्ह धन कट्टा करया सै।

4 देखों जिन मजदूरान नै थारे खेत काट्टे, उनकी वा मजदूरी जो थमनै धोक्खा देकै राखली सै। वे मजदूर चिल्लावै सै, अर उनकी दुहाई सेनाओं के प्रभु के कान्ना तक पुँहच गयी सै।

5 थम धरती पै ऐसो-आराम म्ह लागगे रहै, अर बड़ड़ा ए सुख भोग्या, अर इसा करते-करते थम जानवरों की तरियां बणगे सों, जिन ताहीं काट्टण तै पैहले मोट्टा ताजा करया जावै सै, उस्से तरियां थम न्ही जानते के थम भी अपणे-आप ताहीं परमेसवर की सजा खात्तर तैयार करण लागरे सों।

6 जो धर्मी जन थारा सामना न्ही कर सके थे, थमनै उन ताहीं कसूरवार बणाके मार दिया।

~~~~~

7 इस करके हे विश्वासी भाईयो, प्रभु के आण तक धीरज धरो। जिस तरियां जमीदार धरती की कीमती फसल की आस धरकै पैहली अर आखरी बारिस होण तक धीरज धरै सै।

8 थम भी धीरज धरो, अर अपणी आस नै ना खोओ, क्यूँके प्रभु का आणा लोवै सै।

9 हे विश्वासी भाईयो, एक-दुसरे पै कुड़कुड़ाओ ना, न्ही तो परमेसवर भी थमनै दण्ड देवैगा, क्यूँके लखाओ, न्याय करण आळा आण खात्तर घणा लोवै सै।

10 हे विश्वासी भाईयो, जिन नबियाँ नै प्रभु के नाम तै बात करी, उननै दुख उठाण अर धीरज धरण का एक आदर्श समझों।

11 हम धीरज धरण आळे नै धन्य कह्हां सां। थमनै अय्यूब नामक माणस के धीरज के बारे म्ह तो सुणया ए सै, अर किस तरियां प्रभु नै उस ताहीं प्रतिफळ दिया, जिसतै थमनै प्रभु ताहीं जाण भी लिया के किस तरियां प्रभु करुणा अर दया करै सै।

12 पर हे मेरे विश्वासी भाईयो, सारा तै बड़डी बात या सै के कसम ना खाईयो, ना सुर्ग की, ना धरती की, ना किसे और चीज की, पर थारी बात हाँ की हाँ ना की ना हो, ताके परमेसवर थमनै दण्ड ना देवै।

~~~~~

13 जै थारे म्ह तै कोए दुखी सै, तो वो प्रार्थना करै। जै आनन्दित सै, तो परमेसवर की बड़ाई के भजन गावै।

14 जै थारे म्ह तै कोए रोगगी सै, तो कलीसिया के अगुवां नै बुलावै, अर वे प्रभु के नाम तै उसपै तेल मल के उसके खात्तर प्रार्थना करै,

15 अर विश्वास की प्रार्थना के जरिये रोगगी बच ज्यागा अर प्रभु उस ताहीं ठीक करैगा, अर उसनै जै पाप भी करे हो, तो उनकी भी माफी हो ज्यागी।

16 इस करके थम एक-दुसरे के बिरुध्द किये गये, अपणे-अपणे पापां नै मान ल्यो, अर एक-दुसरे खात्तर प्रार्थना करो, जिसतै ठीक हो जाओ: धर्मी जन की प्रार्थना के असर तै सब कुछ हो सके सै।


17 एलिय्याह नबी भी तो म्हारै समान दुख-सुख भोगी माणस था, अर उसनै मन लगाके प्रार्थना करी, के मिह ना बरसै, अर साढ़े तीन साल तक धरती पै मिह कोनी बरसा।

18 फेर उसनै प्रार्थना करी, तो अकास तै बरसा होई, अर धरती पै फसल भी होई।

19 हे मेरे विश्वासी भाईयो, जै थारे म्ह तै कोए सच की राह तै भटक जावै अर दुसरा कोए उसनै बोहड़ के उस राह पै ले आवै सै,

20 तो वो यो सच जाण लेवै के जो कोए भटके होए पापी नै पाप छोड़ण म्ह उसकी मदद करैगा, पाप छोड़ण आळे के अनेक पाप माफ हो जावैंगे अर उसकी जिन्दगी अनन्त मृत्यु तै बचावैगा।

पतरस की पैहली चिट्ठी



पतरस की पैहली चिट्ठी उन बिश्वासियाँ के नाम लिखी गई थी, जिननै ओड़ै “परमेसवर के चुणे होए माणस” कहा ग्या सै, जो एशिया माइनर के सारे उतरी इलाके म्ह तित्तर-बितर हो के रहवै थे। इस चिट्ठी का खास मकसद अपने पाठकां ताहीं उत्साहित करणा सै, जो के अपने बिश्वास के कारण दुःख अर सताव का सामना करण लागरे थे। लेखक अपने पाठकां ताहीं यीशु मसीह के सुसमाचार की याद दवा, के इसा कर सै, क्यूँके यीशु का मरणा, जी उठणा, अर यीशु का दुबारे आण के बारे म्ह बेरा होणा उननै तसल्ली देवै सै। इस नजरिये तै उननै अपने दुखां अपनाणा अर सहण करणा था, इस बिश्वास के साथ के यो उनके बिश्वास की सच्चाई की परख सै, अर यो सै के “यीशु मसीह के प्रगट होण” के दिन उननै इसका फळ मिलेगा। सताव के बखत हिम्मत बढ़ाण के साथ, लेखकां नै या भी बिनती करै सै, के उसके पाठक इसे माणसां की तरियां जीवन बितावै जो मसीह के जन सो।

रूप-रेखा

जानकारी 1:1,2

परमेसवर के उद्धार नै याद करवाणा 1:3-12

पवित्र जीवन के खात्तर उपदेश 1:13-2:10

दुखां के बखत बिश्वासी की जिम्मेदारियां 2:11-4:19

मसीह की दीनता अर सेवा 5:1-11

समापन 5:12-14

1 या चिट्ठी पतरस की ओड़ तै सै, जो यीशु मसीह का प्रेरित सै, मै या चिट्ठी परमेसवर के चुणे होए माणसां के खात्तर लिखण लागरया सूं, जो परदेशी होके पुन्तुस, गलातिया, कप्पदूकिया, आसिया अर बिथुनिया परदेसां म्ह तित्तर-बितर होके रहवै सै।

2 परमेसवर पिता नै थारे ताहीं अपने माणस बणाण खात्तर, भोत पैहले चुण लिया था, ताके धमनै पवित्र आत्मा के काम के जरिये पवित्र बणावै, यो उसनै इस खात्तर करया ताके धम यीशु मसीह का कहणा मान्नो, अर उसके लहू तै शुद्ध हो जाओ। हम प्रार्थना करा सां के परमेसवर धमनै अनुग्रह अर शान्ति भोत-ए घणी दे।

3 म्हारे मसीह यीशु के पिता अर परमेसवर का धन्यवाद हो, जिसनै म्हारे पै बड़ी दया करके म्हारे ताहीं नई जिन्दगी दी सै, क्यूँके परमेसवर नै यीशु मसीह ताहीं मुदां म्ह तै जिन्दा करया, उसनै म्हारे ताहीं बड़े बिश्वास के साथ जीण के लायक बणाया, ताके हम उन चिज्जां की आस राक्खां जिसका देण का उसनै वादा करया सै।

4 हम उस वसियत नै जो परमेसवर नै म्हारे खात्तर तैयार करी सै, उस ताहीं लेण की हम बाट देख्कां सां, उसनै म्हारे खात्तर उस ताहीं सुर्ग म्ह राख्या सै, जित्त वा कदे गळ न्ही सकदी, खराब न्ही हो सकदी, अर नाश न्ही हो सकदी।

5 परमेसवर नै अपनी महान शक्ति तै थारे ताहीं सम्भाळ के राख्या सै, क्यूँके धम मसीह पै बिश्वास करो सों, जिस दिन मसीह बोहड़के आवैगा, उस दिन तक मसीह धमनै सम्भाळ के राक्खेगा, फेर धम जाणोगे के परमेसवर नै थारे ताहीं पाप अर मौत तै बचा के राख्या सै।

6 धमनै इन सारी वात्तां तै खुश होणा चाहिए भलाए धम कुछ बखत खात्तर कई ढाळ की मुसीबतां के कारण दुखी सो।

7 ये मुसीबत इस्से खात्तर आवै सै, ताके देख्या जा सकै, के परमेसवर पै थारा पक्का बिश्वास सै के न्ही। थारा मसीह यीशु पै बिश्वास करणा सोन्ने तै भी घणा कीमती सै, जिस तरियां नाशवान सोन्ना आग म्ह परख्या अर शुद्ध करया जावै सै, उस्से तरियां जै थारा बिश्वास घणी मुसीबतां म्ह

भी बणया रहवै सै, तो जिब परभु यीशु मसीह बोहड़ के आवैगें तो थारे ताहीं बड़ाई महिमा अर आदर मिलैगा।

8 थमनै मसीह ताहीं कदे न्ही देख्या, उसतै थम बिन देख्खे प्यार करो सो, अर इब तो उसपै बिन देख्खे भी विश्वास करके इसे राज्जी अर मग्न होवो सो, जिस ताहीं बताण खात्तर म्हारे धारे शब्द कोनी।

9 थम इस खात्तर खुश सों, क्यूँके परमेसवर नै थारे ताहीं पाप की सजा तै बचा लिया सै, अर योए मसीह पै विश्वास करण का ईनाम सै।

10 इस्से उद्धार कै बारे म्ह उन नबियाँ नै घणी खोज अर जाँच-पड़ताळ करी, जिननै उस अनुग्रह कै बारे म्ह, जो थारे पै होण आळा था, भविष्यवाणी करी थी।

11 मसीह अर उसके पाच्छे उस बारे म्ह उस ताहीं महिमा मिलैगी, इस कारण उननै यो बेरा पाड़ण खात्तर उसकी खोज करी, मसीह कौण होवैगा, अर यो कद होवैगा।

12 पर परमेसवर नै इन नबियाँ ताहीं बताया था, के यो सन्देस उन खात्तर न्ही बल्के थारे खात्तर सै, यो सन्देस मसीह यीशु के बारे म्ह खुशखबरी सै, जिसके बारे म्ह थम इब सुणो सों। परमेसवर नै सुर्ग तै पवित्तर आत्मा ताहीं भेज्या ताके वो माणसां नै सुसमाचार सुणाण म्ह मदद कर सके, यो इतणा अदभुत सै, के सुर्गदूत भी इन चिज्जां नै होन्दे होए देखणा चाहवै सै।

13 इस खात्तर गौर तै सोच्चों के थम के करण आळे सों, अर अपने-आप पै काबू राक्खों अर परमेसवर तै उद्धार पाण का भरोस्सा राक्खों जो अनुग्रह तै मिलै सै, अर वो थमनै जिब देवैगा जिब मसीह यीशु सुर्ग तै बोहड़के आवैगा।

14 परमेसवर के आज्ञाकारी बणो जिस तरियां आच्छे बाळक अपने पिता का हुकम मान्ने सै, अर पुराणी जिन्दगी के मुताबिक मत जिओ, जिब थम बुरी लालसा नै पूरी करो थे।

15 पर जिसा थारा बुलाण आळा पवित्तर सै, उस्से तरियां ए थम भी अपने सारे चाल-चलण म्ह पवित्तर बणो।

16 क्यूँके पवित्तर ग्रन्थ म्ह लिख्या सै, “पवित्तर बणो, क्यूँके मै पवित्तर सूँ।”

17 अर जिब के थम हे पिता कहके परमेसवर तै प्रार्थना करो सो, जो बिना पक्षपात, हरेक के काम के मुताबिक न्याय करै सै, तो इब जो थम, जिब इस धरती पै परदेशियाँ की तरियां जीण लागरे सों, तो थम उसके प्रति बड़े आदर रखते होए अपनी जिन्दगी जीणी चाहिए।

18 क्यूँके थमनै बेरा सै, के थारा निकम्मा चाल-चलण जो बाप-दादां तै चल्या आवै सै, उस बेकार जिन्दगी तै थम बचगे सों, अर थारा छुटकारा चाँदी-सोन्ने यानिके नाश होण आळी चिज्जां के जरिये न्ही होया।

19 पर बेकसूर अर बेदाग मेम्ने, यानिके मसीह के कीमती लहू के जरिये होया।

20 दुनिया बणाण तै पैहल्याए परमेसवर नै मसीह यीशु ताहीं उद्धारकर्ता करके चुण लिया था, पर इब वो इन आखरी दिनां म्ह इस खात्तर आया के थारी मदद कर सके।

21 जो मसीह नै करया उसकी बजह तै थम परमेसवर पै विश्वास करो सो, अर अपनी आस अर विश्वास परमेसवर पै राक्खो सो, क्यूँके उसनै मसीह ताहीं मुर्दा म्ह तै जिन्दा करया, अर उस ताहीं बड़ी महिमा दी।

22 क्यूँके थम सच मानण के जरिये शुद्ध करे गये सों, इस खात्तर थमनै विश्वासी भाईयाँ तै सच्चे दिल तै प्यार करणा चाहिए, अर तन-मन लाके एक-दुसरे तै प्यार करो।

23 थम एक-दुसरे तै इस खात्तर प्यार करो, क्यूँके थमनै परमेसवर तै नई जिन्दगी पाई सै, थमनै या जिन्दगी उसतै न्ही पाई जो नाशवान सै, पर उसतै पाई सै जो सदा के खात्तर सै। या नई जिन्दगी हमनै परमेसवर के वचन तै मिली सै, जो जीवित अर सदा रहण आळा सै।

24 क्यूँके पवित्तर ग्रन्थ यो कहवै सै, “हरेक जीव घास के बरगा सै, अर उनकी शोभा जंगळी फूलतां के समान सै। घास सूख जावै सै, अर फूल झड़ जावै सै।”

25 पर प्रभु का वचन युगानुयुग स्थिर रहवैगा।" यो वोए सुसमाचार का वचन सै जो थारे ताहीं सुणाया गया था।

2

1 इस करके सारी ढाळ का बैरभाव अर छळ अर कपट अर जळण अर बुराई नै दूर करके,

2 नये जन्मे बच्चे की तरियां जो हमेशा माँ के निर्मल दूध की लालसा करै सै, उस्से तरियां थम भी परमेसवर के वचन ताहीं सुणण की लालसा करो, ताके थारा परमेसवर पै बिश्वास मजबूत हो सकै, अर थारा उद्धार हो जावै।

3 क्यूँके पवित्तर ग्रन्थ कहवै सै, के थमनै चख कै जाण लिया सै के प्रभु कितना भला सै।

4-5 थम प्रभु यीशु मसीह कै धारै आए हो, वो उस खास पत्थर की ढाळ सै जो नीम म्ह लगाया जावै सै, पर वो जिन्दा पत्थर सै। भोत सारे माणसां नै उस ताहीं त्याग दिया, पर परमेसवर नै उस ताहीं चुण्या, अर उस ताहीं कीमती बनाया, अर थम जो बिश्वासी लोग प्रभु यीशु कै धारै आए हो, ताके थम भी उसके जरिये जिन्दे पत्थरां की ढाळ हो जाओ, जो परमेसवर की आत्मिक आराधना का घर बणण म्ह काम आ सकै। उसनै थारे ताहीं भी पवित्तर याजक बनाया, जिस तरियां याजक परमेसवर ताहीं भेट चढ़ावै सै, उस्से तरियां थम भी अपणे दिल नै भेट के रूप म्ह चढ़ा द्यो, अर याए भेट परमेसवर नै आच्छी लागवै सै, क्यूँके थम यीशु मसीह के कहलाओ सों।

6 यो उस्से तरियां सै, जिसा परमेसवर पवित्तर ग्रन्थ म्ह कहवै सै: "देखों, मन्नै किसे ताहीं यरुशलेम नगर म्ह कोणे के पत्थर की तरियां राख्या सै, वो उस पत्थर की तरियां सै, जो नीम पै धरया जावै सै, अर जो कोए उसपे बिश्वास करेगा, वो किसे तरियां ते शर्मिन्दा कोनी होवैगा।"

7 यो पत्थर थारे खात्तर कीमती सै, जो मसीह यीशु पै बिश्वास करो सों, पर पवित्तर ग्रन्थ उन माणसां के बारे म्ह जो बिश्वास न्ही करदे कहवै सै, "जिस पत्थर ताहीं राजमिस्त्रियाँ नै निकम्मा ठहराया था, वोए कोणे का पत्थर हो गया।",

8 पवित्तर ग्रन्थ यो भी कहवै सै, के "इस पत्थर तै लोगां के ठोक्कर लागवैगी, या वा चट्टान सै जिसतै लोग ठोक्कर खाकै गिर जावेंगे," वे इस खात्तर गिरे सै, क्यूँके उननै परमेसवर के वचन पै बिश्वास कोनी करया, परमेसवर नै उन खात्तर याए योजना बणाई सै।

9 पर थारे म्ह इसा ना हो, क्यूँके थम परमेसवर के चुणे होए माणस सो, थम परमेसवर के याजक सों, जो के राजा सै, थम परमेसवर के समर्पित माणस सों, अर थम जो परमेसवर के कुह्वावै सों, उसनै थारे ताहीं अन्धकार म्ह तै रोशनी म्ह बुलाया सै, ताके थम परमेसवर के उन अनोक्ख काम्मां के बारे म्ह माणसां ताहीं बता सको।

10 पैहले थम परमेसवर के माणस न्ही थे, पर इब परमेसवर के माणस सो, पैहले थम परमेसवर की दया नै कोनी जाणो थे, पर इब जाणो सों, क्यूँके उसनै अपणी दया पैहल्या तै थारे ताहीं दिखाई सै।

11 हे प्यारे बिश्वासी भाईयो, मै थारे ते बिनती करूँ सूँ, के थम अपणे-आपनै दुनिया म्ह परदेशी अर मुसाफर जाणके उन दुनियावी अभिलाषायां तै जो आत्मा तै युद्ध करै सै, बचे रहो।

12 वे लोग जो परमेसवर पै बिश्वास न्ही करदे, वे भी थारे आस्सै-पास्सै ए रहवै सै, अर वे भी कह सकै सै, के थम बुरा काम करण लागरे हो। थमनै इसी आच्छी जिन्दगी जीणी चाहिए, ताके वो थारे भले काम्मां नै देखके परमेसवर की महिमा उस दिन कर सकै जिव मसीह बोहड़ के आवैगा।

13 प्रभु नै महिमा देण खात्तर थम उन सारे माणसां का हुकम मान्नां जो इस दुनिया के शासक सै, जिस तरियां राजा, जो के सब पै प्रधान शासक सै।

14 अर राज्यपालों के भी अधीन रहों, क्यूँके राजा उन बुरे काम करणीया नै दण्ड देण अर आच्छे काम करणीया नै सम्मानित करण खात्तर इस्तमाल करै सै।

15 परमेसवर चाहवै सै के थम भले काम करो ताके थम उन बेकूफ माणसां नै जो परमेसवर नै न्ही जाणदे, अर थारे पै झूठे दोष लगावै सै, उन ताहीं रोक सको।

16 थारे खात्तर भी इसा कोए कोनी जो थारे ताहीं रोक सकै, जो थम करणा चाहवो सों, क्यूँके यीशु मसीह के जरिये थम आजाद करे गये सों, पर इस बात नै थम बुरे काम करण का बहाना ना बणाओ, पर अपणे काम्मां के जरिये दिखाओ के थम परमेसवर के सच्चे दास सों।

17 सब का आदर करो, विश्वासी भाईयाँ तै प्यार करो, परमेसवर तै डरो, राजा का आदर करो

18 हे सेवको* थम जो घर म्ह काम करो सों, अर विश्वासी भी सों, अपणे मालिकां का कहणा मान्ना अर सदा उनका आदर करो, हरेक ढाळ के माल्लिक के साथ इसाए बरताव करो, चाहे वो भले हो, नमर हो, या फेर चाहे वे बुरे हो।

19 क्यूँके जै हम दुख ठान्दे, फेर भी जिब म्हारी कोए गलती भी ना हो, तोभी हम इस खात्तर सह लेवां सां, क्यूँके हमनै बेरा सै, के परमेसवर सब कुछ जाणै सै, परमेसवर इसतै ए खुश होवै सै।

20 क्यूँके जै थमनै अपराध करके घूँसे खाए, अर धीरज राख्या, तो इस म्ह के बड़ाई की बात सै? पर जै भला काम करके दुख टाया हो अर धीरज राख्या हो, तो यो परमेसवर नै भावै सै।

21 अर थम इस्से कै खात्तर बुलाए भी गये सो, क्यूँके मसीह भी थारे खात्तर दुख ठाके थारे ताहीं एक बढ़िया नमूना दे गया सै, ताके थम भी उसके नक्शे-कदम पै चाल्लों।

22 पवित्तर ग्रन्थ म्ह मसीह के बारे म्ह न्यू लिख्या सै, के “ना तो उसनै पाप करया अर ना उसके मुँह तै छळ-कपट की कोए बात लिक्डी।”

23 वो गाळी सुणकै गाळी कोनी देवै था, अर दुख ठाके किसे ताहीं भी थमकी कोनी देवै था, पर अपणे-आप ताहीं परमेसवर कै हाथ म्ह सौंप दिया, जो धार्मिकता तै न्याय करै सै।

24 वो आप ए म्हारै पापां नै अपणी देह पै लिये होए क़रूस पै चढ़ गया, जिसतै हम पापां कै खात्तर मरके धार्मिकता कै खात्तर जीवन वितावां, उस्से कै मार खाण तै थम चंगे होए।

25 क्यूँके थम पैहल्या भटकी होइ भेड़ों के बरगे थे, पर इब अपणे जीवन के रुखाळे अर पाळी के धोरै बोहड़ आए सों।

3

1-2 हे विरबानियों, थम भी अपणे धणी कै अधीन रहो, अर जै थारे पिता परमेसवर के वचन पै विश्वास करण तै मना करै सै, तो जिस तरियां थम उनतै बरताव करो सों, उसकी बजह तै थारे बिना कहे वे विश्वास करैंगे, वो मसीह पै जिब विश्वास करैंगे, जिब वो थारा शुद्ध अर भक्तिमय जीवन नै देखैंगे।

3 बाहरली की खूबसूरती के बारे म्ह चिन्ता ना करै, जिस तरियां खूबसूरती तै बाळ गूँथणा, महँगे गहणे, या सुथरे लत्तें पैहरणा।

4 पर थारा भीतरी माणसपण, नमरता अर दीनता जिसे अविनाशी गुणा तै सजा हो, क्यूँके परमेसवर की निगाह म्ह इसका मोल बड़ड़ा सै।

5 पैहल्डे बखत म्ह पवित्तर विरबान्नी भी, जो परमेसवर पै विश्वास अर आस राक्खै थी, वे अपणे-आपने नै इस्से तरियां तै सिंगारै थी, अर अपणे-अपणे धणी का हुकम मान्ने थी।

6 जिस तरियां सारा अब्राहम कै हुकम म्ह रहवै थी, अर उसनै स्वामी कह्या करै थी। इस्से ढाळ थम भी जै दुसरयां की भलाई करो, अर थमनै किसे बात का डर ना हो, तो थम सारा* की बेटियाँ की तरियां होओगी।

7 इस्से तरियां ए हे पतियों, थम अपणी पत्नियों कै साथ मेळ-मिलाप कै साथ रहों, अर सोच्चों के उनकी मदद किस तरियां करी जा सकै सै, थमनै यो बेरा होणा चाहिए के विरबान्नी थारे तै कमजोर सै, इस करके थमनै उनका आदर करणा चाहिए, क्यूँके थम दोन्नु उस वरदान के साझेदार सों, जिसा के परमेसवर नै थारे ताहीं दिया सै, जो के अनन्त जीवन सै, यो इस खात्तर करो ताके जिब थम परमेसवर तै प्रार्थना करो तो वो थारी सुणै।

* 2:18 2:18 सेवको नोकर, गुलाम

* 3:6 3:6 सारा अब्राहम की घरआळी

8 आखरी म्हे मै कहणा चाहूँ सूँ, के थम एक मन हो जाओ, एक-दुसरे तै भाई-भाण की तरियां प्यार करो, एक-दुसरे के बाबत दयालु रहो, अर नरम बणो ।

9 बुराई के बदले बुराई ना करो अर ना गाळी के बदले गाळी द्यो, पर इसके उल्ट आशीष ए द्यो, क्यूँके परमेसवर नै थारे ताहीं इस खात्तर बणाया सै, के थम दुसरयां के खात्तर आशीष बण सको, जै थम इसा करोगे, तो परमेसवर थारे ताहीं भी आशीष देवैगा ।

10 क्यूँके पवित्र ग्रन्थ कहवै सै, के “जै कोए इन्सान जिन्दगी का आनन्द ठाणा चाहवै सै, अर आच्छे दिन देखणा चाहवै सै, तो वो ध्यान राक्खे के बुरी बातें अर जो बात सच न्ही उन ताहीं ना बोल्लो ।

11 जो बुरे काम सै, उन ताहीं करणा छोड़ दे, इसकी बजाए वो भले काम करै, अर एक-दुसरे के साथ शान्ति तै रहण का पूरा जतन करै ।

12 क्यूँके प्रभु की आँख धर्मियाँ पै लागगी रहवै सै, अर उसके कान उनकी बिनती की ओड़ लागे रहवै सै, पर प्रभु बुराई करण आळे तै दूर रहवै सै ।”

13 जै थम सदा भले काम करो तो कोए थमनै नुकसान न्ही पुहुचा सकदा ।

14 जै थम धार्मिकता के कारण दुख भी ठाओ, तो थम धन्य सो, पर माणसां के डराण तै ना डरो, अर ना घबराओ,

15-16 पर अपणे-अपणे मन म्हे मसीह के प्रति आदर राक्खों, अर उस ताहीं अपना प्रभु जाणो । जो कोए थारे तै थारी आस के बारे म्हे बुझ्झे, जो हम विश्वासियाँ की सै, तो उस ताहीं जवाब देण के खात्तर सारी हाण त्यार रहो, पर नम्रता अर आदर के गैल उस ताहीं जवाब द्यो । जो सही सै वोए करो, जै माणस थारे बारे म्हे बुरा बोल्लै सै, तो वो खुद शर्मिन्दा होवैंगे, जिव वो थारे आच्छे चाल-चलण नै देखेंगे, क्यूँके मसीह के गैल थारा गहरा रिश्ता सै ।

17 कई बार परमेसवर म्हारे ताहीं दुख अर मुसीबतों तै गुजारै सै, भलाए हम भला काम करदे हो, पर यो म्हारे खात्तर आच्छा सै, बजाए इसके के हम बुरे काम्मां के कारण दुख अर मुसीबत ठावां ।

18 मसीह नै भी म्हारे पापां खात्तर एके बार अपनी जान दे दी, यानी के एक धर्मी नै सारे अधर्मियाँ खात्तर दुख टाया, ताके वो थमनै परमेसवर तक ले जावै, उसकी शारीरिक मौत तो होई पर परमेसवर की आत्मा के जरिये वो जिन्दा करया गया ।

19 तब उसकी आत्मा नै उन आत्मायाँ ताहीं सुसमाचार सुणाया, अर प्रचार करया जो उस जगहां पै परमेसवर के जरिये कैद करी गई थी, जित्त मरे होए लोगां की आत्मा रहवै सै ।

20 ये वो आत्मा सै, जिननै परमेसवर का भोत पैहले कहणा न्ही मान्या । जिव नूह जहाज बणाण लागरया था, तो परमेसवर धीरज तै देखण लागरया था, के ये लोग माफी माँगै सै के न्ही, पर पाणी नै पूरी दुनिया ताहीं नाश करया सिर्फ आठ माणस जो जहाज म्हे बचे थे ।

21 उससे पाणी का उदाहरण भी, यानिके बपतिस्मा, यीशु मसीह के जी उठण के जरिये, इब थमनै बचावै सै, इसतै देह का मैल दूर करण का मतलब न्ही सै, पर शुद्ध अन्तरात्मा तै परमेसवर के पाच्छे हो जाणा सै ।

22 वो सुर्ग पै जाके परमेसवर के सोळी ओड़ बैठ गया, अर सुर्गदूत अर अधिकारी अर सामर्थी उसके अधीन करे गये सै ।

4

1 इस करके मसीह नै दुख टाया जिव उसनै देह रूप धारण करया, थारा भी रविया उससे तरियां दुख उठण का होणा चाहिए, जिसा उसका था, क्यूँके जै थमनै मसीह खात्तर दुख ठाण की सोच ली सै, तो थमनै पाप ना करण की भी सोच ली सै, ताके आगै तै कदे थम पाप ना करो ।

2 उस कारण वो इन्सान अपनी बाकी की जिन्दगी, इस दुनिया म्हे पापमय अभिलाषायां नै पूरी करण के खात्तर न्ही इस्तमाल करदा, पर वो, वो करै सै जो परमेसवर उस ताहीं करण के खात्तर कहवै सै ।

3 पैहले थमनै भोत सारा बखत वो काम करण म्ह बेकार कर दिया जिस म्ह गैर विश्वासी खुशी मनावै सै, जिस तरियां लुचपण की बुरी अभिलाषाओ, मतवाळापण, लीलाक्रीडा, दारु-बाजी, जारी अर घृणित मूर्तिपूजा जिसे काम्मां तै परमेसवर नफरत करै सै।

4 इस कारण थारे पुराणे मित्तर अचम्भा करै सै, के थम इसे अंधाधुंध लुचपण म्ह उनका साथ न्ही देदे, अर वे इब थमनै गाळी देवै सै।

5 पर वे उसनै जो जिन्दयां अर मरे होए माणसां का न्याय करण नै त्यार सै, लेक्खा देवैगें।

6 योए कारण सै के सुसमाचार उन माणसां ताहीं सुणाया गया, जो इब मर चुके सै, हालाकि वे सब माणसां की तरियां मरण कै जोगगे ए थे, इब वे आत्मा म्ह परमेसवर के साथ हमेशा कै खात्तर रहवै सै।

7 सारी बात्तां का अन्त तावळा होणआळा सै, इस करके सावधान रह अर शान्त मन राख ताके तू प्रार्थना कर सकै।

8 सारया म्ह बढ़िया बात या सै के एक-दुसरे तै घणा प्यार करो, क्यूँके जै थम माणसां तै प्यार करोगे तो थम उन ताहीं माफ करण खात्तर तैयार रहोगे, जो थारा बुरा करै सै।

9 बिना कुड़कुड़ाए एक-दुसरे की मेहमान-नवाजी करो।

10 हरेक इन्सान ताहीं परमेसवर के जरिये काबलियत मिली सै अर वो उस काबलियत नै दुसरे लोगां की मदद करण खात्तर इस्तमाल करै, वो परमेसवर के आच्छे, सेवक की तरियां उसके अनुग्रह के जरिये दिए गए वरदानां का बढ़िया इस्तमाल करै।

11 जै थारे धौरे प्रचार करण का वरदान सै, तो थमनै परमेसवर के वचन का प्रचार करणा चाहिए, जै थारे धौरे दुसरयां की मदद करण का वरदान सै, तो उस शक्ति तै करो जो परमेसवर नै थारे ताहीं दी सै, फेर जो भी काम करोगे, यीशु मसीह के जरिये परमेसवर नै महिमा मिलैगी, सारी महिमा अर सामर्थ युगानुयुग उस्से का सै। आमीन।

12 हे प्यारे विश्वासी भाईयो, उन दुखां कै खात्तर अचम्भा ना करो जो थम सहण लागरे सों, क्यूँके थम मसीह के कुह्लाओ सों, ये चीज इस खात्तर होण लागरी सै, क्यूँके सचमुच थम यीशु पै विश्वास करो सों, तो इसा ना समझो के अनोक्खी बात थारे ए गैल होण लागरी सै।

13 इस बात खात्तर खुश होओ, के थम मसीह के दुख म्ह साझेदारी हो सके, उस बजह तै जिव मसीह बोहड़ के आवैगा, अपनी महिमा लोगां नै दिखाण खात्तर, तो थम खुशी तै भर जाओगे।

14 फेर जै मसीह कै नाम कै खात्तर थारी बुराई करी जावै सै तो थम धन्य सो, क्यूँके परमेसवर की महिमामय आत्मा सै जो थारे म्ह रहवै सै।

15 जै दुख टाओ सों, तो यो दुख खून्नी, चोर, किसे बुरे काम, या किसे और के काम म्ह दखलंदाजी करण के कारण न्ही होणा चाहिए।

16 पर जै मसीह होण कै कारण दुख पावै, तो शर्मिन्दा ना होइयो, पर इस बात कै खात्तर परमेसवर की महिमा करो, क्यूँके थम उसके कुह्लाओ सों।

17 क्यूँके वो बखत आण पोंहच्या सै, के पैहल्या परमेसवर के माणसां का न्याय करया जावैगा, अर जिव के न्याय की शरुआत म्हारै ए तै होगी, तो उनका के अन्त होगा जो परमेसवर के सुसमाचार नै न्ही मानते?

18 जिसा पवित्तर गरन्थ कहवै सै, के “जै धर्मी माणस ए मुश्किल तै उद्धार पावैगा, तो भगतिहीन अर पापी का के टिकाणा?”

19 ज्यांते जो परमेसवर की मर्जी के मुताबिक दुख टावै सै, उननै परमेसवर पै सदा विश्वास करते रहणा चाहिए, जिसनै उन ताहीं बनाया सै। परमेसवर नै जो भी वादा करया सै, उस ताहीं वो हमेशा पूरा करै सै, इस खात्तर हमनै हमेशा भलाई करदे रहणा चाहिए।

5

1 थारे म्ह जो कलीसिया के अगुवें सै, मै थारे ताहीं कुछ बताणा चाहूँ सूँ, क्यूँके मै थारी तरियां

बुजुर्गा सूं, मन्नै खुद वे दुख देखे सै, जो मसीह नै भोत पैहले सहे सै, जिब वो बोहड़ के आवैगा तो मै भी उसकी महिमा म्ह शामिल होऊँगा।

2 जिस तरियां एक पाळी भेड्या की रुखाळी करै सै, उससे तरियां थमनै भी उन लोगगां की रुखाळी करणी चाहिए, जिन ताहीं परमेसवर नै थारे ताहीं सौप्या सै, अर यो मजबूरी म्ह न्ही पर खुद की इच्छा तै राज्जी होकै करो, क्यूँके परमेसवर यो चाहवै सै के थम इसाए करो, पर इसा काम पईसा के खात्तर न्ही पर परमेसवर अर माणसां की सेवा करण खात्तर करो।

3 उन माणसां पै हक ना जमाओ, जो थारे ताहीं सौपे गये सै, पर उनकै खात्तर बढ़िया मिसाल बणो।

4 जिब प्रभु यीशु मसीह जो के पाळीयाँ का प्रधान बोहड़ के आवैगा, तो थारे ताहीं वो महिमा का मुकुट दिया जावैगा जिसकी चमक कदे न्ही जावैगी।

5 इस्से ढाळ हे जवानों, थम भी कलीसिया के अगुवां का कहणा मान्नो, बल्के थम सारे के सारे दीनता तै एक-दुसरे की सेवा करते रहो, क्यूँके हम पवित्र ग्रन्थ म्ह पढ़ा सां, के “परमेसवर घमण्डियाँ का विरोध करै सै, पर दीन पै अनुग्रह करै सै।”

6 इस करके परमेसवर के स्याम्ही दीन बणो, जो थमनै बचा सकै, ताके वो थमनै सही बखत आण पै बढ़ा सकै।

7 अपणी सारी चिन्ता परमेसवर ताहीं दे द्यो, क्यूँके उसनै थारा ध्यान सै।

8 सावधान रहो, अर जागदे रहो, क्यूँके थारा विरोधी शैतान गरजनआळे शेर की ढाळ इस टाह म्ह रहवै सै, के किसने पाड़ खावै, ताके थम परमेसवर की राह ना चाल सको।

9 विश्वास म्ह मजबूत होके, अर न्यू जाणकै उसका सामना करो, के थारे भोत-से विश्वासी भाई जो दुनिया म्ह इसेए दुख सहण लागरे सै।

10 इब परमेसवर जो सारे अनुग्रह का दात्ता सै, जिसने थारे ताहीं मसीह म्ह अपणी अनन्त महिमा के खात्तर बुलाया, थारे कुछ बखत तक दुख ठाण के पाच्छे आप ए थमनै सिध्द अर स्थिर अर मजबूत करैगा।

11 उससे का साम्राज्य युगानुयुग रहवै। आमीन।

12 मन्नै या छोट्टी चिट्ठी लिखकै सिलवानुस के हाथ थारे धौरे भेजी सै, जिस ताहीं मै मसीह म्ह विश्वास जोगगा भाई समझूं सूं, मेरे लिखण का यो मकसद सै के मै थारे ताहीं उत्साहित कर सकूं, अर थारे ताहीं विश्वास दिला सकूं, के जो थम अनुभव करण लागरे सों, वो असलियत म्ह परमेसवर की करुणा का हिस्सा सै, थम उस कृपा म्ह बणे रहों।

13 जो विश्वासी बेबीलोन नगर म्ह सै, उन ताहीं भी परमेसवर नै चुण्या सै, जिस तरियां थारे ताहीं चुण्या, उनका अर मरकुस जो मेरे बेटे की तरियां सै, उसका थारे ताहीं नमस्कार।

14 आप्स म्ह एक-दुसरे ताहीं गळे मिलकै प्यार तै नमस्कार करो। थम सारया ताहीं, जो मसीह म्ह हो, थमनै शान्ति मिलदी रहवै।

पतरस की दुसरी चिट्ठी



पतरस की दुसरी चिट्ठी शरुआती विश्वासियाँ के एक बड़े झुण्ड के नाम लिखी गई है। इस चिट्ठी की बड़ी चिन्ता की बात झूठे शिक्षकों के काम अर उनकी शिक्षा तै पैदा होण आळे गलत काम के खिलाफ मुकाबला करणा है। इन सारी समस्या का जवाब परमेसवर अर प्रभु यीशु मसीह के सच्चे ज्ञान म्ह बणे रहण म्ह मिलै है। वो ज्ञान उन माणसां के जरिये पोंहच्या गया है, जिननै खुद यीशु मसीह ताहीं देख्या अर उसकी सारी शिक्षा ताहीं सुण्या है। लेखक खास तौर पै उन माणसां की शिक्षा तै चिन्ता म्ह है जो दावा कर है के मसीह फेर बोहड़ के न्ही आवैगा। लेखक कहवै है के इसा लागै है, के मसीह के आण म्ह देर हो रही है, पर सच म्ह इसा इस खात्तर है क्यूँके परमेसवर “न्ही चाहन्दा के कोए नाश होवै, पर यो इस खात्तर है ताके सब नै मन फिराण का मौक्का मिलै।”

रूप-रेखा

जानकारी 1:1,2

मसीह का बुलावा 1:3-21

झूठे शिक्षक 2: 1-22

मसीह का आखरी आणा 3:1-18

1 या चिट्ठी शमौन पतरस की ओड़ तै है, जो यीशु मसीह का दास अर परेरित है, उन माणसां के नाम है, जिन नै म्हारै परमेसवर अर उद्धारकर्ता यीशु मसीह की धार्मिकता के जरिये म्हारी तरियां बेसकिमती विश्वास पाया है।

2 मै प्रार्थना करूं, के परमेसवर थारे ताहीं ज्यादा तै ज्यादा अनुग्रह अर शान्ति दे, जिस तरियां थम परमेसवर के ज्ञान अर म्हारै प्रभु यीशु मसीह म्ह बढ़ण लागरे सों।

3 परमेसवर जिसनै अपणी शक्ति के जरिये म्हारे ताहीं वो सब दिया है, जो हमनै भगतिमय जिन्दगी जीण खात्तर चाहिए, यो इस खात्तर मुमकिन है, क्यूँके हम परमेसवर नै जाणा सां, अर उसनै अपणी महिमा अर सदगुणा के मुताबिक अपणे माणस होण खात्तर बुलाया है।

4 अर उसकी महिमा अर भलाई के कारण उसनै म्हारै ताहीं बड़े महान अर कीमती वादे करे है, ताके इनके जरिये थम इस दुनिया की बुरी लालसा तै बच जाओ, जिन ताहीं वे लोग करणा चाहवै है, जो मसीह पै विश्वास न्ही करदे, पर थम ईश्वरीय सुभाव के गैल-साइझी हो जाओ।

5 इस कारण थम सिर्फ मसीह पैए विश्वास करण आळे न्ही, पर हमेशा दुसरयां की भलाई करण म्ह लागै रहों, अर सिर्फ भलाई ए न्ही बल्के बुद्धिमानी तै बरताव करण आळे भी बणो।

6 थम सिर्फ बुद्धिमानी तै ए बरताव करण आळे न्ही बल्के अपणे-आप पै काबू राक्खण आळे भी बणो, अर अपणे-आप पै काबू राक्खण आळे ए न्ही बल्के दुखां नै धीरज तै सहण आळे भी बणो, अर दुखां नै धीरज तै सहण आळे ए न्ही बल्के भगति म्ह जिन्दगी बिताण आळे भी बणो।

7 ना सिर्फ थम परमेसवर नै भावण आळी जिन्दगी जिओ, बल्के विश्वासियाँ तै भी अपणे परिवार के माणस की तरियां प्यार करो, एक-दुसरे ताहीं अपणे परिवार के माणस की तरियां प्यार करण आळे ए न्ही बल्के सब नै प्यार करण आळे भी बणो।

8 जै थारे म्ह ये गुण मौजूद है अर जै थारे म्ह इनकी बढ़ोतरी होण लागरी है तो इनके कारण थम म्हारे प्रभु यीशु मसीह के सम्पूर्ण ज्ञान म्ह ना तो निकम्मे अर ना बिना फळ के होओगे।

9 जै कोए इन्सान इसी जिन्दगी न्ही बितान्दा, तो वो उस इन्सान की तरियां है, जो सही तै न्ही देख पान्दा, अर वो आन्धा है। वो भूल जावै है के परमेसवर नै उसके पाप माफ कर दिये, जो उसनै मसीह पै विश्वास करण तै पैहले करे है।

10 इस कारण हे विश्वासी भाईयो, आच्छा करण की कोशिश करदे रहों, ताके थम अपने-आपने अर दुसरे माणसां नै दिखा सको, के परमेसवर नै थारे ताहीं चुण्या सै, अर बुलाया सै। जै थम इसाए करदे रहों, तो थम कदे भी परमेसवर तै अलग न्ही होओगे।

11 बल्के इस तरियां तै थम म्हारै प्रभु अर उद्धारकर्ता यीशु मसीह के अनन्त राज्य म्ह बड़े आदर के गैल बड़ण पाओगे।

12 ज्यांतै हालाकि थम ये बात जाणो सो, अर जो सच्चा वचन थारे ताहीं मिल्या सै उस म्ह बणे रहो सो, तोभी मै थारे ताहीं ये बात याद दुवाण खात्तर सारी हाण त्यार रहूंगा।

13 मै यो जाणु सूं के जब तक मै जिन्दा सूं, यो सही सै, के मै उन बात्तां के बारे म्ह थारे तै बात करदा रहूँ, ताके थम इन बात्तां नै कदे भूल ना जाओ।

14 क्यूँके मै जाणु सूं के मै तावळा मरण आळा सूं, अर प्रभु यीशु मसीह नै मैरे ताहीं इस बारे म्ह बता दिया सै।

15 ज्यांतै मै इसी कोशिश करूंगा, के मेरे इस दुनिया तै जाये पाच्छै, थम इन सारी बात्तां नै सारी हाण याद कर सको।

16 क्यूँके जब हमनै थारे ताहीं, अपने प्रभु यीशु मसीह की सामर्थ अर बोहड़ण की खबर दी थी, तो हमने श्याणपत तै गढ़ी होई कहींनियों का सहारा कोनी लिया, बल्के हमने आप ए उसके प्रताप ताहीं देख्या था।

17-18 क्यूँके जब उसनै परमेसवर पिता तै आदर अर महिमा पाई जो के प्रतापमय महिमा सै, हमनै उस ताहीं यो कहन्दे सुणा, “यो मेरा प्यारा बेटा सै, जिसतै मै राज्जी सूं।” फेर हम उसके गेल्या पवित्र पहाड़ पै थे, अर सुर्ग तै योए बोल आन्दे सुण्या।

19 हम जाणा सां के जो वचन नबियाँ नै मसीह के बारे म्ह लिख्या सै, वो सच सै, थम इन वचनां नै गौर तै सुणो, जिस तरियां अन्धकार म्ह दीवै का चाँदणा, माणसां नै राह दिखावै सै, उस्से तरियां ये वचन भी सच्चाई नै जाणण म्ह थारी मदद करैगें, थम इन वचनां नै ध्यान तै सुणते रहो, जब तक के यीशु मसीह बोहड़के ना आ जावै। उसका आणा एक नये दिन की सुबह की तरियां सै, जो उजाळा लेकै आवै सै, अर वो सुबह के तारे की तरियां होगा। उस बखत उसका चाँदणा थारे मन म्ह चमकैगा, अर परमेसवर नै साफ तौर पै थारे पै जाहिर करैगा।

20 पर सबतै पैहले यो जाण ल्यो के पवित्र ग्रन्थ की कोए भी भविष्यवाणी, खुद नबियाँ का अपना विचार कोनी

21 क्यूँके कोए भी भविष्यवाणी माणस की मर्जी तै कदे न्ही होई, पर भगतजन पवित्र आत्मा के जरिये उभारे जाके परमेसवर की ओड़ तै बोल्लै थे।

2

1 जिस तरियां इस्राएली माणसां म्ह झूठे नबी थे, उस्से ढाळ थारे म्ह भी झूठे शिक्षक होंगे, वे थारे ताहीं चुपके तै झूठ्ठी शिक्षा सिखावेंगे, जिसकी बजह तै लोग मसीह पै विश्वास न्ही करैगें, वे झूठे शिक्षक मसीह ताहीं अपना प्रभु न्ही मान्नेगें, जिसनै उन ताहीं मोल लिया सै, अर पाप की शक्ति तै आजाद करया सै, इस तरियां वे चाणचक अपने-आप ताहीं नाश कर लेवेंगें।

2 घणखरे जो कहवेंगें के हम विश्वासी सां, वे उनकी ढाळ लुचपण के सुभाव नै अपनावेंगे, अर उनके कारण जो लोग विश्वासी कोनी सच के राह की बुराई करैगें।

3 ये शिक्षक लालची होंगे, अर थारे तै धन पाण के खात्तर मनघडन्त कहाँनी सुणाके थारे ताहीं धोक्खा देवेंगें, परमेसवर नै भोत पैहले फैसला ले लिया था, के वो उन ताहीं दण्ड देवैगा, अर वो यो करण आळा सै, वो सच म्ह उन ताहीं नाश करण आळा सै।

4 क्यूँके जब परमेसवर नै उन सुर्गदूत्तां ताहीं जिननै पाप करया था, उन ताहीं माफ न्ही करया, पर उन ताहीं नरक म्ह भेजके अँधेरे कुण्डां म्ह गेर दिया ताके न्याय के दिन ताहीं कैदी रहवै।

5 थम यो भी जाणो सों, के जो लोग भोत पैहले जिन्दा थे, उन म्ह परमेसवर का भय न्ही था, परमेसवर नै उनकी बुराईयाँ ताहीं नजरअंदाज कोनी करया, जो उननै करी थी, पर उन ताहीं बाद के जरिये नाश कर दिया, उन म्ह तै परमेसवर नै आठ माणसां ताहीं बचाया जिस म्ह नूह भी था, जिसनै धार्मिकता का प्रचार करया।

6 थम यो भी जाणो सों, के जो लोग भोत पैहल्या सदोम अर अमोरा के नगर म्ह रहवै थे, परमेसवर नै उन ताहीं भी दण्ड दिया, क्यूँके उननै भोत बुरे काम करे थे, अर उन ताहीं आग म्ह भस्म करके राख बणा दिया। इसा कारण के जरिये उसनै दिखा दिया, के उन माणसां का के होगा जो उसका कहणा न्ही मानते।

7 सदोम नगर का नाश करण तै पैहले उसनै, लूत जो के एक धर्मी माणस था, उस ताहीं उस नगर तै लिकाड़के उस ताहीं बचा लिया। लूत दुखी था क्यूँके सदोम नगर के लोग परमेसवर का कोए भी हुकम कोनी मान्नै थे, अर वे भोत बुरे काम करै थे।

8 वो उन बुरे माणसां के बीच म्ह रहवै था, अर हरेक दिन उनके बुरे काम्मां नै देखै था जो वे करै थे, अर बुरी बाततां नै सुणै था जो वे बोल्ले थे, अर ये सारी बात उस ताहीं दुखी करै थी, क्यूँके वो धर्मी माणस था।

9 वे सारी बात जो परमेसवर नै पुराणे बखत म्ह करी सै, वे ये दिखावै सै, के परमेसवर पवित्तर माणसां नै मुसीबतां तै किस तरियां बचावै सै, अर न्याय होण के दिन तक बुरे माणसां नै लगातार दण्ड दिया जावै।

10 परमेसवर बुरे माणसां नै दण्ड देवैगा, खास करके उन झूटटे शिक्षकां नै जो अशुद्ध अभिलाषायां के पाच्छे देह के मुताबिक चाल्दे, अर प्रभुता नै तुच्छ जाणै सै। वे ढीठ, अर जिदी सै, अर सुर्गीय चिज्जां के बारे म्ह आच्छा-भुंडा कहण तै न्ही डरदे।

11 तोभी सुर्गदूत जो झूटटे शिक्षकां तै अर सामर्थ म्ह उनतै बड़े सै, प्रभु के स्याम्ही जिब उन झूटटे शिक्षकां पै दोष लगावै सै तो वे अपमानजनक बात कहके उनकी बुराई न्ही करदे।

12 पर ये झूटटे शिक्षक जंगली-जानवरां की तरियां सै, ये जानवर न्ही जानते के किस तरियां सोचना सै, अर उनका मकसद पकड़े जाणा अर मरणा सै। ये लोग भी वोए काम करै सै जो इनके मन म्ह आवै सै, अर उन चिज्जां के बारे म्ह बुराई करै सै, जिसके बारे म्ह वे न्ही समझते, वे नाश हो जावैगे।

13 दुसरयां का बुरा करण के बदले उन्हे का बुरा होवैगा। उननै दिन-दोफारी म्ह भोग-विलास करणा आच्छा लागै सै। ये थारे पै कलंक अर दोष सै, जिब वे थारे गेल्या प्रीति भोज म्ह शामिल होवै सै, तो अपने छलावे का आनन्द ले सै।

14 वो हरेक जनानी नै देखके उसके साथ जारी करणा चाहवै सै, अर पाप करण का मौक्का टोहवै सै, ये उन माणसां ताहीं धोक्सा देवे सै जो परमेसवर पै पक्का बिश्वास कोनी राखदे, अर उन ताहीं पाप करण खात्तर उकसावै सै, उनकी सदा बढ़दी रहण आळी लालसा के कारण परमेसवर उन ताहीं दण्ड देवैगा।

15 उननै वो करणा छोड़ दिया सै, जो सही सै, अर उननै बओर के बेटटे बिलाम की तरियां बुरे काम करणे शरू कर दिए, जो उसनै भोत पैहले करे थे, क्यूँके उसनै बुरे काम्मां तै पईसा कमाणा चाह्या।

16 पर परमेसवर नै बिलाम नबी की गधी के जरिये उस ताहीं डांटा-फटकारा जो बुरे काम वो करण जावै था, हालाकि गधी जो बोल न्ही सकै थी, उसनै बिलाम नबी तै इन्सान की वाणी म्ह बात करी, जिब वो राजा तै मिलण जाण लागरया था, तो गधी नै बिलाम नबी ताहीं उसके बावळेपण तै रोख्या।

17 ये झूटटे शिक्षक उस बेकार पाणी के चोवै की तरियां सै जो सूख लिया सै, अर ये उस बाइळ की तरियां भी सै जिस ताहीं बारिस तै पैहले हवा उड़ा ले जावै सै, परमेसवर नै उन खात्तर, अनन्त अन्धकार म्ह जगहां राक्खी सै।

18 जिब वे माणसां नै सिखावै सै तो वो बेकार के अर घमण्डी शब्दां नै इस्तमाल करै सै, वे माणसां नै समझावै सै के वो बुरे काम कर सकै सै जो उनकी देह करणा चाहवै सै, अर उन माणसां तै भी

दुबारा धोक्खें तै पाप करवाणा चाहवै सै, जो बुरी जिन्दगी तै बाळ-बाळ बचे सै।

19 ये झूठे शिक्षक माणसां ताहीं कहवै सै के थम सारे काम करण खात्तर आजाद सों, जो थम करणा चाहों सों, पर वो खुद गुलाम की तरियां सै, क्यूँके उनका पापी सुभाव उन ताहीं बुरे काम करवावै सै, थम हर उस चीज के गुलाम सों जो थमनै काबू करै सै।

20 माणस इस दुनिया की बुराईयाँ तै भाज्जै सै जिव वो मसीह यीशु नै अपना उद्धारकर्ता मान लेवै सै, पर वे फेर तै बुरे काम करण लाग्गै सै, अर वे बुरी चीज उन ताहीं काबू म्ह राक्खै सै, इब उनकी दशा जो के मसीह नै छोड़ देण तै सै, वो पैहल्डी दशा तै भी भुंडी सै, जिव उननै मसीह पै विश्वास करया था।

21 मेरे कहण का मतलब यो सै, के परमेसवर उन माणसां ताहीं घणा दण्ड देवैगा जो मसीह ताहीं छोड़ देवै सै, उन माणसां तै ज्यादा जो उस ताहीं कदे न्ही अपनादे, उन खात्तर यो ठीक होन्दा के वो कदे न्ही जाणते के धार्मिकता का जीवन किस तरियां जीणा सै, उन ताहीं बेरा सै के सही के सै, पर वो परमेसवर के हुकम नै कोनी मानते जो हम प्रेरितां नै उन ताहीं सिखावै सै।

22 उनपै ये दो कहावत सही बेट्टै सै, के कुत्ता अपना उलटी नै चाट्टै सै, अर नुहाई होई सुरी कीचड़ म्ह लोट्टण के खात्तर फेर चली जावै सै।

3

1 हे प्यारे विश्वासी भाईयो, इब मै थारे ताहीं दुसरी चिट्ठी लिक्खूँ सूं, अर मै दोन्नु चिट्ठियाँ म्ह थारे ताहीं कुछ चीज याद दुआ के थमनै सही ढंग तै सोचचण खात्तर उत्साहित करण की कोशिश करण लागरया सूं, जो थमनै पैहले तै सीख ली सै।

2 मै यो इस करकै करण लागरया सूं, क्यूँके मै थमनै उन नबियाँ के शब्द याद दुवाणा चाहूँ सूं, जो उननै भोत पैहले कहे अर प्रभु यीशु मसीह जो म्हारा उद्धारकर्ता सै, उसकी शिक्षा जो थमनै उन प्रेरितां तै सीखी जो थारे धारे आए थे।

3 यो जाण ल्यो के आखरी के दिनां म्ह मसीह के आण तै पैहल्या भोत-से इसे माणस होवैंगे जो थारा मजाक उड़ावैंगे, क्यूँके थम विश्वास करो सों के मसीह बोहड़ के आवैगा, अर वे बुरे तै बुरा काम करैंगे जो उन ताहीं खुश करै सै।

4 अर कहवैंगे, “उसके आण का वादा कित्त गया? क्यूँके जिव तै उनके पूर्वज सो गये सै, सारा किमे उस्से तरियां ए सै जिस तरियां सृष्टि की शरुआत तै था?”

5 वो इस करकै कहवैंगे क्यूँके वो भूलणा चाहवै सै, के परमेसवर के वचन कै जरिये अकास पुराणे बखत तै विद्यमान सै। उसनै धरती ताहीं भी पाणी म्ह तै बणाया अर पाणी तै न्यारा करया।

6 यो उनके मजाक का ए नतिज्जा था, के बाद म्ह उसनै एक बड़ी बाढ़ के जरिये इस दुनिया ताहीं पाणी म्ह डूबो कै नाश कर दिया।

7 पर परमेसवर नै इब के बखत का अकास अर धरती उस्से वचन कै जरिये ज्यातै राख राक्खे सै, के जळाए जावै, अर ये भगतिहीन माणसां के न्याय अर नाश होण के दिन ताहीं इसेए धरे रहवैंगे।

8 हे प्यारे विश्वासी भाईयो, या बात थारे तै लुकही ना रहवै के प्रभु कै उरै एक दिन हजार साल के बराबर सै, अर हजार साल एक दिन के बराबर सै, उसके खात्तर दोन्नु एक्के सै।

9 प्रभु अपना वादे कै बारे म्ह वार न्ही करदा, जिसी देर कुछ माणस समझै सै, पर थारे बारे म्ह धीरज धरे सै, अर न्ही चाहन्दा के कोए नाश हो, बल्के यो, के सारया ताहीं मन पलटन का मौक्का मिलै।

10 पर मसीह जरूर बोहड़ के आवैगा, उस दिन अकास म्ह बड़ा गरजण होगा अर अकास गायब हो जावैगा, जो कुछ अकास म्ह सै जिस तरियां सूरज, चाँद अर तारे ये सब आग म्ह पूरी तरियां जळ जावैंगे, उस दिन परमेसवर सब जाहिर करैगा, अर इस दुनिया म्ह होण लागरे सारे काम्मां का भी न्याय करैगा।

11 जब के ये सारी चीज इस तरियां तै पिघळ के खतम होण आळी सै, तो थारे ताहीं पवित्त्र चाल-चलण अर भगति म्ह किस ढाळ का माणस होणा चाहिये,

12 जब थम उस दिन की बाट देखो सों जब परमेसवर इस दुनिया का न्याय करण आवैगा, तो उस दिन ताहीं तावळा ल्याण खात्तर पूरी कोशिश करो, उस दिन आग अकास ताहीं जळा कै भस्म कर देवैगी अर जो कुछ अकास म्ह सै उस ताहीं गर्मी पिघळा देवैगी ।

13 पर उसके वादे कै मुताबिक हम एक नये अकास अर नयी धरती की आस देख्वां सां, जिस म्ह परमेसवर की धार्मिकता वास करैगी ।

14 जब के थम इन बातों नै पूरा होण की बाट देखो सों तो थम इसी जिन्दगी जिओ जो परमेसवर नै पसन्द सै यानी थम एक-दुसरे के साथ शान्ति तै उसके स्याम्ही बेदाग अर बेकसूर रहो ।

15 यो जाण ल्यो के, क्यूँ म्हारा प्रभु धीरजवान सै? क्यूँके वो माणसां नै कुछ और बखत देणा चाहवै सै, ताके वो पाप करणा छोड़ दे, अर वो उन ताहीं बचा सकै, जब म्हारा संगी विश्वासी भाई पौलुस जिसतै हम प्यार करां सां, उसनै परमेसवर के ज्ञान के जरिये थारे ताहीं लिख्या सै, उसनै भी थारे ताहीं येए बात बताई सै, जो मन्नै थारे ताहीं बताई सै ।

16 उस्से तरियां ए उसनै अपणी सारी चिट्ठियाँ म्ह भी जो विश्वासियाँ ताहीं लिखी सै इन बातों का जिक्र करया सै, जिन म्ह कुछ बात इसी सै जिनका समझणा ओक्खा सै, अर अनपढ़ अर चंचल माणस उनके मतलबां नै गलत तरिकेँ तै बतावै सै जिसा वो पवित्त्र ग्रन्थ की दुसरे वचनां का गलत मतलब लिकाड़े सै, इसा करके वो परमेसवर नै मजबूर करै ताके वो उन ताहीं नाश करदे ।

17 ज्यांतै हे प्यारे विश्वासी भाईयो, थम जाणो सों, के ये सारी बात होवैगी, तो ध्यान राक्खों के जो लोग परमेसवर का हुकम ताहीं न्ही मानते वो झूठ के जरिये थारे ताहीं बहका ना दे, अर उन बातों के बारे म्ह शक करण लागरे सों, जिनपै पैहले विश्वास करो थे ।

18 पर म्हारे प्रभु अर उद्धारकर्ता यीशु मसीह के अनुग्रह अर ज्ञान की पहचान म्ह बढदे जाओ । उस्से की महिमा इब भी हो, अर युगानुयुग होन्दी रहवै । आमीन ।

यूहन्ना की पैहली चिट्ठी

??????

यूहन्ना की पैहली चिट्ठी के दो खास मकसद सै: (1) अपने पाठकां ताहीं परमेसवर अर उसके बेटे यीशु मसीह, की साझेदारी म्ह जीवन बिताण के खातर उत्साहित करना सै। (2) अर उन झूठी शिक्षा के मानण तै, जिसतै या साझेदारी टूट जावैगी, इसके बिरुद्ध चेतावनी देणा। यो झूठी शिक्षा इस धारणा पै आधारित थी के बुराई भौतिक दुनिया के साथ मिलण का नतिज्जा होवै सै, अर इस करके यीशु परमेसवर का बेटा, सचमुच एक माणस होए न्ही सकदा। इन शिक्षकां का दावा था के मुक्ति पाण खातर एक माणस नै इस संसार म्ह जीवन तै जुड़ी बात्तां तै मुक्त होणा होगा। अर वे यो भी सिखावै थे के शिष्टाचार अर अपने भाई तै प्रेम राखण जिसे बात्तां का मुक्ति तै कोए रिश्ता कोनी। इस शिक्षा के बिरोध म्ह लेखक साफ तौर पै यो दिखावै सै के यीशु मसीह सचमुच एक माणस था, अर वो इस बात पै जोर देवै सै, के जो यीशु मसीह म्ह बिश्वास करै सै, अर परमेसवर तै प्रेम करै सै तो जरूरी सै के वे आपस म्ह एक-दुसरायां गैल प्रेम करै।

रूप-रेखा

जानकारी 1:1-4 चाँदणा अर अन्धेरा 1:5-2:29

परमेसवर के बाळक अर शैतान के बाळक 3:1-24

सच अर झूठ 4:1-6

प्रेम का फर्ज 4:7-21

जीत देण आळा बिश्वास 5:1-21

???? ?? ???

1 हम उस जीवन देण आळे वचन के बारे म्ह लिखण लागरे सां, जो शुरु तै था, जिस ताहीं हमनै सुण्या, अर जिस ताहीं हमने अपनी आँखां तै देख्या, बल्के जिस ताहीं हमने ध्यान तै देख्या अर हाथ्यां तै छुआ।

2 (यो जीवन दुनिया म्ह आया अर हमनै इस ताहीं देख्या, अर हम उसके गवाह सां, अर थमनै उस अनन्त जीवन की खबर देवां सां, जो पिता के गैल था अर म्हारै पै जाहिर होया)।

3 जो किमे हमनै यीशु मसीह के बारे म्ह देख्या अर सुण्या सै उसकी खबर थमनै भी देवा सां, इस करके के थम भी म्हारै गैल संगति करो; अर म्हारी या संगति पिता अर उसके बेटे यीशु मसीह के गैल सै।

4 अर ये बात हम इस करके लिखा सां ताके थम खुशी तै भर जाओ।

?????? ?? ???

5 जो खबर हमनै यीशु मसीह तै सुणी अर थमनै सुणावां सां, वो या सै के परमेसवर चाँदणे के समान पवित्र सै, अर उस म्ह कुछ भी अन्धकार के समान कोए बुराई कोनी।

6 जै हम कहवां, के परमेसवर के गैल म्हारी संगति सै पर फेर भी अन्धकार म्ह चाल्लां, तो हम झूठे सां अर सच की राह पै कोनी चाल्दे;

7 पर जिसा परमेसवर चाँदणे के समान सै, उसेए हम भी चान्दणा म्ह चाल्लां, तो एक-दुसरे तै संगति राख्वा सां, अर उसके बेटे यीशु मसीह का लहू हमनै सारे पाप तै शुद्ध करै सै।

8 जै हम कहवां के म्हारै म्ह कोए भी पाप कोनी, तो अपने-आपनै धोक्वा देवा सां, अर म्हारै म्ह सच्चाई कोनी।

9 जै हम अपने पाप नै परमेसवर के स्याम्ही मान ल्या, तो वो म्हारे पाप नै माफ करण म्ह भरोसेमन्द अर धर्मी सै, अर वो हमनै सारे अधर्म तै शुद्ध करै सै।

10 जै हम कहवां के हमनै पाप न्ही करया, तो परमेसवर नै झूट्टा बणावा सां, अर हम उसके वचन के मुताबिक जीवन कोनी जिन्दे ।

2

~~~~~

1 हे मेरे प्यारे बाळकों, मै ये बात थारे ताहीं इस करके लिखूँ सूँ, के थम पाप ना करो; अर जै कोए पाप करै, तो परमेसवर पिता के धारे म्हारा एक मददगार सै, यीशु मसीह जो धर्मी सै,, जो म्हारे पापां की माफी खात्तर पिता तै बिनती करै सै ।

2 यीशु मसीह ए म्हारे पापां के खात्तर प्रायश्चित्त बलि सै, अर सिर्फ म्हारे ए न्ही बल्के सारी दुनिया के माणसां के पापां खात्तर भी ।

3 जै हम परमेसवर के हुकम का पालन करागे, उस्से तै हमनै बेरा लागगैगा के हम उस ताहीं जाणागे सां ।

4 जो कोए या कहवै सै, "मै उसनै जाण गया सूँ," अर उसके हुकम नै न्ही मानता, यो वो माणस झूट्टा सै, उस म्ह सच कोन्या;

5 पर जो कोए परमेसवर के वचन नै मानै सै, उस म्ह सचमुच परमेसवर का प्यार सिध्द होया सै, परमेसवर म्ह म्हारे बणे रहण का सबूत योए सै, इस्से तै हम जाणा सां के हम उस म्ह सां ।

6 जो कोए या कहवै सै के मै मसीह यीशु म्ह बणया रहूँ सूँ, तो उसके खात्तर जरूरी सै, के जिसा मसीह यीशु जिया उसाए वो भी जीवै ।

~~~~~

7 हे प्यारे विश्वासी भाईयो, मै थमनै कोए नया हुकम न्ही, पर वोए पुराणा हुकम लिखूँ सूँ, जो शरु तै था, यो वाए हुकम सै, जिस ताहीं थमनै मसीह म्ह विश्वास करत बखत सुण्या था ।

8 फेर भी मै थमनै नया हुकम लिखूँ सूँ, उस हुकम की सच्चाई मसीह म्ह थी, अर वाए थारे म्ह भी सै; क्यूँके अन्धकार मिटता जावै सै, अर सच का चान्दणा इब चमकण लागया सै ।

9 जो कोए या कहवै सै, के मै चाँदणे म्ह रहूँ सूँ, पर अपणे विश्वासी भाई तै बैर राक्खै सै, तो वो इब ताहीं अन्धकार म्ह ए रहण लागरया सै ।

10 जो कोए अपणे विश्वासी भाई तै प्यार करै सै, वो चान्दणा म्ह रहवै सै, अर उस म्ह इसा कुछ कोनी के दुसरयां नै पाप करवावै ।

11 पर जो कोए अपणे विश्वासी भाई तै बैर राक्खै सै, वो अन्धकार म्ह रहवै सै अर अन्धेरे म्ह चाल्लै सै, अर न्ही जाणदा के कित्त जावै सै, क्यूँके अन्धकार नै उसकी आँख आँधी कर दी सै ।

12 हे बाळकों, मै थमनै इस करके लिखूँ सूँ के यीशु के नाम तै थारे पाप माफ होए सै ।

13 हे बुजुर्गां, मै थमनै इस करके लिखूँ सूँ के जो शरु तै सै, थम उसने जाणो सां । हे गबरूओ, मै थमनै इस करके लिखूँ सूँ के थमनै उस शैतान पै जीत पाई सै । हे लड़को, मन्नै थारे ताहीं इस करके लिख्या सै के थम पिता परमेसवर नै जाणगे सां ।


14 हे बुजुर्गां, मन्नै थारे ताहीं इस करके लिख्या सै, के जो शरु तै सै, थम पिता परमेसवर नै जाणगे सां । हे गाबरूओं, मन्नै थारे ताहीं इस करके लिख्या सै, के थम ताकतवर बणो, अर परमेसवर का वचन थारे म्ह बणा रहवै सै, अर थमनै उस शैतान पै जीत पाई सै ।

~~~~~

15 थम ना तो दुनिया तै अर ना दुनियावी चिज्जां तै प्यार राक्खो । जै कोए दुनिया तै प्यार राक्खै सै, तो उस म्ह पिता परमेसवर का प्यार कोन्या ।

16 क्यूँके जो किमे दुनिया म्ह सै, यानी देह की अभिलाषा, आँखां की अभिलाषा अर रोजी रोटी का घमण्ड, वो पिता परमेसवर की ओड़ तै कोनी पर दुनिया की ए ओड़ तै सै ।

17 दुनिया अर उसकी अभिलाषा दोनु मिटते ज्या सै, पर जो परमेसवर की मर्जी पै चाल्लै सै वो सदा बणया रहवेगा ।



18 हे बाळकों, यो मसीह के आण का आखरी बखत सै; अर जिसा थमनै सुण्या सै, के मसीह का विरोधी भी आण आळा सै, उसके मुताबिक इब भी घणेए मसीह विरोधी उठ खड़े होए सै; इसतै हम जाणगे सां, के यो आखरी बखत सै।

19 मसीह विरोधी लिकड़ै तो म्हारी कलीसिया म्ह ए तै सै, पर वे म्हारै थे ए कोनी; जै वे म्हारै होन्दे, तो हमनै छोड़ के ना जान्दे; उनका म्हारे ताहीं छोड़ के जाणा ए यो साबित करै सै, के उन म्ह तै कोए भी म्हारा कोनी था।

20 पर थारे ताहीं तो पवित्र आत्मा मसीह के जरिये मिला सै, इस करके थम सारी सच्चाई नै जाणो सों।

21 मन्ने थारे ताहीं इस करके न्ही लिख्या, के थम सच्चाई नै न्ही जाणदे, पर इस करके के थम उस ताहीं जाणो सों, क्यूँके कोए भी झूठ, सच की ओड़ तै कोनी लिकड़ता।

22 झूठटा कौण सै? सिर्फ वो जो यीशु नै मसीह होण तै नाटै सै; अर मसीह का विरोधी वोए सै, जो पिता परमेसवर का अर बेट्टे का इन्कार करै सै।


23 जो कोए बेट्टे नै (मानण) तै नाटै सै उसके धारे पिता परमेसवर भी कोनी जो बेट्टे नै मान ले सै, उसके धारे पिता परमेसवर भी सै।

24 जो संदेश थमनै शरू तै सुण्या सै, जिब थमनै मसीह पै विश्वास करया, जै वो थारे म्ह बण्या रहवै, तो थम भी बेट्टे म्ह अर पिता परमेसवर म्ह बणै रहोगे।

25 परमेसवर नै म्हारे तै वादा करया सै, के वो हमनै अनन्त जीवन देवैगा।

26 मै थारे ताहीं उन माणसां के बारे म्ह चेतावनी देऊ सूं, जो थमनै झूठटी शिक्षा तै भरमावै सै;

27 अर थारे म्ह पवित्र आत्मा जो मसीह की ओड़ तै मिला सै, वो थारे म्ह रहवै सै; इस करके यो जरूरी कोनी, के कोए थमनै उस सच्चाई के बारे म्ह सिखावै, बल्के पवित्र आत्मा थारे ताहीं उन बातों की सारी सच्चाई बतावै सै, अर पवित्र आत्मा जो थारे ताहीं सिखावैगा, वो बिल्कुल सच सै, अर थारे तै झूठ कोनी बोल्लैगा, इस करके मसीह म्ह बणे रह्यो, जिसा थारे ताहीं पवित्र आत्मा नै सिखाया सै।



28 हे बाळकों, मसीह म्ह बणे रह्यो, के जिब वो दुबारा आवैगा, तो म्हारी हिम्मत बणी रहवै, ताके मसीह के आण पै उसके स्याम्ही शर्मिन्दा ना होआ।

29 जै थम जाणो सों, के मसीह धर्मी सै, अर जो कोए धर्म का काम करै सै, वो परमेसवर की ऊलाद सै।

### 3

1 सोच्चों तो सही के पिता परमेसवर नै म्हारै तै किसा प्यार करया, के हम पिता परमेसवर की ऊलाद कुहवाए; अर हम सां भी। पर इस कारण दुनिया के माणस हमनै कोनी जाणते, के हम परमेसवर की ऊलाद सां, क्यूँके वे पिता परमेसवर नै भी कोनी जाणते।

2 हे मेरे प्यारे विश्वासी भाईयो, इब हम परमेसवर की ऊलाद सां अर इब ताहीं यो तथ न्ही होया, के आण आळे बखत म्ह हम के बणागें! इतणा जाणा सां के जिब यीशु मसीह आवैगा तो हम उसके समान होवांगे, क्यूँके हम मसीह नै उसेए दिक्वांगे जिसा वो सै।

3 अर जो कोए मसीह पै या आस राक्खै सै, वो अपणे-आपनै उसाए पवित्र करै सै, जिसा वो पवित्र सै।

4 जो कोए बार-बार पाप करै सै, वो नियम-कायदा का विरोध करै सै। अर हुकम ना मानना ए पाप सै।

5 थम जाणो सों के मसीह इस खात्तर आया, ताके पाप नै दूर करै; अर उसके म्ह कोए भी पाप कोनी।\*

\* 3:5 3:5 (यूह-1:29)

6 जो कोए उस म्ह बणया रहै सै, वो बार-बार पाप न्ही करदा: जो कोए बार-बार पाप करै सै, वे कोनी जाणते के मसीह कौण सै, अर ना ए उसके गैल कोए उनका रिश्ता सै।

7 हे बाळकों, किसे कै बहकावै म्ह ना आइयो। जो धर्म के काम करै सै, वोए मसीह कै समान धर्मी सै।

8 जो कोए पाप करदा रहवै सै, वो शैतान की ओड़ तै सै, क्यूँके शैतान शरु तै ए पाप करदा आया सै। परमेसवर का बेट्टा इस खात्तर आया के शैतान के काम्मां का नाश करै।

9 जो परमेसवर की ऊलाद सै, वो बार-बार पाप न्ही करदा; क्यूँके मसीह का सुभाव उस म्ह बणया रहवै सै, अर वो पाप कर ए न्ही सकता, क्यूँके वो परमेसवर की ऊलाद सै।

10 परमेसवर की अर शैतान की ऊलाद की पिच्छाण इस्से तै हो ज्या सै: कोए भी माणस, जिसका जीवन धार्मिकता का कोनी, वो परमेसवर की ओड़ तै कोनी, अर ना ए वो, जिसनै अपणे भाई तै प्यार न्ही करया।

### XXXXXXXXXXXXXXXXXXXX

11 जो खबर धमने शरु तै सुणी, वो या सै के हम एक-दुसरे तै प्यार करां;

12 अर आदम के बेट्टे कैन की ढाळ ना बणो, जो उस शैतान की ओड़ तै था, अर जिसनै अपणे भाई ताहीं मार दिया। अर उस ताहीं क्यूँ मारया? क्यूँके उसके खुद के काम बुरे थे, अर उसके भाई के काम धर्म के थे।

13 हे विश्वासी भाईयो, जै दुनिया के माणस थारे तै बैर करै सै तो अचम्भा ना करो।

14 हम जाणा सां, के हम मौत के मुँह तै लिकड़के जीवन म्ह दाखल होवा सां; क्यूँके हम विश्वासी भाईयां तै प्यार राख्वा सां। जो प्यार न्ही राखदा वो मृत्यु के सिकन्जे म्ह रहवै सै।

15 जो कोए अपणे विश्वासी भाई तै बैर राख्खै सै, वो हत्यारा सै; अर धम जाणो सां के हत्यारे म्ह अनन्त जीवन न्ही रहन्दा।

16 प्यार के सै? इस्से तै हमनै जाण लिया के यीशु मसीह नै म्हारे खात्तर अपणी जान दे दी; इस करके हमनै भी अपणे विश्वासी भाईयां कै खात्तर जान देणी चाहिए।

17 पर जिस किसे कै धोरै दुनिया की दौलत हो अर वो अपणे विश्वासी भाई नै कंगाल देखके उसपे तरस ना खावै, तो उस म्ह परमेसवर का प्यार किस तरियां बणया रहै सके सै?

18 हे प्यारे बाळकों, म्हारे बोल्लण तै ए न्ही, पर काम अर सच्चाई म्ह भी म्हारा प्यार दिखणा चाहिए।

### XXXXXXXXXXXXXXXXXXXX

19 जिव हम दुसरयां तै प्यार करां सां, तो हम जाण लेवां सां, के हम सच के सां; अर जिस बात म्ह म्हारा मन हमनै दोष देवै सै, उसके बारे म्ह हम परमेसवर के आगै अपणे-अपणे मन नै होसला दे सकां सां;

20 जै बुरे काम की बजह तै म्हारा मन हमनै दोषी बणावै तोभी हम परमेसवर के स्याम्ही जा सकां सां, क्यूँके परमेसवर म्हारे मन तै बड़ा अर सब कुछ जाणण आळा सै।

21 हे प्यारे विश्वासी भाईयो, जै म्हारा मन हमनै दोष ना दे, तो हमनै परमेसवर के आगै जाण म्ह होसला मिलै सै।

22 अर जो कुछ हम परमेसवर तै माँगगा सां, वो हमनै उसतै मिलै सै, क्यूँके हम उसके हुकम नै मान्ना सां अर जो उसनै आच्छा लाग्गै सै, वोए हम करा सां।

23 उसका हुकम यो सै के हम उसके बेट्टे यीशु मसीह पे विश्वास करा, अर जिसा उसनै म्हारे ताहीं हुकम दिया सै उस्से कै मुताबिक हम आप्स म्ह प्यार करां।

24 जो परमेसवर के हुकम नै मान्ने सै, वो परमेसवर म्ह वास करे सै, अर वो उन म्ह वास करे सै: अर इस्से तै, हम जाणा सां, के वो म्हारे म्ह रहवै सै उस पवित्र आत्मा के जरिये जो उसनै म्हारे ताहीं दिया सै।



## 4

**XXXXXXXXXX XXXX**

1 हे प्यारे विश्वासी भाईयो, हरेक आत्मा का विश्वास ना करो, बल्के आत्मायाँ नै परखो के वो परमेसवर की ओड़ तै सै के न्ही; क्यूँके घणखरे झूटटे नबी दुनिया म्ह उठ खड़े होए सै।

2 परमेसवर की आत्मा थम इस रीति तै पिच्छाण सको साँ: जो आत्मा मान ले सै के यीशु मसीह देह धारण करकै आया सै, वो परमेसवर की ओड़ तै सै।

3 अर जो आत्मा यीशु नै न्ही मानती, वो परमेसवर की ओड़ तै न्ही सै; अर वोए तो मसीह के विरोधी की आत्मा सै, जिसका जिक्र थमनै सुण्या सै के वो आण आळा सै, अर इब भी दुनिया म्ह सै।

4 हे प्यारे बाळकों, थम परमेसवर के लोग साँ, अर थमनै झूटटे नबियाँ पै जीत पाई सै; क्यूँके पवित्तर आत्मा जो थारे म्ह बसै सै, वो शैतान तै बड़ड़ा सै, जो इस दुनिया म्ह सै।

5 झूटटे नबी दुनिया के लोग सै, इस कारण वे दुनिया की बात बोल्ले सै, अर लोग उनकी सुणै सै।

6 हम परमेसवर के लोग साँ। जो परमेसवर नै जाणै सै, वो म्हारी सुणै सै; जो परमेसवर नै न्ही जाणता वो म्हारी न्ही सुणदा। इस ढाळ हम सच की आत्मा अर भ्रम की आत्मा नै पिच्छाण लेवाँ साँ।

**XXXXXXXXXX XXXX**

7 हे प्यारे विश्वासी भाईयो, हम आप्स म्ह प्यार करां; क्यूँके प्यार परमेसवर की ओड़ तै सै, जो कोए प्यार करै सै, वो परमेसवर की ऊलाद सै, अर वो परमेसवर नै जाणै सै।

8 जो दुसरयाँ तै प्यार न्ही करते, वो परमेसवर नै न्ही जाणदा, क्यूँके परमेसवर प्यार सै।

9 जो प्यार परमेसवर म्हारै तै करै सै, वो इसतै जाहिर होया के परमेसवर नै अपणे इकलौते बेट्टे ताहीं दुनिया म्ह भेज्जा सै, ताके हम उसके जरिये सच्चे जीवन नै पावाँ।

10 प्यार वो न्ही जो हमनै परमेसवर तै करया सै, बल्के प्यार वो सै जो उसनै म्हारै तै करया, के म्हारे पापाँ के प्रायश्चित्त कै खात्तर अपणे बेट्टे ताहीं भेज्जा।

11 हे प्यारे विश्वासी भाईयो, जिव परमेसवर नै म्हारै ताहीं इसा प्यार करया, तो हमनै भी आप्स म्ह प्यार करणा चाहिए।

12 परमेसवर ताहीं भी किसे नै न्ही देख्या; जै हम आप्स म्ह प्यार करां, तो परमेसवर म्हारै म्ह बसा रहवै सै अर उसका प्यार म्हारै म्ह सिध्द होगया।

13 इस्से तै हम जाणा साँ के हम उस म्ह बणे रह्दा साँ, अर वो म्हारै म्ह; क्यूँके उसनै अपणे पवित्तर आत्मा म्ह तै म्हारै ताहीं दिया सै।

14 हमनै देख भी लिया अर गवाही देवा साँ के पिता परमेसवर नै बेट्टे ताहीं दुनिया का उद्धारकर्ता बनाकै भेज्जा सै।

15 जो कोए या मान ले सै के यीशु परमेसवर का बेट्टा सै, परमेसवर उस माणस म्ह वास करै सै, अर वो परमेसवर म्ह।

16 हम जाणगे साँ, अर हमनै विश्वास सै के परमेसवर म्हारै तै प्यार करै सै। परमेसवर प्यार सै, अर जो प्यार म्ह बणया रहवै सै, वो परमेसवर म्ह वास करै सै, अर परमेसवर उस म्ह वास करै सै।

17 इस्से तै प्यार म्हारै म्ह सिध्द होया, के न्याय के दिन हमनै यो होसला मिले, के परमेसवर हमनै दण्ड न्ही देगा। जिसा मसीह दुनिया म्ह रहन्दे होए परमेसवर म्ह वास करै था, उसाए हम भी परमेसवर म्ह वास कराँ साँ।

18 प्यार म्ह डर न्ही होंदा, बल्के सिध्द प्यार डर नै दूर करदे सै; क्यूँके डर का सम्बन्ध दण्ड तै होवै सै, अर जो डरै सै वो प्यार म्ह सिध्द न्ही होया।

19 हम इस करकै प्यार कराँ साँ, के पैहले उसनै म्हारै तै प्यार करया।

20 जै कोए कहवै, “मै परमेसवर तै प्यार करूँ सूँ,” पर अपणे विश्वासी भाई तै बैर राक्खै तो वो झूट्टा सै; क्यूँके जो अपणे विश्वासी भाई तै जिस ताहीं उसनै देख्या सै प्यार न्ही कर सकता, तो वो परमेसवर तै भी जिस ताहीं उसनै न्ही देख्या प्यार न्ही कर सकता।

21 परमेसवर तै हमनै यो हुकम मिल्या सै, कै जो कोए परमेसवर तै प्यार राक्खै सै वो अपणे भाई तै भी प्यार राक्खै।

## 5

### पारमेश्वर एवम एवम पारमेश्वर

1 जिसका यो विश्वास सै, के यीशु ही मसीह सै, वो परमेसवर पिता की ऊलाद सै; अर जो कोए परमेसवर तै प्यार करै सै, वो उसके माणसां तै भी प्यार करैगा।

2 जिब हम परमेसवर तै प्यार करां सां अर उसके हुकम नै मान्ना सां, तो इस्से तै हम जाणा सां, के हम परमेसवर अर उसके माणसां तै प्यार करां सां।

3 परमेसवर तै प्यार करण का मतलब यो सै के हम उसके हुकमां नै मान्ने; अर उसके हुकम मुश्कल कोन्या।\*

4 क्यूँके जो परमेसवर पिता की ऊलाद सै, उसनै दुनिया पै जीत हासिल करी सै; अर वा जीत दुनिया ताहीं हरा देवै सै, वो म्हारा विश्वास ए सै।

5 दुनिया पै जीत पावैण आळा कौण सै? सिर्फ वो जिसका यो विश्वास सै के यीशु ए परमेसवर का बेट्टा सै।

### पारमेश्वर एवम एवम पारमेश्वर

6 मसीह यीशु ए सै, जिसने बपतिस्मा लिया अर म्हारे खात्तर सूळी पै अपना लहू भी बहाया।

7 गवाही देण आळे तीन सै।

8 आत्मा, पाणी अर लहू; ये तीन्नु एके बात पै सहमत सै।

9 जिब हम माणसां की गवाही मान ल्यां सां, तो परमेसवर की गवाही तो उसतै बढ़के सै; अर परमेसवर की गवाही या सै के उसनै अपणे बेट्टे के बारे म्ह गवाही दी सै।

10 जो परमेसवर कै बेट्टे पै विश्वास करै सै, वो अपणे मन म्ह ए विश्वास राक्खै सै। जिसने परमेसवर पै विश्वास न्ही करया उसनै परमेसवर ताहीं झूट्टा बताया, क्यूँके उसनै उस गवाही पै विश्वास न्ही करया जो परमेसवर नै अपणे बेट्टे के बारे म्ह दी सै।

11 अर वा गवाही या सै के परमेसवर के बेट्टे के जरिये हमनै अनन्त जीवन पाया सै, अर यो जीवन उसके बेट्टे म्ह सै।

12 उसके बेट्टे तै म्हारा गहरा रिश्ता सै, उसके धारे अनन्त जीवन सै; अर जिसका परमेसवर के बेट्टे तै रिश्ता कोनी, उसके धारे अनन्त जीवन भी कोनी।

### पारमेश्वर एवम एवम पारमेश्वर

13 मै या चिट्ठी धारे ताहीं लिखूँ सूँ, जो परमेसवर कै बेट्टे के नाम पै विश्वास करो सां, ताके थम जाणो के अनन्त जीवन धारा सै।

14 हमने परमेसवर कै स्याम्ही यो होसला मिलै सै, वो होसला यो सै, के जो हम उसकी इच्छा के मुताबिक मांग्गा सां, तो वो म्हारी सुणे सै।

15 जिब हम जाणा सां, के जो कुछ परमेसवर तै मांग्या सै, वो म्हारी सुणे सै, तो यो भी जाणा सां, के जो कुछ हमने परमेसवर तै मांग्या, वो पाया सै।

16 जै कोए अपणे विश्वासी भाई नै इसा पाप करते देख्खै, जिसका नतिज्जा मौत ना हो, तो बिनती करै, अर परमेसवर उस ताहीं उन खात्तर, जिन नै इसा पाप करया सै, जिसका कारण मौत ना हो, जीवन देगा। जिस पाप का नतिज्जा मृत्यु सै; मै इसके बारे म्ह बिनती करण खात्तर न्ही कहन्दा

- 17 सारी ढाळ के बुरे काम तो पाप सै, पर इसा पाप भी सै जिसका नतिज्जा मृत्यु कोनी ।
- 18 हम जाणा सां, के जो कोए परमेसवर ऊलाद सै, वो बार-बार पाप न्ही करते; क्यूँके परमेसवर का बेट्टा यीशु मसीह उसनै पाप तै बचाई राक्खैगा, अर शैतान उसनै छू भी न्ही पांदा ।
- 19 हम जाणा सां, के हम परमेसवर तै सां, अर सारी दुनिया उस शैतान के बस म्ह पड़ी सै ।
- 20 हम यो भी जाणा सां, के परमेसवर का बेट्टा यीशु मसीह आ गया सै, उसनै म्हारे ताहीं उस सच्चे परमेसवर नै पिच्छाणण की समझ दी सै; के म्हारा परमेसवर का करीबी रिश्ता सै, क्यूँके म्हारा उसके बेट्टे के गेल्या करीबी रिश्ता सै । सच्चा परमेसवर अर अनन्त जीवन योए सै ।
- 21 हे बाळकों हरेक उस चीज तै दूर रहों जो थमनै परमेसवर तै दूर करै सै ।

## यूहन्ना की दुसरी चिट्ठी



यूहन्ना की दुसरी चिट्ठी “यूहन्ना” की ओड़ तै चुणी होई बिरबान्नी अर उसकै बाळकां के नाम लिक्खी गई सै, हो सके सै: उसका मतलब एक घरेलू कलीसिया अर उसकै सदस्य। साफ तौर तै इसका सन्देश सै, एक-दुसरयां तै प्यार करण की बिनती अर झूट्टी शिक्षकां अर उनकी झूट्टी शिक्षा के खिलाफ चेतावनी।


**रूप-रेखा**

जानकारी 1-3

प्यार की बड़ाई 4-6

झूट्टे रीति-रिवाजां के खिलाफ चेतावनी 7-11


समापन 12,13



1 या चिट्ठी मुझ यूहन्ना की ओड़ तै सै, जो कलीसिया का अगुवां सै, मै उस परमेसवर के जरिये चुणी गई बिरबान्नी अर उसके बाळकां के नाम या चिट्ठी लिखण लागरया सूं, जिनतै मै सच्चा प्यार करूं सूं, अर सिर्फ मै ए न्ही बल्के वे सारे भी प्यार करै सै, जो सच्चाई नै जाणै सै।

2 हम थारे तै प्यार करा सां, क्यूँके सच्ची शिक्षा म्हारे म्ह रहवै सै, अर म्हारे साथ सदा रहवैगी।

3 परमेसवर पिता, अर उसके बेटे यीशु मसीह की ओड़ तै अनुग्रह, दया, शान्ति, ये सब उनके साथ रहवैगी, जो इस सच्चाई नै मान्ने सै, अर एक-दुसरे तै प्यार करै सै।



4 मै घणा राज्जी होया के मनै तेरे कई बाळकां ताहीं उस हुकम कै मुताबिक, जो म्हारे पिता की ओड़ तै मिल्या था, सच पै चाल्दे होए पाया।

5 इब हे नारी, मै तेरे तै बिनती करूं सूं, के हमनै एक-दुसरे तै प्यार करणा चाहिए, यो कोए नया हुकम कोनी, बल्के यो वो हुकम सै जिसनै हम उस बखत तै जाणा सां, जिन हमनै मसीह के पाच्छे चालणा शुरु करया था।

6 अर सच्चा प्यार यो सै, के हम परमेसवर के हुकमां के मुताबिक चाल्लां, जिस दिन तै थमनै मसीह के पाच्छे चालणा शुरु करया था, उस दिन तै थम जाणो सों, के परमेसवर नै म्हारे ताहीं हुकम दिया सै, के हम सदा एक-दुसरे तै प्यार करा।

7 मै ज्यातै कहूं सूं, क्यूँके भोत-से लोग झूट्टी शिक्षा तै दुसरयां नै धोक्खा देण आळे, इस दुनिया म्ह अलग-अलग जगहां तै लिक्कड़ आए सै, वे कहवै सै, के मसीह इस दुनिया म्ह इन्सान का रूप धारण करके न्ही आया, जै कोए माणस ये बात कहवै सै तो वो माणस यीशु मसीह का विरोधी सै, वो दुसरयां ताहीं भरमाण आळा सै।

8 थमनै चौक्कस रहणा चाहिए, के ये लोग थमनै धोक्खा न्ही देण पावै, ताके परमेसवर की सेवा करण म्ह जो मेहनत थमनै करी सै, वा बेकार ना जावै, पर परमेसवर थारी उस मेहनत का थमनै ईनाम देवैगा।

9 जै कोए माणस, मसीह नै जो शिक्षाएँ दी सै उसका पालन न्ही करदा, अर अपणी ओड़ तै उन शिक्षा म्ह कुछ और जोड़ै सै, तो उसकी परमेसवर के गैल साझेदारी कोनी, पर जो कोए उसकी दी गई शिक्षा का पालन करदा रह सै, उसकी पिता परमेसवर अर उसके बेटे यीशु मसीह के गैल साझेदारी सै।

10 जै कोए थारे धौर आवै अर वा शिक्षा दे जो मसीह की शिक्षा तै न्यारी सै, तो उस ताहीं थम ना तो घर म्ह आण द्यो अर ना नमस्कार करो।

11 क्यूँके जो कोए इसे माणस नै नमस्कार करै सै, वो उसके भुन्डे काम्मां म्ह साइझी होवै सै।



12 मन्ने घणीए बात थारे ताहीं बताणी सै, पर मै उन बाततां नै इस चिट्ठी म्ह लिखणा कोनी चाहन्दा, अर उम्मीद सै के मै थारे धोरै आऊँगा, अर आम्ही-स्याम्ही थारे तै बात करूँगा, अर फेर हम आच्छी ढाळ खुशी मनावांगे।

13 परमेसवर के जरिये चुणी गई बेब्बे के बाळकां का, थारे ताहीं नमस्कार।

## यूहन्ना की तीसरी चिट्ठी

???????

यूहन्ना की तीसरी चिट्ठी “यूहन्ना” की ओड़ तै कलीसिया के एक अगुवें, गयुस, ताहीं लिखी गई थी। लेखक गयुस की इस करके बड़ाई करे सै क्यूँके वो दुसरे विश्वासियाँ की भोत मदद कर सै, साथ म्ह दियुत्रिफेस नाम के एक माणस तै चौक्कस रहण की चेतावनी भी चेतावनी भी देवै सै।

रूप-रेखा

जानकारी 1-4

गयुस की बड़ाई 5-8

दियुत्रिफेस ताहीं उल्हाणा 9,10

देमेत्रियुस ताहीं सराहया जाणा 11,12

समापन 13-15

???????

1 या चिट्ठी मुझ यूहन्ना की ओड़ तै, जो कलीसिया का अगुवां सै, प्यारे मित्रर गयुस के नाम सै, जिसतै मै सच्चा प्यार करूँ सुं।

2 हे प्यारे मित्रर, मेरी या प्रार्थना सै, के जिसा तू आत्मिक बढ़ोतरी करण लाग रह्या सै, उस्से तरियां तू सारी बाततां म्ह बढ़ोतरी करै अर भला चंगा रहवै।

3 क्यूँके जिव कुछ विश्वासी भाईयाँ नै आणकै मेरे ताहीं बताया के तू ईमानदारी तै परमेसवर की सच्ची राह पै चाल्लण लागरया सै, तो मै भोत-ए राज्जी होया।

4 मन्नै इसतै बढ़कै किसे और बात की खुशी कोनी के जिव मै सुणु सुं, के वे लोग जो मेरे बाळकां की तरियां सै, वे परमेसवर की सच्ची राह पै चाल्लण लागरे सै।

???? ?? ?????

5 हे प्यारे मित्रर, तू म्हारे विश्वासी भाईयाँ की मदद के खात्तर ईमानदारी तै भोत कुछ करण लागरया सै, तन्नै उनकी भी मदद करी जिन ताहीं तू न्ही जाणदा।

6 जिनकी तन्नै मदद करी थी, उन म्ह तै कई माणसां नै, उरै की कलीसिया के विश्वासी भाईयाँ ताहीं बताया, के तू अपणे विश्वासी भाईयाँ तै कितना प्यार करै सै, इव मै धमनै कहूँ सूं के तू इसे माणसां की हमेशा मदद करदा रहै, जिव वे दुसरी जगहां सफर खात्तर जावै सै, क्यूँके योए परमेसवर नै आच्छा लागगे सै।

7 क्यूँके ये लोग हरेक जगहां सफर करै सै, ताके मसीह का वचन सुणा सकै, अर गैर यहूदियाँ तै कुछ मदद न्ही लेंदे।

8 इस करके हमनै अपणे घर म्ह, इसे माणसां का स्वागत करके उनकी सेवा-पाणी करणी चाहिए, अर उनकी हरेक जरूरत पूरी करणी चाहिए, ताके हम माणसां म्ह सच्चा सन्देस फैलाण म्ह उनके साइझीदार हो सका।

?????????????? ?? ???????????????

9 मन्नै पैहले थारी कलीसिया के विश्वासियाँ ताहीं एक चिट्ठी लिखी थी, पर दियुत्रिफेस नै मेरी हिदायत मानण तै इन्कार कर दिया क्यूँके वो खुद हमेशा कलीसिया का अगुवां बणणा चाहवै था।

10 इस करके जिव मै आजंगा तो, थारे स्याम्ही उसके जरिये करे गये सारी बाततां नै स्पष्ट कर देऊंगा, यानी सारे बुरे-बुरे शब्दां का इस्तमाल करदे होए जो उसनै म्हारे पै दोष लगाए, इतणाए न्ही बल्के वो ना ए तो किसे शिक्षक ताहीं स्वीकार करै सै, अर ना ए कलीसिया के किसे विश्वासी ताहीं इसा करण देवै सै, जो स्वीकार करणा चाहवै सै, उन ताहीं वो कलीसिया तै बाहर कर देवै सै।

11 हे प्यारे मित्र, बुराई करण आळे न्ही, पर भलाई करण आळे बणो। जो भलाई करै सै, वो परमेसवर की ओड़ तै सै, पर जो बुराई करै सै, वो परमेसवर ताहीं कोनी जाणदा।

12 कलीसिया म्ह हर कोए कहवै सै, के देमेतिरयुस एक आच्छा माणस सै, क्यूँके उसका बरताव परमेसवर के सच्चे सन्देस के मुताबिक सै, अर तू भी जाणै सै के जो हम कहवा सां वो सच सै।



13 मन्ने तेरे ताहीं भोत कुछ बताणा तो था, पर मै उन बाततां नै इस चिट्ठी म्ह लिखणा कोनी चाहन्दा।

14 पर मन्ने उम्मीद सै, के तेरे तै तावळा-ए मिलूंगा, फेर हम आम्ही-स्याम्ही बात करागें।

15 मै प्रार्थना करूँ सूँ, के परमेसवर थमनै शान्ति देवै। ओड़ै के मित्रां तै नाम ले-लैकै म्हारी ओड़ तै नमस्कार कह दिये।

## यहूदा की चिट्ठी

??????

यहूदा की चिट्ठी झूठी शिक्षा देणिया के खिलाफ चेतावनी देण खात्तर लिक्खी गई सै, क्यूँके वे विश्वासी होण का दावा करै थे। इस छोट्टी सी चिट्ठी की कई बात पतरस की दुसरी चिट्ठी के समान सै, इस म्ह लेखक अपने पाठकों ने उत्साहित करै सै के “उस विश्वास के खात्तर पूरी कोशिश करो जो पवित्र माणसां ताहीं एके बार सौप्या गया था।”

रूप-रेखा

जानकारी 1,2

झूठे शिक्षाकां का चाल-चलण, शिक्षा, अर अंत 3-16

विश्वास म्ह बणे रहणे की चेतावनी 17-23

आशीष वचन 24,25

1 या चिट्ठी मुझ यहूदा की ओड़ तै सै, मै, मसीह यीशु का दास अर याकूब का छोट्टा भाई सूँ। मै या चिट्ठी उन माणसां ताहीं लिखण लागरया सूँ, जिन ताहीं परमेसवर नै अपने वै विश्वास करण खात्तर बुलाया सै। पिता परमेसवर थारे तै प्यार करै सै, अर मसीह यीशु म्ह थारे ताहीं सुरक्षित राक्खै सै।

2 मै प्रार्थना करूँ सूँ, के परमेसवर थारे ताहीं दया, शान्ति अर प्यार भोत-ए घणा देवै।

3 हे प्यारे विश्वासी भाईयो, जब मै उस नई जिन्दगी के बारे म्ह लिखण म्ह घणी मेहनत करण लागरया था, जो म्हारे ताहीं मसीह यीशु के जरिये परमेसवर तै मिलै सै, अर जिस म्ह हम सब साझीदार सां। तो मनै महसूस होया के मै इस चिट्ठी के जरिये थमनै उत्साहित करूँ, ताके थम अपने विश्वास की बढ़ोतरी खात्तर और भी मेहनत करो, परमेसवर नै यो विश्वास सारे माणसां ताहीं सदा खात्तर एके बार दे दिया सै, अर यो बदल्या न्ही जा सकदा।

4 क्यूँके परमेसवर का कहणा ना मानण आळे भोत-से झूठ्टी शिक्षा देण आळे लोग चुपचाप म्हारे बिना जाणे म्हारे म्ह आ मिले सै, ये वो लोग सै जिनके बारे म्ह परमेसवर नै सदियाँ पैहले पवित्र ग्रन्थ म्ह कह्या था, के उन ताहीं परमेसवर दण्ड देवैगा। वे परमेसवर के अनुग्रह के सन्देस नै बिगाड़ के उस ताहीं भोग-विलास म्ह बदल देवै सै। यीशु मसीह जो म्हारा एकमात्र मालिक अर प्रभु सै, वे उसका इन्कार करै सै।

5 हालाकि थमनै सारी बातों का बेरा सै, फेर भी मै थमनै वे बात याद दुवाणा चाहूँ सूँ, जब प्रभु नै इस्राएली माणसां ताहीं मिस्र देश की गुलामी तै छुड़ाया था, तो उसके बाद उन म्ह विश्वास ना करणीया का प्रभु नै जंगल-बियाबान म्ह नाश कर दिया।

6 यो भी याद राक्खों के परमेसवर नै उन सुगंदूत्तां ताहीं भी दण्ड दिया, जिननै अपनी प्रभुता बणाए न्ही राक्खी, बल्के अपनी खुद की रहण की जगहां जो के सुगंधी छोड़ दी, परमेसवर नै उन ताहीं भी भीषण दिन के न्याय खात्तर अन्धेरे म्ह, जो सदा काल के खात्तर सै, बेल्लां तै बाँधके राख्या सै, जिन ताहीं कोए तोड़ न्ही सकदा।

7 उससे तरियां उन माणसां के बारे म्ह जो सदोम अर अमोरा नगर अर उसके लोवै-धोवै के नगर के माणसां के गैल के बणी थी। वे माणस जार होंगे थे, अर अप्राकृतिक यौन-सम्बन्धां के पाच्छे लागे थे, तो परमेसवर नै उन ताहीं आग तै भस्म कर दिया, जो उनके गैल होया वा दुसरयां खात्तर चेतावनी सै, क्यूँके वे भी अनन्त आग के जरिये दण्ड पावेंगे।

8 इन बातों के बारे म्ह बेरा होन्दे होए, परमेसवर का कहणा ना मानण आळे लोग इससे तरियां तै पाप करै सै, उनका कहणा सै, के वे दर्शन देखे सै, वे अपनी-अपनी देह नै अशुद्ध करै सै, अर वे परमेसवर की प्रभुता नै अस्वीकार करै सै, अर सुगंदूत्तां की बुराई करै सै।



9 पर परमेश्वर के प्रधान सुर्गदूत मीकाईल नै, जिव शैतान तै मूसा नबी की लाश कै बारे म्ह वाद-विवाद करया, तो मीकाईल सुर्गदूत नै भी उसतै आच्छा-भुंडा कहकै खोट लाण की हिम्मत कोनी करी, पर सिर्फ इतणाए कह्या, के “प्रभु तन्नै फटकैरे\*।”

10 पर परमेश्वर का कहणा ना मानण आळे ये लोग उन बात्तां की आलोचना बुरे शब्दां तै करै सै, जिन ताहीं वे जाणदे ए कोनी, अर जिन बात्तां नै वे जाणै सै, उन ताहीं वे बिना सोच्चे-समझे जंगली-जानवरों की तरियां करै सै, इसे काम्मां खात्तर परमेश्वर उन ताहीं दण्ड देवैगा।

11 धिक्कार सै उनपै! जो कैन की तरियां बुरी जिन्दगी जीवै सै, जिसनै अपणे भाई का खून इस करकै करया था, क्यूँके परमेश्वर नै उसकी भेट स्वीकार कोनी करी, अर उसके भाई की कर ली थी, अर वो उस बिलाम की तरियां सै, जिसनै परमेश्वर के माणसां ताहीं पाप करण खात्तर उकसाया, ताके वो धन ले सकै जिसकी पेशकस उस ताहीं करी गई थी, अर जो कोरह की ढाळ मूसा नबी के अधिकार का विरोध करण के कारण नाश होगे।

12 जिव थम परमेश्वर के प्यार नै, याद करण कै खात्तर प्रीति भोज† म्ह कट्टे होओ सों, तो वे भी थारे म्ह शामिल हो जावे सै, तब वे उस समुन्दर म्ह लुक्की होए पत्थर की चट्टान की तरियां सै, जो थारे ताहीं डूबो सकै सै। वे उस पाळी की तरियां सै जो सिर्फ अपणा पेट भरे सै, अर वे बिना पाणी के बादल सै, जिन ताहीं हवा उड़ा ले जावे सै, वे पतझड़ के इसे दरखत सै, जिन म्ह कंदे फळ कोनी लागदे, अर ये जड़ तै उखड़गे सै।

13 ये समुन्दर की तेज झाल के हिलोरे सै, जो अपणी गंदगी का झाग उछाळै सै, ये लोग शर्मनाक काम करै सै, ये उन राह तै भटके होए तारां की ढाळ सै, जो किसे नै सही राह न्ही दिखा सकदे, जिनके खात्तर परमेश्वर नै सदा खात्तर घोर अन्धकार की जगहां तय कर राक्खी सै, जइँ वो सदा खात्तर रहवैगे।

14 हनोक नै भी जो आदम की सातवीं पीढ़ी म्ह तै था, इन माणसां कै बाबत या भविष्यवाणी करी थी, “देक्खों, प्रभु अपणे लाखां पवित्तर सुर्गदूतां कै गेल्या आवैगा,

15 तो उन सब माणसां का न्याय करैगा, अर बुरे माणसां नै उनके बुरे काम्मां का अर दुष्ट माणसां नै जिननै परमेश्वर के विरोध म्ह कड़वे शब्द इस्तमाल करे थे, उन ताहीं कसूरवार ठहरावैगा।”

16 ये तो बेसबरे, बड़बड़ाण आळे, अर अपणी मर्जिया कै मुताबिक लगातार बुरे काम करै सै, अर अपणे मुँह तै घमण्ड की बात बोल्लै सै, वे अपणे फायदे कै खात्तर चापलूसी की बात करै सै।

17 पर हे प्यारे भाईयो, थम इन बात्तां नै याद राक्खो, जो म्हारे प्रभु यीशु मसीह के प्रेरित भोत पैहल्याए कहगे सै।

18 वे थमनै कह्या करै थे, “के प्रभु यीशु मसीह के बोहड़ण तै पैहले इसे माणस भी होवैगे जो प्रभु का मजाक उड़ावैगे, वे इसे माणस सै, जो अपणी बुरी अभिलाषायां कै मुताबिक जिन्दगी जिवैगे।”

19 ये वे माणस सै, जो थारे म्ह फूट गेरै सै, अर जिन म्ह पवित्तर आत्मा न्ही सै उनकी बुरी अभिलाषा, उन ताहीं अपणे बस म्ह राक्खै सै।

20 हे प्यारे विश्वासी भाईयो, थम लगातार एक-दुसरे की बढोतरी करते जाओ, अर आप्स म्ह एक-दुसरे नै सच्ची शिक्षा जिसपै थम बिश्वास करो सों, उसतै उत्साहित करदे रहों, अर जिस तरियां पवित्तर आत्मा थारे ताहीं अगुवाई करै सै थम प्रार्थना करदे रहों।

21 थमनै यो जाणकै जीवन जीणा चाहिए, के परमेश्वर थारे तै प्यार करै सै, अर थम उस दिन की बाट देखदे रहो जिस दिन म्हारा प्रभु यीशु मसीह बोहड़कै आवैगा ताके थमने अनन्त जीवन मिलै, क्यूँके उसनै म्हारे पै दया करी सै।

22 उन माणसां पै दया करो जिनका बिश्वास डामाडोल होरया सै।

23 घणखरे माणसां नै न्याय की आग तै झपट्टा मारकै लिकाड़ो, अर दुसरे माणसां के प्ररति दयालु रहों, पर इसकै साथ चौकस भी रहों, उस लत्ते तै भी नफरत करो जो पाप तै भरे काम्मां तै कलंकित

\* 1:9 1:9 फटकैरेथमकावे † 1:12 1:12 प्रीति भोज परमेश्वर के लोग जो भाई चारे म्ह कट्टे हो के खाणा खावे सै उस ताहीं प्रीति भोज कहवै सै

हो गया सै।

24-25 वो एकमात्र सच्चा परमेसवर सै, जो धमनै ठोक्कर खाण तै बचा सकै सै, अर वो धमनै बेकसूर अर मगन करकै अपणे महिमा म्ह अपणे स्याम्ही खडचा करैगा। जो प्रभु यीशु मसीह नै म्हारे खात्तर करया, उसकै जरिये परमेसवर नै म्हारे ताहीं बचाया सै। म्हारा प्रभु यीशु मसीह माणसां म्ह, परमेसवर की तारीफ करण का कारण बणा, ताके वो पिच्छ्याण सकै, के शरुआत तै, इब अर सदा कै खात्तर शक्ति अर अधिकार उस्से का सै। आमीन।

## प्रकाशित वाक्य



यूहन्ना का प्रकाशित-वाक्य उस बखत लिख्या गया था, जिव विश्वासियाँ ताहीं उनके विश्वास के खात्तर तंग करया जाण लाग रहया था। यीशु मसीह पै प्रभु अर माल्लिक के रूप म्ह विश्वास करण के कारण। इसके लेखक की चिन्ता की बड्डी बात या सै के अपने पढ़णियाँ म्ह आसा अर हिम्मत देणा अर उन ताहीं या बिनती करणी थी के इस दुःख अर सताव के बखत विश्वास म्ह बणे रहवै। इस किताब का घणखरा भाग प्रकाशनां अर दर्शणा की मालाओं के रूप म्ह सै, जिस तरियाँ साकेतिक भाषा म्ह दिखाया गया सै, हो सके सै उस बखत के विश्वासियाँ की समझ म्ह आगी थी, पर दुसरे माणसां खात्तर यो भेद रह्या। जिस तरियाँ संगीत म्ह धुन होवै सै, उसे तरियाँ इस किताब म्ह कई चीज बार-बार कई तरियाँ तै न्यारे-न्यारे दर्शणा की मालाओं के जरिये दुहराई जावै सै। पर इस किताब की व्याख्या म्ह उसके बारे म्ह मतभेद सै। फेर भी जरूरी बात साफ सै: के परमेसवर प्रभु यीशु मसीह के जरिये अपने सारे दुश्मनां नै जिन म्ह शैतान भी शामिल सै, सदा के खात्तर पूरी तरियाँ तै हरा देवैगा। अर जिव या जीत पूरी हो ज्यागी तो वो अपने विश्वास लायक माणसां नै नया अकास अर नई धरती नै आशीषां तै भर देवैगा।

### रूप-रेखा

जानकारी 1: 1-8

शरुआती दर्शन अर सात्तु कलीसिया ताहीं चिट्ठी 1:9-3:22

सात मोहर के जरिये बन्द चमड़े की चिट्ठी 4:1-8:1

सात तुरही 8:2-11:19

अजगर अर दो पशु 12:1-13:18

और दर्शन 14:1-15:8

परमेसवर के छो के सात कटोरे 16:1-21

बेबीलोन का नाश, अर पशु, झूठे नबी, और शैतान की हार 17:1-20:10


आखरी न्याय 20:11-15

नया अकास, नई धरती, अर नया यरुशलेम 21:1-22:5 समापन 22:6-21

1 परमेसवर नै यीशु मसीह ताहीं वो गुप्त बातें दिखाई जो भोत तावळी होण आळी सै, ताके वो अपने दास्तां पै इन बाततां नै जाहिर करै, उसके बाद मसीह नै सुर्गदूत भेज्या, ताके अपने दास यूहन्ना ताहीं ये बात दिखावै।

2 यूहन्ना नै वो सब कुछ लिख लिया, जो उस ताहीं दिखाया गया था, यानी वो वचन जो परमेसवर की ओड़ तै आया था, अर जो कुछ भी मसीह यीशु नै कहा था।

3 धन्य सै वे जो इस भविष्यवाणी के वचन नै पढ़ै सै, अर वे जो सुणै सै अर इस म्ह लिक्खी होई बाततां नै मान्ने सै, क्यूँके ये बात तावळी होण आळी सै।



4 ये चिट्ठियाँ यूहन्ना की ओड़ तै आसिया परदेस की सात कलीसियाओं के नाम सै।

परमेसवर पिता की ओड़ तै थमने अनुग्रह अर शान्ति मिलै, जो सै, अर जो था, अर जो आण आळा सै, अर इन सात आत्मायाँ की ओड़ तै जो उसके सिंहासन के स्याम्ही सै।

5 अर यीशु मसीह जो विश्वास जोगगा गवाह अर मरे होया म्ह तै जी उठण आळा म्ह तै जेट्टा अर धरती के राजयां का हाकिम सै, उसकी की ओड़ तै थारे ताहीं अनुग्रह अर शान्ति मिल्दी रहवै। वो म्हारे तै प्यार करै सै, अर उसने अपने लहू के जरिये म्हारे ताहीं पाप तै छुटाया सै।

6 उसनै म्हारे ताहीं वे माणस बणा दिये सै, जिनका परमेसवर राजा सै, अर उसनै म्हारे ताहीं परमेसवर जो उसका पिता सै, उसका याजक बणा दिया सै, उस्से की महिमा अर पराक्रम युगानुयुग रहवै। आमीन।

7 लखाओ, वो बादळां कै गेल्या आण आळा सै, अर हरेक आँख उसनै देखैगी, बल्के जिननै उस ताहीं बेधा था, वे भी उस ताहीं देखैंगे, अर धरती के सारे कुल उसके कारण छात्ती पीट्टैंगे, जिव उस ताहीं देखैंगे। हाँ। आमीन।

8 प्रभु परमेसवर यो कहवै सै, के वो जो सै, अर जो था, अर जो आण आळा सै, जो सब तै शक्तिशाली सै, "मै अल्फा अर ओमेगा सू।"

~~~~~

9 मै यूहन्ना, जो थारा बिशवासी भाई अर मसीह कै खात्तर दुख सहण म्ह अर परमेसवर के राज्य म्ह, अर धीरज तै दुख सहण म्ह साइझी सू, जो दुख उन माणसां पै आया सै, जिनका उसके साथ रिशता सै, मै पतमुस नाम के टापू पै भेज दिया गया, क्यूँके मन्नै परमेसवर के वचन का प्रचार करया था, अर मसीह यीशु के सच्चे सन्देश ताहीं सुणाया था।

10 प्रभु के दिन, पवित्र आत्मा मेरे पै आ गया, अर मन्नै अपने पाच्छै तुरही बरगा बड़ड़ा शब्द सुण्या।

11 उसनै उसतै कह्या, के "जो कुछ तू देखवै सै, उसनै किताब म्ह लिखके सात्तु कलीसियाओं के धोरै भेजदे, जो इन नगरां म्ह सै, यानिके इफिसुस, स्मुरना, पिरगमुन, थुआतीरा, सरदीस, फिलदिलफिया, अर लौदीकिया ताहीं।"

12 फेर मन्नै उस ताहीं, जो मेरै तै बोल्लण लागरया था, देखण के खात्तर अपना मुँह फेरया, अर पाच्छै घूमके मन्नै सोन्ने की सात दीवट देखी,

13 अर उन दीवटां* के बिचाळै माणस के बेटे के बरगा एक आदमी देख्या, जो पायां ताहीं के लत्ते पहरे, अर छात्ती पै सोन्ने का पटुका बाँधे होइ था।

14 उसके सिर के बाळ धोळी ऊन बल्के बर्फ की ढाळ जमा धोळे थे, अर उसकी आँख आग की तरियां धधकण लागरी थी।

15 अर उसके पैर भट्टी म्ह तपा के चमकाए होए पीत्तळ के जिसे थे, अर उसका बोल घणे पाणी के गरजण जिसा था।

16 वो अपने सोळै हाथ म्ह सात तारे लिए होइ था, अर उसके मुँह म्ह तै पैन्नी दोधारी तलवार लिक्के थी। उसका मुँह इस ढाळ बळै था, जिस ढाळ सूरज करड़ी धूप के बखत चमके सै।

17 जिव मन्नै उस ताहीं देख्या, तो उसके पायां पै मुदा की ढाळ पड़ग्या। उसनै मेरै पै अपना सोळा हाथ, धरके कह्या, "मतना डरै, मै पैहलड़ा अर आखरी अर जिन्दा सू।"

18 मै मरग्या था, अर इब देख मै युगानुयुग जीऊँ सू, अर मौत अर पाताळ लोक की ताळी मेरै धोरै सै।

19 इस करके जो बात तन्नै देखी सै अर जो बात होण लागरी सै अर जो बात इसके पाच्छै होण आळी सै, उन सारियां नै लिख ले।

20 इब मै उन सात तारां का भेद जिन ताहीं तन्नै मेरै सोळै हाथ म्ह देख्या था अर उन सोन्ने की दीवटां का भेद तन्नै बताऊँ सू, वे सात तारे सात्तु कलीसियाओं के धोरै भेज्जे गये सुगंदूत सै, अर वे सात दीवट, सात कलीसिया सै।

2

~~~~~

1 उसनै मेरे ताहीं यो भी कह्या के इफिसुस नगर की कलीसिया के सुगंदूत नै न्यू लिख

\* 1:13 1:13 दीवटां भोट-से दीवे रखण का एक बरतन

के, “जो सात्तु तारे अपणे सोळे हाथ म्ह लिए होड सै, अर सोन्ने की सात्तु दीवटां \*के बिचाळै हाँडे सै, वो न्यु कहवै सै”

2 के मै तेरे काम, अर मेहनत, अर तेरा धीरज जाणु सूं, अर मै जाणु सूं, के तू बुरे माणसां की शिक्षा नै सह न्ही सकदा, अर जो अपणे-आपनै प्रेरित कहवै सै, अर सै न्ही, उन ताहीं तन्नै परख के झूट्टा पाया।

3 अर तू धीरज धरै सै, अर मेरै नाम के खात्तर दुख टा-टाके भी तन्नै मेरी सेवा करना न्ही छोडचा।

4 पर मन्नै तेरे खिलाफ म्ह न्यु कहणा सै, के तेरे म्ह वो प्यार न्ही रह्या जो तू पैहले मेरे तै करै था।

5 यो याद कर के तन्नै शरु म्ह मेरे तै किसा प्यार करया था, अर इब उसा प्यार न्ही करदा, तू पाप करना छोड दे, अर जिसा तन्नै शरु म्ह मेरे तै प्यार करया था उसाए प्यार कर, अर जै तू पाप करना न्ही छोडैगा, तो मै तेरे धरै आके तेरी दीवट नै उस जगहां तै हटा दियुंगा।

6 पर हाँ, तेरे म्ह या बात तो सै, के तू नीकुलइयों† के काम्मां तै नफरत करै सै, जिनतै मै भी नफरत करूँ सूं।

7 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै: वे लोग जो बुराई की ताकत पै जीत पावै सै, मै जीवन के दरखत म्ह तै जो जीवन देवै सै, जो सुर्गलोक म्ह सै, उस ताहीं उस फळ म्ह तै खाण नै दियुंगा।

\*\*\*\*\*

8 अर उसने मेरे ताहीं स्मरना नगर की कलीसिया के सुर्गदूत ताहीं यो लिखण खात्तर कहा, के, जो पैहल्डा अर आखरी सै, जो मर लिया था अर इब जिन्दा होगया सै, वो न्यु कहवै सै के, 9 मै तेरे क्लेश अर गरीबी नै जाणु सूं, (पर तू साहकार सै), अर जो माणस अपणे-आप ताहीं यहूदी कहवै सै, अर सै न्ही, पर वो शैतान के झुण्ड म्ह तै सै, मै उनकी बुराई नै भी जाणु सूं।

10 जो दुख तन्नै झेलणे होंगे, उनतै मत घबरा, क्यूँके देखवो, शैतान अपणे माणसां के जरिये थारे म्ह तै कितन्याँ ताहीं जेळखान्ने म्ह गेरैगा, ताके थम परखे जाओ, अर थारे ताहीं दस दिन तक क्लेश टाणा पडैगा। जान देण तक बिश्वासी रह, तो मै थारी जीत के कारण ईनाम के तौर पै थमनै अनन्त जिन्दगी देऊँगा।

11 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै, वे लोग जो बुराई की ताकत पै जीत पावै सै, उसने दुसरी मौत तै नुकसान कोनी होवैगा।

\*\*\*\*\*

12 अर उसने मेरे ताहीं पिरगमुन नगर की कलीसिया के सुर्गदूत ताहीं यो लिखण खात्तर कहा, के, “जिसके धरै दोधारी अर पेन्नी तलवार सै, वो न्यु कहवै सै”

13 के मन्नै न्यु तो बेरा सै, तू ओडै रहवै सै जित्त शैतान का राज सै, अर मेरै नाम पै स्थिर रहवै सै, अर मेरै पै बिश्वास करण तै उन दिनां म्ह भी पाचछै न्ही हटचा जिन म्ह मेरा बिश्वास जोगगा गवाह अन्तिपास, तेरे नगर म्ह उस जगहां पै मारया गया जित्त शैतान रहवै सै।

14 पर मन्नै तेरे खिलाफ म्ह न्यु कहणा सै, थम उन माणसां का बिरोध कोनी करदे, जो पुराणे जमानै के नबी बिलाम की तरियां झूट्टी शिक्षा सिखावै सै, बिलाम नै राजा बालाक ताहीं यो सिखाया, के इस्राएल के माणसां तै पाप करवाण के खात्तर के करना चाहिए, के वे इम्तिहान म्ह पडे, अर पाप कर बेट्टै। उसने उन ताहीं मूर्तियाँ के आगू चढाई होड चिज्जां ताहीं खाणा अर अनैतिक जिन्दगी जीणा सिखाया।

15 उससे तरियां-ए तेरे जै कितने तो इसे सै, जो नीकुलइयों की शिक्षा नै मान्नै सै।

16 इस करके पाप करना छोड दे, न्ही तो मै तेरे धरै तावळा-ए अऊँगा, अर झूट्टी शिक्षा देण आळे उन माणसां के खिलाफ अपणे मुँह तै लिकड़ण आळी उस तलवार तै लडूँगा, जो के मेरा वचन सै।

\* 2:1 2:1 दीवट भोत-से दीवे रखण का एक बरतन † 2:6 2:6 नीकुलइयों एक इसा धार्मिक टोळ था जो बिश्वासियाँ ताहीं यो सिखाया करदा के हम लुचपण अर मूर्तिपूजा कर सका सां

17 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै, वे लोग जो बुराई की ताकतां पै जीत पावै सै, उस ताहीं मै गुप्त मन्ना म्ह तै दियुँगा, अर उस ताहीं एक धोळा पत्थर भी दियुँगा, अर उस पत्थर पै एक नाम लिख्या होया होगगा, जिस ताहीं उसके पाण आळे कै सिवाए और कोए न्ही जाणैगा ।

???????? ???? ?? ????????? ?????? ??????

18 अर उसने मेरे ताहीं थुआतीरा नगर की कलीसिया के सुर्गदूत ताहीं यो लिखण खात्तर कहा, के, मै परमेसवर का बेट्टा, जिसकी आँख आग की ज्वाला की तरियां, अर जिसके पैर बढ़िया पीत्तळ कै जिसे सै, न्यू कहूँ सूँ, के

19 मै तेरे काम, तेरे प्यार, विश्वास, सेवा, अर धीरज नै जाणु सूँ, अर न्यू भी जाणु सूँ, के तेरे पाच्छले काम पैहल्डा तै बढ़के सै, जिब तन्नै मेरे पै विश्वास करया था ।

20 पर मन्नै तेरे खिलाफ न्यू कहणा सै, के तू उस जनानी इजेबेल नै रहण देवै सै, जो अपने-आपने नबी कहवै सै, अर मेरे दास्सां नै जारी करण, अर मूर्तियाँ के आगगे चढ़ाई होइ चीज नै खाणा सिखाके भकावै सै ।

21 मन्नै उस ताहीं पाप छोड़ण का मौक्का दिया, पर वा अपने जारीपणे के पाप नै छोड़णा कोनी चाहन्दी ।

22 मै उस ताहीं बीमार कर दियुँगा । अर जो उसके गेल्या जारी करै सै, जै वे भी उसके वरगे काम्मां नै जो वा करै सै करणा न्ही छोड़ैंगे, तो उननै मै भारया दण्ड दियुँगा ।

23 अर मै उसके चेल्यां नै मार दियुँगा, अर फेर सारी कलीसिया नै बेरा पाट जावैगा, के हृदय अर मन जाँचण आळा मै ए सूँ, अर मै थारे म्ह तै हरेक नै उसके काम्मां कै मुताबिक बदला देऊँगा ।

24 पर थम जो थुआतीरा के बाकी लोग जिननै इस झूट्टी शिक्षा ताहीं न्ही मान्या, अर उन बात्तां नै जिन नै शैतान की गहरी बात कहवै सै, उन म्ह भाग न्ही लेते, मै न्यू कहूँ सूँ, के मै थारे ताहीं और हुकम कोनी दियुँगा, पर मै जिब तक ना आ जाऊँ मेरे पै मजबुती तै विश्वास करते रहों ।

25 पर हाँ, जो थारे धारे सै उसनै मेरे आण तक थाम्बे रहो ।

26 वे लोग जो बुराई की ताकतां पै जीत पावै सै, अर मेरे काम्मां कै मुताबिक आखरी ताहीं करदा रहवै, मै उसनै देश-देश के माणसां पै राज करण का हक देऊँगा ।

27 मै उसनै भी राज करण का वोए हक देऊँगा जो मेरे पिता नै मेरे ताहीं दिया सै, वो उनपै बिना दया के राज करैगा, अर वो उन ताहीं चकणाचूर कर देवैगा, जिस ढाळ कुम्हार के माट्टी के बासण चकणाचूर हो जावै सै । अर मन्नै भी इसाए हक अपने पिता तै मिल्या सै ।

28 अर मै उसनै भोर का तारा देऊँगा ।

29 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै ।

### 3

?????? ???? ?? ????????? ?????? ??????

1 उसने मेरे ताहीं यो भी कहा के सरदीस नगर की कलीसिया के सुर्गदूत नै लिख, के "जिसके धारे परमेसवर की सात आत्मा अर सात तारे सै, वो न्यू कहवै सै," के मै तेरे काम्मां नै जाणु सूँ, के तू मेरा विश्वास लायक विश्वासी तो कुद्दावै सै, पर असल म्ह तन्नै मेरा कहणा मानना छोड़ दिया सै ।

2 इस करके सावधान हो जा, अर अपने विश्वास नै जो मेरे पै सै उसनै मजबूत कर, क्यूँके तेरे म्ह थोड़ा-सा ए विश्वास बाक्की सै, ताके तेरा बचा होइ विश्वास भी ना जान्दा रहवै, मै जाणु सूँ के तेरे काम अधूरे सै, पर तेरे काम्मां तै, जो तू करण लागरया सै परमेसवर खुश कोनी ।

3 इस करके याद कर, के तन्नै किस तरियां तै शिक्षा पाई अर सुणी थी, अर उस म्ह बणया रह, अर पाप करणा छोड़ दे । जै तू जागदा न्ही रहवैगा, तो मै चोर की ढाळ आ जाऊँगा अर तन्नै कदे भी न्ही बेरा पाट्टेगा, के मै किस बखत तेरे पै आण पड़ूँगा ।

4 पर हाँ, तेरे धोरे सरदीस म्ह कुछ लोग सै, जो पाप के जरिये अशुद्ध कोनी होए, वे धोळे लत्ते पहरे होइ मेरै गैल हाँडेंगें क्यूँके वे इस लायक सै।

5 वे लोग जो बुराई की ताकत पै जीत पावै सै, उस ताहीं इस्से ढाळ धोळे लत्ते पिहराए जावेंगे, अर मै उसका नाम जीवन की किताब म्ह तै किसे तरियां तै भी न्ही काटूँगा, पर उसका नाम अपणे पिता अर उसके सुर्गदूतां कै स्याम्ही मान ल्यूँगा के ये मेरे लोग सै।

6 जिसके कान हों, वो ध्यान तै सुण ले, के परमेसवर का आत्मा कलीसिया तै के कहवै सै।

~~~~~

7 अर उसने मेरे ताहीं यो भी कह्या सै, के फिलदिलफिया नगर की कलीसिया के सुर्गदूत नै न्यू लिख

के जो कहवै सै, मै पवित्र अर सच्चा सूँ, अर मेरै धोरे वा ताळी सै, जो राजा दाऊद की सै, जिब मै ताळी लेके दरबाजा खोलूँ सूँ, तो उसने कोए बन्द न्ही कर सकता, जिब मै ताळी लेके दरबाजा बन्द करूँ सूँ, तो उसने कोए खोल न्ही सकता, वो तेरे तै न्यू कहवै सै के,

8 मन्ने तेरे काम्मां का बेरा सै, देख, मै जाणु सूँ के तेरे म्ह भोत कम काबलियत सै, पर तन्नै वा बात मान्नी सै जिसके बारे म्ह मन्ने तेरे ताहीं कह्या था, अर तन्नै इस बात का इन्कार न्ही करया के तू मेरे पै विश्वास करै सै, इस करके मन्ने एक दरबाजा खोल्या सै, जिसने कोए बन्द न्ही कर सकदा।

9 देख, जो शैतान के झुण्ड म्ह तै सै, अर खुद नै यहूदी कहवै सै, पर सै न्ही, बल्के झूठ बोल्लै सै, देख, मै इसा करूँगा, के वे आके तेरे पायां म्ह मोध्धे पडेंगें, अर न्यू जाण लेवेंगें, के मन्ने तेरे तै प्यार करया सै।

10 क्यूँके जिब तेरे ताहीं सताया जाण लागरया था, तो तन्नै मेरे वचन ताहीं धीरज तै पुगाया सै, उसकी बजह तै मै भी तन्नै इम्तिहान कै उस बखत म्ह बचा के राखूँगा, जो धरती पै रहण आळे माणसां नै परखण कै खात्तर साब्वी दुनिया पै आण आळा सै।

11 मै तावळा-ए आण आळा सूँ, अपणे विश्वास म्ह मजबूत बणो, ताके कोए धमनै धारा ईनाम लेण तै रोक ना पावै।

12 वे लोग जो बुराई की ताकत पै जीत पावै सै, उन ताहीं मै अपणे परमेसवर कै मन्दर म्ह खम्बा बणाऊँगा, वो फेर कदे बाहरणे न्ही लिक्डेंगे, अर मै अपणे परमेसवर का नाम, अर अपणे परमेसवर के नगर, यानिके नये यरुशलेम का नाम, जो मेरै परमेसवर की ओइ तै सुर्ग पै तै उतरण आळा सै, अर अपना नया नाम उसपै लिखूँगा।

13 जिसके कान हों, ध्यान तै सुण ले के परमेसवर का आत्मा कलीसिया तै के कहवै सै।

~~~~~

14 अर उसने मेरे ताहीं यो भी कह्या सै, के "लोदीकिया नगर की कलीसिया के सुर्गदूत नै न्यू लिख"

के, जो आमीन, अर विश्वास जोगगा, अर सच्चा गवाह सै, अर परमेसवर की सृष्टि का खास कारण सै, वो न्यू कहवै सै।

15 के मै तेरे काम्मां नै जाणु सूँ के तू उस पाणी की ढाळ सै, जो ना तो शीळा सै अर ना तात्ता, आच्छा था के तू इन म्ह तै एक होन्दा\*

16 क्यूँके तू गुणगुणा सै, अर ना शीळा अर ना तात्ता, मै तन्नै अपणे मुँह म्ह तै उगळण पै सूँ।

17 तू जो कहवै सै, के मै धनी सूँ, अर धनवान होगया सूँ, अर मन्ने किसे चीज का घाट्टा न्ही, अर न्यू न्ही जाण्दा, के तू निरभाग, नीच, कंगाल, आन्धा, अर उघाड़ा सै।

18 इस करके मै तन्नै राय दियूँ सूँ, के आग म्ह त्याया होइ सोन्ना मेरै तै मोल ले, के तू साहूकार हो जावै, अर धोळा लत्ता ले-ले के पहर कै तन्नै अपणे उघाड़ेपण पै शर्म न्ही आवै, अर अपनी आँखां म्ह लाण कै खात्तर सुरमा ले, के तू देखण लागै।

\* 3:15 3:15 आच्छा था के तू इन म्ह तै एक होन्दा जै तू मेरे पाच्छे चाल्लै सै तो सही तरियां चाल या फेर चाल्लै ए ना।

19 मैं जिस-जिसतै प्यार राक्खूँ सूँ, उन सारया ताहीं उल्हाणा अर ताड़ना दियुँ सूँ, इस करके हिम्मत राख, अर पाप करणा छोड़ दे।

20 देख, मैं दरबाजे पै खड्या होया खटखटाऊँ सूँ, जै कोए मेरा बोल सुणके दरबाजा खोल्लैगा, तो मैं उसके धौरे भित्तर आके उसके गेल्या खाणा खाऊँगा, अर वो मेरै गेल्या।

21 जो जीत पावै, मैं उस ताहीं अपणे गेल्या अपणे सिंहासन पै बिटाऊँगा, जिसा मैं भी जीत पाके, अपणे पिता के गेल्या उसके सिंहासन पै बैठ गया।

22 जिसके कान हों, वो ध्यान तै सुण लेवै के परमेसवर का आत्मा कलीसिया तै के कहवै सै।

## 4

~~~~~

1 इन बातों के पाच्छे, जो मन्ने निगांह करी, तो के देखूँ सूँ, के सुर्ग म्ह एक दरबाजा खुल्या होया सै, अर ओड़ कोए था जो मेरे तै बात करण लागरया था, अर जो बात करण लागरया था, वो वोए था जिसनै मेरे तै पैहले बात करी थी, अर जिसकी आवाज तुरही के शब्द की तरियां थी, अर उसनै मेरे तै कह्या, के “उरै ऊपरान आ ज्या, अर मैं वे बात तन्नै दिखाऊँगा, जिनका इन बातों के पाच्छे, पूरा होणा जरूरी सै।”

2 अर जिब्बे पवित्तर आत्मा मेरे पै आ गया, अर मैं के देखूँ सूँ, के एक सिंहासन सुर्ग म्ह सै, अर उस सिंहासन पै कोए बैठचा सै।

3 अर जो उसपै बैठचा सै, उसकी चमक सूर्यकान्त मणि अर माणिक्य पत्थर के समान थी, अर उस सिंहासन के चौगरदेके मेघ-धनुष था, उसकी चमक पन्ने* के समान की थी।

4 अर उस सिंहासन के चौगरदेके चौबीस सिंहासन सै, अर इन सिंहासनों पै चौबीस बुजुर्ग धोळे लत्ते पहरे होड़ बेट्टे सै, अर उनके सिरां पै सोन्ने के ताज सै।

5 अर उस सिंहासन म्ह तै बिजळी चमकण की अर गरजण की आवाज आण लागरी थी, अर सिंहासन के स्याम्ही आग के सात दिवें जळण लागरे सै, जो के परमेसवर की सात आत्मा सै।

6 अर उस सिंहासन के स्याम्ही पारस था जो के समुंदर जिसा चौड़ा था, अर शीशे जिसा साफ था, सिंहासन के बिचाळे अर सिंहासन के चौगरदेके चार प्राणी सै, जिनके आगू-पाच्छे आँखें-आँख सै।

7 पैहला प्राणी शेर के बरगा सै, अर दूसरा प्राणी का मुँह बळ्ध के बरगा सै, तीसरे प्राणी का मुँह माणस के बरगा सै, अर चौथा प्राणी उड़दे होड़ उकाब के बरगा सै।

8 अर च्यारु प्राणियाँ के छः, छः पंख सै, उनके उप्पर अर हरेक जगहां ए आँख थी, बल्के पंखां के तळे भी, अर वे दिन-रात बिना आराम करे न्यू कहवै सै, के पवित्तर, पवित्तर, पवित्तर परभु परमेसवर, जो सब तै शक्तिशाली था, अर जो था, जो सै, अर जो आण आळा सै।

9 अर जब वे प्राणी उसकी जो सिंहासन पै बैठचा सै, अर जो युगानुयुग जीवै सै, महिमा अर आदर अर धन्यवाद करैगें,

10 फेर सब चौबीस बुजुर्ग सिंहासन पै बैठण आळे के स्याम्ही पड़ जावैगें, अर उस ताहीं जो युगानुयुग जीवै सै प्रणाम करैगें, अर अपणे-अपणे ताज सिंहासन के स्याम्ही न्यू कहन्दे होए धर देवैगें।

11 “हे म्हारे परभु अर परमेसवर, तू-ए महिमा, अर आदर, अर सामर्थ के जोगगा सै, क्यूँके तन्नै ए सारी चिज्जां ताहीं बणाया अर वे तेरी-ए मर्जी तै थी अर रची गई।”

5

~~~~~

1 अर जो सिंहासन पै बैठचा था, मन्ने उसके सोळे हाथ म्ह एक किताब देखी, जो भीत्तर अर बाहरपै लिक्खी होड़ अर वा सात मोहर लाकै बन्द करी गई थी।

\* 4:3 4:3 पन्ना-एक कीमती पत्थर हो सै



2 फेर मन्ने एक शक्तिशाली सुर्गदूत ताहीं देख्या, जो जोर तै बोलण लागरया था, के इस किताब के खोल्लण अर उसकी मोंहर तोड़ण के जोगगा कौण सै?

3 पर ना सुर्ग म्ह, ना धरती पै, ना धरती के तळै कोए उस किताब नै खोल्लण या उस ताहीं पढ़ण लायक कोए कोनी लिंकइया।

4 अर मै फूट-फूटके रोण लागया, क्यूँके उस किताब ताहीं खोल्लण, या उस ताहीं पढ़ण लायक कोए न्ही मिल्या।

5 फेर उन बुजुर्गा म्ह तै एक नै मेरै तै कह्या, मतना रोवै, लखा, यहूदा के गोत्र का वो शेर, जो दाऊद का मूल सै, उस किताब नै खोल्लण अर उसकी सात्तु मोंहर तोड़ण के खात्तर जयवन्त होया सै।

6 फेर मन्ने उस सिंहासन अर च्यारु प्राणियाँ अर उन बुजुर्गा के बिच्चाळै, मान्ना एक मारया होइ मेम्ना खड्या देख्या जो पैहले मर गया था, पर इव वो जिन्दा होगया सै, उसके सात सींग अर सात आँख थी, ये परमेसवर की सात्तु आत्मा सै, जो साक्ती धरती पै भेज्जी गई सै।

7 उसनै आँके उसके सोळे हाथ तै जो सिंहासन पै बेट्या था, वा किताब ले ली,

8 अर जब उसनै किताब ले ली, तो वे च्यारु प्राणी अर सब चौबीस बुजुर्ग उस मेम्ने के स्याम्ही झुकगे, अर हरेक हाथ म्ह वीणा अर धूप तै भरे होइ सोन्ने के कटोरे थे, ये तो पवित्र माणसां की प्रार्थना सै।

9 अर वे यो नया गीत गाण लागगे, के तू इस किताब के लेण, अर उसकी मोहरां नै खोल्लण जोगगा सै, क्यूँके तन्नै मरके अपणे लहू तै हरेक कुल, अर भाषा, अर माणस, अर जात म्ह तै परमेसवर के खात्तर माणसां ताहीं मोल लिया सै।

10 अर उन ताहीं म्हारे परमेसवर के खात्तर एक राज्य अर याजक बणाया, ताके वो परमेसवर की सेवा करै, अर वे धरती पै राज्य करै सै।

11 अर जब मन्ने देख्या, तो उस सिंहासन अर उन प्राणियाँ अर उन बुजुर्गा के चौगरदेके अनगिणत सुर्गदूतां का बोल सुण्या, जिनकी गिणती लाक्खां अर करोड़ां की थी।

12 अर वे ऊँच्ची आवाज म्ह गाण लागरे थे, के मारया होया मेम्ना ए सामर्थ, धन, ज्ञान, ताकत, आदर, महिमा, अर धन्यवाद के लायक सै।

13 फेर मन्ने सुर्ग म्ह, धरती पै, अर धरती के तळै, अर समुन्दर की सारी बणाई होइ चिज्जां नै, अर सारा किमे, जो उन म्ह सै, उन ताहीं न्यू कहन्दे सुण्या, के “जो सिंहासन पै बेट्या सै, उसका, अर मेम्ने का धन्यवाद हो, मेम्ना ए सामर्थ, धन, ज्ञान, ताकत, आदर, महिमा के लायक सै, अर उसका राज्य, युगानुयुग रहवै।”

14 अर च्यारु प्राणियाँ नै आमीन कह्या, अर बुजुर्गा नै झुकके प्रणाम करया।

## 6

??????????

1 फेर मन्ने देख्या, के मेम्ने नै उन सात्तु मोहरां म्ह तै एक ताहीं खोल्या, अर उन च्यारु प्राणियाँ म्ह तै एक का गरजण जिसा शब्द सुण्या, के आ जाओ।

2 अर मन्ने निगांह करी, अर देखो, मन्ने एक धोळा घोड़ा दिख्या, अर उसका सवार धनुष लिए होइ सै, अर उस ताहीं एक ताज पहिराया गया, अर वो सुर्ग तै चाल्या अर धरती पै लिंकइ, जो पैहले तै ए जीत चुका सै, अर फेर तै वो जीत जावैगा।

3 अर जब मेम्ने नै दुसरी मोंहर खोल्ली, तो मन्ने दुसरे प्राणी ताहीं न्यू कहन्दे सुण्या, के आ।

4 फेर एकदम तै एक और घोड़ा लिंकइया, जो लाल रंग का था, उसके सवार ताहीं यो हक दिया गया, के धरती पै तै मेळनमिलाप टा ले, ताके माणस एकन्दुसरे नै मारे, अर उस ताहीं एक बड्डी तलवार दी गई थी।

5 अर जिव उसनै तीसरी मोंहर खोल्ली, तो मन्नै तीसरे प्राणी ताहीं न्यू कहन्दे सुण्या, के “आ” अर मन्नै निगांह करी, अर देखो, मन्नै एक काळे घोड़े ताहीं लिकड़दे देख्या, अर उसकै सवार कै हाथ म्ह एक ताखड़ी\* सै।

6 अर मन्नै उन च्यारू प्राणियाँ कै बिचाळै तै एक शब्द न्यू कहन्दे सुण्या, के एक दीनार एक दिन की मजदूरी भोत सै, एक किलो गेहूँ, या तीन किलो जौ लेण खात्तर, पर तेल अर अंगूर के रस की किम्मत ना बदलिये।

7 अर जिव मेम्ने नै चौथी मोंहर खोल्ली, तो मन्नै चौथे प्राणी का बोल न्यू कहन्दे सुण्या, के आ।

8 अर मन्नै निगांह करी, अर देखो, एक पीळा-सा घोड़ा सै, अर उसकै सवार का नाम मौत सै: अर अधोलोक उसकै पाच्छै-पाच्छै आण लागरया था, अर उन ताहीं धरती पै रहण आळे चार माणस (या एक चौथाई माणसां) म्ह तै एक-एक ताहीं मारण का हक मिल्या, उननै तलवार, भूख, बीमारी, अर धरती के जंगली-जानवरों के जरिये माणसां ताहीं मार दिया।

9 अर जिव मेम्ने नै पाँचवी मोंहर खोल्ली, तो मन्नै वेदी† के तळै उनके प्राणां ताहीं देख्या, जो परमेसवर के वचन के कारण, अर उसपै विश्वास करण के कारण मारे गये थे।

10 अर उसनै जोर तै रुक्का मारके परमेसवर तै कह्या, हे माल्लिक, हे पवित्र, अर सच्चे प्रभु, तू इतनी बाट क्यूँ देखण लागरया सै, उन बुरे माणसां ताहीं दण्ड देण खात्तर, जो इस धरती पै रहण लागरे सै? हम तेरे तै बिनती करां सां, के तू उन माणसां तै बदला ले, जिननै म्हारे ताहीं जान तै मार दिया सै।

11 अर उन म्ह तै हरेक ताहीं धोळे लत्ते देकै, परमेसवर नै उनतै कह्या, के और थोड़ी-देर ताहीं आराम करो, जिव ताहीं के थारे संगी दास, अर विश्वासी भाई, जो थारी तरियां मरण आळे सै, उनकी भी गिणती पूरी ना हो लेवै।

12 जिव मेम्ने नै छठी मोंहर खोल्ली, तो मन्नै देख्या, के एक बड़ड़ा हाल्लण होया, अर सूरज का रंग मोट्टे काळे काम्बळ की ढाळ काळा पड़ग्या, अर पूरा चाँद लहूँ जिसा लाल होग्या।

13 अर अकास के तारे धरती पै इस ढाळ पड़गे जिस तरियां आँधी तै हालकै अंजीर के दरखत म्ह तै काच्चे फळ झड़ै सै।

14 आसमान पाटग्या अर एक किताब की ढाळ सुकड़ ग्या था, अर हरेक पहाड़, अर टापू, अपणी-अपणी जगहां तै हटगे।

15 अर इसका नतिज्जां यो होया के, धरती के राजा, प्रधान, सरदार, साहूकार, अर सामर्थी माणस, हरेक गुलाम, अर हरेक आजाद माणस, पहाड़ां की खोह म्ह, अर चट्टानां म्ह जा लुहके।

16 अर पहाड़ां, अर चट्टानां तै कहण लागगे, के “म्हारे ताहीं लहको ल्यो, अर म्हारै ताहीं उसकै मुँह तै जो सिंहासन पै बैठ्या सै, अर मेम्ने के प्रकोप तै लहको ल्यो।

17 क्यूँके उनके प्रकोप के भयानक दिन जिव परमेसवर अर मेम्ना उन सारया का न्याय करैगा तो कोए भी उननै दण्ड तै बचा न्ही पावैगा।”

## 7

1, 44,000

1-2 उसकै पाच्छै, मन्नै दुनिया के च्यारू कुणयां पै चार सुर्गदूत खड़े देखे, उन सुर्गदूतां नै परमेसवर तै यो हक मिल्या था, के वे दुनिया के माणसां ताहीं मरी तै मारै, चाहे वे धरती पै हो या समुन्दर पै हो, उननै हवा ताहीं धरती के च्यारू कुणयां पै तै रोक राख्या था, ताके हवा धरती, समुन्दर, या किसी भी जंगल तै ना गुजरे, अर मन्नै एक और सुर्गदूत ताहीं पूरब दिशा की ओड़ आन्दे देख्या, उसके हाथ म्ह परमेसवर की ओड़ तै एक मोंहर थी, जो युगानुयुग जिन्दा सै, उस सुर्गदूत नै ऊँच्ची आवाज म्ह दुसरे चार सुर्गदूतां तै यो कह्या।

\* 6:5 6:5 ताखड़ी-तराजू † 6:9 6:9 वेदी-परमेसवर ताहीं भेट चढ़ाण खात्तर एक जगहां

3 जिब ताहीं हम अपणे परमेसवर के दास्सां के माथ्यै पै मोँहर न्ही ला देवां, जद ताहीं धरती अर समुन्दर अर दरख्तां ताहीं नुकसान ना पोहोचाईयो ।

4 अर जिब सुर्गदूतां नै मोँहर लगा ली, तो किसे नै मेरे ताहीं बताया के एक लाख चवाळीस हजार पै मोँहर लगा दी गई सै, ये सारे लोग इस्राएल के बारहां गोत्र म्ह तै सै ।

5 यहूदा के गोत्र म्ह तै बारहा हजार पै मोँहर दी गई, रूबेन के गोत्र म्ह तै बारहा हजार पै, गाद के गोत्र म्ह तै बारहा हजार पै ।

6 अशेर के गोत्र म्ह तै बारहा हजार पै, नप्ताली के गोत्र म्ह तै बारहा हजार पै, मनशिशह के गोत्र म्ह तै बारहा हजार पै ।

7 शमौन के गोत्र म्ह तै बारहा हजार पै, लेवी के गोत्र म्ह तै बारहा हजार पै, इस्साकार के गोत्र म्ह तै बारहा हजार पै ।

8 जबूलून के गोत्र म्ह तै बारहा हजार पै, यूसुफ के गोत्र म्ह तै बारहा हजार पै अर बिन्यामीन के गोत्र म्ह तै बारहा हजार पै मोँहर दी गई ।



9 इसके पाच्छे, मन्ने निगांह करी, अर देखो, हरेक जात, अर कुल, अर माणस अर भाषा म्ह तै एक इसी बड़डी भीड़, जिस ताहीं कोए गिण न्ही सके था धोळें लत्ते पैहरे, अर अपणे हाथ्यां म्ह खजूर की डाळी लिए होए सिंहासन कै स्याम्ही अर मेम्ने कै स्याम्ही खड़ी सै ।

10 अर जोर तै रुक्का मारकै कहवै सै, के उद्दार म्हारे परमेसवर जो सिंहासन पै विराजमान सै, अर मेम्ने की ओड़ तै आवै सै ।

11-12 अर सारे सुर्गदूत, उस सिंहासन, बुजुर्गां अर च्यारु प्राणियां कै चौगरदेके खड़े सै, फेर वे सिंहासन कै स्याम्ही मुँह कै बळ पड़गे, अर परमेसवर ताहीं प्रणाम करके कह्या, म्हारै परमेसवर की बड़ाई, महिमा, ज्ञान, धन्यवाद, आदर, सामर्थ, अर ताकत युगानुयुग बणी रहवै । आमीन ।

13 इसपै बुजुर्गां म्ह तै एक नै मेरै तै कह्या, के तू जाणै सै, के या धोळी पोशाक पैहरे होए कौण सै? अर कित्त तै आये सै?

14 मन्ने उसतै कह्या, "हे माल्लिक, तन्ने ए बेरा सै ।" उसने मेरै तै कह्या, "ये वे सै, जो उस बड़े क्लेश म्ह तै लिकड़के आये सै, इन्ने अपणे-अपणे लत्ते मेम्ने के लहू म्ह धोके धोळे करे सै ।"

15 इस्से कारण वे परमेसवर कै सिंहासन कै स्याम्ही खड़े सै, अर परमेसवर कै घर म्ह दिन-रात उसकी सेवा करै सै, अर जो सिंहासन पै बैठ्या सै, वो उन म्ह रहवैगा अर उन ताहीं बचावैगा ।

16 वे इब ना तो कदे भूक्खे होवैगें अर ना तिसाए, अर ना तो सूरज की गर्मी उन ताहीं झुलसावैगी अर ना कोए दुसरी गर्मी ।

17 क्यूँके जो मेम्ना सिंहासन कै बिचाळे सै वो उनकी रुखाळी करैगा, अर उन ताहीं जीवन रूपी पाणी के चोवै के धारे ले जाया करैगा, अर परमेसवर उनकी आँखां तै सारे आँसू पुंज देवैगा ।

## 8



1 अर जिब मेम्ने नै सातमी मोँहर खोल्ली, तो सुर्ग म्ह आध्धे घंटे ताहीं सन्नाटा छा गया ।

2 अर मन्ने उन सात्तु सुर्गदूतां ताहीं जो परमेसवर कै स्याम्ही खड़े रहवै सै, देख्या, अर उन ताहीं सात तुरही दी गई ।

3 फेर एक और सुर्गदूत सोन्ने का धूपदान लिए होड़ आया, अर वेदी कै लोवै खड्या होया, अर उस ताहीं भोत सारी धूप दी गई, ताके वो उस ताहीं सारे पवित्र माणसां की प्रार्थना के साथ उस सोन्ने की वेदी पै भेट चढ़ावै जो सिंहासन कै स्याम्ही सै ।

4 अर सुर्गदूतां के हाथ म्ह लिये होए उस धूपदान का धुम्मा, पवित्र माणसां की प्रार्थना के साथ परमेसवर के धौरै उप्पर पोहच गया ।

5 अर सुर्गदूत नै धूपदान लेके उस म्ह वेदी की आग भरी, अर उस ताहीं धरती पै गेर दी, अर गरजण गड़गड़ाहट, बिजली चमकी अर हाल्लण होण लाग्या ।

RRR RRRRRRRR

6 फेर वे साचु सुर्गदूत जिनके धोरै सात तुरही थी, उन ताहीं फुककण खात्तर त्यार होए ।

7 पैहले सुर्गदूत नै तुरही फूक्की, अर लहू तै मिले होइ ओळे अर आग पैदा होई, अर धरती पै गेरी गई, अर धरती का एक तिहाई हिस्सा जळग्या, अर दरख्तां का तीसरा हिस्सा जळग्या, अर सारी हरी घास भी जळगी ।

8 जिव दुसरे सुर्गदूत नै तुरही फूक्की, तो मान्नो आग जिसा जळदा होया एक बड़्डा पहाड़ समुन्दर म्ह गेरया गया, अर समुन्दर का एक तिहाई हिस्सा लहू म्ह होग्या ।

9 अर समुन्दर की एक तिहाई\* बणाई होइ चीज जो जिन्दी थी मरगी, अर जहाज के तीसरे हिस्से का नाश होग्या ।

10 अर तीसरे सुर्गदूत नै तुरही फूक्की, अर एक बड़्डा तारा जो मशाल की ढाळ जळै था, सुर्ग तै टूट्या, अर नदियाँ के तीसरे हिस्से पै, अर पाणी के चोवां पै आण पड्या ।

11 उस तारे का नाम नागदीना सै, अर एक तिहाई हिस्से का पाणी नागदीना† बरगा कडवा होग्या, अर घणखरे माणस उस पाणी के कड़वे हो जाण तै मरगे ।

12 अर चौथे सुर्गदूत नै तुरही फूक्की, अर सूरज का एक तिहाई हिस्सा, अर चाँद का एक तिहाई हिस्सा अर तारां के एक तिहाई हिस्से पै आफफत आई, ताके उनका एक तिहाई हिस्सा अन्धेरे म्ह डूब जावै, अर दिन के एक तिहाई हिस्से म्ह चाँदणा न्ही रहया, अर उससे तरियां एक तिहाई रात भी बिना चाँदणे की हो गई ।

13 जिव मन्नै फेर देख्या, तो अकास के बिचाळै एक उकाव ताहीं उडदे अर ऊँचे शब्द तै न्यू कहन्दे सुण्या, “उन तीन सुर्गदूतां की तुरही के शब्दां के कारण, जिनका फूकणा इब्बे वाक्की सै, धरती के बासिन्द्यां पै धिक्कार सै, धिक्कार, धिक्कार ।”

## 9

1 जिव पाँचमै सुर्गदूत नै तुरही फूक्की, तो मन्नै सुर्ग तै धरती पै एक तारा पडदा होइ देख्या, अर उस तारे ताहीं घणे अथाह कुण्ड की ताळी दी गई ।

2 अर उसनै घणे अथाह कुण्ड ताहीं खोल्या, अर कुण्ड म्ह तै बडडी भट्ठी जिसा धुम्मा उठ्या, अर कुण्ड के धुम्मै तै सूरज अर आसमान म्ह अन्धेरा छाग्या ।

3 अर उस धुम्मै म्ह भोट सारी टिड्डी लिकड़ी अर वे सारी धरती पै फैलगी, अर उन ताहीं बिच्छुआ की तरियां माणसां के लडण की शक्ति दी गई ।

4 अर उनतै कह्या गया, के ना धरती की घास ताहीं, ना किसे हरियाली ताहीं, ना किसे दरखत ताहीं नुकसान पोहोचाओ, सिर्फ उन माणसां ताहीं नुकसान पोहोचाओ, जिनके माथ्ये पै परमसवर की मोहर कोनी ।

5 अर उनकी जान लेण का तो न्ही, पर पाँच महिन्ना तक माणसां ताहीं दर्द देण का हक दिया गया, अर उनका दर्द इसा था, जिसा बिच्छु के डंक मारण तै माणस का होवै सै ।

6 उन पाँच महिन्ना म्ह माणस मरण के तरिक्के टोहवेंगे, वे मरणा तो चाहवेंगे, पर वे मर न्ही पावेंगे ।

7 अर उन टिड्डियाँ के आकार लड़ाई के खात्तर त्यार करे होए घोड्या के जिसे थे, अर उनके सिरां पै मान्नो सोन्ने के ताज थे, अर उनके मुँह माणसां बरगे थे ।

8 अर उनके बाळ लुगाईयाँ के जिसे, अर दाँत शेरों के जिसे थे ।

9 अर उनका शरीर मान्नो लोहे के कवच तै ढक्या होया था, अर उनके पंखां का शब्द इसा था जिसा रथां अर भोट-से घोड्या का जो लड़ाई म्ह भाज्जे सै ।

\* 8:9 8:9 एक तिहाई यानी के तीसरा हिस्सा † 8:11 8:11 नागदीना एक पौधा का सै, जिस म्ह तै भोट कड़वा प्रदार्थ लिकड़ै सै

10 अर उनकी पृच्छ अर डंक बिच्छुआ के समान थी, अर उन ताहीं पाँच महिन्ना तक माणसां नै दुख पोहोचाण की जो सामर्थ थी, वा उनकी पुन्झड़ां म्ह थी।

11 घणे अथाह कुण्ड का दूत उनपै राजा था, उसका नाम इब्रानी म्ह अबदोन, अर यूनानी म्ह अपुल्लयोन सै।

12 पाँच महिन्ना बाद वा बिपदा खतम हो जावैगी, लखाओ इब इनकै पाच्छे दो बिपदा और आण आळी सै।

13 अर जब छटमै सुर्गदूत नै तुरही फूक्की तो जो सोन्ने की वेदी परमेसवर कै स्याम्ही सै उसके सीन्गां म्ह तै मन्नै इसा शब्द सुण्या।

14 मान्नो कोए छटमै सुर्गदूत तै जिसकै धोरै तुरही थी कहण लागरया सै, के “उन चार सुर्गदूतां नै जो बड़डी नदी फरात कै धोरै बन्धे होइ सै, खोल दे।”

15 अर वे च्यारु सुर्गदूत जो उस घड़ी, दिन, महिन्ने, या साल कै खात्तर एक तिहाई माणसां नै मारण खात्तर छोड़ दिए गये थे।

16 उननै भोत बड़े घुड़सवारां की पलटन ताहीं कट्टा करया जिनकी गिणती बीस करोड़ सै।

17 अर मन्नै अपणे दर्शन म्ह घोड़े अर उसके इसे सवार दिक्खे, उनकै धोरै कवच था जो लाल, गहरा नीला अर गन्धक की तरियां पीळा था, अर उन घोडचा के सिर शेर कै सिर बरगे थे, अर उनके मुँह तै आग, अर धुम्मा, अर गन्धक लिकड़ै थी।


18 इन तीन्नु महामारियाँ तै, यानिके आग, अर धुम्मा, अर गन्धक तै जो उसके मुँह तै लिकड़ै थी, एक तिहाई माणस मारे गये।

19 क्यूँके उन घोडचा की ताकत उनकै मुँह, अर उनकी पुन्झड़ां म्ह थी, ज्यांतै के उनकी पुन्झड़ सापां जिंसी थी, अर उन पुन्झड़ां के सिर भी थे, अर इन्हें तै वे दर्द देवें थे।

20 अर बाकी माणस जो उन महामारियाँ तै न्ही मरे थे, उननै अपणे बुरे काम करणे न्ही छोड़डे, जो के ये थे भुंडी ओपरी आत्मायाँ की, अर सोन्ने, चान्दी, पीत्तळ, पत्थर, अर काठ की मूर्तियाँ की पूजा करणा, जो ना देख, ना सुण, ना चाल सकै सै।

21 अर ना ए उननै खून करणा, जादू-टोणा, जारी, अर चोरी करणा छोडचा।

## 10



1 फेर मन्नै एक और शक्तिशाली सुर्गदूत ताहीं सुर्ग तै उतरदे देख्या, जिसनै बाइळां ताहीं लत्यां के समान धारण करया होया था, उसकै सिर पै मेघ-धनुष था, अर उसका मुँह सूरज जिंसा अर उसके पाँ आग कै खम्भे बरगे थे।

2 उसनै अपणा सोळा पाँ समुन्दर पै, अर ओळा पाँ धरती पै धरया, अर उसके हाथ म्ह एक छोटी सी खुली होइ किताब थी,।

3 अर इतनी जोर तै चिल्लाया, जिस ढाळ शेर गरजै सै, अर जब वो चिल्लावै था तो गरजण के सात शब्द सुणाई दिए, जिननै मै समझ न्ही पाया।

4 अर जब सात्तु गरजण के शब्द सुणाई दे लिए, तो मै लिखण पै था, अर मन्नै सुर्ग तै यो शब्द सुण्या, के जो बात गरजण के उन सात शब्दां तै सुणी सै, उननै ल्हूकोए राख, अर लिखे ना।

5 अर जिस सुर्गदूत ताहीं मन्नै समुन्दर अर धरती पै खड़े होइ देख्या था, उसनै अपणा सोळा हाथ कसम खाण खात्तर सुर्ग के कान्ही ठाया।

6 अर जो युगानुयुग जिन्दा रहवैगा, अर जिसनै सुर्ग अर उस म्ह बसी होई चिज्जां ताहीं, अर धरती अर उस म्ह बसी होई चिज्जां ताहीं, अर समुन्दर उस म्ह बसी होई चिज्जां ताहीं बणाया सै, उस्से की कसम खाके बोल्या, “इब तो और वार न्ही होगी।”

7जिब सातमै सुर्गदूत का तुरही फुंक्कण का बखत होगा, तो परमेसवर की योजना पूरी हो जावैगी, जिस ताहीं उसनै अपणे नबियाँ ताहीं बताया, जो उसकी सेवा करै सै, पर वो योजना दुसरे माणसां पै जाहिर कोनी करी थी।

8अर जिस शब्द करण आळे ताहीं मन्नै सुर्ग तै बोलदे सुण्या था, वो फेर मेरै गेल्या बात करण लाग्या, के जा, जो सुर्गदूत समुन्दर अर धरती पै खड्या सै, उसकै हाथ म्ह की खुली होइ किताब ले लै।

9अर मन्नै सुर्गदूत कै धोरै जाकै कह्या, “या छोट्टी किताब मन्नै दे, अर उसनै मेरै तै कह्या, ‘ले इसनै खा ले,’ या तेरे मुँह म्ह शहद जिसी मिट्टी लागवैगी, पर या तेरा पेट कड़वा कर देगी।”

10ज्यातै मै वा छोट्टी किताब उस सुर्गदूत कै हाथ म्ह तै लैके खाग्या, वा मेरै मुँह म्ह शहद जिसी मिट्टी तो लागी, पर जिब मै उसनै खाग्या, तो मेरा पेट कड़वा होग्या।

11फेर मेरै तै न्यू कह्या गया, “तन्नै घणेए माणसां, जात्तां, भाषा अर राज्यां के बोरै म्ह फेर तै भविष्यवाणी करणी होगी।”

## 11



1फेर मेरै ताहीं नाप्पण कै खात्तर एक सरकण्डा दिया, जो नाप्पण के यन्त्र जिसा था, अर किसे नै मेरे तै कह्या, “उठ, परमेसवर के मन्दर अर वेदी ताहीं नाप ले, अर उस म्ह आराधना करण आळा की गिणती करले।

2अर मन्दर के बाहर का आँगण छोड़दे, उसनै मतना नाप, क्यूँके वो गैर यहूदियाँ ताहीं दिया गया सै, अर वे पवित्र नगर नै बियाळीस महिन्ने ताहीं रौदेगी।

3अर मै अपणे दो गवाहां ताहीं यो हक देऊंगा, के टाट ओढ़ होए एक हजार दो सौ साठ दिन ताहीं भविष्यवाणी करै।”

4ये वैए जैतून के दो दरखत अर दो दीवट की तरियां सै, जो धरती के प्रभु कै स्याम्ही खड़े रहवै सै।

5अर जै कोए उननै नुकसान पोहचावै सै, तो उनके मुँह तै आग लिकड़के उनके बैरियाँ ताहीं भस्म करै सै, अर जै कोए उन ताहीं नुकसान पोहोचाणा चाहवैगा, तो जरूर इस्से ढाळ मारया जावैगा।

6परमेसवर नै उन ताहीं हक दिया सै, के उनकी भविष्यवाणी के दिनां म्ह अकास तै मिह न्ही बरसै, अर उननै यो भी हक सै, के जिब-जिब वे चाहवै जद-जद वे पाणी नै लहू म्ह बदल दे, अर धरती पै हरेक ढाळ की बिपदा ल्यावै।

7अर जिब वे अपणी गवाही दे लेवैगें, तो वो पशु जो घणे अथाह कुण्ड म्ह तै लिकड़ैगा, उनतै लड़के उन ताहीं जितैगा अर मार देवैगा।

8अर उनकी लाश उस बड़े नगर के चौक म्ह पड़ी रहवैगी, जित उनका प्रभु भी क्रूस पै चढ़ाया गया था, जो आत्मिक तौर तै सदोम अर मिस्र देश कुह्लावै सै।

9अर सारे माणस, सारे कुल, सारी भाषा, अर सारी जात्तां के लोग उनकी लाश साढ़े तीन दिन ताहीं देखदे रहवैगें, अर उनकी लाश कब्र म्ह धरण न्ही देवैगें।

10अर धरती के बासिन्दे, उनके मरण तै राज्जी अर मगन होवैगें, अर एक-दुसरे के धोरै तोप्के भेज्जैगें, क्यूँके इन दोनु नबियाँ नै धरती के बासिन्द्यां ताहीं भोत सताया था

11अर साढ़े तीन दिन कै पाच्छै परमेसवर कै कान्ही तै जीवन का साँस उन म्ह आ गया, अर वे अपणे पायां के बळ खड़े होग्ये, अर उनके देखण आळे डरगे।

12अर उननै सुर्ग तै एक बड़्हा बोल सुणाई दिया, के उरै ऊपरान आओ, न्यू सुण वे बाहळां पै सवार होके अपणे बैरियाँ के देखदे-देखदे सुर्ग पै चढ़गे।

13 फेर उससे बखत एक बड़ड़ा भूकम्प यरुशलम नगर म्ह होया, अर नगर का दसमां हिस्सा पड़ग्या, अर उस भूकम्प तै सात हजार माणस मरगे अर बाक्की बचे होइ माणस डरगे, अर सुर्ग के परमेसवर की महिमा करी।

14 दुसरी बिप्दा बीत ली, देखो, तीसरी बिप्दा तावळी आण आळी सै।

~~~~~

15 अर जिव सातमे सुर्गदूत नै तुरही फूक्की, तो सुर्ग म्ह इस बारै म्ह बड़े-बड़े शब्द होण लागे, के "दुनिया का राज्य म्हारै प्रभु का, अर उसके मसीह का होग्या सै, अर वो युगानुयुग राज्य करैगा।"

16 अर सब चौबीस बुजुर्ग जो परमेसवर के स्याम्ही अपणे-अपणे सिंहासन पै बट्टे थे, मुँह के बळ मोधे पड़के परमेसवर की आराधना करैगें।

17 न्यू कहण लागगे, "के हे सर्वशक्तिमान प्रभु परमेसवर, जो सै, अर जो था, हम तेरा धन्यवाद करा सौं, के तन्नै अपणी बड़डी सामर्थ के काम तै धरती पै राज करणा शरु करया।

18 अर दुसरी जात्ता के छो उठचा, अर तेरा प्रकोप आण पडचा अर वो बखत आण पोंहच्या सै, के मरे होया का न्याय करया जावै, अर तेरे दास नबियाँ अर पवित्तर माणसां ताहीं अर उन छोदटे-बड़ा ताहीं जो तेरे नाम तै डरै सै, वो तेरी महिमा करै, अर धरती पै जो माणस दुसरे माणसां नै बिगाड़े सै, उन ताहीं नाश करा जावै।"

19 फेर परमेसवर का जो मन्दर सुर्ग म्ह सै वो खोल्या गया, अर उसके मन्दर म्ह उसका करार का सन्दूक दिख्या, विजळियाँ, शब्द, गरजण अर भूकम्प होए अर बड़े ओळे पड़े।

12

~~~~~

1 फेर इन बात्ता के बाद सुर्ग पै एक बड़ड़ा निशान दिख्या, यानिके एक जनानी जो सूरज नै ओढ़े होइ थी, अर चाँद उसके पायां के तळै था, अर उसके सिर पै बारहा तारां का ताज था।

2 अर वा गर्भवती थी, अर किल्की मारै थी, क्यूँके जापे का दर्द उसके होण लाग्या था, अर वा बाळक जाम्मण के दर्द म्ह थी।

3 अर एक और निशान सुर्ग पै दिख्या, अर देखो, एक भोत बड़ड़ा लाल अजगर था जिसके सात सिर अर दस सींग थे, अर उसके सिरां पै सात राजमुकुट थे।

4 अर उसकी पुन्ड्र नै अकास के एक तिहाई हिस्से के तारे खिचके धरती पै गेर दिए, अर वो अजगर उस जनानी के स्याम्ही जो जच्चा थी, खडचा होया, के जिव वा बाळक जपै तो उसके बाळक नै निगळ जावै।

5 अर उसके छोरा होया जो लोहे का राजदंड लिए होइ, सारी जात्तां पै राज करण पै था, अर उसका बाळक चाणचक परमेसवर के धोरै, अर उसके सिंहासन के धोरै ठा के पोहोचा दिया गया।

6 अर वा जनानी उस बण म्ह भाजगी, जित्त परमेसवर की ओइ तै उसके खात्तर एक जगहां त्यार करी गई थी, ताके ओड़े एक हजार दो सौ साठ दिन ताहीं उसकी देखभाळ अर उसका पालन-पोषण करया जावै।

7 फेर सुर्ग पै लड़ाई होई, मीकाईल अर उसके सुर्गदूत अजगर तै लड़ण नै लिकड़े, अर अजगर अर उसके दूत उसतै लड़े।

8 पर अजगर हार गया अर सुर्ग तै लिकाड़ दिया गया, अर सुर्ग म्ह उनके खात्तर फेर जगहां कोनी रही।

9 अर वो बड़ा अजगर यानिके वोए पुराणा साँप, जो इब्लीस अर शैतान कुह्लावै सै, अर साबती दुनिया नै भकाण आळा सै, धरती पै गेर दिया गया, अर उसके दूत उसके गैल गेर दिए गए।

10 फेर मन्नै सुर्ग पै तै वो बड़ड़ा शब्द आन्दे होइ सुण्या, के इब म्हारा परमेसवर माणसां ताहीं बचा लेवैगा, अर वो अपणी शक्ति का इस्तमाल करैगा, अर राजा की तरियां राज करैगा, इब उसका मसीह दुनिया पै अपणा हक जतावैगा, क्यूँके शैतान परमेसवर की हजुरी म्ह खड़ा होके, जो दिन रात उसके दास्तां पै दोष लाया करै था, वो सुर्ग तै गिरा दिया गया सै।

11 म्हेरे बिश्वासियाँ नै शैतान ताहीं हराया सै, अर वे मेम्ने के लहू के कारण, अर अपनी गवाही के वचन के कारण, उसपै जीते, अर उननै अपने जी ताहीं प्यारा न्ही जाणया, उरै ताहीं के मौत भी सहण कर ली ।

12 ज्यांतै, हे सुर्ग, अर उस म्ह रहण आळो आनन्दित होओ, अर हे धरती, अर समुन्दर म्ह रहण आळो, थारे पै धिक्कार सै! क्यूँके शैतान घणे छो के गेल्या थारे धोरै उतर आया सै, क्यूँके वो जाणे सै, के उसका थोड़ा-ए बखत और बच रया सै ।

13 अर जिव अजगर नै देख्या, के मै धरती पै गेर दिया गया सूँ, तो उस जनानी ताहीं जिन नै बेदटा पैदा करया था, उसका पिच्छा करया ।

14 अर उस जनानी ताहीं बड़े उकाब के दो पंख दिए गये, के अजगर के स्याम्ही तै उड़ के बण म्ह उस जगहां पोहच जावै, जित्त उसकी एक बखत, अर समयों, अर आध्धे बखत ताहीं देख-रेख करी जावै ।

15 अर अजगर नै उस जनानी के पाच्छै अपने मुँह तै नदी की तरियां पाणी बहाया, के उसनै नदी तै बहा दे ।

16 पर धरती नै उस जनानी की मदद करी, अर अपना मुँह खोल के उस नदी ताहीं जो अजगर नै अपने मुँह तै बहाई थी, पी लिया ।

17 फेर अजगर नै जनानी पै गुस्सा करया, अर उसके वंशजां ताहीं, जो परमेसवर के हुकम नै मान्ने सै, अर यीशु की गवाही देण पै अटल सै, उनतै लड़ण नै गया ।

18 अर वो समुन्दर के बालू पै जा खडचा होया ।

## 13



1 अर मन्ने एक पशु ताहीं समुन्दर म्ह तै लिकड़े होड़ देख्या, जिसके दस सींग अर सात सिर थे, उसके सीन्गां पै दस राजमुकुट अर उसके सिरां पै परमेसवर की बुराई के नाम लिक्खे होड़ थे ।

2 अर जो पशु मन्ने देख्या, वो चित्तै बरगा था, अर उसके पाँ भाल्लू जिसे, अर मुँह शेर के बरगा था, अर उस अजगर नै अपनी सामर्थ, अर अपना सिंहासन, अर बड़्डा हक, उस ताहीं दे दिया ।

3 अर मन्ने उसके सिरां म्ह तै एक पै इसा जानलेवा घाव लाग्या होड़ देख्या, मान्ने वो मरण पै सै, फेर उसका जानलेवा घाव ठीक होग्या, अर साब्वी धरती के माणस हैरान होगे अर उस पशु के भगत बण जावेंगे ।

4 अर उननै अजगर की पूजा करी, क्यूँके उसनै पशु ताहीं अपना हक दे दिया था, अर न्यू कहकै पशु की भी पूजा करी, के इस पशु के बरगा कौण सै? कौण उसतै लड़ सकै सै?

5 उस ताहीं डींग मारण अर परमेसवर की बुराई करण का हक अर बियाळीस महिन्ने ताहीं राज करण की इजाजत दी गई ।

6 पशु नै, परमेसवर अर उसके नाम, उसके रहण की जगहां यानी सुर्ग अर उन सब की, जो सुर्ग म्ह रहवै सै, उनकी बुराई करणा शरू कर दिया ।

7 अर उस ताहीं न्यू हक दिया गया, के पवित्र माणसां तै लड़े, अर उनपै जीत पावै, अर उस ताहीं हरेक कुल, अर माणस, अर भाषा, अर जात पै हक दिया गया ।

8 अर धरती पै रहण आळे वे सारे उस पशु की पूजा करैंगे । मतलब जिनका दुनिया की शरूआत के बाद के वे सारे माणस जिनके नाम उस मेम्ने की जीवन की किताब म्ह लिक्खे न्ही गये सै । मेम्ना वोए सै जो मारया गया सै ।

9 जिसके कान हों वो ध्यान तै सुणै ।

10 जिस ताहीं कैद म्ह पड़णा सै, वो कैद म्ह पड़ैगा, जो तलवार तै मारैगा, जरूरी सै के वो तलवार तै मारया जावैगा । पवित्र माणसां का धीरज दुख टाण अर उसपै बिश्वास करण म्ह सै ।



11 फेर मन्ने एक और पशु ताहीं धरती म्ह तै लिकइदे देख्या, उसके मेम्ने की ढाळ दो सींग थे, अर वो अजगर की ढाळ बोल्लै था।

12 अर यो उस पैहल्ले पशु का सारा हक उसके स्याम्ही काम म्ह ल्यावै था, अर धरती अर उसके बासिन्द्यां तै उस पैहल्ले पशु की जिसका जानलेवा घाव ठीक होग्या था, पूजा करै था।

13 अर वो बड़े-बड़े निशान दिखावै था, उरै ताहीं के माणसां के देखते-देखते सुगं तै धरती पै आग बरसा देवै था।

14 अर उन चमत्कारां के कारण जिन ताहीं उस पशु के स्याम्ही दिखाण का हक उस ताहीं दिया था, वो धरती के बासिन्द्यां ताहीं इस तरियां भकावै था, के धरती के बासिन्द्यां तै कहवै था, के जिस पशु के तलवार लागरी थी, वो जिन्दा होग्या सै, उसकी मूर्ति बणाओ।

15 अर उस ताहीं उस पशु की मूर्ति म्ह जी घाल्लण का हक दिया गया, के पशु की मूर्ति बोल्लण लागै, अर जितने माणस उस पशु की मूर्ति की पूजा न्ही करै, उन ताहीं मरवा देवै।

16 अर उसनै छोटे, बड़े, साहूकार, कंगाल, आजाद, गुलाम सारया के सोठे हाथ या उनके माथ्यै पै छाप लगावाण खात्तर उन ताहीं मजबूर कर दिया।

17 के उस ताहीं छोड़ जिसपै छाप यानिके उस पशु का नाम, या उसके नाम का अंक हो, अर कोए लेण-देण न्ही कर सकै।

18 ज्ञान इस्से म्ह सै: जिस म्ह अकल हो वो इस पशु का अंक जोड़ ले, क्यूँके वो माणस का अंक सै, अर उसका अंक छ: सौ छियासठ सै।

## 14

~~~~~

1 पर उसके बाद मन्ने कुछ और भी देख्या, वो मेम्ना सिय्योन पहाड़ पै खड्या सै, अर उसके गेल्या एक लाख चवाळीस हजार माणस सै, जिनके माथ्यै पै उसका अर उसके पिता का नाम लिख्या होइ सै।

2 अर सुगं तै मन्ने एक इसा शब्द सुणाई दिया, जो पाणी की घणी धारा अर बड़े गरजण जिसा शब्द था, अर जो शब्द मन्ने सुणया, वो इसा था, मान्नो वीणा बजाण आळे वीणा बजान्दे हों।

3 अर वे सिंहासन के स्याम्ही अर च्यारु प्राणियाँ अर बुजुर्गां के स्याम्ही मान्नो, एक नया गीत गाण लागरे थे, अर उन एक लाख चवाळीस हजार माणसां ताहीं छोड़ जो धरती पै तै छुड़ाए गये थे, कोए वो गीत न्ही सीख सकै था।

4 ये वे सै, जो जनानियाँ के गेल्या अशुद्ध न्ही होए, पर कुवारै सै। ये वैए सै, के जित्त किते मेम्ना जावै सै, वे उसके पाच्छै हो लैवें सै। जिस तरियां लोग अपनी फसल म्ह तै पैहला फळ परमेसवर ताहीं चढ़ावै सै, उससे तरियां वो भी परमेसवर अर मेम्ने खात्तर पैहले फळ के रूप म्ह चढ़ाए गए सै।

5 अर उनके मुँह तै झूठ न्ही लिकइया था, वे बेकसूर सै।

~~~~~

6 फेर मन्ने एक और सुगंदूत ताहीं अकास के बिचाळे उड़दे होइ देख्या जिसके धोरै धरती पै के बासिन्द्यां की हरेक जात, अर कुल, अर भाषा, अर माणसां ताहीं सुणाण के खात्तर घणा सनातन सुसमाचार था।

7 अर उसनै ऊँच्ची आवाज म्ह कह्या, “परमेसवर तै डरो, अर उसकी महिमा करो, क्यूँके उसके न्याय करण का बखत आण पोंहच्या सै, अर उसकी आराधना करो, जिसनै सुगं अर धरती अर समुन्दर अर पाणी के सोते बणाए।”

8 फेर इसके पाच्छै एक और दुसरा सुगंदूत न्यू कहन्दा होइ आया, के पड़ग्या, वो बड़ड़ा बेवीलोन नगर पड़ग्या जिसनै अपनी जारी की कोपमय मदिरा सारी जात्तां ताहीं पिलाई सै।

9 फेर इनके पाच्छै एक और सुगंदूत जोर तै न्यू कहन्दा होइ आया, के जो कोए उस पशु अर उसकी मूर्ति की पूजा करै, अर अपणे माथ्यै या अपणे हाथ पै उसकी छाप ले।

10 तो वो परमेसवर के प्रकोप की निरी मदिरा जो उसके खुन्दक के कटोरे में घाली गई है, पीवैगा अर पवित्र सुर्गदूतों के स्याम्ही, अर मेम्ने के स्याम्ही आग अर गन्धक की पीड़ा में पड़ेगा।

11 अर उनकी पीड़ा का धुम्मा युगानुयुग उठदा रहवैगा, अर जो उस पशु अर उसकी मूर्ति की पूजा करै है, अर जो उसके नाम की छाप लेवै है, उन ताहीं दिन-रात चैन न्ही मिलैगा।

12 पवित्र माणसां का धीरज इस्से है, के धीरज तै दुख सहन्दे रहवै अर अन्त ताहीं मजबूत बनके परमेसवर के हुकमां नै मान्ने, अर यीशु पै बिश्वास राख्वै।

13 फेर मन्ने सुर्ग तै यो शब्द सुणया, के लिख, जो मुर्दे परभु में मरै है, वे इब तै धन्य है, आत्मा कहवै है, हाँ, क्यूँके वे अपनी मैहनतां तै आराम पावैगें, अर उनके काम उनके गेल्या हो लेवैगें।

### २२२२

14 अर मन्ने निगाह करी, अर देखो, एक धोळा बाढ़ळ है, अर उस बाढ़ळ पै माणस के बेट्टे बरगा कोए बेटथा है, जिसके सिर पै सोन्ने का ताज अर हाथ में तेज दराती है।

15 फेर एक और सुर्गदूत नै मन्दर में तै लिकड़के, उसतै जो बाढ़ळ पै बेटथा था, जोर तै रुका मारके कहा, “के अपनी दराती ल्याके लामणी कर, क्यूँके लामणी का बखत आण पोंहच्या है, ज्यांतै के धरती की खेती पक ली है।”

16 इस करके जो बाढ़ळ पै बेटथा था, उसनै धरती पै अपनी दराती लाई, अर धरती की लामणी करी गई।

17 फेर एक और सुर्गदूत उस मन्दर में तै लिकड़या, जो सुर्ग में है, अर उसके धोरे भी तेज दराती थी।

18 फेर एक और सुर्गदूत जिस ताहीं आग पै हक था, वेदी में तै लिकड़या, अर जिसके धोरे तेज दराती थी, उसतै जोर तै बोल्या, “अपनी तेज दराती ल्याके धरती की दाखलता के गुच्छे काट ले, क्यूँके उसकी दाख पक ली है।”

19 अर उस सुर्गदूत नै धरती पै अपनी दराती लाई, अर धरती की दाखलता का फळ काटके, अपने परमेसवर के प्रकोप के बड़े रस के कुण्ड में घाल दिया।

20 अर नगर के बाहरणें उस रसकुण्ड में अंगूर रौंदे गये, अर रसकुण्ड में तै इतना लहू लिकड़या के वो नदी में तबदील होगया, जो के तीन सौ किलो मीटर लम्बी अर इतनी गहरी थी, के उस में घोड़े भी समा जावै।

## 15

### २२२२ २२२२२२ २२ २२२ २२२२२२२२

1 फेर इसके बाद मन्ने सुर्ग में एक और बड़ड़ा अर अदभुत निशान देखा, यानिके सात सुर्गदूत जिनके धोरे सात आखरी बिप्दा थी, क्यूँके उनके खतम हो जाण पै परमेसवर के प्रकोप का अंत है।

2 फेर मन्ने इसा लागया जणु मान्ने मै एक काँच के समुन्दर नै देखण लागरया सुं, जिस में आग मिली होई थी, मन्ने इस समुन्दर के किनारे पै उन माणस ताहीं खड़े देखा, जिननै उस बड़े पशु ताहीं हराया था, क्यूँके उननै उसकी मूर्ति की आराधना करण तै अर उसके नाम की मोहर लगाण तै भी मना कर दिया था, उन माणसां के हाथ में परमेसवर के जरिये दी गई वीणा थी।

3 वे परमेसवर के दास मूसा नबी का गीत, अर मेम्ने का गीत गा-गाके कहवै थे, “हे सर्वशक्तिमान परभु परमेसवर, तेरे काम महान, अर अनोखे है, हे युग-युग के राजा, तेरी चाल सही अर सच्ची है।”

4 “हे परभु, कौण तेरे तै न्ही डरैगा अर तेरे नाम की महिमा न्ही करैगा? क्यूँके सिर्फ तू ए पवित्र है। सारी जात आँके तेरे स्याम्ही मोध्ये पड़के प्रणाम करैगी, क्यूँके तेरे न्याय के काम दिखगे है।”

5 जब माणसां नै गाणा बन्द कर दिया, तो मन्ने सुर्ग में मन्दर ताहीं खुल्या होया देखा, जो के परमेसवर के तम्बू की तरियां था।

6 अर वे सात्तु सुर्गदूत जिनके धौरै सात्तु बिप्दा थी, शुद्ध अर चमकदी होई मलमल के लत्ते पहेरे होइ, छात्ती पै सुनहरे परणे बाँधे होइ मन्दर तै लिकड़े ।

7 अर उन च्यारु प्राणियाँ म्ह तै एक नै उन सात सुर्गदूतां ताहीं परमेसवर के, जो युगानुयुग जीवै सै, प्रकोप तै भरे होइ सात सोन्ने के कटोरे दिए ।

8 अर परमेसवर की महिमा अर उसकी सामर्थ्य के कारण मन्दर धुम्मै तै भर गया, अर जिव तक उन सात्तु सुर्गदूतां की सात्तु बिप्दा खतम न्ही होई तब तक कोए मन्दर म्ह न्ही जा सक्या ।

## 16

### CHAPTER 16

1 फेर मन्नै मन्दर म्ह किसे ताहीं जोर तै उन सात्तु सुर्गदूतां तै न्यू कहन्दे सुण्या के जाओ, परमेसवर के प्रकोप के सात्तु कटोरयां ताहीं धरती पै उंडेल द्यां ।

2 इस करके पैहलड़े सुर्गदूत नै जाके अपणा कटोरा धरती पै उंडेल दिया, अर उन माणसां का जिनपै पशु की छाप थी, अर जो उसकी मूर्ति की पूजा करै थे, उनके एक तरियां तै बुरा अर दुख देण आळा फोड़ा लिकड़या ।

3 अर दुसरै सुर्गदूत नै अपणा कटोरा समुन्दर पै उंडेल दिया, अर वो मरे होए माणसां के लहू जिसा होग्या, अर समुन्दर म्ह रहण आळा हरेक प्राणी मर ग्या ।

4 अर तीसरै सुर्गदूत नै अपणा कटोरा नदियां, अर पाणी के चोवां पै उंडेल दिया, अर वो लहू बणग्या ।

5 फेर मन्नै पाणी के अधिकारी सुर्गदूत ताहीं न्यू कहन्दे सुण्या,, के हे पवित्र, जो सै, अर जो था, तू न्यायी सै, अर तन्नै यो न्याय करया ।

6 क्यूँके उननै पवित्र माणसां, अर नबियाँ का लहू बहाया था, इस करके तन्नै उनतै लहू पियाया, क्यूँके वे इस्से जोगगे सै ।

7 दुबारा मन्नै वेदी तै यो शब्द सुण्या, के हाँ! हे सर्वशक्तिमान प्रभु परमेसवर, तेरे फैसले सही अर सच्चे सै ।

8 अर चौथे सुर्गदूत नै अपणा कटोरा सूरज पै उंडेल दिया, तो सूरज ताहीं यो हक दिया गया के वो माणसां नै अपणी गर्मी तै झुलसा दे ।

9 अर माणस घणी तपण तै झुळसगे, अर वे परमेसवर के नाम की, जिन ताहीं इन मुसीबतां पै हक सै, उस ताहीं श्राप देण लागगे, अर ना ए पाप करणा छोडचा, ना उसकी महिमा करी ।

10 अर पाँचमै सुर्गदूत नै अपणा कटोरा उस पशु के सिंहासन पै उंडेल दिया अर उसके राज्य पै अन्धेरा छाग्या, अर माणस दर्द के मारे अपणी-अपणी जीभ चबाण लागगे ।

11 अर अपणे दर्दा अर फोड़यां के कारण सुर्ग के परमेसवर की बुराई करी, अर अपणे-अपणे बुरे काम्मां ताहीं करणा न्ही छोडचा ।

12 अर छटमै सुर्गदूत नै अपणा कटोरा बड़डी नदी फरात पै उंडेल दिया, अर उसका पाणी सूख गया, ताके पूरब दिशा के राजयां के खात्तर राह त्यार हो जावै ।

13 अर मन्नै उस अजगर के मुँह म्ह तै, अर उस पशु के मुँह म्ह तै, अर उस झूट्टे नबी के मुँह म्ह तै तीन भुंडी ओपरी आत्मायाँ ताहीं मेंदकां के रूप म्ह लिकड़दे देख्या ।

14 ये चमत्कार दिखान आळी भोत सी भुंडी ओपरी आत्मा सै, जो साब्की दुनिया के राजयां के धौरै तै लिकड़के ज्यातै जावै सै, के उन ताहीं सर्वशक्तिमान परमेसवर के उस बड़े दिन की लड़ाई के खात्तर कट्टे करै ।

15 अर देख्वां, मेरा आणा एक चोर की ढाळ होगा जो चुपके तै आवै सै, धन्य वो सै, जो जागदा रहवै सै, अर अपणे लत्यां की चौकसी करै सै, के उघाड़ा कोनी हाँडे, अर माणस उसका उघाड़ापण ना देख पावै ।

16 अर उन भुंडी ओपरी आत्मायाँ नै सारे राजा ताहीं उस जगहां कट्टा करया, जो इब्रानी म्ह हर-मगिदोन कुह्वावै सै।

17 अर सातमै सुर्गदूत नै अपना कटोरा हवा पै उंडेल दिया, अर मन्दर के सिंहासन तै यो बड़ड़ा शब्द होया, के, हो चुक्या।

18 फेर विजलियाँ, अर शब्द, अर गरजण होए, अर एक इसा बड़ड़ा हाल्लण होया, के जिब तै माणस धरती पै बणाया गया, जद तै इसा बड़ड़ा हाल्लण कदे न्ही होया था।

19 अर उस बड़े नगर के तीन टुकड़े होंगे, अर देश-देश के नगर पड़गे, क्यूँके परमेसवर नै बेबीलोन नगर के माणसां ताहीं दण्ड देण का अपना वादा पूरा करया, अर यो इसा होगा जिसा मान्नों के वो अपने छो की जळण की मदिरा उननै प्याणा।

20 अर हरेक टापू अपनी जगहां तै टळ गया, अर पहाड़ां का बेरा न्ही पाटया।

21 अकास तै माणसां पै मण-मण के बड़े ओळे पड़े, अर इस करके के या बिप्दा घणीए भारया थी, लोगां नै ओळयां की बिप्दा के कारण परमेसवर की बुराई करी।

## 17

### CHAPTER 17

1 अर जिन सात सुर्गदूतां कै धौरै वे सात कटोरे थे, उन म्ह तै एक नै आके मेरै तै न्यू कह्या, के उरै आ, मै तन्नै उस बेश्या का दण्ड दिखाऊँ, जो घणेए पाणी पै बेट्टी सै।

2 जिसके गेल्या धरती के राजयां नै जारी करी, अर धरती के बासिन्दे उसकी जारी की मदिरा तै मतवाले होंगे थे।

3 फेर सुर्गदूत मेरी आत्मा नै एक जंगल-वियावान म्ह लेग्या, ओड़ै मन्नै एक जनानी ताहीं लाल रंग के एक पशु पै बेट्टे देख्या, वो पशु परमेसवर की बुराई करण आळे शब्दां तै ढक्या होइ था, अर इसके सात सिर अर दस सींग थे।

4 या जनानी बैजनी, अर लाल रंग के लत्ते पैहर-री थी, अर सोन्ने अर घणी कीमती मणियाँ अर मोतियाँ के गहणा तै सजी होइ थी, अर उसके हाथ्यां म्ह एक सोन्ने का कटोरा था जो अश्लीलता की घृणित चिज्जां तै अर उसकी जारी की भुंडी चिज्जां तै भरया होइ था।

5 अर उसके माथ्ये पै एक रहस्यमय नाम लिख्या था, “बड़ड़ा बेबीलोन धरती की बेशयायाँ अर घृणित चिज्जां की माँ, अर सारी अश्लीलता नै जन्म देण आळी।”

6 अर मन्नै उस जनानी ताहीं पवित्त्र माणसां कै लहू अर यीशु के गवाहां कै लहू पीण म्ह मतवाली देख्या अर उस ताहीं देखके मै हैरान होग्या।

7 उस सुर्गदूत नै मेरै तै कह्या, “तू क्यातै हैरान होया?” मै इस जनानी, अर उस पशु का, जिसपै वा चढ़री सै, अर जिसके सात सिर अर दस सींग सै, उसका तेरे ताहीं भेद बताऊँ सूँ।

8 जो पशु तन्नै देख्या सै, यो पैहल्या तो था, पर इब न्ही सै, अर घणे अथाह कुण्ड तै लिकड़के विनाश म्ह पड़ेगा, अर धरती के बासिन्दे जिनके नाम दुनिया के बखत तै जीवन की किताब म्ह लिक्खे न्ही गये सै, इस पशु की या हाल्लत देखके अचम्भा करैंगे, के पैहल्या था, अर इब कोनी, पर यो दुबारा आवैगा।

9 यो समझाण कै खात्तर के एक ज्ञान्नी मन जरूरी सै: वे सात्तु सिर सात पहाड़ सै, जिनपै वा जनानी बेट्टी सै।

10 अर वे सात राजा भी सै, पाँच तो मर लिये सै, अर एक वाक्की सै, अर एक इब ताहीं आया कोनी, अर जिब आवैगा, तो कुछ बखत ताहीं उसका रहणा भी जरूरी सै।

11 अर जो पशु पैहल्या था, अर इब न्ही, वो खुद आठमां राजा सै, अर उन सात्तुआ म्ह तै सै, जिसका विनाश तय सै।

12 अर जो दस सींग तन्नै देखके सै, वे दस राज्जे सै, जिननै इब ताहीं राज्य न्ही मिल्या, पर उस पशु कै गेल्या थोड़े-से बखत खात्तर राजयां बरगा हक दिया जावैगा।

13 ये सारे एक मन होवेंगे, वे अपनी-अपनी सामर्थ्य अर हक उस पशु ताहीं देवेंगे ।

14 ये मेन्ने गैल लड़ेंगे, अर मेन्ना उनतै जीत जावैगा, क्यूँके वो प्रभुओं का प्रभु, अर राजया का राजा सै: अर जो बुलाए होइ, चुणे होइ, अर बिशवासी उसके गैल सै, वे भी जीत पावेंगे ।

15 फेर उसनै मेरै तै कह्या, के जो पाणी तन्नै देख्या, जिनपै बेश्या बेट्टी सै, वो देश, माणस, जात्ति, अर भाषा सै ।

16 अर जो दस सींग तन्नै देख्के, वे अर पशु उस बेश्या तै बैर राक्खेंगे, अर उस ताहीं लाचार अर उघाड़ी कर देवेंगे, अर उसका माँस खा जावेंगे, अर उस ताहीं आग म्ह जळा देवेंगे ।

17-18 वा जनानी, जिसनै तू देख्के सै, वो बड़्ठा नगर सै, जो धरती के राजयां पै राज करै सै । ये सब बात उसके गैल होवैगी, क्यूँके यो परमेसवर ही सै, जो अपने मकसद नै पूरा करण खात्तर उनके मन नै उकसावैगा, ताके वे उसकी मनसा पूरी करै, योए कारण सै के वो अपना हक पशु ताहीं राज करण खात्तर दे देंगे, जब तक के परमेसवर नै जो कह्या सै वो पूरा ना हो ले ।

## 18



1 इसकै बाद मन्नै एक और सुगंदूत ताहीं सुगं तै उतरदे देख्या, जिसकै धोरै बड़्ठा अधिकार था, अर धरती उसके तेज तै चमक गयी ।

2 उसनै जोर तै रुक्का मारके कह्या, पड़ग्या, बड़्ठा बेबीलोन नगर पड़ग्या सै, अर भुंडी ओपरी आत्मयाँ का घर, हरेक भुंडी आत्मा का बसेरा, एक अशुद्ध अर घृणित पंछी का बसेरा होग्या ।

3 यो इस कारण होवैगा क्यूँके बेबीलोन नगर उस बिरबान्नी की तरियां सै, जिसकी जारी की डरावणी मदिरा के कारण सारी जात पड़गी सै, अर धरती के राजयां नै उसके गेल्या जारी करी सै, अर धरती के व्यापारी उसके भोग-विलास के धन के कारण साहूकार होए सै ।

4 फेर मन्नै सुगं तै किसे और का बोल सुण्या, के हे मेरे माणसों, उस म्ह तै लिकड़ आओ, के थम उसके पापां म्ह साइझी न्ही होओं, अर उसकी मुसीबतां म्ह तै कोए मुसीबत थारे पै ना आण पड़े ।

5 क्यूँके उसके पाप सुगं ताहीं पोंहोचगे सै, अर उसके अधर्म परमेसवर नै याद आये सै ।

6 जिसा उसनै थारे ताहीं दिया सै, उससे तरियां ए उस ताहीं भी भर द्यो, अर उसके काम्मां के मुताबिक उस ताहीं दो गुणा बदला द्यो, जिस कटोरे म्ह उसनै भर दिया था उससे म्ह उसके खात्तर दो गुणा भर द्यो ।

7 जितनी उसनै अपनी बड़ाई करी अर सुख-विलास करया, थम भी उसनै उतनाए दुख अर दर्द द्यो, क्यूँके वा अपने मन म्ह कहवै सै, मै राणी के सामान बण बेट्टी सूं, मै बिधवा कोनी, अर ना ए कदे विलाप करूँगी ।

8 इस करके एक ए दिन उसके अंहकार के कारण उसपै बिपदा आण पड़ैगी, यानिके मौत, दुख, अकाळ, अर वा आग म्ह भस्म कर दी जावैगी, क्यूँके उसका न्याय करण आळा प्रभु परमेसवर शक्तिशाळी सै ।

9 अर धरती के राजा जिननै उसके गेल्या जारी, अर भोगविलास करया, जब उसके जळण का धुम्मा देखेंगे, तो उसके खात्तर रोवेंगे, अर छात्ती पीट्टेंगे ।

10 अर उसके दर्द के डर नै याद करके दूर खड़े होके कहवेंगे, हाय! हाय! हे बड़े नगर, बेबीलोन, हे शक्तिशाली नगर, थोड़ी-ए देर म्ह तेरे पै दण्ड आ लेवैगा ।

11 अर धरती के व्यापारी उसके खात्तर रोवेंगे अर कळपेंगे, क्यूँके इब कोए उनकी ये चीज मोल लेण आळा कोन्या रह्या ।

12 उन धोरै भोत सारी चीज थी यानिके सोन्ना, चान्दी, रत्न, मोती, अर मलमल, बैजनी, रेशमी, लाल रंग लत्ते, अर हरेक ढाळ की खसबूदार लाकड़ी, अर हाथी दाँत की हरेक ढाळ की चीज, घणी कीमती लाकड़ी, पीतळ, लोहा, अर संगमरमर के सारे ढाळ के बरतन ।

13 अर दालचीनी, मसाले, धूप, गन्धरस, लोबान, अंगूर का रस, तेल, मैदा, गेहूँ, गाऊँ, बळध, भेड़, बकरियाँ, घोड़े, रथ, गुलाम, अर माणसां के पूराण का कोए खरीदार कोनी रह्या।

14 व्यापारी उस ताहीं कहवैगें, के जिन चिज्जां की तन्नै इच्छा करी थी, इब वा कोनी रही, अर एणो-आराम अर शोहरत की चीज तेरे तै दूर होई सै, अर वे कदे भी न्ही मिलैगी।

15 इन चिज्जां के व्यापारी जो उसके जरिये साहूकार होंगे थे, उसके दर्द के डर नै याद करके दूर खड़े होके रोन्दे अर कळपदे होए कहवैगें,

16 “हाय! हाय! यो बड़ड़ा नगर जो मलमल, अर बैजनी, अर लाल रंग के लत्ते पहरे था, अर सोन्ने, अर रत्नां, अर मोतियाँ तै सज्या था,

17 थोड़ी-ए देर म्ह उसका इसा सारा धन नाश होग्या, अर हरेक माँझी, अर पाणी म्ह सफर करणीया, किस्ती चलाणीए, अर जितने समुन्दर तै कमावै सै, सारे दूर खड़े होके।”

18 अर उस नगर के जळण का धुम्मा देखदे होए रुक्का मारके कहवैगें, “कौण सा नगर इस बड़े नगर के जिसा सै?”

19 अर अपणे-अपणे सिरां पै धूळ गरैगें, अर रोन्दे होए अर कळपदे होए किल्की मार-मारके कहवैगें, के, हाय! हाय! यो बड़ड़ा नगर जिसकी सम्पत्ति के जरिये समुन्दर के सारे जहाज आळे साहूकार होंगे थे, इब थोड़ी-ए देर म्ह तू उजड़ ग्या।

20 हे थम जो सुगं म्ह रहण आळे, अर हे पवित्र माणसां, प्रेरितों, अर नबियों, जो उसके गैल होया सै, इस कारण थम खुशी मनाओ, क्यूँके परमेसवर नै बेबीलोन नगर ताहीं दण्ड देके उसतै धारा बदला लिया सै।

21 फेर एक ताकतवर सुगंदूत नै बड़डी चाक्की के पाट जिसा पत्थर ठाया, अर न्यू कहके समुन्दर म्ह बगा दिया, के, “बड़ड़ा नगर बेबीलोन इस्से ढाळ घणी ताकत तै गिराया जावैगा, अर फेर कदे भी उसका बेरा न्ही पाट्टैगा।

22 अर बेबीलोन नगर म्ह गायक, वीणा बजाण आळे, बाँसुरी बजाण आळे, अर तुरही फूकण आळा का शब्द फेर कदे भी तन्नै सुणाई न्ही देवैगा, अर किसे काम का भी कोए कारीगर तन्नै कदे न्ही मिलैगा, अर चाक्की के चाल्लण का शब्द फेर कदे भी तन्नै न्ही सुणैगा।

23 अर दीवै का चाँदणा फेर कदे भी तेरे म्ह न्ही चमकैगा, अर बन्दड़ा-बन्दड़ी का शब्द फेर कदे भी तन्नै सुणाई न्ही देवैगा, क्यूँके तेरे व्यापारी धरती के प्रधान थे, अर तेरे जादू-टूण तै सारी जात भकाई गई थी।

24 परमेसवर बेबीलोन नगर ताहीं इस कारण सजा देवैगा, क्यूँके नबियाँ, पवित्र माणसां, अर धरती पै सारे घात करे होया का लहू उस्से म्ह पाया गया सै।”

## 19

1 इसके बाद मन्नै सुगं म्ह मान्नी भीड़ ताहीं जोर तै न्यू कहन्दे सुण्या, के, हालेलूय्याह! उद्धार, महिमा, अर सामर्थ, म्हारै परमेसवर ए की सै।

2 क्यूँके उसका न्याय सच्चा अर सही सै, ज्यातै के उसनै उस बड़डी बेश्या का जो अपणी जारी तै धरती के माणसां तै पाप करवाण लागरी थी, परमेसवर नै उस ताहीं दण्ड देके अपणे दास्तां के लहू का बदला लिया सै।

3 फेर दुसरी बर उननै कहा, हालेलूय्याह! अर बेबीलोन नगर के जळण का धुम्मा युगानुयुग उठदा रहवैगा।

4 सब चौबीस बुजुर्ग अर च्यारु प्राणियाँ नै झुकके परमेसवर ताहीं प्रणाम करया, जो सिंहासन पै बैठचा था, अर कहा, “आमीन! हालेलूय्याह!”



5 अर सिंहासन म्ह तै मन्नै एक आवाज सुणाई दी, के, हे म्हारे परमेसवर तै सारे डरण आळे दासां, के छोट्टे, के बड़े, थम सारे उसकी जै-जै कार करो।

6 फेर मन्ने बड़्डी भीड़ का शोर सुनाई दिया, यो भोत घणे पाणी अर जबरदस्त गड़गड़ाहट बरगा शब्द था, हालेलूथ्याह! परभु म्हारा परमेसवर, सर्वशक्तिमान राज्य करै सै।

7 आओ, हम खुश अर मगन होवां, अर उसकी जै-जै कार करा, क्यूँके मेम्ने का ब्याह आण पोहोचा, अर उसकी बन्दड़ी नै अपणे-आप ताहीं त्यार कर लिया सै।

8 अर उस ताहीं शुद्ध अर चमकदार सुथरे मलमल नै पैहरण का हक दिया गया, क्यूँके उस सुथरे मलमल का मतलब पवित्र माणसां के धर्म के काम सै।

9 अर सुगंदूत नै मेरै तै कह्या, न्यू लिख, के, धन्य वे सै, जो मेम्ने के ब्याह के भोज म्ह न्योदे गये सै, फेर उसनै मेरै तै कह्या, ये परमेसवर की कही गई सच्ची बात सै।

10 अर मै उसनै पूज्जण के खात्तर उसके पायां के म्ह पड़ग्या, उसनै मेरै तै कह्या, “देख, इसा मतना करै, मै तेरे अर तेरे भाईयाँ की तरियां ए दास सुं, जो यीशु की गवाही देण पै अटल सै, परमेसवर नै ए पूज, क्यूँके यीशु की गवाही भविष्यवाणी की आत्मा सै।”



11 फेर मन्ने सुर्ग ताहीं खुल्या होइ देख्या, अर के देक्वूँ सुं, के एक धोळा घोड़ा सै, अर उसपै एक सवार सै, जो बिश्वास जोगगा, अर सच्चा कुह्वावै सै, अर वो धर्म के साथ न्याय अर लड़ाई करै सै।

12 उसकी आँख आग की लपट की तरियां थी, अर उसके सिर पै भोत-से मुकुट थे, अर उसके माथ्यै पै एक नाम लिख्या था, जिस ताहीं उसनै छोड़े और कोए न्ही जाणै था।

13 अर उसनै लहू म्ह डबोया होइ बाणा पैहरे राख्या था, अर उसका नाम परमेसवर का वचन था।

14 अर सुर्ग की पलटन धोळे घोड्या पै चढ़कै अर धोळा अर शुद्ध मलमल के लत्ते पैहरे होइ उसके पाच्छै-पाच्छै चाल्लण लागरी थी।

15 अर हरेक देश के माणसां ताहीं मारण के खात्तर, उसके मुँह तै एक पैन्ही तलवार लिकडै थी, अर वो लोहवै का राजदण्ड लिए होइ उनपै राज करैगा, अर वो सर्वशक्तिमान परमेसवर के छो की जलन की मदिरा के कुण्ड म्ह अंगुरां नै रौदेगा।

16 अर उसके लत्ते अर जाँघ पै यो नाम लिख्या था, राजयां का राजा अर परभुओं का परभु।

17 फेर मन्ने एक सुगंदूत ताहीं सूरज पै खड्या देख्या, अर उसनै जोर तै रुक्का मारकै अकास म्ह उड़ण आळे सारे पंछियाँ तै कह्या, “आओ, परमेसवर के बड़े भोज के खात्तर कट्टे हो जाओ।


18 ताके थम राजा, प्रधान, ताकतवर माणसां का, घोड्या का, उनके सवारां का, अर सारे ढाल के आजाद, गुलाम, छोटे, बड़े, सारे माणसां का माँस खा सको।”

19 फेर मन्ने उस पशु जो समुन्दर म्ह तै लिकड्या था, धरती के राजयां अर उनकी पलटन ताहीं उस धोळे घोड़े के सवार, अर उसकी पलटन तै लड़ण के खात्तर कट्टे देख्या।

20 अर वो पशु अर उसके गेल्या वो झूट्टा नबी पकड्या गया, जिसनै उसके स्याम्ही इसे चमत्कार दिखाए थे, जिनकै जरिये उसनै उन ताहीं भकाया, जिन नै उस पशु की छाप ली थी, अर जो उसकी मूर्ति की पूजा करै थे, ये दोन्नु जिन्दे जी उस आग की झील म्ह जो गन्धक तै जळै सै, गेरे गये।

21 बाक्की लोग उस घोड़े की तलवार तै, जो उसके मुँह तै लिकडै थी, मार दिए गये, अर सारे पंछी उनके माँस तै छिकगे।

## 20



1 फेर मन्ने एक सुगंदूत ताहीं सुर्ग तै उतरदे देख्या, जिसके हाथ म्ह अथाह कुण्ड की ताळी, अर एक बड़्डी बेल थी।

2 अर उसनै उस अजगर, यानिके पुराणे साँप ताहीं, जो इक्कीस अर शैतान सै, पकड़कै हजार साल के खात्तर बाँध दिया।

3 अर उस ताहीं अथाह कुण्ड म्ह गेर कै मूंद दिया, अर उसपै मोहर ला दी, ताके वो हजार साल के पूरे होण तक देश-देश के माणसां ताहीं दुबारा न्ही भका सकै, यो सब होण के बाद यो जरूरी सै, के थोड़ी देर खात्तर वो दुबारा खोल्या जावैगा।

4 फेर मन्ने सिंहासनां पै कई माणसां ताहीं बेट्टे देख्या, अर उन ताहीं न्याय करण का हक दिया गया, अर फेर मन्ने उन माणसां की आत्मा ताहीं भी देख्या, जिनके सिर यीशु की गवाही देण अर परमेसवर के वचन के कारण धड़ तै अलग करे गये थे। उननै उस पशु अर उसकी मूर्ति की पूजा कोनी करी थी, अर ना उसकी छाप अपने माथ्यै अर हाथ्यां पै ली थी, वे जिन्दा होकै मसीह के गेल्या हजार साल ताहीं राज करदे रहे।

5 जब तक ये हजार साल पूरे न्ही होए तब तक बाकी मरे होए जिन्दा न्ही होए, यो तो पैहला पुनरुत्थान सै।

6 धन्य अर पवित्र सै वो माणस, जो इस पैहलडे पुनरुत्थान\* म्ह शामिल होवैगा, इस्यां पै दुसरी मौत का किमे भी हक कोन्या, पर वे परमेसवर अर मसीह के याजक होंगे, अर उसके गैल हजार साल ताहीं राज्य करेंगे।

### \*\*\*\*\*

7 अर जब हजार साल पूरे हो लेंगे, तो शैतान कैद तै छोड़ दिया जावैगा।

8 अर उन जात्तां ताहीं जो धरती कै चौगरदेकै होंगी, यानिके गोग अर मगोग जिनकी गिणती समुन्दर की बाळू के बराबर होगी, उन ताहीं भकाकै, कट्टे करकै लड़ाई करण खात्तर लिकड़ैगा।

9 वे साब्की धरती पै फैल जावैगी, अर पवित्र माणसां की छावणी अर प्यारे नगर नै घेर लेवैगी, पर सुर्ग म्ह परमेसवर की आग उतरकै उसकी सारी पलटन ताहीं भस्म कर देवैगी।

10 अर उनका भकाण आळा शैतान आग अर गन्धक की उस झील म्ह गेर दिया, जिस म्ह वो पशु अर झूट्टा नबी भी होगा, अर वे दिन-रात युगानुयुग दर्द तै तड़पदे रहवैगें।

### \*\*\*\*\*

11 फेर मन्ने एक बड़ड़ा धोळा सिंहासन अर उसपै बेट्टे होए परमेसवर ताहीं देख्या, जिसकै स्याम्ही तै धरती अर अकास भाजगे, अर उसके बाद वे दिखाई न्ही दिए।

12 फेर मन्ने छोट्टे-बड़े सारे मरे होया ताहीं परमेसवर के सिंहासन कै स्याम्ही खडे होए देख्या, अर किताबें खोल्ली गई, अर फेर एक और किताब खोल्ली गई, यानिके जीवन की किताब। मरे होया का न्याय उनके काम्मां के मुताबिक करया गया, जिनका बयान इन किताबां म्ह लिख्या होइ था।

13 अर समुन्दर नै उन मरे होए माणसां ताहीं उगळ दिया, जो उस म्ह थे, अर मौत अर अधोलोक नै भी उन मरे होए माणसां ताहीं उगळ दिया, जो उस म्ह थे, अर हरेक का न्याय उनके काम्मां के मुताबिक करया गया।

14 मौत अर अधोलोक भी आग की झील म्ह गेरे गये, या आग की झील ए दुसरी मौत सै।

15 अर जिस किसे का नाम जीवन की किताब म्ह लिख्या होया न्ही मिल्या, वो आग की झील म्ह गेर दिया गया।

## 21

### \*\*\*\*\*

1 फेर मन्ने नये अकास अर नयी धरती ताहीं देख्या, क्यूँके पैहला अकास अर पैहली धरती खतम हो ली थी, अर समुन्दर भी न्ही रहया।

2 फेर मन्ने पवित्र नगर नये यरुशलेम ताहीं सुर्ग पै तै, परमेसवर के धोरै तै उतरदे देख्या, अर वो नगर उस बन्दड़ी की तरियां था, जो अपने बन्दड़े खात्तर सिंगार करकै सिंगरी हो सै।

\* 20:6 20:6 पुनरुत्थान दुबारा जी उठणा



3 फेर मन्नै सिंहासन म्ह तै किसे ताहीं जोर तै न्यू कहन्दे सुण्या, के, देख, आज तै ए परमेसवर का डेरा माणसां के बिचाळे होवैगा, वो उनके गेल्या वास करैगा, अर वे उसके माणस होंगे, अर परमेसवर खुद उनके गेल्या रहवैगा, अर वो उनका परमेसवर होगा।

4 अर वो उनकी आँखां तै सारे आँसू पुंज देवैगा, अर इसके बाद ना मौत, ना दुख, ना विलाप, अर ना दर्द रहवैगा, क्यूँके पुराणी बात बीत ली सै।

5 अर जो सिंहासन पै बेटचा था, उसनै कह्या, के देख, इब मै नई सुष्टि की रचना करण लागरया सूं, फेर उसनै कह्या, के लिख ले, क्यूँके जो कुछ कह्या जाण लागरया सै, जो मै कहण लागरया सूं, तू उसपै बिश्वास कर सके सै, क्यूँके यो पक्का होवैगा।

6 फेर उसनै मेरै तै कह्या, “सब कुछ पूरा होगया सै, मै अल्फा अर ओमेगा, आदि अर अन्त सूं। जो तिसाए सै मै उन ताहीं उस पाणी के चोवै म्ह तै जो अनन्त जिन्दगी देवै सै उस ताहीं मुफ्त म्ह प्याऊँगा।

7 जो बुराई की ताकतां पै जीत पावै, वोए ये सारी आशीष मेरे तै पावैगा, अर मै उसका परमेसवर होऊँगा, अर वो मेरा बेटटा होगा।

8 पर डरपोक, अबिश्वासी, घिनीणे, हत्यारे, जार, जादू-टूणे करणीये, मूर्ति पूजणीये, अर सारे झूठे माणसां का भाग उस झील म्ह मिलैगा, जो आग अर गन्धक तै जळदी रहवै सै, या दुसरी मौत सै।”

### ??????????

9 फेर जिन सात सुगंदूत के धोरै आखरी सात मुसीबतां तै भरे होइ कटोर थे, उन म्ह तै एक मेरै धोरै आया, अर मेरै गेल्या बात करके कह्या, “उरै आ मै तन्नै बन्दड़ी यानिके मेम्ने की घरआळी दिखाऊँगा।”

10 अर वो मन्नै आत्मा म्ह, एक बड़े अर ऊँचे पहाड़ पै लेगया, अर पवित्तर नगर यरुशलेम ताहीं सुर्ग पै तै परमेसवर के धोरै उतरदे दिखाया।

11 परमेसवर की महिमा उस म्ह थी, अर उसकी चमक बेसकिमती पत्थर पारस के समान अर पन्ने की ढाळ सुथरी थी।

12 अर उसकी चारदीवारी घणी ऊँची थी, अर उसके बारहा फाटक अर फाटकां पै बारहा सुगंदूत थे, अर उनपै इस्राएलियाँ के बारहा गोत्रां के नाम लिक्खे थे।

13 पूरब कान्ही तीन फाटक, उत्तर कान्ही तीन फाटक, दक्खिन कान्ही तीन फाटक, अर पश्चिम कान्ही तीन फाटक थे।

14 अर नगर की चारदीवारी की बारहा नीम थी, अर उनपै मेम्ने के बारहा प्रेरितां के बारहा नाम लिक्खे होइ थे।

15 अर जो सुगंदूत मेरै गेल्या बात करण लागरया था, उसके धोरै नगर, उसके फाटकां अर उसकी चारदीवारी ताहीं नाप्पण के खात्तर एक सोन्ने का सरकण्डा दिया गया था।

16 अर वो नगर चकोर बस्या होइ था, अर उसकी लम्बाई अर चौड़ाई एक सी थी, अर उसनै उस सरकण्डे तै नगर ताहीं नाप्या, तो साढ़े सात सौ कोस का लिकडया, उसकी लम्बाई, चौड़ाई, अर ऊँचाई एक सी थी।

17 अर उसनै उसकी चारदीवारी ताहीं माणस के, यानिके सुगंदूत के नाप तै नाप्या, तो छियासठ मीटर लिकडी।

18 अर उसकी चारदीवारी म्ह पन्ने जड़े थे, अर नगर इसे शुद्ध सोन्ने का था, जो कती शीशे बरगा साफ था।

19 अर उस नगर की नीम हरेक ढाळ के घणे महँगे पत्थरां तै सजाई होइ थी, पैहल्डी नीम पन्ने की थी, दुसरी नीलमणि की, तीसरी लालड़ी की, चौथी मरकत की।

20 पाँचमी गोमेदक की, छटी माणिक्य की, सातमी पीतमणि की, आठमी पेरोज की, नौम्मी पुखराज की, दसमी लहसनिए की, ग्यारमी धूम्रकान्त की, बाहरमी याकूत की।

21 अर बारहों फाटक, बारहा मोतियाँ के थे, एक-एक फाटक, एक-एक मोत्ती का बणया होइ था, अर नगर की सड़क साफ-सुथरे काँच के जिसे शुद्ध सोन्ने की थी।

22 अर मन्ने उस म्ह कोए मन्दर न्ही देख्या, क्यूँके सर्वशक्तिमान प्रभु परमेसवर, अर मेम्ना उसका मन्दर सै।

23 अर उस नगर म्ह सूरज अर चाँद के चाँदणे की जरूरत कोनी, क्यूँके परमेसवर के तेज तै उस म्ह चाँदणा होरया सै, अर मेम्ना उसका दीवा सै।

24 अर हरेक देश के माणस उसके चाँदणे म्ह चाल्लै-फिरैगे, अर धरती के राजा अपणी शानों-शोकत उस म्ह ल्यावैगे।

25 अर उसके फाटक दिन म्ह कदे भी न्ही मूदे जावैगे, अर ओडै रात न्ही होगी।

26 अर हरेक देश के माणस अपणी शानों-शोकत उस म्ह ल्यावैगे।

27 पर उस नगर म्ह कोए अशुद्ध चीज, या घृणित काम करण आळा, या झूठ का गढ़नआळा किसे भी तरियाँ तै उस म्ह दाखल न्ही हो पावैगा, पर सिर्फ वे लोग दाखल होवैगे जिनके नाम मेम्ने की जीवन की किताब म्ह लिक्खे सै।

## 22

1 फेर सुर्गदूत नै मेरै ताहीं पाणी दिखाया जो जीवन देण आळा पाणी कहलावै सै, अर वो पाणी शीशे की तरियाँ साफ था, अर उसका चोवां परमेसवर का सिंहासन सै, जो के मेम्ने का भी सिंहासन सै।

2 वो नदी नगर के बीचों बीच सड़क के बिचाळै बहवै थी। अर नदी के इस पार, अर उस पार, उसके दोन्नु किनारों पै जीवन का दरखत था, जो जीवन देवै सै, उस म्ह बारहा ढाळ के फळ लागी थे, अर वो हरेक महिन्ने फळ ल्यावै था, अर उस दरखत के पत्त्याँ तै हरेक देश के माणस चंगे होवै थे।

3 अर फेर कोए श्राप न्ही होगा। परमेसवर अर मेम्ने का सिंहासन उस नगर म्ह होगा, अर उसके दास उसकी सेवा करैंगे।

4 अर वे परमेसवर ताहीं आम्ही-स्याम्ही देखैंगे, अर परमेसवर का नाम उनके माथ्याँ पै लिख्या होया होगा।

5 अर फेर कदे रात न्ही होगी, अर ना ए उन ताहीं दीवै अर सूरज के चाँदणे की जरूरत होगी, क्यूँके प्रभु परमेसवर उन ताहीं चाँदणा देवैगा, अर वे युगानुयुग राज करैंगे।

### परमेश्वर का आदेश

6 फेर सुर्गदूत नै मेरै तै कह्या, “जो मै कहण लागरया सूँ, तू उसपै विश्वास कर सके सै, क्यूँके यो पक्का होवैगा, अर प्रभु जो नबियाँ की आत्मायाँ का परमेसवर सै, अपने सुर्गदूत ताहीं ज्याँतै भेज्या, के अपने दास्साँ ताहीं वे बात जिनका तावळा पूरा होणा जरूरी सै दिखावै।”

7 देख, मै तावळा आण आळा सूँ, धन्य सै वो, जो इस किताब की भविष्यवाणी की बातताँ नै मान्ने सै।

8 मै वोए यूहन्ना सूँ, जो ये बात सुणै, अर देखवै था, अर जब मन्ने सुणया, अर देख्या, तो जो सुर्गदूत मन्ने ये बात दिखावै था, मै उसके पायाँ म्ह प्रणाम करण के खात्तर मोध्था पड़गया।

9 अर उसनै मेरै तै कह्या, “देख, इस ढाळ मतना करै, क्यूँके मै तेरा अर तेरे भाई नबियाँ का अर इस भविष्यवाणी की अर इस किताब की बातताँ के मानण आळा का जोड़ीदार दास सूँ, परमेसवर नै ए पूज।”

10 फेर उसनै मेरै तै कह्या, “इस किताब की भविष्यवाणी की बातताँ ताहीं बन्द मतना करै, क्यूँके बखत आ लिया सै।

11 जो जुल्म करै सै, वो जुल्म ए करदा रहवै, अर जो बुरा सै, वो बुरा बणया रहवै, अर जो धर्मी सै, वो धर्मी बणया रहवै, अर जो पवित्तर सै, वो पवित्तर बणया रहवै।”

12 लखा, मै तावळा-ए आण आळा सूँ, अर हरेक के काम के मुताबिक बदला देण के खात्तर प्रतिक्रम मेरै धरै सै।

13 मै अल्फा अर ओमेगा, पैहला अर आखरी, आदि अर अन्त सू ।

14 धन्य वे सै, जो अपणे लत्ते धो लेवै सै, क्यूँके उन ताहीं जीवन के दरखत के लोवै आण का हक मिलैगा, अर वे फाटकां तै हो के नगर म्ह दाखल होवैगे ।

15 पर कुत्ते, अर जाद्-टूणा करणीये, जार, हत्यारे, मूर्ति पूजणीया, हरेक झूठ का चाहण आळा, अर झूठ गढ़ण आळा बाहरणै रहवैगा ।

16 मुझ यीशु नै अपणे सुर्गदूत ताहीं ज्यांतै भेज्या सै, ताके थारे आगँ कलीसियाओं के बारै म्ह इन बात्तां की गवाही दियु, मै दाऊद का मूल, अर वंश, अर भोर का चमकदा होड तारा सू ।

17 अर आत्मा, अर बन्दड़ी दोन्नु कहवै सै, “आ!” अर सुणण आळा भी कहवै, के “आ!” अर जो तिसाया हो, वो आवै अर जो कोए चाहवै वो जीवन का पाणी मुफ्त म्ह ले ।



18 मै हरक ताहीं जो इस किताब की भविष्यवाणी की बात सुणै सै, गवाही दियुँ सू, के जै कोए माणस इन बात्तां म्ह किमे बधावै, तो परमेसवर उन मुसीबतां ताहीं जो इस किताब म्ह लिक्खी सै, उसपै बढावैगा ।

19 अर जै कोए इस भविष्यवाणी की किताब की बात्तां म्ह तै किमे लिकाड़ै, तो परमेसवर उस जीवन के दरखत अर पवित्र नगर म्ह तै जिसका जिक्र इस किताब म्ह सै, उसका हिस्सा लिकाड़ देवैगा ।

20 जो इन बात्तां की गवाही देवै सै, वो न्यू कहवै सै, “हाँ, मै तावळा आण आळा सू, आमीन । हे प्रभु यीशु आ!”

21 प्रभु यीशु का अनुग्रह पवित्र लोगों के गैल रहवै । आमीन ।